

جواد بلا فارس

المقدمة

لن أحبك .. فأنت خارج عالمي
لن أحبك .. فأنت لست فارسي
لن أحبك .. فلا تتعب نفسك معي
أحبك؟! .. هذا آخر مقاصدي
أعشقتك؟! .. بالتأكيد تمزح معي
أتمناك؟! .. أفق من وهمك ووعي
لست كغيري من النساء
فأنا امرأة ذات كبرياء
انحنى فقط لرب السماء
لن تصمد أمام إيماني
لن تدخل أبداً أحلامي
ستموت وأنت تتمناني
ستبكي دماً لفقداني
لن أصبح احدي جواريك
لن أفعل شيئاً يرضيك
لن أفتح قلبي لمعاليك
فسموك لا يرقى لأحلامي
أحلامي رجلاً كيوسف
وأنت بالرجولة لا توصف

بقلمي : بنوثة أسمره

الفصل الأول من رواية جواد بلا فارس



تسللت أشعة الشمس الذهبية لتلقى بنورها على أحد الأبراج السكنية في أحد أحياء القاهرة الراقية .. تلملم "آدم" في الفراش وفتح عينيه بتكاسل .. حانت منه التفاته الى المرأة النائمة بجواره .. أزاح الغطاء ونظر الى ساعة هاتفه .. ثم نهض وخرج من الغرفة وتوجه الى الحمام .. أخذ دشاً ثم وقف أمام مرآة الحمام يزيل بيده بخار الماء الذي ترسب عليها

نظر الى وجهه الوسيم .. وعينيه الزرقاويين الواسعتين التي تدير عقول الفتيات .. وبشرة وجهه الخمرية وشعره الأسود الحريري الذي انسابت بعض خصلاته المتبلله على جبينه .. فأعطته مظهراً جذاباً .. اذا أضيف الي ذلك جسده الرياضي وعضلاته المفتولة إذن فنحن أمام رجل قل من تستطيع مقاومة جاذبيته .. خرج "آدم" من الحمام لافاً منشفة حوله وسطه وأخرى يجفف بها شعره .. عاد الى الغرفة وتناول ملابسه الملقاة على الأرض في اهمال وبدأ في ارتدائها .. وقف أمام مرآة التسريحة يمشط شعره عندما وقعت منه الفرشاة على البلور لتصدر صوتاً مزعجاً .. تلملمت المرأة النائمة في الفراش وفتحت عينها تنظر الى آدم الواقف أمام المرآة .. ابتسمت وهي تحمل قطعة ملابس شفافه ملقاة على طرف السرير لترتديها ثم تتوجه اليه وتلف يدها حول خصره قائلاً : - صباح الخير يا بيبي قال "آدم" بصوت رجولى رخيم : - صباح النور قبلت وجنته

قائله بدلع : - رايح فين على الصبح كده ؟ نظر اليها فى المرآة قائلاً
بسخرية : - هكون رايح فين يعني .. الشغل طبعا قالت بدلال : - طيب
متخليك معايا النهاردة تحرك " آدم " مبتعداً عنها وذهب ليلتقط هاتفه
الموضوع على الأرض بجوار السرير .. ثم قال : - مش هينفع يا
" بوسي " قالت وهى تغادر الغرفة : - طيب استناني هاخذ شاور ونفطر
سوا كان مندمجاً فى مطالعة بريده الالكترونى على الهاتف .. ثم خرج من
الغرفة وحمل جاكيت البدلة الملقى على أحد مقاعد غرفة المعيشة ثم خرج
وأغلق الباب خلفه .. خرجت " بوسي " من الحمام على أثر صوت غلق
الباب لتجد " آدم " قد غادر البيت فزفرت بضيق .. ثم عادت الى الحمام
مرة أخرى .

خرج
" آدم " من البناية الأنيقة وتوجه الى السيارة ذات الموديل الحديث الواقفة
أمامها .. انطلق بالسيارة .. ليتوقف عند احدى الإشارات ينتظر فتحها ..
اخرج سيجاراً من جيبه وأشعله وهو ينفث دخانها بعمق .. حانت منه
التفاته الى السيارة المجاورة .. ليجد الفتاة التى تقود السيارة الواقفة
بجواره تبتمس له .. بادلها ابتسامتها وأخذت نظراته تزداد جراً وخبثاً ..
انطلقت الفتاة فى طريقها بعدما فتحت الإشارة .. سار " آدم " بسيارته
خلفها وهو يبتسم بخبث .. أوقفت الفتاة سيارتها أمام أحد المطاعم وهى
تعى تماماً تتبع " آدم " لها .. دخلت وطلبت فنجاناً من الشاى وجلست على
احدى الطاولات .. دخل " آدم " يبحث بناظريه عنها الى أن وقع نظره
عليها .. كانت فتاة جميلة وترتدى تنوره قصيرة و بلوزه مكشوفة
الذراعين .. توجه الى طاولتها وجلس بدون أى دعوة .. نظرت الفتاة اليه
بنظرات تملأها الإعجاب والدهشة فى نفس الوقت .. قالت بترفع : - أفندم
.. هو حضرتك مش شايفني أعده هنا ؟ قال وهو يعقد ذراعيه فوق الطاولة
ويرمقها بنظرات جريئه : - لا شايفك .. وحسك كمان قالت الفتاة مصطنعه
الجدية : - لو سمحت قوم من هنا عندك التراييزات ماليه المطعم قرب
كرسيه منها بجرأة وهمس لها وهو يرفع حاجبه بثقه : - عجبني المكان
ده ومش هتحرك من هنا ابتسمت الفتاة وقد أعجبتها جرأته وثقته بنفسه
.. حضر النادل يحمل الشاى فطلب منه " آدم " فنجاناً آخر .. قضى مع
الفتاة قرابة الساعة فى التعارف والدردشة وانتهى اللقاء بتبادل أرقام
الهواتف ومضى كل منهما فى طريقه و هو يلوح للآخر مودعاً

رن جرس الهاتف الى أن
انقطع صوته ليعود مرة أخرى يرن بإصرار .. تحركت الفتاة النائمة فى

والى بشرتها الخمرية مائلة للسمره والى شفاهها الرقيقة .. مطت شفثيها فى تبرم .. ثم أخذت كريم الأساس الذى اشترته أفتح درجة من لونها الحقيقى ليضفى عليها لونا أكثر بياضاً وأخذت قلم الحكل لترسم عينيها وتزيد من اتساعهما .. ومررت قلم الروج على شفثيها بطريقة تزيد من سمكهما .. ابتعدت خطوة لتتنظر لنفسها فى المرآة بعين الرضا .. مطت "حليمة" شفثيها فى تبرم قائله :- لو أبوكى شافك كده هيقطم رقابتك التفتت اليها "آيات" بسرعة قائله بلهفه :- هو لسه هنا ؟ قالت "حليمة" :- لا نزل الشركة من بدرى ابتسمت "آيات" وهى تلقى على نفسها نظرة سريعة فى المرآة قائله :- طيب وهيعرف منين توجهت الى حقيبة يدها فى عجاله ووضع فىها هاتفها ثم نظرت الى "حليمة" قائله :- باى يا دادة قالت "حليمة" وهى تشيعها بنظراتها :- مع السلامة يا بنتى نزلت "آيات" درجات الفيلا بسرعة وتوجهت الى الجراج وأخرجت سيارتها لتسير بها بسرعة عالية وسط شوارع القاهرة

معلش يا دكتورة
أصلها كانت تعبانه أوى امبارح وكانت فى المستشفى .. أنا اتصلت بيها وهى زمانها جايه قالت المعيدة وهى تجمع أوراقها لتتصرف :- أنا مليش دعوة بالكلام ده .. الإمتحان له معاد محدد قالت "اسماء" برجاء :-
عشان خاطرى يا دكتورة .. انتى عارفه ان الامتحان ده عليه 20 درجة بحالهم

قالت المعيدة وهى تتوجه الى باب القاعة للخروج :- دكتور المادة حدد معاد محدد للإمتحان وصحبتك اتاخرت .. مش فى ايديى بأه .. كلمى دكتور المادة ووقفت "اسماء" أمامها تمنعها من الخروج وهى تخرج هاتفها قائله :- يا دكتورة بقولك هى كانت تعبانه .. وهى خلاص فى الطريق اتصلت بـ "آيات" وبمجرد أن انفتح الخط صاحت "اسماء" :- أيوة يا "آيات" انتى فين ؟ أتاه صوت "آيات" قائلاً بلهفه :- أنا خلاص بركن أدام الجامعة أهو .. الامتحان خلص ؟ قالت "اسماء" :- تعالى على قاعة " أ " بسرعة أنهت "اسماء" المكالمة ونظرت الى الدكتورة قائله بلهفه :-

خلاص هى داخله الكلية أهى
أوقفت "آيات" سيارتها أمام الجامعة وخرجت منها بسرعة ودلفت من البوابة وهى تحت الخطى .. الى أن وصلت الى مبنى كُتب عليه بخط كبيرة " كلية التجارة " .. صعدت "آيات" الدرجات بسرعة وتوجهت الى القاعة " أ " .. استقبلتها "اسماء" على الباب قائله :- بسرعة ووقفتها بالعافية دخلت "آيات" وتوجهت الى المعيدة قائله وهى تلهث :- آسفه

والله يا دكتورة .. الطريق كان زحمة موت نظرت الدكتورة بشك الى
"أسماء" ثم نظرت الى "آيات" قائلة : - الطريق كان زحمة ولا انتي
كنتي تعبانه امبارح فى المستشفى ؟ وكزت "أسماء" "آيات" فى ذراعها
ففهمت "آيات" وقالت بسرعة : - كنت تعبانه جداً ووجدت بالعاافية
رغم ان الدكتور كتبلى على راحه واللى زاد وغطى ان الطريق كان زحمة
كمان نظرت اليها المعيدة وهى تعطيها ورقة الإمتحان قائلة : - طيب يلا
انجزى لو دكتور المادة شافك هيبقى سين وجيم جلست "آيات" وأخذت
تجيب على أسئلة الإمتحان .. انتظرتها "أسماء" بالخارج الى أن أنهت
الإمتحان .. شكرت "آيات" الدكتورة بإبتسامه قائلة : - ميرسى يا دكتورة
جذبتها "اسماء" من ذراعها وتوجهت بها الى كافيتيريا الكلية وجلستا
على احدى الطاولات .. نظرت "أسماء" الى "آيات" قائلة بغضب : -
والله بتستهبلى .. ده أنا كان ناقص أبوس ايد المعيدة عشان متمشيش
ضحكت "آيات" وهى تقول : - تسلميلي يا "سمسم" قالت "أسماء"
بغيط : - أهو ده اللى انتي فالحه فيه مبخدش منك غير كلام قامت "آيات"
وهى تقول : - طيب هروح أعزمك على نسكافيه حلاوة جدعتك معايا
النهاردة صاحت "أسماء" بمرح : - نسكافيه بس .. ده انتي المفروض
تعمليلي حفلة .. أنقذت 20 درجة كانوا هيضيعوا عليكي
قالت "آيات" بمرح وهى تنصرف : - مش لما أشوف هاخذ منهم كام
درجة الأول عادت "آيات" حاملة أكواب النسكافيه البلاستيكيه ..
ووضعت كوباً أمام صديققتها .. سمعت من خلفها صوتاً يهتف : - ازيكوا يا
بنات .. عملتوا ايه فى امتحان الشيت ؟ جلست "آيات" وهى تنظر الى
الشاب خلفها قائلة : - ازيك يا ابني عاش مين شافك .. غطسان فين
مبشوفاكش فى السكاشن ؟ قال الشاب مبتسماً وهو يجلس بين الفتاتين
على الطاولة : - محسسانى ان احنا فى طب .. يا بنتى دى تجارة قالت
"أسماء" بمرح : - طول عمرك فاشل يا "أحمد" قال "أحمد" مازحاً : -
سبنالكوا انتوا الدح أخذت "آيات" تشرب من كوبها ببطء .. مد "أحمد"
يده وأخذ الكوب الموضوع أمام "أسماء" ورشف منه قائلاً : - الله كنت
محتاج كوباية نسكافية تطبلى دماغى صاحت "أسماء" بحنق : - ياباى
على الغلاسه .. متروح تجيبلك واحد ده "آيات" جيباهولى نظر "أحمد"
الى "آيات" وهو يرشف رشفه أخرى قائلاً : - مش مشكلة تروح تجيبلك
واحد تانى قالت "آيات" : - ليه ان شاء الله .. مش قايمة تانى أنا قامت
"أسماء" وهى تقول بغيط : - أوف .. هروح أجيب أنا نظر "أحمد" الى
"أسماء" وهى تبتعد ثم التفت الى "آيات" ورمقها بنظراته قائلاً : -

عملتى ايه فى الإمتحان ؟ قالت "آيات" بلا مبالاة وهى تتجول بعينيهما فى رواد الكافيتيريا :- كان لذيذ .. بس فى كام نقطة فى التشوز وقعوا منى ضحك "أحمد" قائلاً :- يا بنتى ده تشوز يعنى اعلمى حادى بادى ابتسمت "آيات" قائله بمرح :- ما أنا لما فشلت فى انى أختار صح .. عملت حادى بادى قال "أحمد" وهو يرمقها بنظرت اعجاب واضحة :- بس انتى زى القمر النهاردة نظرت اليه "آيات" بحدة وقالت :- "أحمد" لو سمحت انت عارف انى מבحبش كده قال "أحمد" بضيق :- ليه بأه ؟ قالت "آيات" بحزم :- لان احنا فريندرز وبس قال "أحمد" بتبرم :- ولية منكنش أكثر من فريندرز يا "آيات" .. ليه منكنش قطع كلامه بعدما أتت "أسماء" حاملة كوبها .. جلست فى مقعدها الذى تركته منذ قليل .. قام "أحمد" قائلاً :- سلام أشوفكوا بعدين غادر "أحمد" .. ونظرات "أسماء" تتابعه .. ثم نظرت الى "آيات" بلؤم قائله :- قالك ايه ؟ قالت "آيات" بلا مبالاة :- هيقولى ايه يعنى قالت "أسماء" مبتسمه بخبث :- فاكرانى مفهمتش اللى حصل ؟ قالت لها "آيات" بنفاد صبر :- ايه اللى حصل يعنى قالت "أسماء" :- اتعمد انه ياخذ من أدامى كوباية النسكافيه عشان أقوم أجيب لنفسى غيرها و يخلاله الجو هتفت "آيات" بحنق وهى ترمق صديقتها بنظرات غاضبة :- ومادمتى عارفه كده ايه اللى خلاكى تقومى أصلاً قالت "أسماء" ضاحكة :- מבحبش أبقى عزول يختى قالت "آيات" بغیظ وهى تنتقل الى المقعد المجاور لـ "أسماء" وتفرك لحم ذراعها بين اصبعيها بقوة :- بطلى الاسلوب ده מבحبوش هتفت "أسماء" بألم :- دراعى يا مفترية قالت "آيات" بتشفى :- أحسن عشان تحرمى تغیظینى تانى قالت "أسماء" وهى تفرك ذراعها بيدها :- يا بنتى ده الواد هيموت عليكى من سنة أولى .. بلى ريقه بأه قالت "آيات" بتأفف :- أوف .. ميت مرة أقولك أنا وهو فريندرز وبس .. فضينا بأه من السيرة دى صمتت "أسماء" قليلاً ثم نظرت الى "آيات" قائله بتهكم :- انسى اللى فى بالك ده خالص ارتبكت "آيات" ونظرت اليها قائله :- تقصدى ايه ؟ تبادلنا نظرة ذات معنى .. الى أن أشاحت "آيات" بوجهها .. فقالت "أسماء" :- طيب طمنينى على الأقل .. الموضوع متطور معاكى لحد فى صمتت "آيات" وأخذت تحرك الكوب الفارغ بين يديها .. فقالت "أسماء" :- خلاص برحتك مش هضغط عليكى التفتت اليها "آيات" قائله بضيق :- اتخنقت .. مش احنا خلصنا ما تيجى نقوم نلف بالعربية شوية أو نروح النادى ؟ قالت "أسماء" بإستنكار :- عندنا النهاردة محاضرتين ورا بعض قالت "آيات" وهى تنهض وتحمل حقيبتها :- كبرى خرجت الفتاتان

من الجامعة وتوجهتا الى سيارة "آيات" وانطلقا بهما فى شوارع القاهرة

*****دخل

"أحمد" بسيارته الفيلا وأوقف سيارته فى الجراج ثم صعد الدرجات يصفر بمرح .. توجه الى غرفته وشرع فى تبديل ملابسه .. نزل الى الطابق السفلى وهو يدور بعينه فى المكان .. الى أن ظهرت الخادمة فسألها قائلاً : - بابا و ماما هنا ؟ فقالت الخادمة : - أيوة يا فندم فى الجنية خرج "أحمد" ليجد والدته واقفة تساعد والده فى تقليم احدى الأشجار بالحديقة .. فأقبل عليها قائلاً بمرح : - يعنى "فؤاد" بيه "الأسيوطى" بجلالة قدره وحرمة المصون واقفين بنفسهم بيقصوا الشجر .. دى لو الصحافة شمت خبر هتبقى فضيحة بجلجل نظر اليه أبويه وضحكا عالياً .. ثم قال له والده "فؤاد" : - ليه بأه ان شاء الله .. عيب ولا حرام قالت أمه مبتسمة : - من امتى بأه قص الشجر فضيحة أقبل عليها "أحمد" وقبل يدها قائلاً بمرح : - الايدين الحلوة دى تتلف فى حرير مش تقص شجر ضحك أبوه قائلاً : - انت عارف انى بحب أعتنى بالجنية بنفسى و والدتك بتحب دايماً تساعدنى فى كل حاجة اعملها التفتت أمه اليه وقالت بلهفه : - قولى عملت ايه فى امتحان النهاردة ؟ قال "أحمد" مبتسماً : - حليته بصابع رجلى الصغير ضحك أبو بتهكم قائلاً : - آه هتقولى على نباهتك .. عارفها كويس .. بدليل انك بقالك 3 سنين فى سنة رابعة مش عايز تطلع منها

قالت أمه بضيق : - متعكنش عليه بأه .. هو وعدنى انه هينجح السنة دى ان شاء الله ثم التفتت اليه قائله : - مش كده يا "أحمد" ؟ قال "أحمد" مبتسماً : - طبعاً يا ست الكل أنا وعدتك قال "فؤاد" متهكماً : - طيب ما انت وعدتها السنة اللى فاتت واللى قبلها ويرده سقطت قالت زوجته بضيق : - "فؤاد" بلاش كلمة سقطت دى قال "فؤاد" صاخراً وهو يخلع الجوانتى السميك الذى يرتدي : - والله أنا مش عارف ايه أخرة دلحك فيه .. ده لو بنت مش هتدلع كده ؟ عانق "أحمد" أمه قائلاً : - ربنا يخليكي ليا يا ماما انتى اللى نصفانى فى البيت ده صاح "فؤاد" قائلاً : - أيوة اتلميتوا على بعض ثم قال : - أنا رايح المكتب .. لما الغدا يجهز نادولى

وضعت "آيات" هاتفها النقال بين أذنها وكتفها وجلست على فراشها تصبغ أظافر يدها بالمانكير .. وتحدثت بضيق قائله : - ما انتى عارفة بابا يا "أسماء" .. مستحيل هيرضى انى أسافر سفريه فيها بيات قالت

"أسماء" بضيق :- باباكي ده صعب أوى .. وكمان مش سامحك تتأخري
بره البيت عن 10 بالليل .. يعني ايه أخرك 10 بالليل .. الناس أصلا
بتبتدى تخرج الساعة 10

قالت "آيات" بحنق :- خلاص بأه مش هنفضل نعيد ونزيد فى الكلام
متخنقتيش انتى كمان قالت "أسماء" بحزن :- كان نفسي تيجي معايا
أوى زفرت "آيات" بضيق قائله :- وأنا كمان .. انتى عارفه أنا بحب شرم
أوى .. بس مش هينفع موضوع البيات ده ثم قالت :- طبعاً باباكي وافق
ضحكت "أسماء" قائله :- آهااا باباتى حبيبي وافق طبعاً .. ماما اللى
عصلجت شوية .. بس بابا راضانى ووافق قالت "آيات" بمرح :- باباكي
ده راجل سكر .. مفيش زيه .. يا سلام لو يعد مع بابا شويه يعلمه ازاي
يبقى أب فرى كده سمعت "آيات" طرقات على باب غرفتها فقالت :- ده
أكيد بابا دى خبطته .. خليكي معايا هشوفه وأرجعك ألق "آيات" هاتفها
على الفراش وأخذت تنفخ فى أظافرها وتحركها فى الهواء لتجففها ..
فتحت الباب ثم ابتسمت للرجل الوقور الذى يغطى الشيب رأسه قائله :-
بابا حبيبي اقترب منها الرجل وقبل رأسها قائلاً :- حبيبة بابا .. اعدة
لوحدك وأنا أعد لوحدى .. متيجي نعد نتفرج على التى فى مع بعض قالت
"آيات" وهى تقبل وجنته :- حاضر يا بابا هفقل بس مع "أسماء" و
أنزل أعد معاك نظر والدها الى هاتفها الملقى على الفراش وقال بمرح :-
انتوا مبتطلوش رعى أبداً ضحكت "آيات" قائله :- واحنا ورانا ايه غير
الرعى مسح على شعرها قائلاً :- طيب يا حبيبتى هستناكى تحت شيعته
بابتسامه ثم أغلقت الباب وعادت الى هاتفها لتضعه على أذنها قائله :-
"أسماء" انتى لسه عايشة؟ ضحكت "أسماء" قائله :- عايزانى أموت
عشان مسافرش شرم للدرجة دى قلبك اسود وحقوده ضحكت "آيات"
قائله :- أه بصراحة متغاظة منك عشان هتروحي وأنا لأ ثم قالت بجديه :-
لا بجد اوعى تفكرى انى ممكن أحقد عليكى أو أبقى غلاويه كده .. انا
مش كده والله يا "أسماء" قالت "أسماء" بسرعة :- انتى عبيطه يا بنت
انتى .. انا بهزر معاكى قالت "آيات" :- طيب يلا من غير مطرود عشان
نزله أعد مع بابا سيباه لوحده من ساعة ما جه من بره قالت "أسماء"
ضاحكة :- ساعات بحس انك مراته مش بنته .. يلا سلام أشوفك بكرة فى
الكلية ثم هتفت قائله :- عندنا بكرة امتحان شيت تانى اوعى تروح عليكى
نومه زى النهاردة .. لو نمتى تانى لا انتى صحبتى ولا أعرفك مش
هترجى المعيدة تانى قالت "آيات" :- لا متقلقيش يا "سمسم" هخلى دادة
تصحيني .. يلا باى - باى

"آيات" على الأريكة بجوار والدها لمشاهدة التلفاز .. كانت مندمجة في المشاهدة وهي تضع حبات الفشار فى فمها بنهم .. التف "عبد العزيز" والدها ينظر اليها وقد رُسمت ابتسامه حاتيه على وجهه .. لف ذراعه حول كتفيها وقربها منه مقبلاً رأسها .. رفعت نظرها اليه مبتسمة فقال لها : - تعرفى يا "آيات" من يوم وفاة أمك الله يرحمها .. ومفيش حاجة ماليه حياتى غيرك .. انتى اللى منوره حياتى بوجودك فيها وأى حاجه غيرك متهمنيش دفنت "آيات" وجهها فى صدره وهي تقول : - انت كمان يا بابا اللى وجودك منور حياتى ربنا ما يحرمنى منك أبداً اقتربت دادة "حليمة" مبتسمة وهي تراهما هكذا .. وقالت بصوت حانى : - يلا يا "آيات" يا بنتى عشان تنامى عندك امتحان الصبح نظر "عبد العزيز" الى "آيات" بدهشة : - عندك امتحان الصبح ؟ .. واياه اللى مسهرك لحد دلوقتى ؟ قالت وقد بدأ النعاس يزحف الى عينيها : - مكنتش عايزه أنام أوقفها والدها قائلاً بحزم : - يلا على أوضتك يا "آيات" ابتسمت "آيات" وانحنت لتقبل وجنته قائلاً : - تصبح على خير يا بابارد والدها مبتسماً : - تصبحى على خير يا حبيبتي سعدت "آيات" الى غرفتها .. توجهت الى الدولاب لتختار ما ستدرديه فى الغد .. فغداً يوم مميز بالنسبة لها .. لأنها غداً ... ستراه.

بعد منتصف الليل بعدة ساعات .. دخل "آدم" بسيارته أحد أحياء القاهرة الشعبية وتوقف أمام احدى البنايات .. بدت سيارته الحديثة متناقضة مع الأجواء حولها .. سعد "آدم" الدرجات برشاقه الى ان توقف أمام أحد الأبواب وأخرج مفتاحه ليفتح الباب بهدوء .. أغلق الباب خلفه وضغط على زر المصباح بجوار الباب .. التفت وشهق بفزع : - خضتيني يا ماما نظر الى المرأة الجالسه على مقعد الصالون الكبير .. امرأة فى العقد السادس من العمر يبدو عليها علامات الوهن والضعف .. وقفت أمامه ونظرت اليه بتبرم قائله : - كل يوم يا "آدم" ترجع وش الصبح .. ده غير بياتك بره كل شويه والتانى زفر "آدم" بضيق وهو يقول : - هو أنا صغير يا ماما .. انا راجل وعندى 32 سنة يعنى مش عيل صغير قالت أمه بعصبيه : - وعشان ما انت راجل ومش صغير المفروض تصرفاتك تكون أعقل من كده يا "آدم" قال "آدم" وهو يتوجه الى غرفته : - نكمل خناق الصبح .. انا مصدع وعايز أنام كاد ان يغلق باب غرفته فأوقفت أمه الباب بيدها ونظرت اليه قائله : - اتعشيت ؟ او مات برأسه

قائلاً : - أيوة نظرت اليه بعتاب ثم تركته ودخلت غرفتها .. أغلق "آدم" باب غرفته التي كانت تحتوى على آثاث متواضع لكنه جيد .. خلع قميصه وتوجه الى حاسوبه وجلس ينظر الى بريده الالكتروني .. زفر بضيق عندما لم يجد مبتغاه وأخرج سيجاراً وأشعله وظل ينفث دخانه بعصبيه .. ثم أغلق الحاسوب وتوجه الى فراشه بعدما أنهى سيجاره واغلق المصباح وغط في سبات عميق

*****استيقظت

"آيات" من فورها بعدما نادتها "حليمة" قائلة : - "آيات" .. اصحى يا بنتى عشان امتحانك كان يبدو عليها النشاط بعكس الأمس .. أخذت دشاً سريعاً وارتدت ملابسها التي اختارتها بعناية الليلة الماضية .. وكالعادة وقفت أمام المرآة تضيف على ملامحها البريئة لمسات تخفى بها برائتها وبساطتها وتظهرها كإمرأة .. توجهت الى باب الفيلا فقالت بها "حليمة" قبل أن تغادر : - مش هتفطرى يا "آيات" ؟ قالت "آيات" وهى تلوح لها مودعة : - هفطر فى الجامعة يا دادة .. باى توجهت الى سيارتها وانطلقت بها .. توقفت أمام الجامعة وخرجت لترتدى نظارتها الشمسية التي أضفت عليها بعض الغموض .. توجهت برشاقه الى داخل الحرم الجامعى .. قابلت "أسماء" فى الكافيتيريا .. فقالت "أسماء" بمرح : - كويس ناموسيتك مكنتش كحلى زى امبارح .. يلا بينا نراجع خلاص معدش وقت جلست الفتاتان معاً تراجعان بعض النقاط وتخبر كل منهما الأخرى عن توقعاتها لأسئلة الإمتحان .. ثم حان وقت الإمتحان ودفقتا الى داخل القاعة .. جلس "أحمد" على المقعد المجاور لـ "آيات" ونظر اليها مبتسماً فبادلته ابتسامته .. انتهى الإمتحان وخرجت الفتاتان لتعودا الى الكافيتيريا مرة أخرى .. قالت "آيات" بضيق : - دكتور غبي قالت "أسماء" بتبرم وهى تنظر الى ورقة الأسئلة : - امتحان مستفز لأبعد حد زفرت "آيات" بضيق قائلة : - ده امتحان يجيبه فى الشيت أمال فى امتحان الترم هيعمل ايه .. ده هينفخنا قالت "أسماء" وهى تطوى ورقة الإمتحان وتضعها فى حقيبتها : - سيبك كبرى .. تعالى نشرب حاجة نروق بيها دمنا بعد نصف ساعة بدأت "آيات" فى مراقبة ساعة الموبايل باهتمام .. فنظرت "أسماء" الى وهى تقول بلؤم : - فى ايه كل شوية تبصى لساعة الموبايل ؟ قالت "آيات" بغیظ : - وعرفتى منين انى ببص لساعة الموبايل قالت "أسماء" بسخريه : - أمال بتبصى لايه ؟ للتيم مثلاً ؟ لم تجيبها "آيات" وتظاهرت بالإنشغال بالنظر الى رواد الكافيتيريا .. مرت الدقائق لتعلن الساعة الواحده الا عشر دقائق .. فأخذت "آيات" تلملم فى أشياءها وهى

تقول لـ "اسماء" :- يلا يا "أسماء" قالت "أسماء" دون أن تتحرك من مكانها :- يلا فين؟ نظرت اليها "آيات" قائلة :- يلا عندنا محاضرة "ادارة أعمال" بعد عشر دقائق قالت "أسماء" بلووم :- اشمعنى يعنى محاضرات "ادارة الأعمال" اللى بتصرى نحضرها قالت "آيات" وهى تنهض مغادرة :- أنا هحضرها عايزة تحضريها احضريها مش عايزة استنيني هنا لحد ما المحاضرة تخلص نهضت "أسماء" وهى تسرع خلف "آيات" .. جلستا متجاورتين فى المدرج الذى ازدخر بالطلبة والطالبات .. سألت احدى الطالبات :- هو الدكتور اتأخر ليه؟ ردت أخرى :- متأخرش ولا حاجة دى كلها 5 دقائق

ردت طالبة أخرى ضاحكة :- ان مكشش ده يتأخر أمال مين اللى يتأخر قالت أخرى بهيام :- يخربيت كده ده عليه جوز عيون يهبلوا شعرت "آيات" بالضيق وهى تستمع الى تلك التعليقات .. وفجأة انخفضت الأصوات تدريجياً وتعلقت الأنظار بالشخص القادم .. التفتت "آيات" تنظر الى باب المدرج وقلبها يخفق بسرعة وارتمت ابتهسامه صغيره على شفتيها ونظره حالمة فى عينيها .. دخل "آدم" المدرج ووقف على المنصة أمام المكتب ببدلته الأنيقة وملامحه الوسيمة ونظرات كالبحر متلاطم الأمواج .. نظر الى الطلاب قائلاً بصوته الرخيم :- مساء الخير ردد الطلاب :- مساء الخير يا دكتور "آدم"

الفصل الثاني من رواية جواد بلا فارس



وفجأة انخفضت الأصوات تدريجياً وتعلقت الأنظار بالشخص القادم ..

التفتت "آيات" تنظر الى باب المدرج وقلبها يخفق بسرعة وارتسمت
ابتسامه صغيره على شفثيها ونظره حالمة فى عينيها .. دخل "آدم"
المدرج ووقف على المنصة أمام المكتب ببدلته الأنيقة وملامحه الوسيمة
ونظرات كالبحر متلاطم الأمواج .. نظر الى الطلاب قائلاً بصوته الرخيم :
- مساء الخير
ردد الطلاب :

- مساء النور يا دكتور "آدم"
حاولت "آيات" بصعوبه اخفاء البسمة التى ارتسمت على شفثيها حال
رؤياه .. قال "آدم" وهو ينظر الى الأوراق أمامه :
- حد يفكرنى وقفنا فىن المرة اللى فاتت
قال أحد الطلاب :

-

اوماً "آدم" برأسه وبدأ محاضرتة .. استمرت المحاضرة قرابة الساعتين
.. قرب انتهاء المحاضرة بدا على الجميع الملل والحنق والرغبة فى
انتهاء المحاضرة بإستثناء "آيات" .. التى كانت تنظر الى "آدم" تراقب
كل حركة وكل سكرة وكل ايماءة وكل التفاته .. التفتت اليها "أسماء"
قائله :

- اطلبى منه صورة أحسن
وكزتها "آيات" فى ذراعها بقوة فقالت "أسماء" بغيظ :
- كوعك عامل زى المسمار يا بنت انتى
قالت "آيات" بتشفى :
- أحسن عشان تحترمى نفسك
هتفت "أسماء" بصوت منخفض :
- انتى مش شايقة نفسك بتبصيله ازاي .. ده انتى هالين عليكي تاخديه فى
ايدك وانتى خارجه من المحاضرة
وكزتها "آيات" مرة أخرى بقوة أكبر .. فلم تستطع "أسماء" كتم صرخة
ألم :
- آه

لم يكن صوتها عالياً للدرجة .. ولكنه كان ملفتاً خاصة مع السكون الذى
كان سائداً فى المدرج .. التفت "آدم" الى مصدر الصوت .. فالتقت عيناه
بعيني "آيات" .. شعرت بقلبها ينبض بجنون داخل صدرها .. وحبست
أنفاسها وتضربت وجنتاها بحمره خفيفه أخفتها الأصباغ الصناعية التى

كانت تضعها على وجهها .. عاد "آدم" ليلتفت الى شرحه وهو ينقل نظره بين طلابه بلامبالاة .. نظرت "آيات" الى "أسماء" بغضب والتزمنا الصمت .. انتهت المحاضرة فتابعته "آيات" بعيناها وهو ينصرف قبل الطلاب .. ساد الهرج والمرج وخرجت الفتاتان من المدرج .. وقفنا أمام الكلية تتحدثان فقالت "أسماء" :

- متيجي نروح النادي النهاردة حسه انى مخنوقة
قالت "آيات" وهى تشعى بالملل :

- وأنا كمان

ثم قالت :

- وكمان هكلم "ايمان" و "سمر" بيجوا معانا

قالت "أسماء" بمرح :

- أوكيشن

توجهت الفتاتان الى النادي وجلستا حول احدى الطاولات فى انتظار حضور صديقتيهما .. قالت "أسماء" وهى تنظر الى "آيات" بعتاب :

- برده مش عايزه تتكلمى معايا

زفرت "آيات" بضيق دون أن تنطق بشئ .. فقالت "أسماء" بغضب :

- بس ابقى خليكى فاكراها يا "آيات" .. والله ما عدت حكيالك أى حاجه

تانى

قالت "آيات" بحنق :

- مفيش أصلاً حاجة تتحكى

قالت "أسماء" بعناد :

- حاولى .. هتلاقى الكلام بيتسرسب منك واحدة واحدة

صمتت "آيات" لفترة ثم قالت بحزن :

- كل الحكاية انه عجبنى مش أكثر من كده يعنى

قالت "أسماء" مبتسمة :

- ليكى حق يا "يويو" الراجل موز ودكتور فى الجامعة

نظرت اليها "آيات" بغضب قائله :

- احترمى نفسك يا "أسماء" لو سمحتى

ضحكت "أسماء" قائله :

- ده بجد بأه

ظهرت علامات الضيق على وجه "آيات" فإقتربت "أسماء" بمقعدها

منها ووضعت يدها على يد "آيات" قائله بإهتمام :

- اتكلمى يا "آيات" .. قوليلى اللى جواكى

قالت "آيات" بنفس النظرة الجزينة :

- مفيش حاجة تتقال

قالت "أسماء" بجدية :

- بس أنا عمرى ما شوفتك كده يا "آيات" .. عمرى ما حسيت انك ممكن

تنجذبى لحد كده .. ما فى ولاد كتير حوالينا وأمامير وستايل وولاد ناس ..

بس انتى عمرك ما اهتيميتي بحد منهم .. فمستغرباكي أوى .. لانى

مشفتكيش قبل كده بتنجذبى لحد من مجرد شكله

نظرت اليها "آيات" وقالت بحده :

- أنا منجذبتلوش عشان شكله

قالت "أسماء" باستغراب :

- أمال عشان ايه ؟ .. انتى أصلاً متعرفيهوش

قالت "آيات" وكان شريط سينيمائى يمر من أمام عينيها :

- فى سنة أولى قبل ما أتعرف عليكي .. كان لسه بابا مجبليش العربية ..

كنت بروح الجامعة فى تاكسى .. او بابا ببيعت معايا العربية بالسواق ..

فى اليوم ده كنت راكبه تاكسى .. ونزلت أدام الجامعة .. معرفش ايه اللى

حصل لقيت فجأة تاكسى تانى بيفرمل جامد أدامى ويخبط فى الرصيف ..

معرفش أنا اللى منتبهتش ولا هو اللى غلطان .. نزل السواق من التاكسى

بتاعه وفضل يزعق فى جامد أوى لدرجة انى عيطت وسط الشارع

كانت "أسماء" تسمع الى "آيات" باهتمام فأكملت قائله :

- كنت فى موقف محرج أوى والراجل مش عايز يهدى ومش عايز يعديني

واكمن العربية خبطت فى الرصيف كان عايز تمن التصليح وأنا ساعتها

مكنش معايا المبلغ اللى طلبه كتعويض

اتسعت عينا "أسماء" وهى تستمع الى كلام "آيات" التى أكملت قائله

باتبسامه خفيفه :

- بعدها لقيت دكتور "آدم" جه .. شكله كان داخل الجامعة ولقى الخناقة

والراجل وهو بيزعق .. المهم فضل يتكلم مع الراجل ويقوله

متزعقلهاش كده دى بنت .. والراجل برده فضل يزعق ومصر ياخذ فلوسه

قولتله هتصل ببابا يبعثلى حد بالفلوس وافق بس بشرط انى افضل معاه

متحركش لحد ما بابا ييجى

ثم نظرت "آيات" الى "أسماء" مبتسمة بخجل وهى تقول :

- كنت خايفه من الراجل أوى .. وكنت بيعيط .. بس دكتور "آدم" فضل

واقف معايا ومرضاش يمشى ويسيبنى واقفه معاه لوحدى .. حسيته كان

مضايق من اللى حصلى وفضل يقولى متخفيش ميقدرش يعملك حاجة ..
وفضل واقف جمبي .. كنت أول مرة أشوفه .. ومكنتش حتى اعرف انه
دكتور عندنا فى الكلية
ثم أكملت :

- بابا جه بنفسه واتفاهم مع الراجل وساعتها دكتور " آدم " سألنى انتى
كويسه .. قولتله أيوة .. قالى معلش راجل معندوش دم متز عليش نفسك
أنا لو كان معايا المبلغ دلوقتى كنت دفعتھوله ومكنتش وقفتك كده
صمتت " آيات " قليلاً ثم قالت :

- بصراحة احترمتھ أوى وحسيتھ راجل أوى .. ومش عارفه دى تھیآت
ولا ايه بس حسيت بنظرات عينه حنينه أوى وهو ببصلى .. بعد كده بابا
شكره انه كان جمبى ودافع عنى .. بس .. شوفته بالصدفة فى الكلية
وعرفت انه بيدي مادة فى سنة رابعه .. أدى كل الحكاية
التفتت " أسماء " الى " آيات " قائله :

- بس أنتى عمرک ما قولتلى انک حسه بحاجه نحيته
قلت " آيات " بحزن :

- أنا نسيت الموضوع وشيلته من بالى .. بس لما شوفته فى بداية السنة
دى وبقيت بشوفه كتير .. مش عارفه .. على طول بفتكر الموقف اللى
عمله معايا

ثم نظرت الى " أسماء " وقالت بحماس :

- تحسياه راجل كده .. مش حنت عيل .. يعنى تحسياه واثق من نفسه
وبيدافع عنک وخايف عليكى وبيحميكى
ثم تنهدت قائله :

- تفتكرى أنا مكبرة الموضوع ؟

قالت " أسماء " بعد تفكير :

- بصى مش عايزة أعشمک بحاجة .. وفى نفس الوقت مش عايزة اضايقک
.. بس أنا مش شايفه أى اهتمام من نحيته يا " آيات "
قالت " آيات " بحزن وهى تطرق برأسها :

- عرفه

نظرت اليها " أسماء " قائله :

- طيب ما تحاولى تلفتى انتباهه

قالت " آيات " بدهشة :

- ازاي يعنى ؟

قالت " أسماء " بحيره :

- مش عارفه

فكرت "آيات" قليلاً ثم قالت بكبرياء :

- لا مش هحاول ألفت انتباهه .. هو لو حس بحاجه نحيتى يبقى منه
لنفسه .. ولو محسش خلاص هو حر مش هضربه على ايده عشان يحبني
ثم ظهر الحزن مرة أخرى فى عينيها وقالت وكأنها تحدث نفسها :
- تفكرى ممكن يحبني ؟

قالت "أسماء" :

- مش يمكن أصلاً يكون متجوز

التفتت اليها "آيات" قائله بثقه :

- لا مش متجوز .. مش لابس دبله

قالت "أسماء" بتهكم :

- مش شرط كل الرجاله المتجوزين يلبسوا دبله يا "آيات"

قالت "آيات" بثقه :

- لا أنا واثقه انه مش متجوز لانى عارفه الأكاونت بتاعه على الفيس

وكاتب فى البروفايل بتاعه سينجل

قالت "أسماء" بدهشة :

وعرفتى الاكاونت بتاعه منين ؟

قالت "آيات" :

- من الجروب بتاع الكلية فى مرة رد على بوست فعرفته من الاسم ومن

الصورة

قالت "أسماء" بعتاب :

- ما شاء الله .. كل ده من ورايا

مازحتها "آيات" قائله :

- متزعش بأه يا "سمسم" .. أصلاً مفيش حاجة عشان أحكيها .. مجرد

احساس من طرف واحد يعنى حاجة عبيطة مش مستاهله تنقل

فى تلك الأثناء أقبلت فتاتان فى اتجاههما كان بينهما عامل مشترك ألا

وهو ملابسهما الواسعة الفضفاضة وحجابهما الطويل .. ابتسمت "آيات"

فى سعادة وهى تهتف قائله :

- "إيمان" .. "سمر"

قامت "أسماء" و "آيات" للترحيب بالفتاتين ومعانقتهما .. ثم التفوا معاً

حول الطاولة .. بدا للناظر من بعيد أنهم مجموعة غريبة .. فتاتان بكامل

زينتهما ويرتديان الملابس الضيقة المثيرة وأخرتان بدون أى زينه

وترتديان ملابس محتشمه .. قالت "آيات" فى سعادة بالغة :

- وحشتونى أوى .. انتوا بجد أندال ليه مش بنجتمع مع بعض على طول .. لازم يعنى أفضل ألح عليكوو عشان نتقابل
ابتسمت "سمر" قائله :
- معلش يا "آيات" انتى عارفه أنا مشغوله أد ايه فى المستشفى
قالت "أسماء" ضاحكة :
- مش عارفه ايه اللى يخليكى تدخلى طب أصلا ملها تجاره ... زى الفل
ضحكت "سمر" قائله :
- آه فل أوى .. ده انتوا فى التراوه خالص
هتفت "أسماء" متظاهرة بالغضب :
- قصدك ايه بأه ده بتوع تجارة دول أجدع ناس .. تنكرى
قالت "سمر" ضاحكة :
- لا طبعاً منكرش .. كنت بهزر معاكى .. وبعدين يا ستى أهى كلها شهادة
التفتت "آيات" الى "إيمان" قائله بمزاح :
- ايه أخبار دكتور السنان الفاشلة ؟
قالت "إيمان" بغيظ :
- عارفه لو عدتى تقولى فاشلة تانى هعملك فيكى ايه
قالت "آيات" مبتسمه :
- الا قوليلى يا "إيمان" هو المفروض أغسل سنانى كام مرة فى اليوم
عشان ميحصليش مشاكل فى سنانى ؟
قالت "إيمان" وهى تخرج بسكويت من حقيبتها وتتناوله :
- ازاي يعنى ؟ .. هو انتى بتغسلى سنانك كل يوم
قالت "آيات" بدهشة :
- أيوة طبعاً وبابا بيضايق منى لو مغسلتهمش مرتين فى اليوم
صاحت "إيمان" قائله :
- أما فرفورة صحيح
ضحكت الفتيات وصاحت "آيات" :
- أنا اللى فرفورة ولا انتى اللى دكتورة سنان فاشلة .. انا مش عارفه
أصلاً انتى طلعوكى من اعدادى ازاي
قالت "إيمان" لتغيظها :
- يلا يا نايتي .. أنا أصلا ايه اللى خلانى أعرف شويه بنات نايتي زيكوو
كده مش عارفه .. بكرة تشوفى اسمى على أكبر عيادات الأسنان فى البلد
وتطلبوا منى معاد عشان تقابلونى وتبقى السكرتيرة بتاعتي تقولكوو
دكتورة "إيمان" مشغوله تعالوا بعد شهر

أكملت "أسماء" ضاحكة :

- آه مشغولة لان العيانيين اتلموا عليها وادولها حته علقه مرقادها شهر
فى المستشفى فتعالوا لما صحتها تتحسن وتنسى الشرخ اللى حصل فى
كرامتها

تظاهرت "ايمان" بالنهوض والمغادرة وهى تقول :
- تصدقوا ان خسارة فيكوا انى أعد معاكوا أصلاً
جذبتها "سمر" قائله :

- خلاص يا "ايمان" بنهزر معاكى انتى عارفه ان محدش بيقدر قيمة
المواهب العبقريه اللى زيك فى البلد دى
جلست "ايمان" وقالت بترفع :
- بكره تشوفوا "ايمان" دى هتبقى ايه
ثم قالت :

- مش هناك حاجة

طلب الجميع مشروباً غازياً بجانب وجبة الغداء .. فقالت "ايمان" بتهكم :
- وكمان طالبينها دايت .. ده انتوا بجد فرافير
قالت "آيات" مبتسمه :

- أنا بخاف أتخن أوى

قالت "ايمان" بتهكم :

- أمال أنا مش خايفة ليه وأنا أدك 3 مرات يا "آيات"

كانت "ايمان" ذات وزن كبير .. بالنظر الى الفتيات الثلاثة فهى تبدو
أكثرهن ضخامة .. ليس طولاً فقط وزناً وعلى الرغم من ملابسها
الفضفاضة الواسعة الى أنها أظهرت مدى زيادة وزنها
قالت "سمر" باهتمام :

- قولتلك كتير يا "ايمان" لازم تهتمى بأكلك أكثر من كده .. ده انتى يا
بنتى مبتعرفيش تمشى على دايت أكثر من 3 أيام
قالت "ايمان" بسخرية :

- وأمشى على دايت ليه شيفانى تخينه .. ده أنا يدوبك برميل بس

انفجرت الفتيات فى الضحك .. ورعلى الرغم من الابتسامه التى ارتسمت
على شفتى "ايمان" الا أن "آيات" لمحت سحابة حزن فى عينيها .. ظلت
تنظر اليها تحاول فهم سبب تلك النظرات الحزينة لكنها لم تستشف شيئاً
فسألتها باهتمام :

- "ايمان" .. فى حاجة مضايكاكى

رسمت "ايمان" ابتسامه واسعه على شفتيها وقالت :

- أيوة مضايقة ان الأكل اتأخر
صاحت "أسماء" قائله :
- يا بنتى ارحمى نفسك .. شوية شوية وهتاكلينا
ثم تظاهرت أنها تنادى على النادل قائله :
- يا عم يا بتاع الأكل قولهم بسرعة شوية معانا حوت لو مسديناش بقه
بأى حاجة هياكلنا واحدة ورا الثانية
ضحكت الفتيات وشاركتهم "إيمان" الضحك

توقف "آدم" بسيارته أمام البرج .. حياه رجل الامن الواقف .. ثم تتبعه
بنظراته وهو يمط شفثيه فى اشمئزاز .. أتى رجل أمن آخر ليرى التعبير
المرسوم على وجه زميله فسأله قائلاً :
- ايه فى ايه ؟
هتف رجل الأمن ومازالت تعبير الإشمئزاز على وجهه :
- الست اللى فى شقة 22 دى مش هتجيبها لبر
قال زميله :
- ليه ايه اللى حصل تانى ؟
قالت رجل الأمن بغضب :
- لا عندها خشى ولا حيا .. وكل كام شهر راجل طالع وراجل نازل أما بقت
حاجة تقرف أنا عارف ليه متغورش من العمارة .. كل اللى ساكنين هنا
ناس محترمة تروح تشوفلها جيران زيها تعيش وسطهم
قال زميله بضيق :
- ربنا يستر على وليانا .. أنا برده مبطقش أبص فى وشها .. ربنا يهديها
صاح الآخر بحرقه :
- قول ربنا ياخذها

صعد "آدم" الى شقة 22 وأخرج المفتاح ودخل وأغلق الباب خلفه .. ما
كاد يدخل الى غرفة المعيشة حتى هبت "بوسى" واقفة وهى تنظر اليه
بعتاب .. لم يعبأ "آدم" بنظراتها وتوجه الى غرفة النوم وهو يخلع جاكيت
البدلة .. ألقاه على أقرب مقعد .. ثم توجه الى الدولاب وظل يتأمل البدل
المتراصة بجوار بعضها ويختار من بينها .. دخلت "بوسى" ووقفت على
باب الحجرة وهى تكتف ذراعيها أمام صدرها وتقول بتبرم :

- انت نازل تانى ؟

قال "آدم" وهو مازال يتأمل البدل باهتمام :

- أيوة

اقتربت منه "بوسى" بعصبية وأدارته من كتفه بحده لينظر اليها .. فنظر اليها مندهشاً لتقول بغضب :

- "آدم" الوضع ده هيستمر لحد امتى ؟

قال بدهشه :

- وضع ايه ؟

قالت "بوسى" بعصبية شديدة :

- الوضع اللي احنا فيه ده .. مش حابب نتجوز قولت ماشى مفيش مشكلة .. لكن تدخل بمزاجك وتخرج بمزاجك وأعد بالأيام مشوفاكش .. كده أوفر

أوى

قال "آدم" ببرود :

- انتى عايزه ايه دلوقتى يا "بوسى" ؟

اقتربت منه ووضعت كفيها على صدره وهى تنظر اليه برجاء قائله بأعين دامعه :

- أنا بحبك يا "آدم" .. بحبك أوى .. عمرى ما حبيت أى راجل زى ما أنا بحبك .. نفسى نكون زى أى اتنين فى الدنيا بيحبوا بعض .. أنا حساك بعيد عنى أوى يا "آدم" .. حتى لما بتبقى موجود معايا بحسك مش موجود ..

نفسى تحبنى زى ما بحبك يا "آدم"

بدا "آدم" وكأنه يستثقل المهمة .. أمسك ذراعيها قائلاً :

- أنا بحبك يا "بوسى" ليه مش قادرة تقتنعى بكده .. ايه اللي يخلينى

أستمر معاكى لو مكنتش بحبك وبموت فيكى كمان

قالت "بوسى" بلهفه :

- بجد يا "آدم" بتحبنى بجد ومن قلبك ؟

عانقها قائلاً :

- طبعا يا حبيبتى .. وعمرى ما حبيت حد زى ما حبيتك

بدت عيناه خاويه جوفاء بارده .. ككلماته

ابتسمت "بوسى" بسعادة وهى تنعم بعناق حبيبها

دخل "آدم" أحد المطاعم وهو ينظر حوله الى أن وقع نظره على الشخص

الجالس على احدى الطاولات .. فعلت الإبتسامه شفتيه .. اقترب من الشخص قائلاً :

- عاش من شافك يا "زياد"

قام الرجل وعانق "آدم" قائلاً :

- وحشني جداً يا "آدم" ربنا يعلم

جلس الاثنان والابتسامه تعلقو شفتي "آدم" قائلاً بسعادة :

- وانت كمان يا "زيزو" وحشتني جداً .. جيت من شرم امتي ؟ ..

وخلص استقرت هنا ولا راجع تاني

قال "زياد" ضاحكاً :

- لا راجع تاني .. انا بس خدت أجازة اكمن الموسم ده مش موسم شغل أد كده

ربت "آدم" على كتف صديقه قائلاً :

- أحسن حاجة اني شوفتك .. ولو مكنتش جيت كنت أنا اللي هجيلك وهو

أقضى يومين في شرم

ضحك "زياد" قائلاً :

- قول بأه انك عايز تستغل صحتك .. اكمنى مدير قرية سياحية وعايز

تستنف من ورايا

ضحك "آدم" قائلاً :

- أوبس .. كشفتني يا معلم .. ماهو مش معقول صحبى وأخويا من أيام ما

كنا في الحضانه ومستنفعش من وراك حته تبقى عيبه في حقك يا أخى

ابتسم "زياد" قائلاً :

- تعالى انت بس وملكش دعوة

قال "آدم" غامزاً :

- أخبار المزز ايه ؟

ضحك "زياد" قائلاً :

- أهم متلقحين هناك

قال "آدم" بمرح :

- عمار يا شرم

صمت كلاهما للحظات ثم سأله "زياد" قائلاً :

- ازي والدتك أخبار صحتها ايه ؟

أوما "آدم" برأسه قائلاً :

- كويسه الحمد لله

نظر "زياد" الى "آدم" باهتمام قائلاً :

قال "آدم" بحده :

- انت متولدتش وفي بقتك معلقة ذهب يا "زياد" .. انت تعبت وشقيت
واتمرمطت وطفحت الدم عشان توصل للى انت فيه دلوقتى .. وعشان كده
انت لسه أبيض من جواك
قال "زياد" بثقه :

- وانت كمان زيي يا "آدم" احنا الاتنين زى بعض وعشنا فى نفس
الظروف ونفس المستوى وكافحنا سوا وتعبنا سوا .. يعني انت كمان من
جواك أبيض
قال "آدم" بتهكم :

- لا معدش يا صاحبى .. انا بقيت اسود .. وأسود من السواد كمان
لم يرد "زياد" أن يضغظ على "آدم" فى الحديث أكثر .. فقال يحاول
تغيير الجو :

- متاخذنيش فى دوكة قولى ناوى تفسحنى فين
ابتسم "آدم" قائلاً :

- انت تأمر يا "زياد" .. شوف حابب تروح فين وأنا أوديك
قال "زياد" مازحاً :

- اعتبرنى سايح وفسحنى
قال "آدم" ضاحكاً :

- ماشى يا سايح .. نتغدى وبعدين هعملك بروجرام هيعجبك
ابتسمت "زياد" لصديقه وربت على كتفه شاكرأ

عادت "آيات" من الخارج لتجد سيارة والدها فى الجراج فقد أتى مبكراً
على غير العادة .. ركنت سيارتها بجوار سيارته ثم أخرجت من حقيبتها
مناديل لإزالة المكياج وشرعت فى إزالة الأصباغ الصناعية التى تزين
وجهها .. فبدت أكثر براءه .. خرجت من سيارتها وتوجهت الى داخل
الفيلا .. رأت والدها وهو خارج من مكتبه فابتسمت له واقبلت عليه تعانقه
وتقبل وجنته قائلاً :

- ازيك يا بابا .. جيت بدرى النهاردة يعني
ابتسم والدها قائلاً :

- تعبت شوية فقولت أريح

قال "آيات" بقلق وهى ترمقه بنظرات متفحصه :

- تعبان مالك يا بابا .. حاسس بإيه ؟

قال " عبد العزيز " وهو يبتسم ويربط على ذراعها :
- متقلقيش يا حبيبتى شوية ارهاق وهيروحووا لما أرتاح
قالت " آيات " وهي تنظر اليه باهتمام :
- بابا متعبش نفسك فى الشغل عندك الشركة مليانه موظفين . لو سمحت
يا بابا صحتك اهم عندى من أى حاجة فى الدنيا
ابتسم لها قائلاً :
- ربنا يخليكي ليا يا حبيبتى
بدا وكأنه انتبه الى ما ترتديه .. فعقد حاجبيه بضيق قائلاً :
- ايه ده يا " آيات " ؟
ارتبكت " آيات " وهي تنظر الى ملابسها قائله :
- ايه يا بابا ؟
قال " عبد العزيز " بصرامة :
- ايه اللى انتى لبساه ده يا " آيات " .. البادى ضيق جداً عليكى وأنا قولتلك
قبل كده عايزة تلبسى بادر يبقى تلبسيه فوقيه جاكيت ومقفل كمان
قالت " آيات " بحنق :
- ما هو أنا لو لبست فوقيه جاكيت مقفل يبقى أصلا مش هيبان يا بابا
قال " عبد العزيز " بحزم :
- ان شاله عنه ما بان .. بنتى متمشيش ولا بسه لبس ملزق على جسمها
بالشكل ده وكل الرجاله عينهم راحه جايه عليها
شعرت " آيات " بالخجل وبالاضطراب فقالت :
- خلاص يا بابا أنا آسفة
فقال " عبد العزيز " بهدوء لكن بحزم :
- مش عايز أعلق على لبسك تانى يا " آيات " .. انتى كبيرة بما فيه الكفايه
عشان تميزي بين الصح والغلط
قالت " آيات " بعدم اقتناع :
- صح يا بابا معاك حق .. معدتش هلبس حاجة ضيقه كده تانى
ابتسم والدها قائلاً :
- طيب يلا يا حبيبتى اطلعى غيري هدومك عشان نتعدى سوا
أومأت برأسها وصعدت الى غرفتها وعلامات التبرم على وجهها .. بدلت
ملابسها فرن هاتفها قبل أن تتوجه الى باب الغرفة .. ردت قائله وهي
تلقي بنفسها على الفراش :
- أيوة يا " سمس " :
قالت " أسماء " :

- كنت بظمن انك وصلتى .. اتغديتي
قالت "آيات" :
- كنت لسه نزله أتغدى .. بابا جه بدرى النهاردة
ثم زفرت بضيق قائله :
- شلت الميك آب وأنا بركن العربية .. ولما دخلت الفيلا شافنى وادانى
محاضرة عشان البادى اللى كنت لابساه
قالت "أسماء" باستغراب :
- ماله البادى .. كان ثقيل مش شفاف
قالت "آيات" بهدوء :
- بيقولى ضيق وملزق .. وأعد يقولى بنتى متمشيش كده والرجاله تبص
عليها
ضحكت "أسماء" قائله :
- أبوكى ده عايزك تعنسي جميعه
ضحكت "آيات" قائله :
- شكله كده فعلاً
ثم قالت :
- يلا باى بأه عشان بابا مستنينى نتغدى سوا
قالت "أسماء" :
- ماشى يا موزه .. أشوفك بكره .. باى

خرجت "سمر" من غرفتها وأقبلت على والدتها التى تتحدث فى هاتفها
وقالت لها :
- ماما أنا خارجه .. رايحه عند "إيمان" شوية
أشارت لها أمها بالإنصراف وهى تتبادل المزاح مع صديقتها عبر الهاتف
وتنفجر ضاحكة .. ألقت "إيمان" عليها نظرة حزينه ثم فتحت الباب
وخرجت من بنايتها الأنيقه .. سارت قليلا فى الشارع الهادئ قبل أن تجد
سيارة أخرى طلبت من سائها أن يقلها الى أحد الأحياء المتوسطة ..
صعدت الدرجات العالية وأطرقت باب بيت "إيمان" فتح لها شاب فى
أواخر العقد الثانى يتميز بلحية خفيفة بمجرد أن رآها أخفض بصره ..
فقالته بخرج :
- "إيمان" موجودة ؟
قال بأدب دون أن ينظر اليها :

- لحظة واحدة
دخل الشاب وتوجه الى "إيمان" الواقفة فى الشرفة بإسدالها وقال لها :
- صحبتك بره يا "إيمان"
التفت "إيمان" وهتفت قائلة :
- هي جت .. ايه ده مخدمش بالى منها وهي طالعه

ابتسمت "إيمان" فى وجه "سمر" وعانقتها وأدخلتها الى غرفتها
وأغلقت الباب خلفهما .. قالت "إيمان" وهي تخلع اسدالها :
- كنت واقفة مستنياكى مخدمش بالى منك وانتي داخله العمارة
قالت "سمر" بمتسمه :

- اللي واخد عقلك
قالت "إيمان" مازحة :
- كنت بفكر فى حلة المحشى اللي ماما بتسويها على النار
ضحكت "سمر" قائلة :

- محشى بالليل كده
قالت "إيمان" ساخرة :
- بعيد عنك احنا عيلة مفترية بتحب تتعشى محشى
انفجرت "سمر" ضاحكة ثم وضعت يدها على فمها وقالت :
- حرام عليكى مضحكينيش كده أخوكى بره هيسمع صوتى
قالت "إيمان" ضاحكة :

- يا ستى خليه يسمع يمكن الضحكة تجيبه على ملا وشه ولا حاجه
سألته "سمر" وقد توقفت ضحكاتهما :

- هو لسه مش لاقى شغل
قالت "إيمان" بحزن :
- لا للأسف .. وحتى الشغل اللي بيتعرض عليه مبيعجبوش
سألت "سمر" بإستغراب :

- ليه بأه مبيعجبوش
قالت "إيمان" :
- كل شغلانه بيطلع فيها حاجات غلط ومبيرضاش يشتغلها .. يعني آخر
شغلانه جتله كانت فى بنك ومرتب ومركز وكل حاجة واحد قريبننا هو اللي
اتوسطله جامد فيها وجابهاله
قالت "سمر" :
- وبعدين ؟

- قالت "إيمان" :
- رفضها عشان فى البنك ده بيتعاملوا بالربا .. قروض بفوايد يعني هتفت "سمر" بحماس :
- والله برافو عليه .. "على" أخوكى ده راجل محترم هتفت "إيمان" بخبث :
- آه قوليتيلى
- تضرجت وجنتا "سمر" خجلاً وقالت :
- ايه فى ايه ايه المشكلة يعني لما أقول انه محترم .. عادى يعني قالت "إيمان" بخبث :
- طيب طالما انتى شايفه انها عادى .. نخليها عادى قالت "سمر" لتغير الموضوع :
- أخبار تكليفك ايه
- قالت "إيمان" بضيق :
- متفكرينيش طالع عيني فيه .. امتى بأه أخلص وارتاح ضحكت "سمر" قائله :
- ربنا يكون فى عون العيانيين اللى تحت ايدك
- قالت "إيمان" بحنق :
- مش عارفه ايه اللى كان خلانى أدخل طب أسنان .. ملها تجارة ما هى زى الفل .. شوفتى "آيات" و "أسماء" فى التراوة خالص .. مش مطحونين زينا
- صمتت قليلاً ثم قالت :
- أصلاً تحسىي اننا كلنا على بعضنا كده مجموعة غريبة ومتناقضة كادت "سمر" أن تتحدث لولا الطرقات التى سمعتها على الباب اعتدلت فى جلستها فقالت لها "إيمان" مطمئنة :
- خليكي زى ما انتى يا بنتى مستحيل يكون "على"
- فتحت "إيمان" الباب فدخلت سيدة بسيطة يبدو على وجهها علامات الطيبة والبساطة أقبلت على "سمر" وقبلتها قائلاً :
- ازيك يا "سمر" عامله ايه يا حبيبتي وازاى ماما
- قالت "سمر" مبتسمة :
- كويسه الحمد لله يا طنط ازي حضرتك
- قالت والدة "إيمان" بسعادة :
- الحمد لله يا حبيبتي كويسه .. انتى منورانا والله
- قالت "سمر" :

- ربنا يباركك يا طنط ده نورك
قالت والدة "إيمان" بحماس :
- خمس دقائق المحشى هيخلص وأجبلكوا تتعشوا سوا انتى و "إيمان"
قالت "سمر" بحرج :
- لا يا طنط متشكره . أنا أصلا شويه وماشيه
هتفت والدة "إيمان" قائله :
- لا والله ما يحصل .. انتى بخيله ولا ايه .. لازم تكلى المحشى بتاع أم
"إيمان" ده جرانى كلهم لما يكون عامله محشى يقولولى ريحة المحشى
بتاعك غير أى حد يا أم "إيمان"
ابتسمت "سمر" بحرج قائله :
- أكيد طبعا هيبقى حلو طالما من ايدك .. تسلم ايدك يا طنط
التفتت والدة "إيمان" الى "إيمان" قائله بعتاب :
- ماعده صحبتك من غير حاجة تشربها من ساعتها
قالت "إيمان" بلا مبالاة :
- يا ماما هى حد غريب .. دى "سمر"
قالت أم "إيمان" بغیظ وهى تغادر :
- أصل الذوق مبيتشراش .. هروح أجبلكوا كوبايتين كركديه .. لسه
عامله الصبح
خرجت والدة "إيمان" و أغلقت الباب خلفها .. التفتت "إيمان" الى
"سمر" قائله بسخرية :
- عيلة همها على بطنها مفيش حاجة ورانا إلا الأكل والشرب
انفجرت "سمر" ضاحكة مرة أخرى وهى تضع يدها على فمها لكتم
ضحكاتها .

فى صباح أحد الأيام تأنقت "آيات" كعادتها فى هذا اليوم من كل اسبوع ..
توجهت الى الجامعة لتلتقى بـ "أسماء" أمام باب المدرج .. قالت لها
"أسماء" بلؤم :
- ايه القمر ده انتى راحه حفلة ولا محاضرة
ابتسمت "آيات" قائله بلهفه :
- حلوه بجد ؟
قالت "أسماء" مبتسمة :
- زى القمر يا "يويو"

دخلت الفتاتان المدرج واختارتا مكان في المنتصف .. جلست "آيات" تنظر الى باب المدرج في انتظار قدومه .. ظهر أمامها فجأة .. فساد الهدوء .. وتعلقت أنظارها به حتى حياهم تحية الصباح .. ابتسمت "آيات" وهي تتذكر يوم أن التفتته منذ ثلاث سنوات عندما أصر السائق على إبقائها معه الى حين حضور والدها وتسديد مبلغ التصليح .. تذكرت نظراته اليها وقتها .. وابتسامته الرقيقة .. تذكرت كيف كان متضايقاً من معاملة الرجل لها وكيف وقف بجوارها ليحميها منه وليردعه إن تطاول بكلماته عليها .. شعرت بالأمان وهو واقف بجوارها في هذا الموقف الذي تعرضت له في أول شهر لها بالجامعة .. كان مظهرها أبسط وملاحظها أرق .. كيف لا وقد كانت تخلو من تلك الأصباغ الصناعية التي تملأه الآن .. كانت تبدو كغزال برئ ضل طريقه ويلتفت حوله يبحث عن يخرجه من مأذقه .. عادت من شرودها الى واقعها عندما تعلقت الأنظار بالفتاة التي دخلت القاعة دون أن تنتظر ادناً من "آدم" .. التفت اليها "آدم" وقال بصارمة :

- انتى يا آنسه .. راحه فين ؟

التفتت الفتاة تنظر اليه فتحركت خصلات شعرها الذهبية فى رقة .. وقالت بهدوء :

- دخله المدرج

نظر اليها "آدم" نظرة طويلة وبدأت ابتسامة سخرية على فمه .. بدأ وكأنه قد نفذ الى أعماقها واكتشف كنهها .. قال بحزم وتحدى وهو يشير الى باب المدرج :

- اتفضلى اطلعى بره

علت الأصوات وتمایل البعض على أذن جاره هامساً .. سمعت "آيات" الفتاة التي بجوارها تقول للتي خلفها :

- أوبا .. "ساندى" شكلها بأه وحش أوى

قالت الفتاة خلفها :

- أحسن البنات دى مبطبقهاش .. شايفه لابسها عامل ازاي قالت أخرى بغيظ :

- معاكى حق والله مش عارفه ازاي يدخلوا الأشكال دى الجامعة صاحت أخرى :

- يخربيتها دى فتحة البادى ولا نفق شبر

تعالت ضحكات الفتيات .. فأعادت "آيات" النظر الى الفتاة تتفحصها .. التفتت "ساندى" وهي تقول لـ "آدم" بتعالى :

- مش من حقك تمنعنى انى أدخل المحاضرة
قال "آدم" وهو يرفع حاجبيه بتحدى :
- مش من حقى ؟
صمت قليلاً ثم نظر إليها ببرود قائلاً :
- طيب حضرتك ممنوعة من دخول محاضرات لحد آخر السنة .. ودرجات
حضورك كلها هتتخصص منك
زفرت "ساندى" بضيق وقد احمر وجهها غضباً .. وغادرت المدرج
بعصبيه
ابتسمت "آيات" وقد أسعدها ما فعله "آدم" بتلك الفتاة
ابتسم "آدم" فى نفسه .. فهو يعلم جيداً من هى "ساندى" .. ومن يكون
والدها .. والأهم .. يعلم جيداً ماذا يريد منها .

الفصل الثالث من رواية جواد بلا فارس



دخل "آدم" منزله لتستقبله والدته قائلة بعتاب :
- اتأخرت ليه يا "آدم"
زفر "آدم" بضيق وقال وهو يغلق الباب :
- كنت مع واحد صحبى
سار متوجهاً الى غرفته فأقبلت أمه خلفه قائلة بغضب :
- وصاحبك هو اللى بتسهر عنده لنص الليل وساعات بتبات كمان ..
وسايب عنده هدومك وبدلك ؟
التفت "آدم" صائحاً بغضب :

- انتى عايزه منى ايه ؟

قالت أمه والدموع فى عينيها :
- عايزاك ترجع "آدم" بتاع زمان
صاح وهو يغلق الباب فى وجهها :
- خلاص مات .. "آدم" بتاع زمان مات
تساقطت العبرات على وجهها وتوجهت الى غرفتها وفرشت سجادة
الصلاة ووقفت بين يدي الله تبكى حال ابنها وتدعو له بالهداية

توجه "آدم" الى فراشه وهو يشعر بالغضب .. بالغضب من نفسه وعلى
نفسه .. بالغضب من كل شئ .. ظل جالساً يفكر بشرود .. ثم قام وتوجه
الى حاسوبه .. اتسعت عيناه دهشة ولاحت ابتسامه على شفثيه عندما
رأى البريد الإلكتروني الذى وصله .. فتحه بلهفة .. وقرأ ما جاء فيها :
- بسم الله تحية طيبة وبعد .. مؤهلاتك الدراسية ممتازة .. لكن ليست لديك
الا خبرة أكاديمية فقط وتفتقر الى الخبرة العملية .. نعتذر عن قبول طلبك
بالإنضمام الى شركتنا

أغلق "آدم" الحاسوب بعصبية وعلامات الغضب والضيق مرسومة على
وجهه .. أخرج سيجاراً وأشعله وظل ينفث دخانه بعصبية شديده .. طرقت
أمه الباب ففتح لها وهو يخفى السيجارة خلف ظهره .. رأت أمه الدخان
المتصاعد بجواره فنظرت اليه ببرود قائله :

- لو مش خايف على نفسك على الأقل خاف عليا
أطرق "آدم" برأسه ودخل يطفئ السيجارة .. دخلت أمه خلفه وهى تقول
:

- لحد امتى يا "آدم" .. لحد امتى هتفضل مش راضى عن حياتك كده
قال "آدم" بحده :

- ماما لو سمحتى اقفلى على الموضوع ده
قالت أمه بحزن :

- ليه يا ابنى متستعوضش ربنا .. وتخلى اللى حصل ده بيباه دافع ليك انك
تكون أحسن .. مش انك تبقى كده
نظر اليها "آدم" ببرود وهو يقول :

- ومالى كده .. دكتور فى الجامعة وزى الفل ومليون واحدة بتتمنانى
قالت أمه بحزن :
- حياتك كلها على بعضها غلط يا " آدم " .. أنا قلبى حاسس انك بتعمل
حاجات كتير غلط .. الغلط بيجر غلط يا ابنى .. خليك مع ربنا ومتغضبوش
قال " آدم " بتهكم :
- يا ماما انتى طيبة زيادة عن اللزوم .. مفيش حد مبيغلطش دلوقتى .. كل
الناس بتغلط .. وكل الناس بتبص للى فى ايد غيرها .. وكل واحد بأه
مستنى التانى يقع عشان ينهش فيه .. ولو مبقيتيش زيهم مش هتعرفى
تعيشي وسطهم
ترقرقت العبرات فى عيني أمه وهى تقول :
- زى ما فى الوحش فى الحلوى يا " آدم " .. ليه تاخد الوحش مثال لىك
وتمشى وراه .. ليه متبصش للحلوى يا ابنى وتعمل زيه
قال " آدم " بتهكم :
- عايزانى أبقى طيب وأهبل عشان الناس تدوس عليا .. عايزانى أبقى
طيب وأهبل عشان الكل يبأه فوق وأفضل أنا تحت رجليهم .. لا يا ماما ..
أنا هبقى زيهم وأحسن منهم كلهم .. واللى ضاع منى هعوضه تانى ..
وهنتقم من كل اللى ظلمنى
قالت أمه بحزم وهى ترمقه بنظرات ذات معنى :
- كويس انك عارف ان الظلم وحش وبيوجع .. وان المظلوم مبيتمناش
حاجة فى الدنيا غير انه ينتقم من اللى ظلمه
قالت ذلك ثم غادر الغرفة وتركت " آدم " حائراً مضطرباً حائقاً

فى صبيحة أحد الأيام خرجت " آيات " من الفيلا بسيارتها الفارهة .. سارت
بها فى شوارع القاهرة .. توجهت الى مكان كتب عليه " جمعية رسالة
الخيرية " توجهت الى الداخل وتوجهت الى مكتب احدى الفتيات التى هبت
واقفة وقالت بسعادة :
- يا أهلا وسهلاً " آيات " شخصياً عندنا
قبلتها " آيات " قائلة :
- وحشانى أخبارك ايه
قالت الفتاة :
- بخير الحمد لله .. اتأخرتى يعنى مش عادتك

قالت "آيات" وهي تخرج سي دي من حقيبتها :

- معلش بس انشغلت شوية اليومين اللي فاتوا

قالت الفتاة مبتسمه وهي تأخذ منها السي دي :

- ولا يهملك يا قمر .. تسلم ايدك

قالت "آيات" وهي تهتم بالمغادرة :

- يلا أشوفك بعدين

قالت الفتاة بإستنكار :

- على طول كدة تعالى اشربي حاجة الأول

قالت "آيات" :

- معلش عشان مستعجلة المرة دي

ابتسمت الفتاة قائله :

- خلاص برحتك .. ربنا يجازيكى خير يا "آيات" ويجعله فى ميزان

حسناتك

ابتسمت لها "آيات" ولوحت لها مودعة .. خرجت "آيات" من المبنى

الذى تزوره كثيراً منذ أن التحقت بالجامعة .. حيث تعرفت فيها على احدى

الفتيات المتطوعات بتلك الجمعية .. شجعت الفتاة "آيات" على التطوع

فى قسم كتابة الكتب للمكفوفين .. فتشارك "آيات" فى كتابة الكتب

الثقافية والعلمية والدينية على الكمبيوتر ويتم تحويلها بعد ذلك الى طريقة

"برايل" لتمكين المكفوفين من قرائتها والإستفادة منها .. كانت "آيات"

تشعر بسعادة بالغة وهي تقدم تلك المساعدة لأولئك الذى حُرِّموا نعمة

البصر .. كانت تجد سعادتها فى الشعور بأنها تقدم على عمل مفيد تُنفع به

غيرها .. وتستغل وقت فراغها فى هذا العمل المفيد .. ركبت "آيات"

سيارتها وانطلقت فى طريقها

- فاكر يا "زياد" لما كنا بنلعب كورة مع بعض هنا تحت البيت

قال "آدم" هذه العبارة وهو واقف مع "زياد" فى شرفة بيت هذا الأول ..

نظر "زياد" الى الأسفل يراقب الأطفال الذين يجرون خلف الكرة

والابتسامه على شفثيه قائلاً :

- أيوة طبعاً فاكر .. كانت أيام حلوة أوى

قال "آدم" وهي ينظر الى الأفق :

- كانت أيام بريئة أوى

التفت "زياد" لينظر الى "آدم" .. يراقب تعبيرات الوجوم على وجهه ..

فقال :

- مش عجبني حالك يا "آدم"

قال "آدم" بتهكم دون أن ينظر إليه :

- ولا أنا عجبني حالي

قال "زياد" بحنق :

- طيب ليه متغيرش حالك ده .. ليه سايب نفسك لليأس كده .. ليه

متحاولش تقوم وتقف على رجلك من تاني

قال "آدم" بصرامة وهو يزم شفثيه بقوة :

- لما أرجع حقي الأول

قال "زياد" بقلق :

- وهترجعه ازاي يعني ؟

قال "آدم" بقسوة وهو ينظر الى "زياد" :

- عشان تحارب التعالب لازم تبقى تلعب زيهم

ثم قال بقسوة شديدة :

- وساعتها يا ويله اللي يقع فى ايدى هاكله بسنانى

قال "زياد" وهو يزفر بضيق :

- شكل كده مفيش فايدة من الكلام معاك .. اللي فى دماغك فى دماغك

قال "آدم" وهو يحاول تناسى الأمر :

- انت راجع شرم امتى ؟

قال "زياد" :

- كمان اسبوع

أوماً "آدم" برأسه وعاد ينظر الى الأفق وزرقة عيناه تختلط بزرقة

السماء .. أخذ يتذكر كم وقف فى تلك الشرفة يتطلع الى قرص الشمس

الذهبي ويرسم بخياله أحلاماً كبيرة .. أكبر من واقعه .. هكذا هو دائماً ..

يحب الشئ صعب المنال .. يعشق المستحيل .. متميم بالتحدى .. رغم

بساطة عيشه والظروف التى تربي بها .. إلا أن أحلامه فاقت واقعه ..

فصعد السلم خطوة بخطوة بعزيمة وصبر وإصرار .. حتى وصل .. وصل

الى قمة النجاح .. وصل الى ما أراد .. وصل الى ما كان يراه مستحيلاً ..

أمسك بيده ما كان يراه صعب المنال .. ف شعر بالزهو .. والفخر ..

والسعادة .. لكن أحلامه تحطمت على صخرة الجشع وتهاوت أشلائها فى

بئر الخيانه .. عندها بدأ يتعلم .. أن الحياة مثلما تعطى تأخذ .. ومثلما

ترسم البسمة ترسم الدمعة .. لكنه لم يتقبل ذلك .. لم يتقبل الخسارة .. لم

يتقبل المكتوب .. أراد أن يحارب القدر .. وأن يثور عليه .. وأن ينزع

رداء الرضا .. ويرتدى حلة الإنتقام .. لكنه لا يعلم أن الإنتقام سيف ذو
حدين .. حتى وان انتصرت به وقتلت خصمك .. فستنظر الى يدك فى
النهاية لتجد النصل الآخر مزق يدك بحدته .. وسالت منه دمائك .. لم يعلم
.. لكنه سيعلم .. لكن السؤال الآن .. هل سيفيد وقتها الندم !؟

ها هو عريس آخر يطرق باب بيتها .. عريس آخر ورؤية أخرى ومقابلة
ستزيد من عمق جرحها ان تُوجت كسالفاتها بالرفض .. ليس منها ..
بل منه .. دائماً لا تأخذ فرصتها فى الرفض .. فقبل أم تُعلنها .. يُعلنها
العريس .. وتضم الى باقة جراحها جرحاً آخر .. يطعن كرامتها .. ويجرح
أنوثتها .. ويزلزل ثقتها بنفسها .. فتلجأ الى دوائها الذى يريحها دائماً ..
ويزيل ما بها من توتر .. الطعام .. الذى قاله عنه نبينا صلى الله عليه
وسلم : " ما ملأ ابن آدم وعاء شراً من بطنه " .. لكنها لم تهتم .. فكل ما
يهم .. هو أن تأكل وتأكّل .. لتفرغ ما بها من شحنات مكبوتة وصرخات
مكتومة .. تلجأ الى الطعام كما يلجأ المدمن الى المخدر .. يعلم أنه يضره
.. ويؤذيه .. لكنه لا يستطيع مقاومته .. فهو البئر الذى يلقي فيه الآمه
وأحزانه .. رغم أنه يعلم جيداً .. أنه حل مؤقت .. ويجب عليه أجلاً أم
عاجلاً أن يواجه واقعه .. الذى يهرب منه الى مخدره
قالت " ايمان " لأمها بتوتر :

- ماما أنا خائفة

قالت أمها بحماس :

- متخفّيش يا بت .. ان شاء الله هتعجبيه وهيكون من نصيبك

ثم قالت :

- ده بسم الله ما شاء الله عليه دكتور وعنده عيادة الله أكبر .. وأخوكى

" على " بيشكر فيه أوى

ثم تفرقت العبرات فى عينيها وقالت بطيبة الأمهات :

- نفسى أوى أفرح بيكي يا " ايمان " يا بنتى .. ده منى عيني من الدنيا دى

أشوفك فى بيتك انتى و " على " أخوكى

طرق " على " الباب ففتحت أمه فدخل ينظر الى " ايمان " قائلاً :

- يلا يا " ايمان " .. العريس بره

شعرت " ايمان " بتوتر بالغ وتضرجت وجنتاها بحمرة انتشرت فى وجهها

كله حتى صار كحبة الطماطم .. قال " على " وهو يتفرس فيها :

- ايمان انتى حطه حاجة على وشك

قالت بسرعة :
- لا والله يا "على"
ابتسم قائلاً :
- طيب يلا

خرجت "إيمان" وقدميها تصطكان ببعضهما البعض .. جلست على أقرب مقعد وهي لا تجرؤ على رفع وجهها .. كان العريس بمفرده .. جلست معه ومع والدها وأخوها "على" قرابة النصف ساعة .. لم تتحدث خلالها أى كلمة وهو لم يوجه أى حديث لها .. استأذن وطلب الإنصراف .. شعرت "إيمان" فى داخلها بالحنق والحيرة .. لماذا لم يوجه اليها أى حديث .. لماذا رحل سريعاً .. بالتأكيد لم تعجبه .. ظلت تلك الأسئلة تدور برأسها .. سمعت والدها وهو يخبره بأن كلا الطرفين سينتظر رداً من الآخر يعد يومين .. دخلت غرفتها وأغلقت الباب وارتمت على فراشها تبكى قهراً .. كانت تشعر فى قرارة نفسها بأنها لم تعجبه .. وسينضم اسمه الى قائمة من رفضوها

دخلت "سمر" المطبخ لتسخن الطعام لنفسها .. أحضرت طبقها وجلست أمام التلفاز .. عادت أمها من الخارج قائلة :
- السلام عليكم
التفتت "سمر" وردت السلام .. فقالت أمها وهي تلقى بنفسها على المقعد متهاكئة :

- كان عندنا شغل كثير أوى النهاردة
قامت "سمر" وتركت طبقها على الطاولة وقالت بحنان :
- هقوم أسخنلك الأكل
ابتسمت أمها بوهن قائلة :
- تسلمي يا حبيبتى

دخلت "سمر" المطبخ تسخن الطعام لوالدتها .. شردت وهي تتذكر لقطات من الماضى .. لقطات كانت تشعر فيها بالأمان وبالسعادة .. لقطات لرجل ذهب ولن يعود يوماً .. ليس لأنه رحل عن الدنيا وفارق الحياة .. بل لأنه ببساطة .. لا يريد العودة .. لا يريد تحمل المسؤولية .. لا يريد أن يكون زوجاً .. لا يريد أن يكون أباً .. وعلى الرغم من ذلك لا تستطيع أن تكرهه .. حاولت ان تكرهه وأن تنساه وأن تمحيه تماماً من ذاكرتها .. لكن ذكراه

أبت إلا أن تظهر أمام عينيها دائماً .. لتذكرها بتخليه عنها وعن أمها ..
لتذكرها بأنها فقدت درعها الحامي .. لتذكرها بأنها عاشت طوال عمرها
محرومة من أب نسي معنى الأبوة .. خرجت من شرودها لتتنظر الى الطعام
الذى يغلى .. أحضرت لأمها طبقها وناولتها اياه .. ابتسمت أمها بوهن
قائله :

- رجعتى امتى النهاردة من المستشفى ؟
قالت "سمر" بلا مبالاة وهى تمد يدها لتأخذ طبقها الموضوع على
الطاولة :

- زى كل يوم
قالت أمها وهى تبدأ فى تناول طعامها :
- مفيش جديد
هزت "سمر" رأيا نفيأ وقالت بهدوء :
- لا .. مفيش جديد

تعالت أصوات أبواها بالشجار كما هي عادتھا .. وكعادتها هربت الى
غرفتها وأغلقتها عليها وجلست على فراشها .. أحضرت "أسماء"
هاتفها بسرعة وأدخلت سماعاته فى أذنها واختارت احدى أغنياتها
المفضلة ورفعت صوتها الى أعلى درجة واستلقت على فراشها تستمع
اليها وهى مغمضة العينين ..
شردت بخيالها وهى تحاول التذكر متى بدأت تلك الشجارات التى تتكرر
ولا تنتهى أبداً .. لم تستطع أن تتذكر متى بدأت تلك الشجارات .. لكنها
تتذكر أمراً واحداً .. وهو أنها لم ترى أبويها على وفاق إلا فيما ندر ..
على الرغم من المستوى الإجتماعى الراقى لأبويها .. ومستوى المعيشة
الذى تعيش فيه وتنمى الكثيرات .. إلا أنها كانت تشعر بالغيرة .. بل
والحسد .. من الفتيات اللاتى يعشن بين أبوين يعرف كل منهما كيف
يحترم الآخر .. ربما لهذا توطدت صداقتها بـ "آيات" واستمرت لأعوام
على عكس علاقاتها السابقة والتى كانت تنتهى بسهولة بعدما تستشعر
"أسماء" الشعور بالنقص الذى تشعر به فى تلك النقطة .. أما "آيات"
فوالدتها متوفية .. ووالدها يعيش وحيداً معها .. فلم تشعر معها بمدى
نقصها .. لأن "آيات" تعاني نقصاً هى الأخرى .. انتهت الاغنية لتعلم بأن
الشجار مازال قائماً ولم ينتهى .. أعادت تشغيلها مرة أخرى .. وهى
تغمض عينيها فى ألم

جلست "ساندى" أمام والدها على المكتب قائلة بعصبية :
- لازم تشوفلك حل معاه يا بابا .. أخرجنى أدام الدفعة كلها وكمان قالى
متحضرش محاضراتى طول السنة وخصم درجات الحضور
ثم قالت بضيق شديد :
- فى داهية درجات الحضور المهم عندى شكلى أدام الدفعة .. لازم يردلى
اعتبارى ويسمحلنى أحضر محاضراته
ثم هتفت بغضب :
- لازم يا بابا تتكلم معاه وتخليه يرجع عن قراره ده .. عايزه من
المحاضرة الجاية أدخل أدام الدفعة كلها وأعد وأنا حطه رجل على رجل
قام والدها والتف حول المكتب ووربت على وجنتها قائلاً :
- متقلقيش يا "ساندى" .. أنا هروحله بكره الجامعة وأحل المشكلة دى
ابتسمت "ساندى" فى فرح قائلة :
- ميرسى يا بابا
ابتسم لها قائلاً :
- شيلبى الموضوع من دماغك خالص ومتشيليش هم .. وفكرى بس فى
حفلة عيد ميلادك
قالت "ساندى" فى مرح :
- أوكى
خرجت "ساندى" من شركة والدها وهى تقول لنفسها فى تحدى :
- اما أشوف أنا ولا انت يا دكتور "آدم"

سمع "آدم" طرقات على باب مكتبه بالكلية فأذن بالدخول .. دخل
"شكرى" والد "ساندى" وقدم نفسه الى "آدم" الذى تظاهر بأنه لم
يسمع اسمه من قبل .. فذكره قائلاً :
- أنا والد "ساندى"
قال "آدم" وهو يتظاهر بالحيرة :
- "ساندى" !
قال "شكرى" :
- أيوة .. البنت اللى حضرتك طرديتها من المدرج فى محاضرتك اللى فاتت
قال "آدم" بخبث :

- أيوة أيوة افكرت .. اتفضل
جلس "شكرى" أمام "آدم" الذى طلب له فنجاناً من القهوة .. تنحج
"شكرى" قائلاً وهو يضع ساقاً فوق ساق :
- بنتى "ساندى" مكنتش تقصد الكلمه اللى قالتها .. طبعاً حضرتك يا
دكتور تقدر تمنعها من حضور محاضراتك زى ما انت عايز
قال "آدم" وهو يستند الى ظهر المقعد ويضع ساقاً فوق ساق :
- أيوة وده اللى عملته فعلاً
تنحج "شكرى" مرة أخرى وقد بدا عليه ثقل المهمة الملقاه على عتقه ..
فلم يعتد أن يطلب من أحد أى شئ .. فهو معتاد فقط على القاء الأوامر ..
قال بنبره فيها شئ من التعالى :
- ياريت يا دكتور تسمعها ترجع تانى تحضر محاضراتك .. لان اللى
حصل ده خلى شكلها وحش أدام زمايلها
تظاهر "آدم" بأنه يفكر فى الطلب .. ثم قال بلهجة متعالیه :
- مفيش مشكلة .. بس تعذرلى عن اسلوبها معايا .. وساعتها هوافق انها
ترجع تحضر محاضراتى
ابتسم "شكرى" وقال :
- مفيش مشكلة .. وحضرتك معزوم على عيد ميلاد "ساندى" آخر
الإسبوع .. ومنتظرين حضورك ان شاء الله
ابتسم "آدم" قائلاً :
- ده شرف ليا يا فندم
أخرج "شكرى" كارت من جيبه وأعطاه الى "آدم" قائلاً :
- ده الكارت بتاعى
أخذه منه "آدم" بترفع وألقى عليه نظرة ساريعه ثم وضعه فوق المكتب
بلامبالاة .. قام "شكرى" قائلاً :
- بعد اذنك يا دكتور
ابتسم "آدم" قائلاً :
- اتفضل
خرج "شكرى" فأمسك "آدم" بالكارت مرة أخرى وأخذ يحركه فى الهوا
قائلاً وعيناه تشعان خبثاً :
- أهو هو ده الكارت اللى أقدر ألعب بيه على حق

وضعت "آيات" حاسوبها فوق قدميها وأخذت تنظر باسمه الى صورة "آدم" التي أخذتها من حسابه على الفيس بوك .. وحفظتها عندها .. تذكرت مرة أخرى يوم أن ساعدها وهدأ من روعها .. كان رجلاً وسيماً .. لكن اهتمامها بكلمة رجل يفوق اهتمامها بكلمة وسيماً .. لطالما كنت "آيات" تحلم بمواصفات معينة في فارس أحلامها .. تمنى أن يكون سنداً لها .. وأن يحتويها وتشعر معه بأنه رجلها وحاميها .. كانت شخصية الرجل المثالي التي تحلم بها متأثرة بشخصية والدها .. دائماً كانت ترى والدها رجلاً مميزاً .. وعلى الرغم من تضايقها من بعض تحكماته إلا أنها تعي أنه يفعل ذلك من أجل صالحها .. وأنا تمثل أهم ما في حياته .. افتقدت "آيات" حنان وحضن أمها منذ الصغر .. فكان والدها كل شئ بالنسبة لها .. وحاول أن يكون كل ما افتقدته في حياتها .. كذلك تتمنى أن يكون فارسها .. ليس حبيباً فقط .. بل فارساً .. يتمتع برجولة وشهامة الفرسان .. وكانت تشعر أن كل هذه الصفات .. موجودة في "آدم" .. فكانت تضي الساعات في مطالعة صورته تحفر كل تفاصيلها في أعماق ذاكرتها .. تشرد بخيالها الى مكان بعيد .. مساحة شاسعة من الخضرة التي تتراقص مع نسيمات الرياح .. والسماء بلونها الأزرق .. لون عيناه .. وقرص الشمس الذهبي الذي يبتسم لها ويبت فيها السعادة والأمل .. والنسيمات الرقيقة تداعب خصلات شعرها الأسود وتتغزل في ملامح وجهها .. وفستانها الأبيض الذي تتطاير طياته حولها .. ومن بعيد يأتي فارسها على حصان أصيل كمن يمتطيه .. يقبل عليها بعزم واصرار ليوقف أمامها يداعب صفحة وجهها بنظراته الشغوفه .. يمد يده اليها والابتسامه تملو شفثيه .. تتلمس الطريق الى كفه وعيناها لا تفارق عينيه .. تمتطى الجواد خلفه ليطير به وقد لفت ذراعيها حوله وهي تغمض عيناها لتتعم بدفء قربه .. كان يراودها هذا الحلم وهذه التخيلات كثيراً لكن كانت اللوحة ينقصها وجه الفارس .. وها هي تنظر الى هذا الوجه الآن .. ابتسمت وهي تنظر الى صورة "آدم" وتقصها بعينيها لتضعها داخل حلمها

كانت "ساندى" تعلم أن حضور "آدم" لعيد ميلادها رداً كبيراً لكرامتها التي أهدرها أمام زملائها .. ابتسمت بسعادة وهي تتوقع دهشة صديقاتها في عيد الميلاد عندما تقع عيناها على "آدم" .. خطت لهذا اليوم جيداً لتبدو فيه كملكة متوجة تسير بين رعاياها

توجه "آدم" ببذلته الأنيقة وسيارته الفارهة الى هذا البرج السكنى لحضور عيد ميلاد "ساندى" .. كان "آدم" يعى جيداً كل خطوة يخطوها .. ويكيل تصرفاته بمكيال المصالح .. ويعلم أن "ساندى" هى التى ستوصله الى مبتغاه .. ستكون أدواته التى تعينه على تحقيق مراده .. لكن عليه اللعب بحذر .. حتى لا يخسر اللعبة قبل أن تبدأ !
دخل المنزل بعدما فتحت الخادمة .. بيت أنيق عصري يتميز بالفخامة والرقى .. أخذ يجول بنظره بين الحضور .. حتى وقع نظره على "ساندى" بشعرها الذهبى الذى أخذ يتمايل فوق ظهرها العارى .. ووجهها الذى تعلقه الزينه .. وتاج صغير يزين رأسها .. وفستانها الأسود القصير .. نظر الى عيون الرجال المعلقة بها .. نظر اليهم فى سخريه .. ود لو صرخ بهم .. لماذا تحمقون فيها هكذا .. فما هى إلا فتاة كغيرها من بنات جنسها .. فتاة مصطنعة تتوارى خلف الأظافر الصناعية والرموش الصناعية والعدسات الصناعية وحمرة الوجه الصناعية وصبغة الشعر الصناعية فما هى إلا امرأة اتخذت من كل ما صنعه البشر للزينه وسيلة لتبدو كملكة .. لكن هيهات .. فليست تلك ملكة من الملكات .. الملكة تخطف القلوب بنقائها والعيون بصفائها .. أما تلك فهى تشعرك بأنك واقف أمام مانيكان للعرض فقط .. وأحياناً يكون قابلاً للمس !!

التفتت "ساندى" لتقع عيناها على "آدم" الواقف ينظر اليها .. أخفى سريعاً نظراته المتهمكة وابتسامته الساخرة ووقف مكانه .. ينظر اليها بعمق .. بادلته نظراته .. وابتسمت .. وكمان توقع .. اقتربت !
أقبلت تتهادى فى خطواتها وحيته وهى تمد يدها قائلة :

- أهلاً وسهلاً دكتور "آدم"
استقبل كفها فى كفه وقال بهدوء :

- أهلاً بيكى

ثم قال :

- كل سنة وانتى طيبة

ابتسمت فى سعادة وهى تقول :

- وانت طيب يا دكتور

أخرج "آدم" من جيبه علبة أنيقة وقدمها لها وأنظاره مركزة عليها يرقب تعابير وجهها .. اتسعت عيناها دهشة ثم رفعت حاجبها فى عدم تصديق وابتسامتها تتسع شيئاً فشيئاً تناولت منه العلبة الأنيقة لتجد سلسلة ذهبية

تحمل حرفاً ذهبياً .. أول حرف من اسمها .. نظرت اليه بسعادة قائله :
- كلك ذوق يا دكتور
رسم "آدم" ابتسامة ساحرة على شفثيه يعلم تأثيرها جيداً .. وقال بصوته
الرخيم :
- أتمنى انها تكون عجبتك
ابتسمت قائله وهى تنظر اليه بسعادة بالغة :
- أكيد عجبتنى
ثم أشارت بيدها قائلاً :
- اتفضل

جلست بجواره وأشارت للنادل ليقدم له مشروباً .. حركت وجهها برقه
لتزيل الخصلات الذهبية التى تجمعت أمام عينها .. كانت تعى جيداً نظرات
مثيلاتها المركزة عليها .. ومشاعر الغيرة التى تقطعن .. رأت احداهن
تميل على أذن الأخرى هامسه .. فارتسمت ابتسامة رضا على شفثيها ..
فلطالما أحببت أن يتهامس الناس حولها .. ونظرات الغيرة تشع من
عيونهم .. كان "آدم" مدرك ما تشعر به تماماً .. فهو خبير فى نفوس
"ساندى" ومثيلاتها .. يعلم أنهن لا يثيرهن سوى المظهر الجذاب ..
والإسم الرنان .. أعطاهما ما تريد .. ليأخذ فيما بعد ما يريد

أقبلت "أسماء" على "آيات" التى تجلس على احدى الطاولات فى
الكافيتيريا شاردة ساهمة .. حركت "أسماء" كفها أمام وجه "آيات"
قائله :

- ايه .. اللى واخذ عقلك
ابتسمت "آيات" ابتسامة واهنة وهى تقول :

- كنت مستنياكى
قالت "أسماء" ضاحكة :

- ما هو واضح
ثم قالت :

- شوفت "أحمد" وأنا جايه وسألنى عليكى
قالت "آيات" ببرود :

- طيب

قالت "أسماء" بتردد :

- وكلمنى عنك
 قالت لها "آيات" بدهشة :
 - يعني ايه كلمك عنى؟ .. قالك ايه يعني ؟
 قالت "أسماء" وهى تنظر اليها :
 - قالى انه بيحبك يا "آيات"
 نظرت اليها "آيات" بدهشة .. للحظات أجم لسانها وتجمدت ملامحها ..
 قبل أن تظهر فيما بعض شرارة فى عينيها وهى تقول :
 - هو مش هيبطل بأه .. ميت مرة أقوله مفيش حاجة بينى وبينه .. وانه
 صديق مش أكثر
 قالت "أسماء" وهى تحرك كتفيها بلامبالاة :
 - أنا قولت أقولك عشان تبقى عارفه
 صمتت "آيات" قليلاً وقد بدا عليها الضيق .. ثم قالت :
 - وقولتيله ايه ؟
 قالت "أسماء" :
 - قولته هقولك .. قالى منتظر منك الرد
 قالت "آيات" بحده :
 - قوليله يبطل شغل المراهقين ده وميتعشش نفسه على الفاضى
 قالت "أسماء" :
 - خلاص يا "آيات" متضايقيش نفسك
 قالت "أسماء" فجأة وهى تتطلع الى نقطة ما خلف "آيات" :
 - "أحمد" جاى نحيتنا
 زفرت "آيات" بضيق .. قال "أحمد" مبتسماً :
 - صباح الخير يا بنات
 قالت "آيات" ببرود :
 -صباح النور يا "أحمد"
 لمس "أحمد" البرود فى صوتها واستشعره نظر الى "أسماء" فعلم أن
 هذا البرود ما هو الا رد على مشاعره تجاهها .. أطرق برأسه قليلاً صامتاً
 ثم قال موجهاً حديثه الى "آيات" كمحاولة جديدة منه للتقارب معها :
 - هتطلى الرحلة ؟
 قالت باستغراب :
 - رحلة ايه ؟
 قال "أحمد" :
 - رحلة للعين السخنة لمدة 3 أيام

قالت "آيات" :
- لا مش هينفع بابا مش بيسمحلنى أطلع رحلة فيها بيات
قال "أحمد" بأسف :
- يا خسارة
قالت "أسماء" بمرح :
- أنا بأه معنديش مشكلة أبداً
ثم التفتت الى "أحمد" قائله :
- هي امتى يا "أحمد" ؟
قال "أحمد" :
- آخر الاسبوع
قالت "أسماء" بمرح :
- كده فل أوى هطلع رحلة العين السخنة وبعدها أطلع رحلة شرم
قالت "آيات" بغيظ :
- بتغيظينى يعنى ؟
قالت "أسماء" بمرح وهى تخرج لسانها :
- أيوة بغيظيك
قال "أحمد" وهو يقف ليغادر :
- عامة فكرى يا "آيات" واعرضى الموضوع على والدك .. وخليه يظمن
فى دكاترة طلعين معنا الرحلة
نظرت "آيات" الى هاتفها تلعب به وتجاهلت ما قال .. قالت "أسماء"
باهتمام :
- مين الكاترة اللى طلعين الرحلة يا "أحمد" ؟
قال "أحمد" وهو يغادر :
- دكتور "آدم" .. ودكتوراه مش فاكرا اسمها
تجمدت "آيات" فى مكانها .. غادر "أحمد" فأخذت "أسماء" تنظر
حولها .. غير مدركة الى الصراع الذى يعتمل فى صدر "آيات" وفجأة
لمعت عيناها ونهضت قائله بلهفه :
- يلا يا "أسماء"
نظرت اليها "أسماء" بدهشة وهى تلحق بها قائله :
- يلا فىن .. رايحه فىن يا "آيات" .. ردى عليا
جذبتها "آيات" من ذراعها وتوجهت الى المسؤول عن الرحلات بالكلية
وطلبت منه تسجيل اسمها واسم "أسماء" فى رحلة العين الساخنة ..
نظرت "أسماء" الى ما تفعله صديقتها بدهشة دشديدة .. تم تسجيل

الأسماء وغادرت الفتاتان وسارتا معاً الى أن جذبتها "أسماء" من
ذراعها لتوقفها قائلة :
- انتى اتجننتى يا "آيات" .. ازاي هتطلعى الرحلة باباكي مستحيل يوافق
؟
صمتت "آيات" وهى تنظر الى صديقتها وبدا وكأنه تشعر بتردد كبير..
فهتفت "أسماء" :
- "آيات" ردى عليا
قالت "آيات" بشى من الخجل :
- بابا مش هيعرف انى هطلع الرحلة دى
قالت "أسماء" بدهشة :
- ازاي يعنى مش هيعرف ؟
قالت "آيات" بعزم وإصرار :
- هقوله انى بايته عندك عشان نذاكر للإمتحانات .

الفصل الرابع من رواية جواد بلا فارس



- انتى اتجننتى يا "آيات" .. ازاي هتطلعى الرحلة باباكي مستحيل يوافق
؟
صمتت "آيات" وهى تنظر الى صديقتها وبدا وكأنها تشعر بتردد كبير ..
فهتفت "أسماء" :
- "آيات" ردى عليا
قالت "آيات" بشى من الخجل :

- بابا مش هيعرف انى هطلع الرحلة دى
قالت "أسماء" بدهشة :
- ازاي يعني مش هيعرف ؟
قالت "آيات" بعزم وإصرار :
- هقوله انى بايته عندك عشان نذاكر للإمتحانات

نظرت اليها "أسماء" بصمت .. فقالت "آيات" تبرر لنفسها قبل أن تبرر
لـ "أسماء" :

- أعمل ايه يعني مش قدامى حل غير كده .. مفيش فرصة تانية ممكن
يشوفنى ويتعرف عليا .. عنده 300 بنت فى الدفعه ايه اللى هيخليه ياخذ
باله منى أنا بالذات
قالت "أسماء" ساخرة :

- أمال راح فين أنا مش هلفت انتباهه مش هضربه على ايده عشان
يحببنى
قالت "آيات" بجدده :

- أنا مش هحاول أقرب منه ولا هلفت انتباهه أنا بس هكون موجوده معاه
فى مكان واحد .. حس بيا حس .. محسش خلاص
أومأت "أسماء" برأسها وقالت بلامبالاة :
- حتى لو حاولتى تلفتى انتباهه أنا شايفاها حاجة عادية مفياش حاجة
قالت "آيات" بحماس وهى تخرج مع صديقتها من الكلية :
- يلا عشان عندنا حاجات كتير لازم نحضرها قبل معاد الرحلة

اشترت "آيات" ملابس جديده من أجل الرحلة .. لتظهر بأفضل مظهر
أمام "آدم" عله يتلفت اليها ويدق قلبه بحبها .. كانت متحمسة للغاية
وسعيدة للغاية .. لم يعكر صفو تلك السعادة سوى الإحساس بالذنب الذى
تشعر به كل حين وآخر .. بسبب اضطرارها الكذب على والدها .. كادت أن
تتراجع عن الفكرة ككل .. لكنها تذكرت أن هذه هى فرصتها الوحيدة حتى
يراها "آدم" بعيداً عن العلاقة الأكاديمية التى تجمعهما .. أقنعت نفسها
قائله :

- أنا مش هعمل حاجة غلط .. أنا بس هكون موجوده فى الرحلة .. وزياها
زى أى رحلة .. مش هحاول أكلمه .. ولو اضطررت أكلمه هتكلم عادى ..
لكن أنا مستحيل أقوله مشاعرى نحيته .. لازم تيجى منه هو .. أنا مش
هعمل حاجة غلط .. مجرد رحلة

ظلت تردد تلك الكلمات الى أن اقتنع بها ضميرها وراح فى سبات عميق

كانت "إيمان" فى هذا اليوم تشعر بتوتر بالغ فهذا هو اليوم الموعد ..
اليوم الذى سيتصل بهم العريس ليعرف ردهم ويعلمهم برده .. استخارت
الله كثيراً ودعته أن يبيض وجهها أمام عائلتها .. وألا يضيف جرحاً آخر
لحياتها التى امتلأت على آخرها بجروحاً وشروخاً وكدمات !
رن جرس الهاتف فانتفضت فى وجل .. دخلت غرفتها لتجلس على
فراشها فى توتر .. ضمت كفيها الى بعضهما البعض أمام وجهها وهى
تردد :

- يارب مفيش حاجة وحشة تحصل .. يارب
دقائق مرت كالسنوات .. قبل أن يفتح الباب .. بمجرد أن طالعت وجه
والدتها الحزين وعلامات الأسى على وجهها حتى علمت الرد .. الرد الذى
توقعته قبل أن يغادر بيتهم .. الرد الذى تسمعه دائماً .. والذى أصبح أمر
مسلم به .. رفضها .. حاولت حبس عبراتها .. فلا ينقصها الآن سوى
شفقة والدتها .. لكنها لم تستطع .. انفجرت فى بكاء مرير .. أغلقت أمها
الباب وجلست بجوارها وأخذتها بين ذراعيها قائلة :

- يا بنتى وحدى الله .. بكرة ربنا هيبعتك نصيبك لحد عندك
ثم قالت لتحاول أن تخرجها من حزنها :
- وبعدين أصلاً مكنش عاجبنى كان اتم كده وبارد ودمه ثقيل
هبت "إيمان" واقفة والعبرات تغرق وجهها وهى تصيح بغضب :
- كفاية بأه كفاية .. مش عايزة أتهان أكثر من كده .. كل مرة تجيبولى
عريس ويرفضنى .. كل مرة أطلع أدامه أكنى بعرض نفسى عليه
ويايشترى ياميشتريش .. كفاية بأه ارحمونى أنا معدتش هقابل عرسان
تانى .. ريحى نفسكوا بأه

وقفت أمها فى مواجهتها وهى تقول :

- انتى اتهبلتى فى عقلك يا بت انتى

قالت "إيمان" بصوت باكى :

- افهمى بأه وكلكوا افهموا مفيش واحد هيبص لواحدة زي

ضربت أمها على صدرها وهى تقول :

- ليه ان شاء الله ناقصة ايد ولا ناقصة رجل ده انتى زى الفل

هتفت "إيمان" وهى تهزى من الغضب :

- مش شايفة أنا عامله ازاي .. مين هيرضى يتجوز واحدة شوال زيي
ثم فتحت دولابها بعصبيه وأخرجت ملابسها وألقتها أرضاً وهي تصيح :
- بصى شوفى مقاسى كام .. عمرى ما دخلت محل إلا والأقى البنت تقولى
معلش يا مدام مقاسك مش عندنا .. مين هيرضى يتجوز واحدة زيي
انهارت على الأرض باكية فوق الملابس التى ألقتها أرضاً .. صاحت أمها
وهي تغادر الغرفة :
- بت مجنونة صحيح .. لما يجي أبوكى يبقى يشوفله صرفه معاكى
ثم أغلقت الباب خلفها بقوة

جلست "ساندى" مع صديقاتها فى النادى لتقول بتفاخر :
- طبعاً يا بنتى هو يقدر مي جيش .. اسألى "ريم" هى اللى شفته
قالت "ريم" صديقتها :
- أها دخل الحفلة من هنا والبنات كلها كانوا هياكلوه بعنيهم .. بس سابهم
كلهم وأعد مع "ساندى"
ابتسمت "ساندى" وقالت بتعالى :
- وكمان جبلى هدية عيد ميلادى
قالت إحدى الفتيات بخبث :
- طب ايه ؟
ضحكت "ساندى" قائلة :
- ايه ايه يا بنت انتى
قالت الفتاة :
- يعني أنا شيفاه مهتم .. حفلة عيد الميلاد .. وهدية .. وكمان رجع فى
كلامه وسمحك تحضرى المحاضرات .. أكيد كل ده مش لله وللوطن
قالت "ساندى" بدلال :
- الله أعلم
قالت فتاة آخر :
- هتطلى الرحلة يا "ساندى" ؟
قالت "ساندى" :
- أها طبعاً طالعاها
قالت الفتاة بخبث :
- من امتى بتطلى رحلات تبع الجامعة .. من أول سنة وانتى بتطلى تبع

النادى ومبترضيش تطلعى معانا

قالت "ساندى" بلوم :

- المرة دى هطلع

قالت الفتاة ضاحكة :

- ايه هو اللي طلب منك ولا ايه ؟

قالت "ساندى" كاذبه :

- أيوة قالى ياريت تطلعيها يا "ساندى"

ضحكت الفتاة قائله :

- ده شكل دكتور "آدم" وقع ولا حدش سمى عليه

تعالت ضحكات الفتيات حول "ساندى" التى كانت فى قمة سعادتها لأنها

محور حديث الفتيات .. و سبب غيرتهن

جلس "آدم" فى غرفته أمام حاسوبه يتصفح بتلمل .. طرقت أمه الباب

فأذن لها بالدخول .. دخلت وقدمت له كوب من الشاى فقال بعبوس :

- شكراً يا ماما

ثم عاد لمطالعة حاسوبه وقد بدا شاردأً حزيناً .. فوجئ بأمه تجذب احدى

المقاعد وتجلس بجواره .. نظر اليها ففهم أنها على وشك القاء محاضرة

أخرى عليه فزفر بضيق وعاد ينظر الى حاسوبه مرة أخرى .. فقالت أمه

:

- مش هكلمك فى الموضوع اللى كل شوية أكلمك فيه .. انا هكلمك فى

حاجة تانية خالص

لم يبيى "آدم" أى رد فعل فقالت أمه بعتاب :

- سبت الصلاة ليه يا "آدم" ؟

بدا وكأنه بوغت بالسؤال .. ظل ملتزماً الصمت فقالت أمه بأسى :

- ليه يا ابنى كده .. ده هى الحاجة اللى بتعصمك من الشيطان .. ليه تسبب

الصلاة وهى عماد الدين يا ابنى .. ودى أول حاجة هتتسأل عنها فى قبرك

.. لو كنت بتصلى وربنا قبل صلاتك هينظر فى عملك .. أما لو مكنتش

بتصلى أو ربنا مش قابل صلاتك عملك كله هيضيع يا ابنى مهما كانت

أعمالك دى كويسه .. طالما مفيش صلاة .. يبأه كل أعمالك دى هتضيع

على الأرض

أطرق "آدم" برأسها دون أن يجيب .. فأكملت وقد اغرورقت عيناها

بالعبرات :

- أنا خائفة عليك يا "آدم" .. خائفة عليك أوى
ثم قالت :

- ده ربنا قال إن من صفات المنافقين " وَإِذَا قَامُوا إِلَى الصَّلَاةِ قَامُوا
كُسَالَى " .. فما بالك باللى مبيصلش خالص
ثم قالت بحنان :

- تعرف يا "آدم" ان الصلاة هي الطاعة الوحيدة والفرص الوحيد من
فرائض الاسلام اللي ربنا عرج بنبيّه إلى فوق السماء السابعة وفرض
عليه الصلاة من فوق سبع سماوات .. فرضها خمسين صلاة .. كل يوم
خمسين صلاة .. لكن النبي صلى الله عليه وسلم طلب من ربنا انه يخففهم
لخمسه بس فربنا استجاب له .. وبقت خمسة فى العدد وخمسين فى الأجر
والثواب .. أما باقى الفرائض والعبادات سيدنا جبريل كان بينزل للنبي
ويوحى له بيها .. شوفت بأه الصلاة مكانتها مهمة ازاي عند ربنا
تنهد "آدم" وعقد ما بين حاجبيه وهو مازال ينظر الى الحاسوب أمامه ..
فنظرت اليه أمها وقالت باكياً :

- يا "آدم" النبي قال "بين الرجل وبين الشرك والكفر ترك الصلاة" ..
أنا خائفة عليك يا ابني

أجهشت فى بكار حار .. التفت "آدم" ينظر اليها وقد اغرورقت عيناه
بالعبرات .. مد يده وهم بأن يضعها على أمه ليخفف حدة بكائها .. لكنه قام
فجأة بعصبيه وحمل هاتفه وغادر البيت .. جلست أمه فى مكانها تكفكف
دمعها وهى تدعو من اعماق قلبها :
- يارب اهديه ونور بصيرته

جلست "إيمان" تشاهد التلفاز حاملة علبة حلوة كبيرة تأكل منها بنهم
شديد وعلامات الوجوم على وجهها .. اقتربت منها أمها هاتفه بحده :
- وترجعى تقولى تخينة وأد الشوال .. حد يعمل عملتك السوداء دى
قالت "إيمان" بحدّة :

- ايه أموت من الجوع يعني
قالت أمها بعصبيه :

- ما قولناش تموتى من الجوع بس اهتمى بأكلك شوية .. اعملى رجيم ..
مش طول ما انتى أعده وانتى عماله تلغى كده
تركت "إيمان" علبة الحلوة بعصبيه وصاحت قائلاً :
- مش طا فحة

دخلت غرفتها وأغلقت الباب بعصبيه وجلست على فراشها وقد تركت العنان لعبراتها .. ثم قالت بغضب وهى تلقى بالوسادة أرضاً : - مش عايزة أعجب حد أصلاً .. محدش له دعوة بيا

جلست "ساندى" تطالع الحساب الشخصى لـ "آدم" على الفيس بوك .. اتسعت ابتسامتها فى سعادة عندما قبل طلب اضافتها لقائمة أصدقائه .. بدأت المحادثة قائله :
"ساندى" : هاى دكتور
"آدم" : هاى "ساندى"
- ازيك عامل ايه
- بخير ازيك انتى
- تمام .. عرفت انك طالع مشرف على رحلة العين السخنة
- أيوة
- مفاجأة حلوة .. على فكرة أنا طالعه الرحلة
- كويس .. طلعتها قبل كده
- يوووو كثير بس مش تبع الجامعة .. بحس رحلات الجامعة مملة ومش يكون فيها على راحتى
- معايا مش هتكون مملة
- ههههههههه اكيد طبعاً .. متشوقة للرحلة أوى .. وأعرف أماكن كثير
حلوة ممكن نزودها للبروجرام هبقى أقولك عليها يوم الرحلة
- خلاص اتفقتا .. باى دلوقتى نتكلم بعدين
- باى دكتور
ابتسمت "ساندى" ثم هبت واقفة وفتحت دولاب ملابسها وأخذت تفكر كيف تستعد لتلك الرحلة .. والأهم .. كيف تجعل "آدم" لا يرى سواها فى هذه الرحلة

كانت "آيات" واقفة أمام المكتبة تصور بعض الأوراق فأقبلت "أسماء" من خلفها وقبلتها قائله :
- سورى اتأخرت عليكي يا "يويو"
هتفت "آيات" بحنق :

- اتأخرتى كده ليه .. بقالى ساعة واقفة أصور فى ورقى وورقك
 قالت "أسماء" وهى تتفحص الأوراق التى فى يد "آيات" :
- شوية بنات وقفت أتكلم معاهم .. بنستعد للرحلة
 ثم التفتت تنظر الى "آيات" قائله :
- على فكرة "ساندى" طالعة الرحلة
 قالت "آيات" بلامبالاة :
- ما تطلع
 قالت "أسماء" بتردد :
- بصى فى حاجة كدة عرفتها .. مش عارفه أقولها لك ولا لا
 التفتت اليها "آيات" قائله :
- قولى طبعا حاجة ايه ؟
 ترددت "أسماء" قائله :
- خايفة تضايقي
 قالت "آيات" بقلق :
- قولى يا "أسماء" قلقتيني
 قالت "أسماء" بتهكم :
- دكتور "آدم" حضر عيد ميلاد "ساندى" من كام يوم فى بيتها وجبلها
 هدية كمان
- اتسعت عينا "آيات" من الدهشة وهى تتمم قائله :
- ازاي يعنى .. ده طردها أدامنا من المحاضرة
 مطت "أسماء" شفيتها قائله :
- معرفش يختى .. ده اللي سمعته
 قالت "آيات" بعدم تصديق :
- أكيد اشاعة
 قالت "أسماء" بتأكيد :
- لا يا بنتى مش اشاعة أنا كنت واقفة مع "ريم" والبنات وعرفت كمان
 انه طلب منها انها تطلع الرحلة دى
- شعرت "آيات" بحزن شديد .. واغرورقت عيناها بالعبرات وقالت وهى
 تحاول أن ستجمع رباطة جأشها :
- خلاص انسى أنا مش عايزة أطلع الرحلة
 هتفت "أسماء" بحده :
- انتى غبية يا "آيات" هتسيبيلها الجمل بما حمل
 التفتت "آيات" تنظر الى "أسماء" بحيرة وضيق قائله :

- أمال أعمل ايه يعني .. خلاص هو طالما بيحبها خلاص ربنا يهنيهم
هتفت "أسماء" بحدة أكثر :

- يا بنتى هتجنيني .. بطلى شغل العبط بتاعك ده .. أنا لو منك هروح
الرحلة وأدب صوابى فى عنيتها أحاول ألفت انتباهه وأخليه يسيبها
ويجلى على ملا وشه
قالت "آيات" بكبرياء :

- أنا مش هعمل كده .. مش هلفت انتباهه .. هو لو محسش بيا من نفسه
خلاص .. انا كنت طالعة الرحلة بس عشان بس أديله فرصة للكلام لو هو
حابب يتكلم معايا .. لكن طالما مهتم بـ "ساندى" فخلاص هو حر
قالت "أسماء" بغيظ :

- يا بنتى ومين قالك انه مهتم بـ "سادى" أصلاً .. مش يمكن كدبت وقالت
للبنات انه طلب منها تطلع الرحلة .. عايزة ترسمى نفسها يعني
صمتت "آيات" وهى تشعر بالحيرة .. فقالت "أسماء" :

- لازم تطلعى الرحلة دى .. عشان حتى تعرفى آخرة الموضوع ده ايه ..
وتحطى النقط على الحروف بينك وبين نفسك .. اتفقنا ؟
نظرت "آيات" الى "أسماء" قليلاً .. ثم قالت :
- خلاص اتفقنا

شردت "آيات" وهى تتساءل .. ترى هناك شئ بينهما .. أيجبها .. تمننت
أن تكون الإجابة .. لا

وقف "آدم" يودع "زياد" قائلاً :

- هتوحشنى يا "زياد"

عانقه "زياد" قائلاً :

- وانت كمان يا "آدم" .. هستنى منك زيارة زى ما وعدتنى .. بجد

هتقضى يومين حلوين فى شرم

ابتسم "آدم" قائلاً :

- خلاص اتفقنا ان شاء الله .. خد بالك من نفسك

ربت "زياد" على كتفه قائلاً :

- وانت كمان يا "آدم" خد بالك من نفسك

أوقف "آدم" سيارته أمام الكورنيش وأخذ يتمشى وهو ينظر الى النيل

ويتأمله .. وقف وأسند ذراعيه على السور وهو يتأمل ظلام السماء ..

شعر بأنه ينظر داخل قلبه .. فحال تلك السماء كحال قلبه .. ظلام فى ظلام

.. ثم نظر الى القمر الذى لا يظهر منه سوى هلال صغير .. تماماً كقلبه ..
يشعر بوجود ضوء صغير يحارب ليظهر ويتغلب على الظلام .. لكن
"آدم" لا يسمح بهذا الضوء بأن يكبر ويئير ظلام قلبه .. لا يسمح ولا
يريد .. يريد قلبه أسود كما هو .. كيف سيحقق انتقامه ان اختفى هذا
السواد ؟ .. يريد أن يرجع حقه ممن نهبه .. لا يريد أكثر من حقه
المسلوب .. فلماذا يُلام على ذلك ؟ .. لماذا يُلام على رغبته فى استرداد
حقه .. شعر بأنه يقترب شيئاً فشيئاً من هدفه .. خطوة وراء خطوة
وسيصل الى مبتغاه .. عليه فقط .. الصبر .. والانتظار

فى صباح اليوم الموعود .. يوم الرحلة .. لم تستطع "آيات" النوم من
فرط حماسها .. كانت تتمم على حقيبتها للمرة التى لا تتذكر عددها ..
اتصلت بها "أسماء" قائلة :
- أيوة يا "آيات" نتقابل فى مكان الباص
قالت "آيات" بحماس :
- تمام يا "أسماء" .. يلا سلام
توجهت الى سيارتها ووضعت حقيبتها .. تذكرت محادثتها مع والدها منذ
يومين حين قال والدها :
- طيب وليه "أسماء" متجيش تبات هنا وتذاكروا سوا
- مامتها مش راضية
- يعني هى مامتها مش راضية .. وانتى ملكيش أهل
قالت "آيات" بسرعة :
- لا مش قصدى يا بابا .. قصدى ان فى بيت "أسماء" طنظ موجودة ..
أما هنا فأنا وحضرتك عايشين لوحدنا .. فعشان كدة الأحسن أنا اللى أروح
أبات معاها
فكر "عبد العزيز" قليلاً ثم قال :
- مش عارف يا "آيات" مش حابب حكاية البيات دى
ألحت "آيات" قائلة :
- عشان خاطرى يا بابا بجد محتاجين نذاكر سوا .. خلاص الإمتحانات
قربت وأنا بركز أكثر لما بذاكر مع "أسماء" .. عشان خاطرى يا بابا
وافق دول هما ليلتين بس .. عشان خاطرى وافق يا بابا .. وكمان لو تحب
خليك معايا على الموبايل على طول نطمن على بعض

وافق " عبد العزيز " مرغماً وهو يقول :

- أعمل ايه يعنى .. خلاص يا بنتي

عانقته " آيات " فى سعادة قائله :

- ميرسي يا بابا

قال " عبد العزيز " محذراً :

- ممنوع الخروج بعد 10 يا " آيات " .. وياريت متخرجش أصلاً انتي

رايحه تذاكري مش تتفسحي

قالت " آيات " بحماس :

- متقلقش يا بابا متقلقش

انتبهت " آيات " الى اشارة المرور التي أرغمتها على التوقف .. توقفت
وهي شاردة فيما تفعل .. زفرت بضيق .. فلم تتصور أن يصل بها الحال
الى الكذب على والدها بهذا الشكل والسفر الى بلد أخرى والإقامة فيها
دون علم والدها .. لكنها أخذت تقنع نفسها بأنها لن ترتكب أى شئ خطأ ..
هى فقط تريد استغلال فرصة لن تتكرر .. تريد أن تكون قريبه تريد أن تفهم
مشاعرها وتعرف هل هناك أمل فى أن يشعر بها يوماً .. أم أنها تجرى
خلف سراب .. أرهقها التفكير فزفرت بضيق وأدارت المسجل لتنساب
نغمات احدى الأغنيات الى أذنيها

وصلت " آيات " لمكان التجمع .. رات مجموعات صغيرة بدأت فى التزايد
رويداً رويداً .. بحثت بعيناها عن " آدم " فلم تراه .. أقبلت نحوها فتاتين
فابتسمت ووقفت تتحدث معهما .. سمعت " صوت " سارة " قادمة فالتفتت
لتقع نظراتها على " آدم " خفق قلب " آيات " بقوة .. وارتسمت رغماً عنها
ابتسامه على شفتيها .. حاولت اخفاء تلك الابتسامه لكنها لم تستطع ..
كانت تشعر بشعور لذيذ وبسعادة غامرة .. اقترب " آدم " من الجمع وألقى
عليهم التحية وسألهم قائلاً :

- جاهزين يا شباب

قال أحد الطلاب بحماس :

- طبعاً جاهزين يا دكتور

نظر " آدم " الى الساعة وقال:

- طيب على العموم لسه خمس دقائق وعايزكم تقفولى صف ومتلعوش

الباص إلا لما أتمم عليكم

قالت احدى الفتيات ضاحكة :

- ايه شغل ابتدائي ده يا دكتور
ابتسم "آدم" ابتسامته الجذابه التي خفق لها قلب "آيات" قائلاً :
- ده نظامى .. لو عندكوا اعتراض ممكن اعتذر عن اشراف الرحلة وأخلى
دكتور "مسعد" يطلع بدالى
صاح الجميع فى استنكار :
- لا أبوس ايدك يا دكتور

- اعمل الى انت عايزه يا دكتور بس بلاش دكتور "مسعد"
ابتسم "آدم" والتفت يبحث بعينيه عن "ساندى" .. لكنه لم يجدها بين
الحضور .. كانت "آيات" واقفة تتأمله .. التحمت نظراتهما .. فجفلت ..
وأخفضت بصرها فى توتر .. ألقى "آدم" عليها نظرة لامبالاة وماهى إلا
لحظات حتى حضرت "ساندى" و "أسماء" واكمل العدد .. نظرت
"آيات" بحده الى "ساندى" الواقفه تتحدث بميوعه مع "آدم" وقالت لـ
"أسماء" بحنق :

- شايفه واقفه تكلمه ازاي
قالت "أسماء" :

- سيبك منها

وقف الجميع صفاً وتقدم كل طالب ليخبر اسمه لـ "آدم" الذى وقف بجوار
باب الأتوبيس من الأسفل .. تابع "آدم" الكشف الذى بيده وهو يستمع
الى اسم كل طالب على حدى .. اتى دور "آيات" فنظر اليها منتظراً أن
تقول اسمها ليبحث عنه فى الكشف .. قالت بتوتر وهى تنظر اليه مبتسمه
:

- "آيات عبد العزيز حسان اليمانى"

تصلب جسد "آدم" وهو يستمع الى اسمها .. رفع رأسه ونظر اليها
بتمعن قائلاً :

- انتى من عيلة "حسن اليمانى" ؟

شعرت "آيات" بالسعادة فلربما يعرف أحد أفراد عائلتها وتجد مدخلاً
للحديث معه .. قالت بحماس :

- أيوة

قال "آدم" بلهفه وعيناه الزرقاوين تكاد تخترقانها من فرط امعانه فيها :

- "سراج حسن اليمانى" يقربك ايه ؟

ابتسمت "آيات" قائله بحماس :

- ده يبقى عمى

تجمدت ملامح "آدم" وظلت نظراته مثبتة عليها كالليزر .. شعرت

"آيات" بالتوتر من نظراته التي لم تستطيع تفسير معناها .. قالت بارتباك

:

- اطلع الباص ؟

أوما برأسه دون أن يرفع بصره عنها .. سعدت وضربات قلبها تزداد
اضطراباً .. وقف "آدم" لحظات جامداً .. ثم ما لبثت تعبيرات الغضب أن
ظهرت على ملامحه واشعلت نظراته وهو يتمتم بصرامة :

- عمك !!

جلست "آيات" بجوار "أسماء" وقالت لها بلهفه وسعادة بصوت

منخفض خشية أن يسمعها من حولها :

- دكتور "آدم" اتكلم معايا

ضحكت "أسماء" قائلة :

- صلاة النبي أحسن .. ده احنا لسه بنقول يا هادي

ثم غمزت بعينها قائلة :

- يا "يويو" يا جامد

ثم قالت :

- احكيلى قالك ايه

قالت "آيات" بحماس :

- سألنى على عمى "سراج"

قالت "أسماء" باستغراب :

- عمك ؟ .. وهو يعرفه منين ؟

قالت "آيات" بسعادة :

- معرفش .. بس مش مهم .. المهم انه اتكلم معايا يا "أسماء"

التفتت "آيات" تنظر الى "آدم" الواقف بجوار الأتوبيس التفت فالتفت

عيناها .. خفق قلبها .. لكنها هذه المرة لم تشح بوجهها .. وهو أيضاً لم

يفعل .. حاولت أن تفهم معنى نظراته وسببها .. لكنها لم تستطع .. ولم

تحاول كثيراً أن تفهم .. فكل ما كانت تشعر به الآن هو السعادة .. السعادة

لأنه أخيراً التفت اليها

صعد الجميع وانطلق الأتوبيس بهم فى طريقهم الى العين الساخنة .. كان

"آدم" يجلس فى الأمام على بعد ثلاث مقاعد من مقعدى "آيات" و

"أسماء" .. التفت ينظر فى اتجاه "آيات" فانتبهت لتلك العينان

الزرقاوان اللاتات تتفرسان فيها .. شعرت بارتجافة فى أوصالها .. ثم عاد

لينظر أمامه مرة أخرى .. ضحكت "أسماء" ضحكة خافته ووكزت

"أسماء" فى ذراعها قائله :

- ايه يا "آيات" ده .. لحقتى وقعتيه

قالت "آيات" بارتباك :

- والله ما عملت حاجة

قالت "أسماء" بلؤم :

- أمال لو عملتى

ثم انفجرت مرة أخرى ضاحكة .. لم تشاركها "آيات" ضحكاتها ولا مزاحها .. لأن عقلها كان فى مكان آخر .. كان مع والدها .. والدها الذى كذبت عليه .. وهاهى فى طريقها خارج القاهرة .. لتمضى ليلتين فى هذا البلد الغريب .. ودون علم والدها .. الذى كان ومازال كل ما تملك فى هذه الحياة .. شعرت بألم شديد فى قلبها .. وصوت يهتف بداخلها :

- أهذه ثقة والدك فيك يا "آيات" .. أيستحق منك تلك الخيانة .. وهو الذى لم يقصر فى حقك يوماً وهو الذى وثق بكِ دوماً .. وهو الذى كان الأب والأم والأخ والصديق وكل عائلتك .. أيستحق منك تلك الطعنة .. ماذا لو علم .. كيف يتكون نظرتة اليك .. الى ابنته التى تعب وعانى فى تربيتها وتعليمها وأوصلها الى ما هى عليه الآن .. كيف ستكون خيبة أمله فيك يا "آيات"

كانت "آيات" تنظر من الشباك المجاور لها وهى شاردة واجمة وعلامات الحزن على وجهها .. لم تنتبه الى "ساندى" التى حضرت من الخلف فى اتجاه "آدم" ونظرت اليه قائله بدلال :

- تسمحلى يا دكتور عايزة أتكلم مع حضرتك فى بروجرام الرحلة ابتسم لها "آدم" ووقف لتجلس على المقعد المجاور له .. كان عقل "آدم" فى مكان آخر تماماً فلم يستمع الى "ساندى" التى تلقى على مسامعه اقتراحاتها بشأن تطوير برنامج الرحلة والأماكن التى تعرفها فى العين الساخنة .. كان عقل "آدم" منشغل بتلك الفتاة التى تجلس خلفه بثلاث مقاعد .. قال لنفسه :

- ما هذه المصادفة يا "آدم" .. واحدة من عائلة "اليمانى" تحت رحمتك .. وفى قبضة يدك .. يبدو أن حظك بدأ فى الإبتسام لك أخيراً يا "آدم" فجأة وبدون سابق انذار هبت "آيات" واقفة وهى تأخذ حقيبتها التى وضعتها فى الرف العلوى .. نظرت اليها "أسماء" بدهشة قائله :

- بتعملى ايه يا "آيات" ؟

قالت "آيات" بحزم وهى تضع الحقيبة على ظهرها :

- نازلة

قالت "أسماء" غير مصدقة :
- نازلة .. يعني ايه نازلة ؟
قالت "آيات" بحزم وهي تنظر اليها :
- مش عايزة أطلع الرحلة دي .. غيرت رأيي
فتحت "أسماء" فمها دهشة وقبل أن تتمكن من الرد عليها توجهت
"آيات" الى السائق وأمرته بالتوقف توقف السائق لتنزل منه "آيات" ..
أسرع "آدم" ينزل درجات الحافلة خلفها وجذبها من ذراعها قائلاً :
- انتى راحه فين ؟
التفتت اليه "آيات" بدهشة ونظرت الى يده الممسكة بذراعها وقالت :
- غيرت رأيي مش طالعه الرحله
قال "آدم" بدهشة :
- هو لعب عيال
جذبت ذراعها من يده وقالت بإضطراب :
- انا أسفة .. بس غيرت رأيي
التفتت لتغادر مشرعة .. رآها "آدم" وهي تبتعد .. كانت تسير فى طريق
العودة الى القاهرة على هذا الطريق الصحراوى الذى يخلو من السيارات
فى هذا الوقت من الصباح الباكر .. شعر "آدم" بأن هذه هى فرصته ..
وأراد استغلالها الى أقصى درجة ممكنة .. توجه مسرعاً الى الأتوبيس
وأخذ حقيبته وقال للمشرفة التى معه :
- أنا مضطر اروح معاها عشان مش هتعرف ترجع لوحدها .. وهبعثلكوا
دكتور "مسعد" .. هتعرفى تتصرفى لوحدهك يا دكتورة ؟
ابتسمت قائله :
- أيوة يا دكتور متقلقش .. المهم متسبش البنت لوحدها
نزل "آدم" من الأتوبيس وهو يحمل حقيبته على كتفه ويقول لنفسه
بقسوة وغل وحقد دفين :
- متقلقيش مش هسيبها .. أبداً !



- انا أسفة .. بس غيرت رأيي
التفتت لتغادر مسرعة .. رأها "آدم" وهي تبتعد .. كانت تسير فى طريق
العودة الى القاهرة على هذا الطريق الصحراوى الذى يخلو من السيارات
فى هذا الوقت من الصباح الباكر .. شعر "آدم" بأن هذه هى فرصته ..
وأراد استغلالها الى أقصى درجة ممكنة .. توجه مسرعاً الى الأتوبيس
وأخذ حقيبته وقال للمشرفة التى معه :
- أنا مضطر اروح معاها عشان مش هتعرف ترجع لوحدها .. وهبعثلكوا
دكتور "مسعد" .. هتعرفى تتصرفى لوحدهك يا دكتورة ؟
ابتسمت قائله :
- أيوة يا دكتور متقلقش .. المهم متسبش البنت لوحدها

نزل "آدم" من الأتوبيس وهو يحمل حقيبته على كتفه ويقول لنفسه
بقسوة :
- متقلقش مش هسيبها أبداً !
رحل الأتوبيس وأسرع "آدم" الخطى خلف "آيات" .. التفتت لتجده
يقترب منها توقفت ونظرت اليه بدهشة شديدة .. قال لها "آدم" بجدية :
- مينفعش تمشى لوحدهك .. أنا هاجى أوصلك
شعرت بقلبها يقفز فرحاً .. ابتسمت لا شعورياً .. حاولت أن تخفى تلك
الابتسامه التى ظهرت على شفثيها .. لكنها كعادتها لم تستطع .. كان وجه
"آيات" دائماً مرآة لما بداخلها .. لا تستطيع اظهار غير ما تشعر به ..
أشاحت بوجهها عنه .. حتى لا يرى ابتسامتها وتلك السعادة فى عينيها ..
سارت بجواره صامته .. التفت اليها ومد يده قائلاً :
- هاتى الشنطة
نظرت اليه قائله بصوت خافت :
- مفيش مشكلة أنا هسيبها

ابتسم اتبسامة خفق لها قلبها وقال :
- ليه مش شايفانى راجل ولا ايه
ابتسمت له وأعطته اياها .. نظرت اليه وهى تقول لنفسها :
- انه هو .. انه حقاً فارسي

شعرت "أسماء" بالغضب الشديد مما فعلته "آيات" حاولت الإتصال بها
لكنها لم تجب .. فقالت بضيق :
- طبعاً من لقي أحبابه يا "آيات" هانم
ثم أخذت تنظر من الشباك فى وجوم

سمعت "آيات" صوت الهاتف لتجد أن "أسماء" هى المتصلة .. ضبطته
على الوضع الصامت ثم اعادته الى حقيبتها .. كان "آدم" يتابعها بطرف
خفى .. قال فجأة :
- حبيبك ؟

التفتت اليه "آيات" بدهشة وقالت :
- لأ

فقال "آدم" :

- افكرت اتخنقتوا سوا وعشان كدة نزلتى من الأتوبيس
قالت بحماس :

- لأ أنا كنت طالعة مع واحده صحبتى
ابتسم لها "آدم" قائلاً :

- أمال ليه نزلتى من الأتوبيس ؟ .. وبسببك اضطريت أرجع ومكملش
الرحلة

قالت بخرج :

- أناأسف جداً يا دكتور .. مكنش قصدى .. ومكنتش أعرف ان حضرتك
هتنزل من الأتوبيس

قال "آدم" لجدية :

- ازاي كنتى عايزانى اسيبك لوحدك فى الصحرا دى
ابتسمت قائله :

- ميرسى أوى يا دكتور .. أنا فعلاً كنت خائفة ومكنتش عارفه هعمل ايه

أعاد سؤاله قائلاً :

- ليه نزلتى من الأتوبيس ؟

صمتت "آيات" قليلاً ثم قالت بتوتر :

- كده غيرت رأيي

قال "آدم" بشك :

- فجأة كدة ؟ .. اكيد فى سبب

صمتت .. فقال :

- حد ضايقتك فى الأتوبيس ؟

قالت بسرعة :

- لا يا دكتور مفيش حد ضايقتي

- أمال ايه .. ايه اللى خلاكى تقررى فجأة انك تقطعى رحلتك

بدا عليها التردد ثم أخيراً قالت بصوت مضطرب :

- بصراحة .. انا كنت طالعة من ورا بابا .. بس حسيت بالذنب ..

ومقدرتش أكمل

كانت تنظر أمامها .. فلم ترى نظرات "آدم" الساخرة .. تحدث الى نفسه

قائلاً : ها هي فتاة مستهترة أخرى .. بنفس الشكل ونفس الأخلاق .. نظرة

اليها نظرة متفحصة .. تأمل عينيها المرسومتان جيداً لتبدو ان أكثر اتساعاً

.. رأى المسكرة التي تزيد من حجم رموشها .. رأى كريم الأساس الذي

أعطاه لون بشرة غير لونها الحقيقي فبدت بشرة وجهها متناقضة فى

لونها مع لون بشرة يدها .. نظر أمامه وهو يقول لنفسه : ما يكان آخر

للعرض فقط .. فيأثرى هل يُسمح بلمسه أم لا !؟

شعرت "آيات" بالسعادة والأمان وهي تسير بجواره .. بجوار فارسها ..

لم يعد لديها شك بأنه فارسها .. الذى طالما راودها فى أحلامها .. وجاءها

على حصانه الأصيل .. وأخذها وانطلق بها ليشق الريح بسرعه .. شعرت

بأنها تحبه بكل كيانها .. هذا الفارس .. هذا الرجل .. التفت "آدم" اليها

قائلاً :

- تعبتى ؟

قالت "بوهن" :

- بصراحة شوية

ابتسم قائلاً وهو يربت على كتفها :

- معلش ان شاء الله نلاقى عربية بسرعة

ارتجفت "آيات" للمسة يده على كتفها .. اضطربت ووقعت فى حيرة لكنها

لم تبدى اعتراض .. ازاح "آدم" يده وهو يقول لنفسه : اذن فهو قابل للمس ! .. ومن أى ان كان ! .. تماماً كغيرها !

أخيراً وبعد السير لأكثر من ساعة .. أتت سياره فى تجاه القاهرة ..
فأستقلاها .. وانطلقت بهما فى طريق العودة .. أوقف "آدم" لها تاكسى
لتعود به الى منزلها لكنها أوقفها قائلاً وهو يخرج احدى الكروت من
جيبه :

- ده رقمى لما تروحي طمنينى انك وصلتى
قالت "آيات" مبتسمة :

- ميرسى يا دكتور

أغلق الباب بعدما ركبت وقال وهو ينظر اليها :

- مستنى اتصالك

رحل فالتفتت "آيات" تنظر من الزجاج الخلفى الى هذا الرجل الذى باتت
واثقة بأنه نصفها الآخر

عادت "آيات" لتخبر والدها بأنها غيرت رأيها بعدما استقبلت والده
"أسماء" أقارب لهم فلم تستطع المكوث عندهم لأنها لن تشعر معهم
بالراحة .. فرح "عبد العزيز" بذلك فقد كان لا يستريح لأمر اقامتها فى
مكان بعيد عنه .. يحب دائماً أن يراها حوله ليطمئن قلبه عليها .. سعدت
الى غرفتها وأخرجت "هاتفها بسرعة واتصلت بـ "آدم" لمئنه بوصولها
كما طلب منها .. فقال لها :

- تمام .. وخلي بالك من نفسك وبلاش حركات مجنونة تانى
ضحكت قائله :

- حاضر يا دكتور

ألقت "آيات" الهاتف على فراشها وألقت بنفسها بجواره وهى تبتسم
ابتسامة حالمة وتتخيل ما حدث اليوم .. والذى لم يكن فى الحسبان

كانت "سمر" فى مكتبها بالمستشفى تستقبل المرضى كعادتها .. دخلت
احدى الأمها ومعها طفلها الصغير .. ابتسمت "سمر" وقامت تداعب
الصغير قائله بمرح :

- ازيك يا "كوكو" أخبرنا ايه النهاردة
ابتسمت أمه قائله :
- الحمد لله يا دكتورة "سمر" أحسن كثير من الإِسبوع اللي فات
حملته "سمر" وقلبت وجنته قائله :
- انت خوفتى عليك أوى يا "كوكو" .. وخوفت ماما كمان ينفع كده
ابتسم الصغير بخجل فقبلته مرة أخرى قائله :
- مش هتكلم بأه نفسي أسمع صوتك
قالت أمه بإهتمام :
- هو كده متأخر فى الكلام يا دكتورة
نظرت اليها "سمر" وطمأنتها قائله :
- لا متقلقيش هو بس انطوائى شوية فمحتاج يختلط بأطفال فى سنه وأكبر
منه
قالت أمه بحزن :
- للأسف مفيش عندنا فى العيلة أطفال فى سنه
قالت "سمر" :
- وديه حضانه لأن مهم أوى ناه يتعلم المهارات الإجتماعية وهات خد
ويشارك فى اللعب .. ده هيخرج من انطوائيته دى واحده واحده
ابتسمت أمه قائله :
- مبرسي يا دكتورة .. وان شاء الله أقدمله فى حضانه
قبلت "سمر" الصغير ثم أعطته لأمه قائله :
- ربنا يباركك فيه
ثم توجهت الى مكتبها وأخرجت لعبة صغيرة وأعطتها له قائله :
- دى من طنط "سمر" عشان تفتكرنى على طول .. ماشى يا "كوكو"
ابتسم الصغير وأخذ اللعبة من يدها
قالت أمه وهى تنظر الى "سمر" مبتسمه :
- الحقيقة كنت عايزه أتكلم معاكى فى موضوع
قالت "سمر" بإهتمام :
- طبعاً اتفضلنى
قالت الأم بإبتسامه حانية :
- بصراحة أنا حبيتك أوى .. وحبيت أكثر لبسك المحترم وأخلاقك العالية ..
وكمان حنيتك على الأطفال واهتمامك بشغلك .. بصراحة أنا مش هلاقي
أحسن منك عروسه لأخويا
شعرت "سمر" بالإرتباك .. فأكملت المرأة :

- هو بيدور على عروسه وانتى مواصفاتك مناسبة بالنسبة له .. فأنا
عايزة منك بس رقم والدك وهو ان شاء الله هيكلمه النهاردة .. أنا كلمت
أخويا عنك وهو معجب جداً بالكلام اللي سمعه عنك .. وهو اللي طلب منك
أقولك كده

صمتت "سمر" وقد أطرقت برأسها أرضاً وعلامات الحزن على وجهها ..
فقالت المرأة :

- دكتورة "سمر" انتى اضايقتى ؟

نظرت اليه "سمر" قائله :

- لا أبداً مضايقتش .. بس

صمتت قليلاً ثم قالت :

- بس الحقيقة أنا مبفكرش فى الارتباط دلوقتى

قالت المرأة بحماس :

- صدقتيني أخويا هيعجبك ان شاء الله .. وكمان أكيد مش هترتبطوا فجأة

كد . أكيد هيبقى فيه فترة خطوبة وتعارف يعني متقلقيش

قالت "سمر بحزم :

- معلىش أسفة لكن فكرة الارتباط أصلاً مش فى بالى حالياً

قالت المرأة بحزن :

- طيب عامة لو غيرتى رأيك عرفيني .. لانى بجد مش هلاقيله عروسه

زيك كده

ابتسمت "سمر" قائله :

- لا ان شاء الله هيلاقى اللي أحسن منى .. لكن أنا بجد مش عايزه أخليه

ينتظر على الفاصى

قالت المرأة :

- يعني ده ردك النهائى .. ما يمكن تغيري رأيك

قالت "سمر" بتماسك :

- لا مش هغير رأيي .. وبجد أنا أسفة

ابتسمت المرأة بحزن قائله :

- هقوله الكلام اللي قوتيه .. بس عامة أنا مش هياس وربنا يقدم اللي فيه

الخير

خرجت المرأة فجلست "سمر" أمام مكتبها وهى شاردة .. ووجهها يشع

حزناً وألماً .. كانت تعلم جيداً أنها لن تستطيع أن تقدم على تلك الخطوة ..

لا تستطيع أن تثق برجل فتكتشف بعد ذلك أنه كوالدها .. عانت كثيراً من

ترك والدها لها ولأمها .. تجرعت مرارة اليتيم رغم أن والدها حى يرزق ..

شعرت بأنها لن تستطيع أن تعطي قلبها وحياتها لرجل قد لا يكون أهلاً
للثقة .. ويفعل بها كما فعل والدها بأمها .. كانت خائفة بشدة .. خائفة من
ال فشل .. خائفة الى درجة أنها حتى ترفض المحاولة .. تنهدت بعمق ..
وصرفت تلك الأفكار عن رأسها .. واستعدت لإستقبال المريض التالى

فتحت والدة "أسماء" الباب وابتسمت قائلة :

- أهلا يا "آيات" اتفضلى يا حبيبتي

دخلت "آيات" وقبلتها قائلة :

- ازيك يا طنط

- الحمد لله يا "آيات"

- هي "أسماء" جوه

- آيوه يا حبيبتي جوه فى أوضتها

توجهت "آيات" الى غرفة "أسماء" التى هبت واقف بمجرد أن رأتها

وقالت لها بحده :

- انتى بتعملى ايه هنا ؟

أغلقت "آيات" الباب واقتربت منها قائلة :

- أنا أسفة يا "سمسم"

قالت "أسماء" بحده :

- والله .. وأعمل ايه بأسفك ده .. أصرفه منين

قالت "آيات" برجاء :

- خلاص بأه يا "أسماء" متزعليش

قالت "أسماء" بغضب :

- وليكي عين تقولى متزعليش .. طلعتيني رحلة أصلا مكنش على بالى

أطلعها وقولت مفيش مشكلة صحبتي ولازم أكون جمبها .. وفجأة تطلعك

الجنونه وتنزلى من الباص وهو فى نص الطريق .. واللى زاد وغطى ان

حبيب القلب نزل وراكى وفضلت أتصل بيكي لما قرفت وانتي طبعاً

منفضالى .. ما انتى هتفتكريني ازاي مش حبيب القلب معاكى

قالت "آيات" بحده :

- ما أنا يا "أسماء" فضلت أتصل بيكي بعدها وطول الـ 3 أيام وانتي مش

معبرانى

قالت "أسماء" بغضب :

- طبعاً معبركيش وحذفت رقمك من عندي اصلاً ومش عايزه أعرّفك تانى
قالت "آيات" بحزن :

- خلاص بأه يا "أسماء" ياستى أن أسفة وحقك عليا .. أنا حسيت انى
بعمل حاجة غلط .. حسيت بالذنب أوى ومقدرتش استنى .. ووالله مكنشت
أعرف انه هينزل ورايا .. أعرّف منين يعنى
صمتت "أسماء" فاقتربت منها "آيات" قائله :

- خلاص بأه ميبقاش قلبك اسود
هتفت "أسماء" :

- أنا قلبى بلاك .. ملكيش دعوة
قبلتها "آيات" قائله بمرح :

- ده انت قلبك أبيض وزى الفل يا "سمسم" يا قمر انت
قالت "أسماء" مبتسمه :

- ايوة اضحكى عليا بكلمتين

ثم وكزتها بقوة فى ذراعها فصرخت "آيات" قائله :

- يا مفترية

قالت "أسماء" بتشفى :

- أحسن تستاهلى

ثم جذبتها من ذراعها وأجلستها على الفراش وجلست أمامها وقالت لها :

- عايزة أعرّف كل حاجة من ساعة ما نزلتوا من الباص .. فاهمة
ابتسمت "آيات" قائله بسعادة :

- بصى يا ستى .. أول شال عنى الشنطة .. بصراحة احترمتة أوى لما
عمل كدة .. وكان مهتم بيا أوى .. ووقف لحد ما وقفلى التاكسى .. وكمان
ادانى رقمه عاشن لما أوصله أكلمه وأطمئه عليا
استعت عينا "أسماء" دهشة وقالت :

- بتهرجى مش كده

قالت "آيات" ضاحكة :

- لا والله مش بهرج

قالت "أسماء" بإستغراب :

- غريبة .. ايه الإهتمام المفاجئ ده .. ده مش اهتمام دكتور بطالبه نزلت
من الباص .. كان ممكن يرجع معاكى القاهرة وبعدين يسيبك مش يوقفلك
تاكسى ويديكى رقمه عشان يطمئن عليكى
ثم قالت بقلق :

- أنا مش مرتاحة للموضوع ده

قالت "آيات" بشرود :
 - أنا برده استغربت زيك .. بس مش عارفه .. هو كان محترم وفعلا كنت
 حساه مهتم بيا .. وكان مهتم كمان يعرف أنا لسه سيبت الباص ونزلت
 نظرت اليها "أسماء" قائله :
 - وقولتيله ايه ؟
 هزت "آيات" كتفيها قائله :
 - قولتله الحقيقة
 هتفت "أسماء" بغضب :
 - انتى غبية يا "آيات" .. كده هياخد عنك فكرة وحشة
 قالت "آيات" بقلق :
 - بس أنا رجعت عن الغلط اللي كنت بعمله ونزلت من الباص .. أنا لو
 وحشة كنت كملت الرحلة
 قالت "أسماء" بحنق :
 - يا بنتى مش هيهتم رجعتى عن الغلط ولا مرجعتيش .. كل اللي هيبصله
 هو انك كنت مسافرة من ورا أهلك .. أكيد هيقول عليكي بنت فلتانه
 قالت "آيات" بحزن وقلق :
 - لا متقوليش كده .. ان شاء الله ميكنش خد عنى فكرة وحشة

جلس "على" مع صديقه فى المسجد بعد الانتهاء من صلاة العشاء .. قال
 "على" بحزن :
 - مش عارف أعلم ايه .. نفسي أوى تكون من نصيبي وخايف تضيع من
 ايدي
 قال صديقه :
 - طالما بتحبها ليه متتقدملهاش ؟
 تنهد "على" قائلاً بحسرة :
 - ياريت كن ينفع كنت خدت أبوي و أمى ومن بكرة كنت روحت اتقدمتلها
 قال صديقه :
 - طيب مبتعملش كده ليه
 قال "على" بضيق شديد :
 - أتقدملها ازاي وأنا لسه لحد دلوقتى مش لاقى شغل .. دى دكتورة
 وبتشتغل .. يعني تبقى هى بتشتغل و أنا عاطل يعني
 ربت صديقه على كتفه قائلاً :

- متضايقش نفسك يا "على" ربنا كبير
صمت "على" قليلاً ثم قال باسمًا :
- عارف اي أكثر حاجة عجباني فيها ؟ .. خجلها .. أول ما بتشوفنى بتبص
فى الأرض ومبتحاولش تتكلم معايا ولا حتى تقولى ازيك رغم انها صاحبة
أختى أختى من زمان .. وكمان هى بنت ناس ومحترمة ومؤدبة وماما
وأختى بيحبوها جداً
ضحك صديقه قائلاً :
- أمك و أختك بس اللى بيحبوها ؟
ضحك "على" قائلاً :
- اتلم يله .. ويلا قبل ما يقفلوا المسجد علينا واحنا أعيدين

جلست "ساندى" مع صديقتها "ريم" فى النادي وهى تهتف بحنق :
- مش قادرة أنسى اللى حصل يا "ريم" دى محروق أوى
قالت "ريم" مبتسمه :
- بصراحة شكلك مكنش لطيف خالص .. خاصة انك قولتى ان هو اللى
طلب منك تطلعى الرحلة
قالت "ساندى" بغضب :
- أنا مش فاهمة لزمته ايه انه ينزل يوصلها .. مكان بعث معاها أى حد ..
أو حتى وصلها ويرجع تانى ليه بيعت لنا دكتور "مسعد" بداله
قالت "ريم" بلامبالاة :
- يمكن معجب بيها
نظرت "اليها" "ساندى" بجدده وقالت بغضب :
- انتى بتتكلمى بجد ؟
قالت "ريم" مبتسمه :
- معرفش .. أنا بقول يمكن
ضاقت عيناها وهى تفكر فى كيفية استرداد كرامتها التى شعرت أنها
أهدرت

جلست "آيات" فى المدرج تنتظر قدوم "آدم" .. تأنقت اليوم فوق العادة
.. أرادت أن يراها بهيئة أجمل مما رآها من قبل .. اضطربت وخفق قلبها
بقوة عندما راته يدخل من الباب .. ارتسمت على شفيتها تلك الإبتسامه

الى تقفز تلقائياً الى شفيتها بمجرد أن تراه .. وقف وقال :

- صباح الخير يا شباب
- صباح النور يا دكتور

لفت عيناه المرج بسرعة .. يبدو أنه كان يبحث عن شخص ما .. خفق قلبها .. ترى أبحث عنها وسط طلابه ؟ .. لم تكذ تنتهي من ترديد السؤال داخل نفسها حتى قال " آدم " :

- " آيات عبد العزيز حسان اليماني "

شعرت بألم شديد يغزو معدتها من فرط التوتر .. قامت وقالت بصوت مضطرب :

- أيوة يا دكتور

التقت نظراتهما .. فشعرت بإضطرابها يتضاعف .. فقال بصوت هادئ :

- عايزك في مكتبي بعد المحاضرة

أومأت برأسها وجلست .. كانت " ساندى " تتابع ما يحدث في اهتمام .. بدأ " آدم " في القاء محاضرتة

بعد انتهاء المحاضرة قالت " آيات " بقلق :

- تفتكرى عايزنى ليه ؟

قالت " أسماء " باستغراب :

- مش عارفه .. يمكن عشان موضوع الرحلة

قالت " آيات " بتوتر :

- ربنا يستر

قالت " أسماء " :

- متقلقيش .. وهستناكى فى الكافيتيريا

توجهت " آيات " الى مكتب " آدم " وهى تشعر بأنها متوجهة الى امتحان مصيري .. طرقت الباب بهدوء فأذن لها بالدخول .. أغلقت الباب خلفها وتوجهت اليه وقالت بصوت مضطرب :

- خير يا دكتور .. فى حاجة

نظر اليها متفحصاً فشعرت بالخجل و أطرقت برأسها .. ابتسم قائلاً :

- حبيت أطمئن عليكى .. باباكى عمل ايه لما عرف بموضوع الرحلة

شعرت " آيات " بالسعادة لإهتمامه وقالت بصوت منخفض :

- أنا ما قولتش لبابا على اللى حصل .. مش عايزه أقوله عشان ميضايقش منى

ابتسم " آدم " فى نفسه بتهكم .. ثم نظر اليها قائلاً :

- شوفت دفتر الحضور .. انتى من أول السنة مفوتيش ليا ولا محاضرة

ابتسمت "آيات" وقالت :
- أيوة فعلاً
ابتسم لها ابتسامته الساحرة وقال :
- ودى حاجة تبسطنى
شعرت "آيات" بالسعادة تغمر كيائها لحديثها معه ولقربها منه .. قالت
بمرح :
- وكمان أنا بذاكر مادة حضرتك يا دكتور أول بأول يعي لو عملت امتحان
مفاجئ هتلاقيني جاهزة
أرجع "آدم" ظهره الى الخلف وقال مبتسماً :
- والله فكرة .. خلاص هعمل امتحان مفاجئ المحاضرة الجاية
ضحكت "آيات" ضحكة خافته وقالت :
- بس أنا كدة عرفت ان فى امتحان مفاجئ
ابتسم لها قائلاً بصوته الرخيم وهو ينظر اليها بعمق :
- انتى حاله خاصة
اتسعت ابتسامتها وقفز قلبها فرحاً .. حاولت اخفاء ابتسامتها فلم تستطع
.. كان "آدم" خبيراً فى تفسير مشاعر الفتيات وايماءاتهن .. علم وهو
ينظر اليها أنها تكن له شيئاً ما .. أسعده ذلك بشدة .. لأنها بذلك ..
اختصرت عليه نصف الطريق

وقفت "ساندى" تنتظر يميناً ويساراً فى تملل .. وفجأة رأت "آدم" وهو
متوجه الى سيارته فأسرعت نحوه قائله :
- هاى دكتور "آدم"
التفت اليه مبتسماً وقال :
- هاى "ساندى"
ابتسمت له قائله :
- ز علانه منك يا دكتور كده تسيبنا فى الرحلة وتبعتلنا دكتور "مسعد"
ملقتش الا دكتور "مسعد"
ابتسم "آدم" قائلاً :
- شكل دكتور "مسعد" ضايقكوا
قالت "ساندى" بحنق :
- منع البنات انها تلبس بكينى على البيلاج .. وكمان مرضيش يودينا حمام
السباحه برده لنفس السبب لان ممنوع دخول حمام السباحه الا بالكينى

ابتسم "آدم" بسخرية لكنه أخفى ابتسامته سريعاً وقال :
- معلىش المرة الجايه هطلع أنا معاكوا
نظرت "ساندى" الى السيارة ثم اليه ومررت أصابعها برقه فى خصلات
شعرها قائله بدلال :
- عربيتى فى التصليح .. يضايقك لو وصلتنى فى طريقك
قال "آدم" بهدوء :
- لا طبعا .. اتفضلى
التفت "ساندى" حول السيارة لتركب وهى تلقى بنظرها على البنات حوله
الذين يرمقونها بنظراتهن .. شعرت بالسعادة وهى تركب سيارة "آدم"
على مرأى ومسمع منهن
أوصلها "آدم" الى مكان سكنها وقبل أن تخرج من السيارة التفت له
قائله بدلال :
- ميرسى أوى يا دكتور .. آه على فكرة فى بارتى حلو أوى النهاردة تحب
تحضره ؟
ابتسم لها قائلاً :
- امتى ؟
قالت بحماس :
- هتبدأ 9 بالليل
صمت قليلاً .. فتعلقت أنظارها به تتمنى موافقته .. اتسعت ابتسامتها
عندما قال :
- قوليلي العنوان
أملته العنوان ونزلت من السيارة وهى تبتسم له مودعه

كانت حفلة كعشرات الحفلات التى تحضرها "ساندى" لكن المميز فيها
هذه المرة هو "آدم" الواقف بجوارها .. والذى أثار ذلك غيرة قريناتها
من الفتيات بالحفل .. كان "آدم" يعنى جيداً ما يحدث حوله لكنه تظاهر
باللامبالاة .. فكل ما يريده يتحقق بدون أن يسعى اليه .. وها هى
"ساندى" هى الأخرى تختصر عليه نصف الطريق

قالت "ساندى" بتفاخر أمام "ريم" وهى جالسه معها فى النادر :
- امبارح بالليل كنت مع "آدم"
هتفت "ريم" غير مصدقه :

- بتكلمى بجد ؟
قالت "ساندى" ضاحكة :
- آمال بهزر
قالت "ريم" بلهفه :
- كنتى معاه فين ؟
قالت "ساندى" :
- كنا فى حفلة مع بعض .. وفضلنا طول الليل مع بعض وروحنا قبل الفجر
بشوية .. بس كانت سهرة لذيدة مووت .. والبنات كانوا بيصولى وهين
عليهم يقطعونى بعينهم لأن "آدم" مكنش معبر فى الحفلة واحدة غيري
ثم قالت ضاحكة :
- تصورى واحدة جتله بتقوله انها عايزه ترقص معاه وهاتك يا تسبيل ..
أخرجها وقالها لو عايز أرقص جمبي بنت زى القمر هرقص معاها ..
حسيتها كانت هتموت من الغيظ
ضحكت "ريم" قائله :
- ممتازة يا "ساندى" خلاص كده دكتور "آدم" بأه متيم
ابتسمت "ساندى" قائلاً بتعالى :
- طبعاً يا بنتى هو أنا شويه

وقفت "آيات" ضاحكة مع "أسماء" و بعض صديقاتها .. عندما اقترب
منهن "أحمد" ووقف وصبت نظراته على "آيات" فقالت له :
- ازيك يا "أحمد"
لم يجيبها .. فقالت "أسماء" :
- ايه يا ابنى مالك واقف متنح لـ "آيات" كده
قال "أحمد" فجأة وعلى مرأى ومسمع من الجميع :
- بحبك تتجوزيني ؟
فتحت "آيات" فمها بدهشة واتسعت عيناها .. وتعالقته شهقات الفتيات
وضحكهن ومزاحهن .. لكن "أحمد" لم يكتفى بذلك بل التف حول نفسه
وصرخ فى جميع من حوله :
- يا جماعة اشهدوا .. أنا بحبك "آيات" وعايز أتجوزها ..
بحبها!!!!!!!!!!!!!!!!!!!!!!!!!!!!!!
نظرت "آيات" حولها لتجد نظرات الجميع معلقة بها وهم يتضحكون فى

"آدم" .. وخطه خبيثة تُرسم داخل عقله

بعد يومين عادت "آيات" الى بيتها فاستقبلها والدها وهو يقول :

- "يويو" حبيبتي

فتح لها ذراعيه فألقت نفسها في أحضانه .. قبل رأسها وابتسم لها بسعادة

.. قالت "آيات" :

- خير بابا شكلك مبسوط

قال ضاحكاً :

- مبسوط جداً

قالت "آيات" مبتسمة :

- ابسطنى معاك

قال والدها وهوي تفرس فيها :

- جالك النهاردة عريس

اخذت ابتسامة "آيات" ليحل محلها الوجوم .. ثم قالت توتر :

- مش دلوقتي يا بابا لما أخلص دراستي

قال والدها :

- أساساً معدش الا كام شهر وتخلصى وبعدين مش تسأليني الأول مين هو

قالت "آيات" بلامبالاة :

- مين .. حد من ولاد صحابك ؟

قال والدها مبتسماً :

- قالى انه دكتور عندك فى الجامعة .. اسمه دكتور "آدم خطاب" ..

بيديكوا مادة "ادارة أعمال"

أخذ قلب "آيات" يرقص فرحاً وهى تتمتم فى سعادة بالغة وبصوت

مرتجف :

- دكتور "آدم" !



- جالك النهاردة عريس
اختفت ابتسامه "آيات" ليحل محلها الوجوم .. ثم قالت بتوتر :
- مش دلوقتى يا بابا لما أخلص دراستى
قال والدها :
- أساساً معدش الا كام شهر وتخلصى وبعدين مش تسأليني الأول مين هو
قالت "آيات" بلامبالاة :
- مين .. حد من ولاد صحابك ؟
قال والدها مبتسماً :
- قالى انه دكتور عندك فى الجامعة .. اسمه دكتور "آدم خطاب" ..
بيديكوا مادة "ادارة أعمال"
- أخذ قلب "آيات" يرقص فرحاً وهى تتمتم فى سعادة بالغة وبصوت مرتجف :
- دكتور "آدم" !
قال والدها :
- أيوة يا "آيات" .. تعرفيه مش كده
قالت بحماس لم تستطيع اخفاؤه :
- أيوة يا بابا أعرفه
ثم قالت :
- طيب هو قالك ايه بالظبط
ضحك والدها قائلاً :
- أمال راح فىن كلامك اللى كان من شوية .. مش دلوقتى يا بابا لما
أخلص دراستى

احمرت وجنتاها خجلاً .. فقال والدها :
- قالى يشرفنى انى أتقدم لبنتك "آيات" .. وعرفنى بنفسه .. وعائز ييجى
البيت عشان يتقدم رسمى وتعدوا تتكلموا مع بعض
قالت "آيات" بفرح :
- بجد .. وقولتله ايه ؟
قال والدها مبتسماً :

- قولتله هرد عليك بكرة ان شاء الله .. قولت الأول آخذ رأيك بما انه
دكتور عندك فى الجامعة يعنى شايفاه وعارفاه .. فخفت يكون مفيش قبول
.. بس كده من الواضح ان فى قبول وقبول أوى كمان
ضحكت "آيات" خجلاً وأطرقت برأسها .. اقترب منها والدها وقبل جبينها
قائلاً :

- ربنا يكتبك اللى فيه الخير يا بنتى
صعدت "آيات" فى غرفتها وهى تكاد تقفز فى الهواء فرحاً .. لم تصدق
ما حدث .. "آدم" تقدم لها .. فارسها يريداه معه على ظهر جواده ..
فارسها اقتحم حياتها بفروسية الفرسان ودخل البيت من بابه .. هو بالفعل
فارسها .. وحببها

فتحت حقيبتها بسرعة وأخرجت هاتفها .. لم تكد "أسماء" تجيب على
الهاتف حتى قفزت "آيات" قائله بفرحة غامرة :
- دكتور "آدم" اتقدملى يا "أسماء"
صاحت "أسماء" بدهشة بالغه :

- ايه .. بتقولى ايه .. بتهرجى
ضحكت "آيات" بسعادة وقالت بصوت أشبه بالصراخ :
- لا مش بهرج .. والله اتقدملى .. رجعت البيت لقيت بابا بيقولى انه
اتقدملى

صمتت "أسماء" قليلاً ثم قالت وهى مصدومة :
- مش مصدقة

قالت "آيات" :
- ولا أنا مصدقة .. أنا هتجنن .. انا مش عارفه أعمل ايه .. فرحانه أوى ..
عائزة أصرخ عائزة أضحك عائزة أظير .. "أسماء" .. أنا حسه ان أنا
بحلم .. لحد دلوقتى مش قادرة أصدق
قالت "أسماء" وهى لم تفق من صدمتها بعد :
- أنا نفسى لسه مش قادرة أصدق .. معقول حبك بالسرعة دى
قالت "آيات" وابتسامه حالمة على شفيتها :

- تفكرى بيحبني فعلاً يا "أسماء" .. يااه مش قادرة أصدق .. أنا فرحانه
بطريقة محدش يقدر يتخيلها
قالت "أسماء" مبتسمه :
- حبيبتي يا "آيات" ربنا يتملك على خير يارب
قالت "آيات" بصدق :
- ميرسي يا "سمسم" وعقبالك انتى كمان يااارب

فتحت والدة "إيمان" الباب وابتسمت قائله بترحاب :
- أهلا أهلا يا "سمر" اتفضلى يا حبيبتي
انتفض "على" الجالس فى غرفته .. وابتسم ابتسامة صغيرة
قالت والداته لـ "سمر" :
- "إيمان" فى أوضتها يا حبيبتي .. والله ما عارفه البت دى ملها .. عين
وصابتها
دخلت "سمر" غرفة "إيمان" .. فوجدتها جالسه فى فراشها وأمامها
طبق كشرى كبير تأكل منه دون توقف .. ضحكت "سمر" قائله :
- طيب قوليلى ازيك حتى
قالت "إيمان" بهدوء وهى تبلع ما بداخل جوفها :
- ازيك يا "سمر"
أغلقت "سمر" الباب وجلست بجوار "إيمان" قائله :
- ايه يا بنتى فى ايه .. مش عجبانى بقالك كام يوم .. وكل ما أتصل بالبيت
طنط تقولى نايمة .. وعلى الموبايل مبترديش .. فى ايه يا "إيمان"
تركت "إيمان" الطبق من يدها وقالت بحزن :
- ما أنا زى الفل أهو .. وأعده عماله ألغ مش راحمة نفسي
قالت "أسماء" وهى تنظر اليها بتمعن :
- أنا عارفاكى يا "إيمان" مبتكليش كده الا لو كنتى مضايقة
ثم جذبت الطبق من يدها قائله :
- وبعدين كده كتير أوى .. حرام عليكى نفسك
قالت "إيمان" بحدة وهى تستعيد طبقها مرة أخرى :
- يا ستى انتى مالك ومالى .. أنا جعانه .. ايه أموت من الجوع يعنى
قالت "سمر" بحزم :
- ده مش جوع يا "إيمان" ده هروب .. بتهرىبي من مشاكلك بالأكل ..
بتهرىبي من خنقتك بالأكل

قالت "إيمان" بتحكم :
- كنت فأكراكى دكتورة أطفال مكنتش أعراف انك دكتورة نفسيه
قالت "سمر" بهدوء :
- مش لازم أكون دكتورة نفسية عشان أقدر أفهم صحبتى .. أقرب صاحبة
ليا
تنهدت "إيمان" وأطرقت صامته .. قالت "سمر" :
- انتى ليه بتعمل فى نفسك كده .. مش اتفقنا هتعملى رجيم وقولتيلى
الاسبوع اللى فات انك هتبتدى فيه
هتفت "إيمان" بحده :
- وأعمل رجيم ليه .. عشان مين .. عشان أعجب راجل ويوافق انه
يتجوزنى .. لا مش عايزة أنا عجبنى نفسي كده
قالت "سمر" بحزم :
- لا مش عشان تعجبنى راجل .. وأعتقد ان المفروض ان انتى واحدة
ملتزمة وعارفه كويس انك ميتفعلش تجذبى راجل ليكى لا بشكك ولا
بجسمك .. انتى هتعملى رجيم عشانك انتى عشان "إيمان"
قالت "إيمان" بعناد :
- "سمر" اقللى على الموضوع .. أنا مش عايزة أعمل رجيم .. أنا كده
مبسوطة بنفسى .. ومبسوطة أوى كمان
صاحت "سمر" بحنق :
- عنيدة ودماعك ناشفة
قالت "إيمان" لتغير الموضوع :
- أخبار شغلك فى المستشفى ايه ؟
قالت "سمر" :
- كويس
قالت "إيمان" :
- مفيش جديد ؟
تذكرت "سمر" .. المرأة التى كانت تريدها لأخوها .. تنهدت وقالت حزن
:
- لا مفيش جديد

دخلت "آيات" المدرج متأنقة كعادتها .. لكن هذه المرة قلبها يخفق من
السعادة .. اليوم سترى "آدم" .. ليس فى المحاضرة فحسب بل فى بيتها

.. اليوم سيأتى "آدم" ليتقدم لها رسمياً .. كانت عيناها تلمعان وابتسامتها لا تفارق وجهها .. رآته وهو يدخل من الباب .. ودت لو قامت وصرخت وسط الطلاب .. هذا الرجل فارسى .. هذا الرجل حبيبي .. هذا الرجل خطيبي .. هو لى وحدى .. وأنا له وحده .. صعد المنصة وحياهم ثم أدار عينيه حتى وصل اليها .. وجدها مبتسمة تنظر له بلهفه .. رأى على وجهها علامات الموافقة .. فعلم أن زيارة اليوم نتيجتها محسومة .. قال بصوته الرخيم :

- امتحان مفاجئ يا شباب .. كله يطلع ورقة وقلم واكتبوا ورايا الأسئلة دى

ابتسمت "آيات" فى سعادة وهى تنظر حولها وتتأمل ملامح الصدمة على وجوه الطلاب .. أما هى فظلت محتفظة بابتسامتها .. فحبيبها خصها وحدها بمعرفة أمر هذا الإمتحان المفاجئ .. ألقى عليها "آدم" نظرة فتلاقت عيناها .. واتسعت ابتسامتها وهى تمسك بقلمها وتستعد لكتابة الأسئلة

تألق "آدم" ووقف أمام المرأة يتمم على مظهره .. دخلت "بوسي" غرفة النوم وهى تتأمله .. ثم اقتربت منه قائلة :
- ايه الشياكة دى كلها .. اللى يشوف كده يقول عريس
ابتسم "آدم" قائلاً :

- ومن امتى يعنى مبهتمش بلبسى
قالت "بوسي" بقلق :

- بس النهاردة حسه انك مهتم زيادة عن اللزوم .. خير ان شاء الله
قال "آدم" بلامبالاة وهى يعيد ربط ربطة عنقه :

- مفيش فى لقاء عمل مهم بالنسبة لى
اقتربت منه "بوسي" وحاولت عناقه من الخلف فابتعد عنها فوراً وقال :
- "بوسي" البدلة مكوية .. وكمان البرفيوم بتاعك مش عايزه ييجى عليها

قالت "بوسي" بضيق :
- طيب هتتاخر ؟

قال "آدم" بلامبالاة وهو يتوجه الى الخارج :
- احتمال أباب عند ماما النهاردة

قالت "بوسي" بحنق شديد :

- وليه متبتش هنا
قال "آدم" بنفاذ صبر :
- ماما لوحدها
قالت "بوسي" بحزن :
- بس يا "آدم" أنا مبحبش أبات لوحدى وانت عارف كده
قال "آدم" وهو يقبل وجنتيها :
- حاضر هحاول أبات معاكى النهاردة .. سلام
خرج وأغلق الباب خلفه .. توجهت "بوسي" الى الشرفة تشاهده وهو
متوجه الى السيارة ثم تنهدت فى حسرة وعلامات الحزن على وجهها

وقفت "آيات" أمام المرأة تتمم على فستانها ومكياجها ولفة حجابها ..
قالت دادة "حليمة" بسعادة :
- بسم الله الله أكبر .. زى القمر يا "آيات"
التفت اليها "آيات" قائله بلهفه :
- بجد يا دادة شكلى حلو ؟
هتفت "حليمة" بحنان :
- حلو بس ده انتى زى القمر يا بنتى
ابتسمت "آيات" بسعادة ثم قفزت من مكانها عندما سمعت صوت سياره
تتوقف تحت نافذتها .. أسرعت بفتح الشرفة ثم قالت بلهفه :
- جه يا دادة جه
تقدمت "حليمة" لتنظر من الشرفة ثم صاحت فى سعادة :
- بسم الله ما شاء الله .. عريسك حلو أوى يا "آيات" وبابن عليه راجل
ملو هدومه .. ربنا يسعدك يا حبيبتي ويوفقك يارب
قالت "آيات" بسعادة ولهفه :
- دادة حلو الميك أب ولفة الطرحة كدة ولا أعدل فيهم حاجه
قالت "حليمة" بحنان :
- يا حبيبتي انتى زى القمر من غير حاجة
قالت مبتسمه :
- نفسى النهاردة يشوفنى أحلى واحدة فى الدنيا
عانقتها "حليمة" قائله :
- ربنا يسعدك يارب ويتمملك بخير
دخلت "أسماء" الغرفة مسرعة وهى تقول :

- جه يا "آيات" انتى فين
خرجت "آيات" من الشرفة وهى تقول :
- آه شوفته يا "أسماء" انتى اللى كنتى فين
قالت "أسماء" بمرح :
- كنت فى المطبخ ما انتى مجوعانى من الصبح
قالت "آيات" ضاحكة :
- المقابلة تعدى على خير وأنا أخذك ونروح أرقى وأحسن مطعم فيكى يا
كايرو وأعزمك عزومة محصلتش
ضحكت "أسماء" قائله :
- ماشى خليكى شاهده يا دادة .. عشان مترجعش فى كلامها بعد كده

فى الأسفل دخل "آدم" بعدما أدخلته الخادمة وجلس فى انتظار والد
"آيات" .. نظر حوله يتأمل الفيلا الراقية بمفروشاتها الثمينة وعيناه
تشعان كرهاً وحقداً وتساءل فى نفسه بسخرية :
- يا ترى فلوسك حرام زى أخوك يا "عبد العزيز" بيه؟! ..
لحظات وحضر والد "آيات" يرحب به قائلاً :

- اهلاً وسهلاً يا دكتور
قام "آدم" وسلم عليه قائلاً :
- أهلاً بيك يا فندم
قال له "عبد العزيز" وهو يجلس فى المقعد المقابل له :
- اتفضل يا دكتور .. تشرب ايه ؟
قال "آدم" :
- قهوة مطبوطة ياريت
طلب "عبد العزيز" من الخادمة احضار ما أراد .. ثم نظر اليه قائلاً :
- برده لسه مفكرتش اتقابلنا فيه ؟
ابتسم "آدم" قائلاً :
- بصراحة لأ .. بس فعلاً عندى نفس احساس حضرتك .. اننا اتقابلنا قبل
كده

ابتسم "عبد العزيز" وهو يقول بمرح :
- خلصا اللى يفكر الأول يفكر التانى
.. ظلا يتحدثان لنصف ساعة .. اخبره خلالها "آدم" بأنه وحيد أمه و أبوه
.. وبأن والده متوفى منذ أعوام .. ووالدته على سفر حالياً لأحد أقاربهم
فى محافظة أخرى .. وأن لديه شقة مفروشة حديثاً فى أحد الأحياء الراقية

.. أخبره عن مشواره العلمي وعن كفاحه ونضاله ليصل الى ما هو عليه .. أعجب " عبد العزيز " بما سمع منه .. لم يكن كل ما قاله " آدم " كذباً .. كان الجزء المتعلق بكفاحه وبمعاناته حتى حصل على الدكتوراة صدقاً .. تجبر أى أب على أن يشعر تجاهه بالفخر والإحترام .. أمر " عبد العزيز " الخادمة لتطلب من " آيات " النزول .. شعرت وكأن قدماها ترفضان حملها .. ابتسمت تلقائياً عندما وقع نظرها عليه اختفت حمرة الخجل خلف الباودر الذى تضعه على وجهها .. قام ومد يده قائلاً :

- أهلا بيك يا أنسة " آيات "

مدت يدها قائلة بصوت منخفض والإبتسامه تزين وجهها :

- أهلا بيك يا دكتور

ارتجف قلبها عندما تلامست أيديهما .. ودت لو تركت كفها بين راحته فترة أطول .. لكنها سحبتها بسرعة وبخجل وجلست فى المقعد الذى أمامه .. تأملها " آدم " وقد فعلت المستحيل لتبدو بصورة أنيقة جذابه .. لكن تلك الصورة أشعرته بالنفور .. أشعرته بأنها الجارية المعروضة فى سوق الجوارى والتي تترين وتفتخر بمحاسنها حتى يشتريها الرجال .. وتصير ملكاً لرجل يأسره جمالها .. لكن " آدم " لم يكن أبداً يستهويه هذا النوع من الفتيات .. لم يكن يستويه من تقدم التنازلات لتنال رضاه السامى .. لم يكن يستهويه الشئ السهل .. الذى يستطيع لمسها متى أراد ويفعل به ما يريد فى الوقت الذى يريد .. هذا النوع يضعه فى قائمة " للتسلية فقط " .. أما قائمة " للأبد " .. لم تحمل إلا اسماً واحداً وسرعان ما حذفه منها بعدما أيقن بأنه أخطأ فى وضعه من الأساس .. أفاق من شروده على صوت " عبد العزيز " وهو يقول :

- منور يا دكتور

ابتسم " آدم " قائلاً :

- ده نور حضرتك يا فندم

قام " عبد العزيز " وقال :

- أسيبكوا تتكلموا مع بعض .. بعد اذنكوا

نظر " آدم " الى " آيات " المبتسمه ثم رسم على شفثيه ابتسامه قائلاً :

- عملتى ايه فى امتحان النهاردة؟

ضحكت قائله :

- الإمتحان المفاجئ ؟

ضحك قائلاً :

- أيوة بالظبط كده

- ابتسمت وهى تقول :
- حليت الأسئلة كلها .. حضرتك طبعاً لسه مصححتش الورق
ابتسم " آدم " وهو يخرج ورقة من جيبه قائلاً :
- صححت ورقتك
- نظرت الى الورقة التى فى يده ثم نظرت اليه لتقابل عيناه التى ترسل أشعة
اختراق قوية فانهارت حصونها أمام نظراته وابتسم قائلاً :
- فول مارك
- ابتسمت وهى تقول بمرح :
- قولتك .. لو عملت امتحان مفاجئ هتلاقيني جاهزة
قال بخبث وهو يعيد الورقة لجيبه :
- شكلك بتحبي ادارة الأعمال أوى
صمتت .. ودت لو قالت له بل أحبك أنت .. قالت له " آيات " باهتمام :
- ممكن أسأل حضرتك سؤال
- اتفضلنى طبعاً
قالت " آيات " وهى تنظر اليه مبتسمة :
- ليه اتقدمتلى .. اشمعنى أنا ؟
صمت " آدم " قليلاً ثم قال :
- تفكرى ليه ؟
قالت :
- أنا اللى بسأل
أخذ رشفة من العصير الموضوع أمامه ثم قال :
- بكرة تعرفى
نظرت اليه .. تحاول أن تعرف فيما يفكر .. ماذا يشعر .. ابتسم لها تلك
الإبتسامه الساحرة الذى تذيب الجليد .. فحقق قلبها .. واتسعت ابتسامتها
وهى تقول فى نفسها :
- بحبك .. بحبك يا " آدم "

بعد يومين .. كانت " آيات " جالسه فى شرفة غرفتها تتأمل القمر الذى
اكتمل وصار بدرأ .. تأملت ضوءه الفضى وهو يخترق ظلام السماء ..
شعرت بأنه كقلبها .. يشع ضوءاً وفرحاً .. ويبث فى جسدها شعوراً لذيذاً
.. تذكرت حلمها .. الزرع .. الخضرة .. وفارسها على جواده الأصيل ..
مقبل نحوها .. والشمس تزين الأفق .. يقف أمامها ويمد يده .. فتبتسم

وتصعد خلفه .. أفاقته من أحلامها على صوت طرقات الباب .. وفتحت الباب وابتسمت قائله :

- بابا .. انت لسه صاحى
ابتسم وهو يدخل قائلاً :

- أيوة حبيبتي .. وشوفتك وأنا فى الجنينة قولت آجى عشان أتكلم معاكى
شوية
قالت له :

- اتفضل يا بابا
وقفنا متجاورين فى الشرفة .. استنشقت "عبد العزيز" عبير المساء .. ثم التفت الى ابنته يمسح بيده على شعرها وينظر لها فى حنان .. ابتسمت "آيات" واقتربت منه تلقى برأسها على صدره .. قبل شعرها قائلاً :

- صعب عليا أوى فراقك .. بس كان لازم يجى اليوم ده .. عارف لو يرضى .. كنت خلتيكوا تعيشوا انتوا الاتنين معايا هنا فى الفيلا
ابتسمت "آيات" وقد رفعت رأسها لتنزر اليه فأكمل قائلاً :

- قوليلي الأولى .. ايه ردك ؟ .. المفروض أبقى عارف ردك عشان لما يتصل بيا بكرة
نظرت "آيات" الى يديها بخجل وهى تعبت بهما بتوتر .. فقال والدها
ضاحكاً :

- أفهم يعني ان السكوت علامة الرضا
ضحكت قائله :

- يعني
قبل رأسها قائلاً وقد اغرورقت عيناه بالعبرات :

- مبروك يا حبيبتي .. مبروك
نظرت اليه وقد اغرورقت عيناه بالعبرات هى الأخرى وقالت :

- ليه بأه كده يا بابا .. بتعيط ليه
ابتسم والدموع فى عينيه قائلاً :

- مبعيطش ولا حاجة انتى اللى بتعيطى
مسحت الدمعة التى سقطت على وجهها وهى تقول بصوت مضطرب :

- مبحبش أشوفك بتعيط .. متعيطش تانى
ابتسم لها وهو يعانقها قائلاً :

- ربنا ما يحرمنى منك أبداً يا بنتى
أغمضت عينيها وهى تلف يدها حوله قائله :

- ولا يحرمنى منك يا بابا

اتصل "آدم" بـ "عبد العزيز" ليعرف منه قرار "آيات" والذي يتوقعه بالفعل .. اتسعت ابتسامته الواثقة وهو يتلقى خبر موافقتها على طلبه للزواج منها .. قال "عبد العزيز" :
- ياريت تشرفنى فى الفيلا يا دكتور "آدم" عشان نتكلم فى التفاصيل
قال "آدم" :
- حضرتك توامر .. ان شاء الله بكرة هكون عند حضرتك على الساعة 5 ..
مناسب ؟

قال "عبد العزيز" :

- أيوة مناسب .. فى انتظارك ان شاء الله
أنهى "آدم" المكالمة وعيناه تلمع خبثاً ومكراً وقد أسعده اقترابه من تحقيق هدفه .. دخلت "بوسى" غرفة المعيشة وطوقت بذراعيها رقبة "آدم" الجالس على الأريكة .. أرغم نفسه على الابتسام فهمست فى أذنه :

- وحشتنى أوى

قال لها :

- وانتى كمان

همست قائله :

- طيب أعد لوحدك ليه

قال "آدم" وهى يرفع هاتفه :

- كنت بتكلم فى الموبايل

جذبتة قائله بدلال :

- طيب كفاية شغل بأه

نهض وقبل وجنتها قائلاً :

- حاضر يا حبيبتى

كان "آدم" فى طريقه الى بيت "آيات" .. عندما رن هاتفه .. ابتسم

بسخرية ثم رد قائلاً :

- هاى "ساندى"

قالت "ساندى" بمرح :

- هاى دكتور .. ازيك

- تمام
 قالت بمرح :
 - بقولك ايه يا دكتور هو الامتحان بتاع المرة اللي فاتت ده كان مهم يعني
 ابتسم قائلاً :
 - أها مهم ودرجاته مخصوصه من توتل المادة
 قالت بدلال :
 - أصل أنا مكنتش مستعده .. وبصراحة معرفتش أجاب على أى سؤال ..
 ورقتي بيضا يعني
 قال " آدم " بمرح :
 - يعني هتاخدى 0 كبيره
 قالت " ساندى " بمرح :
 - وأهون عليك يا دكتور تديني 0 .. مكنش عيش وباتيه
 ضحك قائلاً بلووم :
 - لو وعدتيني انك تذاكري مادتي كويس أنا هغير ال 0 دى
 قالت بحماس :
 - ده أنا هعد دلوقتي أكل الكتب مش بس أذاكر
 قال " آدم " بخبث :
 - ماشى يا " ساندى " .. متقلقيش
 قالت بدلال :
 - واثق انى مقلقش
 قال :
 - طالما " آدم " قالك متقلقيش يبقى متقلقيش
 قالت بسعادة :
 - ميرسي يا دكتور
 أنهى " آدم " المكالمه وهو يبتسم لنفسه بسخرية

- قال " آدم " لـ " عبدالعزيز " وهو جالس معه فى فيلته :
 - أنا بقول نخليها كتب كتاب مع الخطوبة
 ضحك " عبد العزيز " قائلاً :
 - بالسرعة دى يا دكتور
 قال " آدم " مبتسماً :
 - أنا جاهز يا " عبد العزيز " بيه .. ايه يخليني أستنى

قال "عبد العزيز" :

- على الأقل تستنى تشوف هتقدروا تتفاهموا مع بعض ولا لاء

قال "آدم" بثق :

- لا حضرتك متقلقش أنا واثق ان أنا و "آيات" هنتفاهم كويس .. ومش

هيكون فى أى مشاكل بينا

صمت "عبد العزيز" يفكر .. ثم قال :

- بصراحة يا دكتورة . أنا مش حابب السرعة دى .. على الأقل يكون فى

شهر بين الخطوبة وكتب الكتاب

شعر "آدم" بالضيق .. لكنه ابتم قائلاً :

- مفيش مشكلة نخليها شهر وبعدها نكتب الكتاب

قال "عبد العزيز" :

- وناوى الفرح يكون امتى ؟

صمت "آدم" وقد بوغت بالسؤال .. فخطته لن تصل الى يوم العرس أبداً

.. خطته ستكتمل بكتب الكتاب .. هذا هو هدفه الذى يريد أن يصل اليه ..

بالإضافة الى أنه لو وصل الى العرس فسينكشف أمر .. وينكشف كذبه ..

فهو لا يملك تلك الشقة الفاخرة التى ادعى أنها ملكه .. ولا يملك حتى ما

سيدفعه لإقامة حفل العرس .. لذلك فخطته ستتوقف عند كتب الكتاب .. هو

فقط يريد "آيات" فى يده .. أو بمعنى أصح .. يريد روحها فى يده ..

ليتحكم فيها وفيهم كيفما شاء .. ويسترد حقه المسلوب .. أفاق من شروده

قائلاً :

- نحدد سوا المعاد .. مفيش معاد محدد فى بالى

اقتربت "آيات" فى تلك اللحظة .. فنهض "آدم" ومد يده ليسلم عليها

قائلاً :

- ازيك يا آيات"

أجابت مبتسمة :

- كويسة الحمد لله

قام "عبد العزيز" وتركهما بمفردهما .. رفعت رأسها لتجد نظرات "آدم"

مثبتة عليها فابتسمت بخجل .. ثم قالت :

- اتفقتوا على ايه ؟

قال "آدم" مبتسماً :

- اتفقتا ان الخطوبة هتكون بعد اسبوع .. وكتب الكتاب بعدها بشهر

قفز قلب "آيات" فرحاً فسألها "آدم" وهو يراقب تعبيرات وجهها التى

تشع سعادة :

- ايه رأيك ؟

قالت بصوت مضطرب :

- تمام .. مفيش مشكلة

بدت على "آدم" ملامح الجدية ثم قال :

- انتوا ليه مقاطعين عمك "سراج" ؟

لم تكن تلك المعلومة مفاجئة بالنسبة الى "آدم" .. أو اكتشفها بعد أن تقدم

لخطبتها .. بل تلك المعلومة تحديداً هي ما جعلت "آدم" يقدم على طلب

يدها بقلب جامد .. لأن مادامت الخيوط منقطعة بينها وبين عمها .. إذن

فلن يعرف بأمر خطبتها .. ولن يلتقيه "آدم" إلا في اللحظة التي يريد

"آدم" .. يريد أن يخفى هذا الأمر عن "سراج" حتى تأتي اللحظة

الحاسمة .. فيكشف أوراقه ويربح كل الموجود على الطاولة .. قالت

"آيات" بحزن :

- مش عارفه بصراحة

قال "آدم" باستغراب :

- ازاي يعني مش عارفه

قالت "آيات" شارحه :

- بابا مقاطعه من زمان .. وقالى ان حصل خلاف كبير أوى بينهم وقاطعوا

بعض .. لكن مرضاش يحكىلى المشاكل اللى حصلت بينه وبين عمو

قال "آدم" باهتمام :

- وولاد عمك انتى على علاقة بيهم ؟

قالت "آيات" بحزن :

- لا بابا منغنى انى اتكلم معاهم وهما كمان محدش فيهم بيكلمنى .. هو

عنده بنت واحدة وولد واحد .. بس للأسف بقالنا سنين مشوفناش بعض

ومنعرفش أى حاجة عن بعض

ابتسم "آدم" وهو يشكر الظروف التى تساعده على استكمال خطته دون

أى منغصات

هتفت "ريم" ضاحكة :

- مش قادرة أبطل ضحكك .. دكتور "آدم" هيخطب وانتي عماله مصدعانى

ليل نهار ده كلمنى يا "ريم" .. ده بيقولى كذا يا "ريم"

هتفت "ساندى" بحنق وهى تهب واقفة :

- "ريم" لو مبطلتيش ضحك هسيبك وأمشى

قالت "ريم" وهى تحاول كتم ضحكاتها :

- خلاص خلاص اعدى

جلست "ساندى" قائله بحنق :

- وبعدين انتى هبله ؟ .. انتى فاكرانى بحبه ولا ايه .. أنا بس عايزه اننا

نبقى صحاب لانى بحب النظرة اللى بشوفها فى عين البنات لما بكون

واقفه معاه

قالت "ريم" بتهكم :

- وهى خطيبته بأه هتسمحله يقف معاكى تانى .. خلاص يا بنتى دى لو

هتطول هتחסبه فى البيت ومنتزلوش منه

ثم انفجرت ضاحكة مرة أخرى فقالت "ساندى" بحنق :

- ليه ان شاء الله .. وبعدين دكتور "آدم" واحد فري جداً ومش

متخلف .. وهى لو عملت كده فعلاً يبقى بتخنقه وهتخليه يطفش منها

بسرعة

صمتت قليلاً ثم قالت بثقة :

- بكرة تشوفى ان دكتور "آدم" هيفضل زى ما هو ومش هيتغير عشانها

اقترب "آدم" من "بوسى" الواقفة فى المطبخ ولفها بذراعيه قائلاً :

- بتعملى ايه

ابتسمت له قائلاً :

- بعمل ساندوتشات للعشا

ثم قالت بمرح :

- فرحانه أوى انك هتبات معايا النهاردة كمان

قبل وجنتها قائلاً :

- أعمل ايه بتوحشيني لما ببعد عنك

التفتت اليه قائله بسعادة :

- بجد يا "آدم" ؟

قال لها وهى يلعب بخصلات شعرها :

- طبعاً يا حبيبتي

ابتسمت له والتفتت مرة أخرى تكمل عملها .. بدا على "آدم" التردد قليلاً

ثم قال :

- "بوسى" كنت عايز أطلب منك طلب

قالت مبتسمة :
- أمر يا حبيبي
أخذ قطعة خيار ووضعها فى فمه ثم قال :
- محتاج 20 ألف جنية وهرملك فى أقرب قوتك
صمتت قليلاً ثم قالت :
- عايزهم فى ايه ؟
قال ببرود :
- ايه تحقيق .. عايزهم وخلص
توقفت "بوسى" عما تفعل والتفتت اليه قائله :
- بس يا "آدم" على الأقل عرفنى عايزهم فى ايه
قال ببرود وهو يرمقها بحده :
- خلاص انسى يا "بوسى"
ثم غادر وتوجه الى غرفة النوم .. هرعت "بوسى" خلفه تنظر اليه وهو
يبدل ملابسه فقالت :
- بتعمل ايه يا "آدم"
قال ببرود دون أن يلتفت اليها :
- رايح البيت
قالت بحزن :
- مش انت قولتلى هتبات معايا النهاردة
قال دون أن ينظر اليها :
- غيرت رأيي أنا سايب ماما من امبارح
قالت "بوسى" :
- "آدم" ليه بتعمل كده .. انت عارف انى بكره أعد لوحدى .. بتخنىق من
الوحدة .. ليه مش عايز تعد معايا
التفت اليها "آدم" ونظر اليها بحدة قائله :
- أعد معاكى ليه هو انتى بتحبينى
اقتربت منه "بوسى" وقالت بصوت متهدج :
- أيوة بحبك يا "آدم" .. انت عارف انى بحبك
قال "آدم" بحزم :
- لو بتحبينى بجد يباه هتعملى اللى قولتلك عليه يا "بوسى"
قالت "بوسى" مبتسمة :
- خلاص يا حبيبي متزعلش بكرة هروح أسحبهم من البنك
قال "آدم" مبتسماً :

- متقلقيش هردهملك هما وكل الفلوس اللي خدتها منك قبل كده
قالت مبتسمة وهي تلقى بنفسها بين ذراعيه :
- أنا مش عايزاك تردهملى يا "آدم" .. أنا عايزاكى تفضل معايا
ومتسبنيش أبداً
قال "آدم" بنظرات خاوية وصوت خاوى كالصوت الذى يخرج من
الرسائل المسجلة :
- متخفيش يا حبيبتى مش ممكن أسيبك أبداً

توجهت "آيات" بصحبة "آدم" لشراء دبل الخطوبة .. كانت فى قمة
سعادتها وفرحتها وهي جالسه بجوار حبيبها فى سيارته .. امتدت يد
"آدم" لتمسك بيدها .. فالتفتت وابتسمت له فى سعادة .. نزل وفتح لها
الباب فابتسمت له .. لكم تعشق رقته وتصرفاته الراقية .. دخلا محل
الذهب لشراء دبنتين ذهبيتين .. فما كان أحدهما سيهتم بعدم جواز لبس
الذهب للرجل .. تناسيا ذلك أو لم يتذكراه أصلاً .. كانت "آيات" تبتسم فى
سعادة وهي تختار الدبلة التي ستتزوج أصابعها .. راقب "آدم" تعبيرات
وجهها الفرحه .. وابتسامتها التي لم تفارقها كلما رآها .. أخيراً اختارت ما
أعجبها .. وطلب منها "آدم" اختيار خاتم كهدية للخطبة .. ابتسمت فى
سعادة واختارت الخاتم .. أعطى "آدم" ما اختاروه لصاحب المحل وقبل
أن يحاسبه قالت "آيات" للرجل بسعادة :

- لو سمحت اكتب "آدم" و "آيات" على كل دبلة وكمان اكتب 25
سبتمبر سنة

شعر "آدم" بالدهشة من التاريخ الذى اختارته .. فهذا التاريخ يبعد ثلاث
سنوات ونصف عن التاريخ الخالى .. ذهب الرجل لينفذ طلبها فاقترب منها
"آدم" قائلاً :

- اشمعنى التاريخ ده

نظرت اليه بعنيان تشعان حباً وهي تقول :

- تاريخ أول مرة اتقابلنا فيها

عقد "آدم" ما بين حاجبيه فى دهشة ونظرة لها وهو لا يعي ما تقول ..
فقال مبتسمة :

- أول مرة اتقابلنا فيها .. كان فى أول شهر ليا فى الجامعة .. تاكسى خبط
فى الرصيد والسواق وقف يتخايق معايا .. انت جيت ودافعت عنى ..
وفضلت واقف جمبي لحد ما بابا جه ودفع للراجل الفلوس

نظر اليها "آدم" بدهشة .. أخيراً تذكر أين رأى والد "آيات" من قبل ..
لكن الشئ الوحيد الذى لا يستطيع تذكره .. هو "آيات" نفسها .. لم تكن
هى تلك الفتاة التى رآها يوماً .. أخذ ينظر اليها ويتأملها جيداً .. تلك
الفتاة الواقفة أمامه الآن والتى تبدو كفتيات الإعلانات مختلفة تماماً عن
تلك الفتاة البريئة النقية التى رآها من قبل .. والتى لفتت انتباهه يوماً ..
برقتها وبساطتها ووجهها البرئ الذى كانت تعلوه حمرة الخجل كلما
التقت أعينهما .. شعر بالدهشة تغمر كيانه وهو يتساءل فى نفسه .. أين
ذهبت تلك الفتاة البريئة؟! .. لماذا أصبحتى كما أراكى الآن!؟

الفصل السابع من رواية جواد بلا فارس



كان حفل الخطوبة فى حديقة الفيلا .. تم تجهيزها بشكل ممتاز .. وحضر
الأهل والأصحاب .. أما "آدم" فلم يدعو الا زملائه بالجامعة .. ولم يظهر
له بالحفل أى من أقربائه .. وعندما سئل عن ذلك قال ببساطة :
- مليش حد فى الدنيا غير ولدتى وكانت مسافرة عند قرايبها وتعبت جداً
ومقدرتش تيجي
فى غرفة "آيات" التف "أسماء" و "سمر" و "إيمان" حولها ..

كانت تضحك وتمزح معهن وهى تشعر بأنها كالعصفورة .. تطير وتسبح
فى الفضاء وترفرف بجناحيها فى سعادة .. كانت تشعر أن هذا اليوم هو
أحلى أيام حياتها .. نزلت مع صديقاتها وجلست على المقعد بجوار "آدم"

.. ما هي إلا لحظات وتعالى أصوات التصفيق بعدما ألبسها "آدم" دبلتها
وألبسته دبلته .. انحنى "آدم" ليهمس فى أذنها :

- مبروك يا حبيبتي

اتسعت ابتسامة "آيات" وتعالى دقات قلبها الصغير وهى تسمع منه لأول
مرة كلمة "حبيبتي" .. كان الناظر إليها يستطيع أن يتبين سعادتها
الغامرة فى هذا اليوم ..

تعالى أصوات موسيقى حالمة .. فأمسك "آدم" بيدها ووقف أمامها
ليراقصها .. لكنه فجأة وجد "عبد العزيز" مقبلاً تجاههما وأمسك ذراعيه
قائلاً :

- بعد كتب الكتاب يا دكتور

نظر إليه "آدم" للحظة صامتاً ثم قال مبتسماً :

- طبعاً

شكرت "آيات" والدها فى سرها .. لأنه عفاها من حرج مراقبة "آدم"
أمام الناس ..

أقبلت صديقاتها لتقديم تهنئتهن .. ألقى "آدم" نظرة على كل من "إيمان"
و "سمر" .. وشعر بالدهشة .. كانتا الوحيدتان من بين الفتيات بالحفل
اللاتى يرتدين لباساً محتشماً وبدون أى زينة للوجه .. نظر الى الطريقة
التي تتعامل بها "آيات" معهن ف شعر أنهما على صلة وطيدة بها .. بعدما
رحلتا انحنى "آدم" على أذن "آيات" قائله :

- مين دول ؟

ابتسمت قائله :

- صحابي

قال "آدم" باستغراب :

- معاكى فى الكلية

قالت "آيات" شارحة :

- لا "سمر" دكتورة أطفال .. و "إيمان" دكتورة أسنان فى التكليف .. و
"أسماء" معايف الكلية

كانت تشير لكل واحدة منهن أثناء حديثها فقال بدهشة :

- واتعرفتوا ازاي .. انتوا لا من كلية واحدة ولا من سن واحد باستثناء
"أسماء"

ابتسمت قائله :

- اتعرفنا فى رحلة طلعتها فى أول سنة ليا فى الجامعة .. ومن يومها
واحنا صحاب

أوماً "آدم" برأسه .. ثم ابتسم لها وهو ينظر اليها بتمعن قائلاً :
- انتى جميلة أوى النهاردة
ضحكت "آيات" بسعادة قائله :
- بجد ؟ عجبك يعنى ؟
قال "آدم" وهو يشبك أصابعها بين أصابع يده :
- انتى عجبانى على طول
ازدادت سعادتها واتسعت ابتسامتها وهى تنظر اليه بعينان تشعان حباً
نظر اليها قائلاً :
- هستأذن من باباكى ونخرج سوا بكرة .. اتفقنا
أومات برأسها قائله بسعادة :
- اتفقنا

شعرت بسعادة غامرة وهى تنظر الى يده الممسكة بيدها .. رفعت رأسها
لتنظر اليه وهى تتمنى ألا تفرق أيديهما أبداً

انتهى حفل خطبتهما .. وعاد الجميع الى بيته .. أوقف "آدم" سيارته أمام
منزله .. وفتح الباب ودخل غرفته .. وفجأة التفت ليجد والدته واقفة أمام
الباب المفتوح .. خلع جايت البدلة واتجه الى الدولاب لإحضار ملبسه ..
نظرت اليه أمه بغضب قائله :
- مش هقولك كنت بايت فىن .. ولا هقولك بتعمل ايه ومبتعملش ايه ..
هقولك حاجة واحدة .. رضا الأم من رضا الرب
أخرج "آدم" ملبسها ووقف أمامها لتفصح له الطريق .. حانت منها
التفاتة الى يده المزينة بالبدلة .. شهقت من الدهشة ونظرت اليه تقول :
- ايه البدلة اللي فى ايدك دى يا "آدم" ؟
قال "آدم" بنفاد صبر :
- مش حاجة مهمة متقلقيش
قالت أمه وهى تمسك يده وتتفرس فيها :
- يعنى ايه مش حاجة مهمة .. لابسها ليه ؟
ثم صاحت بغضب :
- كمان ذهب ؟ انت مش عارف ان لبس الذهب حرام للرجال يا "آدم" ..
الرسول صلى الله عليه وسلم نهى الرجاله عن لبس الحرير والذهب وقال
دول للمستات بس مش للرجاله يا "آدم"
نظر اليها "آدم" بلا أى تعبيرات على وجهه فأكملت أمه قائله بتهمك :
- صحيح انت ليه هتهتم بالحلال والحرام وانت أصلاً مبتصليش

ثم قالت وتعبيرات الإشمزاز على وجهها :
- تصدق بالله أنا بقيت أقرف أبص فى وشك
قالت ذلك ثم تركته ودخلت غرفتها وأغلقت الباب خلفها بقوة .. ظل "آدم"
واقفاً مكانه شاردأً واجماً

توجهت "آيات" للخارج بخطوات مسرعة .. خفق قلبها وهى ترى "آدم"
واقف بجوار سيارته بحلته الأنيقة الفاخرة .. اقتربت منه وابتسامتها تزين
وجهها قائله :

- اتأخر عليك ؟

ابتسم لها قائلاً :

- لا يا حبيبتي ولا يهملك

فتح لها الباب فجلست .. انطلق بسيارته .. كانت تشعر وكأن كل ما حولها
يشاركها فرحتها .. التفت "آدم" لينظر الى تلك الابتسامه التى لا تفارقها
.. تلاقت أعينهما فابتسعت ابتسامتها .. توقفاً أمام أحد المطاعم الفاخرة ..
جلس "آدم" فى المقعد المواجه لها .. و أثناء تناول وجبتهما .. قالت
"آيات" :

- ممكن تبقى تدينى رقم طنط عشان أكلمها ؟

قال "آدم" بدهشة :

- طنط مين ؟

قالت "آيات" :

- مامتك .. هى مجتث الخطوبة عشان تعبانه والمفروض انى أسأل عليها
قال وهو يحاول تغيير الموضوع :

- ان شاء الله .. ما قولتليش المكان عجبك ؟

ابتسمت قائله :

- جداً

صمت "آدم" قليلاً ثم قال :

- انتى والدتك متوفيه من زمان ؟

قالت "آيات" بشئ من الحزن :

- أهاا .. من يوم ما ولدتنى .. انا عمرى ما شوفتها أبداً

ثم قالت وهى تبتم بحزن :

- بس عندى صور كتير ليها .. كل فترة بخرجهم وأعد أتفرج عليهم

راقب "آدم" تعبيرات وجهها .. فنظرت اليه قائله :

- وانت باباك متوفى من زمان ؟

شعر "آدم" بالضيق لسؤالها عن شئ خاص به .. فقال بنفاذ صبر :
- أيوة

ثم قال وهو ينظر اليها بتمعن :

- باباكي قالى أدمننا شهر عشان كتب الكتاب .. وانه بعد الشهر ده هيسألك
عن رأيك .. حبه تكتبي الكتاب ولا تمدى فترة الخطوبة
قالت :

- أيوة بابا قالى كده فعلاً

قال "آدم" مبتسماً بخبث :

- طيب مش عايزه تطمينيني رأيك هيبقى ايه ؟
ابتسمت له قائله بمرح :

- استنى الشهر وانت تعرف

قال لها بخبث :

- طيب واللى مش قادر يستنى وخايف أوى من قرارك وعايز يعرفه
بسرعة .. يعمل يه ؟

صمتت قليلاً ثم نظرت اليه قائله بإبتسامه :

- يظمن

شعر "آدم" بالراحة .. ومد يده وضعها فوق يدها قائلاً :

- مش هخليكي تندمى أبداً على قرارك ده

شعرت بالإضطراب وبالسعادة فى نفس الوقت وقالت :

- عارفه يا "آدم"

ثم ضحكت بخجل قائله :

- على فكرة دى أول مرة أقول اسمك من غير دكتور

قال بنبره حانيه :

- فى كلمة تانية عايزها بدل اسمى

نظرت اليه بسعادة وقد ادركت ما يريد قوله .. اقترب وجلس على المقعد

المجاور لها وأمسك يدها بين راحتيه ونظر لها بعمق قائلاً :

- بحبك يا "آيات"

خفق قلبها بسرعة واضطرب تنفسها .. ها هو حبيبها جالس بجوارها

ويخبرها عن حبه لها .. ألجمت السعادة لسانها فقال "آدم" هامساً :

- بحبك يا "آيات" وعايز أسمعها منك

شعرت بأن الكلمات ترفض الخروج .. كانت تشعر بإضطراب بالغ .. ودت

لو صرخت له بها .. لكن الكلمة حُبت بداخلها .. ترك "آدم" يدها قائلاً :

- خلاص براحتك مش هضغط عليكى

نظرت اليه خشت أن تكون قد أغضبتة .. فكر "آدم" بسخرية .. أتحاولين
الظهور بمظهر الفتاة الصعبة الآن .. لا تحاولي لقد كشفتك جيداً وأعرف
أنك سهلة .. ولعبة فى يدي !
قال لها :

- يلا عشان متأخرش
نهضت معه وأوصلها الى بيتها .. قبل أن تنزل أمسك يديها مقبلاً اياها
إبتسمت برقه .. قال لها :
- تصبى على خير
قالت بصوت خافت :
- وانت من أهل الخير
غادر "آدم" و "آيات" تشيعه بنظراتها .. ثم تمت بصوت خافت :
- بحبك يا "آدم" .. بحبك أوى

ظلت "آيات" ساهرة فى شرفة غرفتها .. كانت تفكر بحزن هل يا ترى
"آدم" غضب منها لأنها لن تفصح عن حبها له ؟ .. هل ظن بأنها لا تحبه
؟ .. هل هو حزين الآن ؟ .. خفق قلبها بقوة وهى تشعر بأنها لا تتحمل أن
تكون سبب حزنه أو ضيقه .. توجهت الى حاسوبها وضربت بأصابعها
فوق أزراره ابتساموه صغيره على شفيتها .. توردت وجنتاها خجلاً قبل
أن تضغط زر الإرسال .. اتصلت بـ "آدم" وهى تتمنى أن يكون مستيقظاً
.. رد "آدم" قائلاً :
- حبيبتي وحشتيني
ابتسمت "آيات" بسعادة قائلة :
- خفت تكون نمت
قال لها بهيام :
- مش عارف أنا
سألته :
- ليه مش عارف تنام ؟
قال هامساً :
- بفكر فيكي .. بفكر فى عنيكى اللى بقيت حاسس انى مقدرش أبعد عنهم
ثانية واحدة .. بفكر فى ايديكى اللى كانت فى ايدي من شويه .. أنا مش
عارف ازاي قدرتى تعلقيني بيكي بسرعة كده
أغمضت "آيات" عينها تستشعر كلماته بكل حواسها .. ثم قالت بصوت
خافت :

- افتح الفيس يا "آدم" بعثك حاجة عايزاك تشوفها
قال بدهشة :

- وانتى عرفتى الفيس بتاعى منين ؟
قالت بخجل :

- كنت عارفاه من زمان .. بس عمرى ما بعثك آد
شعر "آدم" بالدهشة .. ثم قال :
- طيب خليكي معايا بفتح الجهاز
قالت بسرعة :

- لا شوف وأنا مش معاك .. أنا هقفل دلوقتي .. باى
قال بدهشة :
- باى

فتح جهازه وهو يتمم لنفسه بحنق :
- ابتدينا شغل المراهقة

نظر "آدم" الى حسابه ليجد رسالة مرسله من "آيات" فتحها ليجد فيها :
- أحبك .. أنت كل عالمى

أحبك .. أنت وحدك فارسي

أحبك .. فى كل وقت أنت معي

أحبك؟! .. هذا أول مقاصدى

أعشقتك؟! .. ها أنت فهمت مشاعرى

أتمناك؟! .. أنت فى قلبي فعى

أنت فارس أحلامى

أحلامي رجلاً لا يُوصَف

وكل صفاته بيك توصَف

لم يكن صدى تلك الكلمات فى قلب "آدم" سوى السخرية والتهكم .. ظل
ينظر اليها بأعين بارده وقلب أبرد .. ثم أمسك هاتفه .. وبمجرد أن ردت
"آيات" قال هامساً :

- وانتى فتاة أحلامي

وضعت "آيات" كفها على قلبها عليها تبطئ من وقع دقاته .. وابتسمت فى
سعادة وهى تقول له :

- ربنا ما يحرمنى منك يا "آدم"

مر الإِسبوعين بسرعة وببطء .. فكان وقعهما على "آيات" كالسحر ..
كالتحليق فى الفضاء .. كنسمات الربيع .. أما على "آدم" فكان وقعها
كئيباً رتيباً مملاً .. يتمنى أن تجرى الأيام ويمضى الشهر سريعاً ليُنهى
لعبته .. فى أحد الأيام وقف "آدم" أمام باب الفيلا فى انتظار خروج
"آيات" .. كانت "آيات" تتخير الأوقات التى لا يكون والدها فى البيت ..
حتى تستطيع وضع زينتها كما تريد .. فهى تعلم أن سكوت والدها على
وضعها الميكياج يوم أن تقدم "آدم" لخطبتها والأيام التى تلتها فقط من
أجل أنها عروس ولم يرد ازعاجها .. لكنها تعلم جيداً أن لصبره حدود ..
نزلت درجات الفيلا وعيناها معلقتان بـ "آدم" الذى اختار اليوم ارتداء
الجينز .. ابتسمت له قائلة بمرح :

- أول مرة أشوفك كجوال

ابتسم ابتسامته الساحرة وسألها بمرح :

- طب ايه ؟ أنهى ستايل يعجبك أكثر ؟

قالت بصدق :

- حبيبى أنا بحبك مهما لبست .. حتى لو لبست جبهه وقفطان

ضحك "آدم" قائلاً :

- طيب بس لتلاقينى فى مرة عملها بجد

صحكت قائلة بعند :

- برده هحبك متحاولش

جلست "آيات" فى السيارة والتف "آدم" ليجلس بجوارها ثم ابتسم قائلاً

:

- حبيبتى عايزه تروح فىن النهاردة ؟

صمتت قليلاً ثم قالت :

- ايه رأيك نتمشى على النيل

قال بدهشة :

- نتمشى على النيل

قالت بسرعة :

- أيوة .. ايه مش عايز

قال بلامبالاة وهى ينطلق بيارته :

- فكرت هتقولى نعد فى مكان يعنى

قالت بصوت طفولى :

- زهقت .. وكمان مش بحب الأماكن المقفولة .. بحب أوى أقف أتفرج

على النيل .. كنت أنا و "أسماء" نخرج نتمشى على النيل ونقف ونسرح

ونتكلم لحد ما نزهق
توقف "آدم" فى حد المناطق الهادئة .. نزلت "آيات" ووقفت تنظر الى
النيل بسعادة ونسماء الليل تداعب وجنتيها .. نظرت الى "آدم" الواقف
بجوارها تتأمله ثم التفتت اليه وقالت فجأة :
- "آدم" انت فى حاجة مضايقك ؟
التفتت اليها قائلاً بدهشة :
- ليه بتقولى كده ؟
قالت بحيرة :
- مش عارفه .. ساعات بحس كده .. ساعات بحس انك مضايق من حاجه
أو مخنوق من حاجه
صمت "آدم" وهو ينظر اليها لا يدري ما يقول .. فأكملت قائله بحنان :
- "آدم" مش أنا حبيبتك وبعد اسبوعين ان شاء الله هكون مراتك .. يعني
لو فى حاجة مضايقك قولى عليها وفضفض معايا يمكن ترتاح
ظل "آدم" ينظر اليها وهو يرى مشاعرها الصادقة تجاهه .. أشاح بوجهه
بسرعة وأخذ يتطلع الى النيل ثم عاد ينظر اليها وهو يرسم ابتسامه على
شفتيه ويقول :
- لا يا حبيبتى أنا مفيش حاجة مضايقانى .. متشغليش بالك انتى
ابتسمت "آيات" له ثم وضعت يدها على ذراعه التى كان يستند بها الى
السور وقالت :
- ماشى يا حبيبي .. بس خليك فاكروقت ماتحب تتكلم مع حد أنا موجوده
ارغم نفسه على الإبتسام ووضع كفه فوق كفها الممسكة بذراعه وقال
لها :
- مكنتش أعرف انك بتحبينى أوى كده
نظرت اليه بعتاب قائله بصوت متهدج :
- اخص عليك ازاي تقول كده .. أنا بحبك أوى يا "آدم" بحبك بجد ..
عشان كده بضايق أوى لما بحس انك ممكن تكون مضايق
شعر بالإختناق وهو يستشعر صدق كلماتها .. قال فجأة :
- يلا نمشى
قالت باستغراب :
- ليه فى حاجه ؟
قال بحده :
- لا بس افكرت معاد مهم
شعرت "آيات" بالدهشة من تصرفه لكنها لم ترد مضايقته بكثرة الأسئلة

.. أوصلها الى الفيلا .. ودون أن يوجه لها كلمة .. فقالت قبل أن تنزل من السيارة :

- طمنى عليك لما توصل البيت
هز رأسه قائلاً :

- ماشى
خرجت "آيات" وأغلقت الباب لينطلق "آدم" فى طريقه .. كان يشعر بالضيق والحنق .. لا يدرى لما شعر بذلك .. ظل يسير بسيارته وهو يحاول ازاحة هذا الشئ الذى يجثم على صدره ويحاول خنقه

هتفت "إيمان" بغضب بعدما أخبرتها والدتها بأمر العريس الجديد الذى يريد أن يتقدم لها :

- مش هقابله يعني مش هقابله
قالت "أمها بحده :

- يعني ايه مش هتقابليه
قالت "إيمان" بعند :

- يعني مش هقابله .. مش عايزة أتجوز
هتفت أمها بغضب :

- يعني ايه مش عايزة تتجوزى يا بت انتى .. اتهبلتى فى عقلك ولا ايه ..
لا اتظبطى لأظبطك متطعيش جنانك عليا

هتفت "إيمان" وقد بدأت فى البكاء :

- انتى ليه مش عايزة تفهميني يا ماما .. أنا تعبت بأه مش كل شوية حد
بيجى ويمشى ويتصل يقول معلى مفيش نصيب .. كفاية بأه مش عايزة
أجرح تانى

صاحت والدتها وهى تغادر الغرفة :

- أهو ده اللى انتى فالحة فيه كل شوية عياط وغم .. هتقابليه ورجلك فوق
رقتك ولما بيجى أبوكى يبقى يشوفله صرفه معاكى

أغلقت الباب خلفها بعنف .. فجلست "إيمان" على فراشها تبكى الى أن
شعرت بالإرهاق فنامت ودموعها تبلل وجهها

استيقظت فوجدت الجميع قد آووا الى فرشهم .. توجهت الى الثلاجة
وأخرجت بعض الطعام وتوجهت الى غرفة المعيشة واشعلت التلفاز

بصوت منخفض وجلست تآكل بنهم .. بعد عدة دقائق تذكرت أمر ذلك
العريس .. توقفت عن تناول الطعام وقد بدت عليها الحيرة .. قامت

وتوجهت الى الثلاجة وأعدت الطعام الى مكانه وقامت وتوضأت ودخلت
غرفتها تصلى لله عز وجل وتدعوه ألا تجرح تلك المرة

توقف "آدم" بسيارته فى احدى دور سينما السيارات والتي كانت تتميز
بالهدوء .. التفت وابتسم لـ "آيات" الجالسه بجواره فبادلته الابتسام ..
نظر "آدم" أمامه .. لم يكن يعى حرفاً مما يدور على الشاشة .. لأنه كان
شارداً .. ويفكر بعمق .. التفت ينظر الى "آيات" التي اندمجت فى تناول
الفيشار وهي تنظر الى الشاشة بترقب شديد وقد استهواها الفيلم الذى
تتابعه .. شعر "آدم" وهو ينظر اليها بأن فيها شيئاً من البراعة .. رغم
الملابس الضيقة الملفتة المثيرة التي كانت ترتديها وحجابها الغير محكم
على رأسها والذي أظهر رقبتها كاملة .. ورغم المكياج الذى أبرز ملامح
وجهها وأعطاهها عمراً أكبر من عمرها .. إلا أن شئ واحد فيها ظل يشع
براءه .. ابتسامتها .. تلك الابتسامه العذبة التي ترسم على وجهها حال
رؤيته .. وتتسع حال فرحها .. وتختفى اذا تضايقت .. و تزداد رقة كلما
قال كلمات تُحجلها .. تلك الابتسامه التي تعلن عن نفسها وعن طهرها
وبرائتها وسط كل تلك المظاهر التي يكرهها "آدم" .. شعرت "آيات"
بنظراته فالتفتت تنظر اليه .. بمجرد أن تلاقى أعينهما ابتسمت .. ابتسمت
عيناها قبل شفاتها .. حاول الإشاحة بوجهه فلم يستطع .. شعر بالضيق
وبالإختناق مرة أخرى .. شعر مرة أخرى بذلك الشئ الذى يجثم على
صدره بقوه .. أراد هذه المرة أن يقتله وأن يمنعه من التواجد بداخله مرة
أخرى .. أراد أن يزيحه من طريقه تماماً .. فكر .. للحظات .. ولم يجد إلا
طريقاً واحداً ليقضى على هذا الشئ قبل أن يظهر أكثر ويعلم عن نفسه ..
مد يده ليتلمس وجنتها .. ابتسمت بخجل وهي تطرق برأسها .. ثم رفعت
رأسها لتنظر اليه مرة أخرى .. لكن ابتسامتها تلاشت عندما وجدته ينحنى
نحوها لـ .. يقبل شفتيها .. شعرت بالصدمة وتجمدت .. لم تمنعه .. لم
تعترض .. لم تتحرك .. أنهى قبلته التي استغرقت ثوانى معدودة .. ثم
اعتدل فى جلسته وهو ينظر أمامه يتأمل شاشة العرض وهو يبتسم
ابتسامه رضا .. أخيراً قضى على هذا الشئ .. للأبد

عادت "آيات" الى الفيلا وعلامات الوجود على وجهها .. أقبلت عليها
"حليمة" لتقول :

- حمدالله على السلامة يا بنتى .. أحضرك الأكل ولا اتعشيتي مع خطيبك
قالت "آيات" بصوت مضطرب :

- مش عايزة يا دادة

صعدت الى غرفتها وعينا "حليمة" تتابعها بقلق .. دخلت "آيات"
غرفتها وأغلقت الباب .. جلست على فراشها فى الظلام .. لا ينير الغرفة
سوى ضوء القمر المتسلل عبر الشرفة .. جلست فى مكانها متجمده
كالتمثال .. ونظرات عينيها غائرتان .. وضعت أصابعها على شفيتها
تتلمسهما وهى تتذكر قبلة "آدم" .. شعرت فجأة بقشعريرة تجتاح جسدها
وبنغزات الدموع فى عينيها .. أخذت نفسها طويلاً وشعور الضيق يتزايد
بداخلها .. أخرجت هاتفها واتصلت بـ "أسماء" التى أجابتها قائلة :
- ايه ده معقول .. مش متعودة يعني انك تعبريني فى الوقت ده .. من
ساعة ما اتخطبتى وانتى الوقت ده جزاه لخطيبك .. نفسى أفهم

مبتزهقوش رعى

قالت "آيات" بصوت مضطرب مبجوح :

- "أسماء" أنا مضايقه أوى

قالت "أسماء" بجديه :

- ايه فى ايه .. ايه اللى حصل او عوا تكونوا اتخانقتوا

قالت "آيات" بإضطراب :

- لا مش كده

ثم صمتت .. فحنتها "أسماء" قائلة :

- فى ايه يا بنتى متتكلمى

عضت "آيات" شفيتها وهى تقول بحنق :

- حصلت حاجة مش عارفه حسه انى مضايقه

قالت "أسماء" :

- طيب متفهميني ايه اللى حصل عشان أبقى فاهمة انتى بتتكلمى عن ايه

زفرت "آيات" بضيق وهى تقول بصوت خافت لا يكاد يُسمع :

- "آدم" بسنى

ضحكت "أسماء" بشدة وهى تقول :

- وقعتى قلبى أنا قولت مصيبة حصلت

قالت "آيات" بضيق :

- طيب قوللى

قالت "أسماء" ضاحكة :

- أقولك ايه يا بنتى .. أنا مش فاهمة اصلا انتى مضايقه ليه

قالت آيات " بحيرة :
- يعني اللي حصل ده عادى
قالت "أسماء" بتهكم :
- والله يا "آيات" اللي يسمعك كده يقول طفلة فى ابتدائى
هتفت "آيات" بغضب :
- خلاص يا "أسماء" .. أنا أصلاً غلطانه انى اتصلت بيكي .. باى
هتفت "أسماء" بسرعة :
- يا مجنونة استنى .. طيب خلاص حبه جد بأه .. انتى ايه مضايقتك دلوقتى
؟

قالت "آيات" بحدده :
- معرفش مضايقه وخلاص .. حسه ان أنا مضايقه
قالت "أسماء" :
- طيب مش انتى بتحبيه يا "آيات" ؟
قالت "آيات" بسرعة :
- جداً وانتى عارفه
قالت "أسماء" :
- وهو بيحبك ؟
قالت "آيات" بثقه :
- أيوة بيحبنى
هتفت "أسماء" قائله :
- يعنى انتى بتحبيه وهو بيحبك ومخطوبين وهيتكتب كتابكوا بعد
اسبوعين وبأسك .. فيها ايه دى ؟
صمتت "آيات" .. لا تدرى ما تقول .. فقالت "أسماء" :

- متردى يا بنتى
قالت "آيات" بقلق :
- حسه ان كده غلط .. وكمان أنا خايفه "آدم" ياخذ فكرة وحشة عنى
قالت "أسماء" باستغراب :
- انتى عبيطة يا "آيات" كل المخطوبين بيعملوا كده
قالت "آيات" بنبره حزينه :
- أنا حسه بالذنب أوى .. مش عارفه يمكن عشان أول مرة يحصل كده ..
مش عارفه بس حسه
قاطعتها "أسماء" قائله :
- يا بنتى متكربيش الموضوع

صمتت "آيات" قليلاً ثم قالت بأعين دامعه وصوت مرتجف :
- بس يا "أسماء" أنا سمعت فى مرة شيخ بيقول ان لو حصل حاجات زى
دى بين اتنين مش متجوزين ربنا مش بيبارك لهم فى ارتباطهم ده .. وان
هو لو يحبها فعلاً هيحافظ عليها ومش هيعمل فيها كده .. وان اللى بيعمل
كده مع واحدة مش مراته بيبقى شايفها وحشة ومش محترمة
قالت "أسماء" :

- "آيات" محسسانى انه اغتصبك .. دى بوسه يا بنتى .. مش حاجة
كبيرة يعنى

تنامى الى مسامعها شهقات بكاء "آيات" فقالت بحنان :
- "آيات" بتعيطى ليه دلوقتى ؟

تعالت شهقات "آيات" وقالت ودموعها تتساقط على وجنتيها :
- مش عارفه .. بس حسه انى مضايقة أوى
قالت "أسماء" بهدوء :

- طيب بطلنى عياط .. الموضوع مش كبير للدرجة دى .. هو باسك بس ولا
حصل حاجة تانى ؟

قالت "آيات" بصوت مرتجف :

- باسنى بس

قالت "أسماء" :

- خلاص شيلي الموضوع من دماغك ومتفكريش فيه .. خلاص .. وبطلنى
عياط بأه

مسحت "آيات" دموعها وهى تقول :

- طيب خلاص يا "أسماء"

قالت "أسماء" بحنان :

- هديتي ؟

قالت "آيات" :

- أيوة خلاص .. أنا هقفل لانى حسه بصداع جامد هاخذ حاجة للصداع
وأنام

قالت "أسماء" :

- طيب ماشى وكلمينى لما تصحى

- ماشى .. يلا باى

أنهت "آيات" المحادثة وهى تشعر بنفسها أهدأ .. دخلت الحمام وتوضأت
وصلت الفروض التى فاتتها ثم أوت الى فراشها

عاد "آدم" الى بيته وألقى بنفسه على فراشه وهو يتذكر استسلامها
لقبلته فابتسم ساخراً وقال لنفسه متهاكماً قبل أن يغلق عيناه : كما توقعت
بالضبط

جلست "سمر" فى مكتبها بالمستشفى تنتظر دخول المريض التالى ..
لكنها شعرت بالدهشة بعدما رفعت رأسها لتجد "آيات" أمامها .. فهتفت
بدهشة :
- "آيات"
ثم ابتسمت قائله :
- بتعملى ايه هنا ؟
ابتسمت "آيات" وهى تغلق الباب قائله :
- جيت أشوفك .. ومتخفيش دفعت كشف يعنى ده دورى مش بعطل حد من
اللى بره يعنى
التفت "سمر" حول المكتب وعانقتها قائله :
- لا طبعا هردلك الكشف .. حبيبتي فرحانه أوى انى شوفتك
ثم قالت :
- بس بصراحة مستغربة أوى
تهدت "آيات" وهى تجلس أمام المكتب قائله :
- بصراحة مكنتش قادرة أستنى .. حسيت انى عايزة أتكلم معاكى ..
صحيت ولبست وجيت على طول .. جلست "سمر" على المقعد أمامها
وهى تقول بقلق :
- خير يا "آيات" فى ايه ؟
أطرقت "آيات" برأسها وأخذت تفرك حزام حقيبتها بين يديها .. قالت
"سمر" مشجعة :
- اتكلمى فى ايه ؟
ثم قالت :
- لو خايفة أحب اطمنك .. أى حاجة هتقولها دلوقتى مستحيل تطلع بره
نظرت اليها "آيات" وقالت ممتنه :
- عارفه يا "سمر" وعشان كده جتلك
قالت "سمر" بابتسامة حانية :
- طيب قوليلى بأه فى ايه ؟
أخذت "آيات" نفساً عميقاً ثم قصت عليها ما حدث بينها وبين "آدم"

بالأمس .. هتفت "سمر" بغضب :

- انتى غلطتى أوى يا "آيات" ده خطيبك مش جوزك

هتفت "آيات" تدافع عن نفسها وعن "آدم" :

- بس احنا بنحب بعض يا "سمر"

قالت "سمر" بصرامة :

- حتى لو بتحبوا بعض .. اللى حصل ده غلط أوى

شعرت "آيات" بالحزن وهى تستمع الى كلمات "سمر" التى تعزز

احاسها بالذنب الذى يراودها منذ الأمس .. قالت "سمر" :

- "آيات" أنا عارفكى كويس .. وبقالنا سنين مع بعض .. كلمتك كثير

على لبسك وعلى الميك أب بس مكنتيش بتسمعلي وكنت بدعيك ان ربنا

يهديكى ومبحاولش أضغط عليكى عشان متكرهينيش وتبعدى عنى .. بس

بجد الموضوع ده مينفعش أقول ربنا يهديكى وأسكت

صمتت قليلاً ثم قالت :

- "آيات" فى حديث عن النبي صلى الله عليه وسلم يقول : " فالعينُ

تَرْنِي وَزِنَاهَا النَّظْرُ، وَالْيَدُ تَرْنِي وَزِنَاهَا اللَّمْسُ، وَالرَّجْلُ تَرْنِي وَزِنَاهَا

الْخَطِيءُ، وَاللِّسَانُ يَزْنِي وَزِنَاهُ الْمَنْطِقُ، وَالْفَمُّ يَزْنِي وَزِنَاهُ الْقَبْلُ، وَالنَّفْسُ

تَمْنَى وَتَشْتَهِي، وَالْفَرْجُ يُصَدِّقُ ذَلِكَ أَوْ يَكْذِبُهُ "

وضعت "آيات" يدها على فمها وقد اغرورقت عيناها بالعبرات .. وأخذت

ترتجف وهى تغمض عينيها باكية .. اقتربت منها "سمر" وجلست على

المنضدة أمامها ووضعت يديها على قدميها وهى تقول :

- "آيات" اللى انتى حسه بيه دلوقتى حاجة كويسة أوى .. لان ده معناه

ان عندك نفس لوامة .. بتلومى نفسك لما بتعملى حاجة غلط .. وده عشان

انتى بنت طيبة ونضيفة وكويسة .. بس مشكلتك ان مفيش فى حياتك حد

يوجهك للصح ويبعدك عن الغلط

قالت "آيات" من بين شهقاتها :

- أعمل ايه دلوقتى .. يعني أنا كده

ثم انفجرت باكية مرة أخرى

عانقتها "سمر" قائله :

- ممكن متعيطيش لو سمحتى .. بصى فى عهد النبي صلى الله عليه وسلم

جاله راجل من الأنصار اسمه "أبو اليسر بن عمرو" وقاله : يَا رَسُولَ اللَّهِ

إِنِّي لَقِيتُ امْرَأَةً فِي الْبُسْتَانِ فَصَمَمْتُهَا إِلَيَّ وَيَاشَرْتُهَا وَقَبَلْتُهَا وَفَعَلْتُ بِهَا كُلَّ

شَيْءٍ غَيْرِ أَنِّي لَمْ أَجَامِعْهَا قَالَ فَسَكَتَ عَنْهُ النَّبِيُّ صَلَّى اللَّهُ عَلَيْهِ وَسَلَّمَ

فَنَزَلَتْ هَذِهِ الْآيَةُ : (إِنَّ الْحَسَنَاتِ يُذْهِبْنَ السَّيِّئَاتِ ذَلِكَ ذِكْرَى لِلذَّاكِرِينَ) ،

قَالَ فَدَعَاهُ النَّبِيُّ صَلَّى اللَّهُ عَلَيْهِ وَسَلَّمَ فَقَرَأَهَا عَلَيْهِ فَقَالَ عُمَرُ يَا رَسُولَ اللَّهِ
أَلَهُ خَاصَّةٌ أَمْ لِلنَّاسِ كَافَّةٌ فَقَالَ : " بَلْ لِلنَّاسِ كَافَّةٌ . "
توقفت "آيات" عن البكاء وقالت بصوت مبجوح :

- مفهمتش يا "سمر" اشرحي
قالت "سمر" مبتسمة :

- يعنى فى راجل راح للنبي صلى الله عليه وسلم وقاله انه باس واحدة
واتمتع بيها من غير ما يحصل بينهم علاقة كاملة .. فالنبي صلى الله عليه
وسلم مردش عليه لحد ما ربنا سبحانه وتعالى أوحى للنبي عن طريق
سيدنا جبريل بالآية اللي بتقول : " إن الحسنات يذهبن السيئات ذلك
ذكرى للذاكرين " .. فسيدنا "عمر" سأل النبي صلى الله عليه وسلم وقاله
: الآية دي للراجل ده بس فالنبي قاله لا لكل الناس .. يعنى أى حد يغلط ..
يعمل بعدها حاجة كويسة .. عشان الحسنات تضيع السيئات اللي خدها ..
فهمتى يا "آيات"

أومات "آيات" برأسها قائله :
- آه فهمت

صمتت برهه ثم نظرت الى "سمر" قائله بلهفه :

- يعنى أنا دلوقتى لو عملت خير وحسنات كتير كده ربنا يسامحنى على
اللى حصل

ابتسمت "سمر" قائله :

- أيوة يا "آيات" بس لازم تعاهدى ربنا ان ده ميحصلش تانى أبداً .. لازم
تحطى حدود بينك وبين خطيبك
ثم ضحكت قائله :

- وبعدين يا ستى كلها اسبوعين .. استحملوا الاسبوعين دول

ضحكت "آيات" وعانقت "سمر" بحرارة قائله :

- ربنا يريح قلبك يا "سمر" .. أنا بجد كنت مضايقه أوى بس انتى
طمنتينى وعرفتيني المفروض أعمل ايه

ابتسمت "سمر" قائله :

- احنا اخوات يا "آيات" أى حاجة حابه تسأليني عنها كلميني على طول

ابتسمت "آيات" وهى تخرج مراتها لتعدل من زينتها ثم نهضت قائله

بمرح :

- همشى بأه قبل ما أمهات الأطفال اللي بره يدعو عليا

ضحكت "سمر" وقالت :

- ماشى يا "آيات" .. خلى بالك من نفسك

قالت "آيات" مبتسمة :
- ربنا يوفئك يا "سمر" .. باى
- مع السلامة

ابتسمت "ساندى" وهى ترى اسم "آدم" على هاتفها فأسرعت بالرد
قائله :
- هاى دكتور
قال "آدم" الذى كان يقود سيارته :
- هاى "ساندى" .. ازيك
قالت بعتاب :
- تمام يا دكتور .. مبروك الخطوبة ولو انى زعلانه جداً انك معزمتيش
قال "آدم" :
- معلى الخطوبة كانت على الضيق بس فى كتب الكتاب ان شاء الله أكيد
هتكونى معزومة
قالت بمرح :
- خلاص اتفقنا بس لو معزمتيش المرة دى كمان بجد هزعل جداً
قال "آدم" بجديه :
- فاضية شوية يا "ساندى" .. عايز أقابلك
اتسعت ابتسامتها وقالت بلهفه :
- طبعاً يا دكتور .. ولو مش فاضية أفضالك
ابتسم قائلاً :
- تمام .. يبقى نتقابل كمان نص ساعة
اتفق معها على المكان ثم أنهى المحادثة معها .. لم يكن يغلق هاتفه حتى
أتاه اتصال من "آيات" فرد قائلاً :
- حبيبة قلبي كنت لسه هكلمك
تكلت بجديه قائله :
- "آدم" عايزة أشوفك ضرورى
قال "آدم" بقلق :
- خير فى حاجة يا "آيات" ؟
قالت بنفس النبرة الجادة :
- أيوة بس لما أشوفك
قال "آدم" :
- طيب جايلك حالا .. انتى فى الفيلا

- أيوة

- خلاص ربع ساعة وهكون عندك

اتصل بـ "ساندى" وأجله معاده معها ليوم آخر .. ثم انطلق فى طريقه الى الفيلا وهو يحاول تخمين فيما أرادته "آيات" .. دخلت السيارة وانطلق بها .. التفت اليها قائلاً :

- مالك يا حبيبتي ؟

قالت "آيات" بجديه :

- عايزة أتكلم معاك شوية .. بس وقفنا فى مكان الأول

توقف "آدم" فى مكان ما على الكورنيش .. كانت "آيات" طيلة الطريق شاردة .. خرجت من السيارة فتبعها "آدم" .. وقف أمامها قائلاً :

- فى ايه يا "آيات" ؟

بلعت "آيات" ريقها بصعوبة وهى تخشى أن يسئ فهم حديثها .. لكنها تشجعت ونظرت اليه قائله :

- "آدم" انت عارف أنا بحبك أد ايه .. مش كده

أوما برأسها وعيناه تتفرسان فيها .. فأكملت قائله بنبره حزينه وقد ترقرقت العبرات فى عينيها :

- اللى حصل امبارح ده مكنش المفروض يحصل

أخذ "آدم" ينظر الى عينيها الدامعة وملامحها الحزينة بتمعن وبصمت .. فأكملت قائله بصوت مرتجف :

- أنا كنت عارفه ان ده غلط .. بس معرفش ليه ممنعتكش .. أصلاً ده حصل فجأة وأنا مكنتش مركزة .. ومعرفش كنت مصدومة ومعرفتش أعمل ايه

ثم قالت :

- فضلت طول الليل حسه بالذنب .. والصبح اتكلمت مع واحدة صحبتى

وقالتلى

صمتت قليلا وقد ارتجفت شفثاها وتساقطت العبرات من عينيها وهى تقول بصوت باكى :

- قالتلى ان فى حديث ان ده حاجة زى الزنا كده .. أو بمعنى تانى ان ده طريق للزنا

قالت الكلمة الأخيرة بصوت مرتجف وما كادت تنطقها حتى ارتجف

جسدها لقوة بكائها .. أخفت وجهها بكفيها وهى تحاول السيطرة على

شهقات بكائها .. تجمدت نظرات "آدم" بل وتجمدت كل حواسه .. وهو

ينظر اليها باكية أمامه .. شاعرة بالذنب .. من أجل قبله .. لم تشاركه فيها

.. بل تلقتها فقط .. شعر وكأن شخصاً ألقى على رأسه دلواً من الماء
البارد .. توقفت "آيات" عن البكاء وهي تقول :
- أنا عارفه ان انت عملت كده عشان بتحبني .. بس أنا مش عايزة حاجة
تحصل تخلى ربنا غضبان علينا ويعاقبنا يا "آدم"
رفعت رأسها تنظر اليه بأسى وقد بللت العبرات وجهها :
- أنا مش عايزة ربنا يعاقبنا بإنه يحرمننا من بعض يا "آدم"
ظل يتطلع اليها دون أن يتفوه بكلمة .. مسحت عبراتها وهي تقول :
- بس ده اللي كنت عايزه أقوله .. ومش عايزاك تزعل منى .. أنا عارفه
ومقدرة ان انت بتحبني .. والله أنا كمان بحبك .. بس أنا خايفه نعمل حاجة
غلط ونتعاقب عليها
نظرت اليه قائله :
- ساكت ليه .. قول حاجة
خرج "آدم" عن صمته قائلاً :
- اركبي عشان أوصلك الفيلا
قالت بحزن :
- انت زعلت منى ؟
قال بهدوء :
- لأ .. بس عندي شغل
قالت "آيات" :

- انا أسفة انى عطلتك بس أنا مكنتش قادرة أتسنى وكنت حبه أتكلم معاك
توجهت الى السيارة وركبت .. لحق بها "آدم" وركب بجوارها .. أخرجت
مرأتها لتجد الكحل قد سال على وجهها وخرب مكياجها .. تنهدت فى
ضيق وأخرجت مناديلها المذيلة للمكياج وأخذت تزيله عن وجهها .. لم
يلتفت لها "آدم" طوال الطريق بل ظل شاردًا .. أوقف سيارته أمام الفيلا
.. وما كاد يلتفت اليها مودعاً حتى شعر وكأن أحداً ضربه على رأسه ..
نظر الى تلك الفتاة الجالسه بجواره بعينيها الصافيتين البريئتين وبوجهها
الذى تعلوه حمرة خفيفه وبشفتيها الرقيقتين .. التفتت اليه "آيات" قائله
:

- "آدم" ياريت متزعلش منى .. وتكون فهمت كلامى صح
استمر فى النظر اليها فشعرت بالخجل وتضرجت وجنتاها بحمرة محببه ..
أخذ يتأملها "آدم" وقد عقد لسانه .. نظرت اليه مرة أخرى مبتسمة تلك
الإبتسامة العذبه .. شعر وكأنه يراها لأول مرة .. تأملته "آيات" وقد
شعرت بأنه ينظر اليها كما لم ينظر من قبل .. عشقت نظراته فى تلك

اللحظة .. وابتسمت بخجل قائله :
- بتبصلى كده ليه ؟
سألها بهدوء قائلاً :
- انت ليه بتغيري شكلك ؟
قالت باستغراب :
- تقصد الميك أب يعني ؟
لم يجيب فقالت وهى تهز كتفيها :
- عادى يعني .. كل البنات بتحب الميك أب
ظل صامتاً يتطلع اليها .. فسألته قائله :
- انت مبتحبش الميك أب ؟
انتبه الى نفسه والى ما يحدث .. وقال لنفسه ما شأنك أنت ان وضعت
مكياج أم لم تضع .. فبعد أقل من اسبوعين ستنتهى اللعبة وستفترقان كل
الى حال سبيله .. نظر " آدم " أمامه وهو يقول :
- يلا انزلى عشان ألحق معادى
نظرت اليه تحاول أن تفهم فيما يفكر .. تحاول أن تفهم نظراته التى تعجز
كثيراً عن تفسير معناها .. لكنها اتمثلت لأوامره ونزلت .. وتابعت السيارة
بعينها وهى تبتعد .. ولأول مرة .. يرفع " آدم " عينيه لينظر اليها فى
مرآة السيارة وهو يبتعد

الفصل الثامن من رواية جواد بلا فارس



جلس "آدم" فى أحد المطاعم وتحت يده ملف أخذ يطرق عليه بأصابعه فى توتر وهو ينظر الى ساعته بين الحين والآخر .. أقبلت عليه "ساندى" تتهادى فى خطواتها .. حيته قائله :

- هاى دكتور .. اتأخرت عليك
قال "آدم" بابتسامة مجاملة :
- مش كثير
قالت بمرح وهى تجلس أمامه على الطاولة :
- سورى يا دكتور الطريق كان زحمة موت
أوماً "آدم" برأسه وبدا بأن عقله مشغولاً بشئ آخر .. طلب لها مشروباً .. تحدثا قرابة النص ساعة فى موضوعات شتى عن الجامعة والدراسة والعمل

الى أن قال "آدم" بجديه :
- "ساندى" كنت محتاج منك خدمة
قالت "ساندى" بلهفه :
- طبعاً انت تؤمر يا دكتور
أمسك الملف الذى كان يستند اليه ذراعه ووضع أمامها قائلاً :
- دى دراسة جدوى لمشروع قرية سياحية فى العين السخنة .. الدراسة دى عملتها من كذا سنة .. أرباحها خيالية ومضمونة جداً
ابتسمت "ساندى" قائله وهى تتفحص الملف :
- طبعاً طالما حضرتك اللى عاملها تبقى ممتازة يا دكتور "آدم"
قال "آدم" وهو ينظر اليها بتمعن :
- الدراسة دى أنا محتاج ليها ممول
ثم قال بضيق :
- كنت المفروض انى أنا هكون أحد الممولين فيها بس مش هينفع دلوقتى
أشارك فى راس المال
ثم قال بلهفه :
- أنا عارف ان والدك رجل أعمال ومش بس كدة .. عنده شركة سياحية كبيرة ومنافس قوى فى السوق
ابتسمت "ساندى" بتفاخر وهى تقول ضاحكة :
- فعلاً بابا حقق اسم كبير أوى فى عالم السياحة
قال "آدم" بجديه :
- وعشان كده أنا حابب انه يمول المشروع ده .. المشروع ده من أضخم

المشاريع اللى اتعملها دراسة جدوى .. وكمان المكان نفسه خيالى مش ممكن تتخيلى روعته ... وكل شئ موجود فى الملف ده قالت "ساندى" مبتسمة :

- طيب وليه حضرتك متعرضش على بابا المشروع ده بنفسك قال "آدم" مبتسماً وهو يرجع ظهره للخلف :

- ما أنا هعرضه بنفسى .. ريس انتى متخيله رجل أعمال زى باباكي بيتعرض عليه كام مشروع وكام دراسة جدوى .. ايه اللى يخليه يلتفت لمشروعى وياخده بجديه ضحكت "ساندى" بدلال قائله :

- عايزنى أكون واسطة يعنى ابتسم ابتسامته الساحرة وهو يقول بلووم :
- بالظبط كده

ابتسمت وهى تقول بخبث :

- أخبار نتيجة الإمتحان المفاجئ ايه ؟

ابتسم "آدم" ولمعت عيناه وهو يقول :

- امتحان مفاجئ ايه اللى بتتكلمى فيه .. قولى أخبارك امتحان الفاينال ايه ابتسمت "ساندى" وقد لمعت عيناه عندما أخرج "آدم" ورقة من جيبه ووضعها أمامها .. نظرت "آيات" بفرحة وعدم تصديق الى الاسئلة الموجودة فى الورقة ثم نظرت الى "آدم" قائله بمرح :

- يا سلام عليك يا دكتور .. كده تمام أوى وشكلنا هنعمل مع بعض أحلى بيزنس

ابتسم "آدم" وقال محذراً :

- الورقة دى ليكي انتى بس ولو اتسربت يمين ولا شمال .. انتى عارفه أنا ممكن أعمل ايه يا "ساندى"

قالت ضاحكة وهى تضع الورقة فى حقيبتها :

- ليه هو أنا مجنونة ولا ايه .. أسربها عشان ياخدوا درجات عاليه .. انا مالى انشاله الدفعة كلها تسقط .. المهم انى ضمننت الفول مارك

ابتسم "آدم" قائلاً :

- استنى منك رد امتى ؟

قالت بحماس :

- بابا مسافر وراجع من السفر خلال اسبوعين ان شاء الله ويمكن أقل كمان .. أول ما يبجي مش هخليه يقوم من على الملف غير لما يقراه كله .. وأنا واثقه فيك يا دكتور وعارفه ان أكيد بابا هينبهر بدراسة الجدوى

اللى عملتها
اتسعت ابنتسامة "آدم" وهو يقول :
- اتفقتا يا "ساندى"

جلست "آيات" فى كافيتيريا الكلية تنقل احدى الأجزاء التى فاتتها من
المحاضرة الى دفترها .. اقتربت منها "أسماء" فرفعت "آيات" رأسها
لتنظر اليها ببرود ثم عادت تكمل كتابتها .. جلست "أسماء" فى المقعد
المجاور لها وقالت :

- "آيات" مالك فى ايه ؟ .. انتى مخصمانى ولا ايه ؟
قالت "آيات" ببرود دون أن تنظر اليها :
- مفيش حاجة

قالت "أسماء" بحده :

- لا فى .. مش معبرانى .. بتحضرى المحاضرات من غيرى .. بتصل بيكي
بتردى بالقطارة .. فى ايه يا "آيات" .. من يوم المكالمة اللى كنتى
مضايقه فيها وانتى بتعاملينى وحش
نظرت اليها "آيات" بحده وقالت :

- كنت فاكراكى صحبتى .. كنت فاكراكى بتخافى عليا بجد .. بس بجد أنا
اتصدمت فيكي يا "أسماء"
قالت "أسماء" بدهشة :

- ليه كل ده ايه اللى حصل فهميني ؟

قالت "آيات" بصوت خافت حتى لا تلتفت نظر أحد ممن حولها :

- لما قولتلك على اللى حصل بينى وبين "آدم" أعدتى تقويللى عادى
ومفيهاش حاجة وكل المخطوبين بيعملوا كده .. تعرفى ان دي حاجة النبى
قال عنها انها زنا وانها طريق بيودى للزنا .. وانتى حتى مفكرتيش
تنصحينى وتقويللى لا يا "آيات" اللى حصل ده غلط .. لا فضلتى تقولى
انى طفلة فى ابتدائى وان ده طبيعى طالما بنحب بعض
ثم جمعت أشياءها من فوق الطاولة وحملت حقيبتها وهى تقول قبل أن
تغادر :

- بجد اتصدمت فيكي يا "أسماء"

رحلت "آيات" لنترك "أسماء" متجمدة مكانها .. لحظات ونهضت هى
الأخرى سارت تبحث عن "آيات" الى أن وجدتتها تخرج من باب الكلية
فتوجهت تجاهها بسرعة وجذبتها من ذراعها بشدة وجعلتها تلتفت اليها
ثم صاحت بحنق :

- وأنا كنت هعرف منين يعني ان كده غلط .. ليه أسألتى الظن فيا وقولتى
انى مش بحبك ومش بخاف عليكي .. أنا معرفش ان كده غلط .. ما كل
الناس حولينا بيعملوا كده ومن غير خطوبة حتى .. ليه شوفتيني وحشة
كدة يا "آيات"

ثم اغرورقت عيناها بالعبرات وهى تقول بصوت باكى :
- احنا صحاب من أربع سنين عمرك شوفتيني أديتك ولا عملت حاجة
تحسسك انى مش بحبك ؟ .. ها ردى عليا .. أصلاً أنا مليش صحاب غيرك
وربنا يعلم انى بحبك أكنك أختى وحتى مش بحاول أتعرف على بنات تانية
لاى حسه ان انتى صحبتى بجد .. وعارفه انك بتحبينى زى ما أنا بحبك ..
تيجيى دلوقتى تقوليلى انى مش خايفة عليكي .. والله ما اكنت أعرف .. أنا
افتكرت الموضوع عادى ولما لقيتك مضايقة وبتعيطى قولت اهوئها
عليكي شوية عشان مبحبش اشوفك مضايقة
ثم قالت بألم :

- بس شكراً اوى يا "آيات" شكراً اوى على الكلام اللى سمعتيهولى ده ..
أنا صاحبه وحشة وزبالة ابعدى عنى بأه
قالت ذلك ثم توجهت الى بوابة الكلية وهى تحاول مداراة دموعها التى
تجمعت داخل عينيها .. ووقفت "آيات" فى مكانها تنظر اليها وهى تبتعد ..
ثم تنهدت بضيق شديد وجلست على أحد المقاعد بوجوم

طرقت "آيات" باب مكتب "آدم" ودخلت وقد بدا على وجهها العبوس
قالت بهدوء :

- "آدم" هعطك عن حاجة
قال وهو ينهض ويقف أمامها :
- لا أبداً

وقف ينظر اليها والى المكياج الذى كان يغطى وجهها .. والى التيشيرت
الضيق الذى أبرز تفاصيل جسدها .. وضعت الكتب من يدها ووقفت أمامه
وقد عقدت ذراعيها أمام صدرها وهى تقول بضيق :

- اتخانقت مع "أسماء"
قال "آدم" وهو يشعر بالملل من الإستماع الى المشكلة :
- اتخانقتوا ليه ؟

قالت "آيات" بحنق :
- أنا اتغيبت اوى معاها وقولتلها كلام مكنش ينفع أقوله وهى مضايقه منى
دلوقتى

قال "آدم" ببساطة :
- خلاص كلميها واعتذريلها وصالحيها
قالت "آيات" بحزن :
- خايفة مترضاش تصالحنى
فقال "آدم" بنفاد صبر :
- يعني عايزانى أعملك ايه يعني .. أكلمها بدالك وأقولها معلش صالحى
"آيات"

شعرت "آيات" بالصدمة من الإسلوب الذى خاطبها به .. فرسمت ابتسامة
على شفتيها بصعوبة وأخذت كتبها وقالت بصوت حاولت أن يبدو طبيعياً :
- معاك حق هكلمها وأعتذرلها .. شكراً يا "آدم" وآسفة عطلتك
خرجت مسرعة وأغلقت الباب خلفها وهى تشعر بقطرات الدموع فى
عينيها .. لكنها سيطرت عليها ومنعتها من الإنهمار

دخلت والدة "إيمان" المطبخ لتجدها واقفة وتغلى شيئاً ما ذو رائحة قوية
فقالت لها وهى تتشمم الرائحة المنبعثة من الطنجرة :
- ايه ده بتعملى ايه يا "إيمان"
قالت "إيمان" بوجوم دون أن تنظر اليها :
- شوربة كرنب
قالت أمها باستغراب :
- ايه شوربة كرنب دى ؟
قالت "إيمان" بهدوء :
- عشان التخسيس يا ماما
قالت أمها وهى تتأفف من الرائحة :
- بس دى ريحتها صعبة أوى يا "إيمان" هتشربيها ازاي دى
قالت "إيمان" بنفاد صبر :
- هشربها وخلص
قالت أمها وهى تنظر اليها :
- طيب اتغدى الأول ده أنا عاملة صنية مكرونة بالبشاميل من اللى بتحبيها
قالت "إيمان" بحنق وهى تضع الشوربة فى طبقها :
- مكرونة بشاميل ايه يا ماما بقولك هشرب كرنب عشان أخس .. يعني
أقرف نفسي بأم الشوربة دى عشان أكل شوية مكرونة يضيعوا كل اللى
عملته

قالت أمها وهي تغادر المطبخ :
- أنا مالى يختى هو أنا اللى هاكل ولا انتى .. انتى حرة اعملى اللى تعمليه
جلست "إيمان" ممسكة بطبقها أمام التلفاز وهي تجبر نفسها على شرب
هذا السائل ذو الرائحة القوية

نظرت "أسماء" من العين السحرية لتجد "آيات" واقفة أمام الباب ..
ترددت قليلاً قبل أن تفتح لها .. نظرت "آيات" اليها بحزن .. فبادلتها
"أسماء" بنظرة عتاب .. دخلت "آيات" وأغلقت الباب قائلة بحزم :
- بصى وقبل ما تقولى أى حاجة .. حقك عليا .. أنا غلظت فعلاً وقولتلك
كلما صعب .. اعملى فيا بأه اللى انتى عايزاه بس مش ماشية من هنا غير
لما تقولى انك صالحتيني
ابتسمت "أسماء" ونظرت اليها بعتاب قائلة :
- يعنى لو قولتلك مش هصالحك مش هتمشى وهفضلى أعده هنا على
طول

ابتسمت "آيات" قائلة :

- أيوة

قالت "أسماء" بلووم :

- طيب مش هصالحك .. عشان تفضلى معايا هنا على طول

عانقتها "آيات" قائلة :

- متز عيش منى يا "سمسم" والله بحبك أوى ومقدرش أستغنى عنك

خالص

فى تلك اللحظة تعالت أصوات أبوى "أسماء" بالصراخ ودخلا فى احدى

شجاراتهما .. فصرخت "أسماء" فيهما :

- اقللوا عليكوا الباب فى ناس هنا

نظرت "آيات" اليها بحزن .. فقالت "أسماء" بضيق :

- "آيات" امشى دلوقتى

أومات "آيات" برأسها وقد تعالت حدة أصواتهما .. أغلقت "أسماء" باب

غرفتها عليها ونامت على فراشها تضع فوق رأسها وسادة تكتم بها تلك

الأصوات التى تمت أن تخرس للأبد

جلست "آيات" فى حجرة المعيشة تضع اللاب توب فوق قدميها وهي

تنظر الى صورة "آدم" التى تحتفظ بها على حاسوبها .. قفز قلبها فرحاً

عندما وجدت اتصالاً من "آدم" ردت قائلة :
- ألو

قال "آدم" والذي كان جالساً أمام حاسوبه :

- ازيك يا حبيبتي عاملة ايه

قالت بهدوء :

- الحمد لله ازيك انت

قال بلامبالاة :

- الحمد لله .. بتعملى ايه

ابتسمت وهي تقول :

- أعدة بتفرج على صورتك

ابتسم بسخرية وهو يقول :

- فرحتيني

اتسعت ابتسامتها وهي تقول :

- لما بحس انك وحشنى ببص للصورة عشان أحس انك معايا

قال "آدم" بلامبالاة :

- وأنا كمان عايز صورة ليكي عشان لما تكونى مش معايا أبصلها وأحس

انك معايا

قالت بلهفه :

- طيب استنى هبعثك صورة دلوقتى

قال "ببرود" :

- ماشى يا حبيبتي

أخذت "آيات" تنظر الى عشرات الصور التى تحتفظ بها فى حاسوبها ثم

قالت :

- محتارة .. مش عارفه أبعثك أنهى صورة

صمت "آدم" وقد انشغل بالحديث مع "ساندى" عبر الفيس بوك .. قالت

"آيات" وهي تنظر الى الصور :

- انت شكلك مبتحبش الميك أب .. أبعثك صورة من غير ميك أب ؟

قال "آدم" وتركيزه مع "ساندى" :

- ابعثى اللى تحببها وأكد هتعببنى

ابتسمت "آيات" وهي ترسل الصورة وقالت :

- خلاص بعثها

صمتت قليلاً ثم قالت :

- انت مشغول ولا ايه

قال "آدم" بسرعة :
- لا أبداً برد على واحد صحبي مسافر
قالت "آيات" بحزن :
- طيب شوفتها
قال كاذباً :
- أيوة شوفتها .. زى القمر يا حبيبتى
عقدت "آيات" ما بين حاجبيها وقد شعرت ببروده .. فقلت بهدوء :
- طيب يا "آدم" أنا هقفل دلوقتي عشان نتكلم مع صاحبك براحتك
قال "آدم" بسرعة :
- لا يا حبيبتى أنا معاكى خلاص
قالت بهدوء :
- أنا أصلاً هنام دلوقتي .. خلى بالك من نفسك ومتسهرش كثير عشان
محاضرة بكرة .. تصبح على خير
- تصبى على خير
قبل أن تغلق قال "آدم" :
- "آيات" .. بحبك أوى
ابتسمت قائله :
- وأنا كمان بحبك أوى .. باى
أنهت "آيات" المكالمة وهى تشعر بالحزن .. أحياناً تشعر بقرب "آدم"
منها وبحبه الكبير لها .. وأحياناً تشعر به بعيداً غريباً بارداً .. اعترفت
لنفسها بأنها حتى الآن لم تستطع فهمه .. اعترفت لنفسها بأنها تشعر
بشئ غريب فى قلبها .. شئ يقلقها ويشعرها بالخوف .. شئ يجعلها تفتقد
جزءاً من شعورها بالأمان .. شئ القلق ملازماً لها .. تمنى أن تستطيع
فهمه .. وأن تستطيع احتوائه .. وأن تستطيع أن تجعله لا يقوى على
فراقها .. ولا يتمنى إلا قربها

أنهى "آدم" محادثته مع "ساندى" وأغلق حاسوبه وخرج يبحث عن أمه
اقترب من غرفتها ليجدها ساجدة على الأرض فوق سجادة الصلاة .. سمع
همماتها وصوت نحيبها .. جفل قلبه لمراها هكذا .. نظر اليها بحزن لأنه
يعلم جيداً بأنه سبب بكائها .. وكأنه لا يطيق النظر اليها أكثر عاد الى
غرفته مرة أخرى وأوى الى فراشه وهو ينظر الى سقف الغرفة .. دقائق
بعدها امتدت يده الى أحد أدراج الكمبيوتر ليخرج منه بعض الصور .. أخذ

- بكتب الكتب على الكمبيوتر وبجيبها لهم على سي دي وهما بيحولوها لطريقة برايل عشان الناس اللي فقدوا بصرهم يعرفوا يقرأوها ويستفيدوا منها

شعر "آدم" بالدهشة وهو يستمع إليها .. أدار المحرك وسار في طريقه دون أن يتحدث إليها .. توقف أمام أحد المطاعم ونزلاً معاً .. جلست "آيات" على المقعد المجاور له وانتظرا احضار النادل لما طلبا .. قالت له "آيات" وهي شارده :

- تعرف يا "آدم" ساعات بحس اننا محظوظين أوى .. ربنا ادانا حاجات كتير حلوة وفي ناس كتير أوى محرومة منها
نظر "آدم" إليها وكأنها يحاول استكشافها .. أكملت دون أن تنظر إليه :
- ربنا خد منى ماما الله يرحمها .. ودى حاجة صعبة أوى انى أتحم منها ومن حضنها .. بس ربنا عوضنى بأب حنين أوى .. بيحبنى وبيخاف عليا .. بس فى ناس ربنا حرمها من الاتنين من الأب ومن الأم .. أو بيكونوا عايشين بس مش حنينين وطيبين
ظل ينظر إليها صامتاً .. فنظرت إليه قائلة بحزن :

- واحدة صحبتى كده .. باباها ومامتها عايشين بس مش حنينين عليها .. مش بيعرفوا يتفاهموا معاها ولا بيعرفوا يتفاهموا مع بعض على طول خناق وزعيق .. بتصعب عليا أوى

وجدت "آدم" صامتاً فقالت بسرعة وهي ترسم ابتسامة على شفيتها :
- معلش صدعتك بكلامى .. عارفه انك مبتحبش تتكلم فى المشاكل
نظرت أمامها تتطلع الى المنظر الذى يطل عليه المطعم .. أما "آدم" فاستمر فى تفرسه فيها .. ومشاعر كثيرة متناقضة تتصارع بداخله .. فكر أنه بعد أقل من اسبوعين سيكشف أوراقه .. وسيخبر "آيات" بالحقيقة وبالسبب الذى دفعه لخطبتها ولكتب كتابها .. رغباً عنه قفز الى رأسه سؤالاً .. ترى ماذا سيكون شعورها وقتها ؟ .. ماذا ستشعر بعدما تعلم أنها كانت جزء من خطته للنيل من عمها وابتزازة ؟ .. ماذا ستشعر بعد أن تعلم أنه ما تقرب إليها إلا من أجل استعادة حقه المسلوب ؟ .. زفر بضيق وهو ينظر إليها بغضب .. أراد أن يصرخ فيها .. لماذا أنت طيبة هكذا ؟ .. لماذا أنت صادقة هكذا ؟ .. لماذا لا تكونين مثل "ساندى" و مثل "بوسى" و مثل باقى الفتيات من طبقتك ؟ .. لماذا لا تكونين مانيكان للعرض مثلهن .. لماذا تلك البراعة التى لم تستطعي اخفاءها جيداً خلف مكياجك وملابسك المثيرة ؟ .. لماذا أحببتيني لهذه الدرجة ؟ .. لماذا لا تكونين كعشرات الفتيات اللاتي ينجذبن الى وسامتى وعملى وثرائى دون

الإهتمام بما أحب وبما أكره ؟ .. لماذا تتسللين الى داخل عقلي لتكتشفيه ؟
.. لماذا لا تكتفين بما أظهره لك ؟ .. لماذا تريدين المزيد ؟
.. لماذا لا تتركيني وشأني لأكمل خطتي كما خططت ؟!
حانت من "آيات" التفاته اليه لترى علامات الضيق على وجهه .. فقالت
بلهفة :

- "آدم" فى حاجة مضايكاك ؟

زفر بضيق قائلاً وهو يحاول التصرف بطريقة طبيعية :

- شوية مشاكل فى الشغل متشغليش بالك

ابتسمت له ونظرت فى عينيه قائله :

- معلىش يا حبيبي بس انت ان شاء الله هتقدر تحلها .. معلىش مفيش شغل

مفيش فيه مشاكل .. متضايقش نفسك

تطلع اليها للحظة ثم أبعد عيناه عنها وهو يشعر بذلك الشئ يعود ليجثم

على صدره مرة أخرى

طلب "آدم" من "آيات" الإنتظار أمام المطعم حتى يحضر سيارته التى

صفها على بعد عدة شوارع بسبب زحمة السير .. سمعت "آيات"

ضحكات لشابين بالقرب منها فلم تلتفت اليهما سمعت أحد الشابين يتجراً

عليها بالكلام بكلماته المبتذلة .. التفتت ونظرت اليه نظرة محذرة إلا أن

الفتى وجد فيها دافعاً ليزيد من مضايقتها .. شعرت بالحنق وهى يميناً

ويساراً وهى تقول فى نفسها :

- انت فين يا "آدم"

اقترب الشاب منها فالتفتت اليه تقول بحده :

- احترم نفسك خطيبي جاى دلوقتي ولو شافك هيبهدلك

قال الشاب بمياعه :

- يا خسارة هو القمر مخطوب .. ينفع كده يعنى تكسر قلبي ده دبت فيك

خلاص يا جميل

قالت بغضب وهى تبتعد خطوة للخلف :

- قولتلك احترم نفسك

قال الشاب مبتسماً :

- أحبك وانت متعصب .. هو فى كده .. حتى وانت متعصب زى القمر

توقف "آدم" بسيارته أمام "آيات" التى لاحظت علامات الخوف على

وجهها واقترب الشاب منها .. بمجرد أن رأت "آيات" سيارة "آدم"

توجهت اليها بسرعة وركبت ورمقت الفتى بنظرة غاضبة فتجراً الشاب

وأرسل لها قبلة فى الهواء تحت مرئى من "آدم" .. انطلق "آدم"

بسيارته يشق طريقه بين السيارات .. كنت تلهث وكأنها كانت تجرى ..
نظر اليها ليجد جبينها المعقود و نظراتها الغاضبة .. قال وهو يتظاهر بأنه
لم ينتبه لما حدث :
- فى حاجة ؟

أخذت نفساً عميقاً وحاولت الابتسام وهى تنظر له قائلة :
- لا يا حبيبى مفيش حاجة

ثم التفتت لتتظر من الشباك المجاور لها وقد عقدت حاجبها مرة أخرى
وتبدلت نظرة الغضب الى نظرة حزن .. لم يكن ضيقها بسبب الشاب الذى
ضايقها فحسب .. بل بسبب " آدم " الذى لم يهب لنجدتها أو لتلقين الفتى
درساً .. تنبعت " آيات " جيداً لنظرات " آدم " التى رأت ووعت ما يحدث ..
ومع ذلك لم يحرك ساكناً وكأنها لا تخصه .. وكأنها ليست خطيبته وحبيبته
وكرامتها من كرامته .. وكأنها لن تصبح بعد عدة أيام زوجته وعرضه ..
شعرت بالحزن فى قلبها .. ترى ألا يغار عليها الى هذا الحد ؟ .. اى رجل
فى مكانه كان تصرفه سيكون مختلفاً .. كان سيثور ويغضب ولربما
تشاجر مع الفتى من أجلها .. لماذا حتى لا يطيب خاطرها بكلمة .. لماذا
يتظاهر بأنه لم يرى ما حدث .

راقب " آدم " تعبيرات وجهها .. تنهد فى ضيق .. شعر بالإختناق .. شعر
بأنه لم يعد يتحمل تلك الأيام التى تفصله عن يوم كتب الكتاب .. لتنتهى
لعبته

عادت " آيات " الى منزلها لتلقى بنفسها على فراشها حزينة دامعة العينين
.. قال لها " آدم " قبل أن تخرج من السيارة :
- بحبك يا " آيات "

ولأول مرة تمسح منه تلك الكلمة دون أن يقفز قلبها فرحاً .. شعرت بشئ
يسلب فرحتها بها .. شعرت بها وكأنه يقولها لأنه يجب أن يقولها ..
شعرت وكأنها كلمة ألقاها لسانه دون أن يمررها على قلبه .. أخذت
تتسائل .. ترى أيجبى بالفعل ؟ .. لماذا إذن أشعر بالخوف والقلق والحيرة
من نظرات عينيه ونبرات صوته .. ترى أندم على ارتباطه بى .. أيرانى
غير مناسبة له .. أيجبى من جرح مشاعرى برفضه اياى .. أمسكت
هاتفها تنهدت بعمق ثم اتصلت بـ " آدم " .

كان " آدم " واقفاً يستند على سيارته وينظر الى أضواء القاهرة من فوق
جبل المقطم عندما وجد اتصالاً من " آيات " رد قائلاً :
- أيوة يا " آيات "

قالت "آيات" بسرعة وكأنها تخشى هروب الكلمات منها :
- "آدم" .. انا عايزة أقولك حاجة واسمعى للآخر ومتردش غير لما
أقولك .. ماشى

صمت "آدم" فقالت بصوت مضطرب :
- "آدم" أنا عمرى ما حبيت حد .. ولا عمرى حسيت بحاجة ناحية أى ولد
غير المشاعر العبيطة اللي أى بنت بتحسها فى ثانوي .. بس عمرى ما
شاورت على راجل واتمنيت انه يكون جوزى
صمنت قليلاً ثم قالت بأعين دامعة :

- انت أول واحد أحس نحيتة بكده .. أول واحد أقول هو ده الراجل اللي
نفسى يكون جوزى .. ونفسى أعيش معاه فى بيت واحد .. ونفسى يحبنى
زى ما بحبه .. انت كبرت أوى فى نظرى لما دافعت عنى يوم ما سواق
التاكسى كان بيزعقلنى .. احترمتك أوى وحسيتك راجل أوى وعشان كده
حسيت انى معجبة بيك .. ولما شوفتك السنة دى معرفش احساسى ده كبير
.. ولما اتقدمتلى كنت طاييره من الفرح وبجد حبيتك أوى يا "آدم" لانى
شوفت فيك كل اللي كنت بتمناه فى فارس أحلامى

كان "آدم" يستمع اليها فى وجوم .. فأكملت بصوت باكى :
- بس لو انت حاسس ان مش أنا فتاة أحلامك .. وانك ندمت ومش عايز
تكمل .. قولى يا "آدم" .. متخفش أنا هتفهم ده لانى عارفه ان مينفعش
نكمل مع بعض لو واحد فينا مش متقبل التانى وخايف يقوله كده عشان
ميجرحوش

تساقطت العبرات من عينيها وقالت بصوت مرتجف :
- أنا عارفه ان ده هيكون صعب عليا بس ده أحسن عندى مليون مرة من
انى اكتشفت بعدين انك اتجوزتني عشان متجرحنيش .. "آدم" فى اللحظة
اللى أنا بكلمك فيها دلوقتي أنا مستعدة أسمع منك كلمة مش عايزك يا
"آيات" .. لو انت حاسسها قولها دلوقتي .. لأنك لو أجلتها أنا معرفش
ساعتها هقدر أتحملها ولا لاء

أغمض "آدم" عينيه وهو محتفظاً بصمته .. فأكملت بصوت مرتجف
والعبرات تتساقط على وجنتيها :

- "آدم" خليك صريح معايا .. لو مش عايزنى وندمت قولى دلوقتي وأنا
هقول لبابا ان مفيش نصيب ده لو انت خايف تتكلم مع بابا .. ولو خايف
عليا متخفش أنا فاهمة ان الخطوبة بتبقى فترة للتعارف وعشان كل واحد
يقدر يشوف هو ده الانسان اللي يتمناه ولا لاء .. يعنى أنا هعذرك ومش
هضايق منك يا "آدم"

صمتت "آيات" وهى تحاول السيطرة نفسها ومسح عبراتها التى أغرقت وجنتيها .. قاتل "آيات" بصوت حاولت أن يبدو طبيعياً :
- "آدم" أنا خلصت ومستنية رذك .. حابب تكمل معايا ولا لاء ؟
صمت "آدم" .. وظهرت الحيرة فى عينيه .. والأسى على وجهه .. طال صمته .. فحشته "آيات" قائله والدموه تبلل عينيها من جديد :
- أنا حسه بيها بس عايزة أسمعها منك عشان أفضل فكراها .. عشان تنسيني كل الكلام الحلو اللى سمعته منك قبل كده
صمت فقالت بحده :

- "آدم" رد عليا .. قولتك خلاص أنا فهمت .. بس عايزة أسمعها .. قولها وخلاص وهقفل بعدها ومش هضايقك تانى .. انت عايز تكمل معايا ولا لاء ؟

عض "آدم" على شفثيه بقوة .. وتنهد بقوة ثم أغمض عينيه قائلاً :
- أيوة عايز أكمل معاكى
شعرت "آيات" بالدهشة فلم تكن تلك الإجابة التى شعرت بأنها على طرف لسانه .. قالت "آيات" :
- بجد يا "آدم" .. يعني مش ندمان ؟
قال "آدم" بهدوء وهو يبلع ريقه بصعوبه :
- لا مش ندمان

تنهدت "آيات" بإرتياح وضحكت وسط دموعها قائله :
- حسه انى بحلم .. مكنتش متوقعة انك تقولى كده
اتسعت ابتسامتها وهى تمسح دموعها قائله :
- الحمد لله .. كنت خايفه أوى .. كده ارتحت
لكن شعور "آدم" كان أبعد ما يكون عن الراحة .. ظل يستمع الى السعادة فى نبرات صوتها وكل كلمة تشعره بسواد قلبه أكثر فأكثر .. قالت "آيات" :

- شكلك بره مش كده ؟

تمتم :

- أيوة

قالت "آيات" مبتسمه :

- طيب يا حبيبي متأخرش ولما تروح طمنى عليك مش هنام إلا لما تتصل
تمتم "آدم" :

- لا نامى يمكن أتأخر

ابتسمت قائله بحنان :

- مش هعرف أنام الا لما أظمن انك فى البيت .. خلى بالك من نفسك
قال "آدم" بخفوت :

- مع السلامة

قالت "آيات" قبل ان يغلق :

- بحبك أوى

صمت "آدم" للحظات .. ثم قال بصوت مضطرب :

- وأنا كمان

ابتسمت وأنهت المحادثة وهى تتنهد فى راحة

أما "آدم" فأخذ ينظر الى الفراغ الشاسع أمامه .. وهو يسمع كلماتها
تتردد فى أذنيه .. تشعره بالحيرة والأسى

عاد الى بيته واتصل بها يخبرها بوصوله .. بدل ملابسها وتوجه الى

فراشه .. ظل ينظر الى سقف الغرفة .. ثم فجأة قام وتوجه الى حاسوبه

وفتح رسالة "آيات" والتي أرفقت بها صورتها والتي لم يفتحها بعد ..

ظل ينتظر تحميل الصورة وهو لا يعرف لما أراد رؤيتها .. ظلت أصابعه

تطرق على الماوس بعصبيه .. الى أن ظهرت الصورة .. اختارت صورة

بدون أى زينه .. وابتسامتها العذبة تنير وجهها .. ظل يتأمل ملامحها

باهتمام .. نظر الى عينيها وتذكر آخر كلماتها : بحبك يا "آدم" .. شعر فى

تلك اللحظة بالخوف .. الخوف الشديد .. سيطر شعور الخوف عليه وأخذ

فى التزايد فأغلق حاسوبه بسرعة لتختفى صورتها من أمام عيناه .

الفصل التاسع من رواية جواد بلا فارس



جلس "آدم" فى حجرة الصالون ينتظر نزول "آيات" .. دخل "عبد العزيز" من الباب مبكراً عن مواعده انتبه الى "آدم" فدخل سلم عليه قائلاً :

- أهلا بيك يا دكتور

نهض "آدم" وسلم عليه قائلاً :

- أهلا بحضرتك

جلس "عبد العزيز" فى مواجهة "آدم" وقال :

- بخصوص مكان سكنك اللي اديتهولى يا دكتور "آدم" .. انت سيبت الشقة دى من فترة مش كده ؟ .. لانهم قالولى انها اتباعث مرتين

شرب "آدم" رشفة من كوب الماء الموضوع أمامه وقال بهدوء أعصاب :

- أيوة بعثها .. وحالياً أعد عند والدتى فى بيتنا القديم لحد ما الشقة

الجديدة تخلص لانى بعمل فيها شويه تعديلات

قال "عبد العزيز" :

- أنا افتكرتك اديتنى عنوان شقتك الحالية

قال "آدم" مبتسماً :

- لا اديت لحضرتك عنوان الشقة اللي كنت عايش فيها عشان لما تحب

تسأل عنى تلاقى الجيران عارفينى

ابتسم "عبد العزيز" قائلاً :

- فعلاً الجيران كانوا عارفينك وعارفين الست والدتك كمان وقالوا عنكم

كلام طيب جداً

ابتسم "آدم" وقد شعر بالإرتياح .. نزلت "آيات" والتي فوجئت بوالدها ..

نظر اليها "عبد العزيز" بغضب وهو ينظر الى ملابسها ومكياجها ..

شعرت "آيات" بالإضطراب .. فقال "عبد العزيز" بهدوء حتى لا يجرها

أمام "آدم" :

- اطلعى البسى حاجة تانية يا "آيات" الطقم ده شكله مش حلو عليكى

شعرت "آيات" بالحرج وقالت بصوت خافت :

- حاضر يا بابا

ثم التفتت الى "آدم" قائله :

- ثوانى ونازله

صعدت "آيات" وارتدت ملابس أكثر اتساعاً وان كانت مازالت غير

محتشمة .. وأزالت المكياج فى عبوس .. نزلت الدرج فوقف "آدم" ينظر اليها متفرساً فيها .. ثم استأذن من والدها وانصرفا .. قاد "آدم" سيارته بهدوء وتوقف فى مكان ما .. التفت اليها قائلاً :

- انتى باباكى مش بيخليكي تحطى ميك اب وانتى خارجة ارتبكت "آيات" وقالت دون أن تنظر اليه :

- أيوة

قال "آدم" بغلظة :

- يعنى بتحطى من وراه .. بتستغفليه يعنى نظرت اليه "آيات" بحده فقال لها بصرامة :

- مفيش معنى تانى للى انتى بتعمليه غير كده قالت "آيات" بحده :

- هو مانعنى انى احط ميك اب لانه مش بيحبه .. بس أنا بنت وصغيره وبحب أكون جميلة واحط ميك اب كل البنات بتعمل كده قال "آدم" بهدوء وهو ينظر اليها :

- فعلاً كل البنات بتعمل كده

نظرت اليه فأكمل قائلاً بحزم :

- بس البنت المميزة اللى تجبر الرجل انه يحترمها مش هتعمل كده

احمرت وجنتاها خجلاً وأطرقت برأسها فقال وهو يتطلع اليها :

- نفسي تشوفى نفسك دلوقتى وخدودك لونهم أحمر من الكسوف وقوليلى الشكل ده أحلى ولا الدهان اللى بترسمى بيه على وشك نظرت اليه "آيات" فأكمل قائلاً :

- على فكرة مفيش راحل محترم بيحترم البنت اللى بتعرض نفسها فى

الشارع زى ما تكون جارية فى سوق الجوارى

قالت "آيات" بعتاب ممزوج بالحزن :

- أنا جاريه يا "آدم" ؟

قال بهدوء وهو ينظر الى عينيها :

- لا يا "آيات" مش جاريه .. بس مصره تخلى شكلك زيهم

نظرت الى عينيها وهى تحاول فهم ما يريد وما يفكر فيه .. قالت مبتسمة :

- لو انت مش حابب الميك اب يا "آدم" أنا مش هحطه تانى

انتبه "آدم" فجأة لما يفعل .. وسأل نفسه مرة أخرى .. ما شأنك ان

وضعت مكياج أم لم تضع .. أشاح بوجهه عنها وقال ببرود :

- اعملى اللى انتى عايزاه

قالت "آيات" بحماس :

- لو مش عايزنى أحط بجد مش هحط
قال "آدم" وكأنه يعاند نفسه ويعاند ما يريد :
- لا حطى .. حطيه يا "آيات"
قالت بدهشة :
- بس انت لسه قايل
قال بحنق :
- سيبك من اللي قولته .. أنا عايزك تحطى ميك اب عايز أشوفك بيه على
طول
أنهى جملته ثم انطلق بسيارته بعصبيه ظلت "آيات" تنظر اليه باستغراب
وهى لا تعى تلك التغيرات المفاجئة التى تطرأ عليه من حين لآخر

فتح "على" باب البيت وهو ينادى فى مرح :
- ماما .. "إيمان"
جرت أمه مسرعة من المطبخ وفتحت "إيمان" غرفتها :
- خير فى ايه يا "على"
قال بسعادة :
- الحمد لله لقيت شغل
عانقته أمه قائله :
- يامن كريم يارب
قالت "إيمان" بسعادة :
- مبروك يا "على"
قال مبتسماً :
- الله يبارك فيكي يا "إيمان"
سألته بلهفه :
- اشتغلت ايه
قال "على" :
- هى شغلانه بسيطة فى محل بيع أجهزة كمبيوتر .. بس أهى بداية يا
"إيمان" بدل ما أنا أعد كده من غير شغله ولا مشغله
قالت أمه بحماس :
- ربنا يجعلك فيها الخير يا ابنى وتبقى قدم السعد عليك وتكبر وتبقى
أحسن واحد فى الدنيا يا "على" يا ابنى
قبل "على" يديدها قائلاً :

- ربنا ما يحرمنى منك يا أمى ولا من رضاكى عنى

كالعادة شعرت بالتوتر والارتباك وهى جالسة فى غرفتها تنتظر أن تناديها والدتها .. فتحت والدتها الباب وقالت بحماس :

- يلا يا "إيمان" أبوكى قالى أناديكي .. أبوكى و أخوكى "على" أعدين مع العريس بره

شعرت "إيمان" بخفقات قلبها تتسارع بجنون ظلت تدعو الله فى سرها أن يبيض وجهها تلك المرة .. دخلت برأس منخفض وألقت السلام بصوت خافت .. ردوا السلام وجلست فى المقعد المواجه لهذا العريس .. استكملوا حديثهم مرة أخرى وكأنها غير موجودة .. شعرت بالحنق من هذا التجاهل وكادت أن تبكى أو تنهض لتغادر لولا أنها أجبرت نفسها على البقاء .. فجأة وجدته يوجه اليها الكلام قائلاً :

- ازيك يا دكتورة "إيمان"

شعرت "إيمان" بالسعادة بالرغم من أنه سؤال عادى .. لكن كونها محور اهتمام رجل هو ما أسعدها .. ردت بصوت خافت :

- الحمد لله

لم تستطع أن ترفع رأسها لتتنظر اليه ظلت غاضه بصرها تفكر كفيها فى ارتباك شديد .. قال هذا العريس :

- أنا عرفت انك فى التكليف مش كده ؟

قالت بتوتر :

- أيوة

قال العريس :

- انتى كنت حابه تدخلى طب اسنان ولا التنسيق اللى أجبرك عليها شعرت "إيمان" بالسعادة لأسئلته المتلاحقة عنها .. فقالت بشئ من الارتباك :

- بصراحة أنا كنت حابه أدخل صيدلة بس دخلت أسنان عشان مجموعى مجبش صيدلة بس بعد ما دخلتها حبيتها أوى قال ضاحكاً :

- يعنى طبقتى مقولة حب ما تعمل حتى تعمل ما تحب ابتسمت وهى تقول :

- حاجة زى كدة

تجرات ورفعت رأسها لتنظر اليه .. كان شاباً أسمر البشرة لا تخلو ملامحه من الوسامة .. خفق قلبها لمراه فغضت بصرها مرة أخرى .. ابتسم العريس قائلاً :

- طيب مش عايزه تسأليني عن حاجة ؟

دار الحديث بينهما قرابة النصف ساعة بعدها استأذن للإنصراف .. دخلت "إيمان" غرفتها وتركته يتحدث مع أبوها وأخوها أمام الباب .. أخذت تستعيد في رأسها الحوار الذي دار بينهما .. وأخذ يتردد في أعماقها نفس السؤال الذي يتردد كل مرة .. ترى أسيوافق أم سيرفض ؟ دخلت والدتها الحجره فقالت بلهفه :

- العريس قال ايه يا ماما

قالت أمها مستبشرة :

- ان شاء الله خير .. قال كمان كام يوم كده هيتصل يعرف رذك

قالت "إيمان" من قلبها :

- يارب تمها على خير يارب

وقف "آدم" في منطقته المفضلة فوق المقطم ينظر أمامه شارداً عابساً .. ظل يسأل نفسه .. ماذا يحدث لك يا "آدم" ؟ .. لماذا هذا التردد الذي تشعر به بداخلك ؟ .. ألسنت أنت من وضع الخطة ؟ .. لماذا التردد الآن ؟ .. أخذ يتردد بداخله سؤال .. ما ذنبها ؟ ما ذنب "آيات" فيما حدث لك ؟ .. لكنه رد على هذا السؤال قائلاً .. أنا لن أوذيها .. أنا لا أريد سوى استرداد حقي فقط .. "آيات" لن تخسر شيئاً وستجد يوماً رجلاً أفضل مني .. ما هي الا أسابيع قليلة أو حتى أشهر وتنسى اسمي .. وتنسى أنها رأتنى يوماً وستستمر في حياتها .. مع رجل تحبه ويحبها .. عند تلك النقطة شعر بقشعريرة في جسده .. تراءت أمام عيناه صورتها .. وابتسامتها العذبة .. ونظرات عينيها التي تشع حباً .. واهتمامها به .. ومشاعرها الصادقة النقية .. تباً لذلك .. لماذا يشعر بتلك النغزات في قلبه .. لماذا لا تكف تلك المشاعر المثبطة عن التجوال بداخله .. شعر وكأنه بداخل فرن مشتعل بالرغم من النسيمات الباردة التي كانت تلتفح وجهه .. خلع الجاكت وفتح بعض من أزرار قميصه وهو يتنهد بعمق عله يتخلص من ذلك الشئ الذي يصير على الجثوم فوق صدره .. وبقوة

فشلت "بوسى" طوال الأيام السابقة من الوصول الى "آدم" فلم تجد بدأً من الذهاب الى الجامعة لمقابلته .. لم تجده ذلك اليوم فى مكتبه .. قابلت احدى الطالبات وسألتها قائله :

- لو سمحتى متعرفيش دكتور "آدم خطاب" الأقيه فين ؟
قالت الطالبة :

- شوفيه فى مكتبه

قالت "بوسى" :

- رocht مكتبه ملقتهوش موجود

قالت طالبة أخرى :

- أنا فعلا مشفتوش النهاردة

قالت الطالبة الأولى :

- ممكن يكون واخذ أجازة لأن دكتور "آدم" كتب كتابه آخر الاسبوع

نظرت اليها "بوسى" وقد جحظت عيناها وقالت :

- ايه ؟ .. كتب كتابه ؟

قالت الطالبيه :

- أيوة .. خطب واحدة من دفعتنا .. وكتب كتابهم آخر الاسبوع

ثم ضحكت قائله :

- هي كمان غابت النهاردة

تمتت "بوسى" بخفوت :

- ميرسي

خرجت "بوسى" من الكلية وعيناها تشعان غضباً وحقدأً .. وقد امتلأتا

بالعبرات وقالت فى نفسها : ماشى يا عريس

فى اليوم التالى .. وقفت "آيات" أمام المرآة تقيس الفتسات الذى ستقوم

بإرتدائه فى كتب كتابها .. ثم التفتت الى "أسماء" قائله :

- "أسماء" ايه رأيك فى الفتستان

ابتسمت "أسماء" قائله :

- تحفة يا "آيات"

قالت "آيات" وهى تنظر الى نفسها فى المرآة بسعادة :

- واحد صاحب بابا عنده مصنع ملابس سواريه هو اللى صمم ان فستان

كتب كتابى يبقى هديه منه

ضحكت "أسماء" قائلة :

- أيوة يا عم محدش قدم وتصميم محدش لبسه غيرك .. ربنا يتملك على خيري ا "يويو"

قالت "آيات" بلهفه وهى تنظر الى نفسها فى المرآة :

- يارب يعجب "آدم"

حاولت "آيات" كثيراً الاتصال بـ "آدم" دون جدوى .. ظلت والدة "آدم" تستمع الى رنين هاتف ابنها كل فترة .. فأصابها القلق لعدم رده .. دخلت غرفته لتجده فوق فراشه بملابس خروجه .. اقتربت منه لتجد العرق متصبب من وجهه وجسده وضعت كفها فوق جبينه لتجده مشتتلاً ..

أصابها القلق فارتدت ملابسها وصعدت للطابق العلوى حيث جارهم الطبيب وطلبت منه النزول لفحص ابنها .. أخبرها الطبيب بأنه أصيب بالبرد وكتب على بعض الأدوية .. نزلت والدته مسرعة لشراء الأدوية التى وصفها الطبيب عادت وجلست بجواره وبجانبا الكمادات تضعها على جبينه ووجهه .. فتح "آدم" عينيه بصعوبة ليجدها جالسه بجواره تضع هذا الشئ البارد فوق وجهه .. نظر اليها ونظر اليه .. قالت بقلق :

- انت كويس يا "آدم" ؟

أوما برأسه فوجد رأسه يتألم من مجرد تلك الإيماءه البسيطة .. قالت أمه بحنان :

- طيب نام أنا حطالك فرخة على النار أول ما تخلص هجبلك تاكل نظر "آدم" اليها ثم أغمض عينيه وراح فى سبات عميق من فرط التعب .. رن هاتفه مرة أخرى فنظرت والدته الى الهاتف الملقى بجواره على الأرض .. نظرت لتجد اسم "آيات" .. نظرت الى "آدم" النائم .. ثم .. توجهت الى الخارج ببطء .. دفعها الفضول لتعرف من تلك الـ "آيات" التى تتصل بابنها فى الحاح .. ردت قائلة بتوجس :

- أيوة

شعرت "آيات" بالدهشة عندما استمعت لصوت امرأة .. فقالت :

- ألو .. مين معايا

قالت والدة "آدم" :

- أنا مامة "آدم" انتى مين ؟

ابتسمت "آيات" قائلة بحماس :

- ازى حضرتك يا طنط .. أنا "آيات" .. خطيبته

وقع الخبر على رأس والدته كالصاعقة .. فرددت :

- خطيبته !

فقالت "آيات" :

- أيوة يا طنط .. معلش سامحيني أنا عرفت فى الخطوبة ان حضرتك كنتى مسافرة وتعبانه .. معلش كان لازم أكلمك بس أنا طلبت كتير الرقم من "آدم" وهو كان بيقولى ان الظروف مش سامحه انى أكلم حضرتك صمتت والدة "آدم" وقد تساقطت العبرات فوق عينيها وهى تقطب جبينها فى حزن وألم .. فقالت "آيات" :

- طنط حضرتك معايا

قالت والدة "آدم" :

- أيوة

قالت "آيات" بقلق :

- هو "آدم" موجود أنا بكلمه من الصبح مبيردش

قالت أمه ببرود :

- تعبان شوية

قالت "آيات" بجزع :

- تعبان ازاي يا طنط .. ماله "آدم"

قالت أمه :

- عنده برد وسخن أوى والدكتور كان لسه عنده من شوية

قالت "آيات" وهى تشعر بالحزن والألم :

- طيب يا طنط اديني العنوان

صمتت أمه قليلاً .. ثم ألقت نظرة على ابنها وهى تتسائل فى نفسها .. ماذا

تفعل من خلف ظهري يا "آدم" ؟ .. بالتأكيد تلك الخطوبة ليست طبيعية

والا لكنت أخبرتنى بأمرها ؟ .. اذا كنت تلعب فسأفسدك لعبتك يا بنى ..

قالت والدته بجزم :

- خدى العنوان يا بنتى

أسرعت "آيات" بإرتداء ملابسها فى عجلة وانطلقت بسيارتها الى

العنوان الذى أخذته من والدته .. شعرت "آيات" بالدهشة وهى تدخل تلك

المنطقة الشعبية البسيطة .. أوقفت سيارتها أمام البيت بعدما تعبت وعانت

فى ايجاد العنوان .. رأت سيارة "آدم" فعلمت أنها فى المكان الصحيح ..

صعدت الطبقات الى أن وصلت الى البيت .. فتحت لها والدته فنظرت اليها

"آيات" تحاول تخمين أتك المرأة أمه أم لا .. نظرت اليها أمه تحاول

استكشاف تلك الخطيبة التى أخفاها ابنها عنها .. ابتسمت "آيات" قائلة

بخجل :

- أنا "آيات" خطيبة "آدم" .. حضرتك مامته ؟
أومأت أمه برأسها وأفسحت لها للدخول .. شعرت "آيات" بالإرتباك
بسبب تلك المعاملة الباردة التي تلقتها من والدته .. قالت والدته وهي
تقوم بواجب الضيافة :

- اتفضلى يا بنتى .. تشربي ايه
قالت "آيات" :

- شكراً يا طنط مش عايزه أتعب حضرتك .. أنا بس عايزة أطمئن على
"آدم"

أشارت والدته الى غرفته وتقدمتها .. دخلت "آيات" لتجد "آدم" يتوسط
الفرش وقطعة قماش مبللة بالماء فوق رأسه .. حبات العرق تنبت على
وجهه .. اغرورقت عيناها بالعبرات واقتربت منه تتحسس وجهه ثم قالت
بقلق :

- ده سخن أوى

قالت أمه بهدوء :

- شوية وهيبقى كويس الدكتور كتبله على علاج وقال على بالليل هيكون
كويس

جلست "آيات" بجواره وهي تشعر بالحزن من أجله .. تأملتها والدته
جيداً .. تأملت هذا الحزن على وجهها وتلك العبرات فى عينيها .. نادت
عليه كثيراً فلم يستيقظ .. فالتفتت "آيات" لوالدته قائلة بقلق :

- أجبله دكتور تانى ؟ .. أو ناخده مستشفى ؟

قالت والدته :

- يا بنتى ما تقلقيش .. حرارته هتنزل كمان شوية

قالت "آيات" بقلق :

- طيب

أزالة عن جبينه قطعة القماش التي سخنت من فرط حرارته المرتفعه
وغمستها فى الماء البارد فق الكمودينو ثم عادت لوضعها على جبينه مرة
أخرى .. قالت والدته :

- هروح أشوف الأكل الى على النار

قالت "آيات" وهي تنظر اليها :

- ماشى يا طنط ومتقلقيش أنا هعمله الكمادات

توجهت والدته الى المطبخ .. وظلت "آيات" بجواره وهي تنظر اليه بألم
.. وتناديه بين الحين و الآخر .. تذكرت "آيات" استقبال والدته لها ..
وشعرت بالقلق من تلك المعاملة الباردة .. خرجت "آيات" من الغرفة

تنظر يميناً ويساراً لتتلمس طريقها الى المطبخ . سمعت صوتاً فتوجهت نحوه .. التفتت والدة "آدم" لتجد "آيات" واقفة على باب المطبخ وهي تبسّم بارتباك .. قالت "آيات" :

- تحبي أساعدك يا طنط

قالت والدة "آيات" وهي تنظر الى ملابسها :

- لا شكراً هدمك هنتوسخ

ابتسّمت "آيات" وتوجهت الى مريّلة المطبخ القديمة المعلقة على الباب وارتدتها قائلة بمرح :

- كده مش هنتوسخ

نظرت اليها وادته وكأنها تحاول استكشافها .. اقتربت "آيات" ووقفت لا تدرى ما تفعل فقالت والدته :

- لو بتعرفي تقشري البصل قشريه

ابتسّمت "آيات" بخجل وقالت :

- بصراحة أول مرة هقشر بصل

ثم قالت بحماس :

- بس لازم أتعلم عشان ان شاء الله لما نتجوز أنا و "آدم" أطبخله بنفسي

عملت المرأتان معاً فى المطبخ .. كانت والدة "آدم" تحاول معرفة

معلومات عنها وعن علاقتها بابنها .. علمت بأنها احدى طالباته .. وبأن

كتب كتابهما نهاية الأسبوع .. شعرت بالألم يحرق قلبها .. وقالت فى

نفسها لماذا يا "آدم" .. ماذا تحرمنى من أن أفرح بك وبزواجك ..

اغرورت عيناها بالعبرات فقالت "آيات" بقلق :

- انتى كويسة يا طنط

قالت والدة "آدم" بهدوء :

- أيوة يا بنتى .. متشغليش بالك

سمع كلاهما صوت "آدم" ينادى والدته .. فقفزت "آيات" وتوجهت الى

غرفة "آدم" .. التفت "آدم" ليشعر بالصدمة من رؤيتها أمامه .. قال

بدهشة كبيرة وبصوت مبجوح :

- "آيات" .. انتى بتعملى ايه هنا ؟

قالت "آيات" وهي تقترب منه :

- اتصلت بيك وطنط ادتنى العنوان .. انت كويس يا حبيبي .. خضتنى عليك

أوى

ظل عقل "آدم" يعمل بسرعة .. خشى أن تفسد خطته .. نظر اليها ليتبين

رد فعلها بعدما رأت مكان عيشه .. لم يجد على وجهها سوى القلق من

أجله .. دخلت والدته الغرفة وهي تنظر اليه نظرات نارية .. يعرف سببها جيداً .. أخذت "آيات" من يد والدته الصينية الموضوع عليها الطعام وقالت لـ "آدم" بحنان :

- اعد كويس عشان أحطلك الأكل

جلس "آدم" بصعوبة فوضعت الصينية فوق قدميه .. رمقته بحنان وهي تبتسم له .. خرجت والدته من الغرفة وهي ترمقه بنظرة عتاب لم يتحملها فأشاح بوجهه عنها .. جلست "آيات" بجواره وقالت بحنان :

- أأكلك أنا يا "آدم" ؟

هز رأسه نفيماً .. وما كاد يمسك بالمعلقة حتى ارتعشت قليلاً في يده وبدأ خائر القوى .. أمسكت "آيات" المعلقة وبدأت في اطعامه كالطفل الصغير .. نظر اليها "آدم" بعينين نصف مفتوحتين يتأملها وهي تطعمه .. ابتسمت له تلك الابتسامه العذبه التي اعتادتها عيناه وألفتها .. كان يتمنى أن يبتسم لها .. لكن رغباً عنه لم يستطع .. لم يستطع خداعها بتلك البسمة .. التي ستعطيها المزيد من الشعور بالأمان .. وبالأمل .. شعر بانقباض في قلبه .. قالت "آيات" بحنان :

- كنت خايفة عليك أوى

أشاح بوجهه عنها وحاول أن يصم آذانه عن كلماتها وعن مشاعرها التي تغمره بها أزاح الصينية الموضوعه على قدمه وقال بعبوس :

- "آيات" روحى أنا بقيت كويس
قالت "آيات" باستنكار :

- "آدم" انت ماكلتش حاجة .. وكمان أنا مش همشى غير لما أظمن عليك شعر "آدم" بالنوم يداعب خفونه وبالإرهاق يشل حركته .. أغمض عينيه واستسلم له .. رمقته "آيات" فى حنان وحملت الصينية وتوجهت خارج الغرفة وأغلقتها بهدوء .. نظرت الى والدته التي تعد الطعام على السفرة قائله بحزن :

- مكلش كويس .. ونام

قالت أمه :

- لما يصحى هخليه يكمل أكله

أخذت منها الصينية وقالت لها :

- يلا يا بنتى عشان ناكل سوا

ابتسمت "آيات" وهي تقول بمرح :

- ماشى يا طنط .. تسلم ايديك

بعد عدة ساعات أفاق "آدم" على ضحكات بالخارج .. قام من فورهِ وهو

يتذكر "آيات" وهي تطعمه.. أخذ يسأل نفسه أكان هذا حلماً أم واقعاً ..
خرج ليجد "آيات" جالسه مع والدته أمام التلفاز .. نهض "آيات" قائله
بسعادة :

- "آدم" الحمد لله

أدار "آدم" نظراته بينهما وظل صامتاً .. ثم فجأة نظر الى الساعة التي
تجاوزت العاشرة بقليل وقال لـ "آيات" :

- انتى بتعملى ايه هنا لحد دلوقتى ؟

قالت "آيات" بحنان :

- محبتش أمشى قبل ما أظمن عليك

قال "آدم" وهو يشعر ببعض آثار التعب :

- "آيات" الوقت اتأخر .. يلا عشان تروحي

ابتسمت له قائلاً :

- حاضر .. بس لو سمحت ارجع أوضتك تانى وما تقومش من السرير

غير عشان تصلى وبس

رمقته أمه بنظرات ساخرة .. فأبعد عينيه عن عينيها بسرعة وقال بنفاذ

صبر :

- يلا يا "آيات"

دفعته "آيات" حتى عاد الى فراشه مرة أخرى ودثرته بغطائه ثم قالت

بحنان :

- بكرة ان شاء الله هاجى أزورك

قال بحده :

- لا .. هبقى أتصل بيكي فى التليفون

شعرت بالحزن .. وبالضيق .. لماذا لا يريد لها أن تزوره فى بيته مرة

أخرى .. سلمت على والدته ثم حملت حقيبتها وخرجت .. نظرت والدته

اليه وهي تقول :

- أنا مش فاهمة انت بتعمل ايه بالظبط .. مش هقولك الا ربنا يهديك يا

ابنى .. ربنا يهديك ويهديك نفسك ويبعد عنك شيطانك

حاولت "آيات" كثيراً تشغيل محرك سيارتها دون جدوى .. زفرت بضيق

وسعدت مرة أخرى .. فتحت والدة "آدم" فقالت لها "آيات" فى حرج :

- معلى يا طنط .. متعرفيش ميكانيكى قريب من هنا العربية مش عايزه

تدور

قالت والدة "آدم" :

- لا يا بنتى والله معرفش

قالت "آيات" مبتسمة :

- خلاص مفيش مشكلة أنا هاخذ تاكسى وهسيبها هنا وهبقى أبعت حد ياخذها .. أسفه يا طنط على الازعاج
أغلقت والدة "آدم" الباب فخرج "آدم" من غرفته وهى يسير بصعوبة
قائلاً :

- فى ايه يا ماما

قالت له :

- خطيبتك عربيتها عطلت وكانت بتسأل على ميكانيكى قولتلها معرفش
صمت "آدم" قليلاً ثم قال فجأة :

- ماما لو سمحتى نادى "آيات" بسرعة

فتحت والدته الباب ونادتها قبل أن تخرج من البوابة :

- "آيات"

نظرت "آيات" الى الأعلى وهتفت :

- أيوة يا طنط

قالت والدته :

- تعالى يا بنتى

صعدت "آيات" مرة أخرى فقال لها :

- "آدم" عايزك

ما كادت "آيات" تتوجه الى غرفته حتى خرج لها ووقف أمامها .. صمت

للحظات ثم مد يده اليها بمفتاح سيارته قائلاً :

- خدى عربيتي يا "آيات"

نظرت "آيات" الى المفتاح ثم اليه وقالت مبتسمة :

- خلاص يا "آدم" أنا هاخذ تاكسى مفيش مشكلة

نظر اليها بحزم قائلاً :

- مينفعش تركبى تاكسى لوحدك بالليل كده

خفق قلب "آيات" وهى تنظر اليه .. شعرت بالسعادة تغمر قلبها وهى

تستشعر لأول مرة قلقه عليها .. قالت وهى لا تستطيع ابعاد عينها عن

عينينه :

- خايف عليا ؟

خفق قلبه .. لأول مرة منذ زمن يشعر بأن داخل صدره قلب ينبض .. لكنه

تمالك نفسه وقال بهدوء :

- يلا عشان متأخريش

ابتسمت له وأخذت المفتاح وخرجت .. توجه الى شباك غرفته وفتحه

وتابعها بعينيه حتى ركبت السيارة وانطلقت بها .. عاد الى فراشه يحاول النوم .. لكن النوم جفاه .. لم يستطع أن يغمض عيناه الا بعدما اتصلت به "آيات" لتخبره بأنها وصلت الى بيتها بسلام .

الفصل العاشر من رواية جواد بلا فارس



استقبل "آدم" صديقه "زياد" فى المطار قائلاً :
- حمدالله على السلامة يا "زيزو"
عانقه "زياد" قائلاً :
- الله يسلمك يا "آدم" .. خير جايبنى على ملا وشى ليه .. تعالى بسرعة
وعايزك الموضوع ميحتملش تأجيل خير فهمنى بأه
قال "آدم" وهو يضع ذراعه على كتفيه ويسير معه :
- تعالى بس وأنا هحكملك

توقفت سيارة "آدم" فى مكانه المفضل فوق جبل المقطم .. نزل و
"زياد" ووقفاً متجاورين .. قال "زياد" مبتسماً :
- انت لسه بتحب تيجي هنا ؟
قال "آدم" وهو ينظر الى الفراغ أمامه :
- أيوة .. هنا بحس انى حر .. والأبواب كلها مفتوحة أدامى
نظر اليه "زياد" باهتمام قائلاً :
- قولى بأه انت محتاجنى فى ايه ؟ .. واياه ده الموضوع اللى ميحتملش

تأجيل

نظر اليه "آدم" قائلاً :

- أنا كتب كتابي بعد 5 أيام يا "زياد"

هتف "زياد" فى سعادة :

- ألف ألف مليون مبروك يا "آدم" .. اخص عليك ومخبي عليا مكنش العشم

نظر "آدم" أمامه فى وجود .. اختفت ابتسامة "زياد" وسأله قائلاً :

- فى ايه يا "آدم" .. اوعى تقول أمك اللي غصبتك وجو أفلام الأبيض

واسود ده

تنهد "آدم" قائلاً :

- لا محدش غصبنى

أشار اليه "زياد" قائلاً :

- بأه دى خلقة واحد هيتجوز بعد 5 أيام

قال "آدم" بجدية وهو يلتفت اليه :

- اسمعنى يا "زياد" .. اللي هكتب كتابي عليها دى تبقى بنت أخو "سراج

حسان اليمانى"

نظر اليه "زياد" بدهشة كبيرة وقال :

- ازاي يعنى بنت أخوه .. واشمعنى بنت أخوه .. وبعدين هو "سراج"

ازاي سكتلك

صمت "آدم" فهتف "زياد" :

- "آدم" رد عليا وفهمنى ايه اللي بيحصل بالظبط

قال "آدم" ببرود وقسوة :

- "سراج" ميعرفش لانه مقاطع أبو خطيبتى .. وده اللي نفغنى لان

"سراج" لو كان عرف كانت خطتى فشلت من أولها

نظر اليه "زياد" بشك قائلاً :

- خطت ايه اللي فشلت ؟ .. انت ناوى على ايه "آدم"

قال "آدم" بقسوة :

- ناوى أرجع حقى اللي اتسرق منى يا "زياد"

قال "زياد" :

- وهترجعه ازاي ؟

قال "آدم" ونظرات عينيه البارده تزيد من بروده الليل :

- هكتب كتابي عليها .. وهساومهم على الطلاق

نظر اليه "زياد" مصدوماً دون أن يتفوه بكلمه .. فأكمل "آدم" :

- ساعتها أبوها هيضطر يساعدنى ويضغظ على أخوه يرجعلى حقى عشان
يخلص بنته

خرج "زياد" من صمته قائلاً :

- يا سلام وافرض بأه "سراج" مرضاش يرجعلك حقك .. انت عارفه كلب
وميهموش الا نفسه
قال "آدم" بحده :

- ساعتها أبوها هو اللى هيضطر يدفعلى حقى
قال "زياد" بحده :

- و ابوها ذنبه ايه يا "آدم" ؟

صاح "آدم" بضيق :

- هما مش عيلة فى بعض واللى سرقتى يبقى أخوه وابن أخوه .. خلاص
يتصرفوا مع بعض المهم حقى يرجع

قال "زياد" بأسى :

- "وَلَا تَزِرُ وَازِرَةٌ وِزْرَ أُخْرَى" يا "آدم"
ثم قال بتحدى :

- طيب افرض بأه مرضيوش ورفعوا عليك قضية خلع ولا قضية نصب
هتعمل ايه ساعتها

صمت "آدم" قليلاً ثم التفت اليه قائلاً بهدوء :

- لا هيخافوا

قال "زياد" بدهشة :

- وايه اللى هيخليهم يخافوا ان شاء الله

قال "آدم" بجمود :

- لانى ههددهم ساعتها انى هقول انها كانت بتجيلي البيت وأسوأ سمعتها
فى الكلية وأقول انى كنت على علاقة بيها من زمان

شعر "زياد" بالصدمة وهو يستمع الى كلمات "آدم" التى تخلو من أى
خلق فقال :

- حرام عليك .. حرام عليك يا "آدم" وهى ذنبها ايه ؟

قال "آدم" بعصبيه :

- أنا مش هأذيها يا "زياد" .. أنا ههددهم بس لكن مش هقول عنها حاجة
.. وبعدين أنا لو كنت عايز أذيها كنت كشفت نفسي بعد الدخلة مش بعد

كتب الكتاب .. أنا بس عايز أمسك عليهم حاجة عشان أقدر أساوم بيها
وأرجع حقى

هتف "زياد" بغضب :

- غلط يا "آدم" اللي انت بتعمله ده غلط .. ذنبها ايه هي وأبوها فى
مشاكلك انت و "سراج" و "عاصى" ؟

صاح "آدم" بغضب هادر وهو يشيح بيديه :

- و أنا ذنبي ايه فى اللي حصل ده كله ؟ .. نصبوا عليا هما الاتنين
وسرقونى وكل ده عشان فسخت خطوبتى ببنتهم .. اترميت فى السجن
شهرين مع الحرامية والنصابين والبلطجية كل ده عشان طالبت بحقى ..
بعطولى بلطجية لحد بيتي ضربونى وكسروه فوق دماغى وكسروا عربيتي
كل ده عشان اتجرات ورفعت عليهم قضية وبرده خسرتها .. قولى أعمل
ايه أرجع حقى ازاي .. مشيت صح خدت فوق دماغى .. معدش قدامى غير
طريق واحد وهو انى أخذ حقى بدراعى
ثم قال بقسوة شديدة :

- ومش بس أخذ حقى .. أنا مش هسيبهم الا لما أنسفهم من أدامى نسف
.. هحاربهم فى شغلهم لحد ما أخسرهم كل حاجة
نظر "زياد" الى صديقه بأسى وقال :

- أنا مقدر كل اللي انت بتقوله وعارف أد ايه انت اتظلمت يا "آدم" .. لكن
مهما حصل مينفعلش تظلم واحدة بريئة ملهاش ذنب فى أى حاجة .. انت
بتقول انك مش هتأذيها .. كون انك تكتب عليها وتطلقها ده مش هيبقى
أذيه ليها ؟

قال "آدم" بعصبيه :

- لا مش أذيه .. أصلا كتب الكتاب زى الخطوبة شوف كام بنت خطوبتها
بتتفسخ .. دى حاجه عاديه بتحصل لأى بنت
قال "زياد" وقد يأس من محاولة اقناعه :

- وجايبنى هنا ليه ؟

نظر اليه "آدم" قائلاً :

- محتاجك معايا .. عايزك تكون شاهد على العقد .. لان طبعا مفيش حد
من قرابي هيكون موجود ولا حتى والدتى مفيش الا زمايلى فى الجامعة
.. فهقدمك ليهم على انك قريبي .. مش عايز أثير شكوكهم لحد ما كتب
الكتاب يتم

قال "زياد" بأسى :

- أنا آسف يا "آدم" مستحيل أشارك فى حاجة زى كده

صاح "آدم" بغضب :

- هو انا بقولك اشهد على ورقة جواز عرفى .. ده جواز يا ابنى على ايد
مأذون

قال "زياد" بحزم :
- جواز لعبة يا "آدم" .. لعبة بتلعبها عشان تضر بيها غيرك وأنا مستحيل
أشارك فى كده
قال "آدم" بحنق :
- قولتلك محدش هينضر
وضع "زياد" كفه على كتف "آدم" قائلاً :
- أتمنى يا "آدم" انك تصحى وتفوق لنفسك قبل فوات الأوان

جلست "بوسى" على الأريكة تفكر فى ألف طريقة وطريقة للانتقام من
"آدم" الذى خانها وباعها .. كانت تشعر بالغضب والحقد والكره .. وددت
لو توجهت اليه فى الجامعة وفضحته وسط طلابه .. وأخبرتهم بحقيقة هذا
الرجل الذى يجمعه بها علاقة محرمة .. والذى يسحب منها الأموال
ليصرفها على ملذاته .. والذى لا يصلح لأن يكون دكتورة فى جامعة
محترمة ومسؤولاً عن طالبات فى سن المراهقة .. أخذت تقطم أضافر يدها
بعصبيه وهى تحاول أن تصل الى خطة محكمة للانتقام .. فهى تعرف
"آدم" جيداً وتعرف طرقه الملتوية للهروب من أى مشكلة .. فجأة سمعت
صوت المفتاح فى الباب فهبت واقفة .. دخل "آدم" وألقى عليها نظرة
وأغلق الباب خلفه .. اقترب منها مبتسماً .. وددت لو قفزت وأمسكت فى
عنقه وحطمته بين يديها لكنها تماكنت نفسها حتى تحين اللحظة المناسبة
.. قال "آدم" بصوته الرخيم وهو يقبل وجنتيها :

- ازيك يا حبيبتى
عقدت ذراعيها أمام صدرها وهى تنظر اليه بحده .. أخرج يده من خلف
ظهره محملة بباقة ورد كبيرة وابتسم لها قائلاً :
- دى عشائك

نظرت "بوسى" الى الباقة ثم اليه دون أن تلمسها فقال "آدم" :
- مضايقه منى عشان بقالى فترة بعيد عنك مش كده ؟
عانقها قائلاً :

- حبيبتى معلىش حقك عليا بس مكنتش فى المود الأيام اللى فاتت وكنت
محتاج أبقى لوحدى شويه
قالت له "بوسى" :
- ودلوقتى انت فى المود

أبعدها عنه ونظر اليها مبتسماً وقال :
- أيوة يا حبيبتي وجيت أصلحك وأقولك أنا آسف يا "بوسى" .. وكمان
أخرجك ونسهر سهرة حلوة .. ايه رأيك ؟
أخذت منه الباقه وهى تقول بلؤم :
- ماشى يا حبيبى ثوانى أجهز نفسى
دخلت "بوسى" وبدلت ملابسها وقد شعرت بالدهشة من تغيره المفاجئ
خاصة بعدما علمت بأمر كتب كتابه .. كانت واثقه من أنه يريد منها شيئاً
ما والا لما عاملها بتلك الطريقة الحانية .. خرجا معاً الى احدى المطاعم
الراقية وحرص "آدم" على تدليلها كثيراً حتى كادت أن تتناسى أمر
خطبته .. نظرت الى يديه لتجدهما خاليتان من أى دبله .. ففكرت ترى
أكذبت عليها الفتاتان بالجامعة ؟ .. ثم قالت لنفسها ولما تكذبان .. ما
مصلحتهما فى ذلك .. انتهت السهرة التى كانت كالحلم بالنسبة لها ..
فمضى زمن لم ترى "آدم" يدللها على هذا النحو .. عادا الى البيت بدلت
ملابسها فعانقها "آدم" قائلاً :
- وحشتيني أوى يا "بوسى"
ابتسمت قائله وقد تناست كل غضبها :
- وانت كمان يا حبيبى
رفع رأسها ونظر اليها يداعب خصلات شعرها وهو يقول :
- "بوسى" عايز منك خدمه
ابتسمت وهى تلقى برأسها فوق صدره قائله :
- أمر يا حبيبى
اتسعت عيناها دهشة وتجمدت مكانها عندما سمعته يقول :
- عايز 30 ألف تانيين غير اللى خدتهم .. وهردهم لك فى أقرب وقت
ابتعدت عنه "بوسى" ونظرت اليه بحده قائله بإحتقار :
- هو ده بأه اللى مخليك تعاملنى طول الليل زى البرنسياسة .. أنا برده
قولت هو "آدم" عيان ولا ايه عشان يعاملنى بالحنية دى
زفر "آدم" بضيق وقال :
- ايه لزمة الكلام ده دلوقتى
صاحت بغضب :
- عشان مبتعرفنيش الا لو كنت عايز حاجة يا "آدم" .. مبسمعش كلمة
حلوة منك الا لو كنت عايز منى حاجة .. ارحمنى بأه .. انت ايه مبتحسش
حمل "آدم" الجاكت فى عصبية وهتف فى غضب :
- أنا خارج

أسرعت خلفه وصاحت بغضب :
- فى ستين داهية
خرج وأغلق الباب خلفه بقوة .. اتجه الى سيارته وانطلق بها بعصبيه
بالغة

وقفت "إيمان" ترتدى اسدالها وتنشر الغسيل فى شرفة بيتهم .. عندما
تعالت فجأة أصوات الزغاريد .. نظرت "إيمان" حولها لتتبين مصدر تلك
الزغاريد .. قفز قلبها من مكانه عندما أدركت ان تلك الأصوات منبعثة من
داخل بيتها .. تركت ما بيدها ودخلت لتستقبلها أمها قالت بلهفهه :
- فى ايه يا ماما ؟

أطلقت "أمها" زغروده أخرى ثم قالت :
- العريس وافق يا "إيمان" وجاى هو وأمه وأبوه يوم الخميس عشان
يخطبوكى
تحولت ملامح "إيمان" من الصدمة الى عدم التصديق الى السعادة وهى
تصيح بفرح :

- بجد يا ماما .. متأكده ؟ .. اوعى تكونى بتهزرى
أطلقت أمها زغروده أخرى وقالت :
- مبروك يا "إيمان" مبروك يا حبيبتي
قفزت "إيمان" فى الهواء وهى لا تصدق سعادتها .. سمعتا طرقات على
الباب فتحت لتجد احدى جاراتها تقول :

- خير يا أم "على" سمعنا زغاريت طالعه من عندكوا
قالت أمها بسعادة :
- عقبال عندك يا أم "محمد" .. "إيمان" بنتى هتتخطب
أطلقت المرأة زغروده ثم قالت :
- يا ألف نهار أبيض والله وكبرتى يا "إيمان" .. عقبال على يا أم "على"
قالت أمها ضاحكة :

- تعيشي .. وعقبال متفرحى بولادك انتى كمان .. ادخلى ادخلى لازم
أعملك شربات حلوة الخبر الحلو ده
دخلت "إيمان" غرفتها وهى لا تصدق نفسها .. لا تصدق أن السعادة
طرقت بابها أخيراً .. سجدت الى الله شاكرة له .. وقلبها يقفز من الفرح ..
فتحت دولاب ملابسها للتخير منذ الآن .. ماذا سترتدى لملاقاة عريسها

- تلقت "سمر" مكالمة من "إيمان" قالت لها فيها :
- "سمر" مش هتصدقى .. العريس وافق عليا يا "سمر"
- قالت "سمر" بسعادة ممزوجة بدهشة :
- انهى يا "إيمان" .. اللي كان رفض؟
- قالت "إيمان" بفرح :
- لا مش ده ده واحد غيره
- قالت "سمر" بعتاب وهي تضحك :
- اخص عليكى مجبتليش سيرته يا نادله
- قالت "إيمان" :
- معلىش يا "سمر" والله كنت خايفه يرفض ويبقى شكلى زبالة كالعادة
- ضحكت "سمر" قائله :
- والله فرحتيني يا "إيمان" ربنا يتملك على خير يا حبيبتي
- قالت "إيمان" بلهفه :
- بقولك ايه تعالى عدى عليا النهاردة .. هو وأهله جاين يوم الخميس
- وعايزاكي تختارى معايا الهدوم الى هلبسها
- قالت "سمر" :
- ماشى يا حبيبتي هخلص شغل وأعدى عليكى ان شاء الله
- قالت "إيمان" بسعادة :
- متحرمش منك يا "سمر" وعقبالك انتى كمان
- اختلفت ابتسامة "سمر" لكنها عادت لترسمها على وجهها مرة أخرى
- وقالت :
- المهم نفرح بيكي الأول يا عروسه .. يلا اقفلى عشان الحق أخلص
- الكشوفات اللي بره دى
- قالت "إيمان" ضاحكة :
- كروتهم يا "سمر" ده أنا قلبت العيانيين النهاردة عشان أروح بدرى
- ضحكت "سمر" قائله :
- ما انتى فاشلة هقول ايه .. يلا يا بت سبيني أشوف شغلى خاليني أجيلك
- بدرى
- قالت "إيمان" بلهفه :

- ماشى هستناكى يلا سلام
أنهت "سمر" عملها وتوجهت الى بيت "إيمان" التفتت لتدخل البوابة
فوجدت شاباً جالساً يسد مكان الدخول فغضت بصرها وقالت :
- لو سمحت ممكن أعدى
نظر اليها الشاب وابتسم فى مرح قائلاً :
- تدفعى كام وأنا أعدىكي
زفرت "سمر" بضيق وقالت :
- لو سمحت عديني
قال الشاب ضاحكاً :
- طيب قوميني عشان مش قادر أقوم
ما كاد "على" يخرج من المسجد المواجه لبيته حتى وجد "سمر" واقفة
لا تستطيع الدخول من البوابة تطرق برأسها وعلى وجهها علامات
الضيق .. والشاب الجالس يرمقها بنظراته ويبتسم فى وجهها .. شعر
"على" بدمائه تغلى فى عروقه واقترب من الشاب صائحاً :
- لم نفسك يله
اختفت ابتسامة الشاب والتفت هو و "سمر" ينظران الى على الذى جذب
الشاب من ملابسه وهو يصيح بغضب :
- لو عايز تتربى قولى وأنا أربيك
صاح الشاب :
- ايه فى ايه يا "على" .. انا معملتهاش حاجة
ثم التفت الشاب الى "سمر" قائلاً بحنق :
- عدى يا ستى
دخلت "سمر" من البوابة بسرعة فقال "على" للشاب وهو يرمقه
بنظرات غاضبة :
- لو شوفتك بتضايقها تانى مش هسيبك فاهم
قال الشاب بحنق :
- خلاص يا سي "على" .. خلصنا بأه
دخل "على" البيت فوجد غرفة "إيمان" مغلقة فعلم أن "سمر" معها فى
الداخل .. طرق الباب ثم وقف بعيداً .. فتحت "إيمان" الباب فأشار لها
"على" بالخروج .. خرجت "إيمان" وهى تنظر اليه بدهشة قائلة :
- فى ايه يا "على" ؟
قال "على" وهو يلقي نظرة على باب غرفتها الذى أغلقته خلفها :
- قولى لصحبتك لو حد ضايقها تانى تقولك و أنا هعرف شغلى معاه

قالت "إيمان" بدهشة :
- مش فاهمة مين يضايق "سمر"
قال "على" :
- قوليلها بس اللي قولتتهولك ده
قالت باستغراب :
- ماشى هقولها
دخلت "إيمان" وقالت لـ "سمر" التي كانت تتفحص ملابس "إيمان"
المعلقة فى دولابها :
- "على" قالى أقولك لو حد ضايقك تانى قوليلى وهو هيتصرف معاه
التفتت "سمر" تنظر الى "إيمان" بارتباك .. وأومات برأسها ثم عادت
تتفحص الملابس .. قالت "إيمان" بخبت وهى تجلس فوق فراشها :
- هى ايه الحكاية بالظبط ؟
قالت "سمر" بصوت هادئ :
- مفيش .. فى شاب ضايقتى تحت ومكنش راضى يعدينى وأخوكى هزاه ..
بس كده
قالت "إيمان" بلؤم وهى تبتسم :
- آه قولتيلى .. أصل أخويا "على" ببيغير جدا
احمر وجه "سمر" وقالت لتغير الموضوع :
- الطقم ده مناسب
قالت "إيمان" مبتسمة بخبت :
- أنا كمان شايفه كده .. شايفاه مناسب
نظرت "سمر" الى "إيمان" بحده فأنفجرت "إيمان" ضاحكة وهى تقول
:
- يا بنتى اعترفى بأه ده أنا صحبتك
قالت "سمر" بحده :
- أعترف بإيه .. انتى اتهيلتى فى عقلك يا "إيمان"
قالت "إيمان" بدلع :
- طيب خليكوا انتوا الاتنين كده .. بكرة تترجونى عشان أكون حمامة
السلام بينكوا
قالت "سمر" بحنق :
- لا انتى شكلك اتهيلتى فعلاً .. العريس طير عقلك من أعده واحدة .. ربنا
يستر من اللي هيحصل بعد كده
أطلقت "إيمان" ضحكة عالية و"سمر" ترمقها بنظرات غيظ

نزلت "آيات" الدرج مبتسمه وهى متوجهة الى غرفة الصالون لملاقاة "آدم" لكنها توقفت فجأة عندما سمعته يقول :

- طيب على الأقل نأجلها لبعد كتب الكتاب

شعرت بالدهشة فأطرقت السمع .. سمعت والدها يقول بحزم :

- ازاي يعني يا دكتور .. خطوبة وكتب كتاب من غير شبكة .. لو مش مستعد حالياً خلاص نأجل كتب الكتاب شوية

قال "آدم" بسرعة :

- لا أنا مش حابب التأجيل

قال "عبد العزيز" :

- وأنا مينفعش أوافق ان بنتى تتكتب كتابها من غير شبكة محترمة تليق بيها وبمقامها .. ولا انت مستخسر فى بنتى يا دكتور

قال "آدم" على الفور :

- لا طبعاً مش ممكن أستخسر فيها حاجة

صمت قليلاً ثم قال :

- خلاص على معادنا ان شاء الله .. وبعد بكرة ننزل نشترى الشبكة

قال "عبد العزيز" بارتياح :

- على خيرة الله

توجهت "آيات" الى الغرفة وابتسمت فى وجههما .. خرجت "آيات" بصحبة "آدم" الذى بدا واجماً شارداً .. ابتسمت له قائلة :

- فى حاجة يا حبيبي

قال "آدم" بوجوم :

- لا متشغليش بالك

ثم التفت اليها قائلاً :

- بعد بكرة ان شاء الله هننزل نشترى الشبكة وكتب الكتاب فى معاده

ابتسمت له وظلت عينيها معلقة به .. ثم ما لبثت أن شعرت بالأسى وهى

تراقب جبينه المقطب ونظرات عينيها الحائرة .. توقف "آدم" عند احدى

اشارات المرور فقالت له هامسه وهى مازالت تنظر اليه :

- بحبك أوى

التفت "آدم" ينظر اليها .. خفق قلبه .. مرة أخرى .. وهو يرى الصدق

فى عينيها .. حاول أن ينطق بها فلم يستطع .. لم يستطع قولها وهو ينظر

الى عينيها .. فنظر أمامه ثم قال :
- وأنا كمان بحبك أوى
ابتسمت "آيات" .. ثم ما لبثت شردت هي الأخرى وقطبت جبينها تفكر
بعمق الى أن ظهرت علامات الارتياح على وجهها .. لما هداها اليه عقلها

وقف "آدم" مع "زياد" فى شرفة بيت هذا الثاني وهو يقول بحنق :
- أعمل ايه أبوها طالب شبكة بمبلغ مش عارف أدبره ورافض يأجلها ..
لو الشبكة مجتش مش هنعرف نكتب الكتاب
قال "زياد" بحزم وهو ينظر ال صديقه :
- طلعتى أنا خالص من اللعبة دى قولتلك مش هساعدك يا "آدم" .. مش
عايز أشيل ذنب البنت الغلبانه دى هي وأبوها
قال "آدم" بحنق :
- هرجعهمك فى أقرب وقت يا "زياد" .. أنا خلاص هاخذ حقى
قال "زياد" بجدية :
- لو خدتهم بالطريقة دى فلوسك هتبقى حرام يا "آدم"
قال "آدم" بغیظ :
- خلاص يا "زياد" فضها سيرة أنا هتصرف
قال "زياد" بتهمك :
- مخدتهمش ليه من البنك بتاعك
نظر اليه "آدم" بغیظ فأكمل "زياد" :
- ست "بوسى" هانم اللي مش لاقية حد يربيهها .. تعرف انت متستهلش
الا واحدة زيها فعلاً
نظر اليه "آدم" بحدده فأكمل قائلاً :
- مترد مخدتهمش منها ليه
قال "آدم" بإقتصاب :
- مريضيتش
قال "زياد" ساخراً :
- البنك فلس ولا بتتقل عليك ؟ .. شكك عملت حاجة ضايقتها فقطعت عنك
المصروف
صاح "آدم" بغضب :
- انت في ايه نازل تريقه من الصبح .. أنا غلطان انى جتلك أصلاً

توجه "آدم" الى الباب وقبل أن يخرج لحق به "زياد" قائلاً :
- "آدم" افكر كويس المقولة اللي بتقول : "من يأبى اليوم قبول
النصيحة التي لا تكلفه شيئاً فسوف يضطر في الغد الي شراء الأسف بأعلى
سعر "

توقف "آدم" للحظات وقد أولاه ظهره .. ثم تركه وخرج من البيت .. نظر
اليه "زياد" من الشرفة وهو يركب سيارته .. فتنهّد قائلاً :
- ربنا يهديك يا "آدم" .. وترجع "آدم" بتاع زمان

جلس "آدم" فى بيته ساهراً يفكر بضيق .. كيف يستطيع تدبير المبلغ
لشراء الشبكة .. يفصله عن تحقيق خطته بضعة آلاف .. هل سيتهدم كل
شئ فى لحظة .. شعر بالغضب وزفر بضيق وهو لا يدري ماذا يصنع ..
وجد فجأة "آدم" اتصالاً من "بوسى" .. تجاهلها تماماً .. لكنه وجد بعد
دقائق رسالة تقول فيها :

- تعالالى دلوقتى جبتك المبلغ اللي طلبته .. منتظراك
ابتسم "آدم" بسعادة وقفز من فراشه توجه الى بيتها على الفور .. فتح
الباب فاستقبلته "بوسى" بكامل زينتها وابتسمت فى وجهه وهى تقول :
- حبيبى مهنش عليا زعك
اقترب "آدم" منها وعانقها قائلاً :
- تسلمى يا حبيبتى

رفعت "بوسى" رأسها وابتسمت له .. ثم توجهت الى المنضدة وحملت
المال الموضوع فوقها واتجهت به الى "آدم" الذى لمعت عيناه بمجرد أن
رأى المال فى يدها .. أخذه منها وقبلها قائلاً :
- متقلقيش يا "بوسى" هرجعهملك فى أقرب وقت
ابتسمت قائله بدلال :

- "آدم" متسبنيش النهاردة .. أنا أصلاً مسافره ومش هشوفك الا بعد
فترة طويلة

سألها قائلاً دون اهتمام حقيقي :

- مسافرة فين ؟

قالت :

- مسافرة لأخويا فى أمريكا .. هعد عنده فترة يعنى تغيير جو

ابتسم لها قائلاً :

- هتوحشيني يا "بوسى"

اقتربت منه هامسه :
- انت أكثر

جذبتة من يده فترك المال على الطاولة وتوجه معها الى غرفة النوم ..
فى الصباح استيقظ "آدم" وألقى نظرة عليها ثم نهض وارتدى ملابسه
وأخذ المال وغادر البيت .. سمعت "بوسى" صوت الباب وهو يغلق ..
فنهضت تنظر للفراغ بجوارها فى سخرية .. ثم توجهت الى المقعد الذى
غيرت مكانه الليلة الماضية ووضعت فوق ظهره جزء من ستارة الشرفة
.. رفعت الستارة لتظهر الكاميرا الموضوعه فوق ظهر المقعد .. أعادت
الفيديو من البداية لتظهر وهى تعدل من وضع الكامير .. حركت الصورة
سريعاً ليظهر بعد ذلك "آدم" وهو يدخل الغرفة معها و ابتسمت
بعدما تأكدت من تسجيل كل شئ .. أخرجت كارت الذاكره من الكاميرا
ووضعتة فى كفها وأطبقت عليه بقوة وكأنها تطبق على كنز ثمين
وابتسامة الانتصار على شفيتها

فى اليوم التالى وقف "آدم" فى مكانه المعتاد ينظر الى الفراغ وهو يشعر
بشئ بداخله يحاول أن يثور ويفصح عن نفسه .. شعر وكأنه يحارب
وحشاً لا يستطيع رؤيته .. فى تلك اللحظة اتصلت "آيات" بـ "آدم"
وقالت له :

- "آدم" انت فين ؟

قال "آدم" بوجوم :

- أنا فى المقطم

سألته بحنان :

- بتعمل ايه ؟

قال "آدم" :

- مش بعمل حاجة .. واقف فى المكان اللى بحب أروحه

قالت على الفور :

- طيب استنانى أنا جايه .. باى

قال بدهشة :

- "آيات" استنى

لكنها أغلقت الخط .. أراد الاتصال بها وعزمها عن عدم المجئ .. لكن شئ
ما بداخله أرادها أن تأتى .. أراد أن يراها .. أن يسمع صوتها .. أن يرى

الصدق والنقاء فى عينيها .. و عذوبة ابتسامتها فوق شفيتها .. أنت ..
تحمل تلك الإبتسامه التى شعر بأنها تزيح الجبال من فوق صدره .. أنت
حاملة نظرات الحب فى عينيها .. والصدق والبراءة فى ملامح وجهها
الصافى .. أنت حاملة فى يديها علبة أخذ ينظر اليها بإستغراب .. اقتربت
منه ووقفت أمامه مبتسمة دون أن تتكلم .. نظر الى العلبة فى يدها ثم
اليها وقال :

- جيتي ليه ؟

قالت دون أن تبعد عيناها عنه :

- انت فاكرنى مش هحس بيك وباللى مضايقتك

اضطرب " آدم " وخفق قلبه بقوة .. نظر اليها يحاول فهم ما تعنيه فأكملت
قائله بحنان :

- أنا سمعت كلامك مع بابا امبارح عن الشبكة

أشاح بوجهه عنها لكنه عاد ينظر اليها عندما قالت بحنان وهى ترمقه
بنظرات حب :

- أنا كل حاجة معتمده فيها على بابا .. يعنى أى حاجة عايزة أجيبها بخليه
يجيبها لى أو بطلب منه فلوس على أدها .. وعمرى للأسف ما حوشت ولا
فكرت أحوش .. وأى فلوس كانت بتبقى معايا كنت بصرفها لانى عارفه
انى لما هطلب من بابا هيدنى ومكنتش عارفه انى ممكن أحتاج فلوس
ومقدرش أطلبها من بابا

تحولت نظرات " آدم " اليها الى نظرات دهشة ممزوجة بالقلق .. ضاقت
عيناها يحاول فهم لما تخبره بكل ذلك .. نظرت " آيات " الى العلبة فى يدها
ثم نظرت اليه .. نقل " آدم " نظره من العلبة اليها ونظرات عينيه بدت
كعلامة استفهام كبيرة .. قالت " آيات " بحنان ورقة وعذوبه وهى تفتح
العلبة :

- ده دهبي يا " آدم " بيعه واشترى الشبكة اللى بابا طلبها منك

شعر " آدم " بغصة فى حلقة .. شعر وكأنه يخنتق ولا يستطيع التنفس ..
أكملت برقه :

- أنا عارفه ان صعب عليك تقبلهم منى .. بس أنا وانت واحد .. وخلص
بعد يومين هبقى مراتك والذهب ده هيبقى بعد كده فى بيتنا يعنى ملكنا احنا
الاتنين .. لو الظروف ضاقت بيك فى يوم هتلاقيني بديهملك يا " آدم " ..
فمفيش فرق خدتهم دلوقتى أو خدتهم بعدين

شعر بقلبه يريد أن يقفز من صدره ويذهب اليها ليعانقها ويحتويها فى
حنان .. ظل ينظر اليها وهو يحتويها بنظراته .. شعر بالألم فى قلبه وهو

يراها تقدم له كل ما تملك فى سبيل أن تملكه هو .. تذكر خطته وانتقامه ..
تذكر كيف سيكسر فرحتها ويحطم قلبها بعد يومين .. تذكر أن تلك العينان
اللاتان تتطلعان اليه الآن بحب ستنهمر منهما العبرات بسببه .. تذكر أن
تلك الإبتسامه التى تزين وجهها ستموت فوق شفيتها بسببه .. تحاول أن
تكون مصدر سعادته وهو لا يتوانى عن فعل شئ ليكون مصدر شقتها ..
نظر الى القطع الذهبية المتراصة فى العلبة التى تمسكها بيدها .. ثم نظر
اليها فشعر بأنها أعلى قيمة من تلك القطع .. ود لو ضمها اليه وبثها حبه
وحنانه .. لكن مازال فى داخله سواد يسيطر عليه .. مازال شيطانه أقوى
من مقاومته الضعيفه الهشه .. توجهت "آيات" الى سيارته ووضعت
العلبة فوق المقعد .. ثم قالت له قبل أن تغادر بإبتسامه عذبه :
- مستنياك بكرة أنا وبابا عشان نخرج نشترى الشبكة
قالت ذلك ثم توجهت الى سيارتها وانطلقت بها .. ظل "آدم" واقفاً فى
مكانه وقد ازداد وجوماً وشروداً

ظل "آدم" طيلة اليوم حبيس غرفته .. ينظر الى القطع الذهبية ويتلمسها
بأصابعه .. تتقاذفه الأفكار يميناً ويساراً .. يسير فى الغرفة كالنمر الجريح
.. لا يعرف وجهته .. لا يعرف دواءه .. فقط يشعر بالألم وبالقهر .. حاولت
"آيات" كثيراً الإتصال به .. لكنه لم يجيب .. كيف يجيب .. بماذا سيجيب
.. أيبثها المزيد من كلماته الخادعة .. ووعوده الزائفة .. وأحلاماً ستتحول
الى كابوس مزعج ستجد نفسها فى منتصفه .. وجد رساله منها تقول فيها
:

- لو فاضى شوية افتح الفيس

جلس "آدم" أمام حاسوبه وكأن يدا خفيه تحركه .. وجدها لكنها لم
تتحدث اليه .. ولم يتحدث اليها .. لا يدري ماذا يقول لها .. ظل ينظر الى
صورتها التى أرسلتها له من قبل .. تباً .. لماذا يشعر بهذا الحنين .. لماذا
يخفق قلبه برقه .. لماذا لم تعد خفقاته قاسية قوية .. أرسلت له رسالة
فقرأها بلهفه ليعرف ما فيها :

- أحبك بجنون ولغيرك لن اكون

أحبك ملء عيوني لأن عيونك ملكوني
أتمناك بجانبى ولكنى أخاف منك معذبى

أحب قربك وأبغض بعدك

أعيش لك وأهيم بك

ليتنى أتنفس عبيرك
وأنعم بحناتك
ولكنى أخاف فقدانك *

تملكه شعور لم يألفه من قبل .. ورقه لم يعهد لها بداخله .. وحناناً جارفاً
يستشعره بكل كيانه .. نظر الى تلك العلامة التي تظهر وتختفى فى انتظار
حروفه .. فى انتظار كلماته .. لم يشعر إلا بأصابعه وهى تكتب على لوحة
المفاتيح :

- متخفيش مش هسيبك أبداً
ظل ينظر الى تلك الجملة التى أرسلها .. وسأل نفسه لماذا أرسلها ..
ألتكتمل خطتك .. ألتشعرها بالأمان حتى تُكلل خطتك بالنصر .. وجد نفسه
يقول .. لا بل أرسلتها .. لأننى حقاً أشعر بها .. نعم .. لن أتركها أبداً

هتف "زياد" قائلاً :

- انت بتتكلم جد ؟

قال "آدم" وجالس معه فى منزله :

- أيوة .. ادتنى ذهبها وقالتلى اشترى الشبكة اللى بابا طلبها منك

نظر اليه "زياد" بحده قائلاً بحنق :

- والله انت ما تستاهل ضفرها .. هو فى كده .. البنبت شكلها بتحبك فعلاً يا

"آدم" .. حرام عليك دى لو عرفت الحقيقة ممكن يجرالها حاجة

صمت "آدم" قليلاً ثم قال :

- أنا هعمل تعديل فى الخطة

صاح "زياد" بحنق :

- المفروض تلغى الخطة من الأساس مش تعمل فيها تعديل

وقف "آدم" فى مواجهة "زياد" قائلاً بغضب :

- مش هيب حقى يا "زياد" واللى الكلاب دول عملوه فىا هردلهم الطاق

طاقين

قال "زياد" بحنق :

- والبنبت اللى ملهاش أى ذنب دى ؟

قال "آدم" بجديّة :

- اسمعنى كويس .. منكرش انى بدأت أتأثر بيها وبدأت مشاعرى تتحرك

نحيبتها .. وفى نفس الوقت مش ناوى أتراجع عن خطتى

قال "زياد" باستغراب :

- مش فاهم .. هتحلها ازاي دي

قال "آدم" بحزم :

- هنكتب الكتاب عادى فى معاده .. وبعد كتب الكتاب هفهمها على كل حاجة .. بس مش هتعرف باباها وهوهم باباها انى ببتزه عشان يساعدى آخد فلوسى من أخوه .. وبعد ما فلوسى ترجعلى هعرفه انى مكنتش ناوى أسيب "آيات" وانى متفق معاها على كده صاح "زياد" متهكماً :

- ايه الخطة الفاشلة دي .. وانت متوقع انها هتخبي على أبوها .. وتسيبه مقهور أدامها وهو فاكرا ان بنته مستقبلها بيضيع .. انت فاكرها صنم زيك صاح "آدم" بنفاد صبر :

- خلاص هخبي عليهم هما الاتنين وأنفذ خطى عادى ولما آخذ الفلوس هعرفهم انى مش هطلقها وانى عايزها ضحك "زياد" ساخراً ثم قال :

- وأبوها يسامحك وهى تسامحك وينسوا انك ابتزيتهم .. وتعيشوا فى تبات ونبات وتخلفوا صبيان وبنات مش كده ؟ ده على فرض أصلا ان عمها هيدفعك الفلوس .. أنا واثق مليون المية ان عمره ما هيدفع حاجة .. اللى هيدفع الفلوس دي هو أبوها عشان يخلص بنته من ايدك صمت "آدم" فأكمل "زياد" :

- "آدم" انت عايز كل حاجة فى ايدك .. ومحدش بياخد من الدنيا دي كل حاجة .. اختار .. يا فلوسك يا "آيات" .. مش هينفع تاخذ الاتنين ظل "آدم" محتفظاً بصمته لفترة .. ثم قال بحزم وهو ينظر الى "زياد" :
- لا هاخذ الاتنين .. فلوسى و "آيات" .. أنا هعرف ازاي أخليها تسامحنى قال "زياد" :

- و أبوها ؟ .. أبوها مش ممكن يسامحك قال "آدم" بعناد :

- مش مهم أبوها يسامحنى .. أبوها ميفرقش معايا فى حاجه .. المهم هى .. وأنا هعرف ازاي أخليها تسامحنى

توجهت "آيات" مع والدها و "آدم" لشراء الشبكة .. نظر "آدم" اليها وهو يتأمل تعبيرات وجهها الفرحة وهى تختار شبكتها وتبتسم فى سعادة

.. وجد الابتسامة ترتسم على شفثيه رغباً عنه .. أخذ ينظر اليها برقه
وهى تضحك مع والدها بمرح .. اختفت الابتسامه من وجهه وهو يفكر فى
اليوم العصيب الذى ينتظره فى الغد .. كان من المقرر أن يفصح عن كل
شئ فى يوم كتب الكتاب .. لكنه نظر الى تلك السعادة على محياها وهو
يشعر بالأسف على ما سيحدث .. وما هو مضطر لأن يفعله .. قرر أن
يؤجل الأمر اسبوعاً .. حتى لا يكسر فرحتها بتلك السرعة .. سيحاول
خلال الإسبوع أن يتقرب اليها حتى لا تقوى على العيس بدونه .. حتى اذا
ما أنت لحظة طلب الصفح يجد قلبها مهياً له .. يعلم أنها طيبة القلب ..
ستنسى الإساءة .. وتصفح عنه .. "آيات" تحبه .. لن تتركه .. لن تقوى
على فراقه .. سيعمل على تحقيق ذلك قبل الافصح عن كل شئ .. ظل
يردد تلك الكلمات حتى يقنع قلبه وعقله .. وحتى يريح ضميره .. نعم .. لن
يطول الأمر كلها عدة أيام فقط أسترد خلالها حقى المسلوب .. ثم بعدها
أطلب منها الصفح وأطلب منها أن تشاركنى حياتى للأبد .. بالتأكيد
ستصفح عنى .. نعم ستفعل .. حبها لى أكبر من بضع أيام تعيشها فى
العذاب .. بضع أيام فقط .. وسينتهى هذا الكابوس .. وسأنسج لها حلماً
وردياً أعيش معها فيه للأبد

التفت والدها يقبل رأسها وهو يقول :

- ألف مبروك يا بنتى

قالت مبتسمة:

- الله يبارك فيك يا بابا

نظرت الى "آدم" فهمس قائلاً وابتسامته الجذابه على محياه :

- مبروك

همست بسعادة :

- مبروك علينا احنا الاتنين

امتدت يده ليمسك كفها الذى استقر فى راحته بإستكانه .. تطلع كل منهما

الى الآخر فى سعادة

تألق "آدم" أما مرآة غرفته وخرج متوجه الى باب البيت عندما خرجت
أمه من غرفتها .. وقفت تنظر اليه بأعين دامعة .. تجمد "آدم" فى مكانه

وهو يرى العبرات فى عينيها .. تكلمت بصوت باكى وقالت :

- مبروك يا ابنى

أخفض "آدم" رأسه أرضاً وهو لا يقوى على مواجهة نظراتها .. تساقطت
عبراتها وقالت بقلب مكلوم :
- كان نفسى أكون جمبك وأفرح لفرحك بس اظاهر انك مستعر من أمك يا
"آدم"
أغمض عينيه وهو يشعر بكلماتها تمزقه وتؤلّمه .. أكملت بصوتها الباكي
:
- عروستك طيبة وبنت حلال ربنا يباركلكوا فى بعض
توجه "آدم" مسرعاً الى الباب ليخرج .. بل ليهرب .. تابعته أمه بعينها
وما كاد يخرج حتى جلست على أحد المقاعد لتنفجر فى بكاء مرير
وقفت "آيات" أمام المرأة تنظر الى نفسها بسعادة .. شعرت بالعبرات فى
عينها فقالت "أسماء" :
- بقولك ايه متبوظيش الميك اب مش عايزه دموع
التفتت اليها "آيات" وقالت بتأثر :
- حسه انى فرحانه أوى يا "أسماء" مش مصدقه
ثم نظرت الى المرأة مرة أخرى وهى تقول بحماس:
- خلاص بعد دقائق أنا و "آدم" هنتجوز .. وهنفضل مع بعض طول العمر
قالت "أسماء" مبتسمة :
- ربنا يتمملك على خير يا "آيات"
سمعتا طرقات على الباب .. اقتربت "حليمة" وهى تقول بأعين دامعه :
- بسم الله ما شاء الله .. زى القمر يا "آيات"
قالت "آيات" بحماس ممزج بالسعادة :
- بجد يا دادة يعنى هعجب "آدم" ؟
قالت "حليمة" بحماس :
- ده انتى تعجبنى الباشا
عانقتها والعبرات تتساقط على وجنتها وهى تقول :
- الحمد لله ان ربنا مد فى عمرى وشوفت اليوم ده
قالت "آيات" وهى تنظر اليها :
- دادة بتعيطى ليه دلوقتى هتخلينى أعيط
قالت "أسماء" :
- لا أبوس ايدك يا "آيات" الميك اب هيبوظ
اقتربت احدى الخاديمات من باب الغرفة وهى تقول مبتسمة :
- المأذون اتصل وقال انه على وصول يا أنسة "آيات"

شعرت "آيات" بقلبها يقفز فرحاً فنظرت الى نفسها فى المرآة للمرة الأخيرة وهى تقول فى نفسها بسعادة آخر مرة هبصلك وأنا الآنسة "آيات"

صفق الجميع لمرآى "آيات" وهى تبدو تبتم لهم فى سعادة .. خفق قلب بسعادة "آدم" وهو ينظر اليها أمسك يدها قائلاً :

- زى القمر

قالت بسعادة :

- بجد

قال بحزم :

- أيوة بس اعملى حسابك مفيش ميك أب تانى بعد كده أنا سايبك النهاردة بس عشان عروسة وعايزه تفرحى .. بس بعد كده لو شوفتك بميك اب وانتى خارجة هيبقى فيها كلام تانى .. الميك اب ده يبقى ليا أنا وبس وكمان يكون حاجة بسيطة مش بالشكل اللى يغير ملامحك استمعت اليه "آيات" بسعادة فأكمل قائلاً :

- ولبسك كمان محتاج فرمته من أول وجديد ضحكت قائله :

- كل اللى انت عايزه هعمله

بتسم لها قائلاً :

- يعنى مش معترضه على حاجة من اللى قولتها ؟ نظرت اليه بحب قائله :

- تو

ابتسمت عيناه وقال :

- يعنى هتسمعى كلامى على طول ؟

قالت هامسه :

- أيوة هسمع كلامك على طول

اتسعت ابتسامته وأحكم قبضته على كفها وهو يقول هامساً :

- اتفقنا يا مدام "آيات"

نظرت اليه "آيات" وهى تشعر بأنها ملكت من الدنيا .. كل شئ

توقفت سيارة أمام الفيلا .. وما كاد باب السيارة أن يفتح حتى نزلت "بوسى" وتوجهت الى الأمن الواقف على الفيلا .. ألقت نظرة على الفيلا ثم قالت له :

- مش دى فيلا "عبد العزيز حسان اليمانى" ؟

قال رجل الأمن :
- أيوة يا فندم
نظرت "آيات" الى الزينة المعلقة بقلب مكلوم وبأعين تشع حقداً ثم قالت
:
- ممكن أقابل بنته "آيات" ؟
قال الرجل :
-طيب لحظة واحدة
اتصل الرجل بالفيلا لترد عليه "حليمة" وأخبرها بأمر تلك المرأة التي
تريد مقابلة "آيات"
توجهت "حليمة" الى بوابة الفيلا وهي تنظر للمرأة بأعين متفحصة ..
قالت "حليمة" :
- اتفضلى يا هانم أقولها مين
قالت "بوسى" بتوتر :
- هي متعرفنيش بس عايزة أقابلها ضرورى
قالت "حليمة" :
- طيب اتفضلى
قالت "بوسى" :
- لا .. ياريت تخليها تطلعلى هنا .. أرجوكى أنا محتاجة أتكلم معاها
ضرورى جداً
ثم سألت بقلق :
- كتب الكتاب اتكتب ولا لسه ؟
قالت "حليمة" وهي تشعر بالإستغراب من تلك المرأة :
- لسه
قالت "بوسى" بلهفة :
- طيب لو سمحتى نديها بسرعة
توجهت "حليمة" الى الداخل واقتربت من "آيات" التي كانت محاطة
بضيوفها وهمست لها قائلة :
- "آيات" يا بنتى فى واحدة برده مصره تقابلك وبتقول حاجة مهمة أوى
قالت "آيات" بلا مبالاة :
- طيب خليها تدخل يا دادة
قالت "حليمة" :
- مش راضية تدخل وعايزاكى تطلعيلها
قالت "آيات" :

- خلاص قوليلها مش دلوقتي أنا مش فاضية خلاص المأذون جه
وهيكتبوا الكتاب دلوقتي
قالت "حليمة" وهي تشعر بالقلق :
- بس يا بنتى أنا حسه انى قلبي متوغوش وحسه انها عايزه تقولك حاجه
مهمة .. اطلعى شوفيها عايزه ايه بسرعه وارجعى تانى
خرجت "آيات" ووقفت أمام باب الفيلا وهي تقول :
- هي فين يا دادة ؟
قالت "حليمة" وهي تشير الى بوابة الفيلا :
- أهي واقفة أدام البوابة
توجهت "آيات" اليها بخطوات مسرعة ثم توقفت أمامها وهي تقول
بعجالة :
- أيوة حضرتك عايزانى .. ياريت بسرعة عشان أنا مشغوله
قالت "بوسى" وهي تنظر اليها من رأسها الى أخمص قدميها .. ثم قالت
بتهمك :
- لا معلى افضيلي شوية
شعرت "آيات" بالدهشة من الطريقة التي تتحدث بها وقالت :
- أفندم .. حضرتك تعرفيني
قالت "بوسى" بحزم :
- لا معرفكيش ومش عايزه أعرفك أصلا أنا جايه أقولك حاجة وأمشى
قالت "آيات" بحده ولم يعجبها طريقة تحدث تلك المرأة :
- أفندم .. اتفضلى
صمتت "بوسى" قليلاً ثم فجرت قنبلتها :
- أنا و "آدم" .. خطيبك .. على علاقة ببعض من أكثر من سنة .. ولحد
دلوقتي لسه مع بعض
صمتت "آيات" للحظات ثم ابتسمت بسخرية وعقدت ذراعيها أمام
صدرها وهي تقول بثقة شديدة :
- لو ده اللي جايه تقوليهاولى يباه تعبتى نفسك على الفاضى أنا بثق فى
خطيبى جداً .. وثقتى فيه ملهاش حدود .. بعد اذنك
التفتت "آيات" لتعود الى الفيلا لكن "بوسى" جذبتها من ذراعها وهي
تقول :
- طيب شوفى ده وقوليلى رأيك
أخرجت "بوسى" هاتفها من حقيبتها وحركت أصبعها على شاشته و
"آيات" تنظر اليها بنفاذ صبر .. ثم وضعت الهاتف أمام وجهها وهي

تقول بتهكم :

- شوفى ده كده وقوليلى لسه برده بتنقى فى خطيبك وثقتك فيه ملهاش حدود

أمسكت "آيات" الهاتف بنفاذ صبر وهى تقول :

- أنا مش عارفه انتى عايزه ايه بالضبط

نظرت "آيات" الى الشاشة بيروود .. ثم ما لبثت أن تجمدت نظراتها .. وتجمدت ملامح وجهها .. بل تجمد جسدها كله وتوقفت عن التنفس للحظات وهى تنظر الى ما عرضته "بوسى" على شاشة هاتفها .. ثم .. وكأن دُبت فيها الحياة فجأة .. انتفضت وتركت الهاتف من يدها وكأنه أفعى سامة ليسقط أرضاً .. نظرت اليه وهو ملقى على الأرض لتتذكر بأنها مازالت تحبس أنفاسها أخذت عدة شهقات تحاول بها ايصال الهواء لرئتيها .. لكن بدا وكأنها تشعر بالإختناق كانت تلهث كغريق فى بحر كبير مظلّم .. ألتقطت "بوسى" هاتفها ثم نظرت الى "آيات" بقلق وهى ترى انتفاضة جسدها وعينيها الغائرتين .. أحاطت .. ابتدى رجال الأمن ينظران اليهما بشك .. التفتت "بوسى" اليها وقالت بسرعة وهى تحذف الملف من هاتفها :

- أنا اسفة انى جيت متأخر بس "آدم" شرانى وكان لازم أعمل حسابى انى أكون بره البلد الفترة دى أنا حالا راحة المطار وهسافر لأخويا اعد عنده فترة

ثم قالت لها :

- خلى بالك "آدم" كان خاطب بنت عمك

نظرت اليها "آيات" وهى تشعر بأنها تلقت ضربة أخرى قاتله .. تجمدت العبرات فى عينيها وأخذت تحرك رأسها وهى تحاول أن تعى كل ما يحدث فقالت "بوسى" :

- عمك وابن عمك نصبوا عليه ده كل اللى أعرفه وواثقة انه مخطبكيش لله فى لله

"آدم" مبيحش حد الا نفسه وبس واثقه ان دى خطه عشان يستغلك بيها تساقطت العبرات من عينيها وهى واقفة ترتجف كورقة فى مهب الريح وقد عقد لسانها فلم تستطع النطق بكلمة .. قالت "بوسى" وقد شعرت حقاً بالشفقة من أجلها :

- نصيحة منى ابعدى عن "آدم" .. ده راجل مؤذى

رفعت "آيات" رأسها وأخيرا وجدت فى نفسها القدرة لتقول بين شهقاتها وبصوت مبجوح مرتجف متألم :

- انتى مراته ؟
ابتسم "بوسى" ساخرة وقالت :
- لا مش مراته .. أنا صحبته
اتسعت عينا "آيات" وهى تنظر اليها فأكملت "بوسى" قبل أن تلتفت
لتنصرف :
- عشيقته يعنى
أطلقت "آيات" صرخة ألم ووضعت يديها على فمها تكتم آهاتها التى
انبعثت من أعماق قلبها .. أحاطت جسدها بذراعيها واقشعر بدنها
وعلامات التقزز على وجهها .. أحاطت نفسها وكأنها تحميها مما رأت
ومما سمعت .. تساقطت العبرات على وجنتيها كمجرى الماء المالح .. لم
تستطع قدمها حملها فتهاوت مكانها على الأرض وهى تبكى بحرقة ..
وتطلق آتات ألم بين شهقات بكائها كغزال جريح فى وسط صحراء قاحلة
.. اقترب رجل الأمن منها وقال بقلق :
- أنسة "آيات" .. انتى كويسة
كانت مغمضة العينين يرتجف جسدها من قوة شهقاتها وتعالى صوت
آهاتها وأتاتها التى تمزق القلب .. فقال مرة أخرى :
- أنسة "آيات"
أتى الحارس الآخر وهو يقول بإضطراب :
- روح بسرعة نادى حد من الفيلا بييجى يشوفها ملها
ثم التفت الى زميله يقول :
- هو كتب الكتاب اتكتب ولا لسه ؟
قال الحارس وهو يتوجه الى الفيلا :
- معرفش
أفاقت "آيات" على جملة "كتب الكتاب" فتوقفت شهقات بكائها وفتحت
عينها .. نظر اليها الحارس قائلاً :
- أنسه "آيات"
لم تجيبه .. دارت عيناها بسرعة وهى تفكر فيما يحدث داخل الفيلا الآن ..
التفتت بحدة تنظر الى الفيلا خلفها ووجهها غارقاً بعبراته .. ارتجفت
شفتاها وهى بشدة وهى تهمهم :
- لا .. لا
جثا الحارس على ركبته بجوارها وهو يتفحصها بقلق ويقول :
- بتقولى ايه يا أنسة "آيات"
لم تجيبه "آيات" ولم تلتفت اليه حتى .. شهقت بقوة ونهضت ترفع طرف

فستانها وتجري بأقصى سرعتها في اتجاه الفيلا وقلبها يخفق في وجل ..
كانت طعنات كعب حذائها على الأرض تشق سكون الليل ويطغى على
أصوات الموسيقى المنبعثة من داخل الفيلا .. هرولت لتسبق الريح .. بل
لتسبق الزمن .. تساقطت عبراتها الساخنة لتحرق وجهها وكاد قلبها أن
يتوقف خوفاً وهلعاً وهي تدعو الله أن تصل قبل أن تُكتب وثيقة اعدامها.

الفصل الحادى عشر من رواية جواد بلا فارس



دارت عيناها بسرعة وهي تفكر فيما يحدث داخل الفيلا الآن .. التفتت
بحدة تنظر الى الفيلا خلفها ووجهها غارقاً بعبراته .. ارتجفت شفاتها
بشدة وهي تهمهم :

- لا .. لا

جثا الحارس على ركبته بجوارها وهو يتفحصها بقلق ويقول :

- بتقولى ايه يا أنسة "آيات"

لم تجيبه "آيات" ولم تلتفت اليه حتى ..

شهقت بقوة ونهضت ترفع طرف فستانها تجرى بأقصى سرعتها في
اتجاه الفيلا وقلبها يخفق في وجل .. كانت طعنات كعب حذائها على
الأرض تشق سكون الليل ويطغى على أصوات الموسيقى المنبعثة من
داخل الفيلا .. هرولت لتسبق الريح .. بل لتسبق الزمن .. تساقطت
عبراتها الساخنة لتحرق وجهها وكاد قلبها أن يتوقف خوفاً وهلعاً وهي

تدعو الله أن تصل قبل أن تُكتب وثيقة اعدامها
شقت "آيات" طريقها بين الحضور .. كانت الوجوه مبتسمة مبتهجة ..
بحثت بعينيها عن والدها .. أقبلت "أسماء" نحوها قائلة بقلق :
- "آيات" كنتى فين ؟

لم تجيبها "آيات" بل لم تسمعها .. جرت فى اتجاه حجرة الصالون حيث
رأت المأذون جالساً وعلى يمينه "آدم" وعلى يساره والدها .. سمعت أحد
أصدقاء والدها من خلفها يقول :

- يلا يا عروسة مستنينك عشان نكتب الكتاب
وقفت تنقل نظرها بين ثلاثتهم والحكل يختلط بالدموع على وجهها .. ارتج
قلب "آدم" هلعاً عندما رآها على هذا النحو .. هب والدها واقفاً وقال فى
هلع :

- "آيات" مالك ؟

التفتت تنظر الى والدها وقد بدأت فى النحيب مرة أخرى .. نظر والدها الى
جسدها المرتعش فأحطاها بذراعيه قائلاً بحده من فرط خوفه :
- "آيات" .. مالك يا بنتى ؟

حاولت التحدث لكن الكلمات خانتها .. فقط كانت تبكى وترتجف عانقها
والدها وهو يقرأ آيات من القرآن الكريم على مسامعها وقلبه يخفق فى
هلع .. اقترب "آدم" منها وقد هاله مرآها على هذا النحو .. وضع يده
على كفتها وهو يقول بقلق بالغ :
- "آيات" ايه اللى حصل ؟

رفعت "آيات" رأسها الموضوع على صدر والدها وانتفضت بعدما رأت
يد "آدم" الموضوعه عليها وابتعدت نفسها عن يده وانزوات تدفن نفسها
فى حضن والدها أكثر وهى تأن ألماً نظرت الى والدها بعينيها الدامعتين
وكأنها ترجوه أن يحميها من "آدم" .. نظر اليها "آدم" بدهشة وهو لا
يدرى ما بها ولما تبعد عنه .. تجمهر بعض الضيوف فى حجرة الصالون
ونظرت الدهشة والفضول تملأ أعينهم .. فأراد "عبد العزيز" أن يبتعد
بها عن عيونهم المتطفلة فقال :

- مفيش حاجة يا جماعة .. لحظات وهرجلكم
جذبها والدها وتوجه بها الى مكتبه لحق بهما "آدم" وأغلق الباب خلفه ..
اقترب منها "آدم" قائلاً وهو يكاد يجن من رؤيتها بهذه الحالة :
- "آيات" قوليلى فى ايه .. ايه اللى حصل ؟

كانت ماتزال تنن بصوت يمزق القلب .. وضعت يديها على أذنيها حتى لا
تسمعه .. أغمضت عينيها حتى لا تراه .. تمننت أن يختفى من أمامها ..

عانقها والدها وعبراته تتساقط من عينيه قائلاً :

- يا بنتى .. يا بنتى ريحيني وقوليلى مالك
أنزلت يديها وتشبثت بملابس والدها بعدما كادت أن تسقط أرضاً أجلسها
والدها على الأريكة وجلس بجوارها .. ذهب "آدم" مسرعاً لاحتضار كوب
من الماء .. قبل أن يعود التفتت "آيات" الى والدها .. خرج صوتها
كصوت الألم .. فلو كان للألم صوتاً مميزاً لكان هو صوتها فى تلك اللحظة
:

- مش عايزاه يا بابا
نظر اليها والدها بلهفة ودهشة يحاول استيعاب ما يحدث لابنته مسح على
رأسها قائلاً :

- مين يا حبيبتي .. "آدم" يا "آيات" .. مش عايزة "آدم" ؟
قالت "آيات" وسط بكائها :

- أيوة يا بابا .. ده واحد مقرف
كانت مازالت ترتجف .. جلس "عبد العزيز" بجوارها وقال بلهفه :
- احكيلى يا "آيات" ايه اللى حصل .. عمك ايه ؟
فى تلك اللحظة حضر "آدم" ومعه كوب الماء .. أشاحت "آيات" بوجهها
عنه بحده وأغمضت عينيها بقوة .. نظر اليها "آدم" بدهشة وحيرة
وخوف و ألم .. نقل والدها بصره بينهما ثم التفت الى "آيات" قائلاً بحزم
:

- قولى يا "آيات" متخفيش .. عمك ايه ؟ .. "آدم" عمك ايه ؟
نظر "آدم" الى والدها بدهشة ثم نظر الى "آيات" التى قالت بصوت
مرتجف متألم وهى تخشى أن تفتح عينيها حتى لا تراه :
- واحدة جتيلي وورتنى فيديو ليهم مع بعض .. وقالتلى انه كان خاطب
"شيرين" بنت عمو "سراج"

تجمد "آدم" فى مكانه وهو يستمع اليها .. فيديو .. أى فيديو .. ظل عقله
يعمل بسرعة جنونية .. أمعقول أنها "بوسى" ! .. نظر "عبد العزيز"
الى "آدم" بدهشة ممزوجة بالغضب قائلاً :
- انت كنت خاطب "شيرين" بنت أخويا ؟

قبل أن يتحدث تحدثت "آيات" قائلة بصوت باكى :
- قالتلى ان عمو "سراج" و "عاصى" نصبوا عليه فى فلوس وانه
خطبنى عشان يستغلنى .. هى قالتلى كده
كانت "آيات" مازالت مغمضة العينين بقوة .. وترتعش كورقة فى مهب
الريح .. أحاطها والدها بذراعيه ونظر الى "آدم" قائلاً بغضب هادر :

- الكلام ده مضبوط ؟ .. انطق
لم يجيبه "آدم" بل نظر الى "آيات" قائلاً :
- فيديو ايه اللي وريتهولك ؟
صرخت "آيات" بألم وقد انخرطت فى بكاء حار وتضاعفت ارتعاشة
جسدها وهى تتذكر ما رأت .. كاد "عبد العزيز" أن يصاب بالجنون هتف
فى "آدم" بغضب :
- "آدم" الكلام ده مضبوط .. اتكلم
صمت "آدم" وقد أغمض عينيه بقوة وهو يشعر بأن كل خطئه باءت
بالفشل .. فتح عينيه قائلاً بصوت خافت :
- أيوة مضبوط
قال "عبد العزيز" بغضب ممزوج بالحيرة :
- يعني ايه .. انت كنت خاطب "شيرين" بنت أخويا .. وأخويا نصب عليك
ما كاد "عبد العزيز" ينتهى من جملته حتى هتف "آدم" ليدافع عن نفسه
قائلاً بحده وغضب :
- أيوة كنت خاطبها كنت خاطب بنت أخوك .. وكنت شريك مع أخوك فى
مشروع سياحى .. ولما لقيتها اتغيرت 180 درجة واتصاحبت على شلّة
فاسدة وبقت المشاكل تكثر بينا وبعد ما نصحتها مرة واتنين وتلاته بدون
أى استجابة فسخت خطوبتى معاها .. لكن أخوك المحترم وابن أخوك
مضونى على عقود مزورة ونصبوا عليا وسرقوا فلوسى وسرقوا دراسة
الجدوى اللي كنت عاملها للمشروع
ثم قال بقسوة وغضب مكبوت :
- ومش بس كده بقيت كل ما أطالب بحقى بيعتولى بلطجية يادبونى عشان
اسكت ولما رفضت اسكت لفقولى قضية واترميت فى السجن شهرين
كان يلهث بشدة لكنه أكمل قائلاً :
- ومش بس كدة .. مش بس طلعت خسران من المشروع لا طلعت مديون
كمان ولحد دلوقتى وأنا مديون ولولا ان صاحب الدين وافق انهم يتقسطوا
كل شهر كان زمانى مرمى فى السجن دلوقتى
نظر اليه "عبد العزيز" بغضب واحتقار وصاح :
- وأنا وبنتى ذنبنا ايه فى شغلك ومشاكلك انت وأخويا وابنه وبنته ؟ ..
بتقرب مننا احنا ليه .. كنت عايز مننا ايه ؟
قال "آدم" ببرود :
- كنت عايز حقى
قال "عبد العزيز" بغضب :

- حَقَّكَ تَأخِذُهُ مِنَ الَّتِي ظَلَمَكَ .. مِنَ الَّتِي سَرَقَكَ .. مَشَّ مِنْ نَاسٍ مَلْهَمَشٍ
أَي دَخَلَ بِالْمَوْضُوعِ

قَالَ "أَدَمُ" بِبُرُودٍ وَإِنْ كَانَ قَدْ بَانَ يَشْعُرُ بِضَعْفٍ مَوْقِفِهِ :

- انْتَوَا أَخْوَاتٍ فِي بَعْضٍ يَعْنِي الَّتِي حَصَلَ دَهٌ فِي وَشْكَ أَنْتِ كَمَا
نَهَضَ "عَبْدُ الْعَزِيزِ" وَوَقَفَ أَمَامَ "أَدَمَ" وَهُوَ يَنْظُرُ إِلَيْهِ بِإِحْتِقَارٍ قَائِلاً :
- أَنْتِ إِنْسَانٌ خَسِيسٌ وَمَعْدُوكَشُ ذُرَّةُ أَخْلَاقٍ وَلَا ضَمِيرَ
صَاحَ "أَدَمُ" بِغَضَبٍ :

- أَخُوكَ وَإِبْنَ أَخُوكَ نَصَبُوا عَلَيَا وَسَرَقُونِي وَرَمَوْنِي فِي السَّجْنِ .. مِينَ فِينَا
الَّتِي مَعْدُوشُ أَخْلَاقٍ وَلَا ضَمِيرَ
صَاحَ "عَبْدُ الْعَزِيزِ" بِقُوَّةٍ :

- أَخُويَا أَنَا أَصْلاً مَتَبَرِي مِنْهُ لِأَنَّهُ نَصَابٌ وَحَرَامِي .. أَقُولُهَا لَكَ تَانِي .. أَخُويَا
نَصَابٌ وَحَرَامِي .. وَمَشَاكِلُهُ مَتَخْصِنِيشَ لَا مِنْ قَرِيبٍ وَلَا مِنْ بَعِيدٍ
ثُمَّ قَالَ وَعَلَامَاتُ الإِشْمِزَازِ عَلَى وَجْهِهِ :

- خَبِيبَ ظَنِّي فِيكَ وَأَنَا الَّتِي فَتَحْتَلِكُ بَيْتِي وَكُنْتَ هَسْلَمَكَ بِنْتِي
فِي تِلْكَ اللَّحْظَةِ شَعَرَ "أَدَمُ" بِشَيْءٍ مِنْ تَأْنِيبِ الضَّمِيرِ .. شَعَرَ بِهِ وَهُوَ يَنْظُرُ
إِلَى "آيَاتٍ" الَّتِي أَلْقَتْ بِرَأْسِهَا عَلَى ظَهْرِ الأَرِيكَةِ وَقَدْ التَفَّتْ إِلَى الْجَانِبِ
الْآخِرِ حَتَّى لَا تَرَاهُ .. كَانَتْ مَغْمُضَةً الْعَيْنِينَ .. تَتَسَاقَطُ عِبْرَاتُهَا عَلَى وَجْهِهَا
فِي صَمْتٍ مَزِقٍ قَلْبِهِ .. نَظَرَ إِلَيْهَا بِلَهْفَةٍ وَقَدْ أَشْفَقَ عَلَيْهَا .. أَشْفَقَ عَلَيْهَا
مِمَّا رَأَتْهُ وَمِمَّا سَمِعَتْهُ .. وَدَلَّوْهُ جُلُوسَ بِجَوَارِهَا وَعَانَقَهَا وَطَلَبَ مِنْهَا عَفْوَهَا
وَشَرَحَ لَهَا مَا عَانَاهُ وَمَا أَوْصَلَهُ لِذَلِكَ الطَّرِيقَ بَعْدَمَا أَغْلَقَتْ جَمِيعَ الأبْوَابِ
فِي وَجْهِهِ .. وَدَلَّوْهُ شَرَحَ لَهَا الظُّلْمَ الَّذِي تَعْرُضُ لَهُ عَلَيْهَا تَشْفَقُ عَلَيْهِ
وَتَعْذُرُهُ .. نَظَرَ إِلَيْهَا بِأَلَمٍ وَهُوَ يَتَمَنَّى أَنْ يَقْتَرِبَ مِنْهَا لِيَمْسَحَ تِلْكَ العِبْرَاتِ
الْمُنْسَابَةَ عَلَى وَجْنَتَيْهَا .. أَفَاقَ عَلَى صَوْتِ "عَبْدِ الْعَزِيزِ" وَهُوَ يَقُولُ
بِصِرَامَةٍ :

- اتَّفَضَلْ أَطْلِعْ بَرَّهُ بَيْتِي مَشَّ عَايِزٌ أَشُوفُ وَشْكَ هُنَا تَانِي .. وَالْحَمْدُ لِلَّهِ إِنَّا
لِسَهْ عَلَى الْبَرِّ وَبِنْتِي مَتَكْتَبِشُ كِتَابَهَا عَلَيْكَ
وَقَفَ "أَدَمُ" يَنْظُرُ إِلَى "آيَاتٍ" بِأَلَمٍ .. فَصَرَخَ بِهِ "عَبْدُ الْعَزِيزِ" بِغَضَبٍ
مَشِيرًا إِلَى الْبَابِ :

- قَوْلَتِكَ أَطْلِعْ بَرَّهُ بَيْتِي
بَدَأَ وَكَأَنَّ أَعْصَابَهَا الْمَلْتَهَبَةَ لَمْ تَحْتَمِلْ هَذَا الْكَمَّ مِنَ الصَّرَاحِ فَوَضَعَتْ يَدَيْهَا
عَلَى أذْنَيْهَا وَظَلَّتْ تَصْرُخُ بِقُوَّةٍ .. أَرَادَتْ أَنْ تَهْتَفَ قَائِلَةً : كَفَى لَمْ أَعُدْ
أَحْتَمِلُ .. لَكِنِّهَا لَمْ تَجِدْ كَلِمَاتٍ تَعْبِرُ بِهَا عَمَّا تَرِيدُ .. وَكَأَنَّهَا طِفْلٌ صَغِيرٌ لَمْ
يَتَعَلَّمِ الْكَلَامَ بَعْدَ .. وَلِغْتَهُ الْوَحِيدَةَ الَّتِي يَعْرِفُهَا هِيَ الصَّرَاحُ الَّذِي يَعْبُرُ بِهِ

عما يريد .. اقترب منها " عبد العزيز " بفرع وأحاطها بذراعه قائلاً
بصوت باكى :

- " آيات "

ظلت تصرخ الى أن بح صوتها .. تجمعت العبرات فى عيني " آدم " .. لأول
مرة منذ زمن يشعر بنغزات الدموع فى عينيه .. اقترب منها " آدم " قائلاً
بألم وبصوت مرتجف :

- " آيات " لو عايزانى أمشى همشى بس اهدى

ما هى إلا لحظات حتى سكنت وقد أغشى عليها بين ذراعي والدها .. هتف
" آدم " بقلبه قبل لسانه :

- " آيات "

هم بأن يقترب منها .. لكن " عبد العزيز " قال بقوة وصرامة :

- ابعد عن بنتى .. امشى اطلع بره يا اما هطلبك البوليس .. سمعت

انفتح الباب ليدخل أحد أصدقاء " عبد العزيز " بعدما ارتفع صوت الصراخ
حتى أكل الفضول والخوف الضيوف بالخارج .. صرخ " عبد العزيز " فى
صديقه وهو يشير الى " آدم " قائلاً :

- طلعلى الكلب ده بره .. خليه يخفى من أدامى لقوم أقتله

قبل أن يتجه صديق " عبد العزيز " الى " آدم " كان قد غادر بالفعل تشيعه

نظرات الدهشة والإستكار والفضول من الجميع .. أسرع وتوجه الى

سيارته الواقفة أمام الفيلا .. وانطلق بها وأوقفها على بعد أمتار قليلة من

بوابة الفيلا .. أخذ يضرب بقبضة يده على المقود بقوة وشراسه وهو

يلعن هذا الحظ الذى أوصل " بوسى " الى " آيات " وقبل لحظات من كتب

الكتاب .. نعم هى " بوسى " ومن ستكون غيرها .. أراد أن ينطلق الى

بيتها ليخرج فيها غضبه وحنقه لكنه أراد أولاً الإطمئنان على " آيات "

المنهارة بالداخل .. أخذ ينظر الى الفيلا عله يتبين أى شئ .. لحظات و

تعالت أصوات سرينة سيارة الإسعاف .. قفز قلبه هلعاً .. دخلت السيارة

الفيلا ليرى النقالة تخرج منها فارغة ثم تعود محملة بـ " آيات " .. شعر

بقلق بالغ .. رأى والدها يصعد معها فى سيارة الإسعاف قبل أن تنطلق فى

طريقها الى المستشفى .. أدار " آدم " المحرك وانطلق بسيارته خلف

سيارة الإسعاف

ظل " آدم " قابلاً فى سيارته أمام المستشفى قرابة النصف ساعة .. كان

يخشى أن يدخل فيطرده " عبد العزيز " .. لكن قلقه على " آيات " أخذ

يتضاعف الى أن لم يعد يحتمل البقاء داخل السيارة نزل منها وتوجه الى

الاستقبال ليسأل عن "آيات" علم رقم غرفتها والطبيب المشرف على حالتها .. سأل عن مكتب الطبيب وتوجه إليه قائلاً بلهفه :
- لو سمحت يا دكتور .. "آيات عبد العزيز حسان اليماني" الحالة اللي جت من شوية عايز أطمئن عليها

سأله الطبيب :

- انت قريبها ؟

قال "آدم" بصوت خافت :

- خطيبها

قال الطبيب :

- عندها انهيار عصبي نتيجة تعرضها لصدمة مفاجئة أو شئ مقدرتش تتحملة .. اديناها مهدئ وان شاء الله تبقى كويسة .. أهم حاجة زى ما قولت لباباها هي محتاجة راحة تامة وتبعد عن أى حاجة ممكن انها توترلها أعصابها

قال "آدم" بلهفه :

- يعني هتبقى كويسة ؟

قال الطبيب مبتسماً :

- أيوة متقلقش هي بس محتاجه راحة

شكره "آدم" .. توجه الى باب المستشفى ليخرج .. لكنه فجأة عدل عن رأيه وتوجه بدلاً من ذلك الى غرفة "آيات" غير عابئ بأمر والدها .. طرق الباب ودخل ليجدها بمفردها وسط الفراش الأبيض وقد علقت لها المحاليل .. اقترب من فراشها ونظر اليها بألم .. كانت ساكنة مغمضة العينين .. مسح على شعرها برفق وهو يتمتم :

- أنا آسف يا "آيات"

كانت نائمة لا تسمع ما يقول لكنه أكمل هامساً بتأثر والدموع تلمع داخل عيناه وهو يمسح على شعرها بيده :

- والله ماكنت ناوى أدكي .. "آيات" لو سمعتيني هتعدريني .. "آيات" أنا مكنتش هسيبك .. قسيت على نفسي أكثر ما قسيت عليكى بس غصب

عنى

ثم نظر اليها بألم قائلاً :

- هتسامحيني مش كده ؟ انتى بتحبينى أكيد هتسامحيني

فجأة دخل "عبد العزيز" ليجد "آدم" بجوار ابنته فصراخ قائلاً :

- انت بتعمل ايه هنا .. ابعد عن بنتى يا حقير

ثم خرج من الغرفة وأخذ يصرخ قائلاً :

تنهد "آدم" بقوة .. بالفعل .. بدأ الإحساس بالذنب يتسرب اليه رويداً رويداً .. رغم محاولته لمقاومة هذا الإحساس .. نظر الى "زياد" قائلاً وعلامات الألم على وجهه :

- متخيلش كانت بتصرخ ازاي .. كانت مغمضة عنها عشان متشوفنيش يا "زياد" .. كان جسمها بيرتعش بطريقة غريبه .. صوت عياطها كان بيقطع في قلبي

تنهد "زياد" قائلاً بأسى :

- أنا مش عارف عقلك كان فين يا "آدم" .. قولتك بلاش يا "آدم" البنت شكلها بتحبك ومش هتستحمل انت عندت وصممت قولت هخليها تسامحني

قال "آدم" بغيظ شديد :

- ماهي بنت التيبيبيبيبيبيب دى لو مكنتش عملت اللي عملته كان الموضوع هيكون أسهل .. لكنها وريتها فيديو ليا وليها واحنا مع بعض معرفش صورته ازاي صمت قليلاً ثم قال :

- أكيد عرفت بموضوع كتب الكتاب .. وآخر مرة كنت عندها سجلت الفيديو ده

قال "زياد" :

- وانت كنت عندها امتى

قال "آدم" بضيق :

- أول امبارح .. كنت محتاج فلوس وهى دبترتهلى

قال "زياد" بحده :

- مش عارف أقولك ايه .. بجد ما عارفه أقولك ايه .. انت انحدرت

لمستوى صعب أوى يا "آدم" .. عارف ايه الحاجة الوحيدة اللي

مصبرانى عليك

لم يجيبه "آدم" فأكمل قائلاً :

- اننا عشرة عمر وانى عارف ان اللي أدامى دلوقتى مش "آدم" اللي

أعرفه .. اللي أدامى دلوقتى شيطان

التفت "آدم" بحده وقد شعر بقوة الكلمة .. فأكمل "زياد" و هو يشير الى

قلب "آدم" قائلاً :

- بس أنا واثق ان هنا لسه فى نقطة بيضا .. وانها هترجع تكبر تانى

وتنور قلبه

تنهد "آدم" وقد شعر بإرهاق شديد .. ارهاق ذهني وبدني ونفسي .. ربت

"زياد" على كتفه قائلاً :

- قوم ارتاحك شوية

لم يكن "آدم" فى حاجة للإلاح .. فقد كان فى أمس الحاجة للراحة بالفعل .. توجه الى احدى الغرف وألقى بنفسه فوق الفراش وأغض عينيه واستسلم للنوم

ها هي ترى حلمها مرة أخرى .. النجيلة الخضراء التي تتراقص مع نسيمات الرياح .. والشمس تغرب فى الأفق وتزين السماء بألوانها الحمراء والبرتقالية والصفراء .. وها هو فارسها مقبلاً على صهوة جواده .. فى عزم واصرار .. وها هي تبتسم وتستعد لإستقباله .. تستعد لأن تعطيه يدها ليجذبها خلفه وينطلق بها .. لكن ابتسامتها تلاشت والفرحة فى عينيها انطفأت عندما اقترب منها الجواد لتكتشف أنه .. جواد بلا فارس

استيقظت "آيات" فجأة .. وهى تنظر الى الغرفة حولها .. حاولت أن تتذكر أين هى وماذا تفعل فى هذا المكان .. شعرت بأنها نسيت الزمان والمكان .. شعرت بكل شئ وقت توقف .. حتى عقلها .. شعرت به وقد توقف عن العمل .. فجأة رأت وجه والدها يقترب منها ويتمتم :

- الحمد لله .. الحمد لله

نظرت اليه فى دهشة .. لماذا يبكى .. أين أنا .. ماذا أفعل فى هذا المكان .. وأين "آدم" .. كان اسمه هو الشرارة التي أعادت عقلها الى العمل .. وأعادت ذاكرتها اليها .. "آدم" .. ذلك الحبيب الغارد الذى طعنها وتركها وسط دمائها وأشلانها ورحل .. بدأت فى النحيب و الأنين .. أسرع والدها لينادى الطبيب .. ليقدم دواؤه لصغيرته التي تتألم وتبكي قهراً .. اقترب الطبيب حاملاً دواؤه .. وددت لو صرخت به .. لن ينفعى دواؤك .. فجرحى ليس له علاج .. جرحى لن يندمل أبداً وان مر عليه ألف عام .. لا تتعب نفسك أيها الطبيب لن تجد لدائى دواء .. دائى هو طعنات غادرة بيد من أحببت .. ألمثل تلك الجروح دواء؟! .. لا تتعب نفسك أيها الطبيب .. حتى وإن سكن أنيني وهدأ .. فلا تظن أنك نجحت فى علاجى وتقديم أسباب شفائى .. لأن أنين قلبي بداخلى لن يسكن أبداً .. أغضت عينيها من جديد بعدما سرى المهدئ فى أوردها واختلط بدمائها .. أغضت عينيها لتحلم مجدداً بجوادها الذى فقد فارسه

وقف "عبد العزيز" ينظر الى ابنته النائمة بأعين دامعه وقلب مكلوم ..
تنهد فى حسرة وهو يمسح بيده على رأسها فى حنان .. كانت وغزات
الألم فى قلبه تتزايد حتى صارت غير محتملة .. وضع يده على قلبه
ليوقف الألم اللعين الذى تفشى فيه دون جدوى .. شعر بالإختناق وبتميل
فى أطرافه .. ضغط الزر فحضرت الممرضة تلبى النداء .. أجلس "عبد
العزيز" بعدما رأت آثار التعب على وجهه .. ظل يعتصر صدره بيده وهو
لا يقوى على شرح ما به من "آلام .. أقبل الطبيب ليخبر "عبد العزيز"
بضرورة عمل أشعة على .. القلب

استيقظ "آدم" على أصوات بالخارج .. استيقظ وجلس فى الفراش وهو
ينظر الى بدلته التى مازال يرتديها و يتذكر أحداث الليلة الماضية والتى
تمنى أن تكون كابوساً سيستيقظ منه بعد برهه .. نزل من الفراش وتوجه
الى الخارج ليجد "زياد" يعد الطاولة بطعام الإفطار .. نظر اليه "زياد"
قائلاً :

- انت لسه مغيرتش هدومك .. ادخل خد دش وتعالى افطر
امتثل "آدم" لكلام "زياد" الذى أحضر له ما يرتديه .. جلس "آدم" على
الطاولة يلوك الطعام فى فمه دون أن يشعر بمذاقه .. شاردأ واجماً متغرقاً
فى التفكير .. قال له "زياد" :

- ناوى على ايه يا "آدم" ؟

قال "آدم" بأسى ممزوج باليأس :

- هعمل ايه يعنى .. خلاص كل حاجة ضاعت

نظر اليه "زياد" قائلاً :

- و خطيبتك ؟

ابتسم "آدم" بمرارة وقال :

- هى كمان ضاعت .. معتقدش انها ممكن ترضى تبص فى وشى تانى

تنهد "زياد" بأسى وقال بعتاب :

- قولتلك يا "آدم" محدش بياخد من الدنيا كل حاجة .. بس انت أصريت

على اللي فى دماغك

نهض "آدم" ودخل الغرفة بدل ملابسه فقال له "زياد" قبل أن ينصرف :

- على فين ؟

قال "آدم" وهو يتوجه الى الباب :

- على المستشفى

لم يجد "آدم" طبيب "آيات" فسأل إحدى الممرضات التي أخبرته أنها استيقظت بالأمس على نوبة عصبية وأن الطبيب أعطاها المزيد من المهدئ وأنها نائمة منذ الأمس .. حاول "آدم" رؤيتها لكنه علم بأن والدها معها في غرفتها .. ظل يتحرك في المستشفى بالطير المذبوح .. يريد أن يطمئن عليها لكنه ممنوع من رؤيتها .. رأى "أسماء" مقبلة من باب المستشفى بمجرد أن وقع نظرها عليه أقبلت نحوه قائلة بلهفه :
- ايه اللي حصل لـ "آيات" يا دكتور "آدم" .. من امبارح وأنا مش عارفه أوصلها ولسه عمو رادد عليا من شوية وقالى انها فى المستشفى دى

قال "آدم" بحزم وهو ينظر الى "أسماء" :
- خليكي معاها يا "أسماء" متسببهاش .. خليكي جمبها
قال ذلك ثم غادر المستشفى تحت أنظار "أسماء" المندهشة

لكن صدمت "أسماء" تضاعفت بعدما سمعت من والد "آيات" تطورات ما حدث الليلة الماضية .. فتحت فمها فى دهشة وهى تنظر الى صديقتها النائمة فى أسى وقالت بأسى :
- آه يا "آيات" يا حبيبتي أكيد كان صعب عليكى أوى
قال "عبد العزيز" بصوت مرهق :
- لازم أشتكيه للعميد بتاعه .. اللي زى ده ميصلحش انه يكون دكتور فى الجامعة .. حسبي الله ونعم الوكيل فيه ربنا ينتقم منه

جلست والدة "إيمان" فى غرفة المعيشة تفصص حبات البازيلاء أمام التلفاز .. اقترب منها "على" وجلس بجوارها وقبل يدها قائلاً :
- تسلم ايدك يا ست الكل
ابتسمت والدته قائلة :
- تعيش يا "على"
- العريس وأهله جايبين بعد بكرة مش كدة
- أيوة أمه لسه أفله معايا من شوية .. ربنا يجعله من نصيب أختك يا "على"

قال "على" مبتسماً :
- متقلقيش ان شاء الله خير .. ول كان من نصيبها هتاخده
صمتت قليلاً وبدأ عليه الحرج ثم تنحج قائلاً :
- ماما أنا كنت عايز أكلمك فى موضوع

نظرت اليه والدته قائله :
 - عاز فلوس ؟
 ازداد حرجه وقال بضيق :
 - لا يا ماما أنا معايا فلوس
 ثم نظر اليها قائلاً :
 - ماما أنا بصراحة ومن الآخر كده معجب بواحدة من صحاب "إيمان"
 وعائزك تكلميهها
 قالت والدته ضاحكة :
 - يبأه أكيد "سمر"
 ابتسم "على" بخرج "فقال والدته بلهفه :
 - "سمر" مش كده ؟
 أوما "على" برأسه فقالت أمه بحماس :
 - يازين ما اخترت دى بت زى النسمة ربنا يجعلها من نصيبك يا "على"
 قال "على" بقلق :
 - بصى يا ماما أنا لسه فى بداية الطريق وعارف انى هتعب شوية بس
 بصراحة خايف تضيع من ايدي فعشان كده يا ماما عائزك تكلمى "سمر"
 .. على الأقل نلبس دبل دلوقتى وأنا ان شاء الله بدور على شغل تانى يكون
 أحسن من ده
 قالت والدته بحماس :
 - متشلش هم .. هتكلم معاها
 قبل "على" يد والدته بفرح قائلاً :
 - ربنا يخليكي ليينا يا ماما

عاد "آدم" الى بيته تتبعه نظرات أمه المتفحصة .. اقتربت منه قائله :
 - فى حاجة يا "آدم"
 قال "آدم" بارهاق :
 - لا متشغليش بالك يا ماما
 تنهدت أمه بحسرة وألم وهى ترى ابنها يقصيهها من حياته ويخرجها منها
 .. تركته فى يأس وذهبت الى المطبخ .. دخل "آدم" غرفته وأغلق الباب
 .. توجه الى فراشه وجلس عليه .. كانت علامات الحزن والأسى على
 وجهه .. والحيرة فى عينيه .. يشعر بأن كل ذلك كابوس وسيفيق منه ..
 لا بد أن يكون كابوساً .. ليس من المعقول أن يخسر كل شئ .. خطته .. و
 "آيات" .. تساعل .. ترى كيف حالها الآن .. كيف ستتجاوز صدمتها ..

أستطيع نسيانه .. بل أستطيع هو نسيانها .. رغباً عنه شعر بشئ
تجاهها .. شعر بقلبه يتحرك من سباته ليخبره بأنه مازال فيه روحاً ..
جذبت برقتها ملكته ببرائتها خفت قلبه بصدقها ونقاها وحبها الكبير ..
أحبته حباً يعرف جيداً بأنه لا يستحقه .. أكثر ما يؤلمه هي نظرتها اليه
التي تشوهت .. لم تعد تراه " آدم " ذلك الرجل الذي كتبت فيه الشعر
والخواطر .. بالتأكيد تراه الآن شيطاناً .. كما رآه أعز أصدقائه .. وكما
تراه والدته .. قطب جبينه في أسى .. وترددت أمانيه بداخله .. ليتك دخلتى
حياتى فى وقت آخر وظرف آخر .. ليتك دخلتى حياتى وأنا " آدم " القديم ..
ليتك دخلتى حياتى قبل أن تتشوه .. ما كنت عندها لأفكر لحظة فى أن
أؤذيك .. ما كنت عندها سأتركك لتضعي من بين يدي .. برائتك أظهرت
لى كم أنا حقير .. صدقك أظهر لى كم انا زائف .. حبك أظهر لى كم أنا
حقود .. تنهد فى ضيق وهو يشعر بغرفته تضيق به .. نهض وغادر بيته
مسرعاً .. تجول فى الشوارع بسيارته وعيناه تشعان حيرة وأسى

اختارت " إيمان " ملابسها بعناية فائقة واستعدت لاستقبال عريسها
ووالديه .. جلس الجميع معاً فى غرفة الصالون رغم اعتراض " على "
الذى لم يلقى صدى من والديه .. لاحظت " إيمان " منذ الوهلة الأولى ببعد
حماتها عنها .. كانت تنظر اليها نظرات غير مريحة ولم تبتمس فى وجهها
ولا مرة .. بل لم تبتمس أصلاً ولا مرة .. شعرت " إيمان " بالتوتر وتحولت
سعادتها الى خوف وهى ترمقها بنظراتها من حين لآخر عليها تجد وجهها
وقد لانت ملامحه .. انتبهت الى حديث عريسها والذى كان يتسم بخفة
الظل .. ابتسمت على نكاته وكتمت ضحكاتهما على مزحاته .. شعرت
بالسعادة وهى جالسه تستمع الى الحوار الدائر واهتمام والد العريس
بمعرفة بعض التفاصيل عنها ومشاركتها فى الحديث .. لم يعكر صفوها
سوى عبوس والدة العريس والذى لاحظته الجميع .. انتهت الزيارة مبكراً
بعدها أعلنت والدة العريس أنها ترغب فى الإنصراف .. نظرت " إيمان "
الى والدتها التى كانت تشعر بالضيق من تقرفات والدته التى تخلو من
اللياقة .. فى الأسفل وبمجرد أن خرجوا من البوابة التفتت والدة العريس
الى ابنها قائلة بغیظ :

- وهى دى بأه اللى عجبك يا فالج ؟

قال العريس :

- أيوة

صاحت :

- آه يا مرارى يانى .. وملقتش غير دى

قال ابنها بدهشة :

- مالها يا ماما ؟

قالت أمه بحنق وتهكم :

- انت مش شايف عامله زى الهضبة ازاي .. اتفرج عليها بعد الجواز

والخلفة مش هتعرف تدخل من باب الشقة جتك الأرف فيك وفى ذوقك

قال ابنها بضيق :

- بس دكتورة ومحترمة وعجبني شكلها .. وكمان أهلها ناس طيبين

قالت أمه بسخريه :

- وعامله زى ضلفة الدولاب

ثم قالت بحماس :

- يا ابني دى خالتك "روحية" اتصلت بيا امبارح تقولى على حتت

عروسة مفيش بعد كده .. انت اللي اتسرعت واتسريعت

قال ابنها :

- خلاص يا ماما بأه معدش ينفع الكلام ده

صاحت قائله :

- معدش ينفع ليه ان شاء الله هو انت كنت اتجوزتها ده مجرد كلام

قال بدهشة :

- يعني ايه ؟

قالت تشجعه :

- يعني تروح تشوف العروسة اللي خالتك "روحية" جيبهاالك

قال ابنها وهو يفكر :

- وافرضى بأه معجبتنيش ابقي خسرت "إيمان"

قالت أمه بتهكم :

- بلا وكسة محسننى انها السفيرة عزيزة .. أقولك يا ابن أمك تعمل ايه ..

ما تقولهمش انك صرفت نظر لحد ما تشوف العروسة .. والله عجبتك بيبأه

تقول لأهل "إيمان" انك صرفت نظر ومش مستريح .. معجبتكش أهو

يبقى مخسرتش حاجة .. ها قولت ايه ؟

ابتسم ابنها قائله :

- فكرة حلوة يا ماما وكدة أبقي مسكت العصاية من النص

قالت أمه بحماس :

- وأنا متأكده انها هتعجبك دى خالتك "روحية" بتقول عليها كلام يشرح

القلب

ثم نظرت حولها قائله بحنق :

- يلا من هنا أحسن قلبي اتقبض من ساعة ما شوفت البت دى

جلست "آيات" فى فراشها تنظر الى الجدار أمامها بعينان ذابلتان من كثرة البكاء .. اقتربت منها "أسماء" قائله بحنان :
- ايه رأيك أشغلك التي فى نتفرج على حاجة سوا ؟
لم تجيبها "آيات" .. فجلست بجوارها على الفراش تنظر اليها بأسى وهى تقول :

- "آيات" .. طب اتكلمى .. مش أنا صحبتك .. قوليلى أى حاجة ظهرت الدموع فى عيني "آيات" وهى مازالت تنظر الى الجدار أمامها وتضم قدميها الى صدرها .. قالت "أسماء" بحنان :
- عارفه ان اللى حصلك مكنش سهل .. بس صدقيني بكره تنسيه أطلقت "آيات" آهة ألم ثم بدأت فى النحيب بضعف .. فحتى البكاء لم تعد تقوى عليه شعرت بأن طاقتها قد نفذت .. أو على وشك النفاذ .. عانقتها "أسماء" والدموع تتجمع فى عينيها هى الأخرى وهى تقول :
- خلاص يا "آيات" .. كفاية عياط بأه

لم يكن بكاءً بقدر ما كان أنيناً .. حضنتها "أسماء" الى أن توقفت عن بكائها فابعدتها عنها ومسحت عبراتها وهى تقول بحماس :
- والله بكره تنسيه وتنسى كل اللى حصل ولا كأنه دخل حياتك .. وكلها شهر وشوية ونمتحن ونخلص من الكلية دى خالص .. وننسى سيرتها وكل حاجة عنها

نظرت اليها "آيات" بضعف وحزن وأسى .. فقالت "أسماء" بحماس :
- بكرة تشوفى وتقولى "أسماء" قالت .. يا بنتى اللى يبيعك بيعيه .. ده واحد ميستهلش انك تعيطي عليه أصلاً .. هو اللى خسرك مش انتى اللى خسرتيه يا "آيات"
ثم قالت :

- عارفه لما شوفته فى المستشفى قبل ما اعرف الحكاية .. كان باين عليه مضايق أوى وحزين أوى .. يا بنتى والله هو اللى خسرو ندم وزمانه هيموت ويرجعلك .. أصلاً عمره ما هيلاقى واحده زيك وهو عارف كده كويس .. والله هو اللى خسرو يا "آيات" مش انتى تنهدت "آيات" وهى تغمص عينيها تعباً فقالت "أسماء" بحنان :
- نامى شوية يا حبيبتي

تمددت "آيات" وقامت "أماء" بتغطيتها .. وجلست على المقعد المجاور
لفراشها .. أغمضت "آيات" عينيها عنها تهرب من واقعها .. فالنوم
بالنسبة لها ما هو الا وسيلة للهروب من هذا الواقع الأليم

خرجت "آيات" من المستشفى وعادت الى الفيلا .. فى المساء دخل
والدها اليها وابتسم لها قائلاً :

- أخبار حبيبتي ايه دلوقتى ؟

ابتسمت ابتسامه واهنه .. تمنى "عبد العزيز" أن يسمع صوتها الذى
اشتاق اليه طيلة الأيام الماضية .. لكن الطبيب أخبره بأنه أمر مؤقت
وبمجرد تحسن نفسيته ستعاود الحديث مرة أخرى .. وطلب منه توفير
كل سبل الراحة لها وعدم التحدث فيما يزعجها .. لذلك كان "عبد العزيز"
يتجنب الحديث عن "آدم" و عما يخصه .. لكن هناك أمر لابد منه .. جلس
"عبد العزيز" بجوارها وامتدت يده لتزرع دبله "آدم" وخاتمه من
أصابعها .. ترققت العبرات فى عينيها لتسقط على وجهها الحزين .. وهى
ترى الدبله التى ألبسها اياها طأدم" تنزع من يدها .. الى الأبد .. قال
والدها بصوت باكى وهى يمسح بيده على وجنتها :

- أنا آسف يا بنتى .. كان لازم أهتم بالسؤال عنه أكثر من كده .. يمكن لو
كنت سألت أكثر كنت عرفت اللى يخلينى أرفضه من البدايه .. أنا آسف يا
بنتى

ارتج جسدها بالبكاء فضمها الى صدره قائلاً :

- مش عايز أشوفك بتعيطى تانى فاهمة يا "آيات" .. كل حاجة هترجع
زى الأول وأحسن كأنه مدخلش حياتنا أصلاً .. وبعد ما تخلصى امتحاناتك
هاخذك ونسافر بره مصر كلها .. أى بلد تختارها نعد فيها زى ما انتى
عايزه ..

أبعدها عنه لينظر الى وجهها الباكى وهو يبتسم وسط دموعه قائلاً :

- شوفى بأه أنا ناوى اخليها رحلة تجنن .. وعايزك تستعدى ليها على
الآخر .. ولو عايزه "أسماء" تطلع معنا مفيش مشكلة أنا هكلم والدها ..
وأفسحكوا انتوا الاتنين فسحة تجنن .. ها ايه رأيك ؟

ابتسمت باتسامه ضعيفة مجاملة لوالدها دون شعور بذرة سعادة بداخلها
.. فأكمل والدها بحماس مصطنع قائلاً :

- عايزك تفكرى من دلوقتى وتشوفى ايه المكان اللى تحبيه تروحيه
.. هسيب اختيار المكان عليكى أما بروجرام الرحلة فهيكون عليا أنا ..

اتفقتنا ؟

أومأت برأسها وهي تمسح دموعها .. قبل جبينها قائلاً :
- نامى دلوقتى يا حبيبتي .. يلا تصبى على خير
وضعت "آيات" رأسها على وسادتها .. التي لم تمضى عليها سوى دقائق
قليله حتى تبللت بدموعها المنسابة من عينيها دون توقف .. تراءت أمام
عيناها الفيديو الذى رآته لـ "آدم" .. أغمضت عينيها بشدة علها تزيل تلك
الصورة من أمام عينيها .. لكن هيهات .. أخذت تفكر كيف يكون فارسها
بتلك الأخلاق المتدنية .. كيف لم تراه على حقيقته .. كيف ظنت بأنه
فارسها الذى تنتظره .. كيف استطاع أن يخدعها الى هذه الدرجة .. كانت
تريد رجلاً يحميها ويحتويها ويحبها ويدافع عنها .. لكنها لم تجد أى من
ذلك .. أفاقت من حلمها على واقع بشع .. تذكرت قبلته لها فى السيارة ..
سرت قشعريرة باردة فى جسدها .. مدت يدها الى فمها تسمححه بقوة
وكأنها تحاول ازالة أى أثر لقبلته .. وكأنها لا تطيق تلك الذكرى .. ظلت
تتلوى فوق فراشها وتعالى صوت بكائها .. أزاحت الغطاء فجأة ونهضت
للتوجه الى حاسوبها .. فتحت صورة "آدم" لتتنظر اليها بتقرز .. تلك
الصورة التى كانت تجلس أمامها تتأملها دون كلل أو ملل .. أصبحت الآن
تشعر تجاهها وتجاه صاحبها بالنفور الشديد .. مسحت الصورة وكل ما
يمت له بصلة .. توجهت الى حساب الفيس بوك لتحظره تماماً .. وتطرده
خارج عالمها

دخلت "والدة" "إيمان" غرفة ابنتها لترحب بـ "سمر" ثم طلبت من
"إيمان" الخروج من الغرفة لتتحدث الى "سمر" فى موضوع خاص ..
خرجت "إيمان" من الغرفة وهي تبتمس بخبث .. بدأت والدة "إيمان"
حديثها قائلة :

- شوفى بأه يا "سمر" .. انتى معزتك من معزة "إيمان" و "على" أيوة
والله بحبك من يوم ما شوفتك .. بنت مؤدبة وطيبة وأخلاق وكل حاجة رنبا
يحفظك يا بنتى

ابتسمت "سمر" فى خجل وقالت :

- تسلمى يا طنط رنبا يباركلك

قالت والدة "إيمان" :

- بصى بأه يا "سمر" .. أنا مبحبش ألف وأدور فهتكلم دوغرى ..

"على" ابنى قالى انه عايزك

ارتبظت "سمر" واحمرت وجنتاها خجلاً .. نظرت الأرض وقد أجم

لسانها فأكملت قائله :

- هو شغال دلوقتي .. هي صحيح شغلانه بيطة بس يا بنتي كل حاجة بتبتدي صغيره وبعدين بتكبر .. وبعدين هو بيقول انه هيدور على شغل تاني أحسن من الشغلانه دي .. ومتقلقيش ولا يكون عندك هم أصلاً أنا و أبو "إيمان" شايلين قرشين لـ "إيمان" و "علي" .. يعني "علي" مش على الحديد زي ما انتي فاهمه .. لا .. بس هو بيحب يسعي ورا القرش وميحبش يعتمد الا على نفسه

صمتت "سمر" دون أن تتفوه بحرف .. فأكملت :

- هو عايز يلبس دبل على الأقل .. عشان يتقال ان "سمر" لـ "علي" و "علي" لـ "سمر" .. لانه بصراحة ربنا خايف تضيعي من ايده .. قولتي ايه يا "سمر" ؟

بدا الإضطراب على "سمر" فقالت والدة "إيمان" بطيبة :

- طيب اي حبيبتى هسيبك تفكري براحتك ومستنية رد منك .. اول ما تردى عليا ان شاء الله هاجى أنا وأبو "علي" نطلب ايديك من ماما .. ماشى يا حبيبتى ؟

نظرت اليها "سمر" بحيرة .. فابتسمت والدة "إيمان" فى وجهها وخرجت لتترك "سمر" ومشاعر كثيرة متناقضة تجذبها يمينا ويساراً

ظل "آدم" يبحث عن "آيات" فى محاضراته يأمل فى أن يراها .. ظل يتجول فى الكلية يومياً عله يلحقها .. لكن لا أثر لها .. علم بأنها لا تحضر الى الكلية .. كاد أن يجن من كثرة تفكيره بها .. أراد الإطمئنان عليها بأى شكل .. لكن كل السبل مقطوعه .. حتى صديقتها "أسماء" لا تحضر الى الكلية .. ففكر "آدم" فى حيلة يجذبها بها الى الكلية ليستطيع رؤيتها والإطمئنان عليها .. بمجرد أن انتهى من القاء محاضراته قال وهو ينظر الى طلابه :

- المحاضرة الجاية عليها 10 درجات من درجات المادة ولازم الكل يحضرها .. ياريت تعرفوا الناس اللي مبتجيش ان محاضرة المرة الجاية مهمة

خرج "آدم" من المدرج لتلحق به "ساندى" قائله :

- دكتور "آدم"

التفت اليها فقالت كبتسمه :

- ازيك يا دكتور أخبارك ايه ؟

قال بنفاد صبر :

- الحمد لله

قالت بابتسامه واسعه :

- عندي ليك خبر حلو يا دكتور

نظر اليها "آدم" بلهفه ينتظر ما ستقوله .. قالت بمرح :

- بابا عجبه المشورع جداً وطالب يقابل حضرتك

لاحت ابتسامه صغيره على زاوية فمه فأكملت "ساندى" حماس :

- قالى حضرتك تحدد المعاد وهو هينتظرك

قال "آدم" وقد ظهرت علامات الارتياح على وجهه :

- تمام يا "ساندى" هشوف معاد مناسب وأعرفك

ابتسم لها قبل أن ينصرف وهو يفكر فى أنه لم يخسر كل شئ بعد

دخلت "أسماء" غرفة "آيات" لتجدها جالسه تطالع كتبها فوق فراشها

اقترب منها مبتسمه وقالت :

- ازيك يا "يويو" أخبارك ايه

ابتسمت "آيات" وأشارت لها بالجلوس .. جذبت "أسماء" الكتاب من

يدها وقالت بمرح :

- خيانة بتذاكرى من ورايا

ابتسمت "آيات" ابتسامه ضعيفة ثم كتبت على احدى الدفاتر بجانبها :

- يا بنتى الامتحانات خلاص قربت وعايزين نخلص بأه من هم المذاكره ده

قرأت "أسماء" ما خطته "آيات" بيدها ثم قالت بمرح :

- على رأيك عايزين نخلص من الامتحانات وقرفها عشان نفضى للرحلة

بتاعتنا

ثم قالت بحماس :

- ياه يا "آيات" ده أنا متحمسة للرحلة دى أوى من دلوقتى .. اخترتى

المكان ولا لسه ؟

كتبت "آيات" فوق دفترها :

- لا لسه

قالت "أسماء" :

- طيب فكرى براحتك بس "آيات" ياريت تظبطينا ماشى .. عايزة أتظبط

ابتسمت "آيات" وهى تومئ برأسها .. اختفت ابتسامتها سريعاً لتعاود

النظر الى كتبها .. قالت "أسماء" بشئ من التردد :

- "آيات"
نظرت اليها "آيات" مستفهمة فقالت "أسماء" بتوتر :
- بصى عرفت ان المحاضرة الجاية عليها 10 درجات من درجات المادة ..
هتروحي ؟
كتبت "آيات" على دفترها :
- مادة ايه ؟
نظرت اليها "أسماء" بأسى قائله :
- ادارة أعمال
تجمعت العبرات فى عينى "آيات" على الفور وأخذت تتنفس بسرعة
وكأنها تشعر بالإختناق .. وفى عينيها نظرات حائرة متألّمة .. قالت
"أسماء" بحنان :
- هتحضريها ؟
هزت "آيات" رأسها نفيًا بقوة .. فقالت "أسماء" :
- خلاص ولا يهملك عوضيهم فى النظرى
أومأت "آيات" برأسها بضعف .. عادت الى كتبها مرة أخرى لكنها شعرت
بأن التركيز هرب منها تماماً

دخل المدرج وهو يتمنى حضورها .. يتمنى رؤيتها .. يتمنى الإطمئنان
عليها .. بحثت عيناه عنها بلهفه .. تفرس فى الوجوه يبحث عن وجهها
الذى افتقده .. لم يجدها .. نظر الى "أسماء" وكأنه يسألها عنها .. لكن
"أسماء" أشاحت بوجهها عنه وعلى وجهها علامات الغضب .. ففهم ..
فهم بأنه خسرها للأبد .. لا تريد حتى رؤيته .. لا تريد حتى درجاته التى
وعد بها .. لا تريد منه أى شئ .. صمت .. طال صمته .. انتظر الطلاب أن
يتحدث .. تحدث وأخذوا ينظرون اليه بدهشة عندما قال بضيق شديد :
- المحاضرة ملغية يا شباب

تعالى صيحات الاستنكار بعدما خرج "آدم" من المدرج .. خرجت
"أسماء" متوجهة الى بوابة الكلية عندما استوقفها "آدم" قائلاً :
- "أسماء"

التفتت تنظر اليه .. فقال بلهفه :

- فىن "آيات" مجتش ليه ؟ هى متعرفش ان المحاضر دى مهمة
قالت "أسماء" ببرود :

- لا عارفه .. بس مرضيتش تحضرها

صمت "آدم" وهو يشعر بالأسى ثم نظر اليها قائلاً بصوت مضطرب :
- ازيها عامله ايه ؟
قالت "أسماء" وهي تنظر اليه بعتاب شديد :
- كويسة .. الحمد لله كويسة
قال "آدم" بلهفه وهو يتفرس فيها :
- يعني هي أحسن .. انا عرفت انها خرجت من المستشفى
قالت "أسماء" والدموع في عينيها فلم تعد تحمل التظاهر بالتماسك :
- حرام عليك اللي عملته فيها .. انا عارفه انى مينفعش أقول لحضرتك كده
.. بس بجد انت دمرت "آيات" هي متستهلش كده
شعر "آدم" بكلماتها كطعنات الخناجر فى صدره .. أكملت "أسماء" قائله
بتأثر :
- "آيات" من يوم ما خرجت من المستشفى وهي مبتتكلمش
تجمد "آدم" فى مكانه وقلبه يئن من الألم .. قالت "أسماء" بحده قبل أن
تغادر :
- حرام عليك بجد .. "آيات" عمرها ما هتسامحك أبداً .. ابعده عنها أحسن
وسيبها فى حالها
غادرت "أسماء" لتترك "آدم" غارقاً فى الألم والعذاب ... والندم

الفصل الثاني عشر من رواية جواد بلا فارس



انتظر "آدم" فى تويتر الى أن سمحت به سكرتيرة "شكرى" والد
"ساندى" بالدخول .. دخل مكتبه بثقه وتبادلا عبارات السلام والمجاملة ..
ثم قال "شكرى" بإعجاب شديد :

- الحقيقة المشروع الى "ساندى" ورتنى الملف بتاعه مشروع هایل جداً ..
وكمان المنطقة نفسها شوفت الصور والسى دى اللى كانوا مع الملف ..
وبصراحة المنطقة تحفة

قال "آدم" بحماس :

- وعلى الواقع شئ تانى .. مكان بجد خيال

صمت "شكرى" قليلاً ثم قال :

- بس فى نقطة مخوفانى شوية يا دكتور

قال "آدم" وقد ضاقت عيناه :

- نقطة ايه ؟

قال "شكرى" بجدية :

- المنافسة القوية اللى هنواجهها هناك

ابتسم "آدم" بثقه وهو يقول :

- وهو ده بالضبط اللى أنا عايزه

قال "شكرى" باستغراب :

- ازاي يعنى ؟

قال "آدم" شارحاً :

- المنطقة اللى اخترتها عشان أنفذ عليها مشروعى هى من أروع مناطق

العين السخة .. المنطقة دى على شكل دايرة .. متقسمة من النص ل 3

مثلثات .. كل مثلث بيمثل قرية سياحية .. يعنى المنطقة عبارة عن 3 قرى

سياحية على شكل دايره .. بيشتركوا مع بعض فى نقطة واحدة فى النص

ودى اسمها "المنطقة الخضراء" وهى مساحة كبيرة للـ 3 قرى حق

الانتفاع بيها

قال شكرى :

- تمام

فأكمل "آدم" بحماس :

- ال 3 قرى ملك لمجموعة شاكات كبيرة مصرية وأجنبيه وبيأجروا القرى

التلاته بالكامل للشركات السياحية .. ال 3 قرى دول قرية واحدة بس منهم

هى اللى متأجرة حالياً وهى اللى شغاله والقريتين التانيين غير مؤجرين

قال "شكرى" وهو يفكر بامعان :

- بس يا دكتور القرية اللى متأجرة دى متأجرة لرجل أعمال كبير أوى

وكمان القرية بتاعته ناجحة جداً وعليها اقبال كبير كل موسم

قال "آدم" بتهمك :

- القرية دي ناجحة بدراسة الجدوى بتاعتي وبالأسس اللي حطتها أنا
لإدارة القرية السياحية

قال "شكري" بإستغراب :

- ازاي يعني ؟

قال " آدم " بصرامة :

- أنا كنت داخل شريك فى المشروع ده مع "سراج اليماني" صاحب
القرية اللي شغاله دلوقتي واسمها "قرية الفيروز" .. بس حصل خلافات
بيني وبينه وهو خد دراسة الجدوى و كل تفاصيل خطتي اللي حطتها
عشان ادارة القرية ونفذها بالمللي .. وده سر نجاح قريته

قال "شكري" بحماس :

- يعني حضرتك يا دكتور تقدر تحط خطه عمل وطريقة فى ادارة القرية

تضرب بيها شغل "سراج اليماني" ؟

ابتسم " آدم " قائلاً :

- بالظبط كده .. لاني عارف كل صغيرة وكبيرة فى "قرية الفيروز"
وعارف كويس عيوبها ومميزاتها .. وأقدر أخلى "سراج اليماني" خلال
فترة صغيرة يقفل القرية ويعد فى بيتهم

ضحك "شكري" قائلاً :

- ممتاز يا دكتور .. شكلنا هنعمل بيزنس كبير أوى مع بعض .. لاني زيك
بعشق روح التحدى وطموحى ملوش حدود

ابتسم " آدم " قائلاً :

- أهم حاجة عندي انى أبدأ تنفيذ فى أقرب وقت

قال "شكري" :

- اللي فهمته من "ساندى" انك معندكش استعداد حالياً تدخل شريك فى
راس المال

قال " آدم " :

- بالظبط كده أنا هدخل شريك بالمجهود مقابل ادارتى للقرية كاملة من
الألف للياء

قال "شكري" مبتسماً :

- اتفقنا يا دكتور وهكلم المحامى يجهز العقود والنسب ولينا أعده تانية
مع بعض

ثم قال :

- بس قولى لو كل حاجة مشيت تمام .. انت هيكون عندك استعداد تسافر
العين السخنة امتى ؟

قال " آدم " بثقه :
- السنة الدراسية باقى عليها أقل من شهر .. بمجرد ما الإمتحانات تخلص
هطلب أجازة من الجامعة وأسافر فوراً
قال "شكرى " ضاحكاً :
- أحب الناس اللى عندها حماس كبير زيك يا دكتور .. اتفقنا

خرجت " أسماء " من المصعد فتناهى الى مسامعها صراخ أبويعها من
داخل البيت .. فتحت الباب بسرعة وتوجهت اليها قائلة بحده :
- حرام عليكموا صوتكوا جايب لآخر العمارة فضحتونا أدام الناس
أكمل والدها موجهاً حديثه لوالدتها دون أن يأبى لوجود " أسماء " :
- أصل انتى أصلاً مش ست زى باقيه الستات لو كنتى فاكرة نفسك ست
تبقى غطاته .. هو أنا ايه اللى بيخليني أبص بره ما أنا لو لاقى ست جوه
البيت مش هبص بره
صاحت أمها بتهمكم :
- ليه بأه ان شاء الله .. أنا ست غصب عنك .. بس الدور والباقي على اللى
عامل نفسه راجل وهو تيببيبيبييت .. أصلاً التيببيبيبييت ميعرفش الا
التيببيبيبييت اللى زيه .. عشان كده كل اللى بتعرفهم بنات صيع زيك
بالظبط

قبل أن تكمل حديثها هوى زوجها على وجهها بصفعة صمت آذان
" أسماء " وهى تصيح باكية :

- كفاية بأه حرام عليكموا
صاح والدها فى والدتها :

- أنا هوريكي يا بنت التيببيبيبيبييت اذا كنت راجل ولا لأ
أفاقت والدتها من صدمة الصفعة سريعاً ودفعتة بيديها قائلة :

- امشى اطلع بره بيتي يا تيببيبيبيبييت
دفعها زوجها بيديه هاتفاً بغضب :
- بيتك مين يا أم بيت ده بيتي أنا .. انتى اللى تطلعى بره مش أنا
صاحت أمها بغضب :

- لأ بيتي أنا مشاركات فيه بفلوسى .. وانت اللى هتطلع منه مش أنا .. ما
انت لو كنت راجل كنت عرفت تجبلى شقة بفلوسك لكن طول عمرك فاشل
وصايح وبتاع نسوان ولولايه كان زمانك بتشحت انت وبنتك
هوى زوجها وجهها بصفعة أخرى وقال :

- اظاهر انتى عايزه تتربى .. أنا بأه هسيبك كده زى البيت الوقف لا انتى
طايلة جواز ولا طايلة طلاق وابقى وريني هتعملى ايه اما علمتك الأدب
وربيتك مبقاش أنا .. وهتجوز عليكى بدل الواحده تلاته وهجيبهم يعيشوا
معاكى هنا وابقى وريني هتعملى ايه .. اعلى ما فى خيلك اركبيه
لم تحتلم "أسماء" المزيد فخرجت من البيت لا ترى أمامها من فرط
دموعها المنهمة على وجهها

أنهت "سمر" الكشوفات وظلت جالسه فى مكتبها شاردة تفكر فى كلام
والدة "على" .. وجدت فى داخلها مشاعر كثيرة متناقضة .. فرح .. خوف
.. لهفة .. رغبة فى الموافقة والرفض فى نفس الوقت .. لكم تكره هذا
الشعور .. الشعور بالعجز والحيرة .. لا تستطيع أن تتحدى خوفها وتقدم
على تلك التجربة .. تذكرت كيف مضت عليها وعلى والدتها الأيام والليالى
دون أن يجدوا ما يسدوا به رمقهم .. تذكرت الشعور بالجوع .. ليس جوع
جسدى فحسب .. بل جوع عاطفى .. جوع عاطفى لأب يحتوى ويطمئن
ويبتسم فى وجهها فيعطيهما الأمل ويخفف من أوجاعها .. أب يمسك بيدها
الصغيرة ويقول لها لا تخشى شيئاً يا صغيريتى فأباكى موجود .. أب تراه
يحتضن والدتها ويمسح دمعها .. لكنه اختار الرحيل .. بل الهروب ..
وكأنهما حمل ثقيل على عاتقيه .. أخذت تتساءل ترى أين هو الآن .. ماذا
يفعل .. أتزوج مرة أخرى ؟ .. بالتأكد تزوج .. أله أبناء .. أله أشقاء
وشقيقات .. لماذا لم يعود .. إذا تحسن به الحال لماذا لا يعود .. لماذا حتى
لا يخبرهم عن مكانه .. لماذا لا يتصل كل فترة ليطمئن عليهم .. ألهذه
الدرجة نسيهم .. نسى أن له زوجة وابنة .. أخذت تتساءل فى ألم .. ألم
يشتاق اليها والى والدتها .. ألم يشتاق الى ابنته الصغيره التى تركها يرقه
صغيرة .. ألم يشتاق الى أن يراها وهى فراشة يافعه .. عادت بتفكيرها الى
"على" .. والى رغبته فى الارتباط بها .. اخذت تتساءل فى نفسها .. أى
نوع من الرجال أنت يا "على" ؟ .. أستطيع الصمود فى مواجهة
مصاعب الحياة أم ستهرب عند أول أزمة ؟ .. الى متى ستستطيع الصمود
؟ .. أستطيع حقاً أن تواجه الحياة معى .. بخلوها ومرها ؟ .. أم ستترك
يدي فى منتصف الطريق ؟ .. أريد أن أطمئن اليك يا "على" وأن أثق لك
.. لكن كيف السبيل الى ذلك ؟!

استيقظ "آدم" من النوم فزعاً .. استعاذ بالله من الشيطان الرجيم ونهض
يغسل وجهه .. عاد الى غرفته وهو يشعر بأن النوم فارق جفونه .. جلس
على فراشه فى ظلام الغرفة .. وشعور بالضياح يتملكه .. نظر الى فراشه
وهو يتذكر "آيات" يوم أن كان مريضاً .. تذكر خوفها وقلقلها عليه ..
تذكر رقتها وحنانها وهى تطعمه فى فمه .. أغمض عينيه بألم وهو يعترف
لنفسه بأنه يشعر بالحنين اليها .. ويتمنى أن تغفو عنه وتسامحه وأن
تغمره بحبها وحنانها من جديد .. صرخ قلبه قائلاً .. آه يا "آيات" لو
تعلمين كم احتاج اليك الآن .. احتاج اليك لتطبيبي جراحى ولتساعديني على
أن أخرج من ذلك المستنقع الذى غمرت نفسى به .. لست خائف على
نفسى الآن بقدر خوفى عليك .. من سيطيب جراحك ؟ .. وهل ستطيب يوماً
؟ .. كم أتمنى رؤيتك .. والتمتع بابتسامتك العذبة التى تغمر قلبى بعذوبتها
ورقتها وصدقها .. ماذا فعلت بكِ وبنفسى ؟ .. توجه الى حاسوبه وفتحه ..
تأمل صورتها بلهفة وحنين واشتياق .. قرأ رسائلها .. طبع كل حرف فيها
داخل ذاكرته .. كيف استطاع أن يفرط فى حباً بتلك القوة .. وفى فتاة بهذا
الصدق والبراءة .. فتاة أعطته قلبها ومشاعرها واهتمامها ولم تبخل
عليه حتى بذهبها .. أعطته كل شئ .. فماذا أعطاها هو ؟ .. لم تثقل عليه
بالطلبات طوال فترة الخطبة .. بل لم تطلب أى شئ أصلاً .. لم تسأل حتى
عن مكان سكنهما .. لم تسأل عن مرتبه .. لم تتضايق من مكان سكنه
وبيته المتواضع عندما زارته .. لم تعلق حتى على هذا الأمر وتعاملت
بشكل طبيعى .. واندمجت مع والدته وعاملتها بطيبة بلا غرور أو ترفع ..
أخذ يفكر بألم .. لن أجد مثلها يوماً .. فتاة لم ترد منى إلا قلبى .. ولم أرد
أنا سوى تحطيم قلبها

فوجئ "آدم" بـ "عبد العزيز" يقتحم مكتبه بالجامعة ويلقى أمامه علبة
الشبكة ويقول بصرامة :

- اتفضل شبكتك واوعى أشوفك بتقرب من بنتى تانى
لم يترك له فرصة الرد وتوجه "عبد العزيز" الى الخارج وهو يصفق
الباب خلفه بقوة .. فتح "آدم" العلبة يتلمس القطع الذهبية التى اختارتها
"آيات" بنفسها .. تذكر فرحتها وسعادتها فى هذا اليوم وهى تنتقى كل
قطعة وتجربها .. تذكر ابتسامتها العذبة وهى تقول له "مبروك علينا احنا
اللاتين" .. أغلق العلبة وألقاها فوق المكتب بلامبالاة .. تنهد فى حسرة
وهو يسند رأسه الى قبضتى يده فوق المكتب ..

توجه "عبد العزيز" الى عميد الكلية وقص عليه ما حدث من "آدم"
تجاهه وتجاه ابنته .. قال بحده :

- الدكتور اللي زي ده لازم يطرد من الجامعة مينفعش واحد زي ده
ويدرس لطلاب وطالبات .. واحد بالأخلاق دي ميصحش انه يدرس فى
جامعة محترمة ولا كلية محترمة .. لازم يطرد عشان يكون عبره لغيره
قال العميد وهو يتصل بمكتب "آدم" :

- هدى نفسك يا فندم وان شاء الله هنشوف الموضوع ده .. ألو .. دكتور
"آدم" ياريت تشرفنى شوية فى مكتبي .. طيب منتظرك
فوجئ "آدم" بوجود "عبد العزيز" فى حجرة العميد .. قال العميد :

- اتفضل اعد يا دكتور "آدم"

جلس "آدم" وهو يتنهد بضيق .. قال العميد :

- الأستاذ "عبد العزيز" جاى يقدم فيك شكوى

ال "آدم" بضيق :

- شكوى ايه يا فندم ؟

صاح "عبد العزيز" قائلاً :

- يعنى مش عارف اللي عملته .. ضحكت عليا وعلى بنتى وخطبتها وكنت
عايز تكتب عليها وكل ده عشان تبتزنى أنا وهى .. مش عارف ازاي
ضميرك وأخلاقك ماتوا للدرجة دي
قال العميد :

- لو سمحت يا أستاذ "عبد العزيز" مفيش داعى للكلام ده

ثم التفت الى "آدم" قائله :

- ردك ايه يا دكتور "آدم" على اللي سمعته دلوقتى ؟

قال "آدم" ببرود :

- عنده دليل على اللي بيقوله ده ؟ .. لو عند دليل يقدمه

هتف "عبد العزيز" بغیظ :

- أما بجح صحيح

قال "آدم" للعميد متجاهلاً "عبد العزيز" :

- أنا يا فندم كنت هاجى لحضرتك عشان أقدم على أجازة بعد ما تنتهى
السنة الدراسة دي

ثم نظر الى "عبد العزيز" قائلاً :

- هسيب القاهرة كلها

قال "عبد العزيز" بخنق :

- يكون أحسن برده

قال العميد :

- ياريت نحل الموضوع ودى ومفيش داعى الموضوع يكبر .. ايه رأيك يا أستاذ "عبد العزيز"

قال "عبد العزيز" يحزم قبل أن يغادر :

- أنا هشتكى للى خلقه .. هو قادر ينتقم منه ويجبلى حق بنتى .. مش هقول الا حسبي الله ونعم الوكيل .. بنتى من يوم اللى حصل وهى مفتحتش بقها بكلمة .. بس ربنا قادر ينصر المظلوم وينتقم من الظالم غادر "عبد العزيز" ليترك "آدم" غارقاً فى بحور الندم والألم

عادت "إيمان" من الخارج بصحبة والدتها وهى تهتف:

- كان حتت يوم .. رجلى خلاص مش قادرة أمشى عليها قالت أمها :

- هو انتى فاكرة شوار العروسة بالساهل ده هم ما يتلم ضحكت "إيمان" قائلاً :

- لا ده أنا لو فضلت كل يوم أخرج بالشكل ده على الفرحة هكون اختفيت قالت أمها :

- أهو أحسن من شوربة الكرنب اللى قارفه نفسك بيها ليل نهار قالت "إيمان" بمرح :

- لا خلاص كرنب ايه ده المشى اللى مشيته النهاردة يعادل حلتين تلاته أربعة .. أنا هبطل كرنب وهرکز فى موضوع الشوار ده دخل مزاجى هتفت أمها قائله :

- آه ياختى هو انتى دافعه حاجة من جيبيك ضحكت "إيمان" وهى تعانقها قائله :

- ربنا يخليكي لينا يا ست الكل يا منورة حياتنا وميحرمناش منك أبداً توقفا عن الحديث بعدما خرج "على" من غرفته لينظر اليهما نظرة تردد وحيرة وأسى .. قالت أمه :

- انت مروحتش الشغل يا "على" ؟ تنهد قائلاً :

- لا روحت وجيت يا ماما قالت "إيمان" بمرح :

- ايه مالك شايل طاجن ستك كده ليه ؟ قال "على" بضيق :

- عريس "إيمان" اتصل بيا من شوية
 قالت "إيمان" بلهفه :
 - خير قالك ايه ؟
 صمت "على" قليلاً وهو ينظر الى أخته يشفق على ما ستسمعه .. ثم قال
 بصوت خافت :
 - قال كل شئ نصيب
 اختفت ابتسامة "إيمان" وهي تنظر الى أخيها فى حيرة .. ضربت أمها
 بيدها على صدرها قائلة :
 - ايه .. يعني ايه .. وهو وكان لعب عيال
 قال "على" يهدوء :
 - قال انه مش مرتاح وكل شئ نصيب
 تجمعت العبرات فى عيني "إيمان" وقالت بصوت مرتجف :
 - بس هو كان موافق .. ايه اللي حصل ؟
 قال "على" وهو يرمقها بعطف :
 - معرفش يا "إيمان" مقالش غير كده
 ثم قال :
 - بصى يا إيمان " مش انتى صليتي استخاره .. يبأه ده نتيجة صلاتك
 وأكد ربنا اختارك الخير ليكي
 هتفت "إيمان" بغضب وحرقة :
 - حرام والله العظيم حرام
 لم تقف "إيمان" لتسمع المزيد من كلمات المواساة بل توجهت مسرعة
 الى غرفتها وأغلقتها عليها وألقت بنفسها فوق فراشها لتعود وسادتها
 تتبلل بدموعها من جديد

بدأت الامتحانات سريعاً ودخل الطلاب فى دوامتها التى تشقلب كيانهم
 رأساً على عقب .. كان فى ذلك أثر كبير فى أن تنخرط "آيات" فى شئ
 ينسيها ولو لبعض الوقت التفكير فى حزنها .. كان امتحان مادة إدارة
 الأعمال هى المادة الأخيرة فى الجدول .. قامت "آيات" بقصها من
 الجدول قبل أن تعلقه على باب غرفتها .. حتى كتاب المادة وأوراقها
 أخفتهم فى مكان لا تقع عيناها عليهم .. حاولت أن تتناسى حزنها وكربها
 وساعدها على ذلك والدها ووجود "أسماء" بالقرب منها .. كل يوم
 تقترب فيه من آخر مادة كان يدب الخوف فى أوصالها والألم فى قلبها ..

حتى أتى اليوم الموعود .. ليلة الإمتحان .. كانت تضع الكتاب أمامها لا تجرؤ حتى على لمسه .. كانت تنظر اليه بتقزز شديد وهى تشعر وكأن هذا الكتاب جزء منه .. جزء من " آدم " .. حاولت التركيز فى مذاكرة تلك المادة التى كانت تحفظها عن ظهر قلب لكنها وجدت أن عقلها صفحة بيضاء وكأنها تقرأ تلك المادة للمرة الأولى .. فى صبيحة يوم الإمتحان .. ارتدت " آيات " أول ما وقع تحت يدها من دولابها .. ودون أى زينه كمان هى عاداتها فى الأيام الماضية نزلت الى الأسفل ليستقبلها والدها مبتسماً مشجعاً .. كان " عبد العزيز " يقوم بتوصيلها الى الكلية فى كل امتحان ويجلس فى كافيتيريا الكلية حتى تنتهى من أداء امتحانها ويرجعها الى البيت .. كان يخشى عليها بشدة أن تقابل " آدم " .. أو يحاول مضايقتها .. دعى الله كثيراً فى هذا اليوم أن يمر الإمتحان الأخير دون مشاكل .. وقف ونظر اليها بحنان قائلاً :

- جاهزة يا حبيبتي

أومات برأسها .. سارا معاً الى السيارة وانطلق بهما السائق الى الجامعة .. جلست " آيات " فى المدرج تنتظر ورقة الأسئلة وقلبها يخفق بعنف .. تمنت ألا تراه .. تمنت أن يمضى اليوم بسلام حتى تغادر تلك الجامعة بغير رجعه .. التفتت حولها لتتنظر الى " أسماء " التى ابتسمت لها فبادلتها " آيات " بابتسامه هشة ضعيفة .. حانت اللحظة وتم توزيع ورقة الأسئلة .. فتحت " آيات " ورقة الإجابة وكتبت السؤال الأول .. نعم هذا السؤال تعرفه جيداً .. رآته كثيراً وحفظته عن ظهر قلب فى بداية العام الدراسى .. لكن الآن .. شعرت بأن الكلمات تهرب منها .. وكأنها ترى السؤال لأول مرة .. تعرف السؤال .. وتعرف الإجابة .. لكن أصابعها تأبى أن تكتبها .. حاولت ارغام عقلها على التركيز دون جدوى .. ذكرها هذا السؤال بيوم ألقى " آدم " تلك المحاضرة .. تذكرت كيف كانت تنظر اليه وقتها بحب ولهفة .. تذكرت الامتحان المفاجئ الذى كانت تعلم بأمره .. تذكرت يوم أن علمت بأنه يرغب فى التقدم لها وخطبتها .. تذكرت يوم خطبتها .. تذكرت يوم مرضه وقلقها وخوفها عليه .. تذكرت يوم شراء الشبكة .. تذكرت يوم كتب كتابها ومدى سعادتها وهى تنظر الى المرأة .. حاولت ارغام عقلها عن التوقف فى الاسترسال فى تلك الذكريات التى أصبحت تؤلمها أشد ايلام .. لكن عقلها أبى .. أسندت رأسها بيديها تحاول أن تصب تركيزها على ورقة الأسئلة دون سواها .. لكن قلبها خفق بقوة حتى كاد أن ينخلع من مكانه عندما دخل " آدم " المدرج وقال :

- أخبار الامتحان ايه يا شباب ؟

لم ترفع رأسها .. لم تحاول النظر اليه .. صوته جعلها تشعر بالخوف ..
بالرعب .. بالفزع .. لا تدري مما هي خائفة .. فقط تشعر بقلبها يخفق
بجنون .. ولا تنتمي سوى رحيله عن المدرج .. وتركها بسلام .. بحثت
عيناه عنها .. إلى أن رآها .. كانت تدفن وجهها في ورقتها دون أن ترفعه
لتنظر اليه .. اقترب من أحد الطلبة وهو مازال ينظر اليها .. قال للطالب :

- أخبار الامتحان ايه ؟

قال الطلاب بحماس :

- سهل جداً يا دكتور .. ده أسهل امتحان مر علينا

قال طالب آخر :

- أول مرة تحط امتحان سهل كده يا دكتور .. أكيد كلنا هنجح فيه
تقدم "آدم" تجاهها وتظاهر بفحص ورقة إحدى الطالبات التي ابتسمت
وهي تقول :

- شكل الدفعة كلها هتجيب امتياز يا دكتور

لم يعبا "آدم" بكلامها .. فتركيزه كله ينصب على "آيات" التي لم ترفع
عينها اليه حتى الآن .. ترك الطالبه وتقدم أكثر باتجاه "آيات" .. شعرت
بأن الدماء هربت من وجهها .. رأته بطرف عينها واقف بجوارها ..
شعرت بالإختناق وكأنه يسحب الأوكسجين الذي تتنفسه .. اقترب أكثر
فأحطت جسدها بذراعيها وكأنها تحمي نفسها منه .. امتقع وجه "آدم"
وهو ينظر اليها ويقول .. يا الله كم ذبلت .. تلك الوردة اليافعه ذبلت للغاية ..
أين تلك الابتسامة العذبة التي كانت تزين محياها .. أين تلك العينان اللتان
كانتا تلمعان في مرح .. أين هي تلك الفتاة التي تشع بهجة وسرور .. أته
الإجابة من داخله .. لقد قتلتها يا "آدم" .. قتلتها .. شعر بألم حاد في قلبه
.. و بأسى ظهر جلياً على وجهه .. امتدت يده ليتفحص ورقة اجابتها .. لا
شئ .. لم تكتب أى شئ .. شعرت بأن قلبه منها يعذبها .. يجدد آلامها
وأحزانها التي لم تشفى منها بعد .. أخذت تصرخ بكل كيائها .. ارحل ..
ارحل عنى لا تقترب منى .. لا أريد أن أراك .. لا أريد أن أسمعك .. لا أريد
أن اشعر بك .. وجودك يمزقنى ويذكرنى كم كنت ساذجة .. كم كنت
أضحوكة .. كم كنت لعبة بين يديك .. تجمعت العبرات فى عينها مهددة
بالسقوط .. مهددة بفضحها أمام عيناه .. حاولت منعها بقوة من السقوط
لكنها فشلت .. وانهمرت عبراتها أمام عيناه .. نظر اليها "آدم" يراقب
تعبيرات وجهها المتألم .. وتلك اللئالى التي تتساقط من عينها وتحاول
محوها بسرعة .. قال هامساً :

- أخبار الإمتحان ايه ؟

لم تشعر بنفسها الا وهى ترفع يديها لتغطي أذنها .. ياالله لكم أصبحت تكره
صوته .. أصبحت تشعر بصوته وكأنه خناجر تمزق أذنيها .. أحكمت وضع
يديها على أذنيها حتى لا تسمعه أبداً .. نظر اليها "آدم" بألم .. ثم ..
ولدهشتها وجدته يأخذ قلمها من بين أصابعها .. تركته فوراً حتى لا
تتلامس أيديهما .. أخذ القلم وفتح ورقة اجابتها ودون أن ينتبه أحد وضع
علامة مميزة بداخل الورقة .. نظرت الى العلامة التي صنعها بدهشة ..
ماذا يفعل .. يحاول الانتقام منها .. يحاول ايها المراقبين بأنها من صنع
تلك العلامة .. يحاول أن يضعها فى مآذق .. رفعت رأسها تنظر اليه ..
فتلاقت نظراتهما .. تلك العينان الزرقاوان كم عشقتهما من قبل .. كم تمت
ألا تفارقهما ابداً .. كم سبحت فى بحارهما .. أما الآن فلا تشعرانها تلك
العينان إلا بالألم .. والنفور .. والغضب .. نظر "آدم" اليها .. كم تبدو
بريئة .. ضعيفة .. حزينة .. تمنى أن يزيل تلك النظرة عن عينيها .. وتلك
العبرات من وجهها .. ليرى "آيات" التي يعرفها .. التي تنظر اليه بحب
وشوق ... أخذ يهتف بداخله .. ماذا أفعل لتسامحيني .. ماذا أفعل لأنال
ثقتك من جديد .. ماذا أفعل حتى تتوقفى عن طعنى بتلك النظرات المعاتبة
الغاضبة .. التي تشعرنى بمدى سؤى وحقارتى .. أبعدت عينيها عنه ..
وقد اكتفت بما حصلت عليه من ألم .. من عينيها التي أصبحت مصدر ألمها
وشقائها .. ألمه بعدها ونفورها .. لكنه يعلم جيداً بأنه يستحق ذلك ..
التفت ليغادر فى صمت

انتهت "آيات" من أداء الامتحان الذى لم تكتب فيه الا بضع كلمات لن
تعطيها درجة النجاح بأى حال من الأحوال وقفت خارج المدرج تبكى فى
احدى الزوايا .. خرجت "أسماء" وقالت لها بلهفه :

- فى ايه يا "آيات" ؟

كتبت "آيات" فى دفترها :

- محللتش حاجه

عانقتها "أسماء" تحاول تهدئتها وهى تقول :

- خلاص يا حبيبتي ولا يهكم .. مش مهم

ثم نظرت اليها قائله :

- طيب تعالى نشوف امتحان الشفوى

كتبت "آيات" فى دفترها :

- محللتش نظرى كويس .. الشفوى هيفيدنى بيايه ؟

قالت "أسماء" :

- يا ستي متعرفيش ما فى ناس مبتبقاش حله حاجة وبتلاقيهم بينجحوا ..
وان شاء الله تتجحي
سارت "آيات" مع "أسماء" للبحث عن لجنة الشفوى .. انتظرتا قليلاً مع
الطالبة فى الخارج حتى استطاعتا الدخول للدكتور الذى سيقوم بإمتحانهما
شفهياً .. جلستا أمامه ... قال الدكتور :
- أسمائكم ايه ؟

قالت "أسماء" اسمها أما "آيات" فكتبته على ورقة وأعطتها له .. نظر
اليها فى دهشة فقالت "أسماء" :
- معلىش يا دكتور عندها مشاكل فى زورها فعشان كده هتكتب الإجابات فى
ورقة
قال لها :

-ربنا يشفيكي يا بنتي
نظر الى اسمها ثم قال :
- لا انتى لجنتك مع دكتور "آدم خطاب"
تسارعت خفقات قلبها وهى تنظر الى "أسماء" بدهشة .. قالت "أسماء"
:

- بس يا دكتور .. دكتور "آدم" بيمتحن المدبلرين .. و"آيات" دى أول
سنة ليها فى رابعة يعنى دفعتنا
قال الدكتور :

- والله ده اللى دكتور "آدم" قالهولى .. الطالبه دى تمتحن شفوى عنده
نظرت الفتاتان الى بعضهما البعض ثم تمتت "أسماء" :
- استيني بره هخلص امتحان وأطلعك
خرجت "آيات" ووقفت فى الخارج وعلامات الأسى على وجهها .. فجأة
وجدت "أحمد" يقترب منها .. ووقف أمامها .. نظرت اليه "آيات" لترى
نظرات الحزن فى عينيه .. بدأ حديثه قائلاً :
- ازيك يا "آيات" عامله ايه ؟

أومأت برأسها .. فشعر بالألم .. وقال لها :
- أنا عرفت اللى حصل .. محبتش أكلمك الفترة اللى فاتت .. حسيت انى
مش هقدر أعملك حاجة ولا أخفف عنك .. بس النهاردة آخر يوم ومكنش
ينفع يمر كده من غير ما أتكلم معاكى
توترت "آيات" فأكمل بأسى :

- انت متستهليش كده .. متستهليش كده أبداً
خانتها عبراتها لتتساقط فوق وجنتيها .. ظهرت علامات الألم على وجهه

وهو يراها متألّمة هكذا دون أن يجد في نفسه القدرة على التخفيف عنها .. على بعد خطوات وقف "آدم" ينظر اليهما .. ينظر الى "آيات" الباكية و "أحمد" الواقف أمامها يواسيها بكلماته نظراته .. شعر بغصة في حلقة .. كان يجب أن يكون هو مكان "أحمد" الآن .. واقف مع "آيات" يتحدث معها .. سمع "أحمد" يقول لها :

- أنا لسه بحبك يا "آيات" .. عارف انك مش مستعدة أبداً تسمعي كلام زي ده دلوقتي .. بس أنا فعلاً بحبك
ثم كتب في ورقة قائلاً :

- دي أرقامى كلها .. لو احتجتى أى حاجة كلميني فى أى وقت أعطها الورقة وهو ينظر إليها بحنان قائلاً :

- ماشى يا "آيات" ؟

كانت تشعر بالإضطراب .. اخذت الورقة وأومات برأسها .. شعر "آدم" بالغضب بتجاه هذا الـ "أحمد" .. ود لو ذهب اليه وصرخ فى وجهه .. ابتعد عنها .. ود لو صرخ فى وجه "آيات" .. القى بتلك الورقة فى وجهه .. لكنه يعلم جيداً أن كلا الأمرين لن يجنى منهما إلا إحراج نفسه فحسب .. انتبه "أحمد" لوجود "آدم" فنظر اليه بتحدى .. ثم التفت الى "آيات" قائلاً وهو يرفع صوته :

- حبيبتي مش عايزك تشيلي هم طول ما أنا جمبك
نظرت اليه "آيات" بعتاب .. دخل "آدم" مكتبه وصدق الباب خلفه بقوة .. انتبهت "آيات" على صوت غلق الباب فالتفتت لترى مصدره .. فى تلك اللحظة خرجت "أسماء" وسلمت على "أحمد" ثم قالت :

- خلصت شفوى ؟
قال "أحمد" :

- لا لسه .. هروح أمتحن وأرجعلكوا
جذبت "أسماء" "آيات" فى اتجاه مكتب "آدم" نظرت اليها "آيات" بحزن .. فقالت "أسماء" بحده :

- "آيات" ضيعتى منك الـ 10 درجات بتوع المحاضرة ده غير الامتحان اللى اتعمل فى اخر محاضرة واللى برده محضرتيهوش والنظري محلتيش فيه كويس .. ايه ناوية تضيعي الشفوى كمان
ظهر الألم على محياها فقالت "أسماء" بحنان :

- عارفه انه صعب بس حاولى تضغطى على نفسك .. عايزين نخلص من الكلية دي بأه

ظهرت العبرات فى عيني "آيات" ثم كتبت فى دفترها :

- مش قادرة يا "أسماء" .. لو شوفته هيعط تانى .. مش عايزاه يشوفنى
ضعيفه وبعيظ

كانت فى عينها نظرة تصميم ألا تحضر الإمتحان .. ألا تراه .. امتثلت
"أسماء" لرغبتها مرغمة وقالت :

- طيب تعالى يلا ننزل زمان عمو مستنينا فى الكافيتيريا
انتظرها "آدم" .. دخل كل طلاب لجنته الا هى .. أرسل احدى الطالبات
للبحث عنها فعادت تقول :

- البنات قالولى انها مشيت يا دكتور .. شكلها مش هتتحضر الامتحان
ظهرت علامات الحزن على وجهه .. لقد أغلقت "آيات" كل الأبواب فى
وجهه .. وهاهى تغلق آخر باب .. وآخر أمل .. فى أن يراها ويتحدث معها
ويشرح لها .. شعر بالغضب وبالضيق .. لماذا لا تعطيه فرصة الدفاع عن
نفسه .. لماذا لا تستمع اليه .. لماذا تطرده خارج عالمها بلا شفقة أو
رحمة .. لماذا لا تريد أن تفهم أنه ليس بهذا السوء .. ولكن ما الفائدة ..
لن يفيد أى كلام ولا أى سؤال .. أيقن "آدم" فى تلك اللحظة أنه بالفعل
خسر "آيات" .. خسرهما للأبد

- أنا آسفة يا طنط

قالت "سمر" ذلك بصوت مرتجف .. حائر .. مضطرب .. نعم تتمنى
الموافقة .. تتمنى أن تكون من نصيب "على" .. لن تنكر أنها انجذبت اليه
.. الى أخلاقه وتدينه وغيرته وطيبته .. لكنها خائفة .. مازالت خائفة ..
مازالت لا تستطيع التغلب على خوفها .. استخارت ربها .. مرات ومرات ..
وقفت تناجيه فى جوف الليل .. لكنها مازالت خائفة .. مازالت الخوف
يسيطر عليها ويشل تفكيرها .. لن تستطيع الإقدام على تلك الخطوة .. لا
تشعر بأنها مستعدة لها بعد .. نعم رفضته .. رفضته وهى تتمنى الموافقة

علم "على" .. حزن .. وصدمة .. تحدث مع صديق طفولته قائلاً بتهكم
ممزوج بالألم :

- أكيد رفضتني عشان مش قد المقام
ثم قال :

- أنا قولت لماما تقولها انى هدور على شغل تانى .. وانى لسه فى بداية
الطريق

ثم تنهد بحسرة قائلاً :

- أعمل ايه .. مش ذنبى ان حال البلد زى الزفت .. مش ذنبى ان مفيش فرص شغل .. مش ذنبى انى من أول ما اتخرجت مش عارف أشتغل شغلانه عدله أكون بيها نفسى .. أنا مش واحد صايح أنا اتعلمت وخذت شهادة بس للأسف مش عارف أشتغل بالشهادة اللى طفحت الدم عشان أخذها

قال صديقه مواسياً :

- ان شاء الله تلاقى شغلانه أحسن يا "على"

نهض "على" وهتف بغضب قائلاً :

- امتى .. هلاقيها امتى .. بعد ما "سمر" تضيع من ايدي وتتجوز أول

واحد جاهز يخبط على باب بيتها .. ولا امتى .. قولى امتى هعيش زى

الناس وأبقى قادر أفتح بيت .. لما يبقى عندى 40 سنة!؟

التفت "على" ليغادر فى عصبية جذبه صديقه قائلاً :

- "على" استنى بس رايح فين

صاح "على" بحده :

- رايح فى ستين داهية سيبنى .. بقولك سيبنى

سار "على" بأقصى سرعة وهو لا يدرى الى أين تأخذه قدماه .. كان

يشعر ببركان ثائر بداخله .. بركان غاضب ناغم يريد أن يخرج ليرتاح ..

توقف بعدما تعب من المشى .. أخذ يلهث وهو ينظر حولها وجد مسجداً

صغيراً فدخل وتوضأ وصلى .. بكت عيناه قبل قلبه وهو يتضرع الى الله

أن يفرج كربه وأن يفتح له أبواب الرزق

استيقظت "أسماء" من نومها على اصوات الصراخ مرة أخرى .. جلست

فى فراشها للحظات ثم ما لبثت أن نهضت وخرجت لتجد النقاش وقد احتد

بين أبويها كالعادة .. قالت "أسماء" بضعف :

- حرام عليكموا بأه

هتفت والدتها بغضب :

- تعالى يا "أسماء" .. تعالى شوفى أبوكى المحترم عمل ايه

ثم نظرت اليها أمها قائله :

- أبوكى اتجوز يا "أسماء"

شهقت "أسماء" بقوة وهى تضع يديها على فمها وتنقل نظرها بين

والدها ووالدتها فى عدم تصديق .. فصاح والدها متهكماً متشفياً :

- أيوة اتجوزت .. وهجيبها تعيش معاى هنا فى البيت عشان أذك وأقهرك

صاحت زوجته بغضب :

- ومين قالك انى هعدك هنا .. أنا ماشية رايحة أعد فى بيت بابا ولو مطلقتنيش هرفع عليك قضية خلع وهبهلك فى المحاكم

صاحت "أسماء" باكية وهى تنظر الى تنظر الى والدتها برجاء :

- لا أرجوكى متقوليش كده عشان خاطرى متقوليش كده .. مش هقدر أتحمل يا ماما .. متسيبوش بعض

قالت أمها :

- احنا أصلا كان لازم ناخذ الخطوة دى من زمان

ثم نظرت الى زوجها بتحدى قائله :

- لو مطلقتنيش هرفع عليك قضية خلع فاهم

ثم توجهت الى غرفتها تحضر حقيبة ملابسها .. صاح زوجها بسخرية :

- اعلى ما فى خيلك اركبها مش هطلق وهسيبك كده لحد ما ترجعى تبوسى جذمتى عشان أفتحك باب الشقة

شعرت "أسماء" وكأن الأرض تميد بها .. نعم انها تميد بالفعل .. جلست

على أحد المقاعد ودفنت وجهها بين كفيها لتنفجر فى بكاء حار

نظر "آدم" حوله ليتأكد بأنه جمع كل أغراضه .. أخرج الحقيب أمام باب

البيت .. ثم دخل وطرق باب غرفة والدته .. فتحها ليجدها جالسه على

فراشها تبكى بحرقة .. اقترب منها وهو ينظر اليها بأسى .. جلس

بجوارها .. صمت قليلاً ثم قال دون أن ينظر اليها :

- أنا مضطر يا ماما .. مضطر عشان أقدر أقف على رجلي تانى

قالت له بصوتها الباكى :

- اعمل اللى يريحك يا "آدم"

التفت اليها قائلاً :

- ماما أنا فعلا مضطر أسافر .. بس متقلقيش هظبط وضعى هناك وبعدين

هاجى أذك

قالت أمه باكية :

- اعمل اللى فيه صالحك يا "آدم" ومتشلش همى يا ابنى

تنهد "آدم" بألم وهو يشعر بالتمزق بين مشاعره ورغباته وطموحاته ..

نهض متثاقلاً .. التفتت أمه تنظر اليه بأعين دامعه .. انحنى وقبل رأسها

ثم غادر سريعاً .. حمل حقائبه وألقى نظرة أخيرة على البيت ثم خرج
وأغلق الباب خلفه .. انخرطت والدته فى بكاء مرير وتعالت شهقات بكائها
وهى تضم احدى صورته الى صدرها

تعانق الصديقان طويلاً .. ثم نظر "زياد" الى "آدم" قائلاً :

- فكرت كويس

قال "آدم" :

- أيوة يا "زياد" فكرت كويس

ثم سأله قائلاً :

- هترجع شرم امتى ؟

قال "زياد" :

- بكرة ان شاء الله

تعانقا مرة أخرى وقال "زياد" قبل أن ينصرف :

- خلى بالك من نفسك يا "آدم"

ربت "آدم" على كتفه قائلاً :

- وانت كمان يا "زياد"

ركب "آدم" سيارته .. لكنه شعر بأنه يرغب فى توديع شخص ما قبل
ذهابه .. أوقف سيارته أمام الفيلا .. وهو ينظر اليها .. يأمل أن يرى
"آيات" .. يأمل أن يلقي عليها نظرة أخيرة .. يأمل أن يخبرها بأنه راحل
.. سيترك القاهرة ويرحل يبني نفسه فى مكان آخر .. يأمل أن يعتذر اليها
.. ويطلب صفحها .. يأمل أن يطمئن عليها .. وأن يرى ابتسامتها على
وجهها ليخفف شعوره بالذنب تجاهها .. وقف طويلاً دون أن يظهر لها أى
أثر .. أدار سيارته وانطلق فى طريقه الى العين الساخنة .. لتحقيق أحلامه
وظموحاته .. ليعود "آدم خطاب" كما كان .. ليبنى كل شئ من العدم ..
ليعود قوياً ذو سلطة ومال .. خسر "آيات" ويتألم لخسارتها .. لكنه
سيحاول تحقيق أحلامه .. ليخفف شعوره بالخسارة .. سيحارب "سراج"
و ابنه فى عقر دارهم .. سيذيقهم كأس الخسارة .. ويجعلهم يتجرعون
مرارة الندم .. نظر بحزم الى الطريق وسيارته تسير عليها بتصميم
واصرار

على احدى الطاولات فى النادى .. جلست الأربع فتيات .. كل منهما شاردة فى عالها الخاص ومشاكلها الخاصة وأحزانها الخاصة .. تنهدت "إيمان" فى أسى وهى تتذكر الإهانة التى تعرضت لها .. هذه المرة وقع الإهانة كان أقوى وأشد من سابقتها .. هذه المرة شعرت بمرارة الرفض فى حلقها وفى قلبها وفى روحها .. هذه المرة علمت وتأكدت بأن الفرح لن يطرق بابها أبداً فمثلاً لن تحب ولن تُحب .. لن تكون كصديقاتها لن تتزوج مثلهن .. ستعيش وحيدة لأن مثلاً لن يرغبها أحد .. فكرت بسخرية .. لماذا يترك رجل تلك الفتيات الرشيقات النحيلات ليتزوج ممن هى مثلها ؟ .. لن يحدث ذلك الا فى عالم أحلامها .. أحلامها التى يجب أن تفيق منها وتعلم جيداً أنها مجرد أحلام وأوهام .. يجب أن ترضى بواقعها وتفتح به حتى لا تتعب مرة أخرى .. حتى لا تُهان مرة أخرى .. من الآن هى من سترفض .. سترفض أن يراها أى رجل ليجلس واضعاً ساقاً فوق ساق ويقرر ان كانت تصلح له أم لا .. لن تضع نفسها فى هذا الموقف مرة أخرى .. لن تسمح لأحد بإهانتها مرة أخرى أو التقليل من شأنها .. سترفض قبل أن تُرفض .. تعلم أن فى ذلك هروب .. لكن المواجهة أصبحت مؤلمة .. مؤلمة للغاية

أمسكت "سمر" احدى الزهرات على الطاولة تتلمسها بيدها وقلبها يتساءل .. ترى أستعرف الحب يوماً أستطيع الوثوق فى رجل يوماً .. ترى أستجد من يملء ذلك الفراغ الذى تشعر به بداخلها .. أحياناً تشعر بالندم لرفضها "على" .. كانت بالفعل تشعر بإنجذاب تجاهه .. لكنها ليست بحاجة الى رجل يتقدم الى خطبتها وتصير زوجته .. بل هى بحاجة الى أب .. تشعر بأنها فى كنفه وتحت حمايته .. تشعر أمامه بأنها طفلة صغيرة وهو مسؤل عنها .. تشعر معه بأنها ابنته وليس فقط زوجته .. ترى أمن الممكن أن يكون "على" ذلك الرجل حقاً .. ؟ اتسرعت برفضها اياه ؟ .. أمن الممكن أن يكون "على" هو الأب والزوج الذى تحلم به ؟!

مسحت "أسماء" دمعة كانت أن تفلت من عينيها وهى تتذكر شجارات والديها .. ما هذا الكم من عدم الإحترام .. لماذا تشعر دائماً بان الاحترام مفقود بينهما .. تذكرت احدى الجمل التى قرأتها يوماً .. أن أساس الزواج الناجح هو الإحترام القائم بين الزوجين وإن فقد فهذا معناه أن حياة الزوجين معاً قد انتهت .. فكرت بمرارة فى سطوة الرجل والذى يحق له أن يتزوج واحدة واثنان وثلاث وأربع .. لماذا لا تكون للمرأة نفس السلطة

فيحق لها الزواج من أكثر من رجل .. لماذا يكون للرجل فقط حق قهر المرأة واذلالها بالزواج من أخرى .. لماذا التهديد دائماً بالزواج الثاني لإرهاب الزوجة الأولى .. شعرت بالإختناق وهي تضع نفسها مكان أمها .. ترى أمن الممكن أن تكون مكاتها يوماً ؟ .. أمن الممكن أن تتزوج رجلاً يلعب بورقة الزواج الآخر ليرهبها ويخضعها له .. لن تتحمل .. لن تحترمه .. لن تستطع أن تعيش مع رجل لا يستخدم معها سوى اسلوب الإرهاب لتحقيق ما يريد .. لن تسمح لرجل أبداً بأن يهينها ويضربها ويسبها ويجرحها ويفرض سيطرته عليها .. لن تكون تحت رحمة رجل لا تتمنى في الدنيا سوى رضاه .. ولا يتمنى هو سوى قهرها

نظرت "آيات" الى السماء الزرقاء .. شعرت بأنها تذكرها بشئ ما .. ظلت تحاول تذكره .. الى أن تذكرت .. لون عيناه .. نفضت رأسها بألم وكأنه تريد اخراج أى ذكرى له من رأسها .. تنهدت بقوة وهي تتذكر كيف أحبته وكيف وثقت به .. وكيف ظننته فارسها .. كيف خدعت فيه .. كيف رفعها الى فوق السحاب ليهوى بها فجأة الى الأرض .. لترطم بها .. لماذا لا توافق على الزواج من "أحمد" .. الذى ينتظر اشارة منها .. لماذا لا تفعل وتسكت قلبها عن التحدث من اليوم .. وتترك لعقلها حرية التصرف .. لماذا لا تأخذ بالمثل القائل .. خد اللى يحبك .. لماذا لا تفعل .. "أحمد" شاب جيد و من عائلة محترمة ومن نفس مستواها الاجتماعى .. ومستقبله مضمون .. ويحبها .. ماذا تريد غير ذلك؟! .. ماذا تريد أى فتاة غير ذلك؟! .. قالت لنفسها .. أفيقى يا "آيات" .. أفيقى من أحلام المراهقة التى مازالت تلازمك .. الفرسان لا يأتون الا فى أحلام الفتيات الصغيرات .. وعندما تكبر الفتاة تدرك أنهم لا وجود لهم .. وتبدأ فى انتظار الزوج الذى يستطيع توفير بيت وحياة كريمة لها .. هذه هى أحلام الفتيات فى سنك .. اكبرى يا "آيات" .. اكبرى .



توجه " آدم " الى القرية التي ستكون تحت تصرفه بعدما يستأجرها "شكري" .. تذكر زيارته لها وللقريتين المجاورتين لتلك القرية عندما جاء مع "سراج" و "عاصي" لإختيار القرية المناسبة .. تذكر بمرارة كيف كان متحمساً لبدء مشروعه وكيف سهر الليالي في التخطيط لهذا المشروع ودراسته من كل جانب .. تذكر بمرارة كيف أحب "شيرين" وكيف مات حبها داخل قلبه بعدما تحولت من فتاة بريئة الى فتاة سافرة .. ظل يشجب تصرفاتها كثيراً ويبين لها خطأها .. لكنها كانت مصره على الطريق الذي اختارته ولم تعبأ بخسارته .. ففسخ خطبتها بعدما تشوهت صورتها أمامه وحادت عن صورة فتاة أحلامه .. أخذ يفكر في أخطائه وفي علاقاته النسائية .. نعم هو الآن وصل الى درجة كبيرة من الإنحدار الأخلاقي

لكن فتاة أحلامه ظلت بنفس صورتها لم تتغير تلك الصورة ولم تتبدل .. شعر بأن "آيات" كان من الممكن أن تكون هي .. فلهذا استعداد فطري بأن تكون أفضل .. ويسهل تشكيلها وتوجيهها .. وتستجيب للنصيحة اذا ما لمست صدق صاحبها .. فكر بأسى كيف خسرها وكيف أضاعها من يده .. نظر الى أمواج البحر المتلاطمة .. وهو يحاول أن يتناسى حزنه وألمه وقهره .. أقتع نفسه بأنه سيجد غيرها .. يجد وليفة تشاطره حياته وتعيد اليه نفسه التي فقدها .. لكن عليه أولاً بناء ذاته واسترجاع أمجاده وتقليل أعداءه درساً لن ينسوه .. ألقى بكل عواطفه ومشاعره في البحر قبل أن يوليه ظهره ويتوجه الى هدفه بحزم واصرار وتصميم

كانت "آيات" نائمة في غرفتها .. متمدده على فراشها وعقلها سابح في

مكان آخر .. علمت من والدها بسفر "آدم" وبتركة للجامعة .. أخذت تُفكر
تُرى أين ذهب ؟ .. ولماذا ترك التدريس بالجامعة ؟ .. أخذت تلوم نفسها
بشدة على اهتمامها بأمره .. قالت لنفسها .. وما شأنك أنت يا "آيات" ان
بقي أم ذهب .. لم تعد أموره من شأنك ولا أمورك من شأنه .. نزلت
الستارة يا "آيات" وانتهت المسرحية السخيفة التي أعطاكى فيها دور
البطولة وأشركك فيها رغماً عنك .. انتهت المسرحية وصفق الجمهور
وربح "آدم" المركز الأول فى الغش والخداع .. وها أنت تنزلين من فوق
المنصة لتعودين الى مكانك المظلم الكئيب .. لا تحملين فى قلبك سوى
الحزن والألم .. لا يشعر بك مؤلف المسرحية وكاتبها وموزع أدوارها ..
لقد نسيتك ورماك من خلف ظهره وواصل حياته وخطه كما يريد .. لم
تكونى سوى بطلة من احدى بطلاته فى مسرحية من احدى مسرحياته ..
لا تظنى أنك كنت تعنين له شيئاً .. انت الغيبة يا "آيات" كان يجب أن
تشعري بذلك .. كان يجب ان ترشديك فطنتك لذلك .. أتذكرين يوم أن رأى
الشباب يضايقك ويزعجك .. لم يحرك ساكناً .. لأنك لا تعنين له شيئاً .. ولم
تعنين له شيئاً .. أفيق من وهمك .. فلا يستحق دموعك وأحزانك .. وفري
دموعك لمن يستحقها يا "آيات" ولا تبكي بعد اليوم

سمعت طرقات على باب غرفتها فنهضت فى تكاسل لتفتح الباب .. وجدت
"أسماء" واقفة بجوار والدها وكلاهما يبتسم فى سعادة .. نظرت اليها
"آيات" تحاول معرفة سبب تلك السعادة البادية عليهما .. صرخت
"أسماء" فجأة وهى تعانقها وتلف بها فى الغرفة :
- نجحنا يا "آيات" نجحنا

لم تصدق "آيات" نفسها .. نزلت "آيات" نفسها من حضن "أسماء"
ونظرت اليها غير مصدقة .. قالت "أسماء" بفرح وهى تقفز فى الهواء :
- نجحنا احنا الاتنين خلاص خلصنا مذاكرة وجامعة وامتحانات .. خلاص
لا امتحانات بعد اليوم
اقترب منها والدها وعانقها بشدة قائلاً :

- مبروك يا حبيبة قلبي

ابتسمت "آيات" وهى تنظر اليه .. لكن ابتسامتها لم تكن بتلك العذوبة
التي كانت تبدو بها من قبل .. شعر والدها وهو ينظر اليها بأن سعادتها
ناقصة .. ومازالت عيناها تشع حزناً ... حتى ابتسامتها كانت تشي بشئ
من الألم .. تنهد فى حسره ثم أخفى شعوره بالأسى بداخله وقال بمرح :
- لازم نسهر سهرة حلوة بالمناسبة دى .. يلا أسيبكوا مع بعض وبالليل

جهزوا نفسكم انتوا الاتنين

خرج "عبد العزيز" فجلست الفتاتان على الفراش .. اعطت "أسماء" احدى الأوراق لـ "آيات" قائله :

- خدى يا "يويو" دى درجاتنا فى جميع المواد نظرت "آيات" الى الورقة ثم تجمدت نظراتها وفتحت فمها فى دهشة وهى تنظر الى مادة ادارة الأعمال .. رفعت رأسها لتتنظر الى "أسماء" التى قالت لها :

- أنا برده استغربت انتى لا حلتي نظرى ولا دخلتى الشفوى وضاع منك درجات أد كده فى أعمال السنة .. كنت حطه ايدى على قلبي وأنا بشوف درجتك فى المادة دى عشان مكنتش عايزاكى تشيلها وتمتحنها تانى كنت عارفه انها هتكون صعبه عليكي ثم ابتسمت "أسماء" قائله :

- بس فرحت واستغرب فى نفس الوقت لما لقيتك جايه فيها .. امتياز نظرت "آيات" الى الورقة مرة أخرى .. لكن هذه المرة كانت تنظر اليها بغضب شديد .. أخذت تتسائل فى نفسها .. ما هذا .. تعويض .. تعويض عن تلك الأيام التى قضتها معه .. أم تعويض عن جرحها واهانتها وتحطيم قلبها .. أظن أنه بهذه الطريقة سيريح ضميره .. أظن أنها ستسامحه لمجرد أن أعطاها تقدير لا تستحقه .. ألقت الورقة بغضب ونهضت تفتح باب الشرفة بعصبية وفتت فى الشرفة وهى تقطب ما بين حاجبيها فى ضيق شديد .. وتلهث من فرط عصبيتها وتوترها .. اقتربت منها "أسماء" وقالت :

- سيبك من اللى فات يا "آيات" .. انسيه بخلوه ومره .. ولا كأنه حصل فى يوم من الأيام .. امسحى الأيام دى من ذاكرتك تماماً أومات "آيات" برأسها .. ونظرة تصميم فى عينيها .. فهذا ما قررته بالفعل

تلقى "آدم" اتصالاً من "شكرى" فى المساء يطمئن فيه على سير الأوضاع بالقريه .. فقال "آدم" بحماس :
- لا متقلقش .. كل حاجة تمام .. الإفتتاح هيكون فى أقرب وقت ان شاء الله .. الامتحانات خلصت وعايزين نلحق الموسم من أوله
قال "شكرى" مبتسماً :
- أنا واثق فيك يا دكتور

ابتسم "آدم" قائلاً :
- وأنا متشكر لثقتك الكبيرة دى
ثم قال بجديه :
- محتاج شوية حاجات ناقصة فى الكافيتيريا والبار .. لازم كل حاجة تبقى
جاهزة قبل الافتتاح .. هبعت الليسته بالفاكس .. وكمان الاعلانات اللي
عملناها عن الموظفين اللي طالبيهم ياريت توقفها لانى خلاص اخترت كل
الاستف اللي هيكون شغال فى القرية
قال "شكرى" فى سعادة :
- شكلك مبتضيعش وقت يا دكتور
قال "آدم" وفى عينيه نظرة تصميم :
- معنديش وقت عشان أضيعه .. لازم نبتدى فى أقرب وقت اعلانات القرية
.. لازم كل بيت فى مصر يعرف بقريتنا الجديدة
قال "شكرى" مفكراً :
- لسه مخترناش اسمها يا دكتور
قال "آدم" :
- لا خلاص اخترت اسمها .. اسمها هيكون .. "قرية جولدن بيتش"
أخذ "شكرى" يلوك الإسم فى فمه قائلاً :
- جولدن بيتش .. جولدنش بيتش .. مميمم اسم جميل وقوى
ابتسم "آدم" قائلاً :
- كنت واثق انه هيعجبك
قال "شكرى" مماًزحاً :
- أما نشوف "الفيروز" ولا "جولدن بيتش"
قال "آدم" بجديه بالغة :
- متقلقش قريب أوى هتتمحى قرية الفيروز من على خريطة القرى
السياحية فى العين السخنة
ضحك "شكرى" قائلاً :
- أنا واثق من كده يا دكتور .. منتظر الفاكس .. ولو احتجت حاجة كلمنى
.. سلام
أنهى "آدم" المكالمة وعكف مرة أخرى على مطالعة الأوراق التى أمامه
وهو يدرس كل خطوة جيداً .. ليضع خطة محكمة لنجاح قريته السياحية ..
قرية "جولدن بيتش"

استيقظت "أسماء" على صوت صراخ زوجة أبيها وهي تقول :
- انتى لسه نايمة لحد دلوقتى .. قومي شوفى المطبخ يضرب يقلب

قالت "أسماء" وهي تنظر اليها بحده :

- حد قالك انى الشغالة الفلبينية اللي بابا جبهالك

صرخت فيها قائله :

- احترمي نفسك يا بنت انتى وإلا والله العظيم أقول لباباكي

نظرت "أسماء" بسخرية لتلك المرأة التى تكبرها ببضع سنوات فقط

وقالت بتحدى :

- اعملى اللي انتى عايزه تعمليه

خرجت وهي تتوعدها قائله :

- ماشى والله لأقول لباباكي لما يبجى .. وشوفى بأه هيعمل فيكي ايه

تهدت "أسماء" بقوة وهي تغطى وجهها بوسادتها لتقلل من حدة

أصوات الموسيقى التى انبعثت من غرفة زوجة أبيها

ما كاد والدها يعود من عمله حتى استقبلته زوجته الجديدة شاكية باكية ..

فما كان منه الا أن صرخ على "أسماء" قائلاً :

- أمك اللي قالتك تعملى كده .. مش كده .. قالتك تهيني مراتى وتقرفيها

فى عيشتها عشان تطفسيها .. انا عارف تفكير أمك كويس .. لو كنتى

فاكرة انك كده هتطفسيها تبقى غلطانه انتى وأمك متلزمونيش ولو حد

هيمشى من البيت ده هيبقى انتى فاحترمي نفسك يا بنت انتى أحسنك

شعرت "أسماء" بالقهر والظلم وقالت :

- والله يا بابا معملتها حاجة وماما ماقلتليش حاجة

صاحت زوجة أبيها قائله :

- يعني أنا بتبلى عليكى يعني أما قليلة الأدب صحيح .. يعني أنا كدابه

قال والدها بصرامة :

- شوفى يا "أسماء" مراتى تعاملليها زى ما بتعاملى ماما بالظبط فاهمة

ولو اشتكتلى منك تانى هزعلك يا "أسماء"

دخلت "أسماء" غرفتها ونظرت زوجة أبيها تتابعها فى تشفى .. انفجرت

"أسماء" باكية وهي تشعر بأنها وصلت الى أعلى درجات التحميل .. ولن

تستطيع تحمل المزيد

توقفت سيارة فارهه أمام بناية أنيقة .. نزل السائق وفتح الباب لينزل من

السيارة رجل فى العقد السادس من العمر بدت عليه القوة والصلابة رغم سنوات عمره المتقدمة .. سار فى حزم الى أن وصل الى مكتبه بتلك الشركة الكبيرة .. دخل "سراج اليمانى" مكتبه لتلحق به مديرة مكتبه ومعها دفترها تذكره بمواعيده لهذا اليوم .. لكنه قاطعها قائلاً :

- فىن "عاصى" ؟

قبل أن تتمكن مديرة مكتبه من الرد .. سمع صوتاً من خلفها يقول :

- صباح الخير يا بابا

نظر "سراج" الى ابنه "عاصى" الشاب ذو الثلاثين من عمره والذي يتمتع بعينان تشعان مكرراً ودهاءاً تستطيع تبيينه من أول وهلة .. كانت تعابير وجهه القاسية تشكل مع ابتسامته الساخرة على ركن فمه صورة منفره تحذرك من الإقتراب من هذا الرجل .. نظر "عاصى" الى والده قائلاً بسخرية :

- كالعادة يا بابا أول ما بتحتاجنى بتلاقينى أدامك

أشار "سراج" الى مديرة مكتبه بالإنصراف .. بدت الجدية على ملامحه وهو يقول :

- انت عرفت ان القرية اللي جمب قرية الفيروز اتأجرت ؟

قال "عاصى" وهو يجلس :

- أيوة عرفت

سأل "سراج" باهتمام وهو يضيق عيناه :

- مين اللي أجرها ؟ .. ومين اللي مساكها دلوقتى ؟

قال "عاصى" وهو يمط شفثيه :

- لسه منعرفش

قال "سراج" بصرامة :

- عايز بكرة بالكثير تكون عندى كل المعلومات دى

قال "عاصى" بثقة :

- مدير القرية بتاعتنا هناك كلفته انه يشوفلنا الموضوع ده ومنتظر منه

تليفون بالتفاصيل كلها .. متقلقش يا بابا

ثم قال بسخرية :

- وبعدين مين الغبي ده اللي رايح يفتح قرية سياحية جمب قرية "سراج

اليمانى" .. دى لوحدها تخليك تعرف أد ايه هو شخص غبي وفاشل

ومحسبهاش كويس

ثم قال بثقه وغرور :

- متقلقش يا بابا العين السخنة مفيش فيها الا قرية الفيروز .. وهنفضل

أكبر و أشهر قرية فيها .. وأى حد هيفكر ينافسنا يبقى بينهى مشروعه
بدرى بدرى .. لأن مصيره هيبقى الخسارة .. محدش يقدر يقف أدام
"سراج اليمانى" و ابنه "عاصى"

أنت الخادمة لتنبئ "آيات" الجالسه فى حديقة الفيلا بزيارة آخر شخص
توقعت رؤيته فى منزلها فى تلك اللحظة .. "سمر" .. قامت "آيات"
تستقبل صديقتها بلهفة وفرحة ظهرت فى ابتسامتها وعينيها وان لم
تستطع التعبير عن ذلك بالكلام .. أجلستها "آيات" فى حجرة الصالون ..
كانت تنظر الى "سمر" بسعادة .. فلطالما أحبت صحبتها واستمتعت بها ..
كانت تشعر معها دائماً بالراحة ونفسها تهفو الى الحديث معها .. ابتسمت
"سمر" وهى تقول :

- ازيك يا "آيات" وحشتيني أوى

أومأت "آيات" برأسها مبتسمة .. فقالت "سمر" بحزن :

- لسه برده مبتتكلميش

اختلفت ابتسامه "آيات" ليحل محلها الحزن .. قالت "سمر" بحزم :

- "آيات" اللى انتى فيه ده بايدك انتى .. "آيات" لحد امتى هتفضلى كده

.. فوقى بأه من اللى انتى فيه

نظرت اليها "آيات" بعبوس فقالت "سمر" :

- "آيات" يا حبيبتي .. انتى عارفه أن ليه مصاحباكى رغم ان من الواضح

ان فى حاجات كتير مختلفة بينا

نظرت اليها "آيات" فأكملت "سمر" بجدية :

- لآنك بنت من جواكى عاملة زى قطعة القطن فى بياضها ونقاها ورقتها

ابتسمت "آيات" بوهن فأكملت "سمر" بحماس :

- "آيات" بجد انتى ممكن تكونى أحسن من كده بكتير .. بكتير أوى .. بجد

أنا بحبك أوى ولو مكنتش بحبك ما كنتش جيت لحد عندك عشان أقولك

الكلمتين دول .. أنا كنت حبه اتكلم معاكى بعيد عن "أسماء"

ظهرت علامات الدهشة على وجه "آيات" فقالت "سمر" :

- أسماء" كمان بنت كويسه من جواها بس عيبها انها عنيده شوية .. لكن

انتى يا "آيات" بحسك زى الورقة البيضاء اللى سهل الواحد يرسم عليها

اللى هو عايزه .. وفى نفس الوقت مش ساذجة ولا عبيطة .. لا انتى عاقلة

وبتقدرى تواجهى مشاكلك .. عارفه يا "آيات" الانسان القوى هو اللى

يقدر يواجه مشاكله ويحلها

صمتت قليلاً ثم قالت بتردد :

- فآكرة يوم ما جتيلي المستشفى واتكلمنا عن الحاجة اللي حصلت وكانت مضايقاكي

نظرت "آيات" الى الأرض بخجل وزفرت بضيق وهي تتذكر قلبة "آدم" التي تشعرها ذكراها بالضيقة النفور .. فأسرعت "سمر" قائلة :
- مش بقولك كده عشان أضايقك .. لا بقولك كده عشان افكرك أد ايه انتي كنتي شجاعه .. ولما عرفتى ان كده غلط واجهتية وقتها رغم مشاعرك القوية نحيتها ورغم خوفك من انه يزعل .. وفرحت أوى بجد بيكي وحسيت أد ايه انتي انسانه قوية

نظرت اليها "آيات" بحزن فقالت "سمر" بحنان :

- حبيبتي لازم تبندى صفحة جديدة مع نفسك ومع ربنا يا "آيات" .. انتي كويسة من جوه بس ده مش كفايه .. لازم يبقى من بره زى من جوه يا "آيات" .. مش اللي بيحب حد بيسمع كلامه ؟

أومأت "آيات" برأسها فقالت "سمر" :

- انتي بتحبي ربنا مش كده يا "آيات"

أومأت "آيات" برأسها مرة أخرى فقالت "سمر" بحماس :

- أهو ربنا بأه اللي انتي بتحبيه ده أمرك بشروط معينه للحجاب .. ولو شرط واحد مش موجود فيه يبقى الحجاب مش صحيح عارفه ايه هي الشروط دي ؟

نظرت اليها "آيات" بحيرة ثم هزت رأسها نفيماً .. فقالت "سمر" بهدوء :
- انه يكون ساتر للجسم .. انه يكون واسع فضفاض مش موضح تفاصيل الجسم .. انه ميكنش زينة فى نفسه يعني ميكنش ملفت .. أنه ميكنش شفاف .. انه ميكنش معطر ببرفيوم أو بخور .. انه ميكنش شبه لبس الرجال .. انه ميكنش شبه لبس الكافرات .. انه ميكنش لباس شهره يعني عشان الناس تشاور عليكى وانتى لابساه .. فهمتى يا "آيات" ؟
أومأت "آيات" برأسها وهي تزن فى عقلها ما قالته "سمر" .. فقالت لها "سمر" بحنان :

- والله يا "آيات" أنا صعبان عليا أوى أشوفك كده .. لانى حسه انك ممكن تكونى كويسة أوى أحسن منى كمان .. بجد والله مش بجاملك أنا فعلاً ساعات بحس انك أحسن منى وممكن تكونى أحسن .. بس انتي خدى خطوة وهتلاقى بعدها ربنا يبسرلك كل حاجة
بدا على "آيات" التفكير فقالت "سمر" بحماس :

- ايه رأيك يا "آيات" تيجي معايا المسجد اللي أنا بروح أحفظ فيه .. والله

المحفظة كويسة أوى وهتحببها تحسى انها أختك الكبيرة بجد كلامها جميل بتعد تتكلم معنا بعد ما تسمعنا تقرأ لنا اللي هنعفظه .. ايه رأيك تيجي تجربى وان شاء الله الصحبة هتعجبك أوى .. ها ايه رأيك ؟ فكرت "آيات" قليلاً ثم ابتسمت بوهن وهى تومئ برأسها .. فاتسعت ابتسامه "سمر" قائلاً :

- خلاص يبأه ان شاء الله معادنا زى النهاردة لانى لسه راجعه من عندها النهاردة .. احنا بنتقابل فى مسجد قريب من بيتي .. ان شاء الله هاجى أخدمك .. ولو عايزه تسألنى باباكي اسأليه وعرفيني هيقولك ايه .. وكمان لو عايزة "أسماء" تيجي معنا قوليلها واقنعها بطريقتك انتى أقرب لـ "أسماء" منى قولتى ايه؟ ..

ابتسمت "آيات" فربتت "سمر" على يدها قائله بإبتسامه :
- صدقيني هتبقى أحسن من دلوقتى مليون مرة .. بكرة تشوفى .. بس قولى يارب .. وخليكي معاه

دخلت والدة "إيمان" عليها الغرفة لتجد أشياء مبعثرة وعلى الكتب بعض الأطباق الفارغة وعلى الأرض كوب فارغ فهتفت بحده :
- ايه ده يا بت يا "إيمان" أوضتك مالها عامله زى الزريبة كده ؟ كانت "إيمان" جالسه فى منتصف فراشها تلعب فى هاتفها وفى يدها علبة باسكوييت تأكل منها .. نظرت إليها "إيمان" ثم عادت تلعب فى هاتفها دون أن ترد فصاحت والدتها بغضب :
- انتى يا بت مش بكلمك .. قومى يا معفنة نضفى أوضتك .. ريحتها تغم النفس

فتحت والدتها شباك الحجرة والتفتت اليها تقول فى غضب :
- قومى يا بت فزى نهضت "إيمان" متناقله وهى تقول بضيق :
- طيب حاضر هروقها قالت والدتها متهكمة :
- أكل ومرعه وقلة صنعة .. ما انتى لو بتتحركى وتهزى لحمك ده هتخسى بدل ما انتى عاملة زى البروته كده صاحت "إيمان" بحده :
- ماما خلاص مفيش داعى للكلام ده

قال والدتها بتهكم :

- بأه ده منظر دكتوراه .. ييجوا زمايلك فى المستشفى يشوفوا عفانتك
عشان محدش فيهم يبص فى خلقتك تانى
خرجت "إيمان" من الغرفة توجهت الى الحمام وأغلقت الباب عليها
لتهرب من كلام أمها اللاذع .. جلست على طرف البانيو وأخذت تبكى فى
صمت .. طرقت والدتها الباب بعنف وقالت :

- اخلصى عايزة أكمل غسيل

صاحت "إيمان" بحده :

- طيب طيب

مسحت عبراتها وقامت لتغسل وجهها .. نظرت فى المرآة لترى وجهها
المبلل وعينيها المنتفخة من السهر وكثيرة البكاء وتلك الهالات التى
ظهرت تحت عينيها فباتت واضحة على بشرتها ناصعة البياض .. شعرت
بالتقرز وهى تنظر الى وجهها أبعدت عينيها سريعاً حتى لا تستمر فى
النظر الى وجهها الذى أشعرها كم هى قبيحة وغير مرغوبه

لم تعد "أسماء" تتحمل معاملة زوجة أبيها .. ولا انحياز أبيها لزوجته
الجديدة .. لم تعد تتحمل العيش مع امرأة اختارها والدها لتحل محل أمها
ولتكون الخنجر الذى يطعن أمها فى أنوثتها وكرامتها .. وصلت الى ذروة
تحملها فقالت لوالدها بوهن :

- أنا عايزه أروح أعيش عند ماما يا بابا

لم يعترض والدها .. بل بدا وكأنه كان ينتظر طلبها .. ليخلو له البيت مع
زوجته الجديدة .. حزمت أمتعتها فى أسي .. وهى تبكى ألماً وقهراً .. رأت
نظرات الفرح والتشقى فى عيني زوجة أبيها .. لم تؤلمها تلك النظرات
بقدر ما ألمها غياب أبيها .. فلم يهتم حتى بوداعها أو بتوصيلها .. نزلت
"أسماء" لتتوجه الى بيت جدها حيث تعيش أمها .. مع جدها ومع خالتها
الأرملة وابنيها .. كان الوضع بالنسبة لها يشعرها بالضيق لوجود الشابين
معها فى نفس البيت .. لكنها أرغمت على ذلك فقد قررت ألا تعود أبداً الى
بيت أبيها .. كان البيت كبيراً مكوناً من طابقين .. حرصت "أسماء" على
عدم ازعاج أحد بعدما قالت لها والدتها بحزم :

- أنا مش عايزة مشاكل فاهمة .. ملناش حته تانيه نروح فيها .. خليكى

عاقله وراضى الكل يا اما هتلاقينى أنا وانتى اترميننا فى الشارع

امتثلت "أسماء" لأوامر أمها .. بل الأكثر أنها كانت تمضى معظم الوقت

فى غرفتها لئلا يتضايق أحداً من وجودها .. كانت تعيش فى البيت بملايس
البيت العادية وبشعرها المكشوف رغم وجود الشابين فى البيت .. كانت
تشعر بأنه لأمر شاق عليها أن تتحجب طيلة الوقت خاصة وأن أحد
الشابين فى الثانوية العامة وان لم يكن فى احدى دروسه فهو فى البيت
قابع فيه دائماً .. أما الشاب الآخر أنهى كليته ولا يعمل فيقضى معظم الليل
فى الخارج ومعظم النهار فى البيت نائماً .. لم يكن يضايقها سوى نظرات
هذ الشاب التى لم تكن تريحها بأى حال من الأحوال .. لذلك كانت تحاول
دائماً أن تتحاشى رؤيته أو المكوث معه فى مكان واحد

هتف "سراج" فى دهشة ممزوجة بالحيرة :

- ايه .. بتقول ايه يا "عاصى" ؟

قال "عاصى" بحده :

- زى ما بقولك يا بابا .. الكلب اللى اسمه "آدم" هو اللى ماسك القرية
الجديدة واللى مأجرها رجل أعمال شغال فى مجال السياحة بس أول مرة
يأجر قرية فى العين السخنة

قال "سراج" وقد عقد ما بين حاجبيه فى غضب :

- شكل اللى اسمه "آدم" ده مش ناوى يجيبها لبر

قال "عاصى" بغضب :

- ده أنا أولع فيه هو وأهله .. وزى ما رميته فى السجن هرجع أرميه تانى
اظاهر انه اشتاقله أوى ونفسه يرجلعه تانى

قال "سراج" بحزم :

- متعملش أى حاجة من غير ما أعرف يا "عاصى"

ثم قال وهو شارداً :

- استنى شوية لحد ما الأمور تتضح أكثر ونعرف هو ناوى على ايه
بالظبط

قال "عاصى" متهكماً :

- هيكون ناوى على ايه يعني يا بابا .. أكيد عايز يفرد نفسه ويقول أنا أهو
.. بس واللى خلقه ما هسيبه المرة دى الا لما أطلع روحه فى ايدى .. لانى
حذرتة انه يبعد عن طريقى لكن شكله غاوى مشاكل وبيعزها أد عليه

قال "سراج" بجدية :

- عايز اعرف دبة النملة فى القرية دى .. الناس اللى شغاله معاه مرتاباهم
مين دراعه اليمين البروجرام الترفيهي اللى عمله للسياح حتى أنواع

الأكل اللى فى المنىو .. عايز كل التفاصيل دى تكون عندى
قال "عاصى" بثقة وهو يرفع أحد حاجبيه :
- متخفش أنا ابتديت فعلاً أزرع ناس عنده فى القرية
ثم قال بغل :
- أما نشوف أنا ولا انت يا سى "آدم"

دخل "آدم" غرفته وهو يشعر بإنهاك بالغ .. ألقى بنفسه فوق فراشه
يريح ظهره المتعب .. طيلة الايام الماضية لم يذق غمضاً ولا راحة .. كان
يعمل بهمة ونشاط حتى شعر بالإنهاك .. أراد أن ينهى كل شئ فى أقرب
وقت ليستطيع افتتاح القرية وعلان بدء الحرب .. ساعده انهماكه فى
عمله على أن يتغلب ولو قليلاً على اشتياقه لـ "آيات" .. لكن عندما يعود
الى غرفته فى المساء لا يملك سوى التفكير فيها .. شعر برغبة قوية فى
مهابتها والإطمئنان عليها ومعرفة حالها وهل تحسنت واستطاعت الكلام
مرة أخرى أم لا .. تنهد بقوة وهو يتذكر ما فعله بها وصدمتها حينما
علمت بحقيقته فلم تتحمل مشاعرها الرقيقة الصادقة كل هذا الخداع
والأكاذيب .. تذكر آخر مرة رآها يوم إمتحان مادته .. كيف كانت عبراتها
تتساقط فوق وجنتيها ومشاعر الألم محفورة على وجهها .. لكم يريد الآن
أن يتحدث معها ويخفف عنها .. لكم أراد أن يخبرها بأنه لم يكن ليؤذيها
ولم يكن ينوى تركها .. أراد أن يخبرها بأن مشاعره تحركت تجاهها
بالفعل .. وأنه تنماها بالفعل وأنه رغب بأن تصير زوجته بالفعل .. لكن
ترى هل ستصدق .. بالطبع لن تصدقه .. كيف تصدق من كذب عليها
وخدعها .. كيف تثق به مرة أخرى .. شطح بخياله بعيداً .. عندما يتمكن
من هزيمة "سراج" وابنه .. ويحقق ما حلم به ويبنى نفسه مرة أخرى ..
ترى أتقبل به ان عاد اليها ؟ .. لم يحتج الى تفكير طويل فالإجابة جاهزة ..
بالطبع لا .. لم تهتم "آيات" لا بماله ولا بثرائه بل اهتمت بشخصه الذى
صدمت فيه .. فلا فائدة اذن إن ملك الدنيا ووضعها تحت أقدامها .. مادامت
نظرتها فيه قد تحطمت .. تذكر نفورها منه ونظرت عينيها الغاضبة
المعاتبية .. أصابه ذلك بالإحباط الشديد .. وقال فى نفسه .. انسى يا "آدم"
.. انسى .. لن تفكر فيك بعد الآن .. لن تحترمك بعد الآن .. لن تكون لك
بعد الآن .. شعر بالغيرة تتسرب الى قلبه وهو يتذكر وقوفها مع "أحمد"
الذى صرخ بأعلى صوته وسط الجامعة معلناً عن حبه لها وعن رغبته فى
الزواج منها .. ترى أما زال يعرض عليها الزواج .. أستوافق "آيات" على

الزواج منه .. أستصير فعلاً زوجة لغيره .. امتلاً قلبه بالألم وأخذ نفساً عميقاً عله يريح قلبه مما يعانيه .. تناول هاتفه واتصل بـ "زياد" يتحدث معه قليلاً ليصرف ذهنه عن التفكير في "آيات" .. فى وسط حوارهِ قال :

- آه صحيح كنت عايز أقولك حاجة مهمة
قال "زياد" :

- خير يا "آدم" ؟

قال "آدم" بحزم :

- أنا محتاجك معايا يا "زياد"

قال "زياد" باستغراب :

- محتاجنى معاك ازاي يعني ؟

قال "آدم" بجدية :

- بص يا "زياد" انا محتاج معايا حد ثق فيه .. ومش هلاقى أحسن منك ..

أنا عارف "سراج" و "عاصى" كويس جداً و عارف تفكيرهم .. زمانهم

دلوقتي عرفوا انى مدير القرية الجديدة وانى اخترت المكان ده بالذات

عشان أحاربهم.. وأكد هحاولوا يدمرونى بكل الطرق .. أنا محتاج معايا

حد أثق فيه لان كل اللى شغالين هنا لسه جداد ولسه محطوطين تحت

الاختبار .. عارف ان هيكون منهم جواسيس وناس هيقدر "عاصى" انه

يرشيها عشان يوصلها .. عشان كده لازم يكون فى حد جمبي لو أنا مش

موجود يكون هو عيني اللى بشوف بيها .. فاهمنى يا "زياد" ؟

قال "زياد" بعد تفكير :

- طيب وشغلى يا "آدم"

قال "آدم" على الفور :

- أصلاً القرية اللى انت ماسكها دلوقتي قرية تعبانة لشركة صغيرة .. يعني

الفرصة اللى أنا بعرضها عليك أحسن مليون مرة من ادارتك للقرية

التعبانه دى .. وكم ان المرتب هيكون زى ما انت عايز .. ده غير ان شغلك

هيكون معايا أنا يعني لا صاحب القرية يقرفك ولا يطلع عينك لانى أنا

المسؤل الأول والأخير عن كل حاجة فى القرية لانى شريك فيها بمجهودى

صمت "زياد" يفكر فى عرض "آدم" فحته "آدم" قائلاً :

- مش هقبل رفض يا "زياد" .. بجد محتاجك جمبي .. وفعلاً دى فرصة

بالنسبة لك .. وانت عارف كويس ان الشركة اللى انت شغال معاها شوية

وهتلاقيهم صفوا أعمالهم لأن الشركات الصغيرة اللى زى دى بتظهر

بسرعة وتختفى بسرعة .. قولت ايه ؟

قال "زياد" مفكراً :

- هي فعلاً فرصة زى ما بتقول .. خاصة فعلاً ان الشغل بأه زفت وانا فعلاً متوقع انهم هيقفلوا الشركة قريب
قال "آدم" لهفه :
- طب ايه ؟
قال "زياد" مبتمسماً :
- شكلى مش هعرف أخلص منك أبداً
ضحك "آدم" قائلاً :
- أهو هو ده الكلام .. بجد فرحتينى يا "زياد"
ثم قال :
- بص بأه يا باشا تلم عزالك كده وتجيلى فى أقرب وقت .. فى بلاوى متلتله لازم تخلص قبل الإفتتاح .. قشطة يا معلم
ضحك "زياد" قائلاً :
- قشطة يا دكتور

ما كادت "ساندى" تعلم بأن افتتاح القرية السياحية الخاصة بشركة والدها سيكون خلال شهر حتى قالت لوالدها بلهفه :
- بابا أنا عايزة أشتغل فى القرية السياحية الجديدة
قال والدها مستغرباً :
- بس احنا متفقين من زمان ان شغلك هيكون معايا فى الشركة يا "ساندى"
قالت بدلال :
- بس أنا حابه أشتغل فى القرية يا بابا .. عشان خاطرى يا بابا واقف ..
وبعدين أكيد هستفاد كثير جداً من خبرة دكتور "آدم"
فكر والدها قليلاً ثم قال :
- طيب يا "ساندى" زى ما تحبى
عانقته "ساندى" قائلاً بمرح :
- ميرسى يا بابا
ابتسمت فى سعادة وهى تشعر بالحماس واللهفة لى العمل فى القرية السياحية .. بجوار "آدم"




انلقت الطائرة بـ "عبد العزيز" و ابنته في طريقها الى المدينة .. فقد قرر "عبد العزيز" القيام بأداء العمرة قبل الذهاب الى رحلتها .. أراد أن يدعو الله عز وجل لابنته بالشفاء في هذه البقعة المباركة .. وظن أن في ذهابها خير كثير لها .. ود لو أدى معها مناسك الحج لولا أن الحج في أشهر معلومات كما قال رسول الله صلى الله عليه وسلم : " الْحَجُّ أَشْهُرٌ مَّعْلُومَاتٌ : شَوَّالٌ وَ ذُو الْقَعْدَةِ وَ ذُو الْحِجَّةِ لَيْسَ لِأَحَدٍ أَنْ يَحُجَّ فِيهَا سِوَاهُنَّ " .. أخذ "عبد العزيز" يردد .. لبيك اللهم لبيك .. دون كلل أو ملل .. نظرت اليه "آيات" وهي تستمع اليه وتشعر بشعور غريب .. ودت لو استطاعت النطق لتلبي مثله .. فعلت بقلبها .. حطت الطائرة ونزلت منها في المدينة وهي تنظر الى حولها برهبة .. توجهها الى الفندق لوضع حاجياتها .. ثم توجهها الى القبر النبي صلى الله عليه وسلم لزيارته والسلام عليه ثم توجهها الى مكة



أمرها والداها أن تقول بقلبها : " بسم الله، والصلاة والسلام على رسول الله، اللهم اغفر لي ذنوبي، وافتح لي أبواب رحمتك " .. فعلت مثلما قال والداها .. بمجرد دخولها المسجد الحرام شعرت بشعور لذيذ يغمرها وتنبهت كل حواسها .. نظرت حولها الى المعتمرين لتشعر بسكينة وصفاء

.. كانت تنظر حولها بدهشة ورهبة واستمتاع .. شعور غريب لم تألفه من قبل .. كان والدها مستمر في التلبية وهي كذلك .. حتى وصلا الى الكعبة فأمرها بقطع التلبية .. يا لله نظرت "آيات" الى الكعبة لتشعر وكأن الزمن توقف بها .. وكأن العالم كله ما هو إلا هذه البقعة المباركة ولا شئ سواها

خطأ!



لا تعرف "آيات" من أين أنتها تلك العبرات .. ولا لماذا أتت .. لكنها وجدتتها تتساقط فوق وجنتيها بغزارة .. لم يكن الحزن سبب بكاءها .. بل كان التأثير الشديد .. شعرت وكأنها أمام شيء عظيم .. شيء لا تستحق

الوقوف أمامه ولا التواجد حوله .. شعرت بنفسها صغيرة للغاية .. ضعيفة للغاية .. مليئة بالذنوب والخطايا .. توجهها الى الحجر الأسود .. فاضطبع "عبد العزيز" - أي كشف عن كتفه الأيمن- من حظهما كان الزحام قد خف نوعاً ما .. فاستطاعا الاقتراب منه .. أمرها والدها بلمسه بيدها اليمنى وتقبيله



تذكرت "آيات" كلام والدها قبل صعودهما الى الطائرة .. أخبرها أن في تقبيل الحجر الأسود اتباع سنة .. ليس المقصود بها التبرك أو غير ذلك ..

بل المقصود هو فعل شئ فعله النبي صلى الله عليه وسلم .. تذكرت والدها
حينما قال لها أن أمير المؤمنين عمر بن الخطاب رضي الله عنه قال حين
قَبِلَ الحجر الأسود : (إني أعلم أنك حجر لا تضر ولا تنفع ، ولولا أني
رأيت النبي صلى الله عليه وسلم يقبلك ما قبلتك) .. وقال لها ايضاً أن
النبي صلى الله عليه وسلم أنه قال " إن مسح الحجر الأسود والركن
اليماني يحطان الخطايا حطاً " .. شعرت بقشعريرة تسرى في جسدها
وهي تتلمس الحجر الأسود بيدها لم تتمالك نفسها مرة أخرى ففاضت
عينها بالبكاء .. أمرها والدها قائلاً :

- قولى "بسم الله، والله أكبر" عشان نبدأ الطواف
ففعلت "آيات" .. تذكرت كلام والدها أنهما سيطوفان 7 أشواط تبدأ من
الحجر الأسود وتنتهى عنده .. وخلال ذلك تستطيع قراءة القرآن أو الدعاء
أو الاستغفار ..

مسحت بيدها هي ووالدها على الركن اليماني بدون تقبيل وسمعت " عبد
العزیز " يقول :
- رَبَّنَا آتِنَا فِي الدُّنْيَا حَسَنَةً وَفِي الآخِرَةِ حَسَنَةً وَقِنَا عَذَابَ النَّارِ
ففعلت مثله

خطأ!



طافت "آيات" وهي تستغفر الله عز وجل وتبكي بحرقة .. مازالت تجهل أسباب بكائها لكن كل ما حولها يجعلها تبكي .. شعرت وكأن البكاء يطهرها .. ويزيل ما في قلبها وروحها من آثام .. استشعرت بأن الله عز وجل يراها الآن .. تفعل ما أمر به .. وتستغفره .. فإزدادت حدة بكائها .. كان "عبد العزيز" قد سبقها في أول ثلاث أشواط حيث الرمل - أي الاسراع في السير- أما باقى الأربع أشواط فمشى مشياً عادياً استطاع أن يكون قريباً منها فيستمع الى بكائها .. نظر اليها فى حنان وأكمل دعائه واستغفاره وتضرعه الى الله عز وجل لشفاء ابنته وحفظها من كل سوء .. بعدما انتهيا من الطواف قام "عبد العزيز" بتغطية كتفه الأيمن واتجها

الى مقام ابراهيم .. هو الحجر الذي كان إبراهيم عليه السلام يقف عليه عند بناء الكعبة .. وفي هذا الحجر أثر قدمي إبراهيم عليه السلام



تذكرت كلام والدها أن عمر رضي الله عنه قال : " وافقت ربي في ثلاث، فقلت: يا رسول الله لو اتخذنا من مقام إبراهيم مصلى فنزلت: " وَاتَّخِذُوا مِنْ مَّقَامِ إِبْرَاهِيمَ مُصَلًّى " ذكرها والدها قائلاً :

- " آيات " يا بنتى .. هتقرى فى الركعة الأولى بعد الفاتحة سورة (قُلْ يَا أَيُّهَا الْكَافِرُونَ) .. وفي الركعة الثانية بعد الفاتحة سورة (قُلْ هُوَ اللَّهُ أَحَدٌ) أومأت برأسها ايجاباً وبدأت فى الصلاة .. بعدما انتهت من صلاتها أخذها والدها حيث ماء زمزم .. ذلك الماء المبارك الذى قال عنه النبي صلى الله عليه وسلم : " ماء زمزم لما شرب له "

خطأ!



شربه " عبد العزيز " بنية أن يقيه من عطش يوم القيامة ثم التفت الى
" آيات " قائلاً :

- اشربيه يا بنتى بنية ان ربنا يشفيكي

شربت " آيات " ذلك الماء المبارك وهي تدعو الله عز وجل أن يشفيها
ويفرج كربها ويزيل همها وينير بصيرتها .. شعرت بألن للماء مذاق
خاص في فمها .. لم تشعر من قبل بان للماء طعماً .. لكن هذه شعرت وهي
تشرب من زمزم بأن له طعماً مميزاً تمننت أن يبقى في فمها للأبد .. بعد
ذلك عادا الى استيلاء الحجر الأسود مرة أخرى بالتقبيل .. ثم توجهتا الى
المسعى وعندما اقتربا من الصفا تلا " عبد العزيز " قول الله تعالى (إِنَّ
الصِّفَا وَالْمَرْوَةَ مِنْ شَعَائِرِ اللَّهِ فَمَنْ حَجَّ الْبَيْتَ أَوْ اعْتَمَرَ فَلَا جُنَاحَ عَلَيْهِ أَنْ
يَطُوفَ بِهِمَا وَمَنْ تَطَوَّعَ خَيْرًا فَإِنَّ اللَّهَ شَاكِرٌ عَلِيمٌ) وكذلك فعلت " آيات " ..



بعدها صعدا الى الصفا نظرا الى الكعبة واستقبلا القبلة وردد " عبد العزيز " ثلاث مرات ومعه " آيات " :

- الله أكبر ، الله أكبر ، الله أكبر ، لا إله إلا الله وحده لا شريك له ، له الملك ، وله الحمد ، وهو على كل شيء قدير ، لا إله إلا الله وحده ، أنجز وعده ، ونصر عبده ، وهزم الأحزاب وحده

بدأ هو و " آيات " فى السعى وقراءة القرآن والدعاء والاستغفار حتى وصلا الى المروة .. رددنا ثلاث مرات مع النظر الى الكعبة :

- الله أكبر ، الله أكبر ، الله أكبر ، لا إله إلا الله ، وحده لا شريك له ، له الملك ، وله الحمد ، وهو على كل شيء قدير ، لا إله إلا الله ، وحده ، أنجز وعده ، ونصر عبده ، وهزم الأحزاب وحده

ظلا يسعيان بين الصفا والمروة .. وبعدها أتما الشوط السابع عند المروة قام " عبد العزيز " بحلق جميع شعر رأسه .. وقص لـ " آيات " مقدار عقلة

الاصبع من شعرها .. بدل " عبد العزيز " ملابس الإحرام بملابسه العادية .. أما " آيات " فظلت في الملابس الفضفاضة التي ارتدتها لأداء العمرة .. مكثا في مكة بعض الوقت وحملا معهما الهدايا وماء زمزم .. وتوجها الى الكعبة وطافا بها طواف الوداع قبل أن يغادرا مكة .. شعرت آيات وهي تطوف طواف الوداع وكأنها تودع شخصاً عزيزاً .. شعرت بأنها ستفتقد هذا المكان بشدة .. شعرت براحة وسكينة لم تألفهما من قبل .. شعرت وكأن كل همومها وأحزانها قد زالت وكأنها ولدت في ذلك اليوم بقلب جديد .. روح جديدة .. شعرت بسعادة بداخلها لا تدري سببها .. شعرت بأنها ستعود الى هذا المكان مرة أخرى .. بل مرات .. فحينها لهذا المكان بدأ ولن ينطفئ أبداً

نظرت من شباك الطائرة الى المدينة قبل أن تغادرها .. نظرت لها من السماء بملء عينيها وكأنها تحفر صورتها في قلبها وعقلها .. أسندت رأسها الى المقعد وهي تتنهد في راحة .. وتتذكر ما فعلته في العمرة .. ربت والدها على يدها وابتسم لها قائلاً بحنان :
- مبسوطة يا " آيات " ؟

نظرت اليه وابتسمت .. اغرورقت عيناه وهو يراها لأول مرة منذ فترة تبسم بسعادة .. وتلمع عيناها بهجة .. شعر بأنه يرى " آيات " التي افتقدها والتي اشتاق الى رؤيا ابتسامتها العذبة .. اتسعت ابتسامته وهو ينظر اليها بحنان .. كان ينتظر منها ايماءة برأسها لتجيب بها عن سؤاله كما هي عاداتها .. لكن دموعه أخذت في التساقط على وجنتيه عندما ردت قائلة :
- الحمد لله



هبت نسيمات الصيف الحارة لتلفح وجه "آيات" الواقفة في شرفة غرفتها .. توجهت الى الداخل لتهرب من تلك الموجات الساخنة .. نزلت الى الأسفل حيث قابلت في طريقها دادة "حلمية" التي خرجت للتو من غرفة الطعام لتبتسم في وجهها قائلة :

- كويس هتفطروا مع بعض النهاردة
نظرت اليها "آيات" وعلى شفيتها ابتسامه عذبه .. سعدت بها "حلمية" التي حمدت الله على عودة "آيات" الى وضعها الطبيعي .. دخلت غرفة الطعام وهي تقول بمرح :

- خيانه بتفطر من غيري.....
قبلت رأس والدها الذي ضحك قائلاً :

- ومن امتي بأه واحنا بنفطر سوا .. أنا راجل بصحى بدرى عشان شغلى وحضرتك بتنامى للضهر
جلست "آيات" بجوار والدها على الطاولة وقالت :

- و أصحى بدرى أعمل ايه .. أنا لا شغله ولا مشغله تناولت قطعة خبز ثم نظرت الى والدها قائلة :

- لسه برده يا بابا رافض شغلى عندك فى الشركة
قال "عبد العزيز" وهو يرشف من فنجانة :

- مش مسأله رافض يا "آيات" .. أنا بس مش عايز أتعبك يا حبيبتي
وكم ان لما نبقى نطلع الرحلة اللى اتفقنا عليها
قالت "آيات" ضاحكة :

- آه الرحلة اللى بسمع عنها من قبل امتحاناتى ولسه مطلعنهاش لحد دلوقتى
ابتسم "عبد العزيز" قائلاً بأسف :

- أديكي شايفه من ساعة ما رجعنا من العمرة وأنا مطحون فى الشركة ..

بس زى ما وعدتك هفضى نفسى فى أقرب وقت ونطلع الرحلة اللى
وعدتك بيها

ابتسمت "آيات" قائله بتأثر :

- أحلى رحلة ممكن أفكر انى أطلعها فى يوم من الأيام هى العمرة .. بجد
كان شعور مختلف عمرى ما حسيت بيه قبل كده
ثم نظرت الى والدها قائله :

- ياريت يا بابا نطلعها مع بعض كل سنة

قال "عبد العزيز" وهو يربت على يدها :

- ان شاء الله يا "آيات" .. وكمان هنطلع نحج مع بعض السنة دى ان
شاء الله

قالت "آيات" بلهفه :

- بجد يا بابا .. متصورش فرحت أد ايه .. أنا من يوم ما رجعت من هناك
وأنا نفسى أروح هناك وأشوف الكعبة تانى

قال "عبد العزيز" وهو ينهض :

- ان شاء الله نروح تانى وتالت وعاشر كمان .. بس سببى دلوقتى بأه
عشان الشغل بيناديني

شيعة "آيات" بنظراتها قائله :

- ربنا معاك يا بابا

أنهت "آيات" فطارها وتوجهت الى غرفة المعيشة تشاهد التلفاز .. رن
هاتفها فردت مبتسمة :

- ألو .. أيوة يا "سمر"

قالت "سمر" :

- اسمها السلام عليكم يا بنتى

ضحكت "آيات" قائله :

- السلام عليكم يا "سمر"

- و عليكم السلام .. ها هتيجي النهاردة

قالت "آيات" :

- أيوة طبعاً بس له مرجعتش

- يلا قومى راجعى وبطلنى كسل

ثم قالت :

- أصلا اللى بتكلمك دى لسه مرجعتش

ضحكت "آيات" قائله :

- طيب قولى لنفسك الأول

قالت "سمر" :

- "أسماء" مش عايزه تيجي معانا برده

قالت "آيات" بحزن :

- "أسماء" مش عايزه تعمل أى حاجة .. من ساعة ما مامتها وباباها انفصلوا وراحت عاشت مع مامتها وهى اتغيرت أوى وبعدت عنى أوى حتى لما بكلمها كتير أوى مبتردش عليا ولما بترد ببقى حسه انها عايزه تنهى المكالمة

قالت "سمر" :

- بس اللى أعرفه انكوا صحاب أوى

قالت "آيات" بحسره :

- أيوة صحاب جداً .. بس هى "أسماء" كده لما حاجة تضايقها تلاقىها بعدت عن الكل وخذت جمب لوحدها حتى مبترضاش تحكى عن مشاكلها .. أنا فوجئت لما عرفت ان مامتها وباباها انفصلوا مع انها ماقالتلش انهم مكانوش متفقين مع بعض وده مز عنى منها أوى

قالت "سمر" :

- ربنا يفرج كربها

- أمين

ثم قالت "آيات" بعزم :

- بس أنا برده هفضل ألح عليها انها تيجي معايا المسجد حسه ان جو المسجد هيخليها تنسى مشاكلها وتندمج مع المجموعة اللى هناك .. وكمان لما تبتدى تحفظ قرآن أكيد هتحس براحه أكبر وربنا هيزيل همها

ثم قالت :

- أنا نفسى حسيت بكده وحسيت الصحبة الحلوة دى هونت عليا حاجات كتير

قالت "سمر" :

- خلاص حاولى تقنعها وانتى وشطارتك بأه .. هستناكى متتأخرش

- ماشى يا "سمر"

هاتفتم "آيات" .. "أسماء" التى ردت بهدوء قائله :

- ألو

قالت "آيات" بمرح :

- سمسم ازيك .. وحشائى رغم انك مش معبرانى خالص

قالت "أسماء" بحزن :

- معلىش يا "آيات" أنا مش فى المود اليومين دول

قاطعتها "أسماء" قائله :
- "آيات" بجد متضغطيش عليا .. سبيني وأنا شوية كدة وهتلقيني فوقت
ورجعت زى الأول .. معلش يا "آيات" بس فعلاً أنا مش فى المود خالص
قالت "آيات" بحزن :
- ربنا يريح قلبك يا "أسماء"
تنهدت "أسماء" قائله :
- آمين

دخل "زياد" مكتب "آدم" بالقرية السياحية وهو يصيح قائلاً :
- ايه يا "آدم" الطباخ التعبان اللي عينته ده ؟
رفع "آدم" رأسه ونظر اليه قائلاً :
- ماله .. عمل ايه ؟
قال "زياد" وهو يجلس :
- ده كبيره يا "آدم" يفتح كشك على ناصية شارع
قال "آدم" بضيق :
- أنا مليش فى موضوع الطبخ ده .. قدملى شهاداته والأماكن اللي اشتغل
فيها وكلها أماكن كويسة
قال "زياد" :
- وأكد اطرده منها
قال "آدم" وقد بدا عليه اتعب :
- أنا كان مطلوب منى أعمل انترفيو لكل عامل ولكل مسؤل فى القرية ..
فأكيد هتلاقى فى حاجات ممكن تغلت من تحت ايدي وعشان كده وجودك
معايا هيفرق كثير
قال "زياد" :
- متقلقش سيب موضوع الطباخ ده عليا
قبل أن ينصرف وقع بصره على البار الصغير فى زاوية المكتب فالتفت
الى "آدم" الذى عاد للاثهماك فى عمله وقال :
- انت بتشرب ولا ايه ؟
تابع "آدم" عيناه الواقعه على البار ثم نظر اليه قائلاً :
- لا ده عشان الأجانب والناس اللي بتشرب .. أكيد مش هقدمهم قهوة
وشاى

قال ذلك ثم التقط علبة السجائر وأخرج منها سيجاراً وبدأ فى اشعاله ..
قال "زياد" بعتاب :

- انت رجعت للسجاير تانى ولا ايه مش كنت بطلت يا ابنى
قال "آدم" بلا مبالاة وهو يعاود النظر الى حاسوبه :

- كبر

هز "زياد" رأسه وغادر المكتب .. رفع "آدم" رأسه لينظر الى البار
الذى أمر بوضعه داخل مكتبه .. شعر ببعض الإمتعاض لكنه تجاهل الأمر
وقال فى نفسه .. ضروريات عمل .. ثم عاد الى عمله مرة أخرى

ما كادت "سمر" تتوجه الى باب المستشفى لتغادرها حتى التقت بـ
"على" .. نظرت اليه بدهشة ثم انتبهت الى نظراتها فأخفضت بصرها
وأكملت طريقها الذى اعترضه "على" قائلاً :

- لو سمحتى يا دكتورة

اضطربت "سمر" بشدة ووقفت وهى تشعر بالتوتر الشديد .. بدا على
"على" التوتر مثلها .. قال بحرج :

- أنا بس كنت عايز أقول لحضرتك انى لقيت شغل تانى .. حالياً أنا بشتغل
محاسب فى شركة استيراد .. لسه متثبتش فيها بس على أمل انى انتبث
ان شاء الله أنا متفائل

بلغ اضطراب "سمر" درجاته القصوى .. كانت تنظر الى الأرض دون أن
يكون لديها الجرأة لتنظر اليه .. فأكمل بإرتباك :

- أنا بس كنت عايز أعرفك انى عندى طموح كبير ونفسى أحققه ..
ونفسى أكون أحسن .. يعنى أقصد

تلعثم بشدة ثم قال :

- أنا حابب آجى البيت انا ووالدى ووالدتى ويبقى الكلام براحتنا أكثر وأدام
والدتك

شعرت "سمر" بالكلمات تهرب منها لا تدري ما تقول .. ووقفت صامته
تنظر أرضاً وهى مرتبكة وعاقدة ما بين حاجبيها .. توتر "على" بشدة ثم
قال فجأة بعصبية وقد ظن بأنها ترفضه للمرة الثانية :

- أنا آسف .. انسى اللى قلته .. آسف انى ضايقتك

ثم التفت وغادر المكان وهو يشعر بالحرق والضيق .. ووقفت "سمر"
مكانها تحاول تنظيم ضربات قلبها التى أخذت تتسارع بقوة .. ثم ما لبثت
أن نزلت الدرج واستقلت التاكسى الى منزلها وهى تفكر فيما حدث منذ

قليل

كان "عبد العزيز" جالساً في حديقة الفيلا مع "آيات" يحتسيان الشاي ..
قالت "آيات" بحماس :

- عارف يا بابا .. المحفظة بتاعتي قالتلى ان مستوايا اتحسن كثير فى
القراءة وقالتلى انى لو ركزت فى التجويد ممكن آخذ اجازة فيها
ابتسم "عبد العزيز" بسعادة قائلاً :

- ما شاء الله .. يلا اتجدعنى وخديها وأنا أجبلك أحلى هدية تطلبها
قالت "آيات" مبتسمة :

- لا أنا لو هخدها يبقى هاخدها عشان ربنا وهستنى هديتى منه هو
قال "عبد العزيز" :

- ربنا يفتح عليكى يا بنتى

نظر "عبد العزيز" الى "آيات" قائلاً :

- انتى ليه معدتيش بتلبسى أى حاجة من الذهب بتاعك ؟

ارتبكت "آيات" وصمتت لا تدري ما تقول .. أتقول له ابنتك اسدجة يا أبى
وأعطت كل ذهبها لهذا الحقير الذى خانها وخدعها واستغلها .. أقول لك
أننى أعطيته كل ذهبى لكى يشتري لى شبكة كبيرة حتى يعلى فى نظرك
وتشعر بأنه يقدر ابنتك وتوافق على كتب الكتاب فى موعده .. أم اخبرك
بأننى كنت على استعداد أن أعطيه كل مالى ان كنت أملك مالاً باسمى ..
ماذا ستقول عنى إن علمت .. وفى نفس الوقت لا أستطيع أن أخفى عنك
ما حدث .. لن أستطيع أن أكذب عليك وأنا أنظر فى عينيك .. فتحت فمها
لتخبره بالحقيقة عندما قاطعها صوت هاتفه .. رد "عبد العزيز" على
محامي الشركة وما لبث ان امتقع وجهه وقال من فوره وسار بعيداً عن
مسامع "آيات" قائلاً :

- انت واثق من اللى بتقوله ده ؟

قال محاميه بحزن :

- أيوة للأسف يا "عبد العزيز" بيه خسرنا كل فلوسنا فى البورصة
ومطلوب منا تسديد مبالغ طائلة فى فترة صغيرة جدا
صاح "عبد العزيز" قائلاً :

- لا حول ولا قوة إلا بالله انا لله وانا اليه راجعون اللهم اجرنى فى
مصيبتى واخلف لى خيراً منها

ثم قال :

- انت فين دلوقتى ؟
- فى المكتب بشوف حل للمصيبة دى
قال " عبد العزيز " بلهفه :
- استنانى عندك أنا جايلك
توجه " عبد العزيز " حيث تجلس " آيات " وقال وقد بدا عليه التوتر
والإضطراب :
- انا رايح المكتب يا " آيات "
غادر دون أن يعطيها فرصة للرد وقفت وصاحت :
- فى حاجة يا بابا
التفت قائلاً :
- لا مفيش .. شغل مستعجل بس
غادر مسرعاً .. شعرت " آيات " باخوف يدب فى أوصالها .. خوف لا
تدرى سببه .. استعاذت بالله من الشيطان الرجيم وجلست وهى تحاول أن
تطمئن نفسها

وقفت " أسماء " فى المطبخ تحضر الشاى لنفسها .. كانت ترتدى بيجاما
واسعة وقد عقصت شعرها الى الخلف .. وقفت تدندن وهى تصب الماء
المغلى فى كوبها .. شعرت فجأة بشخص خلفها فالتفتت ثم انتفضت بعدما
رأت " هانى " ابن خالتها الأكبر يقف خلفها .. قالت بفرع :
- خضنتى
ابتسم لها قائلاً :
- بتعملى ايه ؟
قالت بإقتضاب وهى تشعر بالضيق من وقوفه بالقرب منها :
- شاى
وقف بجانبها ينظر اليها وهو يستند بذراعيه الى رخامة المطبخ .. أنهت
" أسماء " اعداد الشاى وتوجهت الى غرفتها بعدما التقت نظراتهما للحظه
فلم تعجبها طريقته فى النظر اليها ولا تلك الابتسامه الخبيثه على زاوية
فمه .. دخلت غرفتها وأغلقت الباب خلفها وجلست فى فراشها تحتسى
كوب الشاى الساخن

كان "آدم" فى تلك الفترة يعمل بهمة ونشاط لتكون القرية بأفضل حال عندما يحين موعد الإفتتاح .. كان يتوتر ويكثر من التدخين كلما اقترب الموعد .. كان يعقد آمالاً كبيرة على نجاح مشروعه السياحى .. وعلى النجاح فى منافسته مع "سراج" و "عاصى" .. ومثلما تمكن "عاصى" من زراعة جواسيسه داخل قرية "جولد بيتش" تمكن "آدم" أيضاً من زراع جواسيسه داخل قرية "الفيروز" .. ليس ذلك فحسب .. بل تمكن من خلال علاقاته السابقة بالعاملين فى شركة "سراج" بالقاهرة من الحصول على معلومات عنه وعن اعماله أولاً بأول ... وهذا ما ساعدته كثيراً بعدما استطاع تجنيد مديرة أعمال "سراج" والتي كانت على علاقة وطيدة بـ "آدم" أثناء عمله مع "سراج" فهو من وفر لها تلك الوظيفة .. وحين وقت رد الجميل .. او كما يسميانه هكذا وهو أبعد ما يكون عن "الجميل" .. كانت مديرة أعمال "سراج" تنقل أخباره الى "آدم" حيث استغل "آدم" تلك الأخبار بعدما علم بوجود مشكلات ثقه بين العملاء وبين قرية لفيروز بسبب بعض الإهمال وسوء الخدمة .. لذلك اهتم جيداً بشكل قريته وبالديكورات الداخلية وبتوفير خدمه من أفضل ما يكون .

أعد "آدم" جيداً للإحتفال الذى سيقام فى ليلة الإفتتاح .. حرص على توفير ألد أنواع الطعام وأعلى انواع الخمور .. واستخدم فى الخدمة فتيات يرتدين ملابس جريئة .. بدأ الإحتفال بحضور "شكرى" و "ساندى" وتم قص الشريط الأحمر وصفق الجميع فى سعادة .. كان "شكرى" مبهوراً بما استطاع "آدم" انجازه فى القرية فى تلك الفترة البسيطة .. علم جيداً بأنه لم يبخل عليها لا بوقته ولا بجهدده .. أعجبت "ساندى" أيضاً بالقرية وازدادت تمسكها بالعمل فى القرية مع "آدم" .. بدأت أصوات الموسيقى تسري فى مكان الحفل .. وبدأن الفتيات بخدمة الضيوف .. أشاد الجميع بجمال القرية وبجودة الطعام والشراب .. وأيضاً بروعة ديكورات الغرف وتقسيمها والأماكن المظلة عليها .. كانت الطبيعة حول القرية ساحرة تخطف الألباب .. اتسعت ابتسامه "آدم" وهو يراقب تعبيرات الإعجاب التى كانت فى عيون الحضور وأولهم وأهمهم .. "شكرى" .. تنهد فى راحة وقد شعر بأنه على بداية الطريق الصحيح

أثناء قياده "عاصى" سيارته رن هاتفه فرد قائلاً :

- أيوة يا بابا
- انت فين يا "عاصى" ؟ .. مش عارف ان عندنا عشاء عمل النهاردة
- لأ أنا عندى سهرة أهم
- سهرة ايه دى ؟
- افتتاح قرية "جولدن بيتش"
صمت "سراج" قليلاً ثم قال :
- انت ناوى تروح ؟
قال "عاصى" بتهكم :
- لازم طبعاً أروح الافتتاح .. ودى تيجي لازم نبارك لدكتور آدم
قال "سراج" :
- ماشى يا "عاصى" بس مش عايز مشاكل فى الافتتاح أكيد الصحافة
هتبقى هناك .. وابقى اتصل بيا طمنى على الأوضاع هنا
قال "عاصى" :
- متقلقش يا بابا أنا واخذ بالى كويس .. سلام
نظر "عاصى" الى الطريق أمامه وهو يفكر فى "آدم" و فى تحديه الذى
بدأه .. أخذت الأفكار الشيطانية تلعب برأسه وأخذ يفاضل بينها ليختار
الطريقة التى سيعاقب بها "آدم" على قوفه فى وجهه

جلس "عبد العزيز" يطالع الأوراق مع محاميه وهو يشعر بألم حاد فى
قلبه .. كانت المصيبة أكبر من قدرته على التفكير فى ايجاد مخرج .. قال
المحامى بأسف :
- أنا مش عارف ازاي ده حصل .. أسهنا انهارت مرة واحدة فى البرصة
والمستثمرين طالبين فلوسهم .. الخسارة كبيرة جداً ورأس المال الذى
هيتبقى بعد بيع الأسهم وحتى الأصول والأملك بالكاد هتغطى الخسارة
قل "عبد العزيز" وهو يفرك عضله صدره بقوة عله يخفف من الألم
الحارق فى صدره :
- طيب نستنى شوية منبعش دلوقتى
قال أحد مدراء شركته :
- الأسهم بتخسر يوم عن يوم .. لو استنينا أكثر من كده هنخسر أكثر
وأكثر أنا مش شايف حل غير فى البيع بالسعر الحالى
ظهرت علامات الألم على وجه "عبد العزيز" ثم ما لبث أن ضاق نفسه
ليطلق صيحة ألم قبل أن يسقط مغشياً عليه

أخذ "آدم" يحيي ضيوفه ويقدم لهم ما لذ وطاب .. ثم ما لبث أن جلس على إحدى الطاولات .. بدأت موسيقى هادئة تدور في المكان فاقتربت منه "ساندى" تتألق في فستان سهرتها عارى الكتفين وهي تقول بدلال :
- قوم ارقص معايا يا "آدم"

نظر إليها "آدم" وقد رفع إحدى حاجبيه بدهشة لاستخدامها اسمه بدون لقب فقالت ضاحكة وقد أدركت سبب دهشته :

- احنا بقينا زملاء عمل وصحاب كمان يعني دور الطالبه والدكتور ده خلاص معدش ينفع بينا

ابتسم "آدم" بسخريه ثم ما لبث أن تحولت ابتسامته الساخرة الى ابتسامة مجاملة .. نهض "آدم" معها وتوسطا القاعة وأمسك بيديها وهو يحيطها بذراعه الآخر وشرعا في الرقص سوياً .. نظرت "ساندى" حولها فالتقت عيناها بعيني فتاة أجنبية .. يبدو أنه لم يرق لها رقص "آدم" مع "ساندى" .. نظرت الى "ساندى" ببرود فبادلتها "ساندى" نظرة تحدى وسخرية .. تركت الفتاة كأسها على الطاولة واقتربت منهما ثم قالت بلهجة مصرية ركيكة :

- دكتور "آدم" مدير القرية ؟

أوماً "آدم" برأسه ايجاباً وضعت يديها على ذراعه وقد لعب الخمر برأسها فبدأت في التحدث بثقل :

- تعالى نرقص سوا

ترك "آدم" "ساندى" لمراقبة تلك السائحة الأجنبية والتي كانت على رأس فوج كبير نزل في القرية في تلك الليلة .. كان "آدم" يتحرك معها كالدمية .. جسد بلا روح .. لكنه كان يقول لنفسه أن ذلك من ضروريات العمل .. فلا يجب اغضاب مثل تلك العميلة .. وأن حربته مع "عاصي" اذا أراد حقاً أن يربحها فعليه أن يتمسك بكل فرصة ويستغلها جيداً .. التفت اليها قائلاً بابتسامته الساحرة :

- عجبك القرية ؟

قالت وهي ترمقة بنظراتها :

- جداً .. وصحابي كمان .. شكلنا هنطول هنا شوية

قال "آدم" وقد برقت عيناها :

- القرية تحت أمركوا

قالت بخبث :

- وصاحب القرية ؟

نظر اليها "آدم" وقد فهم ما ترمى اليه .. قالت بدلال :

- عايزة أشوف شاليه صاحب القرية .. ممكن ؟

ابتسم لها "آدم" وقبل أن يفتح فمه رأى أمامه الشخص الذى توقع رؤياه
والذى انتظره طيلة الحفل .. "عاصى" .. قال للفتاة الأجنبية دون أن يرفع
نظره عن "عاصى" :

- ثوانى ورجعلك

اقترب "آدم" من "عاصى" .. ابتسم "عاصى" بتسخرية بمجرد أن
وقعت عيناه على "آدم" وقال :

- أهلاً بدكتور "آدم" .. مفاجأة مش كدة

وقف "آدم" أمامه وهو ينظر اليه بغل وحقد قائلاً :

- لا مش مفاجأة .. أنا عارفك كويس .. عارف كويس ان الكلب لما ترميله
عضمة مش هيقدر يقاوم وهيجرى وراها

ظهرت علامات الغضب على وجه "عاصى" وقال :

- احترم نفسك يا "آدم"

قال "آدم" بحده :

- أنا محترم غصب عنك

اقتربت منه الفتاة الأجنبية ولفت ذراعه بذراعيها وهى تقول :

- مش يلا بأه

نظر "عاصى" بسخرية الى الفتاة فقال "آدم" بشماته مشيراً الى احدى
الطاولات التى حولها مجموعة كبيرة من الأجانب :

- أحب أقدملك "جيسى" وصحابها .. كانوا من نزلاء قرية الفيروز ..

بس بعد ما شافوا قريتنا النهاردة لغوا الحجز فى الفيروز وحجزوا فى

جولدن بيتش

شعر "عاصى" بغضب بالغ وهو ينظر الى الفتاة المتعلقة بذراع "آدم"
ثم نظر اليه قائلاً:

- مش هتقدر تقف قصادى يا "آدم" .. انسحب أحسنلك

قال "آدم" بتحدى صارخ :

- أعلى ما فى خيلك اركبه يا "عاصى" .. انا أدك انت وأبوك .. وهوقعكوا

زى ما وقعتونى

قال "عاصى" صارخاً وهو يدفع "آدم" فى كتفه :

- اجرى العب بعيد يله

لم يتحرك "آدم" بل تحرك حراسه .. ثلاث رجال مفتولى العضلات بمجرد

أن رؤا يد "عاصي" وهي تدفع "آدم" أسرعوا بالإحاطة بـ "عاصي" ..
نظر اليهم "عاصي" فى توتر فابتسم "آدم" ساخراً وهو يقول :
- أصلى كنت عارف انك جاى فجبتهم يرحبوا بيك
نظر اليه "عاصي" بغبط وقال :
- ليك يوم يا "آدم" كلامنا منتهاش .. هنكمله بعدين
قال "آدم" ضاحكاً :
- فى أى وقت تحبه .. انت تؤمر
رحل "عاصي" وعينا "آدم" تتابعه بإستمتاع .. قالت الفتاة وهي تقترب
منه :
- ياه ده انت جامد أوى
ابتسم "آدم" فقالت بلال وهي ترمقه بنظراتها الجريئة :
- مش هتوريني الشاليه بتاعك بأه
توجه "آدم" معها خارج الحفل الذى أوشك أن ينتهى .. أوقفه "زياد" وهو
يرمق الفتاة شزراً :
- رايح فين يا "آدم" ؟
قال "آدم" بهدوء :
- خلاص الحفلة خلصت .. شوف انت لو حد احتاج حاجه .. سلام
شعر "زياد" بالضيق من رحيل صديقه مع تلك الفتاة التى تكشف من
جسدها أكثر مما تستر

شعرت "أسماء" أثناء نومها بشئ حار يسبح فوق جسدها .. أحكمت
وضع الغطاء عليها .. وغطت فى النوم مرة أخرى .. أفاقت وهي تشعر
بضغط على أجزاء متفرقة من جسدها .. فتحت عينيها لترتطم بوجه
"هانى" .. هبت جالسه فى فراشها وهي تقول بفرع :
- انت بتعمل ايه فى أوضتى ؟
أشار "هانى" بإصبعه الى فمه قائلاً :
- ششششش وطى صوتك
أمسكت "أسماء" الغطاء الذى كشفه عنها وغطت به جسدها حتى ذقتها
وقالت وهي تنظر اليه برعب :
- اطلع بره بدل ما أصرخ وأفضحك
قال "هانى" بسخرية :
- هانى بسخرية :

- مش هتقدرى
قالت بتحدى وقد شعرت بأن حركتها قد شلت من الرعب :
- لأ أقدر
فجأة انطلقت تغادر الفراش وتتطلق فى اتجاه الباب فتحتة وتوجهت الى
غرفة خالتها تطرق الباب بعنف .. أسرع "هانى" بالخروج من غرفتها
والتوجه الى غرفته والنوم على فراشه متظاهراً بالنوم .. فتحت خالت
"أسماء" الباب وهى تقول :
- ايه فى ايه حد خبط على حد كده
قالت "أسماء" باكية :
- "هانى" كان فى أوضتى يا خالتو
قالت خالتها بإستنكار :
- "هانى" ابنى
استيقظ الجميع على تلك الأصوات المرتفعة اقتربت منها أمها قائله :
- ايه فى ايه يا "أسماء"
قالت "أسماء" باكية وهى تنظر الى أمها وخالتها :
- "هانى" كان فى أوضتى لقيته واقف جنب السرير وشال الغطا من عليا
وقالى اسكتى ومنتكلميش
صاحت خالتها قائله بغضب :
- ابنى متربي يا "أسماء" ايه اللي انتى بتقوليه ده
خرج "هانى" من غرفته وهو يتظاهر بالنعاس وقال :
- ايه فى ايه ايه الدوشة دى
قالت أم "أسماء" :
- انت كنت نايم
قال وهو يفرك عيناه :
- أيوة صحيت على صوتكوا
قالت "أسماء" باكية :
- كذاب ده له طالع من أوضتى دلوقتى
أمسكتها خالتها من ذراعها قائله :
- انت بنت مش متربية وقليلة الأدب وكمان بتتبلى على ابنى .. أفهم ايه
من التمثيلية اللي انتى عملاها دى .. بترسمى على الواد يعنى ولا ايه
انفجرت "أسماء" فى بكاء حار وهى تتمم :
- والله العظيم كان فى أوضتى
جذبتها أمها من ذراعها بعدما اعتذرت الى أختها وقالت لأسمها بصرامة :

- اعتذرى لخالتك
نظرت "أسماء" الى خالتها وقالت :
- آسفة يا خالتو .. بس والله
جذبتها أمها قبل أن تنهى كلامها وتوجهت الى غرفتها وأغلقت الباب ثم
قالت بقسوة :
- انت ايه معندكيش احساس .. بقولك مش عايزه مشاكل وانتى راحه
فاضحة نفسك فى نص الليل وتقولى الواد دخل أوضتك
قالت "أسماء" :
- يا ماما
قالت أمها بعنف :
- اخرسى .. ومش عايزه أسمع أى كلمة فى الموضوع ده .. ولو عملتى
مشكلة تانى يا "أسماء" يبقى ترجعى بيت أبوكى أحسن وتعدى مع
المحروسة بتاعته
قالت ذلك ثم خرجت وأغلقت الباب خلفها .. جلست "أسماء" خلف الباب
وهى تدفن وجهها بين قدميها وتبكي وشعور بالقهر والظلم يغمرها

دخلت "آيات" الى المستشفى بصحبة دادة "حليمة" وهى تهزول وتسأل
كل من تقابله بأعين دامعه :
- بابا فين .. "عبد العزيز حسان اليمانى"
أشارت لها احدى الممرضات أن تتوجه الى مكتب الاستقبال ففعلت وقالت
بصوت باكى :
- لو سمحتوا بابا جراه ايه قولولى بابا جراه ايه اسمع "عبد العزيز
حسان اليمانى"
قال لها الرجل :
- الاستاذ "عبد العزيز" فى العناية المركزة بالدور الرابع
هرولت "آيات" وهى تضع يدها على قلبها وتتمتم :
- يارب يارب
طمأنتها "حليمة" قائله :
- متقلقيش يا بنتى ان شاء الله خير
رات محامى والدها واقفاً فى الممر فجرت ليه قائله بلهفه :
- بابا فين يا عمو ؟
قال لها المحامى بأسى :

- فى العنافة المركرة فا ابنتى
انفجرت باكفة وهى تقول :
- افة اللى حصل .. افة اللى حصله ؟
قال المحامى وهو فتنهد بحسره :
- جاله فبر فسارة كبفرة افرضلها بعدها جتله أزمة وجبته على هنا على
طول والذكافره دخلوه العنافة المركرة
انهارت باكفة على أء المقاعد وهى تقول بصدق :
- مش مهم أى فاجه المهم انه ببقى كوفس .. أى فساره ممكن ففعود
لكن هو لأ .. مش ممكن اعوده أبدأ
ثم قالت من أعماق قلبها :
- فارب اشففه فارب .. فارب افضه فارب

فجولت الففاة فى الشالفه وهى ففظر الفه باعجاب .. فقال لها "آءم"
مبفسماً :

- عجبك ؟

قالت وهى ففأمل "آءم" باعجاب :

- جمفل فءاً .. وانف كمان جمفل فءاً

ابفسم "آءم" مجاملاً ثم ففظر الفه قائله بمرح :

- عنءك فرفئك ؟

قال "آءم" وهو ففهز رأسه نفياً :

- لا للأسف مش عنءى ففر شاف لىكى فى الشاف

ابفسمف وهى ففقرب منه بفلال قائله :

- لا فلاف مش مهم

أحاطفه بفءراعفها والففقف ففظراف عفونها الفرففة بعفونه الفى ففلاطم
ففظرافها كفلاطم الأمواف فى فبر هائف مظلم فائر لا ففرى كل موفه فى
أى وفهة فذهب ففرففم فى فرففها بموفة أخرى لفمفرف معها وفففى
بءاؤها وهفذا ففى ففصل إلى الشفط بهءوء وقد سكنت فائرفها واطمفنف
فرفها بوفولها أخفراً إلى بر الأمان .. لكن عفناه فففى عن الشفط فلم
فجده !



تؤمّلُ أنك يوماً تتوبُ !
وتشكو الذنوبَ .. وأنتَ الذنوبُ!

وفي كل يومٍ تبوءُ بذنبٍ
وعيبٍ يُضَافُ لباقي العيوبِ

تؤمّلُ أنك تحيا طويلاً
وشمسك مالت وحن الغروبُ !

أتهجرُ دربَ الهدى والصلاح
وترحل في مُهلكات الدروبِ !؟

تؤجّلُ توبكُ دوماً ! ولستَ
تؤجّلُ يوماً لقاءَ الذنوبِ !

قال "آدم" وهو يهز رأسه نفيّاً :
- لا للأسف مش عندي غير شاى ليكي في الشاى
ابتسمت وهي تقترب منه بدلال قائله :

- لا خلاص مش مهم

أحاطته بذراعيها والتقت نظرات عيونها الجريئة بعيونه التي تتلاطم
نظراتها كتلاطم الأمواج في بحر هائج مظلم حائر لا تدرى كل موجه في
أى وجهة تذهب فترتطم في طريقها بموجة أخرى لتمتزوج معها وتختفي
بداخلها وهكذا حتى تصل الى الشط بهدوء وقد سكنت ثائرتها واطمئنت
ذراتها بوصولها أخيراً الى بر الأمان .. لكن عيناه بحثت عن الشط فلم

تجده !

لكم غرق من قبل بين الأمواج العالية تأخذه وتجذبه الى حيث أرادت لكن هذه المرة شعور بالنفور لازمه .. أين هو من تلك الفتاة البريئة التي بكت أمامه عندما استشعرت أمام خالقها شعور عظيم بالذنب من أجل .. قبلة .. تذكر عبراتها التي انهمرت وهي تدفن وجهها بكفيها وتخبره بأنها ظلت طوال الليل تشعر بالذنب مما حدث بينهما .. خشت من خالقها من أجل تلك القبلة وهو ينتهك حرمة الله وتحت ناظريه .. أين تلك الفتاة التي معه الآن من الفتاة النقية التي أوقفت خاطبها عند حده وكرهت تجاوزاته التي تغضب ربها رغم شدة حبها له .. أين هي من تلك الفتاة العفيفة التي لم تقبل أن يمسه رجلاً آخر غير زوجها حتى ولو كان خطيبها .. نظر الى الفتاة التي معه يحاول أن يتناسى تلك الأفكار التي تراوده .. لكن كلما غاص في البحر أكثر .. كلما شعر بالنفور بداخله يكبر .. حتى .. نهض عنها .. نظرت اليه بغضب قائله :

- فى ايه ؟

عدل ملابسه وقال بهدوء :

- بعد اذنك اخرجى

نظرت الفتاة اليه بغضب شديد وهي تسب بلغتها .. انتظرها " آدم " خارج الشاليه حتى خرجت وهي ترمقه شزراً .. أغلق " آدم " باب الشاليه وأخذ يبحث السير وكأنه يهرب من شئ مخيف بشع .. أخذ يسير بغير هدى فى اتجاه البحر حتى علم بأن هذا الشئ المخيف البشع الذى أراد الهروب منه إنما بداخله هو .. لكن كيف السبيل الى الهرب .. كيف النجاة .. ركل الأرض بطرف حذائه بقوة فتناثرت حبات الرمل أمامه كموجة غاضبة .. جلس على الرمل ينظر الى البحر الثائر كثوران نفسه .. تنهد بقوة وهو يستشعر مدى الإنحدار الذى أوصله اليه عقله .. تذكر نظرات " آيات " يوم أن علمت بحقيقته .. نظرت اليه بتقرز ثم أغمضت عينها حتى تتجنب رؤياه .. وصمت أذنيها لتتجنب سماع صوته .. شعر الآن بما كانت تشعر به وقتها .. فها هو يشعر بالتقرز من نفسه ومن كل شئ فيه .. يشعر بأنه غارق فى مستنقع لزج كلما حاول النهوض جذبه اليه مرة أخرى حتى استسلم له تماماً .. ظل صوت يهتف بداخله .. انهض يا " آدم " .. انهض .. فصاح صوت آخر .. أمثلى يستطيع النهوض؟! .. لقد أغرقتى المستنقع بقذارته حتى لم أعد أشتم الا تلك العفونة المنبعثة منى .. لن أستطيع النهوض .. لكنى رغماً عنى .. لم أعد أطيق تلك الرائحة التي أصبحت تصيبنى بالعثيان .

جلست "آيات" تبكى وتتضرع الى الله أن ينفذ والدها وأن يحفظه لها ..
أخيراً خرج الطبيب المسؤل عن حالته فهبت واقفة وهي تنظر اليه بخوف
وقلق قائلة :

- بابا عامل ايه دلوقتي .. ممكن أشوفه

قال الطبيب وعلامات الإشفاق على وجهه :

- للأسف .. عضلات القلب ضعيفه وفي صمام تالف لازم عملية تبديل
صمام فى أقرب وقت

أجهشت "آيات" فى البكاء .. فأحاطتها "حليمة" الباكية بذراعيها .. فقال
الطبيب :

- المشكلة ان العملية أصلاً فيها خطورة عليه لان زى ما قولت عضلات
القلب ضعيفه .. بس فى نفس الوقت مينفعش نتنى على العملية أكثر من
كده

قالت "آيات" من بين شهقات بكائها :

- يعني نعمل ايه ؟

قال الطبيب :

- بصى يا بنتى الحالتين فيهم خطورة سواء انتظرنا أو عملنا العملية ..
بس رأى الشخصى اننا نعمل العلمية ونتوكل على الله
ثم قال :

- طبعا لازم موافقة حد من أهله

قالت "آيات" وهي تحاول أن تتمالك نفسها :

- طيب هرد عى حضرتك النهاردة وأقولك عنعمل ايه

قال الطبيب :

- معاكى لحد اسبوع لان مينفعش ندخله العلميات دلوقتي .. لما حالته
تستقر شويه

انصرف الطبيب وترك "آيات" غارقة فى حيرتها وخوفها

كانت "إيمان" فى طريقها الى عملها عندما استقلت الحافلة وجلست
بجواء الشباك تتطلع منه الى الطريق بعقل نصف منتبه .. كان الشرود
بادى عليها وهي مستغرقة فى التفكير .. لكنها انتبهت فجأة على ضحكات
عاليه من المقعد خلفها .. سمعت شاباً يقول لآخر :

- أهى واقفة مش لاقيه حته تعد فيها

فقال الآخر ضاحكاً :

- طبعاً يا ابني ودي يجبولها كرسى يكفيها ازاي دي
نظرت "إيمان" أمامها لتجد سيدة بدينة للغاية تقف وهي تتمسك بأحد
المقاعد وحبات العرق تتصبب فوق جبينها فتسمحها بمنديلها وتعود
لتمسك بيديها في المقعد .. سمعت الشاب يقول :
- حد يقولها تقف في النص بلاش تركزن أوى على الجنب اليمين أحسن
الأتوبيس يتقلب بينا
ضحك زميله وهو يقول :

- أو ممكن نجيب فيل ونحطه الجاه الثانية عشان يبقى في توازن
شعرت "إيمان" بالعبرات الساخنة تتساقط فوق وجهها وهي تستمع الى
سخرية الشابين من تلك المرأة .. لم تكن "إيمان" في مثل بدانتها لكنها
شعرت بكلمات الشابين كالخناجر تطعن فيها هي .. وكان كلماتها موجهة
اليها .. أقت نظرة شفقه على تلك السيدة وهي تحسبن على الشابين في
الخلف .. ألا يعلم مثل أولئك النهي الرباني في سورة الحجرات : " يَا أَيُّهَا
الَّذِينَ آمَنُوا لَا يَسْخَرْ قَوْمٌ مِنْ قَوْمٍ عَسَىٰ أَنْ يَكُونُوا خَيْرًا مِنْهُمْ وَلَا نِسَاءٌ
مِّنْ نِّسَاءٍ عَسَىٰ أَنْ يَكُنَّ خَيْرًا مِنْهُنَّ وَلَا تَلْمِزُوا أَنْفُسَكُمْ وَلَا تَنَابَزُوا بِالْأَلْقَابِ
بِئْسَ الْإِسْمُ الْفُسُوقُ بَعْدَ الْإِيمَانِ وَمَنْ لَّمْ يَتُبْ فَأُولَٰئِكَ هُمُ الظَّالِمُونَ " .. ألا
يعلم أولئك الجهال أن الله لا ينظر الى الأجساد لكنه ينظر الى عمل تلك
الأجساد : " إِنَّ اللَّهَ لَا يَنْظُرُ إِلَىٰ صُورِكُمْ وَأَمْوَالِكُمْ وَلَكِنْ يَنْظُرُ إِلَىٰ قُلُوبِكُمْ
وَأَعْمَالِكُمْ " .. ألا يعلمون أن الإنسان كرمه الله عز وجل وأسجد له
ملائكته وعلمه من علمه لذلك وجبت المحافظة على كرامته مصانه غير
مهانه .. ألا يعلم أولئك الذين يسخرون ويستهزأون من غيرهم من ذوى
البدانة أن أحياناً تكون تلك البدانة أمراً وراثياً لا دخل للإنسان فيها ..
كلون عينيه و لون شعره و لون بشرته و شكل أنفه و طوله وقصره ..
كيف تلوم انسان أن لون عينيه أسود؟! .. كيف تلومه لأنه قصير القامة
؟! .. كيف تلومه لأن أنفه كبير؟! .. هو لم يخلق نفسه بل الله خلق والله
جميل يحب الجمال لا يخلق شيئاً قبيحاً أبداً .. لكن لا يوجد انسان كامل
فالكمال لله وحده فقط .. ومقاييس الجمال والدمامه نسبيه من شخص
لآخر .. قد يفضل رجل الشقراوات وآخر يفضل السمراوات .. قد يفضل
رجل النحيلات ويفضل آخر البدينات .. لكن الغير مقبول هو الاستهزاء بما
لا يروق لك .. ودت إيمان" لو صرخت في وجوه الشابين قائله ألم تعلموا
بأن الله أعد عذاباً شديداً وهلاكاً ودماراً لكل من يستهزئ بغيره ويعيب
فيهم ويغتابهم "وَيَلِّ لِكُلِّ هُمَزَةٍ لُّمَزَةٌ " .. وفي أحد التفسيرات أن
"الويل" هو وادي في جهنم .. مسحت "إيمان" عبراتها المتساقطة وهي

تتذكر أن الله عادل لا يظلم أبداً ولذلك أعطى تلك المرأة من حسنات هادين الشابين ما الله به عليم .

جلس "آدم" فى مكتبه يطالع حاسوبه ويطمئن على سير العمل فى القرية .. شعر بالسعادة عندما وجد الإقبال على قريته فى يومها الأول بعد الإفتتاح فاق توقعاته .. شعر بأنه سيصل الى حلمه بأسرع مما ظن .. دخل "زياد" مكتبه وعلى وجهه علامات العبوس .. قال له "آدم" مبتسماً بسعادة :

- شوفت كام نزيل فى القرية ومن أول يوم
قل "زياد" واجماً :

- أيوة شوفت

نظر اليه "آدم" يرقب تعبيرات وجهه برهه ثم قال :
- ايه فى ايه يا "زياد" .. فى مشاكل ولا حاجه
نظر اليه "زياد" بعتاب قائلاً :

- البنت بتاعة امبارح باتت معاك يا آدم ؟

ظهر على "آدم" علامات التبرم .. فقال "زياد" بحده :

- شوفتكوا وانتوا رايعين جهة الشاليه بتاعك .. باتت عندك مش كده
نظر اليه "آدم" قائلاً ببرود :

- لأ .. ارتحت

نظر اليه "زياد" متفرساً ثم قال :

- يبقى كنت ناوى بس فى حاجة منعتك

زفر "آدم" بضيق فقال "زياد" :

- لو مكنتش صحبى وبحبك مكنتش اهتميت وكنت قولت يولع هو وهيا
وأنا مالى .. بس أنا خايف عليك يا "آدم"

قال "آدم" بضيق :

- متخافش يا "زياد" .. وبعدين متعكرش مزاجى أنا فرحان وسيبنى

أشوف شغلى بمزاج

قبل أن ينصرف "زياد" قال له "آدم" :

- آه "زياد" .. جهز نفسك النهاردة عشان افتتاح الملهى الليلى

قال له "زياد" بتبرم :

- مش عارف ايه لزمته

قال "آدم" بحزم :

- لازمته اننا بنجذب السياح وبنجذب المصريين اللى عايزين قرية

سياحية كاملة من كله .. خاصة بأه ان قرية الفيروز مفيهاش ملهى ليلي
ولا فيها مساحة ينفع يتعمل فيها ملهى ليلي ولا حتى فيها ترخيص ملهى
ليلي

قال "زياد" بضيق :

- يعني مينفعش نجذب الناس للقرية بتاعتنا غير الكباريه ده
قال "آدم" بحدده :

- ماسموش كباريه .. ده مكان فيه رقص وشرب مش أكثر من كده
متحسسنيش انى هفتح بيت دعارة فى القرية
قال "زياد" متبرماً :

- طيب انت حر .. مع انى مش مستريح للموضوع ده .. لان نوعية الناس
اللى هتدخله مش هتبقى مطبوطة
قال "آدم" بنفاد صبر :

- اللى مش مطبوط نظبطه أمال البودى جاردز اللى أنا جايبهم دول جايبهم
ليه
أوماً "زياد" رأسه بعدم اقتناع ثم غادر المكتب

توجهت "آيات" الى مكتب محامى والدها بالشركة .. لتسأله عن كيفية
سحب أموال من حساب والدها تكفى للعملية .. فليس لها حساب خاص بها
.. لكن المحامى صدمها بشدة عندما قال فى أسف :

- أنا عارف انها هتبقى صدمة بكيرة עליكي بس أنا مضطر أصارك ..
باباكي اتعرض لخسارة جامدة جداً .. الأرصدة كلها اتجمدت واتحجز على
الفيلا والشركة وكل حاجة باسم "عبد العزيز" بيه
نظرت اليه "آيات" مصدومة وقد فغرت فاها .. فأكمل قائلاً :

- لو ابتاعت الشركة بالفيلا بكل مشتلاتهم يدوبك هتقضى الدين اللى على
باباكي لأن حجم الاستثمارات كان كبير جداً وللأسف سهمننا نزل جامد فى
البورصة وكل يوم بينزل عن اليوم اللى قبله
غارت عيناها وقد عُقد لسانها من الصدمة لا تدري ما تقول .. فقال
المحامى :

- أنصحك يا آنسة "آيات" ببيع كل شئ عشان تسديد الديون .. لان كل ما
اتأخرتى فى البيع كل ما السهم نزل أكثر
قالت "آيات" بنظرات دامعة :

- يعني ايه ؟ .. مفيش فلوس يعمل العملية ؟
قال المحامى :

- ممكن تستأذنى حد من أصحاب الدين انك تتأخرى شوية فى السداد ..
بس لازم البيع فى أقرب وقت
قالت "آيات" بحيرة وأسى :
- ازاي يعني هبيع أنا مفيش حاجة باسمى كل حاجة باسم بابا
قال المحامى :
- أنا معايا توكيل منه .. بس محتاج آخذ موافقتك .. على فكرة قبل ما
والدك يدخل المستشفى كنا بنتكلم فى القطة دى وأكد كان هيوافق على
البيع
فكرت "آيات" بعقل مشتت .. لم تجد غير أن ستنمى الى كلام المحامى ..
فقلت بأعين دامعة :
- خلاص حضرتك اتصرف .. المهم يكون معايا فلوس فى اقرب وقت
عشان عملية بابا هتتكلم جامد
طمأنها المحامى قائلاً :
- متقلقيش ان شاء الله البيع ينتهى بسرعة .. بس ياريت تعملى حسابك
وتفضى الفيلا فى اليومين الجايين
شعرت "آيات" بالحزن والألم والقهر لكنها تمتت :
- انا لله وانا اليه راجعون اللهم اجرنى فى مصيبتى واخلف لى خيراً منها
خرجت "آيات" من مكتب المحامى لتركب سيارتها بألية .. وصلت الى
المستشفى وجلست فى الخارج بعدما رفض الطبيب السماح لها بالدخول
.. جلست على أحد المقاعد تنهمر العبرات من عينيها فى ألم ولسانها لا
يفتر عن الدعاء لوالدها والتضرع الى الله بشفاءه

خرج "آدم" من مكتبه ليجد "ساندى" تتشاجر مع احدى الموظفات .. ثم
أقبلت على "آدم" قائلة بحدة :
- "آدم" البنت دى تطرد فوراً
نظر "آدم" الى الفتاة الواقعة وقال :
- ملها عملت ايه ؟
قالت "ساندى" بتعالى :
- مش عايزه تسمع الكلام .. بقولها تدينى حسابات النزلاء عشان أراجعها
رفضت .. بنت قليلة الأدب لازم تطردها
أمر الفتاة بالإنصراف ثم نظر "آدم" بغضب الى "ساندى" قائلاً :
- أنا هنا اللي اقول مين يمشى ومين يستنى .. وبعدين انتى عايزة

الحسابات تراجعها ليه ؟ .. مالك انتى ومال الحسابات .. انتى وظيفتك هنا
فى العلاقات العامة وبس
قالت "ساندى" بحدده :
- دى قرية بابا وأعلم فيها اللى أنا عايزاه
قال "آدم" بصرامة :
- اسمعى يا "ساندى" .. هتلتزى بشغلك هنا وتبعدى عن طريق يبقى
تمام ومفيش مشاكل .. أما لو فضلتى تدخل فى اللى ميخصكيش يبقى
تروحي تشتغلى فى شركة باباكي اللى فى القاهرة احسن
نظرت اليه "ساندى" بغیظ وقالت بحدده :
- اظاهر ان انت نسيت ان دى قرية بابا وانت شغال عنده
قال "آدم" بعنف :
- لا دى قریتی زى ما هی قریته أنا شریکه مش شغال عنده
رمقها بنظرة غاضبه قبل أن يتركها وينصرف .. شعرت "ساندى"
بالغضب الشديد .. فما كانت تتوقع تلك المعاملة من "آدم" بعدما ساعدتها
على اقناع والدها بمشروعه

جلست "سمر" فى حجرة المعيشة أمام التلفاز .. سمعت صوت الباب
يفتح خلفها .. دخلت والدتها وألقت السلام ثم قالت :
- فى غدا ؟
قالت "سمر" :
- أيوة يا ماما .. أقوم أسخنهولك
قالت والدتها :
- لا خليكي
دخلت والدتها وبدلت ملابسها ثم توجهت الى المطبخ .. تبعتها "سمر"
ووقفت على باب المطبخ تنظر الى أمها .. فالتفتت اليها قائلة :
- أخبار شغلك ايه ؟
قالت "سمر" بخفوت :
- تمام الحمد لله
قالت والدتها :
- اتغديتي ؟
قالت "سمر" :
- أيوة من شوية

صمت كلاهما لفترة قبل أن تقطع "سمر" هذا الصمت قائلة :
- ماما .. هو انتى متعرفيش أى حاجة عن بابا ؟
وقع الطبق من يد والدتها ليتفتت الى أشلاء .. حاولت جمعه فأنجرت
يدها .. أسرعت "سمر" بمساعدة أمها قائلة :
- خليكي .. انا هشيئه
نظفت "سمر" مكان الطبق المكسور .. ثم نظرت الى والدتها التى علا
الغضب وجهها .. ثمق الت :
- ايدك كويسه
قالت أمها :
- أيوة
ثم التفتت اليها قائلة بحزم :
- مش عايزه أسمع سيرة الراجل ده تانى .. ماشى يا "سمر" ؟
قالت "سمر" بألم :
- أنا بس عايزه أعرف هو ليه مبيسألش عننا يني خلاص نسانا
صاحت امها قائلة :
- أيوة نسانا ومعدناش لازمينه .. ومش عايزه أسمع كلمه واحده عنه بعد
كده
خرجت أمها المطبخ مسرعة لتدخل غرفتها باكية .. تبكى شعوراً لا
يوصف بالظلم والقهر والخيانة .. ياه ما أقسى الخيانه .. عندما تأتى من
أقرب الأشخاص اليك .. تكون مرارتها كالعلقم .. وألمها كحد السكين .

جلست "آيات" مع "أسماء" فى الفيلا .. قالت "أسماء" تواسيها :
- معلش يا "آيات" .. ربنا يقوم عمو بالسلامة
قالت "آيات" باكية :
- أنا مش عايزه غير كده .. مش مهم أى حاجه خالص .. المهم هو يقوم
بالسلامة
ابتسمت "أسماء" مشجعة وقالت :
- ان شاء اليه هيقوم بالسلامة
ثم قالت :
- هتعملى ايه فى فلوس العمليه
قالت "آيات" بحزن وأسى :
- المحامى هيبيع كل حاجة ونستأذن حد من أصحاب الدين انى أجل الدفع

شويه .. مع انى خايغه أوى يرفضوا
قالت "أسماء" :

- وليه متطلبيش دهبك من دكترو "آدم" ؟
خفق قلب "آيات" بقوة وهى تستمع الى اسمه .. ثم ما لبثت أن شعرت
بالضيق .. فقالت "أسماء" بحزم :

- انت محتاجة كل مليم واكيد دهبك ده هيفك ضيقه .. اطلببهم منه
صمتت "آيات" قليلاً ثم قالت بحزن وتهكم :

- تفتكرى لو طلبتهم منه هيرجعهملى
قالت "أسماء" بحده :

- اطلببهم يا "آيات" .. ولو مرجعهمش يبقى منه لله بجد
تنهدت "آيات" وهى تشعر بالحيرة ثم قالت بوهن :

- مش قدامى فعلاً غير كده .. مع انى حسه انه مش هيرجعهملى
قالت "أسماء" مشجعة :

- كلميه دلوقتى

أمسكت "آيات" هاتفها وهى تشعر بالإضطراب والتوتر .. هل هى
ستسمع صوته بعد كل تلك المدة .. لولا ضيقتها ما فكرت فى الإتصال به
قط .. فأخر ما تريده هو سماع صوته .. أو التحدث معه .. اتصلت فلم
يجب أحد .. عاودت الإتصال فلم يجب .. تنهدت بحسرة وهى تقول بمرارة
:

- أكيد عارف انها أنا وانى هطلب دهبى .. قولتك مش هيرجعهم
قالت "أسماء" وهى تخرج هاتفها :

- طيب كلميه من رقمى

انتظرت "آيات" لبعض الوقت ثم حاولت الاتصال به من هاتف "أسماء"
ثم قالت :

- برده مبيردش

قالت "أسماء" وهى تنهض :

- ان شاء الله يرد .. أنا همشى بأه يا "آيات"
وقفت "آيات" قائله بوهن :

- طيب يا "أسماء" وأنا هطلع أنام شوية وآخد دش وبعدين هنزل أروح
المستشفى أبات مع باباها هناك يمكن يفوق ولا حاجه
عانقتها "أسماء" قائله :

- متخفيش ان شاء الله هيقول بالسلامة
تنهدت "آيات" بعمق قائله :

- يارب يا "أسماء" يارب

كانت "أسماء" جالسه فى فراشها شاردة تفكر فى حالها وفى وضعها هى و "آيات" .. أرهقها التفكير فقامت واغلقت المصباح وتمددت على فراشها تحاول النوم .. فجأة "هانى" يدخل عليها الغرفة ويغلق الباب خلفه .. صاحت قائله :

- امشى اطلع بره

أشار "هانى" الى فمه بإصبعه وقال مهدداً :

- لو صرختى زى المرة اللى فاتت هقول ان انتى اللى طلبتى آجيك أوضتك

فكرت "أسماء" فى كلامه .. لو فعل ذلك فستطرد من البيت شر طرده .. بكت قائله :

- حرام عليك سيبنى فى حالى بأه

اقترب من الفراش فأنزوت به أكثر .. قال وعينيه تلمعان فى ظلام الغرفة :
- أسيبك ايه هو أنا عبيط .. حد يشوف الحلاوة دى كلها أدامه ويسيبها شدت "أسماء" الغطاء عليها أكثر .. لكنه جذبه وأزاحه عنها .. بكت قائله :

- حرام عليه ده أنا بنت خالتك

قال بغلظة وهو يتلمسها بيده :

- مبلاش تمثيل بأه منتى لو واحدة محترمة مكنتيش أعدتى بلبس زى ده فى بيت فيه شابين

نظرت "أسماء" الى البنطلون والبادى نصف الكم الذى ترتديه وتتجول به فى البيت بلا حرج وهتفت باكية :

- أنا لابسه عادى مش وحش .. وانتوا ولاد خالتى مش حد غريب .. حرام عليك

لم يعبأ ببكائها ولا بتوسلاتها وقال بتهكم :

- متخفيش مش هأذيكي .. ده ان كنتى لسه سليمة أصلاً

شعرت بأنفاسه الكريهة المعبأة برائحة الدخان تلفح وجهها وتكتم أنفاسها وشهقات بكائها المرير .. شعرت بالعجز والضعف وقلة الحيلة وهى تعلم أن مصيرها ان لم تطيعه هو الطرد من البيت بفضيحة تشوه سمعتها أمام الجميع .. شعرت بالنفور والتقرز منه ومن نفسها بكت وتوسلت وترجته أن يتركها .. لكنه ظل يعبث بها الى ان اكتفى .. شعرت "أسماء" برغبة

شديدة فى التقىؤ فلم تستطع أن تكبح جماح نفسها فمدت رأسها بجوار
الفراش لتأتى بكل ما فى بطنها المضطرب .. قال "هانى" بتقرز وهو
يغادر :

- قرفتني الله يقرفك .. وبعدين زى ما وعدتك أهو صاغ سليم
خرج من غرفتها ليتركها باكية بحرقه وهى تكاد تختنق وتغض عينيها
بشدة عليها تتناسى تلك الدقائق الكريهة وما حدث فيها .. نهضت مسرعة
الى دولاب ملابسها وارتدت على عجلة وأخذت ما استطاعت أن تصل
اليه يدها من ملابسها وخرجت من البيت مسرعة دون أن تهتم بإيقاظ
والدتها وابلأغها برغبتها فى الرحيل

فى وسط الإحتفال فى الملهى الليلى الجديد الملحق بقرية جولدن بيتش ..
قال "زياد" لـ "آدم" بصوت مرتفع حتى يتمكن من سماعه :

- كله تمام ومفيش مشاكل

ابتسم "آدم" قائلاً :

- كويس وأنا شايف ان معظم اللي هنا مش نزلاء القرية .. بس أكيد

هيبقوا نزلاء من بكرة

قال "زياد" مبتسماً :

- شكلنا فعلاً هناكل السوق هنا

ضحك "آدم" قائلاً :

- طبعاً يا ابنى كلها فترة صغيرة وميبقاش فى العين السخنة الاقريتنا

ثم قال بحماس :

- ولسه كمان لما الاعلانات الجديدة تنزل فى التى فى

قال "زياد" وهو يحتسى كوب عصير :

- هتنزل امتى

قال "آدم" بحماس :

- من الاسبوع الجاى ان شاء الله ده غير العروض اللي عاملينها للعائلات

.. ان شاء الله فى أقل من شهر القرية هتكون كومبلت

ابتسم "زياد" قائلاً :

- أنا كمان متوقع كده

قال "آدم" وهو يبحث بيعينه عن "شكرى" :

- أمال فىن "شكرى"

قال "زياد" :

- كان هنا من شوية

أخرج "آدم" هاتفه ليتصل به .. لكنه تجمد فى مكانه وقد تعلق عيناه
بالهاتف .. ترك من كوب العصير الذى كان ممسكاً به وهو لا يبعد نظره
عن الهاتف .. انتبه "زياد" لنظراته فقال بقلق :
- ايه فى حاجه ؟

لم يجيبه "آدم" بل أسرع لمغادرة الملهى وابتعد عن الضوضاء .. أخذ
ينظر الى اسم "آيات" بهاتفه وقلبه يخفق شوقاً وخوفاً ورهبة .. ترى
لماذا اتصلت به .. أعاد الاتصال بها بلهفة وشوق .. خرجت "آيات" من
الحمام وهى تلف منشفتها حولها وأسرعت بالتقاط هاتفها الموضوع على
الفراش .. نظرت الى رقم "آدم" وهى تشعر بتوتر بالغ واضطرب تنفسها
.. جلست على فراشها وهى تحاول أن تنظم تنفسها لتستطيع التحدث معه
.. انتهى الرنين .. وعندما أوشكت على الاتصال به وجدته يتصل .. أخذت
نفساً عميقاً ثم ردت قائله :

- ألو

ابتسم "آدم" بسعادة عندما سرى صوتها الرقيق الى أذنه .. قال بلهفه :
- ازيك يا "آيات" ؟

حاولت "آيات" التحدث بصوت طبيعي واخفاء توترها واضطرابها ..
قالت بسرعة حتى لا تهرب الكلمات منها :

- الحمد لله .. أنا كنت بتصل عشان الأمانه بتاعتي اللى عند حضرتك
أخذت "آيات" تضم أصابع يدها بقوة الى قبضتها .. كانت تشعر بتوتر
بالغ .. يالله لكم تحتاج الى ذهبها الآن لتستطيع جمع المال من أجل العملية
الجراحية التى تتوقف عليها حياة والدها .. خافت بشدة .. خافت أن يرفض
اعادتهم اليها .. اضطرب تنفسها عندما صمت .. طال صمته .. تجمعت
العبرات فى عينيها وأخذت بالتساقط .. ماذا ينتظر .. أينتظر أن تترجاه أن
يعيدهم اليها .. ان كان هذا ما يريد فستفعل .. من أجل أن تنقذ والدها ..
همت بالتحدث لترجوه ان يعيدهم اليها فهى فى أمس الحاجة اليهم .. لكنه
سبقها قائلاً بصوته الرخيم :

- أكيد طبعاً

لم تصدق أذنها .. أكمل قائلاً :

- أنا مكنتش عارف أرجعهملك ازاي .. من يوم اللى حصل وأنا معرفتش
أشوفك وكمان خفت أديهم لوالدك عشان ميعرفش اللى انتى عملتية ..
خفت يأذيكى لما يعرف انك اديتيهملى

تهدت "آيات" براحة ومسحت عبراتها .. فأكمل "آدم" قائلاً :

- أنا دلوقتي فى العين السخنة مش فى القاهرة

قالت "آيات" بسرعة :

- مفيش مشكلة ابعتهملى مع أى شركة شحن

صمت "آدم" يفكر .. شعر بأنه لا يريد أن يضيع تلك الفرصة .. الفرصة

الوحيدة التى من الممكن أن يلتقى فيها بـ "آيات" .. والتحدث معها

ورؤيتها .. لم يكن أبداً ليضيع تلك الفرصة من يده .. قال "آدم" :

- أنا جاي بكرة القاهرة .. هديهلك بنفسى

قالت "آيات" وهى تشعر بالتوتر :

- مفيش داعى ابعتهم مع أى شركة أو حتى بالبريد السريع

قال "آدم" وهو يبحث عن حجه :

- لا طبعاً مينفعش ده ذهب افرضى الطرد ضاع أو حد سرقه

قالت "آيات" بإستسلام :

- طيب خلاص

قال "آدم" برقه :

- خلاص أنا جاي بكرة وأول ما أوصل القاهرة هكلمك

قالت بهدوء :

- ماشى .. مع السلامة

انتهت "آيات" المحادثة وهى تشعر وكأن حملاً ثقيلاً زيح عن صدرها ..

أسرعت بإرتداء ملابسها والذهاب الى المستشفى حيث والدها المريض

طرقت "أسماء" بيت والدها بلهفة .. الى أن فتحت لها زوجته وهى تقول

بغضب :

- ايه فى ايه يا بنت انتى فى حد يخبط على حد فى نص الليل ؟

قالت "أسماء" الباكية :

- فين بابا ؟

همت بالدخول فأوقفتها زوجته وهى تقول :

- عندك عندك فى ايه هو أنا سمحتك تدخلى

صاحت "أسماء" قائله :

- بقولك فين بابا

ثم نظرت الى الداخل وهى تهتف :

- بابا .. بابا .. بابا

قالت زوجته بحده :

- باباكي مش موجود .. باباكي مسافر .. وكفاية قلة أدب بأه هتصحى

الجيران .. اتفضلنى امشى من هنا

أغلقت الباب فى وجهها .. فظلت "أسماء" تطرق الباب دون أن تجيبها ..

أخرجت "أسماء" الهاتف لتتصل بوالدها لكنها وجدت الخط مشغول ..

كان والدها فى تلك اللحظة يتحدث مع زوجته التى اتصلت به قائلة :

- شوفت بنتك عملت ايه .. جايه تفضحنى وسط العمارة وعماله تزرق

وتشتم وآخر سفالة وقلة أدب

قال زوجها بحده :

- هى فين

قالت زوجته بصوت باكى :

- خفت منها افلت الباب عليا .. شكل أمها هى اللى قايلها تعمل كده

قولتلك مش هتسيبنا فى حالنا .. طلقها بأه خلينا نخلص من القرف ده

صاح زوجها بغضب :

- مش هطلقها وأعلى ما فى خيلها تركبه .. اقفلى دلوقتى

جلست "أسماء" على السلم تتصل بوالدها كل دقيقة الى أن وجدته يتصل

بها .. قالت بلهفه :

- بابا أنا

قاطعها والدها وهو يصرخ بغضب :

- انتى ازاي يا بنت انتى تروح لمراتى وأنا مش موجود وتزعيلها كده

قالت "أسماء" باكية :

- أنا مزعقتش أنا كنت بنادى عليك كنت فاكراك جوه

هتف والدها بعنف :

- روى قولى لأمك الكلام ده ميحيش معايا .. ومش هطلق وخليها كده

زى الكلبه

قالت "أسماء" وقد تعالت شهقات بكائها :

- مش ماما اللى بعناتى والله .. أنا اللى جايه لوحدى

قال واحدة بغلظة :

- طيب ارجعى لأمك تانى واياك أشوفك بتهوبى نحية مراتى تانى

لم يعطيها فرصة للرد أنهى المكالمة وأغلق الهاتف .. أخذت أسماء" تيكى

الى أن أجهدا البكاء .. نهضت بتثاقل حاملة حقيبتها .. سارت فى الشارع

الخالى المظلم وهى لا تدرى ما تفعله .. فها هى صديقتها "آيات" تمر

بظروف صعبة هى الأخرى .. وعلى وشك الطرد من بيتها بعد أيام ..

ووالدها ملقى فى المستشفى لا تستطيع أن تدبر تكلفة علاجه .. لمن تذهب .. بمن تلجأ .. سارت لا تعرف وجهتها .. الى أن قابلها أحد الرجال الذى نظر اليها بطريقتها أشعرتها بالخوف الشديد و بالنفور .. تذكرت نظرات "هاتى" الخبيثة وأنفاسه الكريهة .. وقفت بجوار أحد الأعمدة لتأتى بما فى معدتها من جديد .. تساقطت العبرات فوق وجهها وهى تشعر بأن ليس أمامها سوى العودة الى بيت جدها .. إما بيت جدها .. وإما الشارع .. حيث الكلاب المسعورة فى كل مكان !

فى اليوم التالى استعد "آدم" للسفر وأخبر "زياد" بضرورة توجهه الى القاهرة لإعادة مصوغات "آيات" اليها ثم قال بلهفه :
- ادعيلي يا "زياد" ان المقابلة دى تكن نتيجتها حلوة
قال "زياد" :

- بصراحة مش متفائل بس يارب
قال "آدم" وهو يعدل من ربطة عنقه :
- تفكر دى حجة عشان تكلمنى .. يعنى هى فعلاً لو عايزه الذهب بتاعها كانت خلت باباها يكلمنى ويطلبه .. مش هى تكلمنى بنفسها مش كده ؟
قالت "زياد" مفكراً :

- يمكن خافت تقول لباباها انها ادتلك ذهبها
قال "آدم" :

- تفكر يا "زياد" ممكن نرجع أنا وهى لبعض تانى ؟
قال "زياد" بحزن :

- مش عايز أحببك بس أنا شايف ان ده مستحيل
قال "آدم" وهو ينظر الى "زياد" :

- بس هى بتحبنى أوى يا "زياد" .. انت متعرفش "آيات" بتحبنى ازاي .. ولا أد ايه هى طيبة وحنينة

صمت ولاحت ابتسامه على شفثيه وهو يقول :

- وحشتنى أوى .. مش مصدق انى أخيراً هشوفها

أسرع "آدم" متوجهاً الى سيارته التى انطلق بها فى طريقه الى القاهرة .. بمجرد وصوله اتصل بـ "آيات" قائلاً :

- أنا وصلت يا "آيات" تحبى نتقابل فين ؟

قالت "آيات" :

- تعالى الفيلا
صمت "آدم" قليلاً ثم قال :
- مينفعش نتقابل فى مكان بره
قالت "آيات" بحزم شديد :
- لأ
ثم قالت :
- لما توصل الفيلا رنلى
أنهت "آيات" المكالمة وهى تنظر الى الشرفة فى انتظاره .. بعد ما يقرب
من النصف ساعة رأت سيارته تقترب من الفيلا .. شعرت بقلبها يخفق
بشده داخل صدرها .. أسعرت الى الداخل حتى تتجنب رؤياه ثم نادى دادة
"حليمة" وقالت لها :
- وصل يا دادة
همت "حليمة" بالخروج فأسرعت "آيات" قائلة :
- دادة زى ما فهمتك
قالت "حليمة" :
- متقلقيش يا بنتى
توقف "آدم" أمام بوابة الفيلا وهو ينظر اليها .. نزل من سيارته وهو
يتصل بـ "آيات" التى لم تجيب .. رأى "حليمة" مقبلة تجاهه .. توقفت
أمامه قائلة :
- الانسة "آيات" بعتنى آخذ الأمانة بتاعتها
نظر "آدم" اليها بضيق ثم القى نظرة على الفيلا وقال :
- طيب هى مينفعش تخرج تاخدها بنفسها
قالت "حليمة" بحزم :
- لا مش هينفع
شعر "آدم" بالضيق الشديد فقد كان يمنى نفسه برؤياها وبالحديث معها
.. توجه الى سيارته وأحضر العلبه وأعطاهها الى "حليمة" وما كادت
لتنلقت لتغادر حتى أوقفها قائلاً :
- "آيات" كويسة ؟
نظرت اليه "حليمة" بحزم وقالت بترفع :
- أوية كويس .. كويسة أوى
دخلت "حليمة" الى الفيلا فهبت "آيات" واقفة وقالت بلهفه :
- ها يا دادة ادهالك ؟
أعطتها "حليمة" العلبه فتحتها "آيات" بلهفه تتمم على محتوياتها ثم

ابتسمت قائله :
- الحمد لله كل حاجة موجودة
قالت "حليمة" بتردد :
- سألتني عليكي
نظرت اليها "آيات" قائله :
- وقولتيله ايه ؟
قالت "حليمة" :
- قولتيله زى ما نبهتى عليا .. انك كويسة ومجبتلوش سيرة عن أى حاجة
خالص
أومات "آيات" برأسها .. قالت "حليمة" بطيبة :
- ليه ما قولتيلوش انك فى ضيقة يا بنتى ؟
نظرت اليها "آيات" بحده قائله بمرارة :
- أقوله عشان يشمت فيا .. ده واحد بيكرهنى أنا وبابا يا دادة .. لو عرف
اللى حصلنا هيشمت فينا
نهضت تنظر من باب الشرفة النصف مفتوح .. رآته مازال واقفاً أمام
سيارته ينظر فى اتجاه الفيلا .. رجعت الى الخلف بسرعة حتى لا يراها ..
بعد عدة دقائق سمعت صوت السيارة .. نظرت من جديد لتراه يرحل
ويبتعد من أمام ناظريها .. تابعته بعينيها الحزينتين الى أن اختفى من
أمامها .. ثم توجهت الى خارج الفيلا وقادت سيارتها الى حيث محل الذهب
ليبيع كل ما تملكه من هذه الدنيا من أجل انقاذ والدها

انطلق "آدم" بسيارته فى شوارع القاهرة وهو يشعر بالحزن والأسى ..
ألهذه الدرجة تكره رؤيته .. لماذا لم تدعه يراها ويتحدث اليها .. لماذا لا
تسمع منه مثلما سمعت عنه .. شعر بالضيق الشديد لأنه شعر بأنه فقد كل
الخيوط التى توصله اليها .. توجه "آدم" الى بيت والدته .. تلك المرأة
الطبية التى تحملت منه الكثير والتى يشعر بأنه ظلمها بشدة .. نظر الى
البيت بشوق .. صعد الدرجات الى أن وصل الى الباب المكسور .. شعر
بالدهشة وهو يفتح الباب الذى لم يكن مغلقاً .. رأى علامات الكسر على
الباب ومحتويات البيت المبعثرة .. أخذ ينادى على والدته بفزع :
- ماما .. ماما

لم يجدها .. لا اثر لها .. هاله الدماء التى كانت تغطى أرض غرفة والدته
.. وأرض الصاله .. كاد أن شجن .. أسرع بطرق باب الشقة المقابلة بلهفة
وخوف وجزع .. فتحت جارتته فقال لها :

- أنا "آدم خطاب" متعرفيش فين ماما ؟
قال ذلك وهو يشير الى شقة والدته .. فقالت المرأة بأسى :
- واحد ابن حرام طلع عليها بالليل وسرق كل اللي حيلتها وشكلها كانت
هتصوت وتفضح فخبطها على دماغها ونقلوها على المستشفى
شعر "آدم" بفزع وخوف شديد قال بلهفه :
- هي فين .. مستشفى ايه ؟
قالت المرأة :

- والله يا ابني معرف .. اسأل اسطة "عبده" المكوجى هو الى طلبها
الاسعاف .. وهو نازل من فوق شاف باب الشقة مكسور ولما دخل لقاها
غرقانه فى دمها

أسرع "آدم" بالتوجه الى الرجل الذى قال بغضب :
- كنت فين يا ابني وأمك مرمية لوحدها كده .. لا حول ولا قوة الا بالله ..
خلاص معدش فى قلوبكوا رحمه
قال "آدم" بأعين دامعة وصوت أجش :
- هي فين .. وديتها مستشفى ايه ؟

أخبره الرجل عن المستشفى الحكومى التى نقلت سيارة الإسعاف أمه اليها
.. أسرع التوجه الى المستشفى والعبرات تغطى وجة المتألم .. أوقف
السيارة ودخل مسرعاً يبحث عنها .. الى ان وجدها نائمة على احد الأسرة
وقد عصبت لفافة بيضاء حول رأسها .. اقترب منها يبكى بحرقة وهو
يتحسس رأسها ويدها .. حاول مناداتها فلم تستجب .. التفت الى احدى
المرضات قائلاً بلهفه :

- لو سمحتى .. عايز الدكتور اللى متابع حالتها
قالت الممرضة ببرود وهى تلوك اللبان فى فمها :

- الدكتور مشى

قال "آدم" بحدده :

- طيب أنا عايز أعرف حالتها أسأل مين هنا
نظرت الممرضة الى الأوراق المعلقة على طرف فراشها بلا مبالاة ثم قالت
:

- متقلقش ان شاء الله هتبقى كويسة

قال "آدم" بحزم :

- لو سمحتى أنا عايز أعرف حالتها بالظبط

قالت الممرضة بحنق :

- شايفنى دكتورة أمامك .. أنا ممرضة يا اخويا .. قولتلك هتبقى كويسة ..

لما يبقى الدكتور يفوت بكرة ابقى اسأله
نظر اليها "آدم" بغضب وهي تبتعد .. لم ينتظر أكثر بل أزاح الغطاء عن
والدته الذى انبعثت منه رائحة كريهة .. وحملها مسرعاً وتوجه بها الى
الخارج .. صاحت احدى الممرضات :

- انت يا أفندى واخدها ورايح بيها على فين ؟ .. ده مجنون ده ولا ايه
لم يعبأ "آدم" لكلامها وتوجه الى السيارة وانطلق بها الى احدى
المستشفيات التى يعرفها .. دخل المستشفى فأسرعت الممرضة بإحضار
الترولى وتوجهت بها الى غرفة الفحص .. دخل "آدم" غرفة الفحص
وقال للطبيب بصوت مضطرب للغاية :
- قالولى ان حرامى خبطها على دماغها وودوها المستشفى بس معرفتش
حالتها هناك ومحدث كان متابعتها فجببتها وجيت على هنا
طمأنه الطبيب وطلب من الممرضة أشعة لمعرفة هل تعاني من كسور
بالجمجمة أم لا .. وبمدى خطورة حالتها
جلس "آدم" خارج الغرفة وهو يسند جبينه الى قبضتيه وهو يغمض
عينيه بقوة .. حاول أن يدعو الله لها .. لكن توقفت الكلمات على لسانه
وأبت أن تخرج .. هتف صوت بداخله .. كيف ستدعوه يا "آدم" .. كيف
؟! .. أوتظن أنه سيستجيب لك !؟

توجهت "آيات" الى المستشفى بعدما تمكنت من بيع مصوغاتها الذهبية
ودفعتهم تحت حساب العملية .. ما كادت تتوجه الى غرفة والدها بالعناية
المركزة حتى قالت لها الممرضة :

- والدك تعب أوى .. وحوالنا نتصل بيكي مردتيش
صاحت "آيات" بأعين دامعة :

- ايه ؟ .. موبايلى نسيته فى البيت .. حصله ايه ؟
خرج الطبيب فأسرعت تقول بلهفه :

- بابا ماله يا دكتور
قال الطبيب :

- لازم العملية تتعمل النهاردة خلاص معدش ينفع انتظار اكثر من كده
قالت "آيات" باكية :

- أنا دفعت مبلغ تحت الحساب دلوقتى وان شاء الله هجيب باقى الفلوس
أعطاها الطبيب ورقة لتمضى عليها قائلاً :

- طيب امضى على موافقتك اجراء العملية

أغمضت "آيات" عينيها تستخير ربها عز وجل .. ثم .. مضت الورقة

وسمعتها الى الطبيب .. جلست "آيات" على أحد المقاعد وهي تهتف من
أعماق قلبها المكلوم :
- يارب اشفيه يارب .. انت قادر على كل شئ .. يارب استجبلى واشفيه
يارب

الفصل السادس عشر من رواية جواد بلا فارس



بعد فترة طويلة من الإنتظار شعر "آدم" بالتوتر الشديد مد يده الى جيبه
ليشعل احدى سجائره .. إلا أنه تذكر وجوده فى المستشفى فأعاد العبوة
الى جيبه مرة أخرى .. نهض من مقعده وهو يدور حول نفسه كالطير
الجريح .. كان التوتر قد أخذ منه مبلغه .. وأخيراً انفتح الباب .. وخرجت
والدته من حجرة الأشعة على الترولى .. كانت قد بدأت فى الإفافة قليلاً ..
قال "آدم" للطبيب بلهفة :
- خير يا دكتور ؟

قال الطبيب :

- لا اطمئن ان شاء الله بسيطة .. بس المسكن اللى خدته مكنش كافي
ففقدت وعيها من شدة الألم
شعر "آدم" بالألم وهو يقول بندم شديد :
- أنا السبب
ثم نظر الى الطبيب قائلاً :

- طيب والآشعة اللى حضرتك عملتها على راسها ؟
قال الطبيب :

- لا متقلقش الحمد لله الوضع مطمئن .. بس أهم حاجة ترتاح كويس
الفترة اللى جايه
قال " آدم "
- حاضر يا دكتور

توجه " آدم " الى غرفة والدتها .. رآها وقد فتحت عيناها وتدور بهما فى
الغرفة .. اقترب منها ببطء .. فالتفتت تنظر اليه .. ما كادت العبرات تقفز
الى عينيها حتى قفزت الى عينية هو الآخر .. اقترب منها وجلس بجوارها
وقبل رأسها المضمد ويديها ودموعه تغرقهما وهو يقول بصوت مرتجف
:

- أنا آسف يا ماما .. بجد آسف
بللت العبرات وجهها وشهقات بكائها تمزق قلبه فنظر اليها بتأثر قائلاً :
- أنا عارف ان أنا ابن عاق .. ادعيلى ان ربنا يهديني
تحدثت أمه بصوت واهن وهى تقول :
- بدعيلك يا " آدم " .. بدعيلك يا ابني ان ربنا يهديك ويكفيك شر نفسك
قبل يديها مرة أخرى ثم مسح العبرات المتساقطة فوق وجهه قائلاً بحزم :
- بمجرد ما صحتك تتحسن .. هاخذك تيجي تعيش معايا .. مش ممكن
أسيبك هنا تانى

ابتسمت أمه وأجهشت فى البكاء وهى تقول :
- وحشتنى أوى يا " آدم "
شعر " آدم " برغبة قوية فى البكاء .. رغبة لم تجتاحه من قبل كما هى
الآن .. شعر بشئ محبوس بداخله يخنقه ويتمنى أن يخرج .. وضع رأسه
فوق كتف والدته وأجهش فى البكاء .. ربتت أمه بيدها على شعره وهى
تلف ذراعيها حوله كالطفل الصغير .. علت شفيتها ابتسامه من بين
دموعها وهى تضمه اليها بشدة خشية أن يبتعد عنها مرة أخرى .. قالت
أمه بصوت مرتجف :

- ربنا يهديك يا " آدم " .. ربنا يهديك
رفع " آدم " رأسه ونظر اليها بوجهه الباكي قائلاً :
- مسامحانى ؟

نظرت أمه اليه بحنان قائله :
- لما تبقى أب هتعرف ان ابنك ده حتة منك مينفعش تغضب عليه عشان
رضاك عليه من رضا ربنا فمش هيجيلك قلب تفضل غضبان عليه ..

وهتسامحه وتأخذه في حضنك .. ومهما عمل فيك هتفضل تحبه وتدعيه
قبل "آدم" رأسها برفق وقال بتأثر :
- أنا مستهلكيش على فكرة
أمسكت وجهه بين كفيها وقالت بحزم :
- لا تستاهل .. بس ارجع "آدم" ابني .. وسيبك من الطريق اللي انت
ماشى فيه ده
تنهد "آدم" بحزن .. ثم نظر اليها قائلاً برفقه :
- نامى دلوقتى .. الدكتور قال انك محتاجه راحه .. ومتقلقيش هفضل
جملك لحد ما تقومى بالسلامة وأخذك معايا
ابتسمت أمه بسعادة وهى تنظر اليه وتتأمله .. تشبع شوقها اليه طوال
الفترة السابقة

ظلت "آيات" تدعو وتستغفر الله عز وجل وهى تنتظر خروج والدها من
حجرة العمليات .. مرت ساعة وراء ساعة ونار الإنتظار تأكلها وتنهش
فيها .. تنظر الى الباب المغلق وتتمنى أن يتحرك ويفتح .. ظلت تنظر اليه
تأمره بعينيها أن ينفتح .. الى أن استجاب لها .. خرج الطبيب فنهضت
بلهفة تسأله وعيناها حمراوين من شدة البكاء .. قالت بصوت مبجوح :
- بابا عامل ايه دلوقتى يا دكتور ؟
التفت الطبيب حوله ثم قال :
- انتى مفيش حد من قرابيك معاكى ؟
هزت "آيات" رأسها نفيماً وهى تقول بضعف :
- لا أنا مليش حد غير بابا
نظر اليها الطبيب بشفقة .. فقالت تحته على الكلام وهى تمسح الدموع
التي تبلل وجهها :
- هو كويس ؟ .. هيخرج امتى ؟
تنهد الطبيب وقال بحنو :
- معلىش يا بنتى .. البقاء لله
تسمرت "آيات" فى مكانها .. تنظر الى الطبيب وقد حبست أنفاسها ..
بدت عيناها كبتيرين ماء امتلاً على آخرهما .. تمتمت قائله :
- ايه ؟
نظر اليها وقد أشفق على حالها فقال بأسى :
- قلبه متحملش العملية .. للأسف اتوفى

لم ترفع "آيات" عينها عن الطبيب .. أخذت دموعها تتساقط وهي تكرر :
- ايه ؟

نادى الطبيب احدى الممرضات وقد شعر بالقلق على "آيات" .. قال لها :
- خليكي معاها متسبيهاش

استمرت "آيات" فى النظر اليه ودموعها لا تتوقف عن الإنهمار ..
ورددت للمرة الثالثة :

- ايه ؟ .. بتقول ايه ؟ .. فين بابا ؟

اضطرب تنفسها وهي تحاول أن تستوعب ما قاله نظرت الى غرفة
العمليات وأخذت تنادى :

- بابا .. بابا .. اخرج يا بابا أنا مستنيك

حاولت الممرضة أن تمسك ذراعيها لتبعدها عن غرفة العمليات .. فنفضت
"آيات" ذراعيها منها بقوة وهي تصيح :

- بابا .. بابا اطلع أنا مستنيك

حاولت اقتحام غرفة العمليات لكن الطبيب أمسكها وهو يصيح فى
الممرضة :

- هاتيلي حقنة مهدئ بسرعة

أجهشت "آيات" فى البكاء وهي تصرخ بأعلى صوتها :

- بابا .. بابا اطلع .. بابا

قال لها الطبيب وهو يحاول أن يهدئها :

- لا حول ولا قوة الا بالله .. اهدى يا بنتى

خارت قواها على الأرض وهو ممسكاً بها وأخذت تصيح :

- بابا اطلع بأه .. بابا اطلع

التف حولها عدد من الممرضات .. اخذت تبكى بحرقة .. حملوها الى
الترولى وأدخلوها احدى الغرف ومازالت صيحات بكائها تشق قلب من
يسمعها

أمضت "أسماء" الليل فى غرفتها وهي جالسه فوق فراشها تبكى قهراً ..
أزاحت التسيريحة ووضعته خلف الباب حتى لا يتمكن ابن خالتها من
الدخول مرة أخرى الى غرفتها .. فى الصباح تخيرت "أسماء" عباءة
واسعة ارتدتها وارتدت فوقها حجاباً طويلاً وخرجت من الغرفة .. تجمعت
الأسرة حول طاولة الطعام .. لمحت نظرات السخرية فى عيني "هانى"

وهو ينظر الى ملابسها .. تذكرت أحداث الليلة الماضية فلم تجد فى نفسها
رغبة فى تناول الطعام .. نهضت وتوجهت الى غرفتها بعدما طلبت من
خالتها مفتاح لغرفتها فقالت لها :

- عايزاه ليه ؟

قالت " أسماء " بارتباك :

- عادى يا خالتو

قالت خالتها بلا مبالاة :

- هبقى أدورك عليه

دخلت " أسماء " غرفتها وأغلقتها مرة أخرى بالتسريحة .. تعلم بأنه لن
يجرؤ على افتتاح غرفتها فى وضح النهار لكنها لم يكن لديها استعداد
للمخاطرة .. فتحت الشرفة وخرجت تستنشق الهواء الساخن .. الذى ألهب
عينها ففاضت دموعها مرة أخرى .. قالت لنفسها :

- هى مش هتتحل بأه يا " أسماء " !

ساعد المحامى " آيات " فى اجراءات الدفن .. خانتها ذاكرتها فلم تتصل بـ
" سراج " لتخبره بوفاة أخيه .. ولا حتى بـ " أسماء " .. كانت فى دنيا غير
الدنيا .. ولولا وجود دادة " حليلة " بجوارها لماتت فى بيتها جوعاً أو
حزناً دون أن يشعر بها أحد .. سقطت مغشياً عليها مرات عدة فأسرعت
دادة " حليلة " بمساعدتها وبمداواتها .. دُفن " عبد العزيز " فى مقابر
العائلة .. عادت " آيات " الى الفيلا الخالية .. أخذت تنظر الى كل ركن فيها
بألم .. فكل مكان بها يحمل ذكرى لها مع والدها الحبيب .. جلست على
فراشها متعبة مرهقة .. فقالت لها " حليلة " بإشفاق :

- أجبك تاكلى يا حبيبتي

هزت " آيات " رأسها نفيماً وهى تضع رأسها على الوسادة وتغمض عينيها
مسحت " حليلة " بكفها على شعر " آيات " وهى تقول بحنان :

- طيب نامى دلوقتى يا بنتى ولما تصحى هحضرلك الغدا

لم تجد " آيات " فى نفسها رغبة لفعل أى شئ سوى .. النوم .. حيث تهرب
من الواقع الى عالم الأحلام .. لكن واقعها اخترق حلمها بقوة لتقوم فزعة
من نومها وهى تصرخ :

- بابا

هرولت " حليلة " من المطيخ قائله :

- أعود بالله من الشيطان الرجيم .. انتى كويسة يا "آيات" ؟
قالت "آيات" بوهن :

- أيوة

جلست "حليمة" بجوارها .. فوضعت "آيات" رأسها على الوسادة مرة
أخرى لتتساقط منها عبرات صامته .. مسحت "حليمة" وجه "آيات"
المبلل .. ودون أن تشعر .. بكت هى الأخرى
نهضت "آيات" فى منتصف الليل وأمسكت مصحفها تقرأ من كتاب الله
وقد فاضت عيناها .. نوت بقلبها اهداء ثواب تلك القراءة لأبيها .. لم
تستطع أن تكمل .. قطع عليها بكائها القراءة .. كانت تشعر بألم يمزقها
الى أشلاء .. كيف تتحمل فقدان أبيها .. لم يكن فقط أباً .. بل كان كل
عائلتها وكل صحبتها .. كان شعورها كمن فقد عائلته كلها فى يوم واحد ..
أخذت ترفع يديها بالدعاء له بالرحمة والمغفرة

أمضى "آدم" الاسبوع بجوار والدته فى المستشفى .. لم يتركها خلاله الا
لفترات قصيرة ثم يعود اليها مرة أخرى .. تابع سير العمل بالقريبة عن
طريق الهاتف .. وتابعه "زياد" بالأخبار أولاً بأول .. كانت أمه سعيدة
بهذا التغير وهذا الإهتمام منه .. قالت له فى احدى المرات وهى تنظر اليها
متبسمة :

- ياه .. كنت وحشنى أوى يا "آدم"

ابتسم "آدم" فأكملت دامعة العينين :

- كان وحشنى ابنى اللى بيخاف عليا وبيهتم بيا .. كان وحشنى أوى

جلس "آدم" بجوارها قائلاً :

- طيب بلاش عياط علشان خاطرى

ابتسمت وهى تحاول اخفاء تأثرها وقالت :

- حاضر يا ابنى خلاص مش هيعط

ثم نظرت اليه قائله :

- شغلك مش متعطل يا "آدم" ؟

قال "آدم" :

- لا متقلقيش يا ماما أنا متابع كل حاجة بالتليفون .. وكمان "زياد" هناك

فعشان كده مطمئن

قالت أمه بسعادة :

- ما شاء الله هو "زياد" بيشتغل معاك
ابتسم قائلاً :

- أيوة

قالت أمه بحنان :

- طول عمركوا روحكوا فى بعض .. ربنا ما بيفرق بينكوا أبدأ
قال "آدم" بمرح وهو ينظر الى هاتفه :

- أهو بيتصل ياريتنا كنا جنبنا سيرة ربع جنيه
رد "آدم" قائلاً :

- أيوة يا "زياد"

قال "زياد" بتوتر :

- أيوة يا "آدم" .. ازى طنط عاملة ايه دلوقتي
قال "آدم" وقد انتبه لتغير صوته :

- أحسن الحمد لله .. ما صوتك .. فى حاجة حصلت ؟

تنهد "زياد" بضيق وبلهفة كما لو كان لا يستطيع الإنتظار أكثر ليخبره
بما لديه :

- لازم تيجي تلحقتى بسرعة يا "آدم" فى حريقة فى القرية
صاح "آدم" وقد هب واقفاً :

- ايه .. حريقه ؟

نظرت اليه أمه بجزع وقالت :

- لا حول ولا قوة الا بالله

قال "زياد" بإضطرب :

- أيوة حريقة .. لسه المطافى ماشيه من شوية
صاح "آدم" قائلاً :

- فى حد مات ؟

قال "زياد" بسرعة :

- لا اطمئن لا فى حد مات ولا حد اتصاب لان الكلام ده حصل بالنهار مكنش
فى حد فى الملهى

صاح "آدم" بغضب بالغ :

- الملهى ؟ .. الحريقة كانت فى الملهى ؟
تنهد "زياد" قائلاً :

- أيوة النار مسكت فيه .. وللأسف المطافى جت متأخر وجزء كبير منه
اتفحم

قال "آدم" بغضب هادر :

- مفيش غيره .. "عاصى" الكلب هو اللى عملها
قال "زياد" بقلق :
- متهورش يا "آدم" لو سمحت أنا بلغت البوليس وهو أكيد هيعرف مين
اللى عمل كده
قال "آدم" بعنف وبدا وكأنه لم يستمع الى كلمات "زياد" :
- أنا هوريك يا "عاصى" الكلب .. اذا كنت حابب شغل البلطجة معنديش
أى مشكله اشرب بأه
كان "آدم" يغلى من الغضب فقالت له والدته بقلق :
- خير يا "آدم"
قال "آدم" بحده :
- مفيش شوية مشاكل فى الشغل متشغليش بالك يا ماما
قالت أمه وهى تنظر اليها بإشفاق :
- طيب يا حبيبى سافر انت متعطش شغلك بسببى أنا بقيت كويسة
نظر "آدم" اليها بحزم قائلاً :
- مش هسيبك هنا يا ماما .. هتيجي معيا
ثم توجه الى الخارج قائلاً :
- هروح أسأل الدكتور إذا كان ينفع تسافرى ولا لا

صاحت "أسماء" بحده :
- انتى بتستعطبى يا "آيات" بجد زعلتيني منك جداً اسبوع يا "آيات" ..
اسبوع وأنا معرفش ان باباكي اتوفى وألفه موبايلك كمان
قالت "آيات" بوهن وهى جالساه فى فراشها :
- معلىش يا "أسماء" أنا مكنش عقلى فيا .. مكنتش قادرة أتكلم ولا حتى
أشوف حد
قالت "أسماء" وهى تجلس بجوارها :
- بس أنا مش حد يا "آيات"
قالت "آيات" ودموعها تتساقط على وجهها :
- معرفش بأه .. أنا كنت طول الوقت بنام عشان أهرب من التفكير ..
وبعدين لما فوقت كلمتك وقولتك
عانقتها "أسماء" قائله :
- يا حبيبتي يا "آيات" .. معلىش ربنا يرحمه
بكت "آيات" قائله :

- مش قادرة يا "أسماء" مش قادرة أتحمل فراقه .. مش قادرة أصدق انه خلاص مات .. بنام وبصحي أحس انه هيخبط على بابا أوضتى .. ويقولى تعالى اتعشى معايا .. ويكلمنى عن الرحلة اللى هنطلعها سوا .. ده وعدنى ياخذنى للحج السنة دى .. وهنطلع عمره كل سنة .. مش قادرة اصدق انى خلاص مش هشوفه تانى .. ازاي مشوفوش تانى يا "أسماء" .. ازاي .. ازاي هعيش من غير بابا .. ازاي بابا معدش موجود .. ازاي معدتش هسمع صوته .. يعني هو كده خلاص معدش هيكون موجود تانى .. خلاص كده هفضل عايشه من غير ما أشوفه انهمرت العبرات من عيني "أسماء" وهى تنظر الى صديقتها فى أسى واشفاق وقالت :

- ربنا يصبرك يا "آيات"

نظرت "أسماء" الى الحقائق التى تملأ الغرفة وقالت :

- انتى هتسيبى الفيلا امتى ؟ .. وهتروحي فين ؟ .. ودفعتى أصلا فلوس العملية ازاي ؟ .. معاكى فلوس ؟
قالت "آيات" وهى تحاول تمالك أعصابها :

- خدت ذهبى .. وبعته ودفعت جزء من احساب العملية .. ولما الشركة اتباعت كملت ودفعت باقى حساب المستشفى .. الفيلا كمان اتباعت بكل اللى فيها فى المزاد بس مديني مهلة لآخر الشهر عشان أخرج منها
قالت "أسماء" بإستغراب :

- بس مش المفروض عمك ده اللى بتكرهوه يورث فى باباكي
قالت "آيات" :

- لا .. الميراث مبيتوزعش الا بعد تسديد الديون .. مش ربنا بيقول فى سورة النساء "من بعد وصية يوصى بها أو دين"
ثم قالت بألم :

- مع انى برده هيبقى عليا أكيد ديون .. لان المحامى قالى ان الفلوس بتاعة الفيلا والعربية مش هتكفى .. فهضطر أبيع عربيتي وللأسف معنديش حاجة تانى أبيعها والفلوس اللى باسم بابا فى البنك كمان راحت
قالت "أسماء" بأسى :

- ده ايه الهم ده

ثم قالت بحزم :

- بيعي عربيتك وخلي فلوسها ليكي انتى .. انتى أولى بيها وسيبك من موضوع الديون واللى يسألك قولى ممعكيش
نظرت اليها "آيات" بلوم وبألم وقالت :

- انتى تعرفى ان فى حديث عن النبي صلى الله عليه وسلم بيقول " يغفر
للشهاد كل شىء إلا الدين " .. وكمان فى حديث عن النبي صلى الله عليه
وسلم " أن النبي صلى الله عليه وسلم أتى بجنابة ليصلي عليها، فقال: هل
عليه من دين؟ قالوا: نعم، قال: صلوا على صاحبكم، قال أبو قتادة: علي
دينه يا رسول الله، فصلى عليه " ..يعني الرسول مصلاش على الميت
صاحب الدين الا بعد ما حد من الصحابة قال انه هيسد عنه دينه .. ازاي
أسيب بابا من غير ما أسدد دينه
تنهدت "أسماء" بأسى وقالت :
- والله لو كان معايا حاجة يا "آيات" مكنتش اتأخرت عنك
قالت "آيات" وهى تنظر اليها ممتته :
- عارفه يا "اسماء"
قالت "أسماء" :
- أمال انتى هتعيشى فين بعد ما تسيبي الفيلا ؟
قالت "آيات" بحيرة واسى :
- معرفش .. معرفش

أغلق "عاصى" الهاتف وهو يضحك بشدة .. سأله والده الجالس معه فى
المكتب قائلاً :
- خير متضحكنا معاك
قال "عاصى" بسعادة :
- مفيش .. "آدم" كان مسافر القاهرة فبعته هدية صغيرة نستقبله بيها
لما يرجع
قال أبوه باستغراب :
- هدية ايه يا "عاصى" ؟
قال "عاصى" بتشفى :
- ولعته فى الملهى الليلى اللى فرحان بيه
ضرب "سراج" بقوة على المكتب فإنتفض "عاصى" .. صاح "سراج"
بغضب :
- أنا مش قولتك متعملش حاجة من غير ما ترجعلى يا "عاصى"
قال "عاصى" بغيظ :
- هو اللى بدأ اللعب بالنار .. اللى يلعب بالنار تلسعه
صاح "سراج" بحده :

- غبي يا "عاصى" .. غبي .. انت عارف "آدم" كويس .. مش من النوع
اللى يخاف ويكش .. انت عارفه كويس ايه اللى خلاك تتهور كده
قال "عاصى" بحدده :
- هيعمل ايه يعنى ولا يقدر يعمل حاجة
هتف "سراج" بحدده :
- غور من دامى يا "عاصى" .. وتروح حالا القرية تأمن عليها كويس
وتخليك فيها اليومين دول لانى واثق ان "آدم" مش هيسكت .. وأى حاجة
جديدة تبلغنى بيها فوراً
ثم صاح محذراً وهو يشير بإصبعه :
- واياك حسك عينك تعمل حاجة من غير ما ترجعلى .. فاهم يا غبي
خرج "عاصى" من مكتب والده وعلامات الغضب على وجهه .. وقف
أمام المصعد وهو يتمتم بغضب :
- أكنى عيل صغير اعلمى يا "عاصى" .. واياك تعمل يا "عاصى" ..
حاجة تقرف

توجه "آدم" مع والدته الى منزلها يجمع حاجياتها ثم انطلق بها الى
العين الساخنة .. كان "آدم" شاردأ طوال الطريق يفكر بغيظ فيما فعله
"عاصى" بقريته .. فليس لديه أدنى شك بأنه وراء حرق الملهى الليلى ..
تلقى اتصالات عديدة من "شكرى" الذى بدا غاضباً لكن "آدم" طمأنه
بأن الخسائر ليست كبيرة وبأن الإقبال على القرية لم يتأثر بتلك الحادثة ..
لكن "آدم" صمم على تلقين "عاصى" درساً حتى لا يتجرأ مرة أخرى
على الإقتراب منه .. أوصل والدته الى الشاليه وتوجه من فوره الى الملهى
الليلى .. عاينه بغضب وهو يتفحص الخسار ثم صاح بغضب :

- ابن التيبيبيبيبيب

قال "زياد" بهدئه :

- الحمد لله انها جت على أد كده يا "آدم" .. كويس ان محدش اتصاب ولا
حد مات والا كانت هتكون فضيحة بجد

خرج "آدم" مسرعاً واجتمع بالحرس الخاص الذى استأجرهم .. و ...
أمرهم بما يجب أن يفعلوه .. قوبل بالإعتراض فى البداية .. لكن
الإعتراض اختفى بعدما لوح "آدم" بالثمن !

أثناء الغداء قالت والدة "سماء" :

- أنا خارجه النهاردة مع خالتك وجدك رايحين نزور ناس قريبنا فى البلد
وهنرجع متأخر

خشت "أسماء" من البقاء بمفردها فى المنزل فقالت بلهفه :

- لا أنا جايه معاكوا

لم تعترض والدتها حانت منها التفاته الى "هانى" الذى ابتسم لها
بسخرية .. قامت وتوجهت الى غرفتها فكانت رؤيته تسبب لها الغثيان ..
بعد منتصف الليل عادوا من الخارج والكل متعب مرهق .. توجهت
"أسماء" الى غرفتها ووضعت التسريحة خلف الباب كعادتها كلما دخلت
الى غرفتها .. ما كادت تلتفت حتى رأت "هانى" أمامها .. كادت أن
تصرخ لكنه وضع يده على فمها يكتمه قائلاً :

- ششششش لو فتحتى بوقك هتبقى فضيحه وهقولهم انى كنت نايم فى
أوضتك لأنها طراوه .. وانتى اللى بتتبلى عليا
بكت "أسماء" وهى تقول له :

- حرام عليك بأه .. أنا بنت خالتك مش واحده من الشارع
كالمرة السابقة لم يعبأ لباكائها ولا لتوسلاتها .. وجذبها الى الفراش ..
أخذت تهتف بين شهقات بكائها المرير :
- كفاية بأه

انتهت تلك الدقائق الكريهة كسابقتها وعاد الى غرفته منشياً شاعراً
بالإنتصار .. أما "أسماء" فكانت نفسيتها وأعصابها فى الحضيض ..
ظلت تتلوى فى فراشها بعدما تقيأت بشدة وأصابها الإعياء .. أغمضت
عينها بشدة وهى لا تتمنى إلا شئ واحد ... الموت

استيقظ "عاصى" على صوت هاتفه .. رد بصوت ناعس :

- أيوة

صاح الطرف الآخر :

- الحق يا أستاذ "عاصى" فى بلطجية دخلوا القرية بعربيات جيب
وكسروا الواجحة والازاز اللى فى المدخل .. وولعوا فى الجنينة ومحدث
عرف يمسخهم ..

هب "عاصى" واقفا وارتنى ملابسه على عجاله ونزل يرى المصيبة

التي أصابت قريته .. وجت النزلاء قد تجمهروا فى الأسفل وهم ينظرون
بجزع الى الحريق الكبير المشتعل فى الحديقة والزرع فصاح قائلاً :
- طلبوا المطافى بسرعة
صاح مدير القرية :
- طلبناها يا أستاذ "عاصى"
صاح به "عاصى" بحده وهو يرى الزجاج المحطم والتمائيل المهشمة
والنار التي تلتهم كل ما يقابلها :
- وكنت فى حضرتك لما ده حصل وفين الأمن
قال مدير القرية بقلق وارتباك :
- كل حاجة حصلت فجأة .. دلخوا بعربيات جيب ورموا ملوتوف على
الجنينة وحجارة على الواجهات وعلى ما جينا نتصرف لفوا ومشوا
بسرعة
صاح "عاصى" بغضب هادر :
- اتفضل قفل حسابك وسلم شغلك وشوفلك مكان تانى ديره .. انت كبيرك
أوى تدير حضانة اطفال مش قرية سياحية
شعر مدير القرية بالمهانة وتوجه الى الداخل مسرعاً بغضب .. وقف
"عاصى" ينظر الى ما حوله بغيظ وقد تعالت صيحات الإستكار من
النزلاء فصاح بغضب :
- حد يطلب المطافى

توجهت "آيات" الى مكتب محامى والدها .. كانت هذه هى المرة الأولى
التي تحتاج لأحد غير والدها .. وتطلب منه شيئاً ما .. شعرت بحرج بالغ ..
قالت ورأسها منخفض :
- أنا محتاجة مبلغ صغير وهمضيلك وصولات أمانه
صمت المحامى قليلاً ثم قال متهرباً :
- انا لو كان معايا فلوس مكنتش أعزها عليكى بس أنا حالياً بمر بأزمة
مالية خاصة بعد ما شغلى فى شركة والدك انتهى .. يعنى أنا زيي زيك
نظرت اليه بألم وقالت :
- بس أنا مفيش مكان حتى أروح فيه .. محتاجة على الأقل أأجر شقة ..
والفلوس اللى اتبقت من بعد بيع العربية مش هتكفى الا ايجار كام شهر ..
ده غير الأكل والشرب والمصاريف

قال المحامى بلامبالاة :
- انزلى اشتغلى .. انتى متخرجة ومعاكى شهادة وأكيد هتلاقى شغل كثير
قالت "آيات" بيأس والدموع فى عينيها :
- طيب حضرتك متقدرش تشوفلى شغل فى أى شركة ؟
قال المحامى وهو يمط شفتيه :
- هحاول أشوفلك
خرجت " آيات" من مكتبه تنظر الى الشارع المزدهم وقد امتلأت عيناها
بالعبرات .. نظرت الى المارة فى الشارع بألم وهى تستعد لأول مرة
لمواجهة الحياة بمفردها .

الفصل السابع عشر من رواية جواد بلا فارس



تجولت "آيات" فى الفيلا تتأمل كل ركن فيها بأعين دامعة .. تجمع ما يعز
عليها فراقه .. وتضعه فى حقيبتها .. تجمعت الحقايب فى الأسفل .. فتحت
شرفة غرفة المعيشة ووقفت تنظر الى القمر بأعين دامعة .. هذه هى
الليلة الأخيرة التى ترى فيها هذا القمر من بيتها الذى ولدت وعاشت
وتربت فيه .. من الغد سيكون هذا البيت ملكاً لغيرها .. سيسكنه اناس
آخرون .. ستطأ أقدام غريبة تلك الأرض التى زحفت ومشت عليها أولى
خطواتها .. وتلك الشرفة التى سهرت فيها ليالى طويلة .. ستشتاق لهواء
هذا البيت .. لجدرانها .. لآثاته .. لأركانها ..

فرت منها دمعة حزينه .. مسحتها بأصابعها و سؤالاً ملحاً يتردد بداخلها

.. أين ستذهبين يا "آيات" .. ليس لديك مأوى .. وليس في حوزتك الا بضعة آلاف من الجنيهات .. ماذا ستفعلين؟! .. الى من ستلجأين؟! .. لم يكن لك في هذه الدنيا الا والدك .. لكنه رحل .. رغماً عنه ورغماً عنك .. أستستطيعين مواجهة تلك الحياة بمفردك؟! .. قاطع دخول دادة "حليمة" شرود أفكارها .. ابتسمت لها "حليمة" بحنان قائله :

- أجييلك تتعشى يا بنتي

هزت "آيات" رأسها نفياً وقالت بأسى :

- ومين له نفس للأكل يا دادة

نظرت الى القمر مرة أخرى .. وشردت في حالها من جديد وهي تقول :

- المفروض أسيب الفيلا بكرة ومش عارفه أروح فين

.. ثم التفتت الى "حليمة" قائله وهي ترمقها بنظرات حزينة :

- هيعز عليا فراقك أوى يا دادة

ابتسمت "حليمة" بحنان فقالت "آيات" بصوت باكى :

- بجد هتوحشيني أوى .. لو كنت عارفه انا راحيه لفين كنت خدت معايا ..

بس أنا حتى مش عارفه هعيش ازاي

عانقتها "حليمة" وأخذت تمسح على شعرها بحنان .. أجهشت "آيات"

في البكاء عليها تريح صدرها مما يقاسيه من أحزان .. قالت "حليمة"

بطيبة :

- بس أنا باه مش هسيبك يا "آيات"

نظرت اليها "آيات" قائله وهي تمسح عبراتها :

- مش هينفع يا دادة أخذك معايا .. أنا أصلاً لسه معرفش هعيش فين

ابتسمت "حليمة" وحي تتأملها قائله :

- هتعيشي معايا

نظرت اليها "آيات" بدهشة فأكملت "حليمة" :

- بيتي القديم لسه موجود مبعتوش .. سبحان من خلانى ما أحتجش أبيعه

.. وأهو الزمن لف ودار واحتجتلته .. وكمان أن محوشه قرشين من مرتبى

الى كنت باخده من والدك الله يرحمه .. هتيجي تعيشي معايا ورزقى

ورزقك على الله

اغرورقت عينا "آيات" بالعبرات وهي تنظر اليها .. لم تتمالك نفسها

فأجهشت في البكاء مرة أخرى وهي تقول بتأثر شديد :

- بجد يا دادة مش عارفه أقولك ايه

قالت "حليمة" بأعين دامعة :

- متقويش حاجة .. أبوكى كان راجل طيب .. زرع في حياته الخير ..

وانتى بتحصديه دلوقتى .. عمره ما عامل حد من اللى شغالين عنده
بطريقة وحشة .. كان بيعامل الناس بطيبة وعمره ما قصر مع حد ولا
عمره أذى حد .. ولما سألته فى مرة عن سر معاملته الحنينة للخدم
وللناس اللى شغاله عنده قالى ان النبي صلى اله عليه وسلم قال "
إِخْوَانُكُمْ حَوْلَكُمْ - أَيِ خِدْمِكُمْ-، جَعَلَهُمُ اللَّهُ تَحْتَ أَيْدِيكُمْ، فَمَنْ كَانَ أَخُوهُ تَحْتَ
يَدِهِ فَلْيُطْعِمْهُ مِمَّا يَأْكُلُ، وَلْيَلْبَسْهُ مِمَّا يَلْبَسُ، وَلَا تَكْفُوهُمْ مَّا يَغْلِبُهُمْ، فَإِنْ
كَفَّفْتُمُوهُمْ فَأَعَيْنُوهُمْ" .. كان راجل طيب ويعرف ربنا والناس كانت بتحبه
.. ربنا يرحمه هو وأمك

ابتسمت "آيات" وهى تقول :

- يارب .. يارب ارحمهم

ربتت "حليمة" على كفتها وقالت مبتسمة :

- متشغليش بالك .. لينا رب وهو أرحم بينا من عباده

ثم قالت :

- أما أروح أتمم على الحاجة اللى هناخدها

نظرت "آيات" الى السماء وقد لاحت ابتسام على شفيتها وهى تقول بتأثر

:

- الحمد لله .. انت كريم اوى يارب

استيقظ "آدم" من نومه فوجد والدتها فى مطبخ الشاليه تعد الطعام فنظر
لها قائلاً :

- صباح الخير يا ماما

نظرت اليه أمه قائله :

- صباح النور يا "آدم"

قال "آدم" وهو يقترب منها :

- ماما بتعملى ايه ؟ .. روحى ارتاحى وأنا خلاص اتفقت مع واحدة هتيجي

تنضف وتطبخ

قالت أمه بحزم :

- لا مليش أنا فى الحاجت دى .. أنا מבحبش واحدة غريبة تنضف بيتي ولا

تخط ايديها فى أكلى

قال "آدم" :

- يا ماما انتى تعبانه مينفعش الل بتعمليه ده الدكتور قال ترتاحى

قالت أمه بعناد :

- أنا الحمد لله بقيت كويسة أوى وأقدر أقف على رجلى وأعملى شغل البيت

قال "آدم" مستسلماً :

- طيب براحتك

ثم قال يحذرها :

- بس لو تعبتى ارتاحى على طول اتفقنا

ابتسمت له قائله :

- ربنا يخليك ليا يا ابنى ولا حيرمنى منك

أخذها فى حضنه قائلاً :

- ولا يحرمنى منك يا ماما

نظرت اليه والدته بعتاب قائله :

- انت لسه مبتصليش

ارتبك "آدم" وشعر بالحرج فقالت بحزن :

- ربنا يهديك يا "آدم"

نظر اليها "آدم" قائلاً :

- أيوة .. ادعيلى الدعوة دى .. انتى دعوتك مستجابة

قالت أمه :

- بدعيلك يا حبيبى .. بس مش كفاية دعائى لوحده .. ربنا بيقول فى سورة

الرعد " إِنَّ اللَّهَ لَا يُغَيِّرُ مَا بِقَوْمٍ حَتَّى يُغَيِّرُوا مَا بِأَنْفُسِهِمْ " .. لازم تبدأ

بتغيير نفسك بنفسك يا "آدم"

تنهد "آدم" قائلاً :

- ان شاء الله

ثم توجه الى باب المطبخ وقال :

- هروح أغير عشان متأخرش على الشغل

قالت له أمه باهتمام :

- مش هتفطر

قال "آدم" بعبوس :

- لا مليش نفس

ارتدى "آدم" ملابسه وخرج من الشاليه متوجهاً الى مكتبه .. كان

العبوس بادى على ملامح وجهه .. كان يشعر بالضيق والحقنق .. لا يدري

السبب .. لكنه غير مرتاح .. غير سعيد .. يشعر بان شئ بداخله مفقود ..

شئ لم يستطع ان يملأه بملذاته ونزواته وسهراته وأمواله وقريته

السياحية .. على الرغم من النجاح الذى حققه حتى الآن .. الا أنه لم يشعر

بالفخر لهذا النجاح .. بل يشعر بالفشل ! .. زفر بضيق وهو يجلس الى مكتبه .. تحدث الى نفسه قائلاً .. لماذا هذا الشعور البغيض ؟! .. لماذا لا تفرح يا "آدم" بإنجازاتك ونجاحك ؟! .. لماذا تشعر بأنك لم تنجز شيئاً ولم تربح شيئاً .. لماذا هذه المرارة التي تشعر بها داخل حلقك .. ما الذي ينقصك يا "آدم" ؟! .. عما تبحث لتكون سعيداً ؟! .. علم الإجابة .. لكنه لم يجرؤ على الإفصح بها لنفسه .. شعوره بالذنب ألجمه وقيده وجعله كالعاجز .. كالعطشان الذي يتمنى قطرة ماء وأمامه نهر من الماء العذب لكنه بدلاً من أن يشرب منه توجه الى البحر المالح .. لكنه كلما حاول أن يروى ظمأه ازداد عطشاً .. لا عطشه ارتوى .. ولا جسده ارتاح !

فى صباح اليوم التالى خرجت "آيات" من الفيلا مع "حليمة" وهى تتأمل الفيلا وتودعها بعينيها الممتلأه بالعبرات .. أسرع الحارس بحمل الحقائب فى السيارة الأجرة التى توقفت أمام باب الفيلا .. نظر الى "آيات" بأسى قائلاً :

- آنسة "آيات" مش محتاجه اى حاجة ؟

نظرت اليه "آيات" قائله :

- شكراً

قال الحارس وهو متأثراً بما حل بها :

- انتى زى أختى الصغيرة .. أنا عندى أخت فى سنك .. أنا هنا مش همشى الساكن الجديد الحمد لله هخلانى فى شغلى .. لو احتجتى أى حاجة أنا موجود هنا

نظرت اليه "آيات" وقد اغرورقت عيناها بالعبرات وهى تقول :

- متشكرة أوى

تابعها بعيناه الحزینتين وهى تتركب السيارة بجوار "حليمة" لتنتقل بهما الى سكنها الجديد ..

فى أحد الأحياء الشعبية توقفت السيارة .. ساعد السائق فى انزال الحقائب وايصالها الى باب الشقة .. صعدت "آيات" البناية القديمة والدرجات المتهالكة وتأملت الجدران المزرية والتي تنبعث منها رائحة غريبة .. أسرع "حليمة" بفتح الباب .. ثم توجهت الى الشباك ففتحته لينير البيت بنور الصباح .. تأملت "آيات" الشقة الصغيرة المكونة من غرفتين صغيرتين بكل منهما فراش وبصالة صغيرة بها صالون متهالك ومطبخ وحمام .. كان البيت الصغير فى حالة مزرية وقد غطى التراب الأثاث

بالكامل .. قالت " حليلة " بتفائل :
- متقلقيش هينصف ويبقى زى الفل
ابتسمت " آيات " بوهن والتفتت لتدخل الحقائب الى الداخل فساعدتها
" حليلة " .. ثم قالت بمرح :
- تحبي تختارى أنهى أوضة
نظرت " آيات " الى الغرفتين .. فكلاهما فى حالة رثة .. قالت بخفوت :
- أى واحدة مش هتفرق
توجهت " حليلة " الى احدى الغرف وقالت وهى تفتح شباكها :
- تعالى هنا دى شرحه عن الثانية
بدأت " حليلة " بتنظيف غرفة " آيات " التى مدت يد المساعدة الى
" حليلة " رغم اعتراضها .. كان العمل شاقاً فأكوام التراب كانت تغطى كل
شئ .. بعد أكثر من ساعة من العمل المتواصل فى الغرفة أصبحت صالحة
للإستهلاك الآدمى .. ألقت " آيات " بجسدها المرهق على الفراش .. فلم
تعتاد العمل فى البيت ولا تحمل مشاق التنظيف .. استسلمت الى النوم و
" حليلة " تغلق باب غرفتها وهى تبتمس فى اشفاق

جلس " آدم " على الشط يتأمل البحر أمامه .. كان شاردأ فلم يرى تلك
الفتاة التى ترتدى البكينيى والتى اقتربت من مكان جلوسه .. انتبه اليها
عندما قالت :
- حضرتك دكتور " آدم " مدير القرية مش كدة ؟
ابتسم " آدم " مجاملاً وقال :
- أيوة أنا
جلست الفتاة دون دعوة على المقعد المجاور له وهى تقول بمرح :
- بجد القرية تحفة .. أول مرة أحس ان مصر فيها أماكن حلوة .. طول
عمرى بقضى الأجازة بره .. بس لما شوفت اعلنا قريتكوا قولت أجرب
وبجد انبهرت
ابتسم " آدم " قائلاً :
- الحمد لله ان قريتنا عجبك
قالت الفتاة وهى تمديدها اليه :
- أنا " بسنت "
- أمسك يدها فى راحته قائلاً :

- تشرّفنا يا آنسه "بسنت"
ضحكت قائله :

- لا מבحبش آنسة وأستاذ والجوده .. أنا "بسنت" وصحابي بيقولولى
"بوسى"

ذكره الإسم بـ "بوسى" .. تلك المرأة التى أمضى معها ما يقرب من العام
.. يعيش معها وفى بيتها ويصرف من مالها .. تلك المرأة التى عاش معها
عيشة تغضب رب السماوات والأرض .. عقد حاجبيه بضيق وهو يتذكر
أيامه ولياليه معها .. شعر بنفور شديد .. من نفسه .. تذكر آخر لقاء جمعه
بها .. تذكر افسادها لزواجه من "آيات" .. "آيات" .. تلك الفتاة التى يأبى
عقله أن ينساها .. لماذا يتذكرها دائماً .. لماذا لا يستطيع نسيانها .. لماذا
تقفز الى عقله بين الحين والآخر .. قال لنفسه افق يا "آدم" .. "آيات"
ضاعت من بين يديك للأبد .. لا فائدة من البكاء على اللبن المسكوب ..
قالت "بسنت" التى كانت تراقب تعبيرات وجهه :

- انت شكلك مش معايا خالص

نظر اليها "آدم" وكأنه نسى وجودها .. ثم نهض قائلاً :

- بعد اذنك عندى شغل

ابتعد وهى ترمقه بنظراتها المغتاضه .. كانت الفتاة جميلة .. و متحررة ..
وترمقه بنظرات الإعجاب .. ويعلم أنه اذا أراد علاقة معها فسيلقى ترحيباً
منها .. لكنه لم يفعل .. سأل نفسه .. لماذا؟! .. فأتاه الجواب من داخله ..
سئمت الحرام !

استيقظت "آيات" على رائحة الطعام الشهى .. شعرت بألم حاد فى بطنها
وهى تتذكر أنها لم تتناول شيئاً منذ الأمس .. فتحت الباب لتجد البيت
مقلوباً رأساً على عقب .. تلمست الطريق الى المطبخ لتجد "حليمة"
واقفة تعد الطعام .. لتفتت تنظر اليها مبتسمة وقالت :

- صباح الخير يا ست البنات .. ثوانى والأكل يكون جاهز

قالت "آيات" مبتمة بضعف :

- قصدك مساء الخير يا دادة

ثم قالت :

- هى الساعة كام ؟

قالت "حليمة" وهى تنظر الى هاتفها :

- المغرب هياذن

صاحت "آيات" قائله :

- كده يا دادة تسيبيني نايمة أنا مصلتش الظهر ولا العصر
أسرعت "آيات" وتوجهت الى الحمام لتتوضأ .. جمعت الظهر والعصر
وبمجرد أن انتهت سمعت آذان المغرب يتردد من المسجد القريب .. نادتها
"حليمة" قائله :

- يلا يا بنتى الأكل جهز

قالت "آيات" وهى تقف :

- هصلى المغرب الأول يا دادة

ابتسمت "حليمة" وقالت :

- طيب تعالى نصلى جماعة بدل ما كل واحدة تصلى لوحدها
ابتسمت "آيات" ووقفت بجوار "حليمة" التى أمتها فى الصلاة .. تناولت
"آيات" طعامها بنهم شديد على الرغم من بساطته وتواضعه .. راقبتها
"حليمة" بإشفاق والابتسامة على ثغرها .. أسرعت "آيات" بالرد على
الهاتف قائله :

- السلام عليكم .. ازيك يا "سمر"

قالت "سمر" بلهفة :

- و عليكم السلام .. اخص عليكي يا "آيات" بأه ده كله يحصل وأنا
معرفش

قالت "آيات" بخفوت :

- حصل ايه

هتفت "سمر" بضيق :

- يعني والدك يتوفى ومشكلة الديون وانك تسيبي الفيلا كل ده وأنا
معرفش هو يا بنتى مش احنا صحاب ولا ايه

قالت "آيات" :

- أيوة طبعاً يا "سمر" .. بس معلش اعذريني أنا والله حتى "أسماء"
مكنش بيبقى فيا دماغ أكلها

قالت "سمر" :

- أنا لسه أفله مع "أسماء" وحكتلى على اللى حصلك .. عملتى ايه فى
موضوع السكن ؟

توجهت "آيات" الى غرفتها وأغلقت الباب وهى تقول :

- اللى ساعدني وفتحلي بيته آخر شخص توقعت انه يقدر يساعدني
قالت "سمر" بإستغراب :

- مين اللى سعدك
قالت "آيات" مبتسمة بتأثر :
- دادة "حليمة" .. فتحتلى بيتها وبتعاملنى زى بنتها
ابتسمت "سمر" وقالت :
- الحمد لله .. رنبا كبير
اغرورقت عينا "آيات" بالعبرات وهى تقول :
- أيوة فعلاً كبير أوى ومفيش أحن منه
قالت "سمر" مشجعة :
- يبقى طلعي حاجة لله يا "آيات" حتى لو كانت صغيرة
ابتسمت "آيات" وهى تقول :
- كويس انك فكرتيني .. انا هعمل كده فعلاً ..
ثم قالت بحزن :

- رغم انى مش هقدر أطلع مبلغ كبير
قالت "سمر" بمتسمه :

- ربنا بيقول " فَمَنْ يَعْمَلْ مِثْقَالَ ذَرَّةٍ خَيْرًا يَرَهُ " .. و رسول الله صلى الله عليه وسلم قال: "سبق درهم مائة ألف درهم" قالوا: وكيف؟ قال: "كان لرجل درهمان تصدق بأحدهما، وانطلق رجل إلى عرض ماله، فأخذ منه مائة ألف درهم فتصدق به " . يعني أجر راجل تصدق بدرهم أكبر من أجل راجل تصدق بمية الف درهم .. فسألوه ازاي يا رسول الله .. فقال .. ان اللى تصدق بدرهم واحد ده راجل كان معاه درهين تصدق بواحد واحتفظ بواحد فمعنى كده انه تصدق بنص ماله .. أما التانى كان معاه فلوس كتير تصدق منها ب مية ألف درهم .. لكن المية ألف دول بيمثلوا جزء صغير من فلوسه الكثير .. يعني تعملى الخير ومتستصغريهوش يا "آيات" بالعكس لما تتصدقى وانى محتاجة وفى أشد الحاجة .. الثواب بيبقى أكثر بكثير من لو تصدقتى وانتي مرتاحه مادياً
ابتسمت "آيات" وهى تقول بحماس :

- بجد فرحتيني بالكلام ده يا "سمر" وحمستيني انى أتصدق بجد .. وربنا يتقبل منى يارب

ابتسمت "سمر" وقالت :

- ان شاء الله يتقبل منك يا "آيات"

ثم قالت بجدية :

- "آيات" احنا اخوات .. لو احتجتى أى حاجة هتقوليلى مش كده
قالت "آيات" :

ثم تنهدت قائلة :

- تعرفى .. خايفة أوى ارتبط بواحد وبعد الجواز عينه تزوغ على واحدة رفيعة ويخونى معاها .. بفكر كتير أوى فى كده .. حسه انى لو اتجوزت مش هعرف أملى عين جوزى ومش هعرف أثق فى نفسى وأجلىع والبس زى ما الستات بتلبس .. حسسه انى مكسوفة من شكلى ومن جسمى أوى سالتها صديقتها :

- طيب انتى ليه متعمليش رجيم يا "إيمان" ؟

قالت "إيمان" بحنق :

- عملت كتير بس مش بعرف أستمر .. كل ما أتحمس انى أعمل رجيم أرجع تانى أكل زى البغلة لحد ما أتخن أكثر من الأول ثم قالت بحزن :

- نفسى أوى يبقى جسمى حلو عشان لما أتجوز متكشفش من نفسى .. نفسى أحس زى البنات كده انى واثقة فى نفسى وانى بنت زيهم .. أنا ساعات بحس انى مش بنت .. ساعات بحس انى ست كبيرة ترقرقت العبرات فى عينيها وهى تقول :

- عارفه لما بكون بشترى حاجة والراجل يقولى يا مدام .. بتخنى أوى وبحس انى عايزه اعيط .. ولا لما بسمع حد بيتريق على تخنى بحس انى عايزه ملك الموت ينزل ويقبض روحى قالت صديقتها :

- معلىش يا "إيمان" فى ناس كده مؤذية مع النبي صلى الله عليه وسلم قال " المسلم من سلم المسلمون من لسانه ويده " .. وبعدين خلى عندك ثقة فى نفسك وواصلى على رجيم وان شاء الله تخسى تنهدت "إيمان" وقالت بياس :
- ربنا يسهل ان شاء الله

فتحت "آيات" الباب لتجد "أسماء" أمامها تقول بغیظ :

- دخت على ما لقيت البيت

ابتسمت "آيات" قائلة :

- معلىش

تعانقت الصديقتان بشدة لفترة طويلة .. قالت "أسماء" :

- وحشتيني أوى .. عاملة ايه

قالت "آيات" بأعين دامعة :

- الحمد لله
نظرت "أسماء" الى المنزل المتواضع ثم أقبلت "حليمة" فسلمت عليها
قائله :
- ازيك يا دادة
ابتسمت "حليمة" وقالت :
- الحمد لله يا بنتي .. أما أروح أعملكوا شاي
جلست الفتاتان فى الحجرة التى خصصتها "حليمة" لـ "آيات" .. فقالت
"أسماء" :
- البيت مبهدل أوى
قال "آيات" بحزن :
- اهو أحسن من الشارع
قالت "أسماء" بشرود :
- وأحسن من اللى أمر من الشارع
قالت لها "آيات" باستغراب :
- تقصدى ايه ؟
ردت "أسماء" بوهن :
- مفيش .. خلينا فيكى انتى .. ناوية على ايه
قالت "آيات" وهى تفكر فى حالها :
- أكيد هنزل أشتغل .. مش معقول هسيب دادة "حليمة" تصرف عليا هى
أصلاً على أد حالها
ثم قالت بمرارة :
- تصورى عمى لحد دلوقتى مكلمنيش .. ولا حتى عسان يعزيني فى وفاة
بابا .. ولا قالى انتى ناقصك حاجة ولا لأ
قالت "أسماء" :
- انتى قولتيله ان عمو توفى
قالت "آيات" :
- لا متصلتش بيه بس أكيد عرف .. وأكيد على الأقل خالص عرف ان
شركة بابا اتباعت لان الاعلان نزل فى الجرنال
قال "أسماء" بحنق :
- أنا مش عارف ايه الأهالى اللى معندهمش احساس دول .. حاجة تقرف
قالت "آيات" وهى تحاول أن تتناسى مآسيها :
- سيبك .. أنا أصلاً مش عايزه منه حاجة
فتحت "أسماء" حقيبتها وأخرجت رزمة نقدية وأعطتها لـ "آيات" قائله

:
- ياريت كان معايا أكثر .. بس انتى عارف انى خيبه ومكنتش بعرف
أحوش .. أنا بعث ذهبي وده نص الفلوس والنص التانى شيلاهم لانى
حسه انى هحتاجهم قريب
نظرت "آيات" الى المال وقالت بحزم :
- لا طبعا مش هاخذ منك حاجة يا "أسماء"
قالت "أسماء" بحده :
- ليه باه ان شاء الله مش احنا صحاب يا "آيات"
قالت "آيات" بصرامة وهى تشعر بالضيق لتعرضها لهذا الموقف :
- صحاب حاجة واللى انتى بتعمليه ده حاجة تانية .. مستحيل أقبلهم منك
قالت "أسماء" وقد تضايقت من رفض "آيات" :
- معنى دكه انك بتعملى فرق بينى وبينك يا "آيات"
قالت "آيات" بسرعة :
- لا والله أبداً .. بس انا لسه معايا فلوس اتبقت من بيع العربيه .. وكمان
أنا عارفه ظروفك المهيبه انتى كمان شيليهم أكيد هتحتاجيهم وأنا لو
احتجت حاجة هطلب منك
قالت "أسماء" :
- وعد .. وعد لو احتجتى حاجة هتطلب منى
نظرت اليها "آيات" بإمتنان قائله :
- أيوة وعد
ابتسمت "أسماء" قائله بتهكم مذاكرة "آيات" :
- فين الشاى اللى دادة "حليمة" قالت عليه .. دى لو كانت بتسخنه فى
حرارة الشمس كان زمانه غلى من بدرى
دخلت "حليمة" الغرفة تحمل صنية الشاى وهى تقول :
- الشاى للعرايس الحلوين

عادت "أسماء" الى بيت جدها .. وما كادت تصل الى منتصف الصالة
حتى أحاطها "هانى" بذراعيه من الخلف وهو يقول :
- وحشتيني يا قمر
انتفضت "أسماء" وحررت نفسها من بين ذراعيه ثم التفتت تنظر اليه
بغضب .. شعرت بالدهشة من جرئته وفى وضح النهار لكن دهشتها
اختفت بعدما قال وهو ينظر اليها بجرأة :

- محدش فى البيت كلهم خرجوا يعني البيت فضى علينا أنا وانت يا جميل صاحت "أسماء" بغضب :
- احترم نفسك بأه .. مش هسكتك المر دى ضحك قائلاً :
- تصدقى اترعبت .. هتعملى ايه يعني قالت بغضب هادر :
- هصرخ وأفضحك وألم عليك الناس قال بتهكم :
- لو صرختى انتى اللى هتفضحى مش أنا انقض عليها فجأة وأحاطها بذراعيه .. سمعت صوت الباب يفتح فصرخت قائله :
- ماما .. ماما الحقينى تركها "هانى" على الفور .. دخلت أمها وخالتها يصيحان فى جزع :
- ايه فى ايه ؟
- بتصرخى ليه ؟
- قالت "أسماء" بغضب :
- الزفت ده كل شوية يقرب منى ويعمل حاجات مش مظبوطة .. أنا سكت كتير بأه بس تعبت وقرفت صاحت خالتها قائله :
- انتى بتقولى ايه يا بت انتى أجهشت "أسماء" فى البكاء قائله :
- ابنك يا خالتو كل شوية يتحرش بيا وبيجلى أوضتى بالليل اقتربت منها أمها وصفعتها قائله :
- اخرسى يا بنت انت ايه اللى بتقوليه ده وضعت "أسماء" كفها على خدها المتأم وهى تقول باكية :
- والله العظيم يا ماما ما بكذب ده اللى بيحصل فعلاً صاحت خالتها :
- لا يا حبيبتي أنا ابنى متربى أحسن تربية الدور والباقي عليكى انتى .. من أول ما رجلك خطت البيت ده وانتى بترسمى عليه وبترمى بلاكى عليه ثم التفتت الى أختها قائله :
- لى بنتك لأمهالك
- جذبتها أمها من ذراعها قائله بغضب :
- عجبك الفضايح دى

جذبت "أسماء" ذراعها من يد أمها وهي تصيح بغضب :
- انا فاض بيا انتي مش أم انتي معندكيش احساس
صفعتها أمها مرة أخرى وهي تصيح :
- بطلى قلة أدب بأه فضحتينا
نظر اليها "هانى" بشماته وكأنه يقول لها .. لقد حذرتك بأن الفضيحة
ستكون من نصيبك أنت .. لم تعبا "أسماء" بنظراته ولا بكلام والدتها
وخالتها وتوجهت الى غرفتها حاملة كل شئ يخصها وخرجت أمام ناظري
والدتها التي قالت :
- راحه فين ؟

التفتت اليها "أسماء" بوجهها المبلل بالعبرات وهي تقول بعنف :
- ملكيش دعوة بيا وانسى انك خلقتيني أصلاً
خرجت "أسماء" ولس أمامها الا مكان واحد للذهاب اليه ... "آيات"

انهارت "أسماء" باكياً في حضن "آيات" وهي تقص عليها ما عانتها في
منزل خالتها .. لم تتمالك "آيات" نفسها ففاضت دموعها هي الأخرى
وهي تقول :

- حسبي الله ونعم الوكيل ربنا ينتقم منه
قالت "أسماء" وهي تغمض عينيها بشدة عليها تتناسى تلك الذكريات
السيئة :

- كنت حسه انى بموت فى البيت ده ومحدث حاسس بيا لا أم ولا أب
نظرت اليها "آيات" قائله بحدده :

- "أسماء" انتى ازاي سكتى على الأرف ده . ده المفروض تقولى
وتتكلمى ومتسكتيش
قالت "أسماء" بضعف :

- ما أنا اتكلمت محدش صدقنى خوفت أتكلم تانى يطردونى أو يفضحونى
قالت "آيات" بعنف :

- الطرد والفضيحة أرحم مليون ألف مرة من انك تستسلمى للحقير ده ..
سكوتك ده هو اللى شجعه انه يتمادى معاكى .. ومش كل مرة كانت
هتعدى سليمة أكيد فى مرة من المرات كان هيغتضبك
قالت "أسماء" وعيناها تشع ألماً ممزوج بالحيرة :
- خوفت يا "آيات" خوفت

قالت "آيات" بحزم :
 - أنا لو كنت مكانك كنت صرخت وفضحته ومهمنيش أى حاجة ولو هطرد
 أطرده بس أكون حافظت على نفسى ومخلتتش حيوان زى ده يلمسنى
 قالت "أسماء" بوهن :
 - يارتتى كنت اتكلمت وقولتلك من زمان .. كان زمانك نصحتيني وكان
 زمانى بعدت عن القرف ده
 انفجرت فى البكاء مرة أخرى فعانقتها "آيات" قائله بحنان :
 - خلاص انسى اللى حصل
 قالت "أسماء" من بين عبراتها :
 - مش ممكن أبداً أقدر أنسى يا "آيات" .. انا مش بس قرفانه منه أنا
 كمان قرفانه من نفسى أوى
 قالت "آيات" وهى تمسح على شعرها برفق :
 - بكرة تنسى
 ثم نظرت اليها قائله :
 - ومتقلقيش هتفضلى هنا معايا .. هنكون مع بعض على الحلوة والمرة ..
 وأنا من بكرة هبدأ أدور على شغل
 قالت "أسماء" وهى تمسح عبراتها :
 - طيب ما تروحي لعمك
 هزت "آيات" رأسها بقوة وهى تقول :
 - لأ مش ممكن أبداً أروح أشحت منه
 قالت "أسماء" بسرعة :
 - لا مش هتشحتى منه انتى هتطلبى منه انه يشغلك عنده أو عند أحد من
 صحابه .. يعني هتطلبى منه يساعذك انك تلاقى شغل مش أكثر من كده ..
 ويا سلام بأه لو شافلنا شغل لينا احنا الاتنين .. اهو نقدر نصرف على
 نفسنا
 قالت "آيات" وعلامات الحزن على وجهها :
 - تعرفى ان محامى بابا الله يرحمه مرضاش يساعدى .. رغم ان بابا كان
 بيعامله كويس
 قالت "أسماء" بحده :
 - حسبى الله ونعم الوكيل فيه .. أصلاً الناس معدش فى قلوبها رحمة ..
 بحس انهم بأوا كتل حجر ماشية على رجلين
 ثم قالت وكأنها تتعلق بأى شئ للنجاة مما هما فيه :
 - حاولى تروحيه يا "آيات" مهما كان عمك وحش بس معتقدش انه

- مش راجع .. انا خلاص هفضل هنا في العين السخنه ويا انا يا
التييييييييييت ده

ظل "عاصى" يفكر فى كيفية القضاء على "آدم" وازالته من أمامه تماماً
.. لم يكن "عاصى" من تلكم الأشخاص التى تتميز بالورع أو الخوف أو
الشفقة .. بل كان قلبه أشبه بالصخر .. وأثبت خلال سنين حياته أن له
نصيب كبير من اسمه .. "عاصى" !

دخل "آدم" الشاليه ليجد أمه جالسـه على أحد المقاعد .. قال :

- ازيك يا ماما

نظرت اليه بعتاب ثم أشاحت بوجهها عنه .. اقترب منها وسألها قائلاً
باهتمام :

- فى حاجه يا ماما ؟

صمتت قليلاً ثم قالت :

- ازاي قابل تعيش كده يا "آدم" ؟

جلس على المقعد المجاور لها وهو يقول بدهشة :

- ازاي يعني مش فاهم

قالت بحدـه :

- عيشتك حرام يا ابني .. وفلوسك حرام

هتف "آدم" قائلاً :

- انا فلوسي مش حرام يا ماما

قالت بألم :

- لا حرام يا ابني .. لما تيجي من وره الخمرة تبقى حرام .. لما تيجي من

وره لحم الخنازير تبقى حرام .. لما تيجي من الرقص والمسخرة والسـتات

العريانة وقلة الأدب تبقى حرام .. انا اتمشيت النهاردة فى القرية

واتصدمت من اللي شوفته

قال "آدم" بارتباك :

- الخمرة ولحم الخنازير فى زباين بيطلبوها وأنا مبضربش حد على ايده

عشان ياكل أو يشرب منها وكمان فى أكلات معينة ميتفـعش تتعمل من

غير الخمرة والأكلات دى هى اللي بيتميز الأماكن الراقية والمطاعم

والقرى الكبيرة .. وبالنسبة للملهى الليلي هو أصلاً مش شغال دلوقتي

بسبب الحريقة اللي حصلت .. وبالنسبة للرقص وللسـتات العريانه انا مش

هضربهم على ايدهم واقولهم مترقصوش وغطوا جسمكوا
نظرت اليه امه بالأم وقالت بحسره :

- انت شايف ان كل اللي قولته ده مقنع ؟ .. طيب لو مقنع تقدر يوم القيامة
تقوله ادامه ربنا لما يسألك جبت فلوسك منين ؟ .. تقدر تقوله لما تتسأل
فى قبرك منين جبت فلوسك وصرفتها فى ايه ؟ .. الرسول صلى الله عليه
وسلم قال " لَا تَزُولُ قَدَمَا عَبْدٍ يَوْمَ الْقِيَامَةِ حَتَّى يُسْأَلَ عَنْ عُمُرِهِ فِيمَا أَفْنَاهُ
، وَعَنْ عِلْمِهِ فِيمَ فَعَلَ ، وَعَنْ مَالِهِ مِنْ أَيْنَ اكْتَسَبَهُ وَفِيمَ أَنْفَقَهُ ، وَعَنْ
جِسْمِهِ فِيمَ أَبْلَاهُ " .. هتقدر تقول الكلام ده وقتها يا " آدم " ؟
قال " آدم " بضيق :

- أنا مبعملش حاجة غلط .. لا بشرب خمرة ولا باكل حاجة حرام
قالت " أمه بحزم :

- بس بتبيعهم للى بياكلهم وللى بيشربهم وده حرام وبتاخذ سيئات زيهم
بالظبط لانك بتقدمها ليهم وبتسهلها عليهم .. النبي صلى الله عليه وسلم
قال " من دعا إلى هدى كان له من الأجر مثل أجور من تبعه لا ينقص ذلك
من أجورهم شيئاً ، ومن دعا إلى ضلالة كان عليه من الإثم مثل آثام من
تبعه لا ينقص ذلك من آثامهم شيئاً "
نهض " آدم " قائلاً وهو يريد الهروب من هذا النقاش :

- أنا داخل أرتاح شوية

دخل " آدم " عرفته وبدل ملابسه .. ألقى بنفسه فوق فراشه فى تهالك ..
أخذ يفكر فى كلام والدته وهو يشعر بضيق شديد فى صدره وكأن الهواء
سُحب من الغرفة عن كامله .. شعر باختناق شديد وهو يفكر فى كل شئ
وأى شئ .. قام يجلس فى فراشه وهو يحاول أن يزيل هذا الإحساس الذى
أصبح ملازماً له فى الفترة الأخيرة .. قال لنفسه .. لماذا هذا الضيق يا
" آدم " ؟ .. تعمل فى مركز يتمناه آلاف الشباب فى سنك ؟ .. لك مرتب
كبير يسد احتياجاتك ويفيض ؟ .. ما شمكنتك .. لماذا هذا الثقل الذى تعشر
به فوق صدك ؟ .. لماذا لا تهناً وتفرح وتسعد وتعيش حياتك كما يفعل
غيرك ؟! .. ما الذى ينقصك يا " آدم " .. ما الذى ينقصك ؟!

تسربت الى أسماعه صوت آيات من القرآن الكريم أدارتها والدته فى
المسجل ورفعت الصوت عالياً حتى اخترق الباب المغلق ونفذ الى أذنيه ..
أعاد ظهره الى الوراء وهو يرهف أذنيه بانتباه شديد .. كالظمان الذى
يسمع صوت خرير الماء بالقرب منه

- يَوْمَ تَرَى الْمُؤْمِنِينَ وَالْمُؤْمِنَاتِ يَسْعَى نُورُهُمْ بَيْنَ أَيْدِيهِمْ وَبِأَيْمَانِهِمْ

بُشْرَاكُمْ الْيَوْمَ جَنَاتٌ تَجْرِي مِنْ تَحْتِهَا الْأَنْهَارُ خَالِدِينَ فِيهَا ذَلِكَ هُوَ الْفَوْزُ الْعَظِيمُ (12) يَوْمَ يَقُولُ الْمُنَافِقُونَ وَالْمُنَافِقَاتُ لِلَّذِينَ آمَنُوا انظُرُونَا نَقْتَبِسْ مِنْ نُورِكُمْ قِيلَ ارْجِعُوا وَرَاءَكُمْ فَالْتَمِسُوا نُورًا فَضُرِبَ بَيْنَهُمْ بِسُورٍ لَهُ بَابٌ بَاطِنُهُ فِيهِ الرَّحْمَةُ وَظَاهِرُهُ مِنْ قِبَلِهِ الْعَذَابُ (13) يُنَادُونَهُمْ أَلَمْ نَكُنْ مَعَكُمْ قَالُوا بَلَى وَلَكِنَّكُمْ فَتَنْتُمْ أَنْفُسَكُمْ وَتَرَبَّصْتُمْ وَارْتَبْتُمْ وَغَرَّتْكُمُ الْأَمَانِيُّ حَتَّى جَاءَ أَمْرُ اللَّهِ وَغَرَّكُمْ بِاللَّهِ الْغُرُورُ (14) فَالْيَوْمَ لَا يُؤْخَذُ مِنْكُمْ فِدْيَةٌ وَلَا مِنَ الَّذِينَ كَفَرُوا مَأْوَاكُمُ النَّارُ هِيَ مَوْلَاكُمْ وَبِئْسَ الْمَصِيرُ (15)

عندما وصلت الى مسامعه تلك الآيه امتلأت عيني "آدم" بالعبرات حتى فاضت وتساقطت على وجهه الذي اشتاق لتلك الدموع الخاشعة الذليلة المستشعره بذنبها وتقصيرها وبعدها .. أغمض عينيهِ ليفرغ ما بداخلهما من عبرات تحرقهما .. وانتفض جسده بعدة شهقات لم يستطع كبحها

- أَلَمْ يَأْنِ لِلَّذِينَ آمَنُوا أَنْ تَخْشَعَ قُلُوبُهُمْ لِذِكْرِ اللَّهِ وَمَا نَزَلَ مِنَ الْحَقِّ وَلَا يَكُونُوا كَالَّذِينَ أُوتُوا الْكِتَابَ مِنْ قَبْلُ فَطَالَ عَلَيْهِمُ الْأَمَدُ فَقَسَتْ قُلُوبُهُمْ وَكَثِيرٌ مِنْهُمْ فَاسِقُونَ .

الفصل الثامن عشر من رواية جواد بلا فارس



جلس "سراج" في بار قريته السياحية وقد علا وجهه علامات الإستغراق في التفكير .. اقترب منه أحد الرجال قائلاً :

قالت "آيات" وهي تسخن الخبز :
- مفيش مشكلة يا دادة هساعدك
استيقظت "أسماء" ومرت على المطبخ فى طريقها الى الحمام وقالت
بصوت ناعس :
- صباح الخير
- صباح النور
- صباح النور يا بنتى
قالت "آيات" وقد عزمت امرها على الذهاب الى عمها :
- على فكرة يا "أسماء" أنا استخرت ربنا .. وهروح النهاردة ان شاء الله
لعمى

ابتسمت "أسماء" قائله :
- كويس .. وان شاء الله خير
كانت "آيات" متوترة للغاية من تلك المقابلة .. مضت سنوات طوال لم
ترى فيها عمها "سراج" و لا أولاده .. ترى أمازال يتذكر شكلها .. ايتذكر
اسمها .. ماذا ستكون رده فعله عندما يراها أمامه .. تطلب منه وظيفة
تكسب منها لقمة عيشها .. تنهدت "آيات" بحسرة ولاحت فى عينيها
العبرات وهي تتذكر والدها وفقدانها له .. ترك فقدانه شرخاً كبيراً فى
نفسها .. شعرت بأنها كشجرة اللبلاب التي فقدت دعامتها وأخذت فى
التمايل .. لكنها أبدأً لن تسمح لنفسها بالسقوط .. ستواجه الحياة وسلاحها
هو قربها من الله عز وجل .. كانت "آيات" تحاول التقرب اليه بقدر ما
تستطيع .. أبدلت ملابسها بأخرى أوسع منذ أن عادت من العمرة .. وإن
كانت ملابسها لم تتصف بعد باللباس الشرعى .. إلا أنها شعرت براحة
كبيرة عن تلك الملابس الضيقة التي اعتادت الخروج بها .. ومنذ أن عادت
من العمرة لم تضع أى زينة على وجهها .. فأصبح أكثر اشراقاً ونعومة ..
تنهدت "آيات" وشعور بالقلق يتسرب اليها .. كانت تخشى لقاء عمها ..
تخشاه بشدة

قامت والدة "آدم" بتحضير الفطور على الطاولة .. ثم ذهبت لايقاظ ابنها
.. طرقت طريقة خفيفة ثم فتحت الباب .. لكنها تسمرت فى مكانها وبدأت
العبرات تبلل عينيها وهي تنظر الى "آدم" الساجد على الأرض .. وضعت
كفها على فمها لتكتم شهقات بكائها وأغلقت باب الغرفة ببطء .. جلست
على أحد المقاعد وهي تبكى وتناجى ربها :
- يارب اهديه يارب .. يارب اصرف عنه كل سوء .. يارب عينه على

نفسه وعلى شيطانه .. يارب اهديه أنا قلبي راضى عنه ارضى عنه يارب .. ارضى عنه

سمعت باب غرفته يُفتح فمسحت عبراتها بسرعة وقالت تقول له :

- يلا يا "آدم" عشان تفطر

التف الاثنان حول الطاولة .. كانت أمه تنظر اليه من حين الى آخر بنظرات فرحة ممزوجة بالحنان والرضا .. تقابلت نظراتهما فابتسم "آدم" ثم قال :

- ادعيلي يا ماما

قالت أمه بنبرة صادقة :

- والله يا ابني بدعيلك دائماً .. ربنا ينورك طريقك ويهديك يا "آدم" اتسعت ابتسامته وهو يغادر الشاليه متوجهاً الى مكتبه فى القرية .. لأول مرة منذ شهور طويلة جداً يشعر براحة فى صدره .. كان شعور الضيق مازال يلزمه الا أنه هذا اليوم كان أخف وطأه .. استمتع بهذا الشعور من الراحة الذى افتقده طويلاً .. دخل مكتبه وشرع فى ممارسة عمله بحماس .. دخل "زياد" المكتب ليقول :

- صباح الخير يا "آدم"

ابتسم له "آدم" قائلاً :

- صباح النور يا "زياد" .. ايه الأخبار .. مدير قرية الفيروز اللى اطرده أخبره ايه معانا

قال "زياد" وهو يجلس أمامه على المكتب :

- مبسوط على الآخر

ضحك "آدم" قائلاً :

- زمان "عاصى" هيموت من الغيظ

قال "زياد" بتوتر :

- يا خوفى المرة دى متجيش سليمة زى المرة اللى فاتت

قال "آدم" بحزم :

- ميقدرش يعمل حاجة أنا زودت الحراسة على القرية ومدى أوامر للبودى جاردز لو شافوا حد ببيلطج فى القرية يموتوه ضرب لحد ما يبانله صاحب

قال "زياد" فجأة :

- ايه أخبار بنت أخو "سراج" اللى انت كنت خاطبها ؟

قال "آدم" باستغراب :

- اشمعنى يعنى ليه بتسألنى

قال "زياد" :
- أصل أبوها مات
شعر "آدم" بالصدمة وهو يستمع لخبر موت "عبد العزيز" وهتف قائلاً

:
- لا حول ولا قوة الا بالله
ثم نظر اليه قائلاً :
- انت عرفت منين ؟

قال "زياد" :
- قرينته فى الجرنال من فترة
شعر "آدم" بالقلق على "آيات" فهو يعلم أنها ليس لها أقارب .. وليس
لها أحداً فى هذه الدنيا إلا والدها .. أسرع "آدم" يخرج هاتفه ويتصل بـ
"آيات" ..

جلست "آيات" مع "سمر" و "إيمان" و "أسماء" .. فى غرفتها ببيت
"حليمة" .. عندما رن الهاتف .. نظرت الى الرقم وشعرت بإضطراب بالغ
عندما علمت أن "آدم" هو المتصل .. أخذت تتساءل فى نفسها عن سبب
اتصاله .. ماذا يريد منها .. نظر اليها الثلاث فتيات وهى تمسك هاتفها
وتنظر اليه بتوتر .. سألتها "أسماء" باهتمام :

- ايه .. مين يا "آيات" ؟
قالت "آيات" بتوتر :
- "آدم"

أسرعت "سمر" قائله :

- متعبريهوش

انقطع الإتصال فقالت وهى مازالت تحاول تخمين سبب اتصاله :

- أصلاً مكنتش هرد

عاود الإتصال مرة أخرى فقالت "إيمان" :

- طيب شوفى عايز ايه

قالت "سمر" بحزم :

- لآ هيكون عايز منها ايه يعنى .. خلاص الموضوع انتهى وده واحد

نصاب وكداب المفروض متكلمش معاه تانى ولا تثق فيه أبداً

قالت "أسماء" فى حيرة :

- بس ليه بيتصل تفتكرى عايز ايه يا "آيات" ؟

تنهدت "أسماء" بضيق ثم أغلقت هاتفها تماماً حتى لا يعاود الإتصال بها

وهى تقول بضيق :

- معرفش ومش عايزه أعرف

شعر "آدم" بالتوتر عندما حاول الاتصال بها مرة أخرى ليجد هاتفها مغلق .. زفر بضيق فسأله "زياد" قائلاً بإهتمام :

- ايه مبردش ؟

قال "آدم" بحنق وهو يكتب رسالة على هاتفه :

- كان بيرن وفجأة لقيته مقفول .. أكيد مش عايزه تكلمنى

نظر اليه "زياد" قائلاً :

- هتبعثها رسالة ؟

قال "آدم" وهو يكتب رسالته :

- أيوة

أرسل "آدم" رسالته وقلبه وعقله منشغل بـ "آيات" وحالتها بعد وفاة والدها .. شعر بالأسف لفقدانها والدها لعلمه بمدى تعلقها به .. وبمدى حبها له واعتزازها به .. رق قلبه لحالتها وأخذ يتخيل شعورها بمرارة الفقد التي ذاق مثلها بعد وفاة والده .. حاول الاتصال بها مرة أخرى لكن الهاتف ظل مغلقاً .. انصرف "زياد" دون أن يشعر به "آدم" .. دخل الفيس بوك وتوجه الى حسابها .. أخذ يبحث عن اسمها دون جدوى .. طردته من عالمها تماماً .. حاول الإتصال بها مرة أخرى دون جدوى .. زفر بضيق وقد أخذ القلق منه مبلغه

فى المساء .. ألقى "آيات" نظرة على "أسماء" النائمة بجوارها .. ثم أسندت ظهرها الى واسادتها وهى تفكر فى لقاء الغد .. قررت الذهاب الى عمها فى الغد .. امتدت يدها الى هاتفها تفتحه .. اندهشت عندما وجدت

رسالة من "آدم" .. فتحتها بأيدي متوترة وقرأت ما فيها :

- "آيات" البقاء لله عرفت ان والدك توفى .. أنا عايز أطمئن عليكى

نظرت "آيات" الى الرسالة بسخرية ممزوجة بمرارة شعرت بها فى قلبها .. هتفت بداخلها .. تريد أن تطمئن على؟! .. ما أرق قلبك؟! .. تنهدت فى

ضيق وتركت هاتفها على الأرض بجوار السرير وحاولت النوم

استلم "آدم" تقريراً بوصول رسالته فأسرع بالنهوض من فوق فراشه وأمسك هاتفه الموضوع على المكتب واتصل بها .. نظرت "آيات" الى الهاتف وهى تشعر بالإضطراب .. ثم ما لبثت أن اختفى اضطرابها وظهرت علامات الألم على وجهها وهى تتذكر كيف خدعها وكيف لعب بعواطفها

ومشاعرها وكيف استغل حبها له ليصل الى ما يريد .. وكيف خانها مع تلك المرأة .. وكيف تجراً وفعل هذا الذنب الكبير .. هتفت بصمت .. ماذا تريد منى .. لم أعد أملك شيئاً تريده .. لم أعد أملك أى مال .. لم أعد أملك أحداً تستطيع ابتزازه .. لم أعد أملك أى شئ فى هذه الدنيا .. ابحت عن غيري لتستغلها وتلعب بها .. لن أمسح بأن أكون لعبة فى يدك مرة أخرى .. أغلقت "آيات" هاتفها تماماً .. ووضعت رأسها على وسادتها وقد فاضت عيناها بالعبرات .. تنظر الى هاتفها على الارض بحزن وألم

شعر "آدم" بالحزن عندما وجد هاتفها مغلقاً مرة أخرى .. قال فى نفسه .. لماذا يا "آيات" .. ما أردت سوى الإطمئنان عليك .. لماذا تبعديني عنك هكذا بلا رحمة .. لماذا لا تستمعى الى أعدارى ومبرراتى لما فعلت .. لست شخصاً كريهاً كما تظنين .. بل أنا شخص مريض يا "آيات" .. مريض بذوبى وآثامى وأخطائى .. أنا أولى بشفتك من نفورك .. وأولى بعطفك وحنانك من بغضك .. جلس على فراشه وهو يتنهد فى حسره وهو يتذكر كيف أضاعها من بين يديه

تقدمت "آيات" تعبر أورقة الشركة بإرتباك ظاهر .. شعرت بتوتر معدتها وكأنها ذاهبة الى امتحان مصيري .. كادت أن تعود ادراجها لكنها تذكرت الضيقة التى وقعت فيها .. وكيف أنها بلا مال وبلا عمل .. ويجب أن تتصرف بسرعة قبل أن ينفذ مالها ومال "أسماء" .. دخلت غرفة مديرة أعمال "سراج" وهى تقدم رجلاً وتؤخر الأخرى .. وقفت أمامها بإضطراب وهى تقول :

- لو سمحتى عايزة أقابل الأستاذ "سراج اليمانى"
نظرت اليها السكرتيرة وقالت بروتينية :

- فى معاد معاه ؟

قالت "آيات" بتوتر :

- لأ .. بس ياريت حضرتك تقويله بنت أخوه "عبد العزيز" عايزه تقابله
نظرت اليها المرأة نظرة متفحصة .. ثم قامت من فوق مكتبها وتوجهت الى مكتب "سراج" قائلة :

- فى واحدة بتقول انها بنت أخو حضرتك وعايزه تقابلك

نظر اليها "سراج" بدهشة ثم ما لبثت أن ظهرت تعبيرات التعالى الممزوج بالغضب على وجهه ثم قال بحق:

- قوليلها مش فاضى

التفتت السكرتيرة لتغادر فأوقفها قائلاً :

- ولا أقولك استنى .. دخلها .. بس ادخلى معاها ولما أشاورك تقولى ان
فى اجتماع
قالت المرأة بطاعة :

- حاضر يا فندم

جلس "سراج" وقد أسند ظهره الى الخلف ورفع رأسه بتعالى مستعداً
لرؤية ابنة أخيه .. ابنة أخية الذى تبرى منه أمام الناس لعدم رضاه عن
طرقه الملتوية فى تسيير أعماله .. دخلت "آيات" تتقدمها مديرة أعماله
.. نظر اليها نظرة متفحصة .. بدت متوترة وهى تتطلع الى عمها الذى لم
تره منذ سنوات طويلة .. ظل كلاهما ينظر الى الآخر بصمت بترقب ..
ابتسمت "آيات" بصعوبة وهى تقول :

- ازيك يا عمو

صمت "سراج" لبرهة ثم قال بدون ترحيب حقيقي :

- أهلا أهلا ازيك

قالت آيات "بتوتر :

- الحمد لله

أشار لها بالجلوس قائلاً :

- اتفضلى اعدى

جلست "آيات" تضع حقيبتها أمامها وهى تفرك يديها فى قلق .. نظرت
اليه قائله :

- حضرتك عرفت ان بابا اتوفى ؟

عقد "سراج" ما بين حاجبيه للحظات ثم قال :

- آه عرفت

نظرت اليه "آيات" بمزيج من الدهشة والحزن .. وهى تقول فى نفسها ..
ومادمت قد علمت فلماذا لم تسأل اذن عن ابنة أخيك؟! .. صمتت قليلاً ثم
قالت بتوتر وخجل :

- حضرتك عرفت ان بابا الله يرحمه كنا عليه ديون واننا بعنا كل حاجة

عشان نسدد الديون دى

قال "سراج" بلامبالاة :

- أيوة عرفت دى كمان

صمتت "آيات" لا تدرى ما تقول .. كان اللقاء أبرد مما توقعت .. كادت أن
تغير رأيها وترحل دون أن تخبره بالسبب الحقيقي الذى دفعها الى المجئ
اليه .. لكنها تذكرت محنتها فأرغمت نفسها على البقاء .. نظرت اليه

بإستغراب فهو لم يسأل حتى اين تقيم ولا من أين تعيش .. تنهدت بعمق ثم
قالت بألم :

- أنا اضطريت أبيع الفيلا وأبيع الشركة والعربية وكل حاجة عشان الديون
تتسدد .. انا بس كنت عايزة من حضرتك

توترت وشعرت بالخجل فلم تستطع أن تنظر الى وجهة .. خفضت رأسها
وقالت :

- يعني .. أنا محتاجة وظيفه

أرجع "سراج" ظهره الى الخلف .. ران الصمت للحظات ثم قال بصوته
الأجش :

- طيب تعالى بعد كام يوم أكون حاولت أشوفك شغلانه
ثم قال :

- انتى خريجة ايه ؟

قالت "آيات" بلهفة :

- بكالوريوس تجارة

قال "سراج" :

- اشتغلتى فين قبل كده ؟

قالت "آيات" بتوتر :

-لا انا مشتغلتش قبل كده دى أول مرة

ابتسم "سراج" بخرية ثم ما لبث أن قال :

- طيب هحاول أتصرف

فى تلك اللحظة دخل "عاصى" المكتب .. نظر اليه والده بدهشة .. قال

"عاصى" وهو يلقي نظرة على "آيات" :

- مساء الخير .. معلش مكنتش أعرف ان عندك حد

قال "سراج" وهو يشير الى "آيات" :

- دى بنت عمك "عبد العزيز"

نظر اليها "عاصى" وقد رفع حاجبيه يرمقها بنظرة متفحصة أدخلتها ..

ثم قال :

- "آيات" .. مش ممكن .. كبرتى واحلويتى

شعرت بسخونه فى وجهها وقد تضرجت وجنتاها بحمرة الخجل وأخفضت

رأسها .. ابتسم قائلاً :

- ازيك ايه أخبارك

قالت بخفوت وهى تتحاشى النظر اليه :

- الحمد لله

أشار "سراج" لمديرة أعماله بطرف خفى فقالت على الفور :
- بفكرك بإجتماع حضرتك اللي هيبدا دلوقتى يا "سراج" بيه
نهضت "آيات" على الفور وقالت بجرح :
- شكراً يا عمو .. أنا همشى دلوقتى وهاجى لحضرتك مرة ثانية ان شاء
الله تكون شوفتلى موضوع الشغل
أوماً "سراج" برأسه وقال بنبرة متعاليه :
- ان شاء الله

التفت "عاصى" الى والده بعد خروج "آيات" قائلاً بإستغراب :
- شغل ايه اللي بتتكلم عنه

قال "سراج" بتهكم :
- ابوها مات مديون وسابها على الحديدية ومش لاقيه وظيفه تعيش منها
وجيالى أشوفلها شغل
قال "عاصى" :

- وقولتلها ايه
قال "سراج" بنفاد صبر :
- قولتلها هبقى أتصرف .. المهم قولى هو انت ايه اللي نزلك القاهرة مش
قولت هتفضل فى العين السخنة
قال "عاصى" بصرامة :

- جاى أنخور ورا التيبيبيبيبيت اللي اسمه "آدم" ده .. وأشوف أى
حاجه أقدر أمسكها عليه والوى دراعه بيها
ثم هتف بغضب :

- تصور التيبيبيبيبيت ده شغل عنده مدير القرية بتاعتنا اللي طردته
ثم قال وكأنه يتحدث الى نفسه :
- بس وربنا ما أنا عاتقه .. هخليه يندم على اليوم اللي فكر فيه انه يقف
قصادى ويتحدانى

بمجرد خروج "آيات" من مكتب "سراج" أسرع مديرة أعماله بمهاتفة
"آدم" الذى كان فى منتصف اجتماع هام .. لكنه استأذن منهم ليرد عليها
لظنه بأنها تحمل له أخباراً هامة عن "سراج" و "عاصى" .. قال بلهفة
:

- أيوة
قالت مديرة أعمال "سراج" وهى تتلفت حولها لتتأكد من عدم وجود من
يسمعها :

- أيوة يا دكتور "آدم"

قال باهتمام :

- فى حاجة جديدة ؟ .. أنا فى اجتماع دلوقتى

قالت بسرعة :

- أيوة من شوية جت واحدة وقالت انها بنت أخو "سراج" بيه

اتسعت عينا "آدم" دهشة وقال :

- "آيات" ؟

انتبه "زياد" الذى كان جالساً على طاولة الإجتماعات الى اسم "آيات"

فنظر الى "آدم" باهتمام .. قالت مديرة أعماله "سراج" :

- مش عارفه اسمها

قال "آدم" بلهفة واهتمام :

- متعرفيش جتله ليه ؟

قالت المرأة :

- كانت جايه طالبيه منه شغل

قال بدهوة :

- شغل ؟

قالت :

- أيوة قالت ان باباها كان مديون وباعوا كل حاجة الفيلا والشركة وانها

عايزه شغل عشان تصرف منه على نفسها

خفق قلب "آدم" فى لوعة وصمت قليلا وهو يقول :

- يعنى هى دلوقتى بتدور على شغل .. وبعات كل حاجة ورثتها ؟

قالت المرأة :

- ده اللى فهمته من كلامها

قال "آدم" بحزم :

- طيب لو جتله تانى بلغينى .. ضرورى جداً .. فاهمة

تمتت المرأة بطاعة :

- أيوة فاهمة .. سلام دلوقتى

خرجت "آيات" وهى تشعر بالتوتر الشديد .. هربت دمعة من عينيها وهى

تخرج من الشركة .. كان تعلم بوجود مشاكل بين أبيها وعمها لكنها لم

تتوقع أن يقابلها بمثل هذا البرود .. ما ذنبها هى فى خلافاته مع والدها ..

كيف يعاملها بمثل تلك القسوة .. كادت "آيات" أن توقف سيارة أجرة

للعودة الى منزلها .. لكنها تذكرت بأنها يجب أن تقتصد فى نفقاتها حتى

تجد وظيفة تضمن لها مرتب فى آخر كل شهر .. فهى لا تثق فى أن

"سراج" سيجد لها عملاً .. رغم قدرته على ذلك بمجرد اشارة من اصبعه

.. لكنها شعرت كما لو كان يريد الانتقام من والدها فيها .. ورد ما فعله به .. ووقت "آيات" فى محطة الأتوبيس تنتظره مع من ينتظرونه .. مر بعض الوقت حتى جاء الأتوبيس .. تراحم الناس من حولها وهى تشعر بالضيق .. دخلت الى الأتوبيس بقوة الدفع .. شعرت بالراحة عندما وجدت مقعد بجوار الشباك مازال فارغاً .. جلست فى مكانها وانطلق الأتوبيس .. كانت تلك هى المرة الأولى التى تركب فيها المواصلات العامة .. نظرت من الشباك وهى تريح ظهرها الى الخلف وتستند برأسها على الزجاج تفكر فى حالها وفى مستقبلها المجهول .. شعرت و كأن شئ ما يلمسها فانتفضت ونظرت الى الرجل بجوارها والذى كان يبدو عليه علامات الهدوء .. كان ينظر أمامه وقد عقد ذراعيه فوق صدره .. عادت للنظر الى الشباك تتابع المارة بجوار الأتوبيس وقد شردت مرة أخرى .. مرة أخرى شعرت بنفس الشئ .. نظرت بجوارها بطرف عينيها فوجدت الرجل يتشيث فى ظهر المقعد الذى أمامه .. فقالت فى نفسها لعله تحرك من اهتزاز الأتوبيس .. فانزاحت حتى التصقت فى الشباك تماماً للتحاشى ملامسة الرجل لها .. بعد عدة دقائق شعرت بنفس الشئ .. التفتت تنظر اليه بحدده وقد تأكدت بأنه يتعمد لمسها بيده القريبة منها وهو عاقد ذراعيه فوق صدره .. شعرت بالغضب والضيق .. نظرت حولها فلم تجد أحداً منتبهاً لما يحدث .. انزوت أكثر بعيداً عنه .. لكنه اقترب بجسده منها ولمسها مرة أخرى .. تجمعت العبرات فى عينيها أرادت الصراخ فى وجهة لكنها خافت من فضح نفسها أمام ركاب الأتوبيس .. تذكرت "أسماء" عندما كانت فى وضع مشابه لوضعها وخشت هى أيضاً التحدث وعنفقتها "آيات" .. أما الآن فهى تشعر بما كانت تشعر به "أسماء" .. شعور بالنفور والخوف والغضب والمهانة والتقزز .. نظرت اليه وهتفت بصوت منخفض :

- لو سمحت ابعده شوية

تظاهر الرجل بأنه لم سمعها ومال يميناً ويساراً وكأن حركة الأتوبيس هى التى تهزه هكذا .. لم تعد "آيات" تحتمل اقترابه وملامسته اياها نهضت فجأة وطلبت من السائق التوقف .. نزلت "آيات" من الأتوبيس ودموعها فى عينيها .. أوقفت أول سيارة أجره قابلتها وأملته العنوان حيث انطلق بها الى بيت "حليمة"

دخلت "آيات" البيت ولم تجد أحداً به .. دخلت غرفتها وجلست على فراشها باكيه .. كانت تشعر بالغضب والمهانة .. أخذت تمسح بيدها المواضع التى لمسها الرجل بيده وكتفه وكأنها تريد ازالة آثاره منها ..

شعرت وكأن تلك الأماكن اتسخت بلمسه أياها .. كانت ترتعش بالبكاء فأحاطت جسدها بذراعيها وانحنت الى الأمام وهي تغمض عينيها دون ان تستطيع السيطرة على عبراتها التي تنساب على وجهها .. سمعت صوت هاتفها .. فنظرت الى حقيبتها الموضوعه بجوارها على الفراش ثم فتحتها لتجد رقماً غريباً .. كفكت دمعها وكادت أن تتجاهل الإتصال لولا أن تذكرت "سراج" فلعله وجد لها عملاً وأراد ابلاغها .. ثم فكرت بدهشة كيف علم برقمها .. لم تنتظر لتعرف الإجابة بل ردت بسرعة وهي تقول بلهفة :

- ألو

لم تسمع صوتاً فقالت مرة أخرى :

- ألو

اتأها صوت "آدم" قائلاً :

- أنا "آدم" يا "آيات"

انتفض قلبها بشدة .. وحبست أنفاسها المضطربة .. ثم قالت بصوت

حاولت أن يبدو طبيعياً :

- أيوة حضرتك عايز ايه ؟

على الرغم من محاولتها الا أن صوتها خرج متحشرج مضطرب .. باكى

.. فقال "آدم" بقلق :

- انتى كويسة ؟

بدا وكأنها استعادت تماسكها فقالت بحزم :

- أفندم حضرتك عايز ايه ؟

قال "آدم" وقد ازداد قلقه :

- انتى كنتى بتعيطى ؟

صمتت وقد انسابت العبرات من عينيها مرة أخرى فقال "آدم" بلهفة :

- "آيات" انتى كويسة .. اتكلمى معايا .. مالك فى ايه .. بتعيطى ليه

صاحت بصوتها الباكى :

- ملكش دعوة بيا .. دى حاجة متخصكش ولو سمحت متتصلش بيا تانى

شعر "آدم" بقلبه وقد كاد ينخلع من مكانه قلقاً وخوفاً وألماً من أجلها ..

فقال بصوت حانى :

- "آيات" انتى فين .. اديني عنوانك

صاحت بغضب :

- عنوان ايه اللى انت عايزه .. انت تبعد عنى خالص .. فاهم .. أنا لا

عايزة أشوفك ولا عايزه أسمع صوتك ولا عايزه أعرفك أبداً

قال "آدم" بألم وندم :

قال مدير الشركة بغضب :
- انت ملكش دعوة الا بشغلك وطالما حطيت مناخيرك فى حاجة
متخصكش بيقى متلزمينش .. مين قال ان العبوات منتهية الصلاحية .. أنا
راجل شريف وعندى ضمير
صاح "على" بغضب وهو يشير الى احدى العلب فى يده :
- العلبه دى التاريخ واضح عليها انه منتهى من شهرين
قال مدير الشركة :
- دى علبه وسط ملايين العلب السليمة
قال "على" بحده :
- لا العلب مش سليمة العلب كلها متشال من عليها الصلاحية والعمال
تحت فى المخزن عمالين بيظبعوا تواريخ جديدة على العلب
ثم صاح :
- حرام عليكموا هى الناس ناقصة .. اتقوا ربنا دول ناس غلابة ده مفيش
بيت فى مصر الا وفيه حد مريض .. حسبي الله ونعم الوكيل فيكوا ده انتوا
ربنا هينتقم منكوا شر انتقام
خرج "على" من الشركة وهو يحمل العلبه فى يده وأوقف سيارة أجرة
لكى يتوجه الى قسم الشرطة .. لكن لم يكد يبتعد بالسيارة عدة أمتار حتى
أقبل بعض الرجال الذين أوقفوا السيارة وجذبوه من ملابسه وأوسعوه
ضرباً وركلاً .. هرب سائق السيارة الأجرة وترك "على" فريسة لهؤلاء
الوحوش

صاحت "أسماء" بحنق :
- انتى ازاي سكتى .. ازاي سمحتيله يتحرش بيكى كده
قالت "آيات" بأعين دامعة وهى تجلس بجوارها على الفراش :
- كنت خائفة
نظرت اليها "أسماء" بعطف فقالت "آيات" بصوت مرتجف :
- فاكرة لما زعقتك وقولتلك فيه متكلمتيش ليه مصرختيش قولتلى انك
خوفتى من اللى ممكن يتقال عليكى .. انا حسيت بإحساسك ساعتها ..
حسيت انى خائفة ان الناس تبصلى وحش .. وكنت مخضوضة ومش
عارفه أعمل ايه .. فضلت أقوله يبعد بس هو مكنش بيبعد ومكنش حد
واخذ باله من اللى بيعمله يعني لو زعقت بصوت عالى كان ممكن يقول
انى بتبلى عليه .. عشان كده وقفت العربية ونزلت

عايزين يسممو الناس

قالت "إيمان" بغضب :

- منهم لله .. خلاص مبقاش فى ضمير للدرجة دى .. حتى الأكل

قال "على" بمرارة :

- قولى حتى الهوا .. دول لو طالوا يسممو الهوا هيسمموه

أغض "على" عينيه فى ألم .. وهو يقول فى نفسه .. يارب أحلامى

بسيطة للغاية .. لست كغيرى أحلم بالسيارة الفارهة والفيلا الأنيقة وعمل

يدر عليا الملايين .. بل حلمى هو وظيفة حلال وبيت مؤجر وأثاث متواضع

وزوجة تشاركنى حياتى .. يكن لى منها أبناء أعلمهم وأرببهم وأجعلهم

يسيرون فى درب الهدى والصلاح .. لست أبغى سوى حفظ كرامتى وماء

وجهى .. لست أرغب سوى فى العيش .. العيش فقط

جلس "آدم" أمام حاسوبه فى غرفته بالشاليه يتطلع الى صورة "آيات"

.. ظلت عيناه تمر فوق تلك الكلمات التى سطرتهما بيديها والتى تبثه فيها

حبها وشوقها .. نظر الى الكلمات بمزيج من الحسرة والألم .. وأخذ يفكر

كيف تحول هذا الحب بداخلها الى كره ونفور .. مازال لا يصدق .. مازال لا

يصدق أن حبه بداخلها قد مات وانتهى .. أخذ يقول لنفسه .. انساها يا

"آدم" .. أمامك مئات البنات اختر من شئت .. لكن شئ ما بداخله تمسك

بها .. هى وحدها .. شعر بأنه لا يريد غيرها .. يريد لها وحدها .. بصفاتها

ونقائنها وبرائتها وطيبة قلبها .. تذكر اللحظات التى جمعتهما فى الماضى

وكيف كانت معه صادقة المشاعر .. واضحة كالشمس .. رقيقة كرقعة

الندى على ورقات الشجر .. كم تهفو نفسه اليها .. الى النهل من بحر

حنانها وعذوبة صوتها .. تذكر أنه لم يصلى العشاء بعد .. فوقف يصلى

بين يدي الله وجد نفسه يدعو الله فى سجوده أن يغفر له .. وأن يجمع بينه

وبين "آيات" .. ظل يردد دعائه كثيراً دون ملل أو كلل .. لا يعلم كيف

سيتحقق ذلك .. كيف يمكن أن يتطهر من ذنوبه وهو مازال يعمل فى تلك

القرية .. لن يستطيع ترك عمله .. عمله الذى بناه وكبره ويدر عليها مبالغ

طائلة .. وفى نفس الوقت يتمنى رضا ربه عليه .. يتمنى "آيات" بقربه ..

تشاركه حياته وأحلامه وطموحاته .. يريد مغفرة ربه ثم مغفرة "آيات" ..

لكن كيف السبيل؟! .. كيف يحقق تلك المعادلة الصعبة؟! .. كيف ينجح

فى الجمع بينهم؟! .. لديه مثلث من ثلاث زوايا .. الله .. "آيات" .. عمله

.. كيف يمكن أن يجمع الثلاثة زوايا فى خط مستقيم؟! .. كيف؟! .. ليس

أمامه سوى حل واحد .. أن يخترق أحد أضلع المثلث ويثنيه الى أن يصبح خطأ مستقيماً .. لكنه وقف حائراً .. أي الأضلاع يكسر؟!!

الفصل التاسع عشر من رواية جواد بلا فارس



استيقظت أم "آدم" من نومها وخرجت من غرفتها لتجد "آدم" واقفاً في الشرفة .. اتجهت اليه وقالت :
- صباح الخير يا "آدم"
التفت "آدم" وابتسم بوهن قائلاً :
- صباح النور يا ماما
نظرت اليه أمه بإستغراب وقالت :
- انت ايه اللي مصحيك بدرى كده ؟
قال "آدم" وقد بدت على وجهه تعبيرات حزينة وفي عينيه حيرة
استشعرتها أمه من أول وهلة :
- أنا منمتش أصلاً
اقتربت منه ووقفت بجواره على سور الشرفة ونظرت اليه قائلة بإهتمام :
- خير يا ابني في ايه
تنهد "آدم" محاولاً تخليص نفسه من ضيقه الذي يجثم على صدره ..
صمت ولم يجيب فحنته قائلة :
- أنا أمك يا "آدم" لو في حاجة قولى يا ابني يمكن أقدر أساعدك
التفت "آدم" اليها وقال بحزن وضيق :

- "آيات" .. والدها اتوفى
صمتت والدته قليلاً ثم قالت :
- "آيات" خطيبتك القديمة مش كده ؟

أوما برأسه فقالت أمه بأسى :
- لا حول ولا قوة الا بالله ربنا يرحمه ويغفرله
قال "آدم" وهو ينظر الى الشمس التي بدأت أشعتها تلوح فى الأفق :
- باباها كان مديون واضطرت تبيع كل ميراثها عشان تسدد ديونه ..
وحتى الفيلا باعتها ومعرفش هى عايشه فين ولا ازاي
ثم زفر بضيق قائلاً :
- وراحت لـ "سراج" عمها تطلب منه شغل
سألته أمه باستغراب :
- وانت يا ابني عرفت كل ده ازاي هو انتوا لسه بتكلموا بعض
قال "آدم" بضيق :
- عرفته وخلاص .. حاولت أكلها كتير مردتش عليا وفين وفين لما ردت
.. ولما طلبت عنوانها وانى أظمن عليها قالتلى انها لا عايزة تشوفنى ولا
عايزه تسمع صوتى وانها مش هتشغل الشريحة دى تانى ومن ساعتها
وموبايلها مقفول
تابعت أمه باهتمام تعبيرات الضيق على وجهه .. لاحت ابتسامه حانيه
على شفيتها وهى تقول :
- انت حبتها يا "آدم" ؟
نظر "آدم" الى أمها بحزن وعيناه تقول : نعم .. أحبها .. أحبها
اتسعت ابتسامه أمه وهى تقول بحماس :
- دى بنت طيبة وبنت حلال .. أول ما شوفتها بصراحة معجبنيش شكلها
يعني كانت بتحط مكياج كتير ولبسها ضيق فبصراحة اضايقت بس لما
اتكلمت معاها حسيت انى ارتحتلها أوى وحسيت انها مؤدبة ومحترمة
ابتسم "آدم" بوهن قائلاً :
- حبيتها يعني ؟
قالت أمه بحماس :
- بصراحة أيوة .. ومادمت انت كمان حبيتها يبقى يا ابني متضيعهاش من
إيدك
اختفت ابتسامه "آدم" وهو يقول :
- ماما انتى متعرفيش اللى حصل ولا تعرفى احنا سبنا بعض ليه وازاي
نظرت اليه أمه نظرة مشجعة على الحديث .. فأخذ نفساً عميقاً ثم قص

عليها كل شئ .. بدأ من الخطة التي وضعها لخطبة "آيات" وابتزاز "عبد العزيز" بورقة زواجها لإسترجاع حقه الذي سلبه "سراج" و "عاصي" .. الى علاقته بـ "بوسى" وفضحها اياه عند "آيات" والفيديو الذي صورته لهما معاً .. انتهى من كلامه الذي شعر بالضيق الشديد وهو يقصه على مسامع والدته .. كان ينظر الى أمامه أثناء حديثه وهو لا يجروء على النظر اليها .. شعر بالحزن والندم الشديد وهو يتذكر ما فعله بـ "آيات" .. ومن قبلها نفسه .. ران الصمت طويلاً .. كانت أمه تحاول استيعاب ما قال .. تحاول استيعاب أن بأن ابنها زانى .. ومخادع .. تحاول استيعاب مدى السوء الذي وصل اليها "آدم" .. لكنه فلذة كبدها .. وسيبقى كذلك .. مهما فعل ستسامحه وتحاول أن تقومه وتدعو له بالهداية .. وضعت يدها على كفته وهي تنظر الى تعبيرات وجهه .. والى عيناه التي بدأت فى اللمعان بما فيهما من عبرات .. ثم قالت بحنان :

- ربنا غفور رحيم يا ابني .. وزى ما قال سيدنا النبي صلى الله عليه وسلم "كل ابن آدم خطاء، وخير الخطائين التوابون" .. ومن رحمة ربنا ان باب التوبة مفتوح فى كل وقت وكل زمان وكل مكان .. بس انت ارفع ايديك وقول يارب .. ده مفيش أكرم منه ولا أرحم منه .. بيغفر ويسامح ويمحى كل ذنوبك فى ثانيه .. بس انت توب واستغفر يا حبيبي ومتخليش الشيطان يوسوسلك انك ملكش توبة أو ان ربنا مش هيغفرلك نظر اليها "آدم" بلهفة وتطلب عيناه وترجوها الإستزاده من هذا الكلام الذى يبعث فى نفسه الأمل .. فأكملت بحماس :

- فى قصة النبي صلى الله عليه وسلم حكاها أنا مش حفظه الكلام بالظبط بس هحكياها لك أكنها قصة .. كان زمان أوى قبل ما ربنا يرسلنا النبي صلى الله عليه وسلم .. كان فى راجل قتل 99 روح .. والراجل ده حس فى يوم انه عايز يتوب وعايز يبقى بنى آدم كويس .. راح لراهب وقاله انه عايز يتوب وانه قتل 99 واحد .. الراهب قاله انت ملكش توبه .. فراح الراجل ده موت الراهب وكمل عدد اللي قتلهم ل 100 .. بعد كده الناس قالته فى عالم كبير روحه وقوله انك عايز تتوب .. راح للعالم ده وقاله انه قتل 100 انسان وعايز يتوب .. العالم قاله وايه اللي مانعك انك تتوب ! .. توب بس لازم تسبب المكان اللي انت فيه لان المكان ده مكان مش كويس وهيترك تانى للمعاصي والذنوب لو انت فضلت فيه .. وروح البلد الفلانيه دى فيها ناس كويسه هياخدوا بايدك .. الراجل مكذبش خبر بس وهو فى الطريق مات .. وعشان هو كان فعلا عايز يتوب وهو واقع بيحتضر اتجه بصدرة ناحية البلد الطيبة الى كان رايح لها .. بعد ما مات

نزلت ملايكة الرحمة عايزين يقبضوا روحه .. ونزلت ملايكة العذاب عايزين يقبضوا روحه .. والملايكة اتخاصموا عليه .. ملايكة الرحمة قالوا ده تاب وكان عايز يقرب من ربنا واستغفر لذنوبه ورايح للبلد اللي فيها صحبة كويسة عشان يساعده على التوبة .. وملايكة العذاب قالوا ده راجل معملش أى حاجة خير فى حياته ولا حتى حسنه واحدة .. ساعتها ربنا ارسل ملاك فى صورة انسان خلوه حكم بينهم .. قالهم قيسوا المسافة بين البلد اللي عاش فيها الراجل ده وبين المكان اللي مات فيه .. وكمان قيسوا المسافة بين البلد الطيبة اللي كان رايحلها وبين المكان اللي مات فيه .. واذا طلعت المسافة الأولى أكبر من الثانية يبقى تقبضه ملايكة العذاب .. واذا كانت المسافة الثانية أكبر من الأولى يبقى تقبضه ملايكة الرحمة .. قاسوا المسافة ولقوا ان المسافة الأكبر هي اللي بين المكان اللي مات فيه وبين البلد الطيبة اللي كان رايحلها فقبضته ملايكة الرحمة وربنا غفرله ذنوبه كلها .. رغم انه معملش أى حسنة فى حياته لحد ما مات .. بس مات على توبة وعلى نيه صادقة فى التوبة وعلى عمل يدل على انه فعلا تاب

شعر " آدم " بقشعريرة تسرى فى جسده وهو يستشعر رحمة الله عز وجل .. تذكر بالفعل الحديث الذى قاله النبي صلى الله عليه وسلم والذى شرحته أمه الطيبة دون أن تتذكر نصه .. " كان فيمن كان قبلكم رجل قتل تسعة وتسعين نفساً، فسأل عن أعلم أهل الأرض، فدلّ على راهب، فأتاه فقال: إنه قتل تسعة وتسعين نفساً، فهل له من توبة؟ فقال: لا. فقتله فكمل به مائة، ثم سأل عن أعلم أهل الأرض، فدلّ على رجل عالم، فقال: إنه قتل مائة نفس، فهل له من توبة؟ فقال: نعم، ومن يحول بينه وبين التوبة، انطلق إلى أرض كذا وكذا، فإنّ بها أناساً يعبدون الله، فاعبد الله معهم، ولا ترجع إلى أرضك، فإنها أرض سوء. فانطلق حتى إذا نصف الطريق أتاه الموت، فاختصمت فيه ملائكة الرحمة وملائكة العذاب، فقالت ملائكة الرحمة: جاء تائباً مقبلاً بقلبه إلى الله. وقالت ملائكة العذاب: إنه لم يعمل خيراً قط. فأتاهم ملكٌ في صورة آدمي، فجعلوه بينهم، فقال: قيسوا ما بين الأرضين، فإلى أيتهما كان أدنى فهو له. فقاوسه، فوجدوه أدنى إلى الأرض التي أراد، فقبضته ملائكة الرحمة "

تأملت أمه انفراجة أساريه فإبتسمت قائله :

- " إِنَّ اللَّهَ غَفُورٌ رَّحِيمٌ " يا ابني .. وربنا سبحانه وتعالى يقول " قُلْ يَا عِبَادِيَ الَّذِينَ أَسْرَفُوا عَلَىٰ أَنفُسِهِمْ لَا تَقْنَطُوا مِن رَّحْمَةِ اللَّهِ إِنَّ اللَّهَ يَغْفِرُ الذُّنُوبَ جَمِيعًا إِنَّهُ هُوَ الْغَفُورُ الرَّحِيمُ "

تهنأ "آءم" فى راحة وقد بدأ الأمل يءب فى أوصاله .. الأمل فى الكثير والكثير .. الأمل فى التوبة .. الأمل فى التطهير من ذنوبه وآثامه .. الأمل فى أن يصبح انسان أفضل .. الأمل فى استرجاع "آيات" .. من المؤكد أنها لن ترفض العوءة اليه اذا ما لمست صدق توبته .. التفت الى أمة قائلاً بحماس :

- تفكرى ممكن "آيات" ترجعلى لو حست فعلاً انى اتغيرت وانى نءمت على كل اللى عملته ؟

أشارت أمة الى السماء بإصبعها وقالت :

- اسأله وهو يءيك .. مفيش حاجة بعيده عليه .. وربك بيقول " وَإِذَا سَأَلَكَ عِبَادِي عَنِّي فَإِنِّي قَرِيبٌ أُجِيبُ دَعْوَةَ الدَّاعِ إِذَا دَعَانِ فَلْيَسْتَجِيبُوا لِي وَلْيُؤْمِنُوا بِي لَعَلَّهُمْ يَرْشُدُونَ "

أخذ "آءم" نفساً عميقاً وزفره فى راحة وقد شعر بصدرة قد اتسع وشرح .. اتسعت ابتسامته وهو ينظر الى أمة ثم قبل رأسها ويءيها وهو يقول بتأثر :

- ربنا يخليكى ليا يا ماما وميحرمنيش منك أبداً

نظرت اليه بحنان قائله :

- ويباركلى فىك يا ابنى وميحرمنيش منك أبداً

استيقظت "آيات" من نومها وجلست على فراشها تفكر فى وضعها والى الطريق المسدود الذى وصلت اليه .. تهنأت فى يأس وهى تتذكر مقابلة عمها التى أشعرتها كم هى وحيدة فى هذه الدنيا دون سند أو دعامة ترتكز عليها .. اغرورقت عيناها بالعبارات وهى تتذكر دعامتها التى فقءتها .. أببها الحبيب .. الذى تشعر الآن بدونه بالضياع .. أغمضت عينيها وهى تتخيله أمامها تلقى بنفسها بين ذراعيه وتريح رأسها على كفته وتترك له همومها ليزيحها بيءيه من فوق كتفيها .. ثم يعانقها بشءة يخفيها بين ذراعيه ويحميها من شرور الناس وأذاهم .. فتحت عينيها لتعود مرة أخرى الى واقعها المرير وهى تقول لنفسها .. همومك لن يزيحها غيرك يا "آيات" .. ولن يحميكى احداً غيرك .. يجب أن تعتادى ذلك .. يجب أن تكونى أقوى .. فالضربة التى لا تقسمك يجب أن تجعلك أقوى ..

توجه "عاصى" الى كلية التجارة بجامعة القاهرة يحاول أن يتقصى أى معلومات تقع تحت يءيه عن "آءم" .. قابل هناك احدى الطالبات التى قالت له :

- أيوة عارفاه بس هو السنة دى واخذ أجازة بس كان بيدي سنة رابعة
السنة اللى فاتت

قال "عاصى" بإهتمام :

- أصل أنا قريبه وكنت مسافر ومش عارف أوصله لانه غير رقمه وكمان
غير مكان سكنه .. متعرفيش أقدر ألاقيه فين .. أو مين هنا من الدكاترة
قريب منه ويعرفه عن قرب

قالت الفتاة بحماس :

- ممكن تسأل العميد

بدا على "عاصى" التردد قليلاً فالعميد لن يأتيه الا برقمه وعنوانه وهو لا
يريد تلك المعلومات .. بل يبحث عما يستطيع به أن يلوى ذراع "آدم" ..
فقال للفتاة :

- أنا فعلاً هسأل العميد .. طيب انتى متعرفيش الطلبة هنا بيقولوا عليه ايه
.. أكيد انتوا بينكوا وبين بعض بتبقوا عارفين الدكتور الكويس من
الوحش وبتكون عارفين حاجات ممكن العميد ميعرفهاش
قالت الفتاة وقد شعرت بالإستغراب من أسئلته :

- لأ أنا معرفش عنه حاجة غير انه كان خاطب واحدة من الكلية السنة
اللى فاتت وسابوا بعض .. غير كده معرفش حاجة عن دكتور "آدم" ..
وهو معاملته مع الطلبة كويسة
قال "عاصى" بإهتمام :

- قولتلى كان خاطب واحدة من الكلية .. طيب متعرفيش سابوا بعض ليه
.. وهو اللى سابها ولا هى اللى سابته
بدأت الفتاة بالشعور بعدم الراحة من أسئلته الغريبة فقالت بنفاذ صبر
وهى تهتم بالانصراف :

- لا معرفش سابوا بعض ليه .. عن اذنك

أوقفها "عاصى" وقال بلهفة :

- طيب اسمها ايه البنت دى ؟

قالت الفتاة بحنق :

- اسمها "آيات اليمانى" .. ممكن تعدينى ؟

نظر "عاصى" الى الفتاة بدهشة وقال :

- "آيات اليمانى" ؟ .. تقصدى "آيات عبد العزيز حسان اليمانى" ؟

قالت وهى تغادر مسرعة :

- معرفش

لكن "عاصى" لم ييأس .. سأل حتى تأكد من أن "آيات" هى الفتاة التى

خطبها "آدم" ثم انفصلا .. شعر بمزيج من الدهشة والانتصار .. فما هو يعرف معلومة جديدة قد يتوصل من خلالها الى نقطة الضعف التي سيخترقها للوصول الى "آدم" .. ومن ثم تحطيمه

أثناء تناول طعام الغداء قالت "أسماء" :
- متصلة بعمك كده يا "آيات" يمكن يكون شافك الشغل اللي قالك عليه
قالت "آيات" وهي تتناول طعامها :
- مش معايا رقمه .. وبعدين قالى أروحله بعد يومين
قالت "أسماء" :
- اليومين فاتوا خلاص
توقفت "آيات" عن تناول الطعام وقالت بياس :
- تفكرى فعلاً هيشغلى ؟
قالت "حليمة" بحماس :
- طبعاً يا بنتى الضفر ميطلعش من اللحم ومهما كان انتى بنت أخوه
قالت "آيات" بتهكم :
- يا دادة انتى مشفتيش قابلى ازاى .. أكنى واحدة غريبة ميعرفهاش
قالت "حليمة" وهي مازالت تصر على أن كل الناس طيبين مثلها :
- معلى دى ساعة شيطان .. لما يشوفك تانى النفوس هتصلى ويخدك
تحت جناحه
قالت "آيات" بشرود :
- ياريت فعلاً النفوس تصفى أنا مليش غيره دلوقتى
نظرت اليها "أسماء" بعتاب قائلة :
- وأنا ودادة "حليمة" روحنا فين يعني
نظرت اليهما "آيات" بإمتنان وقالت :
- انتوا دلوقتى كل أهلى وكل صحابي
ابتسمت حليمة وهي تربت على كتفها وكتف "أسماء" قائلة :
- وانتوا الاتنين بناتى اللي مخلفتهمش .. أنا لا اتجوزت ولا خلفت بس
ربنا رزقتى بيكوا انتوا الاتنين تونسوا وحدتى
ابتسمت الفتاتان لطيفة "حليمة" وحنانها .. قامت "حليمة" بعدما أنهت
طعامها فنظرت "أسماء" الى "آيات" قائلة :
- هو لسه فى ناس بالطيبة دى
ابتسمت "آيات" وهي تقول :

"سراج" و هو ينظر اليها :
- سببي بياناتك ولو لقيت حاجة مناسبة هبقى أبغك
خرجت "آيات" من مكتبه وهى تملى مديرة مكتبه بمرارة رقمها
وعنوانها فسألته المرأة باهتمام :
- ده عنوان بيتك مش كدة
قالت "آيات" بشرود :
- لا ده عنوان ست كانت بتشتغل عندنا أنا أعده معاها فى بيتها
غادرت الشركة كما فى المرة السابقة .. عيناها ممتلأتان بالدموع .. دونت
المرأة بيانات "آيات" فى ورقة ووضعتها فى أحد الأدراج وعادت الى
الانهماك فى عملها عازمة على الاتصال بـ "آدم" فى نهاية اليوم بعد
الإنهاء من عملها لإبلاغه بعودة "آيات" مرة أخرى
عادت "آيات" الى البيت وقصت على "أسماء" ما حدث فقالت لها :
- ده راجل تيبيبيبيبيب صحيح
قالت "آيات" بألم :
- حسسنى انى راحة أشحت منه .. أنا خلاص مستحيل أروحله تانى ..
مستحيل أطلب منه أى حاجة تانى
ثم قالت :
- وأصلاً مكنتش مركزة ساعتها وملتيت مديرة مكتبه رقمى القديم .. نسيت
انى كسرت الشريحة وغيرت الرقم
قالت "أسماء" وهى تتنهد بتحسر :
- وهنعمل ايه دلوقتى يا "آيات" ؟

- يعنى "آيات" بنت عمى كانت خطيبة "آدم"
ألقي "عاصى" تلك العبارة على مسامح "سراج" الذى اتسعت عيناه
دهشة وهو يقول :
- معقوله .. انت متأكد يا "عاصى"
قال "عاصى" بثقه :
- أيوة متأكد .. واللى عرفته ان حصل مشكله بينها وبينه يوم كتب الكتابة
بعد ما المأذون جه .. بس محدش يعرف ايه هى المشكلة دى بالظبط
أخذ "سراج" يفكر وقد علمت الدهشة ملامحه .. فقال "عاصى" بحزم :
- لازم أعرف من "آيات" كل حاجة .. اكيد تعرف معلومات عن "آدم"
ممكن تفيدنا ونقدر نستخدمها ضده
قال "سراج" وكأنه يتذكر أمراً :

- آه على فكرة كانت هنا النهاردة
قال "عاصى" باهتمام :
- وبعدين ؟
قال "سراج" بلامبالاة :
- قولتها لسه ملقتلهاش شغل وانى هبقى أتصل بيها لو لقيت حاجة
مناسبه
قال "عاصى" بحق :
- يا بابا .. طيب وبعدين هنوصلها ازاي دلوقتي ؟
قال "سراج" وهو يضغط الزر لينادى مديرة مكتبه :
- أنا قولتها تسيب رقمها وعنوانها
دخلت المرأة وقالت :
- ايوة يا فندم
قال لها "عاصى" بلهفة :
- "آيات" بنت عمى سابت بياناتها قبل ما تمشى ؟
أومأت المرأة برأسها وقالت :
- أيوة سابت رقمها وعنوانها
قال "عاصى" بعجالة :
- طيب هاتيه بسرعة
توجهت الى مكتبها وأخرجت الورقة التى احتفظت لها وسلمتها الى
"عاصى" الذى نظر اليها وعلى شفثيه باتسامه انتصار .. ما كادت تعود
الى مكتبها حتى ضربت جبينها بكفها وهى تتمتم بغیظ :
- أووووف .. غبية
أمسكت هاتفها واتصلت بـ "آدم" الذى أجابها بلهفة قائلاً :
- ألو .. ها فى جديد
قالت المرأة بضيق :
- أيوة البنت جت تانى
قال "آدم" بلهفة وهو يهب واقفاً :
- ها وبعدين
قالت المرأة بصوت خافت وهى تتلفت حولها :
- "سراج" بيه قالى آخذ منها بياناتها قبل ما تمشى .. وكتبتلى رقمها
وعنوانها
قال "آدم" بسعادة وقد اتسعت ابتسامته وأمسك قلمه من فوق المكتب
بلهفة :

- طيب مليني الرقم والعنوان

قالت المرأة بحرج :

- مش معايا

اخذت ابتسامه "آدم" وهو يقول باستغراب :

- مش قولتي انها اديتك رقمها وعنوانها

قالت المرأة :

- أيوة بس "عاصي" بيه طلبهم واديتله الورقة ونسيت أكتبها عندي

قال "آدم" بغيظ :

- أعمل فيكي ايه دلوقتي

قالت المرأة بسرعة :

- متقلقش هحاول أتصرف

قال "آدم" بحزم :

- الرقم والعنوان عايز أعرفهم فى أقرب وقت .. النهاردة قبل بكرة

قالت المرأة بثقه :

- متقلقش هحاول أوصلهم

خرج "عاصي" من مكتب "سراج" فأسرعت بانهاء المكالمه .. وتابعته

بعينيهما الى أن انصرف وهى تفكر فى طريقة تحصل بها على الورقة التى

سلمتها الى "عاصي" بيدها

عاد "على" الى بيته مستنداً الى والده ووالدتها .. جهزت "إيمان"

غرفته وفراشه .. مدد عليه جسده المتعب من آثار الضرب والكدمات ..

أسرعت والدته بالذهاب الى المطبخ لإعداد ما يتقوى به ابنها .. نظرت

اليه "إيمان" بإشفاق وقالت :

- انت كويس يا "على" ؟

قال "على" مبتسماً بضعف :

- الحمد لله يا "إيمان"

جلست على المقعد امامه وقالت بحماس مصطنع :

- ان شاء الله الظروف هتبقى أحسن وهتلاقى الشغلانہ اللى بتحلم بيها

قال "على" بتهكم :

- طبعاً طبعاً

علمت "إيمان" بأن كلماتها لن تصلح لمواساته فنهضت وهى ترمقه

بنظرات حائيه .. اخرج "على" مصحفه من درج الكمودينو بجوار فراشه

الصغير و وأخذ يقرأ في كتاب الله الي أن وصل الي الآية في سورة الإسراء التي تقول " مَنْ كَانَ يُرِيدُ الْعَاجِلَةَ عَجَلْنَا لَهُ فِيهَا مَا نَشَاءُ لِمَنْ نُرِيدُ ثُمَّ جَعَلْنَا لَهُ جَهَنَّمَ يَصْلَاهَا مَدْمُومًا مَدْحُورًا * وَمَنْ أَرَادَ الْآخِرَةَ وَسَعَى لَهَا سَعْيَهَا وَهُوَ مُؤْمِنٌ فَأُولَئِكَ كَانَ سَعْيُهُمْ مَشْكُورًا * كُلًّا نُمِدُّ هَؤُلَاءِ وَهَؤُلَاءِ مِنْ عَطَاءِ رَبِّكَ وَمَا كَانَ عَطَاءُ رَبِّكَ مَحْظُورًا * انظُرْ كَيْفَ فَضَّلْنَا بَعْضَهُمْ عَلَى بَعْضٍ وَلِلْآخِرَةِ أَكْبَرُ دَرَجَاتٍ وَأَكْبَرُ تَفْضِيلًا " .. تنهد " على " في ضيق من نفسه وهو يشعر بأن انك في طلب الدنيا وخف شيئاً فشيئاً عن سعيه وعمله لدار البقاء .. تتمم في خفوت :

- استغفر الله العظيم

وما زال يستغفر حتى أذن المغرب .. فتحامل على نفسه متثاقلاً وذهب الي الحمام ليتوضأ .. رأته والدته فساعدته في الوضوء .. ثم نظرت اليه بدهشة عندما وجدته متوجهاً الي الباب وقالت له :

- رايح فين يا " على " ؟

قال وهو يرتدي حذائه :

- اشتقت للصلاة في المسجد

جلس " على " على أحد المقاعد يصلى .. أخذ ينظر الي الأرض بحسرة وقد اشتاق لوضع جبهته عليها خضوعاً لله عز وجل .. أنتهى من صلاته وقد شعر بسكينة في قلبه .. اقترب منه أحد الرجال ذو السمات الإسلامي والذي كان يعرفه شكلاً دون أن يتحدث معه .. قال له الرجل :

- شفاك الله وعافاك يا أخي

ابتسم له " على " قائلاً :

- جزاك الله خيراً

ابتسم له الرجل ببشاشه وقال :

- افتقدتك اليومين اللي فاتوا .. لانى متعود أشوفك دائماً في المسجد ما

شاء الله عليك

قال " على " بأسى :

- مفيش كنت تعبان شوية

نظر الرجل الي ذراع " على " الموضوع في الجبيرة وقال :

- حادثة ؟

صمت " على " قليلاً ثم قال :

- يعني حاجة زي كدة

ربت الرجل على كتف " على " وقد انتبه الي تعبيرات الحزن والأسى على

وجهه وقال :

- أبشر ان شاء الله
نظر اليه " على " قائلاً :

- تفتكر فى أمل ؟

ابتسم الرجل وقال :

- النبي صلى الله عليه و سلم علمنا ان " ما من مسلم يدعو بدعوة ليس فيها اثم ولا قطيعة رحم إلا أعطاه الله بها إحدى ثلاث : إما أن تُعجل له دعوته ، وإما أن يدخرها له في الآخرة ، وإما أن يصرف عنه من السوء مثلها ، قالوا : إذا نُكِّرَ ؟ قال : الله أكثر "

تمتم " على " :

- عليه الصلاة والسلام

أكمل الرجل قائلاً :

- وكمان النبي صلى الله عليه وسلم قالنا " ادعوا الله تعالى وأنتم موقنون بالإجابة " .. أحسن الظن بالله يكن كما ظننت ان شاء الله

قال " على " للرجل :

- فعلاً أنا كان نقصنى اليقين فى إجابة دعائى .. جزاك الله خيراً انك

ذكرتني

ربت الرجل على كتفه .. ظل " على " جالساً فى المسجد يقرأ من كتاب الله حتى حان موعد العشاء فأداها فى جماعة .. ظل يدعو الله كثيراً فى سجوده وهو يعلم أن أقرب ما يكون العبد من ربه وهو ساجد .. فظل يدعو بيقين فى اجابة دعائه وبالرضا والتسليم لقضائه

سمعت " آيات " صوت الجرس وهى جالسة فى غرفتها تقرأ فى مصحفها .. فالتفت الى " أسماء " الواقفة فى الشرفة وقالت :

- مين اللى بيخبط علينا

نظرت اليها " أسماء " قائله :

معرفش تلاقى حد من جيران دادة " حليلة "

ثم قالت :

- فى عربية شيك أوى وقفت تحت البيت ونزل منها راجل شكله مش من المنطقة تفتكرى هو اللى بيخبط ؟

قالت " آيات " باستغراب :

- هيكون مين يعنى ؟

قالت " أسماء " وهى تمط شفيتها :

- معرفش بس أول ما الراجل دخل من المدخل سمعت بعدها بشوية صوت

الجرس

لم تكذ تنتهى من جملتها حتى طرقت "حليمة" باب الغرفة ونظرت الى "آيات" وهى تقول بحماس :

- "آيات" يا بنتى .. ابن عمك بره

انتفضت "آيات" وهبت واقفة وهى تقول :

- ابن عمى مين ؟

نظرت "أسماء" بدهشة تتابع ما يحدث فقالت "حليمة" مبتسمة :

- "عاصى" ابن عمك أعد بره فى الصالون مستنيكي

تبادلت الفتاتان نظرة دهشة .. قالت "أسماء" بلهفة :

- قومي البسى بسرعة أكيد جاى يتكلم معاكى عن الشغل اللى طلبتیه من عمك

ارتدت "آيات" ملابسها فى عجلة وقلبها يخفق بشدة من فرط توترها ..

خرجت فوقف "عاصى" يستقبلها مبتسماً وهو يمد يده اليها قائلاً :

- ازيك يا "آيات"

شعرت بالخرج فمدت يدها تسلم عليه .. ثم نزعته من يده سريعاً وهى

تقول :

- الحمد لله .. اتفضل

أشارت الى المقعد فجلس .. دخلت "حليمة" وقدمت له الشاى بينما كانت

"أسماء" تستمع الى حديثهما وهى واقفة بالقرب من الصالون .. بدأ

"عاصى" حديثه قائلاً :

- أولاً بعذر انى كنت مقصر فى حقك الفترة اللى فاتت بس أنا مكنتش هنا

.. أنا كنت فى العين السخنة ولسه راجع من كام يوم وراجع تانى على

هناك

قالت "آيات" بإبتسامة مجاملة :

- لا أبداً لا تقصير ولا حاجة

قال "عاصى" بإبتسامة مشجعة :

- طيب بما ان مفيش زعل يبقى نخرج نتعشى مع بعض

شعرت "آيات" بالخرج فأسرع قائلاً :

- عشان نتكلم فى تفاصيل الشغل

قالت "آيات" بلهفة :

- شغلى ؟

قال "عاصى" بحماس :

- أيوة هتشتغلى معايا .. بس عايزن نتكلم فى التفاصيل مع بعض وفرصة

ندردش شوية وأعرف أخبار بنت عمى

صمتت "آيات" قليلاً ثم قالت :

- طيب ممكن صحبتى تيجي معنا

قال بدهشة :

- صحبتك ؟

قالت "آيات" شارحة :

- أيوة هي عايشة معايا هنا

شعر "عاصى" بالضيق لأنه أراد التحدث معها بمفردها لكنه خشى أن

ترفض فقال :

- طبعاً طبعاً دى تنورنا

ابتسمت "أسماء" الى كانت تستمع الى الحوار فإستأذنت "آيات" لترتدى

ملابسها .. دخلت "أسماء" الغرفة تنتظرها وبمجرد أن أغلقت "آيات"

الباب قالت "أسماء" بسعادة :

- الحمد لله أخيراً الدنيا هتبتدى تتظبط معنا

قالت "آيات" بضيق :

- كان ايه لزمته موضوع العشا ده .. ما كان قالى التفاصيل هنا وخلصنا

قالت "اسماء" بحماس :

- يا بنتى وفيها ايه ما نتعشى معاه وبعدين ما أنا هكون معاكى مش

هتكونى لوحديك

كانت "آيات" تشعر بعدم اقتناع لكنها أرغمت نفسها على إمرار هذا الأمر

من أجل حل مشكلتها الحالية .. مضى بهما "عاصى" الى أحد المطاعم

الراقية .. تذكرت "آيات" زيارتها السابقة لذلك المطعم مع والدها .. مرت

سحابة حزن أمام عينيها لتلك الذكرى .. ثم ما لبثت أن نفضت تلك

الذكريات من رأسها ورسمت على شفثيها ابتسامة مجاملة عندما نظر

اليها "عاصى" مبتسماً .. قالت "أسماء" بمرح :

- حلو أوى المكان ده

ابتسم لها "عاصى" قائلاً :

- كويس انه عجبك

ثم التفت الى "آيات" قائلاً :

- وبنت عمى .. عاجبها المكان ولا لا

ابتسم "آيات" قائله :

- أيوة .. جميل

شرع فى طلب الطعام لثلاثتهم .. نظر اليهما "عاصى" مستفهماً :

- انتوا صحاب من زمان
- قالت "أسماء" بمرح :
- بأنا أكثر من 4 سنين مع بعض
- التفت اليها "عاصي" قائلاً :
- وانتي خريجة ايه يا آنسة "أسماء"
- قالت "أسماء" مبتسمة :
- أنا زى "آيات" ما احنا كنا زمايل فى الجامعة ومن هناك اتعرفنا على
- بعض وبقينا صحاب و أكثر من الإخوات
- رفع "عاصي" حاجبيه قائلاً :
- واضح فعلاً انكوا قريبين من بعض أوى بدليل انكوا عايشين مع بعض
- توترت "أسماء" فلم ترد مناقشة أسباب تركها لبيتها .. التفت "عاصي"
- الى "آيات" قائلاً :
- شكلك من النوع الهادى يا "آيات" .. أعده ساكته ومبتكلميش
- قالت وقد بدأت تضيق ذرعاً من جلوسها معه :
- لأ عادى
- ثم قالت بجديّة :
- ياريت نتكلم فى الشغل .. ايه التفاصيل اللي قولت اننا هناقشها مع بعض
- فى تلك اللحظة حضر النادل ووضع أمامهم أصناف الطعام .. بدأ
- "عاصي" فى تناول طعامه وهو يقول :
- أنا عندى قرية سياحية فى العين السخنة .. وحابب انك تشتغلى معايا
- هناك
- قالت "آيات" بحذر :
- هشتغل ايه بالضبط ؟
- قال "عاصي" وهو يلوك الطعام فى فمه :
- الشغلانہ اللي تختاريها .. ممكن تشتغلى فى العلاقات العامة أو فى
- الاستقبال أو فى أى مكان تختاريه فى القرية .. زى ما تحبى
- صمتت "آيات" وهى تفكر فى كلامه .. فانتهزت "أسماء" الفرصة لتقول
- فى مرح :
- ويا ترى الشغل ده لـ "آيات" لوحدھا .. مفيش حاجة تنفع صحبتھا
- التفت اليها "عاصي" وقال مبتسماً بلووم :
- لا طبعاً .. أكيد فى لصحبتهأ
- ابتسمت "أسماء" بسعادة وهى تقول :
- اتفقنا

التفت "عاصى" الى "آيات" ورفع حاجبيه وهو ينظر الى ملابسها
متفحصاً وهو يقول :

- بس طبعاً محتاجة لوك تانى خالص
نظرت اليه "آيات" بدهشة وهى تقول :
- ازاي يعنى ؟

قال "عاصى" وهو يشير الى ملابسها :
- مينفعش ده يكون لبس واحدة شغالة فى قرية سياحية وخاصة لو فى
العلاقات العامة أو بتتعامل تعامل مباشر مع زوار القرية والسياح .. لازم
يبقى لبسك أشيك من كده وكمان مينفعش يبقى وشك كده من غير ميك أب
ثم نظر الى "أسماء" وابتسم بخبث قائلاً :

- يعنى خليكي حلوة زى صحبتك
ابتسمت "أسماء" فقال "عاصى" وهو يتفحصها هى الأخرى :
- برده انتى كمان محتاجة شوية تعديلات
ثم قال بحماس :

- عامة متقلقوش هنديكوا سلفة من مرتبكوا تشتروا بيها لبس مناسب ..
لازم قبل ما تروحوا القرية تكونوا على سنجة عشرة .. عشان أى حد
بيشتغل فى القرية بيكون عنوان ليها
شعرت "آيات" بالضيق الشديد من كلامه .. نظر اليها "عاصى" متفحصاً
وهو يقول :

- مالك يا "آيات" مبتكليس ليه ؟
قالت "آيات" بوجوم :
- شبعانه

قال "عاصى" بخبث :
- إلا قوليلى يا "آيات" انتى مخطوبة ؟
قالت "آيات" وعقلها منشغل فى طريقة للهرب من تلك السهرة التى
أصبحت ثقيلة عليها :
- لأ

فسألها قائلاً :
- ولا اتخطبتى قبل كده ؟
نظرت اليه بحدده وهى تتساءل فى نفسها .. هل يعلم بأمر خطبتها من
"آدم" أم لا .. قالت فجأة :
- معلش أنا تعبانة ممكن نروح ؟
نظرت اليها "أسماء" باستغراب ممزوج بالحنق .. أما "عاصى" فنظر

اليها متفرساً محاول تخمين ما تفكر وما تشعر به .. استجاب لمطلبها دون الحاح حتى لا يضايقها .. أوقف سيارته تحت البيت وهو يقول بمرح :
- طبعاً لما تبتدوا الشغل معانا فى العين السخنة هيكون ليكوا شاليه مخصص .. يعنى موضوع السكن مش عايزكوا تقلقوا منه خالص ثم ابتسم وهو ينظر الى "آيات" قائلاً :
- مش عايزك تقلقى أبداً يا "آيات" طول ما أنا جمبك ارتبكت "آيات" من نظراته ونزلت من السيارة هى و "أسماء" فلوح لهما مودعاً .. سعدت "آيات" الى البيت تتبعها "أسماء" بمجرد أن دخلت "أسماء" الغرفة أغلقتها عليهما وهى تقول :
- ليه قومتى بسرعة يا "آيات" أنا حسيت انه اضايق من كده قالت "آيات" بضيق شديد :
- يضايق ولا يتفلق سألتها "أسماء" قائله :
- ايه فى ايه من ساعة ما أعدنا معاه وانتى مش مضبوطة ولاويه بوزك نظرت اليها "آيات" بحدده قائله :
- انتى مسمعتيش الكلام اللى قاله .. عايز يلبسنا على مزاجه وكمان يخلينى أحط ميك أب عشان أبقى عنوان يشرف قريته .. أهو أنا بأة ميلزمنيش الشغل فى قريته دى هتفت "أسماء" بضيق :
- محسسانى انه قالنا البسوا بكينى قالت "آيات" بغضب وقد احمر وجهها بشدة :
- ده بيقول ان لبسك انتى مش عاجبه .. لبسك اللى أنا شيفاه ضيق ومينفحش يتخرج بيه أصلاً
قالت "أسماء" وقد بدأ غضبها يتصاعد هى الأخرى :
- وماله لما نلبس لبس شيك وراقى زى ما هو عايز .. انا مستعدة أوافق على أى حاجة .. أى حاجة مقابل انى أشتغل وأصرف على نفسى ومرجعش بيت خالتى تانى .. لو هو ده شرطه أنا موافقه
قالت "آيات" بحزم وهى تقف فى مواجهتها :
- بس أنا مش موافقه ومش ممكن أوافق
قالت "أسماء" بحدده :
- لو موافقتيش هنموت من الجوع مستحيل يشغلنى من غيرك
قالت "آيات" وهى تتوجه الى ملابس البيت لتستبدلها بملابسها التى ترتديها :

- أنا مش هلبس حاجة تغضب ربنا عشان أَرْضِي "عاصي" أو عشان أَرْضِي أي حد

ثم قالت بحق :

- أنا حسه بذنب فظيع عشان سلمت عليه بإيدي رغم ان "سمر" نبهتني كثير للموضوع ده وقالتلى مينفعش أسلم على راجل بإيدي .. أنا اتخرجت لما مدلى ايده .. بس مكنش لازم اعمل كده مهما كان هو مين ومهما كنت هتكسف .. لأن مفيش راجل ولا بنت ولا أي مخلوق فى الدنيا يستاهل انى اغضب ربنا عشانه

خرجت من غرفتها وتركت "أسماء" شارده فيما سمعت

سمعت والدة "آدم" عدة طرقات على باب غرفتها فى الصباح الباكر .. فنهضت من فراشها بعجالة وفتحت الباب لتجد "آدم" واقفاً أمامها فقالت بقلق :

- خير يا ابني

قال "آدم" :

- أنا مسافر القاهرة يا ماما

قالت أمه وهى تنظر اليه بتمعن :

- خير يا ابني حصل حاجة ؟

تنهد "آدم" بضيق قائلاً :

- "آيات" لسه قافله تليفونها وهموت وأظمن عليها .. مش قادر أستنى أكثر من كده

ابتسمت أمه بحنان وربتت على كتفه قائلاً :

- متقلقش ان شاء الله تلاقيها وتجبها معاك

قبل "آدم" رأسها قائلاً :

- ادعيلي يا ماما

انصرف آدم فرفعت أمه كفها الى السماء وقالت :

- يارب يا جامع الناس ليوم لا ريب فيه اجمع عليه ضالته

انطلق "آدم" بسيارته الى القاهرة وهو عازم على اصلاح أموره مع

"آيات" فلم يعد يطيق بعدها عنه ولو للحظة .. أرادها معه .. بجواره ..

فى حياته .. تشاركه اياها .. لن يتركها وحدها وهو أدري الناس بمدى

طبيعتها وبرائتها .. لن يتركها وسط الغابة لتلتهمها الضباع والكلاب ..

سيكون زوجها وحاميتها .. يحتاج منها فقط أن تسامحه .. ولن يتوانى عن

اسعدها .. توجه فى بادئ الأمر الى الفيلا .. خرج من سيارته وألقى عليها نظرة من الخارج .. لفت نظره أحد الحراس .. نعم لقد رأى هذا الحارس من قبل .. أقبل عليه قائلاً :

- مساء الخير

نظر اليه الحارس وقد تذكره فقال :

- مساء النور يا دكتور "آدم"

ألقى "آدم" نظرة على الفيلا ثم نظر اليه قائلاً :

- محدش موجود فى الفيلا مش كدة

قال الحارس :

- لو تقصد حد من طرف عيلة "اليمانى" فلا مفيش .. اللى هنا ناس

جديدة سكنت بعد ما باعوا الفيلا

سأله "آدم" بإهتمام :

- متعرفش "آيات" بنته راحت فىين ؟

قال الحارس :

- لا معرفش

ثم قال وكأنه تذكر شيئاً :

- بس هى يومئذ مشيت مع دادة "حليمة" اللى كانت شغاله عندهم

قال "آدم" بلهفة وقد شعر بأنه وصل الى طرف الخيط الذى سيوصله بـ

"آيات" :

- طيب متعرفش "حليمة" ساكنة فىين ؟

هز الحارس رأسه نفيماً وقال :

- لا والله معرفش

- ولا معاك رقمها ؟

- لا والله

تنهد "آدم" بحسرة ثم توجه الى سيارته وانطلق بها يفكر .. كيف سيصل

الى "آيات"

توجه "زياد" الى شاليه "آدم" ففتحت له والدته "آدم" وهى تبتسم قائلة

:

- أهلا يا "زياد" يا ابنى اتفضل

قال "زياد" مبتسماً وهو يدخل البيت :

- ازيك يا خالتي أخبارك ايه

ابتسمت وهى تغلق الباب قائلة :

- بخير يا ابنى الحمد لله .. اتفضل

ألقى "زياد" نظرة على الشالوية ثم التفت اليها قائلاً :
- أمال فين "آدم" يا خالتي ؟
قالت له :

- "آدم" نزل القاهرة يدور على خطيبته القديمة
اتسعت عينا "زياد" دهشة وقال :

- ايه ؟ .. ولا جبلى سيرة
ثم توجه الى باب الشالوية قائلاً :
- طيب يا خالتي أنا هكلمه على الموبايل
هتفت قائلاً :

- استنى يا ابنى أحطلك الغدا أنا سايباه يتردد على النار
قال "زياد" وهو يفتح الباب :

- تسلمى يا خالتي مرة تانية ان شاء الله
هاتف "زياد" "آدم" وقال له :

- ايه يا ابنى تسافر القاهرة كده من غير ما تعرفنى
قال "آدم" وهو يتوقف عند احدى اشارات المرور :

- معلىش يا "زياد" أنا سافرت بدرى ومرضتش أقلقك
قال "زياد" باهتمام :

- انتى ليه سافرت طيب .. حصل حاجة
قال "آدم" :

- أيوة حصل

قال "زياد" بقلق :

- ايه اللى حصل ؟

صمت "آدم" قليلاً ثم قال وفى عينيه سحابة حزن ولوعة :

- فى انى بحبها مش قادر أعيش من غيرها

ضحك "زياد" قائلاً :

- انت وقعت ولا الهوا رماك

قال "آدم" بحنق :

- مش فايقلك دلوقتى يا "زياد"

قال "زياد" بجديه :

- طيب عملت ايه .. وصلت لايه ؟

تنهد "آدم" وقال :

- كل اللى وصلته ان الفيلا اتباعت ومحدث يعرف هى راحت فين بس
الحارس قال انها مشيت مع الدادة بتاعتها .. "آيات" كانت بتحبها أوى

فأكيد الست دى عارفه مكان "آيات" .. ده ان مكنش الاتنين مع بعض
دلوقتى

قال "زياد" يحفز صديقه :

- متقلقش ان شاء الله هتلاقيها

قال "آدم" بحماس :

- أنا دلوقتى طالع على الجامعة .. كان ليها صاحبة قريبة منها أوى اسمها

"أسماء" هحاول أوصل لعنوانها وأنا متأكد ان "أسماء" هتكون عارفه

طريقها لانهم كانوا أصحاب أوى و "آيات" كانت بتحبها

قال "زياد" :

- طيب تمام .. بلغنى بالتطورات يا "آدم"

ثم هتف فجأة :

- آه صحيح أنا أصلاً كنت بتصل بيك عشان أقولك حاجة مهمة أوى

قال "آدم" باهتمام وهو ينطلق بسيارته بعدما فتحت الإشارة :

- خير ؟

قال "زياد" :

- القرية الثالثة اتأجرت

صمت "آدم" قليلاً ثم قال :

- اتأجرت لمين ؟

قال "زياد" :

- لا معرفش .. لسه مش عارفين مين اللي أجرها بس من الواضح انه

سخن أوى .. العمال نزلين توضيب فيها وعرييات عفش داخله خارجه ..

لو استمروا على معدل الشغل ده يبقى هيفتحتها قريب أوى

قال "آدم" باهتمام :

- ياريت يا "زياد" تجبلى كل المعلومات عن اللي أجر القرية وعن شغله

وهل له فى السياحة ولا لا .. عايز أعرف كل حاجة عنه

قال "زياد" بثقه :

- متقلقش على ما ترجع أكون جببتك أراه ان شاء الله .. يلا انت ربنا

يوفقك

انشغل "آدم" بالتفكير فى مستأجر القرية الثالثة .. لكن "آيات" اخترقت

تفكيره رغباً عنه وحجبت عنه أى شئ سواها

هتفت "آيات" وهى واقفة على الباب قائله :

- يلا يا "أسماء"

قالت لها " حليلة " الواقفة بجوارها :
- متقلقيش يا بنتي ان شاء الله هتلاقى شغل كويس انتى و " أسماء "
نظرت اليها " آيات " وهى تقول :
- يارب يا دادة
عزمت " آيات " على البحث عن عمل بنفسها مع " أسماء " ..وعلى بدء
الطريق من بدايته .. وأحسنت الظن بخالقها .. أقبلت " أسماء " تقول :
- خلاص خلصت
نزلت الفتاتان وقد شيعتهما " حليلة " مودعة وهى تقول بطيبتها
المعهودة :
- ربنا يفتح فى وشكوا أبواب الرزق يارب ويكفيكوا شر ولاد الحرام
ينورلكوا طريقكوا يارب
دخلت " حليلة " البيت وتوجهت الى غرفتها وأمسكت مصحفها واتكنت
على الأريكة وهى ترتديها نظارتها وتقرأ فى كتاب الله .. نزلت الفتاتان
الدرج .. وقبل أن تخرجا من البوابة أقبل أحد السكان وبصحبه فتاة ..
تحاشت الفتاة النظر اليهما وبدا عليها التوتر .. أمسكها الشاب من ذراعها
وتوجه بها الى أول شقة وفتح الباب ودخلا سوياً .. خرجتا من البوابة
فانحنت " أسماء " على " آيات " قائلة :
- شوفتى اللى انا شوفته
قالت " آيات " بتقزز :
- أيوة شوفت
قالت " أسماء " بغيظ :
- مش المفروض الشاب ده عايش لوحده .. مين بأه الحلوة اللى دخلت
معاه دى
قالت " آيات " بضيق :
- مش أول مرة أشوفها داخله معاه الشقة .. وكل ما تشوفنى ترتبك
وتتوتر وتدارى وشها
قالت " أسماء " بحده :
- وازاى السكان ساكتين على كدة
قالت " آيات " وهى تحت السير :
- معرفش يمكن محدش واخذ باله .. سبيه ربنا مش بيسيب حد
توجهت الفتاتان لعدة عناوين جمعتاها من الجرائد لشركات ومكاتب تطلب
موظفين .. كانت كل منهما تحمل فى يدها ملفها بكل أوراقها وشهاداتها ..
وكل منهما تحمل فى قلبها أملاً بالألا تعود فارغة اليدين

توجه "آدم" الى عنوان "أسماء" الذى حصل عليه من الكلية .. وقف قليلاً قبل أن يفتح له رجلاً .. تنحج "آدم" وقال له :

- حضرتك والد "أسماء" ؟

أوماً والد "أسماء" برأسه وقال :

- خير فى حاجة ؟

قال "آدم" :

- انا كنت عايز أسألها عن حاجة .. هى موجودة ؟

قال له والدها وهو ينظر اليه نظرة متفحصة :

- لا مش موجودة انت مين ؟

قال "آدم" :

- أنا دكتور فى كليتها كنت بدرسها مادة السنة اللى فاتت .. وكنت عايز

أسألها عن واحدة صحبتها .. اسمها "آيات"

قال والدها بحدة :

- أصلاً أنا معرفش بنتى فىن .. هربت من بيت أمها

نظر اليه "آدم" بدهشة وقد عُقد لسانه .. فتهد الأب بحسرة قائلاً :

- من يومها وأنا بدور عليها ومش عارف أوصلها .. روحت للفيلا اللى

كانت عايشة فيها "آيات" صحبتها لأنها أقرب صاحبه ليها أو بمعنى

أصح صحبتها الوحيدة .. لقيت الحارس بيقولى انهم باعوا الفيلا وان والد

"آيات" اتوفى وميعرفش "آيات" راحت فىن

تهد "آدم" بحسرة ويأس وهو يقول :

- يعنى ايه .. مش هنعرف نوصلهم

نظر اليه أبوها برجاء وهو يقول :

- ياريت لو عرفت حاجة تبلغنى .. أنا لفيت على الاقسام وعلى

المستشفيات وبرده معرفتش أوصل لأى حاجة

قال "آدم" فجأة وقد تذكر شيئاً :

- طيب ما تكلمها على الموبايل ولا أفله موبايلها برده

تهد أبوها بحسرة وقد لمعت عيناه بالعبرات وهوى قول بخرج :

- "أسماء" فى آخر يوم فى امتحانتها موبايلها اتسرق .. وقفت الشريحة

وعملت واحدة جديدة بس كان بيجيلها مكالمات كتير معاكسات وادتنى فى

مرة الموبايل أرد على اللى بيعاكسها وآخر ما زهقت قولتلها تغير رقمها

ثم أطرق برأسه قائلاً بخرج ممزوج بالندم :

- ومخدتش منها رقمها الجديد

نظر اليه "آدم" بتمعن قائلاً :
- طيب مامتها .. أكيد مامتها عارفه رقمها
قال أبوها بتهكم :
- مامتها متعرفش انها غيرت رقمها أصلاً
شعر "آدم" بالحنق والضيق فهل يعقل ألا يعرف أبوان رقم هاتف ابنتهما
! .. قبل أن ينصرف "آدم" تبادل والدها معه الأرقام وقال له برجاء ولهفة
:
- أرجوك لو وصلت لحاجة عنها أو عن صحبتها "آيات" تبلغنى على
طول
قال له "آدم" بلهفة :
- وانت كمان لو عرفت حاجة ياريت تبلغنى
انصرف "آدم" وقد شعر بأنه فقد بداية الخيط مرة أخرى !

تعبت الفتاتان من كثرة اللف على الشركات والمكاتب .. خارت قواهما
فتوجهتا الى أحد المطاعم .. قالت "آيات" :
- يا بنتى بلاش مصاريف احنا لو الفلوس اللي معانا خلصت مش عارفه
هنعمل ايه
قالت "أسماء" وهى تنظر الى قائمة الطعام لتتخير منها :
- يا ستى مرة واحدة مش هتفرق .. خلاص بطنى نشفت من الأكل اللي
بناكله
قالت "آيات" وقد جرى ريقها هى الأخرى :
- طيب بس واحنا ماشيين ناخذ معانا تيك أو اوى لداة "حليمة"
قالت "أسماء" :
- لسه شركة الديكور مروحلهمش
قالت "آيات" بحماس :
- طيب ناكل ونروحلهم وان شاء الله تصيب المرة دى
قالت "أسماء" بياس وهى تنظر الى قائمة الطعام مرة أخرى :
- ان شاء الله

مر "عاصى" على مكتب مديرة مكتب "سراج" فى طريقه الى مكتب
والده فأوقفته بسرعة قائله :
- "عاصى" بيه

التفت اليها قائلاً :

- أيوة

قالت المرأة :

- لو سمحت عايزة عنوان الأنسة "آيات" اللي اديته لحضرتك عشان
أضم بياناتها فى البرنامج اللي مسجلين فيه أسماء اللي بيشتغلوا فى
الشركة

بحث "عاصى" فى محفظته عن الورقة ثم أعطاها اليها بلامبالاة ..
وتوجه الى مكتب والده .. ابتسمت المرأة وقد ظفرت بالورقة .. وأول ما
فعلته بعد ذلك هو الإتصال بـ "آدم"

وقف "آدم" فى مكانه المفضل فوق جبل المقطم .. شعر بالضيق وقد
أغلقت جميع الأبواب فى وجهة .. هتف قلبه بلوعة .. أين أنتِ يا "آيات"
.. أين أنتِ؟! .. اتسعت عيناه دهشة ورهبة ولهفة عندما رأى اسم مديرة
مكتب "سراج" على هاتفه فأسرع يرد قائلاً :

- ها وصلتى لحاجة

قالت المرأة :

- ايوة جبت منه الورقة وفيها رقمها والعنوان اللي هى ساكنه فيه قالتلى
انه عنوان واحدة كانت شغاله عندهم
قال "آدم" وهو يلف حول نفسه وقد شعر بالحماس والنشوة تدب فى
أوصاله :

- طيب ابعتيهولى فى رسالة بسرعة .. بسرعة

انتظر رسالتها على أحر من الجمر وصلت رسالتها فشرع للوهلة الأولى
بالإحباط لوجود نفس الرقم الذى يحمله لـ "آيات" والذى تغلقه دائماً ..
لكنه تعلق بالعنوان كالغريق الذى يتعلق بطوق نجاته .. ركب سيارته
وانطلق الى حيث تسكن

أثناء جلوس الفتاتان معاً لتناول طعامهما .. رأيا فجأة الطاولة تهتز
أمامهما وتتراقص فوقها أكواب الماء .. فأمسكتا فى الطاولة .. نظرت
"آيات" حولها وهى ترى كل شئ يتحرك .. كان الزلزال يبدو قوياً .. ما
هى إلا دقيقة حتى توقف الاهتزاز .. وعاد كل شئ الى مكانه .. وسكن
الماء فى الأكواب .. لكن فى مكان آخر .. فى حى آخر لم يعد كل شئ الى
مكانه .. بل انهار رأساً على عقب .. ذلك البناء القديم الذى سرت الرطوبة

فى جدرانه كسريان الدم فى الشرايين .. فلم يتحمل تلك الهزة فتصدع الى أن انهار أمام أعين الناس المتسعة رهبة وخوفاً .. تعالت أصوات النساء بالصراخ والنحيب لانهباء هذا البيت فوق رؤس أصحابه .. وأسرع الرجال بطلب الاسعاف ومحاولة رفع الحطام لإنقاذ ما يمكن إنقاذه .. لكن دوى فجأة صوت انفجار قوى فى المكان .. انفجرت أحد الأنابيب من تحت الأنقاض لترسل أسنة لهب عالية الى السماء .. رجع الجميع الى الخلف وتعالت أصوات الصراخ مرة أخرى ممزوجة بصيحات الإستنكار .. لم يكد ينتهى دوى الانفجار الأول حتى أعقبه آخر .. وأصبحت الأنقاض كجمرة النار المشتعلة تحترق بكل ما فيها .. لم تستطيع دلاء الماء الممتلأه أن تطفى من حدة غضب النيران المشتعلة .. لأن منبعها كان من الأعماق تحت الأنقاض المنهارة فوق الجثث .. حاول الجميع الاتيان بكل ما يستطيع لتطفى النيران .. وثقذ الأرواح .. اقترب "آدم" بسيارته من المكان .. هاله مرأى النيران المشتعلة وصوت الصراخ والنحيب .. لم يستطيع دخول الشارع لكثرة الزحام .. فأوقف سيارته على ناصيته وترجل منها ودخل وسط الزحام .. نظر الى العقار المنهار فى لوعة وهو يبحث بعينه عن رقم 19 .. رقم بيت "حليمة" والذى تقطن فيه حبيبته "آيات" .. لم يجد .. توقفت الأرقام عند 18 .. ثم .. البناء المنهار .. نظر الى أسنة اللهب والى الرجال الذين يسعون الى اطفائها .. التفت فى لوعة يسأل أحد الرجال :

- لو سمحت فىن البيت رقم 19 ؟

تعلقت عينا "آدم" بشفتى الرجل وقد اضطرب تنفسه وتعالت ضربات قلبه المفزوع .. قال الرجل وهو يضرب كفاً بكف :

- لا حول ولا قوة الا بالله .. البيت رقم 19 هو البيت اللى وقع ده التفت "آدم" ينظر الى الأنقاض فى لوعة وحسرة وألم وقد انخلع قلبه من مكانه .. اقتحم الصفوف وأخذ يصرخ وعيناه معلقتان بالكتلة الأسمنتية المنهارة :

- "آيات" .. "آيات"

اخذ بجنون يحاول رفع أحد الجدران المنهارة وهو يصرخ بإسمها فى لوعة .. سُمعت أصوات سيارات المطافئ والاسعاف .. أبعدوا الجميع عن النيران وأخذوا فى محاولة اطفائها والسيطرة عليها .. نظر "آدم" بأعين دامعة متسعة من الفزع الى العقار وقد انهمرت الدموع من عينيه فى ألم .. ساعد الرجال مرة أخرى على رفع الأنقاض وعلى اخراج .. الجثث !

انهار "آدم" على الأرض يبكى بعدما تأكد الجميع من أن جميع ساكنى

العقار هم الآن فى ذمة الله عز وجل .. بكا بقلبه المكوم وعينه التكلى ..
ما أشد قسوة الفقد .. الفقد الأبدى .. تعالت شهقاته بالبكاء وارتجف جسده
بشدة وهو يتمتم :

- لأ .. لأ

لم يرد أن يصدق أنها رحلت .. أنه لن يراها مرة أخرى .. هب وقفاً واتجه
الى سيارته وهو لا يرى أمامه من فرط دموعه المنهمرة .. وانطلق خلف
سيارة الاسعاف التى جمعت الجثث .. فى مشرحة المستشفى تجمهر بعض
الأهالى للتعرف على جثث ذويهم واستيلاهما .. وقف "آدم" بعينيه اللاتان
بدتا كجمرتتا نار من شدة احمرارهما .. كان يخشى الدخول .. لم يجد فى
نفسه الجرأة على ذلك .. كان قلبه يبكى قبل عيناه كلما دخل أحد من
الأهالى وعاد يبكى وقد تعرف على احدى الجثث .. انتظر الى أن انفض
الجمع .. دعا الله أن تكون جميع الجثث قد استلمها أصحابها .. دخل وقلبه
يخفق فى وجل .. سأل أحد العاملين بلوعة :

- لو سمحت كل الجثث اتعرفوا عليهم أهاليهم ؟

قال الرجل وهو يشعر بالأسى لتلك المأساة :

- لا يا ابنى لسه فى جثتين محدش اتعرف عليهم لحد دلوقتى

قال "آدم" بصوت مرتجف باكى :

- طيب لو سمحت عايز أشوفهم

نظر اليه الرجل بحسرة قائلاً :

- لا حول ولا قوة الا بالله انت كان ليك حد ساكن فى العمارة دى ؟

أوماً "آدم" برأسه ومازال جسده يرتعش .. أدخله الرجل الى المشرحة
التى تراصت الجثث فوق طاولاتها .. اقترب الرجل من احدى الجثث وقال

:

- طيب يا ابنى فى جثتين واحدة لست كبيرة وواحدة لبنت بس منظرها

صعب ومش باين منها حاجة صعب انك تتعرف عليها .. اللى انت بتدور

عليها صغيرة ولا كبيرة

قال "آدم" ودموعه تتساقط فوق وجهه :

- صغيرة

ثم أكمل بصوت مرتجف :

- بس كانت عايشة مع ست كبيرة

نظر اليه الرجل بحزن فقال "آدم" وهو يحاول تمالك نفسه :

- وريهاالى

قال الرجل وقد أشفق عليه من رؤيتها :

- يا ابني قولتك مش باين منها حاجة
قال "آدم" بحزم :

- وريهالى

امتثل الرجل لطلب "آدم" واقترب من الجثة ثم .. ازاح الغطاء عنها ..
ظهرت علامات الألم الشديد على وجهه وقد انعقد جبينه بقوة وهو ينظر
الى الجثة التى تفحمت عن آخرها .. اقترب منها ومد يده المرتعشة يزيح
الغطاء عنها أكثر لعله يتبين أى شئ يدلّه إن كانت "آيات" أم لا .. كانت
بالفعل يصعب التعرف عليها .. لكن وقع فى قلبه أنها هى .. أخذ ينظر الى
حجم جسدها وطولها ويقارنه بـ "آيات" .. بدت قريبة منها .. نفس الحجم
ونفس الطول .. التفت الى الرجل قائلاً بصوته المرتجف :

- ورينى الجثة الثانية

تقدم الرجل الى احدى الجثث .. وقف "آدم" أمامها .. فأزاح الرجل الغطاء
.. شهق "آدم" بقوة وأخذ يبكى بحرقة وهو ينظر الى "حليمة" التى بدت
ملامحها واضحة رغم الحروق التى أصابتها .. انفجر فى بكاء مرير .. قال
له الرجل فى أسى :

- متقلّش يا ابني هى متعزبتش بالنار .. الخبطة اللى فى دماغها دى
موتتها على طول يعنى محسنتش بحاجة

لم تكن صرخات "آدم" بالبكاء نابعة من تعرفه على "حليمة" .. بل
تعرفه على "حليمة" جعله يجزم بأن الجثة الأخرى هى لـ "آيات" ..
التفت اليها وأخذ جسده ينتفض بقوة لم يشعر بنفسه إلا وهو بنحني
ليأخذها بين ذراعية ضاماً اياها اليه بشدة .. أخذ يردد اسمها وسط بكائه
الذى يشق القلوب .. أغمض عينيه بشدة وهو يضمها اليه أكثر لا يريد
تركها .. اقترب منه عامل المشرحة مع زميله فى محاولة تهدئته ونزع
الجثة من بين يديه .. لكنه تشبث بها بشدة بين أحضانه .. ولم يسمح لهم
بنزعها من بين يديه .. رفع رأسه ينظر الي وجهها المتفحم وقد غطت
الدموع وجهه .. لم يشعر بالخوف أو الفزع من شكلها .. بل أخذ يسقط
عليها صورة "آيات" فى مخيلته .. ارتجفت شفثيه وهو يقبل وجنتها ..
وضمها اليه مرة أخرى وهى ترتجف بين يديه من شدة نحيبه وقد أغمض
عيناه وهو يردد اسمها فى لوعة



جلس "آدم" على أحد المقاعد في المستشفى .. منهاراً .. تتساقط الدموع من عينيه في غزارة .. يرمقه المارة من العاملين بالمستشفى بنظرات الشفقة .. دخل "زياد" المستشفى ليبحث عنه .. لم يحتاج الى البحث كثيراً .. وجده فوق أحد المقاعد .. ملابسه رثة أصابها الحروق والتمزيق .. يجلس كما لو كان جثة بلا روح .. اقترب "زياد" منه وجلس بجواره وهو يشعر بالأسى تجاه صديقه المكلوم .. ربت على كتفه قائلاً :

- انت كويس يا "آدم"

لم يجيبه "آدم" بل أغمض عينيه بشدة لتتساقط العبرات منهما أكثر .. ثم ما لبث أن انفجر في بكاء مرير .. حاول التحكم في نفسه فلم يستطع .. تألم "زياد" لمرآى حال صديقه وقال :

- ادعيها ان ربنا يرحمها ويغفر لها

قال "آدم" بصوت منهار وهو يحاول السيطرة على نفسه دون جدوى :

- ماتت محروقة يا "زياد" .. اتفحمت .. أنا اللي المفروض أتحرق مش هي يا "زياد"

توقفت شهقات بكاءه للحظات ثم قال بصوته الباكي الذي يمزق طيات القلب :

- كانت طيبة جداً .. مبتأديش حد وفي حالها .. أنا اللي مؤذى يا "زياد" أنا اللي مؤذى أذتها وأذيت أبوها وأذيت أمى وأذيت نفسي ثم قال :

- مش قادر أتخيل ان خلاص كده معدش هيبقى فى حياتى "آيات" عاود بكأوه مرة أخرى وهو يقول :

- مش عايزها تموت أنا محتاجها جمبي .. بس للأسف اتأخرت عليها ..

ياريتنى كنت جيتلها من بدرى .. ياريتنى مكنت سبتها وسافرت .. كان
زمانها معايا دلوقتى

ربت "زياد" كتف صديقه فى اشفاق وهو يقول :

- خلاص يا "آدم" اهدى مش هيفيد الكلام ده

مسح "آدم" بكفيه العبرات التى تغرق وجهه .. فسأله "زياد" :

- انت اللى هتستلمها

قال "آدم" بألم :

- هتستلمها هى والدادة بتاعتها

قال "زياد" :

- هى الدادة ملهاش أهل يستلموها ؟

قال "آدم" وهو ينظر الى "زياد" بعينيه الحمر اوين :

- محدش جه لحد دلوقتى .. وأنا مش هسيبها فى المشرحة لازم تدفن

تساقطت العبرات مرة أخرى من عينيه وهو يقول :

- لإن "آيات" كانت بتحبها

سأله زياد :

- هتستلمهم امتى؟

تمتم "آدم" :

- بكرة

ران الصمت لفترة ثم قال "زياد" :

- طيب قوم معايا يلا

قال "آدم" لحزم :

- لا هفضل هنا

هتف "زياد" :

- قوم يا "آدم" روح مش هيسلموك الجثتين غير بكرة

قال "آدم" بعناد وهو لا يريد مغادرة المستشفى :

- قولتك هفضل هنا

تنهد "زياد" وظل بجوار صديقه .. لم يرد الضغط عليه أكثر

نزلت الفتاتان من الأتوبيس .. قالت "أسماء" بألم :

- رجلى مش حسه بيها خالص

قالت "آيات" وهى تحمل طعام "حليمة" فى يدها :

- وأنا كمان خلاص مش قادرة

قالت "أسماء" بحنق :
- ما انتى اللى أصريتى اننا نشترى جرنال النهاردة ونلف كمان على
عناوين المكاتب اللى طالبين موظفين
قالت "آيات" وهى تسير بصعوبة لألم قدميها :
- أعمل ايه قولت يمكن نلاقى حاجة .. ما العناوين اللى خدناها من جرنال
امبارح وأول زى ما شوفتى يا اما حد سبقنا يا اما طلبين شهادات خبرة
قالت "أسماء" وهى تزفر بضيق :
- هنعمل ايه دلوقتى
قالت "آيات" بشرود :
- فى مكتبة فى الشارع اللى ساكنين فيه شوفتهم النهاردة واحنا معديين
من أدامهم معلقين يافته طالبين واحدة تشتغل فى المكتبة
قالت "أسماء" بسخرية :
- حلو أوى بصراحة .. شغلانه هايله .. ويا ترى هيدوكى كام بأه
زفرت "آيات" بضيق وهى تقول :
- يدونى زى ما يدونى بأه أهو أحسن من مفيش لحد ما نشوف شغل تانى
قالت "آيات" فجأة :
- ايه ريحة الدخان دى
قالت "أسماء" باستغراب :
- مش عارفه
التف للدخول الى الشارع الذى تقطن فيه "حليمة" .. صرخت "أسماء"
وهى تجذب "آيات" من ذراعها :
- "آيات"
نظرت "آيات" الى ما تنظر اليه "أسماء" فهالها ما رأت .. شهقت بقوة
وسقط الطعام من يدها وهى تحت الخطى فى اتجاه المبنى المنهار ..
نظرت الفتاتان الى الركاب بهلع وانفجرتا فى البكاء .. قالت احدى السيدات
للفتاتين :
- لا حول ولا قوة الا بالله انتوا كان ليكوا حد ساكن هنا ؟
التفتت اليها "آيات" تصرخ قائله :
- دادة "حليمة" .. فين دادة "حليمة"
قالت المرأة وهى تنظر اليهما بعطف :
- البقاء لله يا بنتى كل اللى كانوا فى المبنى ماتوا الله يرحمهم
انفجرت "آيات" فى البكاء ولم تستطع قدماها حملها فجلست فى مكانها
تبكى بشدة .. وقفت "أسماء" تنظر الى الركاب باكية واضعة كفها على

فمها وكفها الأخر على كتف "آيات" .. قالت المرأة فى أسى :

- لا حول ولا قوة الا بالله

التف حوهما امرأتين أخرتين وقالت احداهما :

- مالها .. كان ليها حد فى العمارة ؟

قالت أخرى :

- أيوة اظاهر كده

ربتت احداهن على كتف "آيات" النهاره وقالت :

- اهدى يا بنتى مش كده .. لا حول ولا قوة الا بالله .. قومي معايا يا بنتى

حاولت "أسماء" الباكية مساعدة "آيات" على الوقوف بمساعدة احدى

النساء وأدخلتهما الى منزلها .. أحضرت لهن كوبين من الماء الممزوج

بالسكر لتهدئ من روعهما فقد كانت "آيات" تبكى وتنتحب بشدة حتى

كادت أن تفقد وعيها .. جلست المرأة بجوارها على الأريكة وهى تقول

بحنان :

- كانت تقربك ايه اللى بتقولى عليها "حليمة" دى

لم تتوقف "آيات" عن البكاء ولم تستطع الكلام فقالت "أسماء" وسط

بكائها :

- كانت الدادة بتاعتها وكنا عايشين معاها فى شقتها

قالت المرأة باستغراب :

- عايشين معاها .. أمال انتوا كنتوا فين

قالت "أسماء" :

- كنا بره من الصبح بندور على شغل ولسه راجعين دلوقتى

نظرت اليهما المرأة بحنان قائله :

- شوفوا رحمة ربنا كبيرة ازاي أنقذكوا من اللى حصل ده

هتفت "آيات" بصوت باكى :

- هى فين ..

قالت المرأة :

- خدوا الجثث كلها ودوهم مشرحة المستشفى

أغمضت "آيات" عينيها بألم وقالت :

- مستشفى ايه ؟

قالت المرأة :

- والله يا بنتى معرف .. بس ابني أكيد عارف لانه كان معاهم هناك راح

مع واحدة كانت بردة يا عيني بتعيط على ابنها اللى كان ساكن فى العمارة

ثم قالت :

- خليكوا أعيدين ولما ييجى ابني من بره هعرفلكوا منه المستشفى دى فين قامت المرأة الطيبة ودخلت مطبخها المتواضع لتحضر بعض الطعام للفتاتين .. بعد ما يقرب من ساعة حضر ابن المرأة .. وسألته أمه عن المستشفى التي أخذوا الجثث إليها .. قال الشاب :

- آه أنا كنت هناك بعد اللي حصل .. بكرة الصبح ان شاء الله هخدكوا هناك .. لما مشيت كان فى جثتين مكنش حد لسه اتعرف عليهم قالت "آيات" بصوت مبجوح من كثرة البكاء :

- شكلهم ايه الجثتين دول
قال الشاب :

- لا والله مشوفتهمش
قالت أمه لـ "آيات" بطيبة :

- خليكوا بايتين هنا وبكرة الصبح ان شاء الله ابني ياخدكوا المستشفى كان التعب قد أخذ من الفتاتين مبلغه فساقتهم المرأة الى احدى الغرف وقالت :

- دى أوضة بناتي هما دلوقتي متجوزين والأوضة فاضية من ساعة ما مشيوا بس متقلقوش أنا بنضفها على طول .. يلا يا حبيبتي ارتاحوا وبكرة ابني ان شاء الله يوصلكوا للمستشفى التفتت "أسماء" الى المرأة قائلة بوهن :

- شكراً
أغلقت المرأة الباب فنظرت الفتاتان الى بعضهم بريبة وقالت "أسماء" بصوت خافت :

- أنا خايفة
قالت بصوت باكى "آيات" وهى تمسح عبراتها :

- شكلها طيبة
قالت "أسماء" بقلق :

- أنا معدتش بثق فى حد
قالت "آيات" وهى تعاود البكاء :

- طيب لو مشينا هنروح فين .. احنا مكناش واخدين معانا فلوس كتير واتصرفت فى المواصلات والأكل .. يعني حتى ممعناش فلوس نأجر أوضة فى فندق
قالت "أسماء" وهى تضع أحد المقاعد خلف الباب .. لتشل حركة مقبضة فتمنع فتحه :

- ربنا يستر بأه

تمددت الفتاتان على الفراش وقد راحتا فى سبات عميق على الفور من
شدة الإجهاد والتعب

أشرق فجر اليوم الجديد .. تثائب "زياد" وهو يريح ظهره الى الخلف ..
التفت اليه "آدم" قائلاً بصوته المجهد :

- قوم يا ابنى روح

قال "زياد" :

- أروح ازاي يعني يا "آدم" .. هفضل معاك طبعاً .. من ساعة ما اتصلت
بيك أظمن على الأخبار وقولتلى على اللي حصل وأنا هموت من خوفى

عليك وركبت العربية وطرت على القاهرة

قال له "آدم" بإمتنان :

- تسلم يا "زياد"

التفت اليه "زياد" قائلاً :

- ربنا يصبرك يا "آدم"

ترقرقت العبرات فى عيني "آدم" .. أقبل عليهما عامل المشرحة وهو

يقول :

- تعالى يا ابنى خلاص المسؤل جه وهيسلمكوا الجثث

ظهرت تعبيرات الألم على وجه "آدم" عندما قال الرجل "جثث" .. أهذا

ما أصبحت عليه حبيبتة؟! .. جثته هامده فارقتها الحياة؟! .. حملاً

الجثتين الى احدى عربات الإسعاف وتوجها بهما الى حيث تم تغسيلهما ثم

الى أحد المساجد للصلاة عليهما ثم توجها بهما الى ... المقابر

ساق الشاب الفتاتان الى مكان المستشفى .. دخلت "آيات" الباكية .. قالت

"أسماء" وهى تنظر حولها برعب :

- هو احنا لازم نشوفها

التفت اليها الشاب قائلاً :

- أيوة عشان تتعرفوا عليها وتستلموها

أجهشت "آيات" فى البكاء وهى تقول :

- مش هقدر أشوفها

تقدم أحد عمال المشرحة قائلاً :

- أيوة

قال له الشاب :

- البنيتين دول ليهم واحدة قريبتهم كانت ساكنه فى العمارة اللى وقعت

امبارح فى الزلزال اللى حصل فيها الحريقة .. وجايين عشان يتعرفوا عليها ويستلموها

قال عامل المشرحة بحيرة :

- بس الجثث بتاعة عمارة اللى وقعت فى الزلزال اتسلمت كلها توقفت "آيات" عن البكاء وقد دب الأمل فى قلبها فى أن "حليمة" على قيد الحياة .. تبادلت نظرة دهشة مع "أسماء" ثم التفتت الى الرجل تقول له فى لهفة :

- حضرتك متأكد

قال الرجل :

- أيوة يا بنتى متأكد

سألت "أسماء" الرجل قائله :

- الست اللى بندور عليها اسمها "حليمة"....."

توجه الرجل الى مكتب صغير وأخرج أحد الكشوفات .. ثم علت وجهة سحابة حزن وقال :

- ربنا يرحمها يا بنتى .. ماتت وفى ناس استلموها من شوية

أجهشت "آيات" فى البكاء مرة أخرى عندما تأكدت من موت "حليمة" .. ساعدتها "أسماء" على الجلوس فوق أحد المقاعد .. التفتت "أسماء" الى الرجل قائله :

- حضرتك متأكد ؟

قال الرجل :

- أيوة طبعاً يا بنتى متأكد

فى تلك اللحظة ناداه أحد الأطباء فذهب مسرعاً اليه .. جلست "أسماء"

بجوار "آيات" الباكية وقالت :

- خلاص يا "آيات" .. اهدى

قالت "آيات" وهى لاتزال تبكى :

- أنا حسه ان قلبي مروجع أوى يا "أسماء" .. انا كنت بحبها أوى .. دى

هى الشخص الوحيد اللى اتبقالى فى الدنيا دى .. ربنا يرحمها مش قادرة

أتحمل فراقها حسه انى هموت يا "أسماء"

عانقتها "أسماء" وهى تنظر حولها بضيق وقالت :

- طيب تعالى نمشى من هنا أنا قلبي اتقبض

نهضت الفتاتان معاً وقال لهما الشاب :

- تحبوا أوصلكوا لمكان ؟

التفتت اليه "أسماء" قائله :

- لا شكراً .. وأسفين اننا تعبناك معانا
قال الشاب :
- لا أبداً متقولوش كده .. ربنا يصبركوا

وقف "آدم" أمام القبر الذى دفن فيه الجثة التى ظن أنها لـ "آيات" ..
يرفع كفيه الى السماء ويدعو لها بالرحمة والمغفرة .. أنفجر فى البكاء
وهو يردم فوقها التراب .. كان يشعر وكأن قلبه يشطر ويتفتت اللى فتات
صغيرة .. يحمل كل جزء منها مرارة الفقد .. جلس أمام قبرها لا يريد
الرحيل .. ربت "زياد" على كتفه قائلاً :

- يلا يا "آدم" قوم روح وغير هدومك وارتاح شوية
كانت ثيابه فى حالة رثة للغاية .. لكنه لم يعبأ بذلك .. ظلت عيناه معلقة
بالقبر .. حثه "زياد" قائلاً :

- يلا يا "آدم"

قال "آدم" بحزم دون أن يلتفت اليه :

- روح انت أنا هستنى هنا

قال له "زياد" بعناد :

- مش همشى من غيرك .. طيب روح بيت مامتك غير هدومك وارتاح
شوية وتعالى هنا تانى

تساقطت العبرات من عينه الثكلى وهو يقول :

- مش قادر أقوم .. مش قادر أسيبها .. دى أول ليلة هتقضيها فى القبر ..
لوحدها

ارتجف جسده فجأة لشدة بكاءه وهو يقول :

- خايف عليها أوى .. خايف أوى

قال "زياد" وهو يتألم لألم صديقه :

- ان شاء الله ربنا يرحمها ويتجاوز عن سيئاتها

قال "آدم" بحسرة وشعور بالندم يمزقه :

- كان فى حاجات كتير فى حياتها غلط .. يارتنى نصحتها .. يارتنى شلت

من دماغى فكرة انى أرجع حقى وكنت كملت معاها .. كنت هغير فيها

حاجات كتير .. هى كان عندها استعداد تتغير وتبقى أحسن .. كانت بتحبنى

وكانت بتسمع كلامى .. كنت أقدر أحميها من ذنوب كتير بتعملها .. بس أنا

ضيعتها .. ضيعتها من ايدي وضيعتها دلوقتى .. يارتنى نصحتها .. يارتنى

مسبتهاش .. يارتنى ما سافرت

تنهد بعمق وهو يكمل بألم :

- ياريت "بوسى" مكانت راحتها .. كان زمانا مع بعض دلوقتى .. أنا
مكنتش ناوى أسيبها .. يوم كتب الكتاب فعلاً مكنتش ناوى أسيبها
ثم قال بمرارة :

- لكن فايدته ايه الكلام ده دلوقتى .. لا هيرجعهاالى ولا هيخلينى أسامح
نفسى على اللي عملته فيها وفي نفسي
ارتعش صوته وهو بقول :

- آخر مرة كلمتها فى التليفون كانت بعيط .. كان فى حاجة تعبها
ومردتش تقولهاالى .. كان نفسي أكون جمبها وأخفف عنها .. كان نفسي
أشوفها وأقولها سامحينى يا أحن وأرق وأطيب قلب عرفته .. كان نفسي
تاخذنى فى حضنها وتاخذ بايدى وتساعدنى انى أتغير وأبقى انسان تانى ..
كان نفسي نساعد بعض ونعين بعض واللى فيه نقص التانى يكمله
تهد بحسرة وهو يشعر بالنيران تتصاعد من داخله مع كل شهيق وزفير
.. قام "زياد" وترك صديقه يتجرع أحزانه ويفرغ ما بداخله لعله ذلك
يخفف عنه ما هو فيه

جلست الفتاتان فى شرود فى احدى الحدائق العامة .. تنهدت "أسماء"
قائله :

- أنا جعت

نظرت اليها "آيات" وقالت :

- انتى معاكى كام

نظرت "أسماء" الى حقيبتها ثم قالت فى تبرم :

- معايا 12 جنيه .. وانتى ؟

نظرت "آيات" فى حقيبتها تضع الجنية فوق الجنية وقالت :

- معايا 17 جنية

زفرت "أسماء" بضيق شديد وهى تقول :

- يعنى معايا 29 جنية .. أصلاً مش هيكفونا يوم واحد .. ده غير ان مفيش
حته نبات فيها

نظرت "أسماء" الى "آيات" وهى تقول فى لوعه :

- هنبات فى الشارع يا "آيات" .. ولا هنعمل ايه دلوقتى

تنهدت "آيات" فى حسرة ولم تجيب .. قالت "أسماء" بحزم :

- مفيش قدامنا الا "عاصى" ابن عمك .. هو اللي هينقذنا من الورطة اللي
احنا فيها دى

التفتت اليها "آيات" بحدة قد عقدت ما بين حاجبيها لتقول فى عناد :

- لأ .. مش هروح لـ "عاصي"
هتفت "أسماء" بغضب :
- والله ؟ .. طيب وهنعمل ايه حضرتك .. هنبات فى الشارع ؟
قالت "آيات" بحزم وهى تشرد بتفكيرها :
- لأ مش هنبات فى الشارع
قالت لها "أسماء" بإستنكار :
- أمال هنعمل ايه فهميني
ازدرأت "آيات" ريقها بصعوبة وهى تقول :
- مفيش أدامنا غير ... "أحمد"
نظرت اليها "أسماء" بدهشة لبرهه ثم ما لبثت أن قالت :
- "أحمد" مين ؟ .. تقصدى "أحمد فؤاد" ؟
أومأت "آيات" برأسها ايجاباً فقالت "آيات" :
- فى آخر يوم امتحاناتنا ادانى أرقامه وقالى لو احتجته أكلمه
قالت "أسماء" بلهفة :
- أيوة صح "أحمد" بيحبك وأكد هيساعدنا
قالت "آيات" بحزم :
- أنا مش هطلب منه مساعدة عشان هو بيحبنى .. أنا هطلب منه مساعدة
لان مفيش أدامى غيره .. والمساعدة دى هتكون بدون أى مقابل
قالت لها "أسماء" بتبرم :
- يا ستى اعملى اللى انتى عايزاه المهم نخلص من الورطة دى
قالت "آيات" بضيق :
- بس للأسف أنا محتفظتش بأرقامه
ابتسمت "أسماء" وقالت وهى تخرج هاتفها من حقيبتها :
- متقلقيش أنا معايا رقمه
نظرت اليها "آيات" بدهشة وهى تقول :
- جبتيه منين ؟
قالت "أسماء" وهى منهمكة فى ايجاد رقمه على هاتفها :
- أيام خطوبتك واللى حصل فيها خد رقمى القديم وكان بيكلمنى عشان
يطمن عليكى
قالت "آيات" بغیظ :
- ما قولتليش يعنى الموضوع ده وبغني يطمن عليا بصفته ايه يعنى
قالت "أسماء" بفرح :
- أهو رقمه أهو .. يلا كلميه بس متطوليش عشان مش معايا الا كام دقيقه

لو خلصوا مش هنعرف نشحن تانى
أخذت منها "آيات" الهاتف فى تردد .. كانت متوترة للغاية .. جزء منها لا
يريد الإتصال به .. وجزء آخر يقول ليس لك ملجأ سواه .. إما هو أو
"عاصى" .. عزمت أمرها واتصلت به وقلبها يخفق بقوة .. سمعت صوت
الرنين ثم :

- ألو

صمتت "آيات" قليلاً ثم قالت :

- ألو .. أنا "آيات" يا "أحمد"

ران الصمت بينهما ثم هتف بسعادة وهو لا يصدق نفسه :

- "آيات" .. مش ممكن .. وحشتيني .. ازيك عاملة ايه

قالت "آيات" بتوتر وهى تنظر الى "أسماء" التى أشارت اليها تحثها
على مواصلة الحديث :

- الحمد لله .. "أحمد" فى مشكلة أنا واقعة فيها .. وكنت محتاجه منك
مساعدة لو كان ينفع يعنى

قال "أحمد" بلهفة :

- طبعاً أنا تحت أمرك بس مش هينفع على الفون .. تعالى نشوف بعض
ونتكلم براحتنا

قالت "آيات" بصعوبة :

- أنا مع "أسماء" فى حديقة الأزهر

قال "أحمد" على الفور :

- طيب أنا هنزل دلوقتى من الشركة ونص ساعة بالكثير وهكون عندك
أنهت "آيات" المحادثة وهى لا تدرى إن كانت تصرفت بطريقة صحيحة
أم لا .. قامت وتوجهت الى المسجد القريب مع "أسماء" لأداء فريضة
المغرب

أوقف "أحمد" سيارته وأخذ يبحث بناظريه عن "آيات" الى أن وجدها ..
ابتسم بسعادة وأقبل نحوها قائلاً بلهفه :

- ازيك يا "آيات"

قامت "آيات" لتقف فى مواجهته .. مد يده ليسلم عليها .. أحاطت جسدها
بذراعيها وهى تقول فى توتر :

- معلىش يا "أحمد" مش هسلم بالإيد

ابتسم فى توتر ومد يده الى "أسماء" قائلاً :

- ازيك يا "أسماء"

سلمت عليه "أسماء" وقالت بوهن :
- الله يسلمك يا "أحمد"
نظر "أحمد" اليهما .. كان يبدو عليهما التعب بالإضافة الى ملابسهما
الغير مهندمة .. نظر الى "آيات" فى اهتمام قائلاً :
- تعالوا نعد فى مكان ونتكلم براحتنا
همت "أسماء" بالموافقة لكن "آيات" قالت على الفور :
- لا مفيش داعى .. نتكلم هنا أحسن
وقف يستمع اليها فى انصات قائلاً :
- خير يا "آيات" اتكلمى
قالت "آيات" بعد فترة من التردد :
- بابا اتوفى من فترة وكان عليه ديون اضطريت أبيع كل حاجة عشان
نسددها .. وكنت عايشة مع "أسماء" عند دادة "حبيمة" فى بيتها
انهمرت عبراتها وهى تقول فى ألم :
- الزلزال اللى حصل امبارح .. البيت وقع و .. ماتت
ارتجف جسدها لشدة بكائها
نظر اليها "أحمد" بألم وهو يقول برقة :
- الله يرحمها .. خلاص يا "آيات" اهدى
حاولت "آيات" التماسك وهى تقول :
- كل فلوسنا كانت فى البيت اللى وقع .. ومفيش مكان نروح فيه
صمتت لا تدرى ما تقول .. بل شعرت أنها لا تدرى ماذا تريد منه .. ماذا
سيفعل لها .. لا تدرى أطلب منه مالاً أم سكناً أم عملاً .. شعرت بالتوتر
والحرج وندمت أنها اتصلت به .. قالت فجأة بإضطراب :
- أنا أسفة يا "أحمد" مش عارفه ليه اتصلت بيك .. أنا مش عارف
ثم نظرت اليه بعينها الدامعتين وهى تقول :
- بس أنا معرفش حد ممكن أجاله .. وأنا
قاطعها "أحمد" مبتسماً وهو يقول :
- متشليش هم .. تعالوا معايا
قالت له "آيات" بقلق :
- نيحى فين ؟
قال "أحمد" وهو ينظر اليها بحنان :
- شكلك تعبانه .. احنا عندنا شقة فى مدينة نصر .. هروح بس الفيلا أجيب
المفتاح وبعدين أوصلكوا على هناك
نظرت "آيات" الى "أسماء" ثم التفتت الى "أحمد" قائلة بتوتر :

- مش عايزة أضايقك أو
قاطعها مرة أخرى وهو يقول :
- مفيش داعى للكلام ده يا "آيات" .. يلا اتفضوا
انطلق "أحمد" بهما الى الفيلا .. أوقف سيارته ثم التفت اليهما قائلاً
بإبتسامه مرحبه :
- تعالوا انزلوا هعرفكوا على ماما وبابا وأعرفهم عليكموا
قالت "آيات" بحرج :
- معلش يا "أحمد" مفيش داعى
قال دون أن يتضايق من رفضها :
- مفيش مشكلة .. استنوني هجيب المفتاح وأجى على طول
ترجل "أحمد" من سيارته .. التفتت "آيات" لتتنظر الى "اسماء" قائله
بندم :
- مكنش لازم أكلمه
قالت "اسماء" بدهشة :
- ليه ؟
قالت "آيات" وهى تشعر بضيق شديد :
- محرجة أوى منه .. يعنى هو ذنبه ايه عشان يشيل همنا
قالت "اسماء" وهى تريح ظهرها الى الخلف فى تعب :
- بصى أنا تعبانه ومش قادرة أناهد معاكى
نزل "أحمد" من غرفته فرأى أمه وأبيه خارجان من غرفة الطعام ..
نظرت اليه أمه قائله :
- جيت امتى يا "أحمد"
قال "أحمد" وهو يلوح بالمفاتيح :
- جيت من شوية .. كنت عايز مفتاح شقة مدينة نصر
نظر اليه أمه بإستغراب قائله :
- لسه عايزها فى ايه
قال "أحمد" وهو متوجه الى باب الفيلا :
- فى اتنين صحابي هيباتوا فيها مؤقتاً
خرج "أحمد" فتوجهت والدته الى الشباب تنظر من الزجاج الى الفتاتان
القابعتان فى سيارة ابنها .. ركب "أحمد" ثم انطلق بهما خارج أسوار
الفيلا .. التفتت أمه الى أبيه قائله بحده :
- صحاب ابنك اللى هيباتوا فى الشقة بنتين مش ولدتين
قال والده بإستغراب :

- وهو "أحمد" ليه هيببتهم فى الشقة
قالت زوجته بحدده :
- وأنا أعرف منين
ثم قالت :
- اتصل بيه شوف ايه الحكاية ومين البنتين دول
قال زوجها وهو متوجه الى مكتبه :
- لما يبقى يرجع هبقى أتكلم معاه
هتفت زوجته بحنق :
- ده ايه البرود ده .. بقولك ابنك معاه بنتين فى العربية وواخدهم وطالع
بيهم على الشقة وبيقولك هيببتهم فيها
التفت اليها قائلاً :
- أنا عارف ابني كويس وعارف بتعامل معاه ازاي .. اطلعى انتى منها
تابعته بعينيها الى أن دخل مكتبه وهى تشعر بالغَيْظ

فتح "أحمد" باب المنزل وأشار لهما بالدخول قائلاً :
- اتفضلوا
دخلت الفتاتان وهما تنظران الى ما حولهما .. أضاء "أحمد" النور ..
كانت شقة فاخرة ذو أثاث راقى .. التفتت "آيات" تنظر اليه فابتسم لها
قائلاً :
- متخافوش محدش ببيجي هنا .. وعامة ماما وبابا عارفين ان فى اتنين
صحابي هيباتوا فى الشقة
ثم نظر الى المنزل قائلاً :
- معلش الشقة مقفولة من فترة عشان كده هتلاقوها متربه بس بكرة
الصبح ان شاء الله هبعث واحدة تنصفها
قالت "آيات" بخرج :
- مفيش داعى
ابتسم "أحمد" وهو يقول لها بحنان :
- متشليش هم .. ماشى
أومات "آيات" برأسها فى حرج .. فأخرج المفتاح من الباب وأعطاه لها
قائلاً :
- خدى مفتاح الشقة يا "آيات" ولو حبيتي تغيري الكالون غيريه
ثم أشار الى الباب خلفه قائلاً :

- عامة الباب فيه تراس من جوه
قالت له "أسماء" بامتنان :
- بجد متشكرين أوى يا "أحمد" مش عارفين من غيرك كنا عملنا ايه
قال لها "أحمد" :
- أنا معملتش حاجة
ثم توجه الى الخارج وهو يقول :
- يلا أسيبكوا ترتاحوا .. تصبحوا على خير
نزل "أحمد" فالتفت "آيات" الى "أسماء" التى أخذت تنظر الى
محتويات المنزل وهى تقول :
- ده طلع بيحبك أوى على فكرة
زفرت "آيات" بضيق وهى تقول :
- أنا خايفة يفهمنى غلط .. ويفتكر ان دى مقابل دى
نظرت اليها "أسماء" وهو يقول :
- لا يا شيخة معتقدش .. وبعدين انتى مطلبتيش منه حاجة هو اللى عرض
اننا نستنى فى الشقة دى
قالت "آيات" وهى تفكر بحزن :
- وبعدين هنعمل ايه يا "أسماء" .. أكيد مش هنفضل هنا على طول .. لازم
نشوف حل
قالت "أسماء" بضيق :
- والله أنا مش عارفه هى عماله تتقفل فى وشنا كده ليه .. كل ما أقول
خلاص هتفرج ألقياها اسودت أكثر
قالت "آيات" وعينيها تمتلئ بالعبرات :
- وحشتنى أوى
التفتت اليها "أسماء" تنظر اليها لتدمع عينيها هى الأخرى .. قالت
"آيات" ودموعها تتساقط :
- ربنا يرحمها .. كان نفسى أعرف هى مدفونة فين
كفكفت دموعها ونظرت الى "أسماء" قائله :
- تفتكرى يا "أسماء" مين اللى استلمها ؟
قالت "أسماء" وهى تفكر :
- يمكن حد قريبها
الت "آيات" بحيرة :
- بس هى ملهاش حد
مطت "أسماء" شفيتها وهى تقول :

- معرفش .. يمكن حد من جيرانها
ثم قالت فجأة وهى تضع يدها على بطنها وعلامات الألم على وجهها :
- أنا جعانه أوى
قالت "آيات" :
- وأنا كمان هموت من الجوع .. شوفت سوبر ماركت أدام البيت واحنا
طلعين .. هنزل أجيب أى حاجة
قالت "أسماء" محذره :
- بس خلى بالك ممعناش غير 29 جنيه ومعرفش هنقدر نجيب فلوس تانى
امتى
أومات "آيات" برأسها وما كادت تلتفت لتتوجه الى باب البيت حتى
سمعتنا صوت الجرس .. نظرنا الى بعض فى ريبة .. ثم نظرت "آيات" من
العين السحرية لتعرف من القادم .. فتحت الباب بعدما تعرفت على
"أحمد" .. ابتسم لها قائلاً :
- خوفت تكونوا نمتوا
قالت له بحذر :
- لالسه
وضع "أحمد" بعض الأكياس من يده بجوار الباب من الداخل وهو يقول :
- قولت بدل ما تنزلوا .. انتوا أكيد لسه مش عارفين حاجة فى المنطقة هنا
.. وكمان التلاجة فاضية للأسف .. لان الشقة دى مقفوله على طول
شعرت "آيات" بالحرص الشديد وقالت :
- مفيش داعى يا "أحمد"
قال لها وهو ينظر اليها بحنان :
- أنا معملتش حاجة .. يلا تصبحوا على خير .. ولو احتجتى حاجة كلمينى
وأنا أجيلك على طول
أغلق الباب بيده .. نظرت الفتاتان الى بعضهما البعض ثم ابتسمت
"أسماء" قائله بخبث :
- ده الحب ولع فى الدرة على الآخر

خرج "آدم" من الحمام بشعره المبلل الذى تتساقط قطرات الماء منه على
وجهه دخل غرفته وفرش سجاده ليصلى العشاء .. دعا لـ "آيات" كثيراً
فى سجوده والعبرات تتساقط فوق سجادة الصلاة .. أنهى صلاته وألقى
بنفسه فوق الفراش فى انهاك .. اقترب منه "زياد" قائلاً :

- "آدم" أنا جبت أكل قوم كلك لقمة
أولاه ظهره وأغمض عينيه .. نظر اليه "زياد" بأسى ثم تركه وأغلق باب
الغرفة .. فتح "آدم" عينيه فى ظلام الغرفة ثم ما لبث أن أغلقهما وقد
عقد جبينه فى ألم .. بعد منتصف الليل بقليل استيقظ "آدم" فجأة .. جلس
على فراشه وهو يتذكر أحداث اليومين الماضيين كما لو كان كابوساً
يتمنى الإستيقاظ منه .. توجه الى الخارج ونظر الى "زياد" النائم على
الأريكة .. توجه الى الطعام فوق الطاولة وأخذ بضعة لقيمات يتقوى بها ..
ثم حمل مفاتيح سيارته ومصحفاً صغيراً وتوجه الى الخارج دون أن يهتم
بإرتداء ملابس لائقة .. استيقظ "زياد" على صوت غلق الباب .. انتفض
وذهب الى غرفة "آدم" ليجده وقد غادرها .. فتح شرفة غرفته فوجده
متوجهاً الى سيارته .. ثم انطلق بها .. تنهد "زياد" فى أسى وهو يعلم
جيداً الى أين توجه "آدم"

جلس "آدم" أما القبر وقد افترش الأرض .. ينظر اليه بأعين دامعة
تتساقط منهما العبرات فى صمت .. لف ذراعيه حول قدميه وضمهما الى
صدره .. أخذ يشرد بخياله ويتخيلها الآن وقد انضمت جدران القبر
لتضمها تلك الضمة التى قال عنها النبي صلى الله عليه وسلم "إِنَّ لِلْقَبْرِ
ضَغْطَةً وَلَوْ كَانَ أَحَدٌ نَاجِيًا مِنْهَا نَجَا مِنْهَا سَعْدُ بْنُ مُعَاذٍ " .. يعلم جيداً أن
تلك الضمة تكون بحسب عمل الإنسان فإن كان خيراً كانت تلك الضمة
حانية كضمة الأم لوليدها .. وإن كان شراً كانت قاسية تتهشم فيها العظام
وتختلط فيها الضلوع .. ارتعش جسده ودب الخوف فى أوصاله .. خوف
عليها .. على ما تلاقيه الآن فى قبرها فى أول ليلة .. نظر حوله .. الى
سكون الليل والى الوحشة التى تحيط بالمكان .. والى شواهد القبور التى
تتطلع اليه فى صمت .. ثم عاد لينظر الى القبر أمامه وازداد انهمار
عبراته وهو يتذكر حديث النبي صلى الله عليه وسلم " صنفان من أهل
النار لم أرهما بعد : رجال معهم سياط كأذناب البقر يضربون بها الناس ،
ونساء كاسيات عاريات مائلات مميلات على رؤوسهن كأسنمة البخت
المائلة ، لا يدخلن الجنة ولا يجد ريحها ، وإن ريحها ليوجد من مسيرة
كذا وكذا " ارتجف جسده بشدة وهو يبكى ألماً وخوفاً .. أخذ يتمتم دون
انقطاع :

- يارب ارحمها .. يارب ارحمها .. يارب ارحمها
ثم أخرج مصحفه من جيبه وظل يتلو آيات من كتاب الله بصوت مرتجف ..
ذلك الكتاب الذى هجره طويلاً .. ها هو يعود الى حمله بين يديه والى
تمرير عينيه وقلبه على كلماته الربانية .. يشعر بقيمته وبكم هو فى حاجة

اليه .. نوى بقلبه أن يهديها ثواب قرائته .. ودعا ربه أن يتقبلها منه .

فى الصباح توجه "أحمد" الى مكتب والده بالببيت .. ابتسم له والده وأزاح
عويناته من فوق أنفه قائلاً :

- تعالى يا "أحمد"

ابتسم "أحمد" وجلس وهو يقول :

- ماما قالتلى ان حضرتك عايزنى

نظر اليه والده "فؤاد" قائلاً :

- مين صحابك دول اللى بايتين فى شقة مدينة نصر

قص عليه "أحمد" مأساة "آيات" ورغبته فى مساعدتها .. فقال له :

- برافو عليك .. مكنش يصلح تسيب بنتين فى ظروف زى دى من غير ما
تساعدهم

ثم نظر اليه متفحصاً وهو يقول :

- بس قولى بتساعدهم لله فى الله كده ولا فى سبب تانى

تنحنح "أحمد" ثم قال بمرح :

- بصراحه يا "فؤاد" بيه فى أسباب أخرى

قال فؤاد بلؤم :

- اها قولتلى .. مين فيهم بأه

قال "أحمد" مبتسماً :

- "آيات"

قال "فؤاد" وهو يرجع ظهره الى الخلف يستند به على ظهر مقعده :

- ماشى يا سى "أحمد" .. المهم دلوقتى عايز أسألك عن حاجة مهمة

قالت له بجديه :

- اتفضل يا بابا

قال "فؤاد" باهتمام :

- فى دكتور كان عندك فى الكلية اسمه "آدم خطاب" تعرفه ؟

ظهرت علامات الضيق على وجه "أحمد" وهو يتذكر خطبة "آدم" لـ

"آيات" ثم قال :

- أيوة أعرفه كان دكتور عندنا فى الجامعة

ثم هتف بغیظ :

- بس راجل مش محترم

رفع "فؤاد" حاجبيه بدهشة ثم قال :

- ازای يعنى مش محترم ؟

قال "أحمد" بحده :

- سي "آدم" ده كان خطيب "آيات" البنت اللي كنت بكلم حضرتك عنها دلوقتي .. وطلع راجل مش محترم وماشيئه مش مضبوط .. خانها مع واحده صورته فيديو وهو معاها وراحت يوم كتب الكتاب لـ "آيات" ووريتها الفيديو .. و "آيات" و باباها طردوه من البيت وفسخوا الخطوبة نظر اليه "فؤاد" صامتاً يزن ما قاله فى عقله ثم سأله :

- "آيات" اللي قالتك
قال "أحمد" :

- لأ مش "آيات" .. صاحبته "أسماء" .. بعد اللي حصل "آيات" جالها انهيار عصبي وتعبت ودخلت المستشفى ومكنتش بتتكلم من الصدمة وبعدين سافرت مع باباها عمره وأنا فى الفترة دي كنت بتصل بـ "أسماء" عشان أطمئن على "آيات" وأعرف أخبارها أوما "فؤاد" برأسه فى شرود .. فسأله "أحمد" باهتمام وقال :

- انت ليه بتسأل عنه يا بابا
أخذ "فؤاد" نفسها عميقاً ثم قال :

- لانى قررت أأجر قرية سياحية جمب قريته فى العين السخنة .. فكنت حابب أعرف كل حاجة عنه هو ومدير القرية الثانية .. لأن القرية اللي أنا اخترتها ملك لمجموعة شركات مالكة لـ 3 قرى جمب بعض .. فكنت حابب أعرف كل المعلومات عن منافسينى فى القريتين اللي جمبى نظر اليه "أحمد" بدهشة وقال :

- ما قولتليش يعنى على موضوع القرية دي
قال "فؤاد" :

- الموضوع فى دماغى من زمان بس كنت محتاج حد يشاركنى فيه .. لأنه مشروع ضخم ومش هقدر أدخل فيه لوحدى .. والحمد لله لقيت بدل للشريك اتنين
ابتسم "أحمد" قائلاً بحماس :

- طيب ايه رأيك تشغل "آيات" و "أسماء" فى القرية .. دول بنتين ممتازين بجد يا بابا وأهو تاخذ فيهم ثواب
قال "فؤاد" :

- أنا فعلاً محتاج عماله الفترة اللي جاية .. بس مش فى القرية .. هنا فى شركة السياحة اللي هتتعامل مع العملا وتجذبهم لقريننا
ثم قال :

- هما نفس تخصصك ادارة أعمال ولا تخصص تانى ؟

قال "أحمد" :

- أيوة نفس تخصصى

قال "فؤاد" :

- طيب ممتاز .. خليهم يجولى الشركة فى بعد يومين لانى مسافر بكرة ..

هعمل معاهم انترفيو بسيط .. وان شاء الله يكونوا معانا فى الشركة

اتسعت ابتسامه "أحمد" وهو يقول بحماس :

- متشكر أوى يا بابا .. أكيد هيفرحوا أوى

ابتسم فؤاد قائلاً :

- بس خلى بالك أنا الشغل عندى مفيهوش لا قرابه ولا مجاملات .. لو

هيشغلوا معايا هديهم مرتبات كويسة بس فى المقابل عايز شغل ممتاز ..

يعني مايعتمدوش على صحوبيتك ويهملوا شغلهم

ضحك "أحمد" قائلاً :

- طول عمرك متعرفش غير شغلك يا "فؤاد" بيه .. لا ليك فى الكوسة ولا

فى السلطة

ضحك "فؤاد" وهو يحمل عويناته ليرتديها مرة أخرى :

- طيب يلا بأه عشان عندى شغل

شعر "أحمد" بالإرتياح وركب الى سيارته بسعادة وعزم على التوجه الى

"آيات" ليخبرها بهذه البشرى

قالت والدة "آدم" على الهاتف بقلق بالغ :

- أنا خايفة عليه يا "زياد"

تنهد "زياد" قائلاً وهو يحاول أن يبتث فيها الطمأنينه :

- متقلقيش يا خالتي أنا معاه وواحد بالى منه

قالت بصوت باكى :

- لا حول ولا قوة الا بالله ربنا يرحمها .. يا قلبي عليك يا ابنى .. ربنا

يصبرك

قال "زياد" :

- يارب

قالت "أم" "آدم" بلهفة :

- لما يبجي يا "زياد" اتصل بيا وخليني أسمع صوته .. وقوله يفتح

موبايله يا ابنى أنا هموت من القلق عليه

قال "زياد" مطمئناً اياها :

- حاضر من عنيا يا خالتي متقلقيش

سمع "زياد" صوت الفمّاح فى الباب فهب واقفاً وهو يقول :

- أهو جه

قالت بلهفة :

- اديهولى يا "زياد"

دخل "آدم" الى البيت أشعثاً أغبراً .. نظر "زياد" الى ما كان يرتديه ..
فلقد اعتاد أن يرى "آدم" متأنقاً فى غاية الأناقة .. ولم يعتد أن يراه غير
مهتم بملابسه هكذا .. نظر اليه قائلاً :

- "آدم" مامتك عايزه تكلمك

أخذ "آدم" الهاتف من "زياد" وقال بصوت مبجوح :

- أيوة يا ماما

قالت أمه بصوت كمن أوشك على البكاء :

- ازيك يا حبيبي انت كويس

تنهد بإرهاق قائلاً :

- أيوة كويس

صمتت أمه قليلاً ثم قالت بحزن وأسى :

- ربنا يرحمها يا ابنى

دمعت عيناه وهو يقول :

- آمين

قالت أمه :

- هترجع امتى يا ابنى

قال "آدم" وهو يمسح دمعة فرت من عينه :

- شوية كده

ثم قال :

- انتى كويسة .. ناقصك حاجة

قالت أمه :

- لا يا ابنى مش ناقصنى غير وجودك جمبي

قال "آدم" بخفوت :

- يومين كده وهرجع ان شاء الله

قالت أمه :

- تيجي بالسلامة يا حبيبي .. بس افتح تليفونك عشان لما أحب أظمن

عليك

قال باستسلام :

- حاضر

قال "زياد" لـ "آدم" محاولاً جذب انتباهه لشيء آخر بعيداً عما يقاسيه :
- أنا عرفت مين اللي أجر القرية الثالثة يا "آدم"
بدا على "آدم" وكأن الأمر لا يعنيه .. ودون ان يتفوه بحرف توجه
"آدم" الى غرفته تحت أنظار زياد" وتمدد فوق فراشه فى انهاك

فتح "على" الباب .. بمجرد أن رأى "سمر" أمامه شعر بمشاعر كثيرة
متضاربه .. فغض بصره على الفور .. نظرت الى ذراعه المجبر وهى
تشعر بالإشفاق عليه .. فمئذ أن أخبرتها "إيمان" بما حدث له وهى تشعر
بالحزن من أجله .. تمت بصوت خافت :
- "إيمان" موجودة ؟

قال لها وهو يفسح الطريق :

- أيوة موجودة اتفضللى

انتظرت "سمر" أمام الباب الى أن حضرتك "إيمان" قائله :

- تعالى يا "سمر" ادخلى

دخلت "سمر" وتعانقت الصديقتان .. وقع نظرها مرة أخرى على "على"
الذى كان متوجهاً الى غرفته .. تلاقى عيونهما للحظة .. بدت عيناها
حزينتان لما أصابه .. وبدا معاتباً اياها على رفضها المتكرر له .. ثم دخل
غرفته وأغلق الباب بهدوء
جلست "سمر" مع "إيمان" فى غرفتها فقالت هذه الأخيرة :

- باركيللى

التفتت اليها "سمر" على الفور وقالت :

- ايه .. عريس ؟

ضحكت "إيمان" بسخرية :

- هو انتى لسه عندك أمل .. ده أنا فقدت الأمل من زمان

نظرت اليها "سمر" بحزن لما تشعر به من احباط ثم قالت :

- أمال أباركلك على ايه

قالت "إيمان" بتهمك وهى تجلس فوق الفراش :

- سيببت شغلى

هتفت "سمر" بدهشة وهى تجلس بجوارها :

- ايه .. سببتى شغلك .. ليه يا إيمان"

قالت "إيمان" بتبرم :

- قرفت .. بدور فى ساقية طول الشهر ومقبضش غير ملاليم .. قرفت من

الشغل ومن الناس ومن كل حاجة

قالت "سمر" بعتاب :

- بس على الأقل كنتى بتخرجى وبتشوفى ناس يا "إيمان"

قالت "إيمان" بضيق :

- بلا أرف .. سيبك .. قوليلي أخبارك ايه انتى

قالت "سمر" الحمد لله

ثم سألتها فى حرج :

- ازي اخوكى دلوقتى ؟

تنهدت "إيمان" بأسى قائله :

- أهو زى ما انتى شايغه التيبيبيبيبىيت ضربوه وكسروه ايدى .. كل ده

عشان مكنش موافق انهم يغيروا تاريخ صلاحية عبوات الأكل المحفوظ

قالت "سمر" بحنق :

- ربنا ينتقم منهم

قالت "إيمان" بتهكم :

- كل حاجة فى البلد دى بايظة .. محدش مرتاح يا بنتى .. محدش مرتاح

أبدأ

قالت "سمر" وسحابة حزن تمر بعينيها :

- على رأيك .. محدش مرتاح

نظرت "سمر" الى "إيمان" بتفحص .. فانتبعت لزيادة وزنها عدة كيلو

جرامات .. شعرت "سمر" بالإشفاق عليها .. وبالضيق أيضاً فهى من

تفعل بنفسها ذلك .. لم تشأ أن تخبرها بأنها لاحظت زيادة وزنها حتى لا

تصاب بالإحباط فهى تعلم حساسية "إيمان" الشديدة لهذا الأمر

وقف "آدم" أمام القبر يدعو ويستغفر .. بدا وكأنه لا يريد مفارقة هذا

المكان .. كان الحزن والألم ينخران فى جسده فبدا وجهه كلوحة تعبر

ببراعة عما يقاسيه ويكابده .. ودعا بنظراته الحزينة وعيونه الدامعه

وقد اتسعت الهالات تحت عينيه .. همس لها بصوت مرتجف وكأنه قادم

من مكان سحيق :

- مش هنسأكى

اقترب منه "زياد" وربت على كتفه .. التفت اليه "آدم" فجذبه "زياد"

من ذراعه قائلاً :

- يلا يا "آدم"

سار "آدم" معه وتوجها كل الى سيارته .. نظر "زياد" الى "آدم" بقلق وقال :

- هتعرف تسوق ؟

ارتدى "آدم" نظارته الشمسية وهو يفتح باب سيارته ويقول :
- أيوة

وانطلقا فى طريقهما الى .. العين الساخنة

تمدد "آدم" على فراشه ينظر الى سقف الغرفة .. كالجثة التى فارقت الحياة لا يميزه عنها سوى حركة جفوته الرتيبة من حين لآخر .. تابعته أمه بنظراتها المشفقة وهى لا تدرى ماذا تصنع لولدها لتخفف من هذا العذاب الذى يدب فى أوصاله .. لم يظن أنه سيتألم لفقدائها الى هذه الدرجة .. لم يدرك أنها مهمة له لهذا الحد .. علم فى تلك اللحظة أنه لم يحب فتاة قبلها .. أشد ما يؤلمه هو الطريقة التى ظن أنها ماتت بها .. ظل يتخيل الزلزال وانهيار البناء والحريق .. هل قاست وتعذبت أم ماتت على الفور مثل "حليمة" التى دفنها فى القبر المجاور لها .. ظهرت تقطبية على جبينه وهو يتمنى ألا تكون قد تألمت .. ظلت الأسئلة تتقاذف الى عقله .. ماذا يحدث لها الآن .. أقبرها الآن روضة من رياض الجنة .. ام حفرة سحيقة من حفر النار .. ارتجف جسده وارتعد .. امتدت يده الى مصحفه وفتحه وشرع فى القراءة .. واهدائها هذا الأجر

امتنع "آدم" عن الذهاب الى عمله اليومين الماضيين .. لم يجد فى نفسه القوة على العمل أو حتى الحديث .. ظل قابلاً فى غرفته لا يلوى على شئ .. ذات ليلة أتت "ساندى" للإطمئنان عليه بعدما علمت من "زياد" شدة تأثره لوفاة "آيات" خطيبته السابقة .. شعرت "ساندى" لأول وهلة بالحزن لوفااتها ثم ما لبثت أن شعرت بالغيب .. كانت تظن أن "آدم" نسى "آيات" ومحاها من تفكيره تماماً .. لكنها اكتشفت أنها كانت مخطئة وظنت أن هذا ما كان يحول بينها وبينه .. لم تنكر تلك السعادة التى شعرت بها فيما بعد وهى تفكر فى أنها تخلصت من غريمتها .. وللأبد .. وبالتأكيد سيكون "آدم" محتاج الآن لمن تبقى معه وتبدد أحزانه .. عدة أيام أو أسابيع وسينساها ويبدأ قلبه فى البحث عن حب جديد .. وستكون هى ذاك الحب .. توجهت الى الشاليه .. فتحت لها والدته "آدم" ودعتها للدخول .. فابتسمت لها "ساندى" قائلة :
- انا جيت أظمن على "آدم"

قطبت أمه جبينها في حزن وهي تقول :

- والله يا بنتي زى ما هو .. لا عايز يخرج ولا عايز يتكلم مع حد .. طول الوقت حابس نفسه فى أوضته .. وحتى الأكل بياكل بالعافية تسرب شعور بالغبظ الى نفس "ساندى" لكنها قالت بأسف زائف :

- بجد ربنا يصبره .. أكيد كانت حاجه صعبة عليه .. مع انى كنت فاكراه انها خلاص مبقتش تفرق معاه من ساعة ما سابوا بعض قالت أمه بتأثر :

- اذا كنت أنا اللي شوفتها مرة واحدة و اتأثرت بموتها .. ربنا يرحمها كانت صغيره

قالت "ساندى" وهي تجول بعينها فى المكان :

- ممكن يا طنط تقولى انى عايزة أشوف .. أنا قلقانه عليه أوى وعايزه أطمئن عليه

لكن رد "آدم" كان حاداً عندما قال لأمه :

- قوليلها نايم

قالت أمه بعتاب :

- يعنى يا ابنى أخرج البنت وهي فى بيتنا أنا قولتلها انك صاحى .. ميصحش برده

قال "آدم" بحزم :

- مش طايق أشوف حد .. يا تقوليلها انتى يا أطلع أقولها

كان آخر ما سنقصه الآن هو رؤية "ساندى" بسماجتها وثقل ظلها .. رن هاتفه فتفحصه للحظة ثم رد قائلاً :

- ألو

قال الطرف الآخر :

- أيوة يا دكتور "آدم" .. ازى حضرتك .. أنا "مدحت" والد "أسماء"

- أيوة رقمى عندى يا أستاذ "مدحت"

قال "مدحت" بخرج :

- أنا آسف لو اتصلت فى وقت غير مناسب

- لأ ابدأ أتفضل

- كنت عايز أسأل عن "أسماء" موصلتش لحاجة ؟ .. معرفتش حتى طريق صاحبتها "آيات"

دمعت عيناه وهو يقول بصعوبة بصوت مضطرب :

- "آيات" .. "آيات" الله يرحمها

صمت "مدحت" للحظات ثم صاح :

- لا حول ولا قوة إلا بالله .. ماتت ازاي
تحدث "آدم" بصعوبة بالغة وقد شق عليه التحدث عن موتها مع أحد :
- الزلزال اللي حصل .. البيت اللي كانت ساكنه فيه مع الدادة وقع
قال "مدحت" بلهفة ولوعة :
- أسماء كانت معاها ؟
- لا مكانتش معاها
- انت متأكد ؟

- أيوة متأكد لإن الجثث كلها استلموها أهلهم
قال "مدحت" بأسى :

- ربنا يصبر أهلهم .. البقاء لله يا دكتور .. وآسف انى ضايقتك
ألقى "آدم" الهاتف على فراشه بلامبالاة وأسند ظهره الى الخلف ليغرق
فى أحزانه من جديد .. شعر بكل شئ حوله تافهاً لا قيمة له .. كل ما كان
يحلم به وكل ما كان يطمح اليه .. كل شئ فجأة بدا صغيراً .. بلا قيمة ..
وضيعاً .. تسرب اليه الندم ينهش فى قلبه .. شعر بأنه ترك ما يستحق من
أجل مالا يستحق .. شعر بأنه كان يسير طيله الفترة الفاتنة كالمغيب ..
كالأعمى .. كفاقد البصر والبصيرة .. غضبه وقهره والظلم الذى تعرض له
أحاده عن الطريق الصحيح وسلسله الشيطان فى سلسله يحركه كما
يشاء .. واستسلم هو بلا أى رغبة فى المقاومة .. حركته رغبته فى
الإنقاذ واسترداد حقه حتى قسى قلبه كقلوب من ظلموه .. فلا فرق بينهما
الآن .. كلاهما ظالم مذنب هالك عاجلاً أم آجلاً .. أغمض عينيه وهو يتمنى
أن يفقد ذاكرته .. أو يعود بها الى عامين مضوا .. الى حيث كان "آدم" ..
شخص آخر .. غير "آدم" الذى يراه الآن فى مراته

نزلت "آيات" بصحبة "أسماء" من البناية الأنيقة .. انحنى "أسماء"
على أذنائه قائله :

- يارب فعلاً تصيب المرة دى ويرضى يشغلنا
قالت "آيات" وهى تنظر الى "أحمد" الذى خرج من سيارته ليستقبلهما
:

- ان شاء الله خير

التف "أحمد" حول السيارة وفتح الباب لـ "آيات" قائلاً ببشاشة :

- بابا مستنينا فى المكتب

قالت له "آيات" بخرج :

- مكنش فى داعى تيجي معانا احنا كان ممكن نروح لوحدنا بدل ما نتعبك

وكزتها "أسماء" بكوعها ونظرت اليها نظرة تقول .. أنسي تي أننا لا نملك
مالاً يكفى حتى للذهاب الى الشركة
قال "أحمد" وهو مازال محتفظاً بإبتسامته :
- لا مفيش تعب ولا حاجة

ظلت "آيات" طوال الطريق شاردة ترمق "أحمد" بنظرات مختلصة ..
كانت تخشى أن يظن فى لجونها اليه معنى لا تقصده .. خاصة بأنها تعلم
بمشاعره تجاهها .. قطبت جبينها بشدة وهى تخشى أن يكون فى موقفها
هذا استغلالاً لمشاعره بطريقة أو بأخرى .. توقف بسيارته أمام شركة
والده .. نزلت "آيات" من السيارة لتلتفت الى "أسماء" قائلة :
- "أسماء" اسبقينا خطوتين

نظرت اليها "أسماء" بدهشة ثم ما لبثت أن استجابت لطلبها .. التف
"أحمد" حول السيارة ووقف مواجهاً لـ "آيات" وهو يلقي نظرة على
"أسماء" التى ابتعدت عدة خطوات .. وقفت "آيات" فى مواجهته وهى
تقول :

- "أحمد" فى حاجة مهمة عايزه أقولها لك
ارتسمت البسمة على شفثيه وهو يقول :
- اتفضلى يا "آيات"

أخذت تبحث عن كلمات مناسبة تصوغ به ما تريد قوله .. قالت بجدية :
- بص يا "أحمد" .. أنا خايفة تفهمنى غلط .. يعنى أنا لجأتلك لانى ملقتش
حد غيرك الجالء .. لو كان ينفع الجالء لعمى كنت لجأتله بس هو شبه
طردنى من مكتبه .. ده غير ابنه اللى مرتحتلوش نهائى .. وأنا مليش حد
قال "أحمد" وهو يحاول فهم ما تقول :
- أيوة عارف كده

قالت "آيات" بحزم :

- يعنى أنا مش بوعدك بحاجة .. ولا هيكون فى مقابل على اللى انت
بتعمله معايا .. فاهمنى

تجمدت نظراته للحظة وظهر العبوس على محياه ثم قال :

- "آيات" اللى عايزك تعرفيه هو انى مش بساعدك عشان عايز حاجة
مقابل مساعدتى ليكي .. أى بنت لو كانت مكانك ولجأتلى بظروفها دى
كنت برده ساعدتها

ثم قال وهو ينظر اليها بنظرة ذات مغزى :

- ما بالك بأه إن البنت دى .. بحبها

توترت "آيات" وأخفضت بصرها بعدما تضرجت وجنتاها .. فقال بخفوت

:
- أنا عارف كويس انك مش حسه بحاجه نحيتي .. بس أنا مش حابب أفقد
الأمل .. وفي نفس الوقت مش هطلب منك حاجة مقابل مساعدتي ليكي ..
أصلاً لو عملت كده مبقاش راجل .. لو استغلّيت ضعف واحدة وحاجتها
للى يساعدها و يقف جمبها .. مبقاش راجل
نظرت اليه "آيات" بامتنان لشهامته وطيبته .. فرسم ابتسامه على شفّتيه
وهو يقول :

- يلا زمان بابا مستنى وبابا ده موته وسمه التأخير
جلست مع "أسماء" و "أحمد" فى مكتب السكرتيرة فى انتظار أن يُسمح
لهم بالدخول .. أخذت تفكر فى حياتها الجديدة التى ستُقبل عليها بعد
لحظات .. عمل جديد ومسكن جديد وطريق جديد .. تُرى أسينتهى هذا
الطريق ككل الطرق التى سلكتها ؟ .. أم أنها ستجد هذه المرة فى نهايته ..
السعادة !؟

نظر "آدم" فى مرآة الحمام يرقب نظرات عينه الغائرة .. وقد ازدادت
عمقاً وزرقه .. والى شعره الأسود الذى تتساقط منه حبات الماء على
وجهه .. أخذ ينظر الى تلك الملامح التى ينظر اليها يومياً فى مرآته ..
رغم أنها نفس الملامح الا أنه شعر اليوم بشئ مختلف .. شعر بأنه
شخص آخر غير من يراه فى مرآته يومياً .. اختلف فيه شئ .. شئ لا
يظهر أثره إلا فى نظرات عينيه .. ها هو مقبل على فصل جديد من حياته
.. فصل ليس كالفصول التى سبقته .. ارتدى ملابسه وتأنق .. تأمل نفسه
فى مرآته للمرة الأخيرة قبل أن يقبل يد والدته ويتوجه الى خارج الشاليه
.. ارتدى نظارته الشمسية وقد عقد ما بين حاجبيه فى عزم واصرار ..
وسار بخطوات واثقة .. ونظرات عينيه من خلف النظاره ثابتة ثابتة
تعرف ما تريد جيداً .. اليوم سيأخذ عدة قرارات مهمة .. اليوم سيكون
مختلفاً فى قرية جولدن بيتش .. شعر بأنه كالجراح الذى أخطأ فى احدى
عملياته وكاد أن يموت المريض بين يديه .. لكن قبل أن يتلقى اللوم
والتوبيخ أسرع بأخذه الى غرفة العمليات مرة أخرى .. وها هو يمسك
بمبضعة فى يده .. وبيده الأخرى يحدد مكان المرض .. ها هو يهوى بيده
على المكان ليشفقه وينظفه ويطهره !

كنت ميتاً في بحور الغيِّ والإثم غريقاً .. كنت عبداً في قيود الذنب مملوكاً
رقيقاً

مد لي الشيطان من أسبابه حبلاً وثيقاً .. منكرات كنت آتيها غروباً وشروقاً
غزت الإثام لحمي ثم عظمي والعروق .. كنت في التفحيط نجماً يبهر الدنيا
بريقاً

اجهدت سيارتي من شدة الزحف الطريق .. يارفيق الدرب مهما كنت فذاً
لن تفوق

والجماهير اصمتني صفيراً ونعيقاً .. كم اطار كان يهدى ثم ارميه عتيقاً
كم دخلت السجن مرات فازداد فسوقاً .. اصبح الوجدان قفراً ضامئ
الإرض سحيقاً

انني احتاج غيثاً صافياً يكفي بروقاً .. صافياً يكفي بروقاً

الفصل الحادى والعشرون من رواية جواد بلا فارس



شعرت "آيات" بالتوتر الشديد وهي تدلف الى مكتب "فؤاد" والد
"أحمد" .. حانت منها التفاتته الى "أسماء" فوجدتها بنفس توترها ..
تبادلت الفتاتان النظرات قبل أن يقدمها "أحمد" الى والده قائلاً :
- بابا أحب أعرفك على "آيات" و "أسماء" .. زمايلي في الكلية
ابتسم "فؤاد" ووقف يمد يده ليسلم على الفتاتان قائلاً :

- أهلاً بيكم
سلمت عليه "أسماء" .. أما "آيات" فتوترت رفعت يدها قليلاً ثم تراجعت
وقالت بارتباك شديد :
- معلى يا عمو مش بسلم بإيدي
أعاد "فؤاد" يده بجواره ثم أشار لهما بالجلوس قائلاً :
- اتفضلوا

جلست الفتاتان فى مقعدين متواجهين .. أما "أحمد" فجذب مقعداً وجلس
بالقرب من "آيات" .. عقد "فؤاد" كفيه فوق المكتب وقال :
- ها تحبوا تشربوا ايه ؟

ضغط زراً بجواره فحضرت السكرتيرة على الفور ثم انصرفت تحضر ما
طلبوه .. بدأ "فؤاد" حديثه قائلاً :

- "أحمد" كلمكوا عن طبيعة الشغل اللى محتاجكوا فيه ؟

قبل أن تجيب الفتاتان أسرع "أحمد" بالإجابة قائلاً :

- لا يا بابا ما قولتلهمش حاجة .. قولت حضرتك تشرحلهم أفضل

رجع "فؤاد" بظهره الى الخلف ثم قال :

- أنا ناوى ان شاء الله أعمل مشروع سياحى .. قرية سياحية فى العين
السخنة

نظرت الفتاتان الى بعضهما البعض فى دهشة .. فلاحظ "فؤاد" دهشتهما
فضاقت عينيه قائلاً :

- فى حاجة ؟

التفتت "آيات" اليه وتحننت ثم قالت :

- لا أبداً .. بس ابن عمى برده عامل مشروع سياحى فى العين السخنة

وكان عارض علينا نشتغل معاه

قال "فؤاد" باهتمام :

- اسمه ايه ابن عمك ؟

- "عاصى سراج اليمانى"

رفع "فؤاد" حابيه بدهشة وهتف :

- انتى بنت أخو "سراج اليمانى" ؟

حانت منها التفاتة الى "أسماء" ثم نظرت اليه قائلة بتوتر :

- أيوة

صمت "فؤاد" وقد بدا عليه التفكير .. سأله "أحمد" باهتمام :

- ليه فى حاجة يا بابا .. حضرتك تعرفه ؟

عقد "فؤاد" ذراعيه مرة أخرى فوق المكتب ونظر الى "آيات" قائلاً :
- قرية "سراج اليماني" اسمها قرية الفيروز ودي جمب قرينتا بالظبط
أومات "آيات" برأسها وقد غرقت في التفكير .. نظر إليها "فؤاد" نظرة
ثاقبه وقال :

- وقرية "شكري" "اسمها جولدن بيتش ودي كمان جمب قرينتها
فجأة تجمدت الدماء في عروقها عندما سمعته يقول :
- ومديرها دكتور "آدم خطاب"

بدا على "أسماء" الدهشة وهي تستمع الى "فؤاد" .. أما "آيات" فقد
بدا عليها الضيق .. رمق "أحمد" والده بنظرات عتاب وكأنه يقول : لماذا
أخبرتها ؟ .. خشى "أحمد" أن تتراجع "آيات" عن العمل في القرية
بعدما عملت بأنها ستعمل في قرية منافسة لـ "سراج" عمها .. و "آدم"
خطيبها السابق .. نظرت "أسماء" إليها ترقب تعبيرات وجهها عليها
تستشف ما تفكر فيه وما تنوى فعله .. ظلت "آيات" صامتة ترمق
السجادة في شروود .. أكمل "فؤاد" حديثه قائلاً :

- شغلك انتي و "أسماء" لو وافقتوا تشتغلوا عندي .. مش هيكون في
القرية فمتقلقيش مش هتحتكي بحد منهم .. شغلك هيكون هنا في المكتب
السياحي اللي هنستقبل فيه الحجوزات واللي هنعمل منه الدعاية للقرية
التفتت "آيات" تنظر الى "فؤاد" وهي تسأله باهتمام :
- هنتغل ايه بالظبط

- أنا محتاج ناس بتحب شغلها وناس متفرغة لان الشغل الفترة الجاية
هيكون متعب .. انا مش داخل منافسة زي دي عشان أخسرها .. وداخل
وأنا عارف كويس حجم منافسيني .. ولازم أتفوق عليهم .. عشان كده
محتاج معايا ناس بتعشق النجاح .. وتكره الفشل
ثم قال :

- وعلى أد ما هتدوا لشغلوكوا على أد ما شغلوكوا هيديكوا .. يعنى اللي
بيتعب معايا بيلاقي نتيجة لتعبه

صمتت "آيات" تزن كلماته في عقلها ثم قالت :

- طيب هل في ملف خاص بالمشروع أو ملخص عنه

- أكيد في

- طيب أحب أشوفه وأدرس الموضوع الأول قبل ما أوافق

ضحك "فؤاد" قائلاً :

- محسسانى انى بتكلم مع سيدة أعمال من الدرجة الأولى

شعرت "آيات" بالجرح وقالت :

- أنا بس حبه انى أتأكد ان كل حاجة هتكون مطبوعة .. أقصد ان مش هيبقى فيه حاجات تغضب ربنا .. أنا كنت فى الجامعة وفى ثانوى بعشق الرحلات .. وزرت العين السخنة كتير أوى وأعرفها كويس جداً .. وروحت قرى كتير بصراحة كان فى حاجات كنت بضايق منها بس مكنتش بهتم .. لكن دلوقتى يهمنى انى لما أشتغل فى مكان ميكنش فيه حاجت غلط بتحصل .. عشان مثلش ذنبها

ابتسم "فؤاد" وهو يخرج احدى الملفات من درج مكتبه ويضع فوقها سي دي ويضعهم أمام "آيات" قائلاً :

- دي نسخة من البريزنتيشن اللى بقدمه للعملا .. وده سي دي فيه صور القرية والمناطق اللى حوليها أخذتهم "آيات" قائله :

- ان شاء الله هرد على حضرتك خلال يومين بالكثير التفت "فؤاد" الى "اسماء" قائلاً :

- وانتي يا "اسماء"

ابتسمت "اسماء" وقالت فى كياسة :

- طبعاً أنا يشرفنى جداً انى أتشغل عند حضرتك يا أستاذ "فؤاد"

- خلاص يبقى اتفقنا .. ادرسوا الموضوع كويس ومنتظر ردكوا عليا .. خلاص المكتب انتهينا من تشطيباته وبكرة بالكثير يكون اتفرش .. فمحتاج رد فى أقرب وقت

جلس مدحت والد "اسماء" أمام التلفاز وهو لا يعى ما يدور .. سمع المفتاح يدور فى الباب فهب واقفاً وعلامات الغضب على وجهه .. نظرت اليه زوجته الجديدة قائله :

- انت هنا يا بيبي

عقد ذراعيه أمام صدره قائلاً :

- أيوة هنا .. كنتى فين ؟

قالت فى تبرم :

- كنت مع صحابى

زمجر فى غضب :

- طبعاً بتصرفى فى الفلوس اللى سحبتيتها امبارح ارتبكت وقالت :

- انا كنت محتاجة مبلغ وخذته .. وبعدين انت ادتنى الكريدت عشان لو
احتجت حاجة أسحبها
صاح بغضب هادر :
- ممكن أفهم كنتى بتعملى ايه بـ 15 ألف جنية
زفرت بحنق وقالت وهى تلوح بيديها :
- اشتريت شوية حاجات
- أيوة ايه هى الحاجات اللى اشتريتها دى ؟
هتفت بغضب وهى تتوجه الى غرفة النوم :
- حاجات وخلص
انقض عليها جاذباً اياها من ذراعها وهو ينظر اليها بشراسة قائلاً :
- اوعى تكونى فكرانى نايم على ودانى .. انا عارف كويس انتى عملتى
ايه بالفلوس دى
بلعت ريقها بصعوبة وقالت وهى تخفى خوفها :
- ايه الكلام ده
قال بعنف :
- أنا عارف كويس انك لسه بتقابلى التيبيبيبيبيبى خطيبك .. وانك ادتيله
الفلوس دى
شعرت بالصدمة لكنها تماكنت أعصابها وقالت :
- ايه الكلام الأهل ده
لطمها على وجهها فتأوهت بألم .. قال بحزم :
- أنا اللى غلطان من الأول انى اتجوزت عيله زيك متعرفش يعنى ايه
مسئولية
صاحت وهى تمسح بكفها على وجنتها المتألمه :
- احمد ربنا انى رضيت بواحد زيك شايب وعايب
لطمها مرة أخرى صارخاً فيها :
- لمى هدومك وامشى اطلعى بره .. انتى طالق
ضحكت بسخرية قائله :
- قال يعنى طردتنى من الجنة .. بلا أرف
ألقى بجسده فوق أحد المقاعد وهو يدفن وجهه بين كفيه ويشعر بأن
عالمه ينهار من حوله

فى المساء وقف "آدم" أمام البحر الهادر يراقب موجاته الغاضبه التى
ترسل الزبد تحت قدميه .. اقترب منه "زياد" قائلاً وهو يلهث :
- ايه يا ابنى انت فين دوختنى عليك
التفت اليه "آدم" بصمت .. وقف "زياد" أمامه يتفرس فيه قائلاً :
- انت كويس
أوماً "آدم" برأسه .. فقال "زياد" :
- أنا رجعت النهاردة من شرم لقيت كل اللى فى القرية بيتكلموا عن اللى
حصل النهاردة
عاد "آدم" ينظر الى البحر مرة أخرى وهو لايزال محتفظاً بصمته .. سأله
"زياد" :
- انت بجد منعت الخمر من القرية .. وشلت من المنيو الأكلات الى
بتتعمل بيها ؟
أوماً "آدم" برأسه دون أن ينظر اليه .. فأكمل "زياد" مبتسماً :
- وعرفت كمان انك قلبت الملهى الليلى لقاعة بلياردو وبولينج .. وان
المهندس هيجى من بكرة يعاين المكان
التفت "زياد" ينظر الى البحر لبرهة .. ثم نظر الى "آدم" قائلاً :
- هو ده اللى كان لازم يحصل .. أنا كمان مكنتش مرتاح للحاجات دى ..
كنت حاسس ان بركة فلوسنا كانت ناقصه
تحدث "آدم" قائلاً بحزم :
- قول فلوسنا كانت حرام أصلاً
ركل "زياد" الرمل بطرف حذائه ثم قال :
- معاك حق
ثم تنهد فى ضيق قائلاً :
- رغم ان الواحد عارف كده بس للأسف ساعات بنضعف أدام المغريات
المادية
ثم وضع كفه على كتف "آدم" وقال مبتسماً :
- بس برافو عليك
ران الصمت بينهما الى أن قطعه "زياد" قائلاً :
- بس يا ترى ايه هيكون رد فعل "شكرى" لما يعرف .. تفتكر ممكن
يعترض ؟
قال "آدم" بحزم وهو يراقب موجة عالية تبتلع أخرى :
- يتفلق .. لو مش عاجبه يخبط دماغه فى الحيطه
التفت "آدم" ليغادر المكان .. جلس "زياد" على الرمل وهو يرقب

الأمواج بدوره .. ثم أراح ظهره فوق الرمال ينظر الى النجمات القليلة
التي تتلألأ في السماء وهو يقول لنفسه :
- ايه يا "زياد" مش ناوى تلاقى نصك التانى بأه
ثم رفع ذراعيه الى السماء قائلاً بمرح :
- ابعتها يارب

جلست "آيات" على الأرض في حجرة المعيشة تفتersh أمامها الصور
والأوراق التي كانت موجودة في الملف الذي أعطاها اياها "فؤاد" ..
أقبلت عليها "أسماء" حاملة كوبين من الشاي الساخن وضعت أحدهما
بجوار "آيات" ثم جلست على أحد المقاعد تنظر الى صديقتها المنهمكة
في مطالعة الأورق والصور ثم قالت :
- ها ايه الأخبار
حكى "آيات" رأسها ثم قالت وهي تنظر الى احدى الأوراق فى يدها :
- بصراحة مشروع جبار .. ولو اتعمله دراسة جدوى صح مكاسبه هتكون
رهيبه .. الموقع فعلاً خرافى .. رغم انى حافظه العين السخنة بس عمرى
ما شوفت فيها مكان بالروعة دى
قالت "أسماء" باهتمام :
- هتوافقى يعني ؟
نظرت اليها "آيات" قائله بشرود :
- لسه مقررتش .. فى حاجات قلقانى
- ايه اللي قالكك مش بتقولى مشروع كويس
ثم هتفت "أسماء" بتهكم :
- وبعدين يا "آيات" ملف ايه اللي بتدرسيه .. محسسانى انك هتدخلى
شريكة فى المشروع .. يا بنتى ده انتى يدوبك شغاله فى المكتب السياحى
.. ده ايه الهم ده يارب
قالت "آيات" بحزم :
- لازم أعرف كل حاجة عن المكان اللي هشتغل فيه .. افرضى اشتغلت فى
المكتب السياحى وفى الآخر اكتشفت ان فى حاجات حرام بتحصل فى
القرية دى .. أشيل ذنبهم يعني ؟
قالت "أسماء" بحده :
- حاجات حرام ايه يا بنتى متفرزينيش .. دى قرية محترمة هيحصل فيها

ايه يعني

قالت "آيات" بهدوء :

- يحصل فيها اللي كنا بنشوفه فى القرى اللي بنروحها يا "أسماء" ..
ستات عريانه ماشية يمين وشمال .. بيسين مينفعش تنزليه الا وانتى
لابسه بيكيني والرجاله راحه جايه عينهم تندب فيها رصاصة .. و البيرة
اللى كانت بتتشرب زى البيبسي بالظبط .. ده غير المناظر اللي كنا
بنشوفها عيني عينك كدة من غير أى كسوف ولا خجل .. ويا سلام بأه
على الأجانب اللي كنا بنتكعبل فيهم على الشط والواحد من دول قاله كل
هدومها ونايمة على الأرض تعمل حمام شمس .. مش ده اللي كان بيحصل
فى القرى اللي بنروحها يا "أسماء"
قالت "أسماء" بتبرم :

- يعني نعمل ايه .. نقول للرجاله اتلموا ومتبصوش على البنات وهى
ماشية على البحر أو وهى نازله البسين .. ولا نقول لكل بنت اياكى تعملى
علاقة مع واحد فى القرية عشان مناخدش ذنبك
ثم قالت بتهمك :

- لو كل الناس فكرت بطريقتك يبقى السياحة هتضرب وكل واحد صاحب
قرية يقفلها ويعد فى بيتهم أحسن .. ويبقى بلد زى مصر خسرت أهم
مصادرها للدخل القومى .. يا بنتى لو كل الناس فكرت زيك كده كان البلد
خربت

ابتسمت "آيات" بثقة وهى تقول بتحدى :

- طيب .. أنا بأه هعمل دراسة جدوى للمشروع ده بالطريقة اللي أنا
شيفاها .. هحط فيها كل الأفكار اللي فى دماغى .. وهنحسبها بالورقة
والقلم .. ونشوف اذا أفكارى دى اتنفذت السياحة فعلاً هتضرب ولا لا
ابتسمت "أسماء" بسخرية وهى تنهض قائلاً :

- والله انتى مخك تعبان

نظرت "آيات" الى الأوراق أمامها .. ثم حملتهم جميعهم وتوجهت الى
غرفة المكتب واللى تحتوى على الحاسوب الساكن فى ركن الغرفة .. ثم
شرعت تضرب بأناملها فوق لوحة المفاتيح فى تودة

لم يشعر بمضى الوقت وهو يتأمل صورتها .. امتدت أصابعه لتلمس
الشاشه .. ذلك الوجه البرئ الخالى من أى شئ مصطنع .. تلك النظرة
البريئة والبسمة الرقيقة .. امتدت يده الى درج مكتبه ليخرج منها تلك

الورقة التي تمزق قلبه كلما تطلع اليها .. شهادة وفاة .. نظر بعيون
ثكلى الى اسمها الذي كان يأمل أن يراه على عقد زواجهما .. لكن إرادة
الله سبقت أمانيه ... أخذ شهيقاً عميقاً ليزفر معه ما يعتمل في صدره من
ألم .. لكن هيهات .. لا سبيل للخلاص من هذا الألم .. تناول مصحفه من
فوق المكتب .. وأخذ يقرأ فيه .. علاصوته في التلاوة ليصل الى مسامع
أمه .. ابتسمت في حنو وهي ترنو الى غرفته ببصرها .. كم اشتاقت
لسماع ترتيله العذب .. وصوته الخاشع يطرب أذنيها المرهفتين .. انتهى
من التلاوة بعدما دامت لما يقرب من ساعة .. أطلت برأسها من الباب
الموارب وابتسمت في حنو قائله :

- أجيبيك تتعشى يا "آدم"

هز رأسه نفيماً .. ففتحت الباب أكثر ودخلت قائله :

- يا حبيبي انت على لحم بطنك من الصبح .. مفطرتش وحتى في الغدا
مكلتش الا لقمتين .. عشان خاطري يا حبيبي أحضر لقمة ناكل سوا ..

ماشى

أوما برأسه ايجاباً اذعاناً لإصرارها فابتسمت قائله :

- ان شاله يباركلى فيك

أحضرت صنية كبيرة موضوع عليها ما لذ وطاب .. وضعتها فوق الطاولة
ونادت عليه .. جلس بجوارها يلوك الطعام في فمه وكأنه لا يشعر بمذاقه
.. قالت مبتسمة :

- عجبك الأكل

قال بخفوت :

- أيوة يا ماما تسلم ايديك

ربتت على ظهره وهي تضع أمامه المزيد من الطعام .. نظر اليها قائلاً :
- على فكرة أنا منعت الخمره واللحوم الحرام من القرية .. والملهى هنقلبه
صالة ألعاب

اتسعت ابتسامته والدته فقال لها :

- حبيت أعرفك عشان تعرفى ان فلوسى معادتش حرام

قالت له فى حماس :

- ربنا يبارك فيك يا ابنى ويصرف عنك كل سوء .. اهو كدة انت ابنى

"آدم" اللى طمرت تربيتي فيه

ابتسم بوهن وأمسك كفها قائلاً :

- ربنا يخليكي ليا يا ماما وجودك جمبي فارق معايا

وضعت يدها الأخرى فوق كفه وقالت :

- وهتلاقيني لآخر يوم فى عمرى جمبك ووراك .. لو وقعت أقومك .. ولو
تعبت أداويك .. انت ابنى وحته منى نفسى أشوفك أحسن واحد فى الدنيا
دى

ثم استدركت قائله :

- مش بالمال ولا بالجاه .. لكن بالأدب والدين والأخلاق
قبل " آدم " يدها قائلاً يتأثر :

- عارفه لو كل الأمهات زيك .. كان شباب كثير حالهم انصلح .. لكن فى
أمهات بدل ما تدعى لابنها بالهداية بتدعى عليه .. ومتعرفش ان دعاء الأم
مستجاب .. فى أمهات بتدمر ولادها بلسانها .. بكلمة منها تخرج فى
ساعة اجابة ربنا يتقبل دعاءها على ابنها
ابتسمت أمه فى حنو وقالت :

- عمر ما قلبي طاوعنى أدعى عليك .. حتى لما كنت قاسى عليا كنت
بدعيلك بالهداية .. والحمد لله أهو ربنا استجاب وهداك وصلح حالك
وباركلى فيك يا " آدم "

شعرت " مديحة " والدة " أسماء " بالصدمة عندما فتحت الباب لتجد
زوجها أمامها .. نظرت اليه لبرهة وقد تجمدت فى مكانها .. ثم قالت :
- أفندم عايز ايه
لم يجيبها بل اندفع للداخل فتراجعت للوراء .. أغلق الباب خلفه فصاحت :
- امشى اطلع بره
نظر اليها بصرامة قائلاً :

- " أسماء " هربت من البيت ليه يا " مديحة " ؟
اشتعلت عيناها غضبت وهتفت :

- انت جاي تفكر بنتك دلوقتى .. صباح الخير يا " مدحت "
اشتعلت عيناها غضباً هو الآخر وقال :

- بنتك لفيت عليها فى كل حتة وسألت طوب الأرض عليها ومحدث
عارف هى فين .. ايه اللى خلاها تسبب البيت انطقى
قالت بصوت مضطرب وهى تحاول أو تطمئن نفسها :
- متقلقش هى أكيد عند " آيات " صحبتها
قال بوجوم :

- " آيات " ماتت

شهقت " مديحة " واضعة كفها فوق فمها وقالت :

حاول "هانى" التحدث لكن "مدحت" لم يدع له الفرصة .. صرخ بصوت مكتوم بعدما سدده له "مدحت" ركلة فى بطنه احتقت لها الدماء فى وجهه وهو يشعر بصعوبة شديدة فى التنفس .. أقبلت أمه من الخارج تصرخ وتولول :

- انت اتجننت انت بتعمل ايه فى ابني
جئت على ركبتيها بجوار "هانى" تتفحصه وهى تصيح بغضب فى "مدحت" :

- انت بتمد ايدك على ابني .. والله لأوديك فى ستين داهية
ثم نظرت الى أختها قائله :
- لمى هدومك وامشى اطلعى بره انتى وجوزك والله لأحبسكوا انتوا الاتنين

وضعت رأس "هانى" الدامى على صدرها وهى تبكى قائله :
- "هانى" .. عمل فيك ايه الحيوان ده
اقترب "مدحت" وبصق فى وجه "هانى" الجالس على الأرض وقال فى صرامة :

- اتفو عليك عيل تيبيبيبيبيب
انصرف "مدحت" بينما توجهت "مديحة" الباكية تجمع أغراضها فى عجالة وهى تبكى فى لوحة وحسرة وندم .. قام "هانى" بمساعدة أمه التى لم تتوقف عن النحيب والوعيد لأختها وزوجها .. أجلسته على الأريكة .. فى تلك اللحظة خرجت "مديحة" من الغرفة فهجمت عليها أختها تجذبها من ملابسها وتصرخ فيها :

- مش عارفين تربوا بنتكوا وجايين تتشظروا على ابني .. روحى شوفى بنتك التيبيبيبيبيب هربت مع مين وبعدين ابقى تعالى كلمينى
نظرت اليها "مديحة" بغضب بأعينها الدامعة وهى تقول :
- حسبي الله ونعم الوكيل فيكي انتى وابنك .. بس مش غلطكوا .. دى غلطتى انى مصدقتش بنتى ودافعت عن ابنك التيبيبيبيبيب

جذبت ذراعها من بين يديها وخرجت لا تدرى الى أين تذهب .. فلا هى تملك المال ولا تملك المكان .. مكانها الوحيد كان بيتها الذى طردت منه وها هى الآن تُطرد من بيت أبيها الذى تعلم جيداً أنه لا حول له ولا قوة أمام عنفوان ابنته .. نزلت الدرج وهى تفكر فى ابنتها الضائعة التى انتهجت خطواتها من قبل .. ونزلت بحقيبة ملابسها لا تدرى الى أين تذهب .. عزمت على التوجه الى الصاغة لبيع احدى مصوغاتها الذهبية الى أن تبحث عن عمل وهى التى كانت تعيش منعمة مرفهة فى بيت

- أيوة أسمع عنه .. ابنه كان عندي في الكلية
قال "آدم" ذلك موجهاً حديثه الى "زياد" بعدما عرف منه بان "فؤاد"
هو الذي استأجر القرية الثالثة .. تذكر "آدم" يوم أن هتف "أحمد" وسط
الجامعة معلناً حبه لـ "آيات" .. تذكر يومها كيف هرعت الى مكتبه
لتخبره بأنها لا تبادله مشاعره .. علم وقتها بأنها تحمل له هو مشاعر
خاصة دفعتها الى التصرف بتهور والإقدام الى مكتبه لشرح الأمر .. تنهد
وهو يتذكر مدى طبيبتها ووضوحها وبرائتها .. اخرجته "زياد" من شروده
قائلاً :

- بس لسه مش عارفين مين المدير اللي هيجيبه للقرية .. بس بيقولوا انه
محتاج شريك معاه عشان يقدر يفتح القرية وفي اتنين رجال أعمال
عرضين شراكتهم بس لسه متفكش مع حد فيهم
أوما "آدم" برأسه وهو يقول :

- "فؤاد" رجل أعمال محترم بس ملوش في شغل السياحة .. يعني
ميعتبرش منافس قوى بالنسبة لنا .. تلاقيه حب يجرب حظه .. بس أنا
واثق انه مش هيستمر .. ده اذا لقي حد يشاركه أصلاً
قال "زياد" وهو يمط شفتيه :

- أنا كمان شايف كده .. مفيش داعي للقلق
سمعا صوت طرقات على باب الشاليه فهب "آدم" واقفاً ليرى القادم ..
شعر بالإمتعاض وهو يرى "ساندى" أمامه .. ابتسمت قائله :
- هاى ازيك يا "آدم"

قال "آدم" وعلامات الجدية على وجهه :
- كويس الحمد لله

هتفت بمرح :

- حسيت انى هموت من الملل قولت آجى أعد معاك انت وطنظ .. بصراحة
حببتها أوى وأنا وهى بقينا صاحب خلاص
التفت "آدم" بتبرم ونادى والدته .. أسرع بالقدوم لتري "ساندى"
أمامها .. أقبلت عليها "ساندى" تقبلها وهى تقول :

- ازيك طنظ عامله ايه دلوقتي
ابتسمت والدته "آدم" قائله :

- بخير يا بنتى تسلمى

تركهما "آدم" وتوجه الى غرفة المعيشة حيث "زياد" وأشار له قائلاً :

- قوم نخرج
قال "زياد" وهو يتلفت حوله :
- مين اللي جه ؟
قال "آدم" بتأفف :
- "ساندى"
نظرت "ساندى" الى "آدم" الذى مر بجوارها متوجهاً الى باب الشاليه
وهتفت :
- انت خارج
التفت اليها قائلاً بتهكم :
- ده بعد اذنك
شعرت بالغیظ .. قال لها "زياد" وهو يلحق بصديقه :
- ازيك يا "ساندى"
قالت وهى شاردة وعلامات الضيق على وجهها :
- كويسه
أغلق "زياد" الباب خلفه .. رسمت "ساندى" على شفيتها ابتسامه
مصطنعة عندما قالت لها والدة "آدم" :
- اتفضلى يا ابنتى اعدى
جلست فى تبرم .. فأخر ما كانت تريده عندما قدمت الى الشاليه هو
مجالسه والدة "آدم"

وقف "عاصى" فى شرفة الشاليه الخاص به يمسك بيده كأساً من الخمر
وفى اليد الأخرى الهاتف .. أرجع رأسه للوراء وانفجر ضاحكاً وهو يقول :
- أيوة اظاهر كده .. قولتلك من الأول انه عيل غبي .. رايح يمنع الخمره
من القرية لأ وقلب الملهى الليلى لصالة ألعاب
انفجر فى الضحك مرة أخرى وهو يقول :
- احترس السيارة ترجع الى الخلف
قال "سراج" على الطرف الآخر :
- أنا مش عارف هو بيخطط لايه بالظبط
قال "عاصى" بحقد :
- هيكون بيخطط لايه يعنى ده عيل تيبيبيبيبيت ميتخفش منه
رشف رشفه من كأسه ثم قال :

- لا والتانى اللى اسمه "فؤاد" اللى رايح يأجر قرية جمب حيتان زينا ..
أهو ده بأه غباؤه ملوش وصف .. واحد لسه بيقول يا هادى فى شغل
السياحة مش يختار مكان مفيهوش منافسين كبار زينا .. لا جاى راشق
فى النص .. يشرب بأه
ثم قال :
- ده حتى مش عارف يشيل الليلة لوحدة وبيدور على شريك
- هو لقي شرك ولا لسه ؟
قال "عاصى" بثقه :
- لا لسه .. متقلقش أنا بعرف الأخبار أول بأول .. واول ما هعرف حاجة
هبلغك .. بس اطمئن "فؤاد" هو آخر شخص نخاف منه
قال "سراج" وهو يوافق الرأى :
- معاك حق

جلست "آيات" فى مكتب سكرتيرة "فؤاد" وهى تتذكر بضيق قدوم
"أحمد" ذلك اليوم ودسه لרزمة مالية فى يدها وأخبرها أنها ستخضم من
مرتبتها الأول .. حاولت بحرج وضيق رفض هذا المال لكنه أصر بشدة
وتركها وانصرف .. التفتت اليها "أسماء" الجاله بجوارها وهى تقول :
- افرضى معجبوش الدراسة اللى عملتيها .. هنتصرف ازاي ؟
قالت "آيات" بحزم :
- مش هقبل الشغل طبعاً
بثت كلماتها الغيظ فى نفس "أسماء" التى قالت بتهكم :
- أول مرة أشوف واحدة رايحة تشتغل فى شركة وتفرض عليهم طريققتها
فى الشغل .. وكمان مقررره انهم لو معجبهمش دراسة الجدوى بتاعتها
ترفض الشغل معاهم
قالت "آيات" وقد تعبت من مناقشة "أسماء" فى هذا الأمر :
- قولتلك مليون مرة مش هعمل حاجة حرام .. ولو الموضوع متظبطش
زى ما أنا عايزه مش هشتغل معاهم
سالتها "أسماء" بحدده :
- ولما ترفضى الشغل هنعمل ايه ساعتها .. وهنرد لـ "أحمد" السلفة اللى
ادهاننا من المرتب ازاي ؟
شعرت بالضيق وهى تفكر فى ورطتهما .. قطع عودة السكرتيرة حبل
أفكارها لتشير لهما الى مكتب "فؤاد" قائله :

- اتفضلوا بس خلوا بالكوا ان الأستاذ "فؤاد" عنده اجتماع بعد 10 دقائق بالظبط

لم تكن "آيات" فى حاجة الا لهذه الدقائق لعرض الدراسة التى عكفت على كتابتها لمشروع القرية السياحية .. قام "فؤاد" وسلم على "أسماء" ثم التفت لـ "آيات" دون ان يمد يده قائلاً :
- ازيك يا "أسماء" .. ازيك يا "آيات"

- الحمد لله

- الحمد لله

أشار لهما بالجلوس وعقد كفيه فوق المكتب وقال :
- خير كنتوا عايزنى فى حاجة
تنحنت "آيات" قائله :

- أيوة .. انا عملت دراسة جدوى لمشروع القرية السياحية كانت نظرات "فؤاد" تتم عن دهشته مدت يدها بالملف فأخذه منها وارتنى عويناته الموضوعه فوق المكتب وأخذ يتفحصه .. مرت الدقائق تشعرها بالتوتر أكثر .. قبل أن ينتهى "فؤاد" من مطالعة الملف كاملاً دخلت سكرتيرته معلنة عن بدء الاجتماع .. تسرب شعور بالضيق فى نفس "آيات" التى كانت تتمنى أن تتاح لها الفرصة لمعرفة رأيه فى الحال .. قامت بخرج وقالت :

- معلى أنا أصلاً اللى غلطانه انى جيت من غير معاد .. ان شاء الله هحدد معاد مع السكرتيرة ونبقى نيجي مرة ثانية
نزع "فؤاد" عويناته ونظر اليها قائلاً :

- تقدرى تشرحى الدراسة اللى علمتيها أدام ضيوفى اللى عامل معاهم الاجتماع ؟

تبادلت "آيات" نظرة دهشة مع "أسماء" ثم التفتت الى "فؤاد" قائله
بارتباك :

- مش عارفه

نهض "فؤاد" قائلاً :

- تعالوا معايا

تبعته الفتاتان فى استسلام .. كاد قلب "آيات" أن يتوقف من شدة التوتر والإرتباك .. دخل "فؤاد" قاعة اجتماعات صغيرة تضم طاولة كبيرة جلس عليها ثلاثة رجال بالإضافة الى "أحمد" الذى رفع حاجبيه فى دهشة لمرأى الفتاتين برفقة والده .. قدم "فؤاد" كل منهم للآخرين .. علمت بأن أحد هؤلاء الرجال هو محامى "فؤاد" أما الرجال الآخران هما رجلى

الأعمال المرشح أن يشارك أحدهما "فؤاد" فى مشروع القرية السياحية .. جلس "فؤاد" وظلت الفتاتان واقفتان .. قال "فؤاد" وهو يلوح بملف "آيات" فى يده :

- الآنسة "آيات" عملت دراسة جدوى لمشروع القرية وحابب انها تعرضه عليكما بنفسها

طلب "فؤاد" من السكرتيرة ادارة البروجيكتور .. وقفت "آيات" بجوار الشاشة البيضاء تشعر بتوتر بالغ وقد أصبحت تحت محط أنظار الجميع .. كانت تثق بفكرتها وبمشروعها لكنها لم تسبق أن قدمت بريزنتيشن من قبل .. وأمام رجال أعمال ذو أهمية !

استعانت بالله وقامت بعرض الصورة الأولى التى كانت تمثل صورة لدائرة صفراء فى منتصفها دائرة صغيرة خضراء وتحدثت قائله :

- زى ما حضراتكوا عارفين المنطقة اللى فى الصورة ملك لمجموعة شركات مصرية وأجنبية ومتقسمة ل 3 قرى جمب بعض على شكل دايره .. ال 3 قرى بيشتروكوا فى المنطقة الخضراء اللى فى النص ودى متقسمة لملاعب جولف و اسطبل خيول لممارسة رياضة ركوب الخيل ولل 3 قرى حق الانتفاع المشترك بيها بحسب تقسم معين بيكون منصوص فى العقد تقدمت من البروجيكتور لعرض الصورة التالية والتى كانت تمثل مثلث أصفر ثم التفتت اليهم تتحاشى النظر الى وجوههم حتى لا تتوتر أكثر وقالت :

- القرية الأولى هى قرية الفيروز .. رجل الأعمال اللى أجرها "سراج اليمانى" ومدير القرية هو ابنه "عاصى" .. مميزات القرية دى هى انها أكبر ال 3 قرى فى المساحة وتقسيم الغرف والشاليهات ممتاز .. القرية الثانية هى قرية جولدن بيتش رجل الأعمال اللى أجرها هو "شكرى

" .. ومديرها ...

صممت برهة وهى تشعر بالتوتر لذكر اسمه .. ثم قالت :

- مديرها دكتور "آدم خطاب" .. هى أصغر فى الحجم من قرية الفيروز لكن ميزتها الطابع المعمارى الأثرى اللى فيها .. القرية الثالثة وهى قرينتا وهى أصغرهم مساحة لكن ميزتها وجود 2 بيسين بعكس القريتين الثانية اللى فيهم بيسين واحد

قال أحد الرجلين وهو يمط شفثيه :

- وايه الميزة فى كده ؟

قالت "آيات" بهدوء :

- هشرح دلوقتى .. قرية الفيروز وقرية جولدن بيتش بدأوا منافسة قوية بينهم .. القريتين بيسمحووا بوجود الخمور وكافة أنواع اللحوم .. وقرية جولدن بيتش فيها ملهى ليلي .. وفى المقابل قرية الفيروز فيها مساج للرجال والنساء والقائم عليه بيكون رجال فقط
قالت الجملة الأخيرة بشئ من التقرز .. ثم أردفت :

- زى ما حضراتكوا شايفين هما قريتين سياحيتين كبار بس زيهم زى أى قرية تانية مفيش حاجة بتميزهم غير فروقات بسيطة مبتأثرش كثير .. لو احنا فتحنا القرية الثالثة وخذت نفس الطابع بتاع القريتين دول بباه مستفدناش أى حاجة ومقدمناش أى حاجة جديدة .. وهتبقى منافسة روتينية مش أكثر
سألتهم فجأة :

- عارفين البطاطس الشيبسى ؟

ابتسم الجميع .. قال "أحمد" بمرح :

- أكيد عارفيناها

قالت "آيات" بحماس :

- نتخيل ان اللى بياكل شيبسى فى مصر هما 3 مليون فرد .. اتعودوا على منتج بشكل ومواصفات ونكهات معينة .. وبعد فترة جت شركة جديدة نزلت منتج تانى بس المنتج ده بنفس مواصفات ونكهات وطعم المنتج الأول مجرد بس انهم سموه اسم جديد .. اللى هيحصل ان ال 3 مليون هيتقسموا نصين نص هيشترى المنتج الأول ونص هيشترى المنتج التانى .. لأن المنتجين زى بعض فمش فارقه كثير .. لو أنا جيت ونزلت منتج بنفس شكل ومواصفات المنتجين التانيين كل اللى هيحصل هو ان ال 3 مليون هيتقسموا على 3 .. لكن لو أنا جيت وقدمت منتج بإسم جديد .. وشكل جديد ونكهة جديدة وجودة أعلى وكمان عملت عليه تخفيض .. تفتكروا هيفضل عدد اللى بيشترى الشيبسى هما هماهم ال 3 مليون ؟
أجابت على نفسها قائلة :

- أكيد لأ .. لان فى ناس بتحب نكهات تانية ملقتهاش فى المنتجين الأول والتانى .. واللى أنا عملته هو انى وفرت للناس دى النكهة الجديدة اللى تجذبهم .. ده بالإضافة ان ال 3 مليون اللى اتعودوا على المنتج القديم أكيد الفضول هيدفعهم انهم يغيروا ويجربوا الجديد .. ولما أنا أهتم بالجودة وأخليها أعلى .. يبقى كسبتهم هما كمان فى صفى وأبقى فعلاً ملكت السوق بدون منازع

صممت قليلاً تتأمل الوجوه التى تعلقت أنظارهم بها تبغى المزيد من

التوضيح .. عرضت احدى الصور لأحد الشواطئ الخلابة ثم التفتت اليهم
قائله :

- دى صورة من قرية فى تركيا .. اللى أنا بقترحه فى دراسة الجدوى
بتاعتى اننا نعمل زى ما القرية دى عملت بالضبط
سألها أحد الرجلين بإهتمام :
- وايه اللى عملته القرية دى ؟
قالت "آيات" بثقة :

- أضافت مفهوم جديد للسياحة اسمه السياحة الحلال
رفع أحد الرجلين حاجبيه بسخرية قائلاً :
- سياحة حلال !

أما الآخر فقال بإهتمام :

- ياريت تشرحى أكثر

أكملت "آيات" قائله :

- من كام سنة دخلت تركيا مفهوم السياحة الحلال للقرى والشواطئ
بتاعتها .. كان الكل متوقع فى البداية فشل ذريع للنوع ده من السياحة ..
لكن تركيا أثبتت ان الفكرة ناجحة وناجحة جداً .. عارفين قيمة المبيعات
وصلت لكاف فى خمس سنين ؟
قال أحد الرجلين بروتينييه :

- 100%

ابتسمت "آيات" قائله :

- لا .. 200%

ساد الوجوه مزيج من الدهشة والإعجاب .. قال أحد الرجلين :

- طيب وايه مفهوم السياحة الحلال ده ؟ .. وايه الفرق بينه وبين السياحة

اللى بنشوفها فى كل القرى اللى بنروحها

قالت "آيات" وهى تعرض صورة للقرية الثالثة مصورة بالأقمار

الصناعية :

- أولاً قريننا هيمنع فيها منعاً باتاً أى حاجة حرام .. من أول الخمور لحد

البكىنى

ضحك أحد الرجلين بصوت عالى وهو يرجع رأسه الى الخلف ويقول :

- حلوة دى .. هنمنع البكىنى .. ازاي بأه ممكن أفهم .. أمال الناس هتلبس

اياه

كظمت "آيات" غيظها وأكملت قائله :

- ثانياً بالنسبة لحمام السباحة .. زى ما قولت ان قريننا فى حمامين

سباحة ودى ميزة كويسة جداً .. لان اللي هيحصل هو اننا هنخصص
بيسين للرجال وبيسين للسيدات .. بيسين الرجاله هنسمح فيه بدخول
الرجال والصبيان و البنات تحت سن 7 سنين .. وبيسين السيدات هنسمح
فيه بدخول السيدات و البنات الصغيرة والصبيان من تحت سن 7 سنين ..
ومش بس كدة .. هيبقى فى حد أدنى للبس .. يعني فى حمام السيدات
ممنوع لبس البكيني وهيلتزموا بالمواصفات الشرعية للبس اللي
المفروض تلبسه السيدات أدام بعضهم وكذلك فى حمام الرجاله .. طبعاً
القائمين على حمام الرجاله هيكونوا كلهم رجالة من أول عامل النظافه
لحد المدير المسؤل .. ونفس الشئ فى حمام السيدات
اندفع أحد الرجلين يقول بحده :

- ها وبعدين .. هتعملى ايه بأه على البيلاج .. أظن هتقوليلنا نقفل البيلاج
أحسن

قالت "آيات" بهدوء :

- لأ طبعاً ازاي نقفل البيلاج .. سياحة الشواطئ هتفضل زى ما هى .. دى
متعة فى حد ذاتها .. مفيش حد بيسافر مصيف أو قرية الا وبيعشق انه
يقعد على الشط وينزل البحر
صمنت قليلاً ثم قالت بحزم :

- بس برده هيبقى فى شروط للحد الأدنى من اللبس .. وأظن نوعية الناس
اللى هتيجي القرية عشان يفصلوا بين الرجاله والسيدات فى حمامات
السباحة مستحيل يقبلوا بعري على الشط .. يعني واحد بيغير على مراته
وجه قرينتنا عشان تبقى بحريتها فى حمام السباحة بعيد عن عيون الرجاله
مش معقول أبداً أول ما يقعد معاها على البيلاج يلبسها بيكيني أو لبس
مكشوف !

قال الرجل وهو مازال محتداً :

- انتى بتتكلمى عن مين بالظبط .. مين اللي هيحب سياحة زى دى .. وانه
يعد فى قرية بالمنظر ده ؟

قالت "آيات" دون أن تسمح له بإخراجها عن طورها بأسلوبه :

- اللي هيحب النوع ده من السياحة هو كل راجل مصرى عنده نخوه
وكرامه وبيغير على بنته ومراته وأمه وأخته .. وكل ست فى مصر بتغير
على جوزها وابنها من انه يشوف مناظر مش كويسة .. المصريين
بالفطرة عندهم نزعة دينية .. حتى لو الواحد بيعمل غلط برده بيفضل يغير
على مراته وميقبلش عليها الهوا .. فى ناس كتير أوى فى مصر عندها
امكانيات انها تروح قرى سياحية بس مبيرضوش عشان المناظر اللي هما

متأكدين انهم هيشوفوها هناك .. الناس اللي أعده فى بيوتها دى ونفسها
تصيف فى مكان محترم متشلش فيه ذنوب وفى نفس الوقت تستمتع
بوقتها والمناظر الطبيعية أنا هو فرلهم كل ده .. قرية محترمة مفيش فيها
حاجة حرام .. وأنا واثقة إن كتير أوى من رواد القرى التانية نفسهم فى
كده بس للأسف مش لاقيين قدامهم إلا القرى اللي بيروحوها
قال أحد الرجلين :

- انتى بتتكلمى عن المصريين يعنى سياحة داخلية .. فىن بأه السياحة
الخارجية من الدراسة دى ؟
قالت "آيات" بحماس :

- طبعاً عامله حسابهم .. أولاً أكثر ناس هتحب النوع ده من السياحة هما
دول الخليج .. اللي أصلاً بيمشوا البنات بشكل معين ولبس معين .. واللى
عندهم مولات كاملة من أولها لآخرها ستات فى ستات .. يعنى لما أنا آجى
أقولهم على قرية سياحية فيها فصل بين الرجالة والستات هتبقى ده شئ
رائع بالنسبة لهم
قال الرجل الساخر :

- طيب والأجانب ملهمش نصيب ولا ايه ولا احنا هنشغل على المصريين
والعرب
التفتت اليه "آيات" وقالت :

- لأ طبعاً ازاي .. أنا بعمل مشروع سياحى يعنى عايزة أجدب له
المصريين وغير المصريين .. العرب وغير العرب
أخذت نفسها عميقاً ثم قالت :

- بالنسبة لحمامات السباحة هيلتزموا بالقوانين الرجالة فى مكان والستات
فى مكان .. وممنوع الخمور فى القرية حتى لو للسباح الأجانب .. بالنسبة
للسواطين هيلتزموا بنفس القوانين اللي فرضتها على الكل وهى حد أدنى
من الإحتشام
صاح الرجل غاضباً :

- انتى واثقة انك طبيعية .. مش ناقص غير تقوليلى هتسلبى الاجانب
الحجاب

قال "فؤاد" بشئ من الضيق :

- براحة شوية هى بتشرح وجهة نظرها مش بتفرضها على حد
قال الرجل بغيظ :

- آسف .. اتفضللى كملى

ساد الصمت لبرهة ثم قالت وهى تجول بنظرها فى وجوههم :

- انتوا عارفين ملكة انجلترا عملت ايه لما زارت الإمارات ؟
نظر اليها الجميع فى حيرة فأجابت عن سؤالها قائلة :

- لبست حجاب
ثم أردفت :

- احترمت البلد اللي هى راياها ولبست حجاب .. ودى مين ؟ .. ملكة
بريطانيا .. لبسته ليه ؟ .. لأن ده من أبسط قواعد الإتيكيت .. وهى انك
تتحترم المكان اللي انت فيه .. بقوانينه بأعرافه .. محدش من بلدها ولا من
أى بلد أجنبية تانية طلع واستنكر اللي هى عملته لأنه بمنتهى البساطة ..
اللى هى عملته ده يدل على انها انسانه راقية فعلاً
نظرت اليهم قليلاً ثم قالت :

- لما بيجى السياح يزوروا المساجد الأثرية زي السلطان حسن والأزهر
ومسجد محمد علي و لما بيجوا يدخلوا المسجد بيعملوا ايه ؟ ..
بيخلعوا الشوز أو بيلبسوا فوقها أكياس مش كدة ؟
نظر اليها الجميع فى صمت فأكملت :

- لان من قوانيننا كمسلمين ان مينفعش حد يدخل المسجد بالشوز بتاعه ..
وهما عارفين القانون ده وبيحترموه .. أنا مبجبرش أى سايح انه يدخل
المسجد او انه يعمل حاجة مخالفه لمعتقداته لانه طبعاً بيدخل الكنيسة
بتاعته بالشوز .. بس كل اللي أنا بقوله هو اذا كنت عايز تدخل المكان ده
يبقى تلتزم بالقانون ده .. ولانهم ناس بتحترم القوانين وعقلها متفتح جداً
بيلتزموا بالقانون ده وبيدخلوا المسجد بالطريقة اللي احنا حطينها مش
كده ؟

أخذت نفساً عميقاً ثم قالت وهى تنظر الى أحد الرجلين بتحدى :
- لما حضرتك بتروح تزور حد فى بيته بتحترم البيت اللي حضرتك فيه
بقوانينه وقواعده .. يعنى مثلاً لو زورت واحد صحبك مبيسمحش ان
مراته تعد مع صحابه .. حتى لو كنت انت غير كده ومينفعش أبدا تقوله
ادخل نادى مراتك من جوه أنا متعود أهد مع مرات صحابى .. مش كده
برده ؟
أكملت قائلة :

- لانك ببساطة لو عملت كدة يبقى أخليت بقواعد الاتيكيت واللياقة لان
اللى بيروح مكان بيحترم صحاب المكان وبيحترم قوانينه .. ولما يرجع
بيته يبقى يعمل كل اللي هو عايزه .. حريتك تنتهى عندما تبدأ حرية
الآخرين .. وده اللي أنا هعمله فى القرية .. اللي عايز يشرفنى فى القرية
يلتزم بقوانين بسيطه مش هتضره فى شئ وفى نفس الوقت هتحمى أهلى

وناسى وولاد بلدى وتحافظ عليهم .. وأنا واثقة ان النقطة دى مش هتشكل
أى مشكلة مع السياح الأجانب لانهم ببساطة عارفين وفاهمين كويس أوى
ان ده قانون والقوانين ليها احترامها .. السياح اللى جاى من ألمانيا ولا
استراليا وقطع نص الكره الأرضية عشان يتمتع بشمس مصر وبشواطئ
مصر مش هيبقى صعب عليه يستغنى فى الكام يوم اللى هو قاعدهم عن
الخمرة اللى بيشربها فى بلده وغرقان فيها وزهقان منها ليل نهار .. ولا
هيفضه فى شئ انه يلتزم بحد ادنى من الاحتشام .. مبقولش الستات
الاجانب تتحجب بس بقول على الأقل متبينش جسمها على البيلاج .. لكن
فى الشاليه بتاعها او فى غرفتها هما حرين .. وكمان ممكن أعمل زى
شاطئ خاص بالإيجار للسياح الأجانب .. يأجروا الشاطئ ده ويعملوا فيه
كل اللى هما عايزينه .. لانى ساعتها هكون زى صاحب البيت اللى بيأجر
شقه لمجموعة سياح

ثم قالت :

- وفى نفس الوقت أنا هتميز فى القرية من كل شئ .. الروم سيرفيس ..
جودة الأكل فى مطعم القرية هجيب طباخين على أعلى مستوى .. النظافة
ههتم بيها جداً .. وأظن كلكوا عارفين المشكلة اللى واجهتها قرية الفيروز
مع موضوع النظافة وده اللى انتبهتله قرية جولدن بيتش واهتموا
بمستوى النظافة فى القرية جداً عشا يتميزوا عن قرية الفيروز .. وكمان
أنا ممكن أوفر ميزات مش موجودة فى القرى اللى حوليا .. زى مكان
صغير يتعمل عيادة أطفال وتبقى خدمة بتقدمها القرية لنزلانها مع طبعاً
دفع أجر للكشف لكن مخفض لنزلاء القرية عن اللى خارج القرية .. أنا لو
أم وأدامى 3 قرى سياحية واحدة منهم فيها عيادة للأطفال أكيد هختار
القرية اللى فيها العيادة عشان لو ابنى تعب ألقى اللى يسعفه .. كمان
ممكن أعمل سحب وقرعة ورحلات ترفيهية مجانية كدعاية للقرية .. كمان
ههتم جدا جدا بالدعاية سواء فى التى فى أو الأوت دور وكفاية انى هكون
أول قرية بتحط القوانين دى فى مصر .. كمان أقدر أوفر زى ملعب صغير
للأطفال مجهز بكل الألعاب اللى تجذب انتابهم .. ده غير صالة بلاى
ستيشن وبلياردو وبولينج .. ممكن كمان أخصص جزء من المساحة
الخضرا ويبقى فى زى ملاهى مصغره .. ده بالإضافة الى مسجد صغير
عشان الناس الحريصة على صلاة الجماعة فى المسجد
أخذت نفس عميق ثم قالت :

- فى مليون ألف طريقة أقدر أجذب بيها النزلاء لقريتي من غير ما أضطر
انى أدخل فيها خمرة وأسمح فيها بالعري .. مش لازم أعضب ربنا عشان

أنجح فى شغلى وأتفوق فيه .. الذكى فعلاً هو اللى يقدر يجمع بين النجاح ورضى ربنا

ساد الصمت لفترة طويلة .. كانت أعين الجميع سابحة فى مكان آخر كل منهم غارق فى شروده .. لكن عيني "أحمد" سلطت على "آيات" بنظرات اعجاب مفضوحه .. أول من قطع الصمت هو "فؤاد" الذى قال :
- بصراحة أنا مندهش من الأفكار اللى طرحتها .. كبيزنس مان أقدر أقول ان كلامك عقلانى جداً ومنطقى جداً .. وفعلاً لو اتنفذ هيبقى قبلة الموسم قال أحد الرجلين :

- بس محتاجين ن فكر كويس لانها خطوة مش سهلة قال الآخر :

- أنا كمان محتاج وقت للتفكير

قال "فؤاد" بحماس :

- تمام يبقى نجتمع هنا بعد اسبوع يكون كل واحد فكر كويس فى الكلام اللى اتقال

ابتسمت "آيات" والحماس والأمل يداعب أحلامها .. كانت عازمة على النجاح فى هذا الأمر .. تمنى من الله أن تكون إجابة الرجلين أو أحدهما .. هى الموافقة

أخذت "آيات" تتمشى بغير هدى سابحة فى أفكارها وأحلامها وطموحاتها .. أخذتها قدمها الى الفيلا .. التى شهدت كل ذكريات طفولتها وصبابها .. نظرت الى الفيلا من البوابة الحديدية بنظرة اشتياق ممزوج بالحزن .. تنهدت وهى تتحسر على تلك الأيام التى ولت ولن تعود .. ترقرت دموع الشوق فى عينيها .. الشوق لبيتها القديم .. لوالدها .. لـ "حليمة" .. لحياتها السابقة .. ثم ما لبثت أن نفضت تلك الذكريات عنها والتفت لتعود أدراجها .. لكنها فجأة وجدت من يمسك بذراعها من الخلف .. التفت بحده .. فاصطدمت عيناها برجل سمح الوجه ذو لحية سوادء أنيق الملبس ارتسمت على ثغره ابتسامه عذبه وفى عينيها نظره سعادة ومرح .. نظرت اليه لبرهه ثم ما لبثت أن رسمت ابتسامه واسعه على شفيتها ونظرت اليه بشوق ولهفة وعدم تصديق وهتفت بسعادة بالغة :

- كريم !

الفصل الثاني والعشرون من رواية جواد بلا فارس



أخذت "آيات" تتمشى بغير هدى سابحة في أفكارها وأحلامها وطموحاتها .. أخذتها قدماها الى الفيلا .. التي شهدت كل ذكريات طفولتها و صباها .. نظرت الى الفيلا من البوابة الحديدية بنظرة اشتياق ممزوج بالحزن .. تنهدت وهي تتحسر على تلك الأيام التي ولت ولن تعود .. ترقرت دموع الشوق في عينيها .. الشوق لبيتها القديم .. لوالدها .. لـ "حليمة" .. لحياتها السابقة ..

ثم ما لبثت أن نفضت تلك الذكريات عنها والتفت لتعود أدراجها .. لكنها فجأة وجدت من يمسك بذراعها من الخلف .. التفتت بحده .. فإصطدمت عيناها برجل سمح الوجه ذو لحية سواده أنيق الملبس ارتسمت على ثغره ابتسامه عذبه وفي عينيها نظره سعادة ومرح .. نظرت اليه لبرهه ثم ما لبثت أن رسمت ابتسامه واسعه على شفثيها ونظرت اليه بشوق ولهفة وعدم تصديق وهتفت بسعادة بالغة :

- كريم !

اتسعت ابتسامته وهو يقول اليها :

- "آيات" .. مش مصدق .. كبرتى يا بنت انتى

أطلت الفرحة من عينيها وهي تقول بسعادة :

- أنا اللي مش مصدقه .. "كريم" انت جيت امتى .. وطنط و عمو جم

معاك ولا لأ ؟

قال لها مبتسماً :

- لا محدش جه غيري .. هما لسه فى النمسا
ثم اخذ نفساً عميقاً وقال :

- أنا اللي اشتقت لمصر أوى .. فخذت بعضى وجيت
قالت "آيات" بفرحة كالأطفال :

- أنا فرحانه أوى انك جيت .. بجد فرحانة أوى
ثم قالت بعتاب :

- رغم انك مبتسألش عليا
قال معتذراً :

- معلش أنا عارف ان أنا قصرت معاكى .. بس بجد من يوم ما سافرت
وأنا مطحون شغل .. لحد ما قولت ستوب كفاية أوى كده الواحد بأه ينزل
بلده يعمله فيها مشروع صغير على أده ويتجوز ويستقر بأه
ابتسمت قائله بمرح :

- ايه ده انت لسه عانس ؟ .. مش عيب عليك ده انتى دلوقتى عندك يجي
33 سنة

أطلق "كريم" ضحكة عالية ثم قال :

- هو فى راجل بيعنس يا تحفه انتى
قالت "آيات" مازحه :

- أنا قولت بأه هترجع وفى ايدك واحده نمساوية مستوردة
ضحك قائلاً بمرح :

- لا مليش أنا فى المستورد .. البلدى يوكل برده
ابتسمت وقالت وهى تنظر اليه بسعادة :

- بجد لسه مش قادرة أصدق انى شوفتك
نظر اليها بسعادة وهو يقول :

- أنا اللي مبسوط أوى انى شوفتك .. ونفسى أشوف عمو "عبد العزيز"
أوى .. هو فى الفيلا ولا فى الشركة ؟

أقلت "آيات" نظرة حزينة على الفيلا .. ثم ترقرت عيناها بالعبارت وهى
تقول :

- بابا اتوفى يا "كريم"

اختلفت ابتسامه "كريم" لتحمل محلها تقطبية جبينه وهو يهتف :

- لا حول ولا قوة الا بالله .. لا حول ولا قوة الا بالله

نظر اليها يتأمل عبراتها المتساقطة وشهقات بكائها قائلاً بأسى :

- طيب ادخلى دلوقتى ونتكلم بعدين عشان مينفعش تعيطى كده فى الشارع
مسحت عبراتها لتقول بمرارة :

- الفيلا اتابعت .. أنا مبعثش عايشة هنا
نظر اليها بدهشة .. ثم قال :

- ازاي يعني ؟

صمتت وهى تطرق برأسها أرضاً لتتساقط عبراتها من جديد .. جذبها من
ذراعها وفتح باب احدى السيارات الواقفة أمام الفيلا المواجهة لفيلا
"آيات" القديمة وقال :

- اركبي يا "آيات"

ركب خلف المقود وانطلق بها الى أحد المطاعم .. نظرت الى النيل
بجوارها وهى شارده .. تأملها قائلاً :

- فاكرة لما كنت بفسحك وأجيبك هنا

التفتت تنظر اليه وهى تقول بابتسامه حزينه :

- أيوة فاكرة

انحنى "كريم" على الطاولة واضعاً ذراعيه فوقها وهو ينظر اليها قائلاً :

- احكيلى يا "آيات" .. شكلك متغير كتير .. حسك بقيتي أكبر من سنك ..

اتكلمى امتى عمو اتوفى وليه بعنى الفيلا وعايشه فين دلوقتى

قالت بأسى :

- أنا فعلاً حسه أكنى عندى 50 سنة يا "كريم" .. موجوده أوى .. من

كل حاجة

نظر اليها بإشفاق قائلاً :

- طيب اتكلمى .. ولا خلاص معدتيش بتعتبريني أخوكى الكبير

مسحت عبرة متساقطة وهى تقول :

- لأ طبعاً ازاي .. انت فعلاً أخويا يا "كريم" .. وطول عمرى بحب أحكيك

مشاكلى وبحب انك تنصحنى

- طيب اتكلمى أنا سمعك

أخذت نفساً عميقاً .. ثم .. روت عن وفاة والدها و عما قاسته من بعده من

الديون والافلاس والبقاء بلا مأوى .. كان يعقد حاجبيه بقوة وهو يستمع

اليها وينظر اليها بأسى .. انتهت من كلماتها فأعطاها منديلاً تكفكف به

دمعها وهو يقول بحنان :

- مش عايزك تخافى طول ما أنا موجود يا "آيات"

نظرت اليه بامتنان لما بثته كلماته القليلة .. الكثير من الأمان بداخلها ..

فأكمل قائلاً بحزم :

- أول حاجة لازم تحصل انك تسيبي شقة زميلك دى .. ميصحش تعدى فى

شقة واحد غريب وأخوكى موجود

ابتسمت ولم تعقب فأكمل بحيرة :
- وصحبتك دى اللى حكايتها حكاية .. كده مش هينفع تعدى معايا فى الفيلا .. بس مفيش مشكلة هسيبهالكوا وانزل أنا فى أى فندق مؤقتاً لحد ما نشوف الأمور هترسى على ايه
قالت "آيات" على الفور :
- لا يا "كريم" مش معقول نخرجك من بيتك .. وبعدين أنا خلاص هشتغل وهيبقى لى مرتب
قال "كريم" بجدية :
- ولحد ما تشتغلى ويبقى لك مرتب ازاي تفضلى عايشه فى شقة زميلك يا "آيات"
قالت بخرج :
- أنا اضطريت أعمل كده مكنش قدامى غير كده تنهد قائلاً :
- عارف بس طالما فى بديل يبقى خلاص الوضع ده ميصحش يستمر أكثر من كده .. هتيجي تعدى انتى وصحبتك فى الفيلا .. لحد ما الأمور تتظبط فكر قليلاً ثم نظر اليها وقال :
- شركة ايه اللى هتشتغلى فيها .. انتى بتقولى شركة والد زميلك .. طيب هتشتغلى ايه يعني
- هشتغل فى مكتب سياحى
رفع حاجبيه فى دهشة ثم قال :
- مكتب سياحى
صمت وعلامات الضيق على وجهه ثم قال :
- طيب مش وقت كلام فى الموضوع ده دلوقتى .. أهم حاجة دلوقتى انك تنقلى من الشقة دى النهاردة
أوصلها "كريم" الى بيت "أحمد" .. والتفت اليها قائلاً وهو ينظر الى العمارة والى المنطقة حولها :
- تحبى أستناكى
التفتت اليه وقالت :
- لا هناخد وقت على ما نرتب حاجتنا .. هتصل بيبك لما أخلص
أخرجت هاتفها وقالت :
- قولى رقمك يا "كريم"
أمسك منها الهاتف ودون رقمه ثم اتصل به .. ثم قال :
- قوليلى رقم زميلك عشان أتصل بيه أشكره

قالت له "آيات" :

- مش معايا رقمه .. هو مع "أسماء" صحبتى
- طيب خلاص ابعتيهولى فى رسالة عشان أعرفه انكوا هتسيبوا الشقة و
أشكره على اللى عمله معاكى
- أومات برأسها وتوجهت الى البناية .. استقبلتها "أسماء" قائلة :
- كنتى فين يا بنتى ؟

أغلقت "آيات" الباب وعلامات الفرحة على وجهها وقالت :

- "كريم" رجع من السفر

نزرت اليها "أسماء" بإسغراب وهى تقول :

- "كريم" مين ؟

قالت "آيات" بحماس وهى تضع حقيبة يدها فوق المقعد :

- "كريم" جارنا .. أخويا فى الرضاعة اللى حكتهك عنه

قالت "أسماء" وهى تمط شفيتها :

- مش فاكرة .. أنا فاكرة انك قولتلى ليكى أخ بس مش فاكرة انتى

قولتلى ايه عنه

قالت "آيات" وهى تجلس على أحد المقاعد :

- ده ابن جيرانا اللى فى الفيلا اللى أصادنا .. مامته كانت صاحبة ماما الله

يرحمها .. ولما ماما اتوفت بعد ولادتى طنط دى رضعتنى عشان كانت

لسه والده جديد .. ومن كام سنة سافروا كلهم النمسا عشان عمو باباه

جاله شغل هناك و"كريم" اشتغل هو كمان هناك

ثم أضافت بسعادة :

- بس هو دلوقتى رجع مصر لوحدته .. فرحت أوى لما شوفته تانى .. بجد

كنت مفتقدها جدا .. "كريم" ده يا بنتى أنا كنت بعتره بابا التانى مش بس

أخويا

ضحكت "أسماء" بتهكم وقالت :

- بابا !

قالت "آيات" بحما وهى تقف فى مواجهتها :

- تعرفى انه قالى اننا نسيب الشقة ونروح نعد عنده فى الفيلا

نظرت اليها "أسماء" بدهشة .. وبدت شاردة .. قالت لها "آيات" بقلق :

- ايه فى ايه مفرحتيش ليه افكرتك هتفرحى

قطبت جبينها قائلة :

- مش عارفه .. أنا طبعاً واثقة فيه لانك واثقة فيه .. بس أنا بقيت أخاف

من الناس كلها .. وانتى بتقولى انه رجع لوحدته يعنى عايش لوحدته

ثم استدركت :

- ولا هو متجوز ؟

- لا مش متجوز .. بس متقلقيش هو أصلاً قالى انه مش هيعد فى الفيلا
وهيسبنى أعده فيها أنا اونتى لوحدنا لانه بدره شاف انه ميصحش انك
تعدى فى الفيلا وهو موجود فيها
رفعت " أسماء " حاجبيها بدهشة وقالت مبتسمه :

- ده شكله طيب أوى

قالت " آيات " بحماس :

- طيب موووت .. بجد أكثر حد محترم ممكن تقاليه فى حياتك

ضحكت " أسماء " قائله :

- يا خسارة مامته دى عملت فيكى فصل بايخ أوى كان لازم ترضعك يعنى

حبكت

قالت " آيات " بمراره وفى عينها نظرة حزينه :

- لا كدة أحسن لان علاقة الأخوة هى اللى بتدوم .. لكن الحب بيخلص

بسرعة

اختلفت ابتسامه " أسماء " وهى تنظر الى " آيات " .. بدت على وشك

البكاء لكنها تداركت نفسها بسرعة وهى تقول بمرح زائف :

- يلا بأه عشان نلم حاجتها هو مستنى اتصال منى

عكفت الفتاتان على تعبئة أغراضهما .. حانت من " أسماء " التفاته قائله

:

- شكلة ايه " كريم " ده ؟

قالت " آيات " وهى تضع ملابسها فى حقيبتها :

- ريحى نفسك مش استايلك

- مش ستايلى ازاي يعنى ؟

التفتت اليها " آيات " قائله :

- ملتحي وبيدقق فى كل حاجة .. يعنى بالنسبة لك هتشوفيه متشدد

ورجعى

قالت " أسماء " بتهكم :

- آه قولتيلى

ابتسمت " آيات " وهى تقول شاردة :

- كان بينصحنى فى حاجات كتير وكنت على طول بسمع كلامه .. بس لما

سافر ودخلت الجامعة .. معرفش .. حسيت انى لوحدى .. ونسيت كل اللى

عملهولى واللى كان بيقلهولى

تهددت بأسى قائله ونظرة حزن فى عينيها :
- ياريتها فضل هنا .. خاصة لما بدأت أدخل الجامعة وأشوف ناس واختلط
بناس .. أكيد كان هيغير نظرتى لحاجات كتير
لمعت عبرة فى عينيها وهى تقول :
- وأكيد كان هيغير مشاعرى تجاه حاجات كتير
توقفت "أسماء" عن تعبئة أغراضها ثم نظرت الى صديقتها وسألتها
بشك :
- "آيات" انتى لسه
قاطعتها "آيات" على الفور وقالت بصرامة شديدة :
- لأ

ثم التفتت الى حقيبتها تعاود جمع أغراضها .. وقفت "أسماء" تنظر اليها
للحظات .. ثم انهمكت هى الأخرى فيما تفعل

طرق "أحمد" باب مكتب والده فى المنزل .. دخل ليجد والده جالساً
مستغرقاً فى التفكير .. ابتسم وهو يجلس قبالة قائلاً بمرح :
- كانت جامده صح ؟
نظر اليه والده فأكمل "أحمد" بحماس :
- بجد أفكارها روعة .. ولو اطبقت فعلاً هنبقى فعلاً كسبنا السوق .. انا
رأىي ندخل بقلب جامد .. الاقتراحات اللى قالتها "آيات" بجد ممتازة
اختفت ابتسامته وهو ينظر الى والده الذى يجلس واجماً .. سأله "أحمد"
باهتمام :
- فى حاجة يا بابا
قال "فؤاد" وهو يخلع عويناته ليعبث بها :
- الرجلين اللى كانوا هيشاركونى .. رفضوا الفكرة اللى "آيات" طرحتها
ثم أطلق تنهديه وقال :
- للأسف الاتنين رفضوا
مط "أحمد" شفثيه فى تبرم ثم قال :
- مش مشكلة أكيد هنلاقى حد غيرهم يشاركنا
ثم نظر الى والده وقلبا بحنق :
- وبعدين مش احنا اتفقنا اسبوع ويفكروا .. ايه اللى خلاهم يردوا دلوقتى
ومفتش كام ساعة من الاجتماع
قال "فؤاد" بحيرة :
- مش عارف

ثم نظر الى "أحمد" وقال بحزم :
- أفكارها فعلاً عجبتنى .. خاصة انها هتريح ضمير الواحد من انه يضطر
يسمح بحاجات مش مضبوطة .. يعني الواحد هيشغل ويكسب وينافس
وكم ان هيكون ضميره مرتاح
أرجع ظهره الى اخلف قائلاً بحزم :
- أنا هنفذ افكارها كلها .. ومش بس كده .. أنا كمان هخليها تشتغل فى
القرية نفسها مش فى المكتب السياحى هنا
ابتسم "أحمد" فقال والده مبتسماً :
- وان شاء الله هلاقى حد يشاركنى .. رجال الأعمال المحترمة كثير و أكيد
حد فيهم هتعجبه الفكرة ان شاء الله
قال "أحمد" بلهفة :
- يعني أفرحها وأبشرها ؟
- أيوة .. خلاص "آيات" من النهاردة موظفة فى شركتى .. وطبعاً
"أسماء" صحبتها
خرج "أحمد" متوجهاً الى سيارته عازماً على الذهاب الى "آيات"
ليخبرها بتلك البشرى بنفسه يرى علامات السعادة على وجهها .. رن
هاتفه فرد قائلاً وهو يستعد لركوب السيارة :
- ألو
- أستاذ "أحمد فؤاد" ؟
- أيوة أنا يا فندم
- مع حضرتك "كريم" أخو "آيات"
توقفت يد "أحمد" على مفتاح السيارة وهو يعقد حاجبيه فى دهشة ..
أكمل "كريم" قائلاً :
- أنا متشكر جدا على اللى حصرتك عملته مع أختى .. وهى وصحبته
هيسيبوا الشقة النهاردة .. فياريت نتقابل عشان أديلك مفتاح الشقة
صمت "أحمد" يحاول أن يتوعب ما يسمع ثم قال :
- مفيش مشكلة .. شوف تحب نتقابل فين ؟
- أنا مستنى تليفون من "آيات" لما هتخلص لم حاجتها هى وصحبته
هتكلمنى ساعتها هكلمك وأجيلك أسلمك المفتاح
أنهى "أحمد" المكالمة وهو شاردأ ثم هتف بحنق ممزوج بالدهشة :
- ده مين "كريم" ده ان شاء الله
أدار سيارته وانطلق فى طريقه الى "آيات"

رن جرس الباب .. فقالت "آيات" وهي تتوجه لفتحه :

- أكيد "كريم"

فتحت الباب لكنها شعرت بالدهشة لمرآى "أحمد" .. قال بوجوم :

- ازيك يا "آيات"

- الله يسلمك

بدا عليه الضيق وهو يقول :

- كنت جاي عشان أبشرك ان بابا عجبته افكارك اللي طرحتها في

الاجتماع وان شاء الله هتشتغلي معاه انتي و "أسماء" .. وكمان

هتشتغلوا في القرية نفسها مش في المكتب السياحي

اتسعت ابتسامة "آيات" وهي تتمم :

- الحمد لله

قال لها فجأة :

- مين "كريم" ده ؟

- هو كلمك ؟

- أيوة وبيقولى انه أخوكي .. انتي أصلاً ملكيش اخوات

- ده أخوكي في الرضاعة .. كان مسافر النمسا ورجع

أوما برأسه وهو يقول بضيق :

- مفيش داعى تسيبي الشقة اصلاً محدش ساكن فيها ومحدش فينا

بيروحها

في تلك اللحظة انفتح باب المصعد ليخرج منه "كريم" .. امتقع وجهه

لرؤية ذلك الغريب واقفاً مع "آيات" أمام باب البيت .. اقترب منهما فقالت

"آيات" بتوتر :

- ازيك يا "كريم" .. ده "أحمد" زميلي اللي كلمتك عنه

مد "كريم" يده وسلم عليه قائلاً :

- أهلا وسهلا يا "أستاذ" أحمد"

نظر اليه "أحمد" بدهشة وهو يقول :

- الله يسلمك

- شكراً على اللي عملته مع أختي

- لا أبداً مفيش حاجة

التفت "كريم" الى "آيات" قائلاً :

- خلصتوا ؟

قالت وهي تدلف للداخل :

- أيوة ثواني هجيب الشنط

دخلت للحظات كان "أحمد" يرمق خلالها "كريم" بدهشة وبدا وجهه كعلامة استفهام كبيرة .. كاد أن يفتح فمه للتحدث لكن أقبلت "آيات" فى تلك اللحظة ومعها "أسماء" .. أسرع "كريم" بحمل الحقيبتين .. وأخذ المفتاح من يد "آيات" وسلمه الى "أحمد" قائلاً وعلى ثغره ابتسامه :

- متشكر مرة ثانية

ثم أشار الى الشقة قائلاً :

- تقدر تتم على كل حاجة فى الشقة قبل ما نمشى

قال "أحمد" على الفور :

- لأ طبعاً

كانت "أسماء" ترمق "كريم" بنظراتها المتفحصة وقد اتسعت عيناها

دهشة .. فتح لهما "كريم" باب المصعد وقال :

- اسبقونى وهنزل بعدكوا

بمجرد أن انغلق باب المصعد التفت "اسماء" الى "آيات" وقالت بحده :

- انتى بتستعبطى يا "آيات" .. انتى عايزه تفهمينى ان الراجل ده أدنا فى

السن ؟

قالت "آيات" وهى تضحك بشدة :

- لأ طبعاً "كريم" أكبر منى ب 11 سنين يعنى عنده دلوقتى 33 سنة

صاحت "أسماء" بدهشة :

- يعنى عايزة تفهمينى ان مامته كانت بترضعه وهو عنده 11 سنه

انخرطت "آيات" فى ضحك متواصل حتى انفتح باب المصعد .. خرجت

منه ومازالت تضحك الى أن قالت "أسماء" بغیظ :

- يا بنتى فهميني .. ازاي أخوكى فى الرضاعة

قالت "آيات" من بين ضحكاتها :

- يا بنتى مامته كانت حامل وولدت بس البيبي مات .. عشان كده قدرت

ترضعنى وقتها لانها ولدت بعد ما ماما الله يرحمها اتوفت بفترة صغيرة

هتفت "أسماء" :

- آه قولتلى .. ده انا اتجننت لما شوفته لان شكله مش سنك خالص ..

قولت البنت دى بتسرح بيا ولا ايه

صمتت قليلاً ثم قالت :

- بس كان معاكى حق .. مش ستايلى

ابتسمت "آيات" وهى تقول بتهكم :

- أيوة أنا فاهماكى كويس .. انتى عايزة واحد من أبو جل فى شعره

وحظاظه فى ايده وسلسلة فى صدره وبيقول مامى وبابى

وكزتها "أسماء" بكوعها قائله :
- ها ها ها خفه .. مش للدرجة دي يعني .. بس على الأقل يكون ستايليش
نظرت اليها "آيات" بتحدى قائله :
- ليه هو انتى شايفه "كريم" مش ستايليش .. على فكرة طول عمره
بيهتم بلبسه وبشكله جداً
قالت "أسماء" بتهكم :
- بس شكله عقد يا بنتى .. دي كفاية دقنه اللي مدياله سن أكبر من سنه ..
مشوفتيش خد منك المفتاح ازاي واداه هو لـ "أحمد" .. لا وكمان
مرضيش يركب معانا الأسانسير .. على أساس انى مرأة والمرأة عوره
يعني
قالت لها "آيات" بغیظ وهى تنظر الى "كريم" و "أحمد" الخارجان من
البوابة :
- عمل كده عشان ما يضايقكيش يا متخلفة
اقترب "أحمد" منهما وقد بدا عليه الضيق قال لـ "آيات" :
- لو احتجتى اى حاجة كلمينى يا "آيات"
نظر اليه "كريم" بضيق .. فقالت "آيات" بتوتر :
- شكراً يا "أحمد"
التفت الى "أسماء" ومد يده قائلاً :
- سلام يا "أسماء" لو احتجتى حاجة كلمينى فى أى وقت رقمى معاكى
ابتسمت "أسماء" وسلمت عليه قائله :
- ميرسى يا "أحمد"
انطلق "كريم" بسيارته متوجهاً الى الفيلا .. كانت "أسماء" ترمقه من
المقعد الخلفى بشئ من الفضول .. لاحظت انه لم ينظر اليها فى المرآة قط
.. فأشاحت بوجهها تنظر من شبك السيارة وهى تبتسم بسخرية .. أوقف
"كريم" سيارته والتفت الى "آيات" قائلاً بحنان :
- محتاجين نعد ما بعض أعده جامده .. يلا انزلى ارتاحى دلوقتى ولو
احتجتى حاجة كلمينى
ثم رفع حاجبه بحزم قائلاً :
- تكلمينى أنا ها .. مش حد تانى
قالت "آيات" على الفور :
- أصلاً مكنتش هتصل بيه يا "كريم" .. ويجد ملجأتلوش غير لما مكنش
فى حد أدامى غيره
ثم هتفت فجأة :

- آه على فكرة باباه قال انه خلاص موافق على شغلى عنده أنا و
"أسماء"

- طيب يلا انزلى دلوقتى ونتكلم بعدين

اقتربت الشمس من المغيب مودعة هذا اليوم واعدة بفجر يوم جديد ..
جلس "آدم" فى شرفة الشاليه ماسكاً مصحفه .. خاشعاً قلبه .. دامعة
عيناه .. اقترب منه "زياد" قائلاً :

- مساء الخير يا "آدم"

قاطع "آدم" التلاوة والتفت اليه قائلاً :

- أهلاً يا "زياد"

جلس "زياده" أمامه وهو ينظر الى هاتف "آدم" المغلق والموضوع
فوق طاولة صغيره قائلاً :

- قافل موبايلك ليه ؟

- كنت مضايق شويه ومكنتش عايز وجع دماغ

زفر "زياد" بضيق وقال :

- أحسن انك قفلته

- فى حاجه حصلت ؟

قال "زياد" بحنق :

- "شكرى" اتصل وأعد يجعر عشان الخمره اللي رجعناها المخازن
وفضل يقول كلام ملوش لازمه وعايزك تفتح تليفونك عشان يكلمك .. كنت
واثق انه هيعملنا مشاكل

مط "آدم" شفتيه وقال :

- أكيد "ساندى" اللي قالتله

- أكيد طبعاً

قال "آدم" بهدوء :

- أصلاً كان لازم هيعرف دى فى الأول والآخر قريته

- طيب ناوى على ايه .. هو شكله فعلاً مش هيتراجع عن موضوع الخمره

ده مش فاهم ليه .. واخدها على قلبه أوى

قال "آدم" وهو يعاود النظر الى مصحفه :

- يعمل اللي يعمل .. أنا كمان مش هتراجع

كاد أن يبدأ فى التلاوة مرة أخرى .. لكنه نظر الى هاتفه الموضوع فوق

الطاولة والتقطه وفتحه .. وقف يجرى اتصالاً فرمقه "زياد" بنظرات

الفضول قائلاً :

- هتكلمه ؟

أوماً "آدم" برأسه .. كانت المكالمة عاصفه .. احتد فيها "شكرى" قائلاً

:

- ازاي يعني يا دكتور ترجع الخمرة المخازن تانى .. انت عايز تضحك
الناس علينا ولا ايه

قال "آدم" بحزم :

- لأ مش عايز أضحك الناس علينا .. بس أنا شايف ان ملهاش لازمه
ونقدر نمشى القرية من غيرها

قال "شكرى" بحده :

- ازاي يعني يا دكتور .. ازاي نبقى قريه فايف ستارز من غير الخمره
اللى السياح بيشربوها زى المايه .. كده احنا بننزل خطوة وبنسمح لـ

"عاصى" وأبوه انهم يسبقونا .. لما قريرتهم يقدموا فيها خمرة واحنا لأ
كده احنا بنقول للسياح سيبوا قريتنا وروحوا لقريتهم

قال "آدم" بعناد وهو يشعر بالضيق من هذا الحوار :

- لأ مش لازم يكون فى خمره عشان السياح يتمسكوا بالإقامة فى قريتنا
وبعدين احنا متميزين عن قرية الفيروز بحاجات كتير .. وكمان

قاطعته "شكرى" قائلاً بحزم :

- الخمرة اللى رجعت المخازن أنا هكلمهم دلوقتى يرجعوها القرية تانى
وياريت تستقبل العربية اللى جايه أو تخلى حد يستقبلها

صمت "آدم" قليلاً ثم قال بصرامة :

- لو العربية جت همسيها يا "شكرى"

صاح "شكرى" محتداً :

- انت بتقول ايه

قال "آدم" بعناد وهو لا ينوى التراجع فى هذه النقطة :

- بقول اللى سمعته .. أنا مدير القرية مش انت .. وأنا اللى أديرها

بطريقتى اللى شايفها صح

صاح "شكرى" محتداً بشدة :

- طيب أنا عندي اجتماع دلوقتى .. نتكلم بعدين يا دكتور .. بس اعمل

حسابك انى مش هقبل أبداً انك تهد الاسم اللى عملناه فى الفترة اللى فاتت
انتهت المحادثة بينهما بطريقة عاصفة كما بدأت .. وقف "آدم" ينظر الى

قرص الشمس الذى غرب بحيرة وتردد وخوف وحزن .. مشاعر كثيرة

متضاربه وأفكار بداخله تأتى وتذهب .. التفت الى "زياد" قائلاً :

- يلا نصلى المغرب

- زى ما بقولك كده .. اشتغلت مع "فؤاد" .. انا لسه الخبر واصلنى طازه
تفوه "عاصى" بذلك بحده عبر الهاتف .. فقال "راج" بحزم :
- هى اتجننت ولا ايه .. هى مش عارفه انهم منافسين لينا
قال "عاصى" بغیظ وكأنه يتحدث الى نفسه :
- بأه حتت بت زى دى لا راحت ولا جت ترفض تشتغل معايا وتروح
تشتغل مع اللى اسمه فؤاد ده
- أنا مش غايظنى الا الكلام اللى هيتقال دلوقتى .. لما بنت أخو "سراج
اليمانى" تشتغل فى قرية منافس له معنى كده انها شافت القرية الثانية
دى أفضل من قرية عمها
قال "عاصى" بغضب :
- شكلها عايز تتقرص من ودنها عشان تتظبط
- استنى يا "عاصى" لما نشوف آخرتها ايه .. بلاش تهور
صاح "عاصى" :
- كل شوية استنى يا "عاصى" استنى يا "عاصى" لحد ما الناس
هتركبنا يا بابا .. فى مواقف مينفعش فيها أستنى .. البت دى لو اشتغلت
مع "فؤاد" هيستغل وجودها فى قريته لمصلحته .. ومش بعيد ينشرها فى
الجراید وبالبنط العريض .. بنت عيلة اليمانى بتشتغل فى قريته ورفضت
الشغل فى قرية عمها
ضاقت عيناه ليقول :
- لازم قرصه ودن عشان تتظبط

جلست "آيات" بصحبة "كريم" فى أحد المطاعم وقد بدا عليهما
الاستغراق فى الحديث .. قالت :
- صدقنى يا "كريم" الراجل بجد محترم .. وأنا حبه أشغل معاه
قال "كريم" بشئ من الضيق :
- اسمها أشغل عنده مش معاه .. وبعدين انتى محتاجه الشغل فى ايه
قالت "آيات" باستغراب :
- ايه اللى محتاجه فى ايه .. محتجاه عشان أعيش واصرف على نفسى
نظر اليها "كريم" قائلاً :
- وأنا روحت فىن .. وبعدين كفاية أوى احساسى الفظيع بالذنب انى

مسألتش عنك الفترة اللي فاتت .. بس بجد دوامة الشغل كانت وخذانى
ومعرفتش أبداً باللى حصل لوالدك الله يرحمه .. لو كنت عرفت صدقيني
كنت هنزل مصر فوراً واخذك وأرجع بيكى على النمسا مكنتش سيبتك أبداً
لوحذك كده

ثم استطرد قائلاً :

- بس ملحوقه أديني رجعت أهو

- أنا كمان قصرت فى حقك وفى حق طنط وعمو .. بس معرفش ليه
الاتصالات اتقطعت فجأة وكل واحد بأه فى وادى .. أنا حتى فقدت الأمل
انكوا ممكن ترجعوا مصر تانى .. وقولت خلاص مش هشوفكوا تانى أبداً
نظر اليها بعتاب قائلاً :

- وليه متصلتيش بيا لما ده كله حصل

قالت "آيات" بشرود :

- معرفش كل حاجة حصلت بسرعة .. فى فترة صغيرة كان لازم أسيب
البيت ولما دادة "حليمة" عرضت عليا اعيش معاها قولت بس الدنيا
انتظبت وهلاقي شغل وهعرف أعيش .. جه موضوع الزلزال ده وفجأة
لقيت نفسي فى الشارع وكان لازم أتصرف فى نفس اليوم والا كنت
هقضيه فى الشارع .. فكان أحمد "أقربلى وأسرع فى انه يساعدى
وبعدها على طول قالى على موضوع الشغل عند باباه قولت بس أهى
اتحلت

قال "كريم" باستغراب :

- معقول ملكيش صحاب خالص تلجأيلهم

تنهدت "آيات" قائله :

- أقرب واحده ليا هي "أسماء" وأنا وهى ظروفنا واحده .. فى بنتين كنت
عارفاهم فى رحله ووجد بحبهم .. بس مكانوش هيقدروا يساعدونى انى
ألاقي شغل .. هما عارفين من زمان انى محتاج شغل ولو كان حد فيهم
أداهم شغل مناسب كان قالى على طول .. وبعدين أنا لما اتصلت بـ
"أحمد" اتصلت عشان عارفه ان باباه عنده شركة وانه يقدر يشغلنى
ولما قالنا على شقتهم واننا هنفضل لوحدنا قولت أحسن ما أفرض نفسي
على "ايمان" اللي أنا عارفه ظروفها كويس .. ولا على "سمر" اللي
ممكن مامتها تضايق من وجودنا .. لكن شقة "أحمد" كنا أعيدين فيها
لوحدنا

قال "كريم" بحزم :

- غلطانه طبعاً .. هو مش له جيران .. وشايفين بنتين فى الشقة ..

وميعرفوش ايه القصة بالظبط .. ده غير ان من الواضح انه كان بيجي الشقة كمان

قالت "آيات" على الفور :

- لا والله مكنتش بدخله كان بيبقى واقف على الباب

قال "كريم" وينظر اليها بحزم :

- حتى لو مكنش بيدخل الوضع مكنش مظبوط أبداً يا "آيات"

دمعت عيناها وهى تقول بضيق :

- معرفش بأه هو ده اللي حصل وقتها .. أنا أصلاً كنت طالعة من المشرحة

ومكنتش عارفه أركز .. أصلاً أنا لما كلمته مكنتش عارفه أنا عايزه منه

ايه بس قولت ممكن يساعدى فى شغل أصرف منه

ربت "كريم" على كتفها قائلاً :

- طيب خلاص متضايقيش نفسك اللي حصل حصل

قالت "آيات" وهى تعاود الحديث فى نقطة العمل :

- "كريم" انت مش ملزم تصرف عليا .. وبجد أنا متحمسة للشغل جداً

صمت "كريم" لبرهه ثم قال بضيق :

- "آيات" انتى عارفه يعني ايه شغل فى قرية سياحية .. عارفه ايه اللي

بيحصل هناك

قالت "آيات" بحماس :

- لأ متخفش مفيش حاجة من اللي انت خايف منها دى خالص

- ازاي يعني ؟

شرحت له "آيات" أفكارها للقرية التى طرحتها على "فؤاد" ورجلى

الأعمال .. فقال كريم " مبتسماً :

- كبرتى يا "آيات" وبقيتى بتعرفى تفكرى

قالت بغضب مصطنع :

- قصدك ايه بأه .. قصدك انى كنت غبية يعني

ضحك "كريم" وقال :

- لأ مش قصدى بس أنا فاكرك "آيات" البنوته بتاعة ثانوى .. آخر مرة

شوفتك فيها فاكرة

- طبعاً فكرة ده أنا يومها عيطت عياط .. ربنا يسامحكوا سيبتونى

وسافرتوا

ابتسم قائلاً :

- خلاص أدينى رجعت أهو .. وانتى كبرتى وبقيتى عروسة

ثم نظر اليها نظرة ذات مغزى وقال :

- رغم ان فيكي حاجات كدة مش عاجباتى
علمت "آيات" أنه يقصد ملابسها فقالت بحرج :
- أصلاً اللي انت شايفه ده تقدم
رفع حاجبيه وقال :
- تقدم ! .. ليه انتى كنتى بتلبسى ايه قبل كده ؟
لم تجيب وأشاحت بوجهها فقال بحنق :
- اوعى تقولى زى صحبتك ؟
قالت "آيات" وشعور بالضيق والندم يلازمها :
- بص يا "كريم" مش حبه أتكلم فى اللي فات .. ماشى
- خلاص ماشى .. زى ما تحبى
نظرت اليه وقالت :
- ها قولت ايه فى موضوع الشغل ده .. انا حبه آخذ رأيك أوى
قال "كريم" بجديّة :
- بصى يا "آيات" منكرش ان الفكرة رائعة وعجبتنى .. بس فى مشكلة
انتى مينفعش تسافرى لوحدك وتعيشى لوحدك فى بلد غريبة ومن غير
محرم كمان
هتفت "آيات" قائله :
- بس أنا لوحدى يعنى ظروفى كده
- وأنا روحت فىين
- مش قصدى يا "كريم" بس انت لو مكنتش جيت كنت هبقى لوحدى
وكنت هسافر لوحدى
- بس أنا موجود خلاص
صمتت بضيق فقال :
- بصى أنا مش بفرض عليكى حاجة .. انتى سألتينى عن رأيى وقولت هولك
.. أنا مش حابب انك تسافرى لوحدك وتعيشى لوحدك فى بلد متعرفيهاش
ومن غير راجل معاكى .. وكمان صحبتك مش حابب سفرها لوحدها
وأهلها موجودين
قالت "آيات" وهى تتذكر مأساة "أسماء" بحزن :
- "أسماء" مضطرة .. انت متعرفش اللي حصل ومش هقدر أحكيهولك ..
بس فعلاً هى مضطرة لكده
تنهد "كريم" قائلاً :
- رأيى وقولت هولك .. الفيلا وخليكي عايشه فيها على الأقل هبقى مطمئن
عليكى .. وان كان على الشغل أنا قولتك راجع وعايز أعمل مشروع ..

يعني لو صبرتي كام شهر ممكن تشتغلى معايا
قالت "آيات" بحيرة :

- بس أنا فعلاً متحمسة أوى لمشروع القرية
قال "كريم" وهو شاردأ :

- بصراحة أنا كمان اتحمست .. خاصة انها فكرة مفياش أى حرمانيه ..
وكمان هتبقى حاجة كويسة من باب الدعوة .. ويمكن القرى الباقية تقلدنا
وتعمل زينا ويبقى احنا اللي كسبانين دين ودنيا
بدا شاردأ وهو يفكر في أفكار "آيات" لمشروع القرية السياحية
نظر اليها قائلاً :

- اسمه ايه والد زميلك ؟ .. وشركته فين ؟

أخبرته "آيات" بالتفاصيل ثم نظرت الى ساعتها قائلاً :

- يلا روحنى بأه عشان متأخرش على "أسماء" أكثر من كده

دخلت سكرتيرة "فؤاد" قائله :

- فى واحد اسمه "كريم ضياء" عايز يقابل حضرتك .. بيقول بخصوص
قرية العين السخنة

شعر "فؤاد" بالدهشة وطلب منها السماح له بالدخول .. دخل "كريم"
فوقف "فؤاد" ستقبله بالترحاب .. بعد تبادل عبارات المجاملة .. بدأ
"كريم" حديثه قائلاً :

- على فكرة أنا أخو "آيات اليماني" .. وكلمتني عن المشروع وعن
الأفكار اللي حضرتك تبنتها للمشروع .. انا كنت مسافر النسما من سنين
.. ورجعت وأنا عايز أعمل مشروع ف بلدى وأستقر هنا .. ولما سمعت
من "آيات" اتحمست جداً لمشروع القرية .. انا عارف ان مع حضرتك
شريك بالفعل .. بس كنت حابب انى أدخل فى المشروع ده ولو بنسبه
بسيطة

ابتسم "فؤاد" وعقد كفيه فوق المكتب وهو يقول :

- لا أنا مليش شريك لحد دلوقتى

رفع "كريم" حاجبيه بدهشة قائلاً :

- ده اللي فهمته من "آيات" .. بس عامة طالما مفيش شريك لحد دلوقتى

.. أنا بعرض على حضرتك انى أشاركك فى المشروع ده .. بس عشان

تكون حضرتك عارف أنا مش هقدر أشارك بنسبه عالية .. لان المشروع

ضحم وراس المال اللي معايا مش هيكفى انى أدخل مناصفه فى الشراكه

قال "فؤاد" على الفور :

- وأنا مش شرط عندى انك تدخل معايا مناصفة .. هنعُد أنا وحضرتك
والمحامى ونشوف النسبة اللى مناسبة بالنسبة لك وده بعد ما تدرس كل
بيانات المشروع والدراسة اللى علمناها للأرباح والنفقات وغيره
ابتسم "كريم" ببشاشه وقال :

- على خيرهِ الله
ثم قال :

- بس فى نقطة مهمة بالنسبة لى
- اتفضل

- أشارك فى ادارة القرية .. يعنى أنا مش عايز ارمى فلوسى فى مشروع
ويطلعلى أرباح وخلص .. لأ أنا عايز أشرف عى المشروع ده من الألف
للىاء .. لأن اللى عجبني فى المشروع ده هو الأفكار المحترمه اللى نقدر
بيها نعمل قرية سياحية فى مصر من غير محرمات ومن غير ما نشيل
ذنوب .. وفى نفس الوقت هنغير مفهوم ناس كتير عن السياحة والقرى
السياحية و نقدملهم مكان يستغنوا بيه عن الأماكن اللى بيروحوها واللى
بيكون فيها من المعاصى ما الله به عليم
ابتسم "فؤاد" وقال :

- وأنا مفيش مشكلة بالنسبة لى .. بس محتاجين نعد مع بعض الفترة
الجاية عشان نوصل لشكل محدد وثابت فى ادارة القرية عشان متحصلش
مشاكل مستقبلاً ان شاء الله
اتسعت ابتسامه "كريم" قائلاً :
- اتفقتنا

وقف "آدم" مع أحد العاملين بالقرية يعطيه بعض التعليمات عندما وجد
سيارة تقف بداخل القرية وتتوجه اليها "ساندى" وتأمر العمال بتحميل
الصناديق الى الداخل .. توجه مسرعاً اليها وقال :

- فى ايه يا "ساندى" ؟

نظر الى الكراتين التى يحملها العمال ولما مكتوب عليها فصاح فجأة :
- انتى يا ابني رجع الكراتين دى العربية
قالت له "ساندى" بتحدى :

- لأ مش هترجع بابا اللى قالى أعمل كده
ثم نظرت الى العمال قائله بنره متعالية :
- دخلوا الحاجة دى جوة

صرخ "آدم" فى الرجال قائلاً :
- بقولك سيب اللى فى ايدك انت وهو
نظر الرجال الى بعضهم فى حيرة ثم ما لبث أن استجابوا لأوامر "آدم"
متجاهلين "ساندى" تماما .. التفتت اليه "ساندى" وقد أعاظها تجاهل
العمال لأوامرها وقالت :
- انت ايه اللى عملته ده يا "آدم" .. بقولك بابا اللى قالى أنزل الحاجات
دى فى مطبخ القرية
قال "آدم" بصرامة وعيناه تشعان غضباً :
- أولاً اسمى دكتور "آدم" .. ثانياً أنا قولت لأبوكى انى مش هدخل خمره
للقارية تانى
صاحت بحدته :
- وده اسمه ايه ان شاء الله ازاي يعنى .. انت عايز تخسرنا ولا ايه
ثم صاحت بسخرية :
- آه فهمت .. شكك اتفقت مع عيلة اليمانى علينا .. هما اللى قالوك تعمل
كده وتبوظ شغلنا مش كده .. وانت طبعا مقدرتش ترفض طلب لعيلة حبيبة
القلب اللى ماتت
تجمدت الدماء فى عروقه وهو ينظر اليها نظرة ثاقبة أشعرتها بالخوف ..
قال بصرامة شديدة :
- اياكى تجيبى سيرتها على لسانك تانى
أولاهما ظهره وانصرف .. حث الخطى لا يدرى الى أين هو ذاهب .. كعادته
لم يجد مكان أكثر راحة من الجلوس فوق الرمل ومطالعة البحر أمامه ..
تنهد فى ضيق وهو يشعر بأنه أجل كثيراً قراراً لا بد من أخذه .. نعم لا
يوجد حل آخر .. حاول كثيراً استخدام اسلوب الترقيع لكن ذلك لم يجدى
نفعاً .. لم يعد هناك حل سوى البتر ! .. نعم مؤلم وصعب وقاسى .. لكن
ليس أمامه سواه حتى يتخلص من الداء الخبيث الى غير رجعه !

تقبلت "آيات" خبر مشاركة "كريم" لـ "فؤاد" بسعادة غامرة .. خاصة
بعدما عملت بأمر ادارة "كريم" للقريبة السياحية .. توطدت علاقة قوية
وثقة لا بأس بها بين كل من "فؤاد" و "كريم" بعدما لمس كل منهما فى
الآخر نقاء السريرة .. استخار "كريم" ربه وعزم على التوكل عليه فى
هذا الأمر .. سجدت "آيات" لله شكراً على تحسن أوضاعها وعدم
اضطرارها لأن تعيش عائلة على أحد .. ستعمل وتكد وتكسب قوتها ..
تذكرت "إيمان" ومشاكل أخيها مع البطالة وعدم ايجاد عمل مناسب له ..

وعلمت منها أيضاً بتركها لعملها .. فتحدثت مع "كريم" عن رغبتها في عمل الفتاة وأخيها في القرية .. رحب "كريم" بذلك ففي الفترة القادمة سيحتاج الكثير من العماله في القرية وحبذا لو كان أشخاص موثوق بهم .. كان رد "إيمان" في بادئ الأمر :

- انتى اتجننى يا "آيات" .. لا ماما ولا بابا ولا "على" هيوافقوا على كده لكن "آيات" أخبرتها:

- أنا مش عايزاكى انتى لوحدك .. أنا عايزه "على" كمان كانت سعادة والدة "إيمان" غامرة .. أما "على" بدا قلقاً في البداية الى أن شرحت له "إيمان" الطريقة التي سيعتمد عليها أصحاب القرية في ادارتها وخلوها من اى محرمات .. تحمس كلاهما وكان ردهما بالموافقة . لم يمضى الا اسبوع حتى استعد الجميع لمغادرة القاهرة والتوجه الى العين الساخنة لبدء العمل في القرية التي تحتاج الى الكثير من العمل الدؤوب والصبر حتى يجنون ثمرة عملهم وفي اليوم الموعد توقفت سيارة "كريم" تحت منزل "على" ثم ما لبث أن تعرف الرجلان وكل منهما يتطلع الى وجه الآخر مستبشراً خيراً .. التفت الى الجميع وذكرهم بقوله :

- متنسوش يا جماعة دعاء السفر التفت اليه "على" قائلاً :

- جزاك الله خيراً على التذكير

تمتت "إيمان" بدعاء السفر .. أما "آيات" و "أسماء" نظرت كل منهما الى الأخرى .. ثم ما لبثت أن قالت "آيات" لـ "كريم" :

- "كريم" قوله عشان مش حفظاه .. قال "كريم" ببطء :

- الله اكبر, الله اكبر, الله اكبر, سبحان الذي سخر لنا هذا وما كنا له مقرنين , وانا الى ربنا لمنقلبون , اللهم انا نسالك في سفرنا هذا البر والتقوى , ومن العمل ما ترضى, اللهم هون علينا سفرنا هذا , واطو عنا بعده , اللهم انت الصاحب في السفر , والخليفة في الاهل , اللهم اني اعوذ بك من وعشاء السفر , وكآبة المنظر , وسوء المنقلب في المال والأهل

فرددت الفتاتان الدعاء خلفه .. جلس "على" بجوار "كريم" وأخذ نفساً عميقاً يعبئ رئتيه بهواء الصباح المنعش وقد ارتسمت باتسامة أمل على ثغره .. شعر بإنشراح في صدره وبفرحة غامرة لإستجابته دعاؤه فأخذ يتمم بلا كلل :

- الحمد لله

تشارك الثلاث فتيات في المقعد الخلفى .. بدت "آيات" سعيدة ومتحمسة

لبدء حياتها العملية وتنفيذ أفكارها على أرض الواقع .. كانت تشعر ببعض التوتر لوجود "آدم" بنفس البلد .. لكنها تجاهلت ذكره ووجوده وحذفت أى فكرة عنه من عقلها .. لا يهمها ان كان موجوداً أم غير موجود .. تراه أم لا تراه .. لم تعد تشعر تجاهه بأى شئ .. ولن يفرق وجوده من عدمه .. بالنسبة لها هو كالهواء .. موجود لكنه غير محسوس !

أما "أسماء" فشعرت بالراحة لمغادرة القاهرة وبدء حياة جديدة خالية من المشاكل وعزمت على نسيان كل ما مرت به .. وان كان رغم عنها تشعر بشئ من الحزن والقهر لنسيان أبويها أمرها .. تنهدت فى حسرة ونفضت تلك الصور الحزينه من عقلها وعزمت على ترك الماضى حيث هو .. حانت منها التفاتته الى "كريم" من ثم الى "على" .. للمرة الأولى تتعامل مع أشخاص بهذه الخصال التى اشعرتها بمزيج من الدهشة والحنق .. نظرت من الشباك ونظرة حائرة فى عينيها

تطلعت "إيمان" الى الطريق وهى تتساءل أسيكون هذا التغيير فى صالحها أم ضدها .. كانت شارده لا تعرف تحديد مشاعرها .. لا تعرف ان كانت سعيدة أم غير سعيدة .. كل ما كانت تشعر به هو الخوف .. الخوف من المجهول .. الخوف من ألا تتحسن حياتها قط .. وان تظل فى دوامة أحزانها ومشاكلها ولا تخرج منها أبداً .. التقت عيناها بعيني "كريم" الذى كان يتابع الطريق خلفه فى مرآة السيارة ثم ما لبث أن ابعد كل منهما عينيه بسرعة .. لم تكن سوى أقل من ثانيه .. لكنها أحدثت فى نفس إيمان "الكثير" !

تطلع "كريم" الى الطريق أمامه وهو يفكر بحماس فى مشروعه الجديد .. لم يكن هدفه هو العمل وجنى الأرباح فحسب .. بل ما شجعه لهذا المشروع هو فكرته الدعوية التى يتمنى فعلاً تطبيقها فى بلده الحبيب مصر .. تمنى أن يجعله الله سبباً لتغيير مفهوم الناس عن السياحة .. ولدرء مفاصد الأفكار الهدامة التى يبثها من أرادوا أن تشيع الفاحشة بين المسلمين عن السياحة وما يجب أن تكون عليه .. عزم على السير فى هذا الطريق ومحاولة انجاحه بكل ما أوتى من قوة .

أمة الإسلام بشرى إننا نلمحُ فجراً
في شبابٍ قد أشادوا صحوّةً للدينِ كبرى
وبإذن الله تأتي وثبة تجلبُ نصراً
وثبةً عظمى لجيلٍ يملؤُ الأكوان ذكراً
يقرأ القرآن دوماً خاشعاً سرّاً وجهرّاً
يحملُ الدينَ شعاراً فعلى بالدينِ قدراً
فحباه الله توفيقاً و تسديداً و أجراً
أمة الإسلام بشرى إننا نلمحُ فجراً
في شبابٍ قد أشادوا صحوّةً للدينِ كبرى
رغم طوفان المآسي شق في الطوفان مجرى
أسرج العزم جواداً صاهلاً يمنى و يسرى
صاهلاً يسكب لحن النصر في الأسماع سحراً
و العدى ترنوا إليه تغتلي حقداً و قهراً
أمة الإسلام بشرى إننا نلمحُ فجراً
في شبابٍ قد أشادوا صحوّةً للدينِ كبرى

أمة الإسلام سيرى و اشمخي عزاً و فخرا
واكسري قيد التراخي و الخنوع اليوم كسرا
وانشري الدين ضياء وانثري الأخلاق عطرا
فإذا أعطيت نصراً فاسجدي لله شكرا
أمة الإسلام بشرى إننا نلمحُ فجراً
في شبابٍ قد أشادوا صحوةً للدين كبرى

الفصل الثالث والعشرون من رواية جواد بلا فارس



عبرت سيارة "كريم" بوابة القرية التي كانت تحمل لافتة أنيقة كبيرة كتب عليها "قرية الماسة" .. نظرت "آيات" حولها تتطلع الى الطبيعة

الساحرة .. اتسعت أعين الجميع فى انبهار ولاحت ابتسامه على شفتى
"كريم" وهو يدعو ربه أن يجعل له فى هذا المكان خيراً كثيراً وأن يرزقه
السداد والتوفيق .. توقفت سيارته وهبط الجميع .. صاح "على" بانبهار

:
- ما شاء الله لا حول ولا قوة الا بالله

قالت "إيمان" مبهورة وهى تتطلع حولها حيث المساحة الخضراء
والهواء المنعش القادم من البحر محمل برائحة اليود الذكية المنعشة :
- ما شاء الله المكان حلو أوى

توجه الجميع الى الداخل .. وبدأ "كريم" فى استيلاء مهامه كمدير للقريه
.. اجتمع الجميع فى الغرفة التى اصبحت مكتباً له .. ابتسم "كريم" ووجه
حديثه الى "على" قائلاً :

- تعالى نتكلم بأه فى تفاصيل الشغل بس الأول عايزين نشوف اقامتنا
هتبقى ازاي عشان البنات تروح ترتاح من السفر
قال "على" بحرج :

- اللى تشوفه حضرتك

نظر "كريم" الى كل من "على" و "آيات" وقال :

- فى اقتراحين الاقتراح الأول اننا ناخد 3 شقق جنب بعض واحده ليك يا
"على" انت وأختك وواحدة ليكي يا "آيات" انتى وصحبتك وواحدة ليا ..
والاقتراح التانى ان أنا و انت يا "على" نكون فى شقة واحدة .. والبنات
مع بعض و طبعاً الشقتين هيكونوا جنب بعض

قالت "آيات" بحماس وهى تنظر الى "إيمان" و "أسماء" :

- أيوة الاقتراح التانى أحسن ياريت نكون كلنا فى شقة واحدة
ابتسم "أسماء" وقالت :

- أيوة ياريت أنا و "آيات" و "إيمان" نكون مع بعض
نظر "كريم" الى "على" وقال :

- ها ايه رأيك

التفت "على" الى "إيمان" يعرف رأيها فابتسمت له وأومأت برأسها ..
فقال لـ "كريم" :

- خلاص تمام كده .. بس زى ما قولت الشقتين يكونوا جنب بعض

توجه الجميع الى المنزلين الذى اختارهما "كريم" لإقامتهم .. ترك
الفتيات يرتحن من عناء السفر وتوجه هو مع "على" الى القرية للبدء
فى عملهم .. هتفت "أسماء" بسعادة وهى تجلس على أحد الأسرة :

- أنا فرحانه أوى القرية تحفة
- قالت "إيمان" مبهورة :
- تحفة بس دى روعة بجد مكان خيالى
- قالت "آيات" بمرح طفولى :
- أنا كمان فرحانه أوى .. وفرحانه أكثر ان احنا التلاته مع بعض
- ما لبث أن رن هاتف "إيمان" فأخرجته من الحقيبته قائله بمرح :
- والله اللمه دى ناقصاكي
- تظاهرت "سمر" بالبكاء وقالت :
- اهئ اهئ يلا يا وحشه سبتيني ومشيتي
- قالت "إيمان" بحزن :
- والله العظيم بجد وحشتيني من دلوقتي يا "سمر"
- هتفت "آيات" بمرح :
- هاتيهاالى هاتيهاالى
- أخذت منها الهاتف وقالت :
- "سمر" حبيبتي وحشتيني
- بس بأه يا "آيات" متغيظونيش .. انتوا التلاته مع بعض وفى العين
- السخنة وأنا هنا مطحونة فى المستشفى
- فى تلك اللحظة دخلت الممرضة لتقول لـ "سمر" :
- أدخل الكشف يا دكتورة
- أشارت لها "سمر" بأصبعها قائله :
- لا استنى شوية
- قالت "آيات" بمرح :
- اسكتي يا "سمر" المكان رهيب بجد .. لا وايه أنا و "اسماء" و "إيمان"
- نازلين مع بعض فى شقة واحدة
- هتفت "سمر" مغتاظه :
- بس بأه يا "آيات" متغيظينيش
- ضحكت "آيات" فالتقطت "إيمان" الهاتف منها وقالت :
- أيوة يا حبي
- حبك ايه بأه ما نتي ناسيانى وعائشه حياتك .. يلا يا "إيمان" اقللى
- ضحكت "إيمان" قائله :
- والله العظيم وحشانى
- قالت "سمر" بحزن :
- والله انتى أكثر .. خلاص بأه عشان عيني دمعت وكمان فى كشف ملطوع

بره .. هقفل واكلمك بالليل
- ماشى يا حبيبتي

قالت "إيمان" بحزن :
- "سمر" هتوحشنى أوى
هتفت "اسماء" :
- يا ستى ما هى أكيد هتجيلنا
قالت "آيات" وهى تتناول ملابسها من الحقيقية :
- يلا بأه عشان نرتاح وبعد كده نتكلم فى البيزنيس
أطلقت "إيمان" ضحكة عالية وقالت :
- طيب انتوا خريجي تجارة وتكلموا فى البيزنيس .. أنا بأه طب أسنان
هتشغلونى ايه فى القرية دى
قالت "آيات" بمرح :
- يا ابنتى هو انتى مصدقة انك دكتورة سنان بجد .. ده احنا عملنا خير
كبير وثواب عظيم فى العيانيين اللى كانوا بيبقوا تحت ايديكى .. وبعدين
متقلقيش القرية كبيرة وأكد هنلاقى فيها حاجة مناسبة لدكتورة سنان
فاشلة زيك
قدفتها "إيمان" باحدى الوسائد مفتاظة وقالت :
- قولتلك متقوليش عليا فاشلة تانى
صاحت "اسماء" بغیظ :
- والله لو أخوكى وأخوكى شافوكوا كده هيرحلوكوا على القاهرة عدل ..
بأه ده منظر ناس هتشتغل فى قرية سياحية كبيرة .. هى السياحة خربت
من شوية
التفت اليها "آيات" قائله :
- سبنالك انتى العقل يحتى .. وبعدين بكرة تشوفى هبقى بيزنيس وومان
محصلتش
ساد بينهم جو من المرح افتقده ثلاثتهم منذ فترة طويله .. شعرت كل
منهن بالأمل والسعادة والتفاؤل بداخلها .

عاد "كريم" مع "على" الى المكتب وقال :

- ايه رأيك ؟

قال "على" منبهراً :

- ما شاء الله بجد .. وكمان الأفكار اللي هتتنفذ رائعة .. انا متحمس جدا للشغل

ابتسم "كريم" وهو يجلس على مكتبه وقال :

- وأنا بحب أوى الناس اللي بتبقى متحمسه لشغلها

ابتسم "على" وقال بحماس :

- بجد أنا حابب الشغل هنا أوى ..أولا فرصة كبيرة بالنسبة لى .. ثانياً

حاسس انى فى المكان ده هقدر أطلع كل الطاقة اللي جوايا .. بجد أنا

متحمس جداً يا أستاذ "كريم"

قال "كريم" وهو يشمر ساعديه :

- بص من البداية كده أنا بجد حبيتك لله فى الله ومتسألنيش ليه .. بس

سماهم فى وجوههم .. من أول ما شوفتك وأنا استبشرت بيك خيراً ..

فبلاش بأه أستاذ و الألقاب العقيمة دى .. اعتبرنى واحد صحبك

قال "على" بامتنان :

- على فكرة بأه أنا كمان ارتحتك .. وطبعاً يشرفنى انى يبقى فى صداقة

بيننا بعيداً عن الشغل .. يعني حتى لو مكملتش شغل هنا أو استغنيت عن

خدماتى فى أى وقت فيكفى انى اتعرفت على أخ محترم زيك

قال "كريم" بمرح وهو ينهض :

- طب يلا بأه نبعت أكل للبنات احسن زمانهم بياكلوا فى بعض من الجوع

.. وناكل احنا كمان أحسن خلاص أنا واقع

توجهها الى مطبخ القرية .. نظر "على" فى أحد قوائم الطعام ليجده خالياً

من الخمور ومن أى لحوم محرمة أو مطبوخة بشئ محرم .. نظر اليه

"كريم" وقال وقد فهم ما يبحث عنه فى القائمة :

- عيب عليك

ابتسم "على" بخرج وهو يترك القائمة من يده وقال :

- يعني الواحد حابب يطمئن بس .. زيادة اطمئنان مش أكثر

التفت اليه "كريم" وقال بجدية :

- بص يا "على" .. او عى تفتكر انى واحد راجع من بره ومعاه فلوس

وهمه يعمل مشروع يكسب منه وخلاص .. لا أنا مش كده .. أنا لما قررت

أرجع مصر قررت أرجع عشان أعمل حاجة أفيد بيها البلد دى .. والناس

اللى فيها .. حتى لو كانت حاجه بسيطة .. بس أهم حاجة عندى انها

تقربنى من ربنا مش بتعدنى عنه .. حبيت فكرة القرية لانها فكرة دعوية

ممتازة وهقدر أخدم بيها ديني .. أنا محتسب في المشروع ده حاجات كتير
أوى .. منها انى أبين للناس ان مش عشان الواحد يتفسح ويرفه عن
نفسه انه يلجأ لحاجات مش هينوبه منها غير المعاصى والذنوب .. لا احنا
ممكن نعيش ونتمتع ونتفسح ونعمل كل اللي احنا عايزينه بس برضا ربنا
علينا ومن غير ما نغضبه .. ربنا لما حرم كل المحرمات اللي فى ديننا
حرمها عشان بتضرنا وبتأذينا .. وعشان نجاتنا فى البعد عنها .. ومش
معنى اننا نلتزم بكلام ربنا يبأه احنا ناس مكلكة ومعقدة ومبتعرفش
تضحك ولا تستمتع بحياتها .. لا .. احنا بنعرف نعمل كل ده من غير ما
نغضب ربنا .. أنا عايز بجد الناس كلها تعرف ان مش عشان أكسب فلوس
وأزود دخلى ألجأ للى يغضب ربنا وأقول مضطر عشان أعيش .. لا مفيش
حد مضطر على الحرام .. مفيش حد بيترك شئ لله الا وربنا بيعوضه باللى
أحسن منه .. عشان كده أنا ميهمنيش كسبت كام أد ما يهمنى انى معملش
أى حاجة غلط .. وأنا زى ما قولتك التمسيت فيك انك شاب محترم ..
صحيح لسه متعرفين من ساعات بس أنا اتعاملت مع ناس كتير أوى جوه
مصر وبره مصر وبقيت أقدر أفهم الانسان اللي أدامى من نظرة .. عشان
كده رفعت التكليف بينى وبينك لانى حابب اننا نعين بعض .. يعنى لو
شوفتنى فى مرة غلظت تقولى حاسب يا "كريم" خلى بالك .. لان الانسان
دايما لازم يحيط نفسه بصحبة صالحة لان هو ده اللي بيقومه لما بيحيد
عن الطريق وربنا عز وجل حثنا على ده فى سورة الكهف لما قال "
وَاصْبِرْ نَفْسَكَ مَعَ الَّذِينَ يَدْعُونَ رَبَّهُمْ بِالْغَدَاةِ وَالْعَشِيِّ يُرِيدُونَ وَجْهَهُ وَلَا
تَعْدُ عَيْنَاكَ عَنْهُمْ تُرِيدُ زِينَةَ الْحَيَاةِ الدُّنْيَا وَلَا تُطِعْ مَنْ أَغْفَلْنَا قَلْبَهُ عَنِ ذِكْرِنَا
وَاتَّبَعَ هَوَاهُ وَكَانَ أَمْرُهُ فُرُطًا " .. وضح فى الآية دى أهمية الصحبة
الصالحة وحذرنا من صحبة السوء .. عشان كده لما لقيت سمتك طيب ..
واهتميت واحنا بنعمل جولة فى القرية انك تسألنى عن تفاصيل الشغل
والاختلاط فى القرية .. ولما العصر أذن وسألتنى عن مكان المسجد ..
ودلوقتى وانتى بتبص على المنيو بتدور هل فيها حاجة حرام ولا لا ..
استبشرت خيرا وحسيت انك بجد هتكون خير معين ليا ان شاء الله ..
ثم ابتسم بعذوبه وقال :

- بجد أنا مبسوط انى اتعرفت عليك

ابتسم "على" وقال بتأثر :

- أنا اللي مبسوط انى عرفتك يا "كريم" .. ويارب فعلاً أكون عند حسن

ظنك

أنهى "آدم" صلاة العشاء ثم نهض وطوى سجادة الصلاة ووضعها على أحد المقاعد .. خرج من غرفته وتوجه الى والدته الجالسه فى حجرة المعيشة تشاهد التلفاز وقال :

- أنا خارج شوية يا ماما

- ماشى يا حبيبى

خرج "آدم" من الشاليه .. وتطلع الى اتجاه البحر للحظات ثم سار اليه سيراً فى تودة .. وقف أمامه ينظر الى ارتفاع امواجه وقد وضع يديه فى جيبي بنطاله .. كان بدو ساكناً كالتمثال .. ثم ما لبثت عيناه أن لمعت بالدموع .. أخذ نفساً عميقاً يحاول به التخفيف من حرارة النيران المشتعلة بقلبه .. تتم بشفتيه وكأنه يتحدث الى شخص أمامه :

- خلاص يا "آيات" هسيب كل حاجة وأرميها ورا ضهرى .. هخرج من دوامة الانتقام اللي دخلت نفسى فيها .. هسيب كل حاجة عشان أبقي انسان كويس زي ما كنتى شايفانى .. كنتى شايفانى انسان محترم .. أنا هرجع محترم تانى يا "آيات"

تساقطت عبرة على وجنته وأكمل هامساً :

- كان نفسى أفرحك وأقولك انى اتغيرت .. كان نفسى نرجع لبعض تانى .. أنا كنت عايش فى نار .. النار كانت محوطانى من كل ناحية .. بس مكنتش عايز أخرج منها .. كنت واقف وسطها بمزاجى .. وانتى كنتى عامله زي النسمة الهادية اللي دخلت حياتى واللى غصب عنى اتمنيت انى أخرج من النار وأقرب منها

انتفض فجأة بعدما شعر بيد تربت على كتفه التفت ليجد "زياد" فى وجهه .. مسح عبراته المتساقطة بسرعة .. قال "زياد" :

- رحلتك الشاليه خالتى قالتلى انك خرجت .. وأنا راجع شوفتك وانت واقف أدام البحر

أوما "آدم" برأسه فى صمت .. تنهد "زياد" بحزن وقال :

- انسى بأه يا "آدم" .. ربنا يرحمها

لمعت عيناه مرة أخرى بالعبرات وهو قول بصوت مرتجف :
- وحشتنى أوى

التفت ينظر الى "زياد" والدموع تتساقط مرة أخرى على وجهه وقال :

- لما جيت هنا جيت بمزاجى .. كانت بتوحشنى بس على الأقل كنت عارف انها موجودة .. انى هرجعلها .. كنت حاسس من جوايا انى هلف ألف

وأرجعها .. بس دلوقتي هي معدتتش موجودة يا "زياد" .. معدتتش أقدر أرجعها .. بجد وحشاني أوى .. وحشتني ابتسامتها .. وحشتني نظرة عليها .. وحشتني رقتها .. وحشتني طيبتها .. كانت طيبة أوى .. كانت بتحبني أوى

أعاد النظر الى البحر وهو يقول بمرارة :

- يوم كتب الكتاب لما كنت ماسك ايدها اتمنيت ساعتها اننا منفترقش أبداً .. ساعتها حسيت اني بحبها بجد .. لما قولتلها ان في حاجات فيها محتاجه تتغير .. بصتلي وابتسمت ووافقتني على طول .. لما ادتني ذهبها حسيت انها مستعدة تعمل أي حاجة عشاني .. حسيت انها بتحبني بجد بصدق بإخلاص .. رغم كل الشر والحقد اللي كان جوايا لكنها قدرت تدخل قلبي وتبرجلي عقلي .. لو كنت فضلت معاها كنت هقدر أرجع معاها تاني انسان محترم وكنت هنسى كل الأفكار الحقيرة اللي كنت بفكر فيها .. هتف به "زياد" وقال :

- " آدم " انت بتعذب نفسك بنفسك .. خلاص هي الله يرحمها ماتت ومش هترجع .. انسى بأه عشان تقدر تكمل حياتك ..

نظر اليه " آدم " بأعين متألمه حائرة وقال :

- قولي ازاي .. قولي أنساها ازاي .. ازاي أبطل أحس انها وحشاني .. ازاي أخرجها من قلبي وعقلي .. قولي يا "زياد" .. قولي وريحني لاني فعلاً نفسي أرتاح .. ازاي أبطل أحس انها وحشاني ؟ لم ينتظر من "زياد" اجابه .. التفت وغادر المكان أخذ نفساً عميقاً مرة أخرى يحاول به تهدئه نيرانه .. لكن هيهات

وقفت " آيات " في شرفة غرفتها .. أخذت نفساً عميقاً تنعش به رئتيها .. نظرت الى دوران القمر واكتماله .. ثم التفتت تنظر الى البحر أمامها .. تأملته الى أن شعرت بوخز الدموع تحرق عينها .. خرجت من تأملها لتحاول السيطرة على تلك الرغبة القوية في البكاء التي اجتاحتها .. سألت نفسها : ما هذه الغصة التي تشعرين بها في حلقك يا " آيات " .. انها بالتأكيد لفقدك والدك الحبيب .. و " حلمية " الطيبة المخلصة .. ارحمهما يا الهى واغفر لهما وتجاوز عنهما .. تألمت كثيراً لفقدهما لكنها حكمتك .. هكذا أردت .. وهكذا حكمت .. تنهدت بقوة ودخلت من الشرفة .. مرت على " أسماء " النائمة في فراشها المجاور .. ثم خرجت من الغرفة ..

نظرت الى غرفة "إيمان" وتوجهت اليها .. وجدتها واقفة تصلى ماسكة مصحفها .. كانت الساعة قد تجاوزت منتصف الليل .. شعرت براحة وسكينة وهي تراها تصلى قيام لله عز وجل .. أنهت "إيمان" صلاتها في تلك اللحظة لتفاجئ بـ "آيات" الواقفة على باب الغرفة .. تقدمت منها "آيات" وقالت :

- ما شاء الله "إيمان" انتى بتصلى قيام على طول ؟

قالت "إيمان" مبتسمة :

- لا بصراحة مش على طول .. فى أيام مبصليش فيها قيام .. نفسى أواظب أوى

قالت "آيات" وهي تتر اليها بإعجاب :

- ما شاء الله عليكى .. تعرفى أنا مصلتش قيام خالص .. مصلتوش غير مرتين تلاته بس

قالت "إيمان" بحماس :

- ليه يا "آيات" .. على فكرة هتحسى براحة عجيبة وانت بتصلى قيام .. كفاية انك تعرفى ان ربنا سبحانه وتعالى بيتنزل الى السماء الدنيا فى التلت الأخير من الليل وبيقبل الدعاء فى الوقت ده

استشعرت "آيات" تلك الكلمات بقلها فأكملت "إيمان" بنفس الحماس :

- ربنا سبحانه وتعالى بيقول "أَقِمِ الصَّلَاةَ لِدُلُوكِ الشَّمْسِ إِلَى غَسَقِ اللَّيْلِ وَقُرْآنَ الْفَجْرِ إِنَّ قُرْآنَ الْفَجْرِ كَانَ مَشْهُودًا , وَمِنَ اللَّيْلِ فَتَهَجَّدْ بِهِ نَافِلَةً لَكَ عَسَى أَنْ يَبْعَثَكَ رَبُّكَ مَقَامًا مَّحْمُودًا " .. وكمان بيقول "أَمَّنْ هُوَ قَانَتْ أَنَاءَ اللَّيْلِ سَاجِدًا وَقَائِمًا يَحْذَرُ الْآخِرَةَ وَيَرْجُو رَحْمَةَ رَبِّهِ قُلْ هَلْ يَسْتَوِي الَّذِينَ يَعْلَمُونَ وَالَّذِينَ لَا يَعْلَمُونَ إِنَّمَا يَتَذَكَّرُ أُولُو الْأَلْبَابِ " .. وكمان بيقول "

إِنَّمَا يُؤْمِنُ بِآيَاتِنَا الَّذِينَ إِذَا ذُكِّرُوا بِهَا خَرُّوا سُجَّدًا وَسَبَّحُوا بِحَمْدِ رَبِّهِمْ وَهُمْ لَا يَسْتَكْبِرُونَ تَتَجَافَى جُنُوبُهُمْ عَنِ الْمَضَاجِعِ يَدْعُونَ رَبَّهُمْ خَوْفًا وَطَمَعًا وَمِمَّا رَزَقْنَاهُمْ يُنفِقُونَ فَلَا تَعْلَمُ نَفْسٌ مَّا أُخْفِيَ لَهُمْ مِنْ قُرَّةِ أَعْيُنٍ جَزَاءً بِمَا كَانُوا يَعْمَلُونَ " .. وفى آيات كتير أوى بتحت على قيام الليل .. كان النبي صلى الله عليه وسلم بيصلى قيام الليل لحد ما رجله تنورم .. فسألوا النبي ليه بيصلى كده رغم انه ربا غفرله ما تقدم وما تأخر من ذنبه فرد وقال:

"أفلا أكون عبدا شكورا" .. تعرفى كمان ان أمنا عائشه رضى الله عنها قالت عن النبي صلى الله عليه وسلم " لا يدع قيام الليل ، وكان إذا مرض أو كسل صلى قاعدا " .. تخيلى ده النبي اللى ربنا غفرله كل ذنوبه .. ما بالك احنا بأه بذنوبنا دى وبأعمالنا دى مش احنا برده أحوج لقيام الليل من النبي صلى الله عليه وسلم ؟

قالت "آيات" بتأثر :

- أكيد .. ده احنا عندنا بلاوى مش ذنوب .. على الأقل بتكلم عن نفسى
قالت "إيمان" :

- تعرفى ان النبي صلى الله عليه وسلم قال "من الليل ساعة لا يوافقها
عبد مسلم يسأل الله خيراً إلا أعطاه إياه , وهي كل ليلة " .. يعني كل ليلة
فى ساعة لو دعيتي فيها ربنا يستجيب لدعائك .. تخيلى باه واحنا بنام
ونسيب الساعة دى تضيع منا
عقد "آيات" ما بين حاجبيها وقالت :

- ياه ده احنا مقصرين أوى

نظرت اليها "إيمان" قائله :

- أنا كنت زيك كده يا "آيات" وأمر منك كمان .. بس "على" أخويا ربنا
يكرمه كان بيفضل يزن عليا ويتكلم معايا لحد مرة ورا مرة حسيت انى
بدأت أتغير من جوايا

نظرت اليها "آيات" وقالت بحماس مبتسمة :

- أنا كمان ان شاء الله هصلى قيام من بكرة

- من بكرة ليه متخليش الشيطان يعطلك .. اتوضى وصلى دلوقتى لسه
شوية على الفجر

توجهت "آيات" على الفور الى الحمام وتوضأت .. فرشت سجادة الصلاة
فى غرفتها وأمسكت مصحفها .. شعرت بسكينة وراحة وفرحة لا تدرى
سببها وهى تبدأ فى صلاتها .. وقفت تقرأ طويلاً الى أن بدأت تشعر بتعب
فى قدميها .. مر على خاطرها كلام "إيمان" عن تورم قدم النبي صلى الله
عليه وسلم الشريفتين .. فشعرت بسعادة فى قلبها .. شعرت بلذة هذا الألم
.. وخشع قلبها أكثر .. قال ابن رجب الحنبلي رحمه الله: "أصل الخشوع
لين القلب ورقته وسكونه وخضوعه وانكساره وحرقته، فإذا خشع القلب
تبعه خشوع جميع الجوارح والأعضاء، لأنها تابعة له " .. انتهت من
القيام لتخر ساجدة .. دعت الله كثيراً فى سجودها .. شعرت ولأول مرة
بلذة الطاعة .. صلت طوال عمرها .. لكنها لم تشعر من قبل بأن للصلاة
لذة لا يشعر بها الا من خشع قلبه وتعاضم اسم الله فى داخله .. لا يشعر بها
الا من فصل مشاعره وحواسه عن العالم من حوله .. ودخل الصلاة
مستشعراً كل حركة .. وأنه الآن واقف بين يدي الله .. ينظر اليه ..
ويسمعه .. بل ويشاركه صلاته ! .. قال رسول الله صلى الله عليه
وسلم: "إذا صليتم فلا تتلفتوا فإن الله ينصب وجهه لوجه عبده فى الصلاة
ما لم يلتفت " .. وقال صلى الله عليه وسلم : " قال الله عز وجل قسمت

الصلاة بيني وبين عبدي نصفين ولعبدى ما سأل، فإذا قال: الحمد لله رب العالمين قال الله: حمدني عبدي فإذا قال: الرحمن الرحيم، قال الله: أثني عليّ عبدي، فإذا قال: مالك يوم الدين، قال الله: مجّدي عبدي، فإذا قال: إياك نعبد وإياك نستعين، قال: هذا بيني وبين عبدي ولعبدى ما سأل، فإذا قال: إهدنا الصراط المستقيم، صراط الذين أنعمت عليهم غير المغضوب عليهم ولا الضالين، قال الله: هذا لعبدى ولعبدى ما سأل "

انتهت من صلاتها بعدما تنامى الى مسامعها آذان الفجر فقد سرقها الوقت ولم تشعر بدنوه .. جلست "آيات" فى مكانها تردد الأذان خلف المؤذن .. كانت تشعر براحة كبيرة فى نفسها وكأنها أمضت معاهدة سلام مع نفسها ومع العالم أجمع .. عاهدت نفسه ألا تترك القيام قط .. وأن تواظب عليه كل ليلة

فى الصباح .. توجه "زياد" الى مكتب "آدم" قائلاً :
- صباح الخير يا "آدم"
رد "آدم" التحية وهو يضع بعض الأغراض فى حقيبة .. نظر اليه "زياد" باستغراب وقال :
- بتعمل ايه ؟
أطرق "آدم" قليلاً ثم نظر الى "زياد" وقال بحزم :
- أنا خلاص يا "زياد" هسيب القرية دى .. أنا خلاص خدت قرارى ومش هرجع فيه
أوماً "زياد" برأسه وبدا غير مندهش .. وهذا ما أصاب "آدم" بالدهشة فقال :
- شكلك مش مستغرب يعنى .. مع انى متكلمتش معاك فى الموضوع ده .. ولا قولتلك انى ناوى أسيب الشغل فى القرية
ابتسم "زياد" بوهن وقال :
- أيوة متكلمتش بس أنا كنت حاسس انك هتعمل كده .. من يوم ما "شكرى" عرف بموضوع الخمرة واتكلم وزعق وأنا عارف انها كده
قفلت وانكوا مش هتتفقوا مع بعض
قال "آدم" بضيق :
- مش بس الخمرة .. رفض موضوع صالة الألعاب وأصر على الملهى .. ده غير القمار اللى بيحصل عيني عينك .. ده غير المناظر المقرفة كل شوية الواحد يتكعبل فيها .. حاولت أقنعه ومفيش فائدة .. وأنا خلاص

مش عايز أعد فى الأرف ده كفاية بأه
أوما "زياد" برأسه صامتاً فسأله "آدم" :

- وانت ناوى على ايه

- أصلاً يا "آدم" انا مكنتش مرتاح من البداية .. بس كنت محتاج اللي
يشجعنى عشان آخذ الخطوة دي .. وبقالى فترة عارف انك هتعمل كده
ثم قال :

- طبعاً رأيي من رأيك نبعد أحسن عن الأرف ده .. كفاية الاحساس بالذنب
اللى كان خائق الواحد وهو حاسس انه بيعمل حاجة غلط
قال "آدم" مبتسماً :

- كنت عارف على فكرة انك هتقول كده .. وانك هتسيب القرية زي
هتف "زياد" بحنق :

- تبقى تنفعه بأه خلي "شكرى" يشبع بيها وبالأرف اللي فيها
ثم قال :

- طيب وناوى تعمل ايه ؟ .. هترجع للجامعة تانى ؟
قال "آدم" بحيرة وهو يكمل جمع أغراضه :

- مش عارف .. لسه مقررتش
ثم نظر اليه قائلاً :

- وانت ناوى تعمل ايه
قال "زياد" بمرح :

- مش عارف .. لسه مقررتش
ابتسم "آدم" فأكمل "زياد" :

- هترجع القاهرة ؟

- أيوة .. بس مش هرجع الجامعة دلوقتي .. عايز أصفى ذهني من كل
حاجة .. محتاج أبعده عن كل حاجة فترة لحد ما أقرر أنا عايز أعمل ايه

- أجازة مفتوحة يعني

- أيوة بالطبط كده

- طيب قشطة أنا كمان هستجم .. الواحد اطحن الفترة اللي فاتت فى القرية
دي

ثم نظر الى "آدم" مستفهماً :

- صحيح ايه أخبار القرية الجديدة

- مش عارف .. كل اللي أعرفه ان الافتتاح بتاعهم كمان يومين

قال "آدم" بدهشة :

- ايه ده بالسرعة دي

- يا ابني ما أنا قايلك من أول يوم وهما شغالين الله ينور .. وكمان اللي سمعته انهم عمليين نظام جديد خالص .. سمعت انهم فصلين بين الرجالة الستات فى القرية وحطين قوانين فى اللبس
- قوانين فى اللبس ازاي يعنى ؟
- معرفش التفاصيل أنا مبقتش بتابع من يوم ما حسنت اننا خلاص أيامنا معدودة فى القرية دى
قال "آدم" وهو يفكر :
- شوقتنى أشوف القرية دى .. متيجى نروح الافتتاح بتاعهم
قال "زياد" بلا مبالاة :
- خلاص تعالى نروح
قال "آدم" بحماس :
- ماشى يبأه نحضر الافتتاح ونسافر على طول
صمت "آدم" وهو يفكر فيما قاله "زياد" عن الأنظمة والقوانين الجديدة التى لم يسمع بها من قبل والتى وضعها أصحاب القرية الجديدة .. شعر بفضول كبير لمعرفة تلك القوانين تفصيلاً والى رؤية سير العمل فى تلك القرية

اجتمع "كريم" و "على" و "آيات" و "إيمان" و "أسماء" معاً فى مكتب "كريم" .. التف الجميع حول الطاولة .. ترأس "كريم" الاجتماع وتحدث قائلاً :

- عايزين نحدد شغل كل واحدة فيكوا فى القرية
نظر الى "آيات" قائلاً :

- بالنسبة ليكى يا "آيات" هتكونى حلقة الوصل بيني وبين كل البنات اللي بتشتغل فى القرية يعنى انتى اللي هتتعاملى معاهم تعامل مباشرة مشاكلهم اقتراحاتهم كل حاجة خاصة بيهم هتكون معاكى انتى .. بالإضافة لمتابعتك لسير عملهم .. عارف انها شغلانه صعبة بس انتى أدها وكمان انتى الوحيدة اللي شايف انها تقدر تقوم بالهمة دى لان مش هيكون بيني وبينك حرج من أعادنا مع بعض وكلامنا .. يعنى انتى تعبرى نائبة ليا فى القرية ودراعى اليمين فى كل حاجة تتعلق بالبنات اللي شغالين فى القرية
ابتسمت "آيات" وقالت بحماس :

- تمام يا "كريم"

- يعنى مستعدة للموضوع ده

- أيوة مستعدة

قال برضا :

- طيب تمام .. نيجي للآنسة "أسماء"

نظرت اليه "أسماء" فتحدث اليها واضعاً عيناه فى الأوراق التى فى يده :

- حضرتك هتكونى مسؤلة عن أى مشكلة أو شكوى بتواجهها نزلاء

القرية من السيدات .. طبعاً لو كانت الشكاوى من أحد العاملات بالقرية

هترجعى فيها لـ "آيات" .. ولو كانت المشكلة متعلقة بعامل فى القرية

هترجعى فيها لـ "على" لأنه هو كمان يعتبر نائب ليا بس مهمته هو كل

العماله الرجال فى القرية .. هيكون مسؤل عنهم ومشرف عليهم بصفة

مباشرة ... شايفه انك تقدرى على المهمة دى ؟

قالت "أسماء" بتوتر :

- بصراحة انا خايفة لانى أول مرة أشتغل

قال "كريم" وهو مازال يتطلع الى أوراقه :

- على فكرة الموضوع مش صعب والا مكنتش رشحتك ليه وانتى بدون

خبره .. كل اللى مطلوب منه استقبال شكاوى النزلاء من السيدات ورائهم

وإما انك توجهيها لـ "آيات" أول "على"

صمتت قليلاً ثم قال بحماس وهى تنظر اليه :

- خلاص موافقة

- شايفه نفسك تقدرى تسدى فى الشغلانه دى

- أيوة ان شاء الله

- تمام .. نيجي للآنسة "إيمان"

توترت "إيمان" وحانت منها التفاته الى "على" ثم نظرت الى يديها

المتعرقتين من فركها اياهما بتوتر .. قال "كريم" :

- حضرتك هتشاركى فى الاشراف على صاله الألعاب الرياضية الخاصة

بالسيدات

شعرت "إيمان" بالإحمرار يغزو وجنتيها .. وقع كلامه على مسامعها

كإهاته لم تحتلمها .. لماذا اختارها هى بالذات لهذه المهمة .. لأنها ... !؟

.. شعرت بوخز الدموع فى عينيها .. لم تشعر بنفسها الا وهى تنهض

لتغادر غرفة المكتب وسط أعين الجميع المندهشة .. أغلقت الباب خلفها

لتنهمر دموعها كالمطر .. كتمت شهقاتها وتوجهت مسرعة الى المنزل ..

ران الصمت على الجميع وعيونهم معلقة بالباب الذى خرجت منه

"إيمان" .. التفت "كريم" لـ "آيات" قائلاً وهو مقطب الجبين :

- هو أنا قولت حاجة غلط

قالت "آيات" بدهشة :
- لا .. أنا معرفش هي مشيت ليه
قال "على" وهو ينهض :
- طيب أنا هروح أشوفها مالها
قالت "آيات" وهي تسارع بالنهوض :
- لا خليك هي أكيد راحت الشقة أنا هروحها
نهضت "أسماء" لتغادر بصحبة "آيات" .. فوجئت الاثنتان بـ "إيمان"
الباكية فى غرفتها .. قالت لها "آيات" بلهفة وهي تجلس بجوارها على
الفرش :
- "إيمان" مالك فى ايه
صاحت "إيمان" بحدة :
- أخوكى بيهزأنى يا "آيات"
نظرت اليها "آيات" بدهشة وهي تقول :
- ازاي يعني .. "كريم" ما قالش حاجة غلط ما احنا كنا أعدين وسامعين
قالت ودموعها مازالت تنهمر على وجهها :
- اشمعنى أنا اللي اختارنى عشان أشارك فى الاشراف على الجيم ..
اشمعنى يعني المكان ده .. ليه محطيش فى الاشراف على البسين .. أو
أى مكان تانى فى القرية
ثم صاحت بصوت باكى :
- قصده يعني انه يقولى انى تخينه ومحتاجه أخس .. هو ماله ومالى أنا
حره بأه أنا عجبني نفسى كدة
انخرطت فى بكاء حار .. تبادلت "آيات" مع "أسماء" النظرات المندهشة
.. اقتربت منها "أسماء" قائلة :
- "إيمان" انا واثقه انه مكنش يقصد كده
قالت بغضب :
- انا أصلا غلطانه انى جيت .. لو كنت أعرف انى هتهزأ كده مكنتش جيت
قالت "آيات" بحزم :
- "إيمان" انتى مكبرة الموضوع
- طبعاً هتدافعى عنه ما هو أخوكى
- لا مش بدافع عنه عشان أخويا بس أنا مش شايفه انه غلط لما حطك فى
الاشراف على الجيم .. عادى يعني
قالت "إيمان" بصرامة وهي تكفكف دموعها بظهر يدها :
- لأ مش عادى .. هو قصده يهزأنى ويحرجنى .. مش عارفه ليه .. بس

أكيد هو قاصد

صممت "آيات" وهي تتطلع اليها ثم قالت :

- على فكرة يا "إيمان" .. عارفه ايه مشكلتك ؟ .. مشكلتك انك مش حسه بأوثنتك .. وعلى طول فاقدة الثقة بنفسك

قالت "إيمان" بسخرية مريرة :

- أنوثة ايه يا بنتى .. انتى مش شايفه البرميل اللى أدامك

فوجئت "آيات" بـ "كريم" يتصل بها فقالت :

- "كريم" بيتصل

نظرت اليها "إيمان" بألم وكأنها تتذكر الجملة التى قالها منذ قليل والتى

أعدت اليها الشعور بالمهانه .. نهضت "آيات" وتوجهت الى غرفتها

وقالت :

- أيوة يا "كريم"

- السلام عليكم

- وعليك السلام

قال "كريم" باهتمام :

- خير .. عرفتى هى اضايقت ليه ؟

صممت "آيات" لا تدري ما تقول .. فحثها :

- "آيات" معايا

- أيوة معاك

- كلمتيها .. عرفتى هى اضايقت ليه ؟

قالت بتردد :

- انت ليه اخترتها هى بالذات عشان تمسك الجيم ؟

قال "كريم" باستغراب :

- يعني ايه اخترتها هى بالذات .. أنا حظيت كل واحدة فى مكانها اللى أنا

شايف انها هتكون مناسبه فيه .. وبعدين اقتراح انها تمسك الجيم ده كان

اقتراح "على" مش اقتراحى

قالت بدهشة :

- "على"

- أيوة .. قالى انها اشتركت كتير فى جيم قبل كده .. وفى أماكن مختلفه ..

وانها أكيد هتمون عارفه الألعاب كويس وتقدر تساعد البنات هناك ..

فشوفت كلامه مناسب .. بس هى دى كل القصة

- خلاص يا "كريم" هفهمها كده

- أمال هى فهمت ايه بالظبط ؟

قالت "آيات" بتردد :
- افكرتك قاصد تهزأها
قال بدهشة شديدة :
- لا حول ولا قوة الا بالله وأهزأها ليه ؟
- مفيش هي فهمت كده .. يعني عشان هي مليانه شوية افكرتك تقصد
تهزأها
قال "كريم" وقد تقطب جبينه في ضيق :
- ايه اللي يوصلها انها تفكر كده .. وأنا مالي أنا اذا كانت مليانه ولا رفيعه
.. واياه اللي يخليني أتريق عليها وأهزأها يعني وأنا معرفهاش أصلاً ..
وبعدين ههزأها أدام أخوها يعني .. تفكيرها غريب
- خلاص يا "كريم" بأه نقفل على الموضوع ده .. انا مش عايزاها تمشي
من هنا بجد محتجاها معايا
قال "كريم" بحده :
- يا بنتي أنا ما قولتش تمشي .. ده انتوا الستات عليكموا مخ الله المستعان
.. فهميها اللي أنا كنت أقصده بكلامي وان ده أصلاً اقتراح أخوها مش
اقتراحى .. وقوليلها ده شغل مش لعب عيال .. يعني لو في حاجة
مضايقاها تتكلم مش تمشي وتسبب الاجتماع كده
- طيب خلاص هقولها
تنهد قائلاً :
- طيب حلّى انتى المشكلة دى أنا فى دماغى مليون حاجة عشان الافتتاح
بتاع بكرة
- خلاص انت ربنا يعينك أنا هشوف الموضوع ده

- فهمتى بأه يا ستى .. يعني "على" اخوكى هو صاحب الفكرة مش
"كريم"
نظرت "إيمان" بخرج الى "آيات" وقالت :
- وقالك ايه تانى ؟
قالت "آيات" الجالس به جوارها على فراشها :
- قالى ده شغل مش لعب عيال مينفعش تسبب الاجتماع وتمشى كده
زفرت "إيمان" بضيق وهي تقول بصوت باكى :
- شكلى بأه زبالة أدامه
- لا يا بنتى لا زبالة ولا حاجة .. بس بطلى الحساسية دى

نظرت "آيات" ايلها بحزن وقالت :
- "إيمان" انتى ليه بتعملى فى نفسك كده .. انتى مش وحشة .. عارفه لو
خسيتى حبه صغيرين هتبقى قمر والله
قالت "إيمان" بتهكم :
- حبه صغيرين
قالت "آيات" بحماس وحزم :
- بصى أهم حاجة تبقى انتى راضية عن نفسك .. مش مهم تخسى كثير
ولا قليل المهم تبقى واقفة بتفرجى على نفسك فى المرايا وانتى حسه انك
مبسوطة .. وانتى حسه انك بنوته
تطلعت "إيمان" اليها بحزن فأكلت :
- يا بنتى لازم يبقى عندك ارادة أقوى من كده عشان تغيريى من نفسك ..
مشكلتك انك كارهه نفسك ومش حباها يا "إيمان"
تساقطت العبرات من عيني "إيمان" فنظرت اليها "آيات" بحنان وقالت :
- بتعيطى ليه دلوقتى
قالت "إيمان" وهى تبكى :
- عارفه يا "آيات" .. انا عمرى ما حسيت انى بنوته زى ما بتقولى ..
عارفه البنات فى ثانوى لما بيهتموا بنفسهم وبشعرهم وبجسمهم .. أنا
مكنتش كده .. كانت ماما دايمًا بتحسنى انى ولد مش بنوته ودلوعة .. لأ
.. تعرفى انها كانت بتخلينى ألبس لبس "على" فى البيت .. مكنتش بحب
أبص لنفسى فى المرايا .. هى برضه معذورة الظروف كانت على الأد ..
فكانت بتشتري من صغرنا لبس يليق عليا وعلى "على" .. عشان نلبسه
من بعض .. حتى فى ثانوى شراباتي اللى كنت بروح بيها المدرسة كانت
شرابات "على" .. كان صحابي بيتريقوا عليا عشان لابسه شرابات
رجالى .. بس مكنتش بتكلم ولا أقول لماما لانى عارفه ظروفنا فمكنتش
بحب أقولها اشتريلى ولا هتيلي .. كنت بتكسف .. وكنت فاكرة انى لما
هشتغل ويبقى معايا فلوس هجيب اللى نفسى فيه وأحس انى بنوته .. بس
لما كبرت حسبت ان فى حاجة ماتت جوايا .. حاجة محسسانى انى كائن
هلامى ملوش جنس محدد .. مش عارفه أهتم بنفسى زى أى بنت .. مش
عارف احس أصلا انى بنت .. لما بسمع البنات بتتكلم عن وصفة للشعر أو
لتنعيم الجسم بحس اكنى من عالم تانى .. بحس انى نفسى أكون زيهم
وأتكلم زيهم واهتم باللى بيهتموا بيه .. بس مش عارفه .. مش عارفه
أكون زيهم
قالت "آيات" وهى تشعر بحجم ما تعانيه "إيمان" من آلام حبستها

بداخلها :

- "إيمان" انتى مشكلتك الوحيدة هى عدم ثقتك بنفسك .. بجد انتى محتاجه شوية ثقه مش أكثر

ثم هتفت بمرح :

- وبعدين يا ستى لو كان على خلطات الشعر والبشرة فالبت "أسماء" دى فظيعة أستاذة خلطات .. بالليل هخليها تضربلنا كام خلطة من بتوعها وأهو الواحد يبقيه وشه منور فى حفلة بكرة صاحت "إيمان" بمرح وهى تمسح دموعها :

- لا يختى أنا مش هحط حاجة على وشى وخاصة "أسماء" اللى عملها نادت "آيات" "أسماء" فأتت .. قالت لها بمرح :

- "سمسم" متشوفيلنا خلطة من بتوعك تجهزيهاننا بالليل عشان نبقي مزز بكرة فى الحفلة

صاحت "أسماء" قائله بتهكم :

- يختى اتبلى .. اخوكى وأخوها قسموا الستات فى حته والرجالة فى حته .. حفلة ايه دى بس يا ربي اللى محشططين فيها كل نوع فى حته .. الناس بتروح الحفلات عشان تتشاف وتتخبط .. أخواتكوا انتوا الاتنين على فكرة خنقونى آخر خنقة

أطلقت "إيمان" و "آيات" الضحكات العالية فنظرت اليهما "أسماء" بغیظ وهى تقول :

- آه اضحكوا اضحكوا .. بكرة نلاقيهم مقسمين الهوا اللى فى القرية .. هوا للرجاله وهوا للستات .. واللى يشم من هوا التانى يقيموا عليه الحد قالت "إيمان" من بين ضحكاتها :

- والله انتى رهيبة يا "أسماء" .. لا بجد مسلية الواحد يتفرج عليكى بدل التليفزيون

ثم التفتت الى "آيات" قائله :

- هى من زمان كده

ضحكت "آيات" وهى تقول :

- آه للأسف من يوم ما عرفتها وهى صواميل مخها مفكوكه محتاجه تتربط

قالت "أسماء" بغیظ وهى تهم بمغادرة الغرفة :

- كده طيب مفيش ماسكات .. خليكوا معفين كده

نهضت "آيات" بسرعة وقبلتها قائله :

- لا يا "سمسم" مقدرش على زعلك .. متحرميناش من خلطاتك الرهيبة

.. حتى عشان البنت الغلبانه دى
- طيب على الله يطمر

عبرت سيارة "عاصى" بوابة قرية الماسة لتتوقف أمام المبنى الإدارى ..
خرج من سيارته ونظر حوله بأعين متفحصه .. اقترب من احد العاملين
وقال :

- لو سمحت ألاقى فين الأنسة "آيات" ؟

أشار له الى المبنى وقال :

- هتلاقيها فى مكتبها .. ولو ملقتهاش تبقى بتلف على الموظفين فى
القرية

دخل "عاصى" البناية وأخذ ينظر الى الأسماء المعلقة على الغرف حتى
وجد اسم "آيات" نظر اليه بسخرية ثم طرق الباب .. لم يسمع صوتاً
ففتحه ليجده فارغاً .. اقترب منه أحد العاملين وقال :

- حضرتك تؤمر بحاجة يا فندم

التفت اليه وقال بترفع :

- عايز الأنسة "آيات"

- هى مش موجودة فى مكتبها بس ممكن تسأل عنها الأستاذ "كريم"

قال "عاصى" وهو يرفع حاجبه :

- "كريم ضياء" مدير القرية ؟

- أيوة يا فندم .. ده مكتبه

أشار العامل الى المكتب .. فالتفت "عاصى" متوجهاً اليه دون أن يوجه

كلمة شكر الى العامل .. طرق الباب فأذن له "كريم" بالدخول .. دخل

"عاصى" يرمى عينيه فى محيط الغرفة .. وقف "كريم" قائلاً :

- اتفضل

نظر اليه "عاصى" بتهكم ممزوج بالدهشة لما رأى عليه من سمت

أدهشه .. سأل ليتأكد من هويته :

- انت "كريم ضياء" ؟

- أوية أنا يا فندم اتفضل

جلس "عاصى" ثم قال بتعالى :

- كنت عايز أقابل الأنسة "آيات اليمانى" .. ملقتهاش فى مكتبها وقالولى

أسألك عنها

ضاقت عينا "كريم" وهو ينظر الى "عاصى" قائلاً :

- وحضرتك مين ؟
- أنا "عاصى اليمانى" .. ابن عمها
- نظر اليه "كريم" متفحصاً ثم قال :
- مدير قرية الفيروز مش كده .. اهلا بيك
- وبيك .. ممكن تشوفلى هي فين ؟
- أخرج "كريم" هاتفه واتصل بـ "آيات" وطلب منها الحضور الى مكتبه ..
- شعرت "آيات" بالدهشة وهى تنظر الى "عاصى" الجالس فى مكتب
- "كريم" .. نظر اليها "عاصى" قائلاً :
- ازيك يا "آيات"
- قالت بإقتضاب :
- الحمد لله
- تعالى نتكلم بره شوية
- قال "كريم" بحزم :
- اتفضل اتكلم معاها هنا
- نظر اليه "عاصى" بحدة ثم قال بشئ من الغضب :
- عايز أقول لبنت عمى حاجة خاصة
- قال له "كريم" بصرامة :
- اللى انت عايز تقوله لأختى قوله أدامى
- نظر اليه "عاصى" بدهشة وقال بتهكم :
- أختك
- أيوة أختى .. "آيات" أختى فى الرضاعة .. اتفضل قولها اللى انت
- عايزه أدامى
- التفت "عاصى" الى "آيات" بحدته قائلة :
- قوليله ميتدخلش بيني وبينك .. عايز أكلمك لوحديك
- قالت "آيات" بحزم وهى تعقد ذراعيه فوق صدرها :
- اللى عايز تقوله قوله أدام "كريم" .. أنا مفيش بيني وبينك مواضيع
- خاصه
- اشتعل "عاصى" غضباً وصاح قائلاً :
- انتى ليه مصره كل شوية تتحديني .. انت مش عارفه أنا مين ولا ايه
- قالت بحزم :
- مفش داعى للكلام ده
- نظر اليها بغضب قائلاً :
- بصى يا بنت عمى .. من الاخر كده شغلك فى القرية دى ينتهى قبل

الافتتاح بتاع بكرة .. ومن بكرة هتيجي تشتغلي معنا في القرية بتاعتنا ده
لو انتى لسه محتاج لشغل لكن شغل فى القرية دى لأ
صاحت "آيات" بتهكم :

- يا سلام .. ده ايه الثقة دى .. انت ملكش حكم عليا انت فاهم .. مش من
حقك تقولى أعمل ايه ومعملش ايه

- لأ هقولك وهتسمى كلامى وإلا مش هيحصل كويس يا بنت عمى
وقف "كريم" ودار حول مكتبه ليقف أمام "عاصى" قائلاً بصرامة :
- كفاية لحد كده

رمق "عاصى" كيهما بنظرات غيظ ثم غادر المكتب .. زفر "كريم"
بضيق ثم قال :

- لو كان زود فى الكلام عن كده مكنتش قدرت أمسك أعصابى
قالت "آيات" بلامبالاة :

- سيبك منه

- أنا قبل كده سألت باباكى الله يرحمه ليه مقاطع أخوه وقالى ان فى
مشاكل بينهم وانهم ناس شغلها مش مطبوظ .. أول ما شوفت ابن عمك
دلوقتى مرتحتلوش نهائي .. له حق باباكى يبعد ويبعدك عنه
- خلاص انسى .. أهو عرف ان ملوش حكم عليا وان ليا أخ يقف جمبى

ويحمينى

نظر اليها "كريم" قائلاً :

- متخفيش منه

ابتسمت قائله :

- مش خايفه

صمت "كريم" لبرهه ثم نظر الى "آيات" وقال :

- "آيات" مش عايزك تحضرى افتتاح بكرة

قالت بضيق :

- ليه يا "كريم" نفسى أحضر الافتتاح

- أنا قلقان من ابن عمك

قالت "آيات" بحماس تبث فيه الطمأنينة :

- ميقدرش يعمل حاجه

تنهد قائلاً :

- خلاص ماشى وعامة كده كده القاعة هتبقى متقسمة تراييزات للرجال
وتراييزات للسيدات .. يعني مش هيقدر يدخل وسط الستات ويكلمك .. وأنا
هكون جمبك وعيني عليكى

عادت "آيات" الى عملها .. وتركت "كريم" يشعر بالقلق .. رغم الأمان الذي حاول أن يبثه في نفس "آيات" الى أنه فشل في أن يشعر به في داخله

الفصل الرابع والعشرون من رواية جواد بلا فارس



دخل "مدحت" بيته ليجد "مديحة" جالسه تبكى فوق الأريكة .. نظرت اليه ومسحت عبراتها وهي تحاول أن تتمالك نفسها .. اقترب منها وقال :
- في حاجة

نظرت اليه ورفعت حاجبها بسخرية قائله :

- ومن امتى بتهتم يعني اذا كان في حاجة ولا لأ
زفر بنفاد صبر وتوجه الى غرفة النوم لتبديل ثيابه .. توجه الى بعد ذلك الى المطبخ وفتح الثلاجة يبحث عن طعام ليسد به رمقه .. أغلق الثلاجة بعنف بعدما وجدها خاليه الا من بعض الطعام الفاسد أو الذي أوشك على الفساد .. توجه الى غرفة المعيشة حيث تجلس "مديحة" وقال بغضب
مكبوت :

- هو مفيش أكل

قالت وهي تفتح التلفاز :

- لأ مطبختش

- ليه مطبختيش

نظرت اليه بعناد قائله :

- مزاجي .. هو انت فاكرني الخدمة بتاعك .. مش احنا متفقين على
الطلاق .. أطبخلك بتاع ايه بأه .. انا لما بطبخ لنبفسى مش لبيك
ومكنش ليا مزاج النهاردة أطبخ
أطلق سبة بصوت منخفض وتوجه الى غرفة النوم يخرج هاتفه من جيب
بنطاله ليطلب الطعام من أحد المطاعم .. لحقت به "مديحة" وقالت :
- انت بتشتمنى ؟
نظر اليها بأعين تشع غيضاً وقال :
- "مديحة" غوري من أدامى دلوقتي
نظرت اليه بشئ من الإحتقار ثم توجهت الى غرفة "أسماء" التي
أصبحت غرفتها التي تقيم بها وأغلقت الباب بعنف .. اطلق "مدحت" سبة
أخرى وجلس ينتظر عامل التوصيل .. أحضر العامل الطعام فوضعه على
الطاولة وشعره فى تناول طعامه .. خرجت "مديحة" من الغرفة ونظرت
اليه بغيظ وقالت :
- طول عمرك أنانى .. طيب على الأقل شوف الكلبة اللي أعده جوه دى
عايزه تاكل ولا لأ
نظر اليه بغضب وصاح :
- مش قولتى اننا هنطلق وانك مش الخدمة بتاعتي عشان تطبخلى ..
أهو أنا بأه مش ولى أمرك عشان أصرف عليكى
صاحت قائله :
- طول عمرك كده وهتفضل كده مبتشوفتش نفسك غلطان أبداً .. دايماً أنا
اللى غلط وانت باشا مبتغلطش
قام من فوره وأزاح الكرسي الى الخلف بعنف حتى وقع على الأرض
وصاح :
- انتى بتقولى شكل للبيع .. انتى واحدة معنديش دم ولا ذرة احساس ..
سيبتي بنتك تضيع من ايدك والتبيبيبيبيبت ابن أختك يتحرش بيها ولا
فتحتى بقك بكلمة .. ده انتى أفضل أم وزوجة على وجه الأرض
- لآ أنت اللي زوج مثالى .. يا راجل يا شايب يا يالى رايح تتجوز واحده
أد بنتك .. أهى سبيتك زى التبيبيبيبيبت واطلقت منك
دفعها بقبضتيه فى كتفيها من شده غيظه وقال :
- أنا اللي طلقتها زى ما هطلقك وأرميكى فى الشارع تشحتى عشان تلاقى
لقمة نضيفه .. اما خلتيك تقولى حقى برقبتي مبقاش أنا "مدحت"
توجهت "مديحة" الى غرفة "أسماء" مرة أخرى وأغلقت الباب فى
وجهه بعنف شديد حتى كاد أن ينخلع من مكانه .. جلس "مدحت" أمام

الطاولة ثم ما لبث أن دفع الطعام بيده بعصبيه حتى تساقط وتناثر على الأرض

اتكأت والدة "آدم" على الأريكة وبيدها طبق من الأرز تنقى ما به من شوائب .. دخل "آدم" الشاليه واقترب منها قائلاً :
- ازيك يا ست الكل
ابتسمت فى وجه بطييه وقالت :
- ان شاله تسلم يا ابنى
جلس "آدم" بجوارها .. رآها تضيق من عينيها وهى تعاود النظر الى الطبق فى يدها .. انحنى الى الأمام وسألها باهتمام :
- ماما انتى حسه ان نظرك ضعف ولا حاجة
نظرت اليه وقالت وهى ترمش بعينيها :
- والله ما أنا عارفه يا ابنى بقيت أحس ان عيني مزغله
قال بجديه :
- طيب وليه ما قولتليش يا ماما
ثم قال :
- طيب سيبى ده دلوقتى وتعالى نكشف أكيد هتبقى محتاجه لنضاره
قالت بلا مبالاة :
- لا ملهاش لازمه .. مش مهم
نهض "آدم" وأخذ الطبق من يدها ووضعها على الطاولة وقال :
- مفيش حاجة اسمها ملهاش لازمه .. اذا مكنتش صحتك مهمة أمال ايه
اللى مهم يعنى
قالت وهى مازالت جالسها لا تريد النهوض :
- يا ابنى ما أنا شايفه أهو .. ملهاش لازمه النضارة
جذبها من يدها ووجهها الى غرفتها قائلاً :
- يلا ادخلى البسى يا ماما لو سمحتى
لاحت ابتسامه على شفيتها تشى بسعادتها لإهتمام "آدم" بها .. انطلق بسارته الى احدى عيادات العيون .. أثناء انتظار دورها فى الكشف مالت عليه وقالت وهى تتطلع الى وجهه بتمعن :
- انت كويس يا ابنى
التفت اليها وابتسم بوهن وقال :
- أيوة متقلقيش عليا
نظر اليه بحزن وقالت :

- انت ندمان انك سببت الشغل ؟

قال على الفور بثقة شديدة :

- لأ طبعاً مش ندمان أبداً

ثم أحاط كتفيها بذراعه وقربها منه قائلاً فى حنو :

- متقلقيش عليا .. أنا عارف انى هقدر أقف على رجلى تانى

قال وبقلب مخلص :

- ربنا يكرمك ويرزقك من وسع ويديلك على أد نيتك يا ابنى

قالت بحماس وبطيبة الأمهات المعهودة :

- عارف يا ابنى الحرام ده بياكل فى جسم الانسان وبيقفل بركة ماله

وصحته وعفيته .. لكن الحلال حتى لو كان قليل بس ربك بيبارك فيه ..

عارف يا "آدم" أبوك كان مرتبه قليل أوى أوى .. بس سبحان الله والله يا

ابنى عمرنا ما ممدينا ايدنا لحد .. كنا أول كل شهر نعد ن فكر ازاي هنقضى

الشهر بالمرتب الصغير ده .. بس سبحان الله كنا بنحس ببركة ربنا فى كل

حاجة وكان ربك بيسترها معانا لحد آخر الشهر وساعات كان يتبقى فلوس

كمان .. كنت آجى أشيلها ألقى أبوك الله يرحمه يقولى لازم نطلع منها

صدقة عشان ربنا يباركلنا فى مالنا وصحتنا وابنا "آدم" .. كنت ساعات

اقوله خليههم يمكن نحتاجهم فى وقت عوزه كان يقولى متقلقيش لو معاكى

10 جنية وطلعتى منها لله 5 جنية يتبقى كام ؟ .. كنت أقوله يتبقى 5 جنية

.. يقولى لا يتبقى 10 لأن الفلوس اللى بتطلعها لله مبتقلش المال أبدا دى

بتزود بركته

ابتسم "آدم" وهو ينظر الى أمه بتأثر .. قبل رأسها حتى انتبه اليه بعض

الجالسين فى العياده .. وقال لها وهو مازال محيطاً كتفيها بذراعه :

- ربنا يرحمه .. وبيبارك فيكي يا ماما .. انتى وبابا سبب اللى أنا فيه

دلوقتى .. لانكوا بعملكوا الطيب ربنا كافنكوا وهدانى .. لو مكنتوش انتوا

كده كان ممكن أفضل تايه طول عمرى

قبل رأسها مرة أخرى .. فنظرت اليهما احدى السيدات الجالسات بتأثر

وقالت :

- ربنا يخليهولك يا حجه

التفتت اليها أم "آدم" وهى تشعر بسعادة غامر من معاملة ابنها البارة

بها .. شعرت كأنها ملكته التى يدلها ويعتنى بها ويحث نفسه على نيل

رضاها .. ربتت على قدميه وقالت بإبتسامه واسعة :

- انشاله يارب

واجهت "أسماء" مشكلة مع أحد العاملين بالقرية فبحثت عن "على" الى أن وجدته واقفاً أمام أحد البوابة .. يتحدث الى أحد الحرس معطياً إياه بعض التعليمات .. اقتربت منه وقالت :

- لو سمحت يا أستاذ "على"

التفت اليها "على" ثم أخفض بصره وقال :

- ثوانى بعد اذنك

التفت الى الرجل وأنهى حديثه معه .. انصرف الرجل فالتفت اليها على ونظر الى الأرض قائلاً :

- اتفضلى

اقتربت منه "أسماء" لتريه المكتوب على احدى الورقات يديها .. غزى عطرها الفواح أنفه .. فابتعد خطوة الى الخلف .. نظرت اليه "أسماء" بشئ من الضيق وقالت :

- فى 2 من عمال البوفيه بتوع حفلة بكرة اعتذروا وطالبين أجاره بكرة وسلمونى طلبهم ده .. واحد تعبان والتانى مسافر وأنا مش عارفه هل نطلب اتنين غيرهم ولا الموجودين هيكفوا

قال "على" بهدوء وهو يأخذ منها الورقة ليقرأها :

- أصلاً دى مش شغلتك يا أنسة .. المفروض كانوا يجولى انا مباشرة نظرت اليه "أسماء" بضيق وظنت أنه يهمش دورها فقالت بتحدى :

- لأ دى شغلتى الأستاذ "كريم" قال كده

طوى "على" الورقة وعض على شفتيه قليلاً ثم قال بهدوء :

- حضرتك فهمتى كلام الأستاذ "كريم" غلط .. حضرتك مسؤلة عن

السائحات ومشاكلهم اللى بيوجهوها فى القرية لو كانت مع أحد الموظفين حضرتك بترجعلى .. ولو كانت مع إحدى الموظفين بترجعى للآنسة "آيات"

قالت بحنق وقد أيقنت أنها اساءت الفهم :

- طيب فهمت .. وبعدين اصلاً عامل البوفيه هو اللى جالى وسلمنى الورقة

وأنا جيت لحضرتك عشان معرفتش أتصرف

قال "على" بهدوء وهو يستعد للإنصراف :

- مفيش مشكلة .. بعد اذنك

غادر فى هدوء .. فالتفتت اليه "أسماء" ترمقه بنظراتها المتهكمة .. ثم

ما لبثت أن عادت الى عملها من جديد

قال بحنان :

- فرحتيني كنت قلقان عليكي

شعر "أحمد" بيدتبت على كتف فالتفت ليجد "كريم" .. ابتسم له فى

حرج وقال :

- ما شاء الله يا "كريم" المكان هنا روعة زى ما شوفته على السى دى

بالظبط .. قال "كريم" بهدوء وان كانت ملامحه تنم عن الضيق :

- الحمد لله انها عجبتك يا "أحمد" .. على فكرة باباك منتظر فى المكتب

.. "على" هياخذكوا على الأوضتين بتوعكوا

التفت "أحمد" الى "آيات" قبل أن ينصرف قائلاً :

- سلام يا "آيات" أشوفك بعدين

كادت "آيات" أن ترحل بدورها لكن "كريم" أوقفها .. نظرت اليه بحرج

وقالت :

- عارفه انك هتقولى انك مضايق ان "أحمد" كان واقف يتكلم معايا ..

بس هو اللي جه كلمنى وأنا يدوبك رديت على أد السؤال

صمت "كريم" وهو يتطلع اليها ثم قال :

- بصى يا "آيات" أنا ليا عنين وعقل بفكر بيه .. واضح جداً من نظرات

"أحمد" ليكي ومن اهتمامه بيكي انه حاسس بحاجة نحتيك

ارتبكت "آيات" ونظرت أرضاً وهى لا تجرؤ على اخباره بأنها تعلم ذلك

جيداً .. فأكمل "كريم" :

- أنا مقبلش ان راجل يبص لأختى كدة .. مركز عينه عليكي وواقف يتكلم

معاكى أكنه محرم ليكي .. مينفعش يا "آيات"

بلعت ريقها بصعوبة ونظرت اليه قائله :

- طيب خلاص هحاول معدتش هقف معاه تانى

أحاطت كتفيها بذراعه وسار بها فى اتجار البحر يمشى بخطى بطيئة ..

التفت اليها وقال بهدوء :

- بصى يا حبيبتي .. عايزك تعرفى انى بعمل كده عشان أحافظ عليكي .. أنا

أخوكى الكبير وانتي رعية ربنا ائتمنى عليها وهيسألنى عنها يوم القيامة

.. انتى لسه صغيرة وفى حاجات كتير ممكن تعملها ببراعة بس هى

بتكون غلط وغلط كبير كمان

أومات "آيات" برأسها وهى شاردت تنظر الى الرمل الذى تخطوه بقدميها

.. فأكمل "كريم" :

- مفيش حاجة اسمها صحوبيه بين ولد وبنت .. وأى ولد يقول لبنت احنا

صحاب واصدقاء والكلام ده يبقى بيضحك عليها وعلى نفسه .. لأن ميل

الذكر للأنثى والأنثى للذكر دى حاجة فطرية ربنا خلقتنا عليها
ثم قال :

- وبعدين أى اتنين بيقولوا انهم صحاب أكيد هتحصل بينهم تجاوزات
غصب عنهم .. زى مثلا انهم يبصوا لبعض ويركزوا نظرهم على بعض
وهما بيتكلموا .. ربنا سبحانه وتعالى بيقول "قل للمؤمنين يغضوا من
ابصارهم ويحفظوا فروجهم ذلك ازكى لهم ان الله خبير بما يصنعون *
وقل للمؤمنات يغضن من أبصارهن " .. يعني زى ما الراجل مأمور
بأنه يغض بصره .. البنت برده ربنا أمرها تغض بصرها
توقفا عن السير أمام الشط فالتفت اليها وأنزل ذراعه قائلاً بهدوء :
- وفى حاجة أنا لاحظتها فيكي يا "آيات" .. لما بتيجي تتكلمى مع
"أحمد" أو "على" أو أى راجل بتتكلمى وانتي بتبصيله
قالت "آيات" بتوتر وقد احمرت وجنتاها :
- بس أنا مببيقاش قصدى حاجة .. أنا ببص عادى يعني مش قصدى أركز
معاه

ابتسم "كريم" قائلاً :

- عارف انك مببيقاش قصدك حاجه وحشة .. بس برده مينفعش .. لان
ربنا هو اللى أمرك بكده .. حتى لو نيتك كويسة برده مينفعش
أطرقت "آيات" برأسها .. فقال "كريم" :
- النبي صلى الله عليه وسلم قال "ما تركت بعدى فتنة هي أضر على
الرجال من النساء" .. عشان كده ربنا أمر النساء وقالهم "لا تَخْضَعْنَ
بِالْقَوْلِ فَيَطْمَعَ الَّذِي فِي قَلْبِهِ مَرَضٌ" .. وأنا مش هقبل أن حد يطمع فى
أختى

أومات برأسها مرة أخرى وهى مازالت مطرقة .. ألقى "كريم" نظرة على
البحر أمامه ثم التفت اليها قائلاً :
- ساكته ليه .. اضايقتى من كلامى
نظرت اليه قائله بصدق :
- لا والله بالعكس .. أنا فرحانه انك بتنصحنى .. لأن فى حاجات كتير أنا
معرفهاش

ابتسم اليها وقال :

- لو فى اى حاجة حابه تعرفيها اسأليني فيها على طول
ابتسمت وقالت :

- ماشى

- يلا نرجع وانا شغل كتير .. حفلة بكرة تخرج أحسن ما يكون

عادا ادراجهما .. وعقل "آيات" شارداً فى كلمات "كريم" .. تعيدها فى رأسها مرة أخرى كشریط المسجل

فى المساء .. أطلقت "إيمان" ضحكة عالية وقالت وهى تنظر الى وجهها فى المرآة وقد كساه سائل لزج ذو لون أخضر :

- بقيت شبه الرجل الأخضر

ضحكت "آيات" الجالسه خلفها تضع على وجهها نفس السائل وقالت :

- معلىش اللى عايز الورد يتحمل شوكة

نظرت "إيمان" الى "أسماء" الذى اكتسى لونها هى الأخرى باللون

الأخضر وقالت بمرح :

- "أسماء" انتى حطه ايه فى البتاع ده .. عارفه لو اتشوهت هعمل فيكى ايه

قالت "أسماء" ضاحكة :

- يا ابنتى ما أنا و "آيات" حطين زيك أهو يعنى لو فى حاجه وحشة

مكناش حطيناه على وشنا

قالت "إيمان" وهى تجلس بجوارها :

- يعنى البتاع ده لما هشيله هبص فى المراية الأقى نفسى بقيت مزه

ضحكت "أسماء" وقالت :

- ليه هو أنا عمله خلطة سحرية .. قال مزه قال

نظرت اليها "إيمان" بغیظ .. فقالت "آيات" :

- أصلاً انتى يا "إيمان" بشرتك رايقه أوى ما شاء الله يعنى مش محتاجه

ماسكات خالص .. بس أهو تجربى معايا العك بتاع "أسماء"

قالت "أسماء" بغیظ :

- طالما عك طلبتى منى أعملهولك ليه .. زى القطط صحيح

ثم نظرت اليهما وقالت بحماس :

- شكل الحفلة دى هتبقى جامده .. ناس ستايل وأجانب بأه ورجاله

لووووووز

صاحت "إيمان" مستنكره :

- يخرب عقلك ايه رجالة لووووز دى .. خليتى ايه للولاد

قالت لها "أسماء" بمرح :

- خليكى انتى فى البتاع اللى حطاه على وشك ده .. كفاية عليا أخوكى

- ماله "على" بأه

- ممالوش يا ستي .. بس تحسبه عنده كلعيه أد كده .. شكله كان بيحب
واحد زمان وهي اللي كرهته فى الصنف
ضحكت "إيمان" وقالت :
- لا " على " مش كاره الصنف ولا حاجه
صاحت "أسماء" بإستنكار :
- أمال لو كان كاره كان عمل ايه .. ده بيتكلم من مناخيره وبالقطاره
بيحسنى انى بشحت منه مش بشتغل معاه .. على فكرة أخوكى بجد
مغرور أوى
قالت "إيمان" بجديه :
- لا والله " على " مش مغرور خالص بالعكس هو حد بسيط أوى
مطت "أسماء" شفيتها وقالت :
- معرفش .. بس أنا شيفاه مغرور
ثم نظرت الى "آيات" قائله :
- وأخوكى انتى كمان مغرور وشايف نفسه
ألقت عليها "آيات" الوسادة فأصابت وجهها وقالت :
- احترمي نفسك ومتقوليش على "كريم" كده
نظرت "أسماء" بأسى الى الوسادة التى اتسخت بالماسك وهتفت :
- بوظتيلي الماسك ربنا على الظالم والمفتري
قالت لها "آيات" بتشفى :
- أحسن عشان متتكلميش عن أخويا تانى
نهض "أسماء" بتبرم لتضع الماسك مرة أخرى على وجهها فأطلقت
"آيات" و "إيمان" الضحكات العالية وقالت "إيمان" بمرح :
- أحسن تستاهل

فى مساء يوم حفل افتتاح قرية الماسة .. استعد الجميع لهذا الحدث
الكبير .. بدا التوتر على البعض منهم .. وبد الحماس والتفاؤل على آخرين
.. كان الجميع يعمل كالنحل فى الخليه .. من أجل الخروج أمام الناس
والصحافة الإعلام بأفضل صورة لائقة ..
كانت قاعة الإحتفال من الداخل تحتوى على طاولات للنساء فى جهة
وطاولات للرجال فى الجهة الأخرى .. راقب "كريم" كل شئ بدأ من
جودة الطعام الى الفقرات الترفيهية والبيرزنتيش للتعريف بالقرية ..
وقف "على" أمام باب القاعة يرتدى حلة أنيقة يرحب بالرجال ويرشدهم

الى مكان القاعة .. ووقفت "أسماء" على بعد خطوات منه وقد ارتدت فستاناً أبرز بعض مفاتها وزينت وجهها بالمكياج .. ولفت حجابها الى الخلف حتى بدت رقبتها عارية من الأمام .. حانت منها التفاته الى "علي" الذي يقف بزواية مولياً اياها ظهره .. رفعت حاجبها في دهشة وهي تنظر الى سيارة "ساندى" التي توقفت على بعد خطوات لتهبط منها متوجهة الى القاعة .. تسمرت "ساندى" فى مكانها وهي ترى "أسماء" .. اقتربت منها قائلة :

- ايه ده "أسماء" .. مش "أسماء" برده ؟

أومأت "آيات" برأسها مبتسمة فسألته "ساندى" باستغراب وهي تراها واقفة على باب القاعة :

- ازيك يا أسماء بتعملى ايه هنا ؟

اتسعت ابتسامة "أسماء" وهي تقول بنعومة :

- هاى "ساندى" .. أنا بشتغل هنا

رفعت "ساندى" حاجبها فى دهشة فقالت "أسماء" بنظرات ماكرة :

- منورة قريننا يا "ساندى"

تجاهلت "ساندى" حديثها وتوجهت الى داخل القاعة .. نظرت بمزيج من

الدهشة والإمتعاض الى ترتيب الطاولات .. والى الصوانى المحملة

بالعصائر التي تُقدم للضيوف .. ألقّت نظرة سريعة ثم ما لبثت أن عادت

أدراجها وانطلقت بسيارتها الى خارج القرية

أقبلت احدى الزائرات فابتسمت "أسماء" فى وجهها ورحبت بها .. قالت

المرأة بإعجاب :

- القرية بتاعتكوا ممتازة .. أخذت جولة فيها بجد رائعة وكمان الأوفرز

اللى عاملينها هايله .. ربنا يوفقكوا

قالت "أسماء" بأدب :

- شكراً لحضرتك وان شاء الله نكون دائماً عند حسن ظنك

قالت المرأة بحماس :

- يا ترى فين مدير القرية أو حد من المسؤولين هنا .. عايزه أشكرهم

بنفسى

أشارت "أسماء" الى "علي" الذى كان مستمعاً الى الحوار وقالت :

- ده الأستاذ "علي" نائب مدير القرية

التفتت المرأة الى "علي" وقالت ببشاشة وهي تمد له يدها للمصافحة:

- أهلا بحضرتك .. بجد بحييكموا على المجهود العظيم ده

نظر "علي" الى يدها الممدومة ثم أبعد عينيه وقال بأدب :

- أهلا بحضرتك معلى أسف مبسلمش على ستات .. ان شاء الله تلاقى
الإقامة عندنا فى القرية ممتعة

تلاشت ابتسامه المرأة وأعدت يدها بجوارها ودخلت القاعة دون أن
تتفوه ببنت شفه .. زفرت "أسماء" بضيق وهى تتابع المرأة بعينها ثم
التفتت الى "على" قائله بحنق شديد :

- مكنش فيها حاجة يعنى لو سلمت عليها بدل ما تخرجها كده
أطرق "على" برأسه دون أن يجيب .. شعرت "أسماء" بالحنق أكثر
وهتفت :

- بقول مكنش فيها حاجة يعنى لو سلمت عليها بدل ما تخرجها كده
تمتم "على" بهدوء دون أن ينظر اليها :
- سمعتك

زاد رده من حنقها أكثر و أكثر .. فقالت بحده :
- طالما سمعت جاوبنى

قال "على" وهو يعقد حاجبيه بضيق وهو لا يزال ينظر أمامه دون أن
يلتفت اليها :

- حضرتك مسألتيش حاجة عشان أجابك
زفرت "أسماء" بحنق ونظرت أمامها صامته .. قال "على" فجأة بنبرات
هادئة :

- النبي صلى الله عليه وسلم قال " لئن يطعن في رأس أحدكم بمخيط من
حديد خير له من أن يمس امرأة لا تحل له " .. وأنا معنديش استعداد
أتحمل العذاب ده عشان أرضى واحدة أو محرجهاش
ظلت "أسماء" صامته .. حانت منها التفاته اليه لتجده يقف كما هو لا
ينظر اليها .. نظرت أمامها وقد بدا عليها الشرود .. فى تلك اللحظة أقبلت
"آيات" بصحبة "إيمان" فهتفت "أسماء" بتهكم :

- ما لسه بدرى

قالت "آيات" بعجالة :

- كان ورايا شوية حاجات بخلصها

التفت "على" وألقى نظرة رضا على ملابس أخته المحتشمة وعلى
وجهها الخالى من الزينه .. قالت "آيات" :

- ادخلى انتى يا "أسماء" .. هقف بدالك شوية

توجهت "أسماء" الى داخل القاعة بصحبة "إيمان" واهتمتا بالضيوف
بالداخل .. جالت "إيمان" بعيناها فى القاعة تتفحص المكان فوق نظرها
على "كريم" الذى يمر بين طاولات بخفة مرحباً بهذا وضاحكاً مع هذا ..

أشاحت بوجهها سريعاً وجلست على إحدى الطاولات
وقفت "آيات" ترحب بالنساء .. عندما تقدم منها "أحمد" بحلته الأنيقة
وعطره الراقى وقال مبتسماً :

- ايه الأخبار

قالت وهي تبعد عينيها عن وجهه متذكره كلمات "كريم" :

- تمام الحمد لله

نظر اليها قائلاً :

- لو تعبتى ادخلى وواحدة من البنات تقف مكانك

قالت على الفور دون ان تنظر اليه .. وقد بدأت تشعر بالضيق من تدخله

المتزايد فى شئونها :

- لا متعبتش

دلف "أحمد" الى داخل القاعة وقام بمهمة مجالسه الضيوف والترحيب

بهم شأنه شأن "كريم" الذى بدأ نجم الإحتفال بأناقة ملبسه وعذوبة

لسانه وبشاشة وجهه وثقته بنفسه وحديثه المرح

عدلت أم "آدم" من وضع عويناتها الجديدة فوق أنفها وتوجهت الى
غرفة ابنها تتطلع اليه وهو واقف أمام مرآته بحلته الأنيقة الفاخرة يصفف
شعره فى تودة فابتسمت قائلة :

- ربنا يحرسك من العين يا ابنى

ثم اقتربت منه ووضعت كفها على رأسه تقرأ له فاتحة الكتاب والمعوذتين

.. بعدما انتهت التفت اليها مبتسماً .. فقالت له :

- على فكرة أنا خلاص يا ابنى جهزت الشنط

قال لها وهو يتوجه الى الكمودينو يحمل هاتفه ومفاتيحه :

- تمام .. أنا مش هتأخر عليكى ان شاء الله يا ماما .. يعني كلها ساعة

ساعة ونص بالكثير

ثم نظر اليها وقال :

- برده مش عايزة تيجي معايا ؟

قالت وهي تجلس على فراشه :

- لا يا ابنى أنا مليش فى الحفلات والجوده .. انا هستناك هنا

قبل راسها وقال :

- طيب شغلى التليفزيون اتسلى فيه على ما أرجع .. وأنا هاخذ الشنط

دلوقتى أحطها فى العربية

حمل "آدم" الحقائب ووضعها فى حقيبة السيارة .. اتصل بـ "زياد" وهو

ينطلق بسارته وقال :
- ها انت فين .. انا فى الطريق
- وأنا كمان لسه طالع حالاً نتقابل هناك هستناك بره عشان ندخل سوا

- التفت "على" يقول لـ "آيات" وهو غاضباً بصره :
- خلاص كده أعتقد مفيش حد جاى بعد كده .. ندخل أحسن
دخلت "آيات" ولحق بها "على" .. توجهت الى طاولات النساء ترحب
بهن وتقدم لهن المشروبات الباردة المنعشة .. بدا على الجميع الرضا من
الأنظمة المتبعة فى القرية ولكن الأمر لم يخلو من بعض الإنتقادات
اللازمة !

توقفت سيارة "زياد" فى القرية وقبل أن يترجل من السيارة أتى "آدم"
بسيارته .. تصافح الصديقان وقال "زياد" وهو ينظر حوله متأملاً :
- يلا بينا ندخل نشوف الناس دى بتعمل ايه بالظبط ده أنا سمعت عن
قوانين غريبه عمر ما حد نفذها قبل كده
- يلا بينا

دخل الاثنان القاعة .. لأول وهله شعر كلاهما بالدهشة لوجود طاولات
مخصصه للنساء وأخرى للرجال .. وبد كل قسم مندمجاً وشبه مستقل عن
الآخر .. نظرا الى بعضهما البعض .. وتوجها الى طاولات الرجال .. أدار
"آدم" عينيه فى المكان متفحصاً وجوه الرجال .. وقع بصره على
"أحمد" .. فجأة صاح "زياد" قائلاً :
- مش ممكن

التفت اليه "آدم" ينظر اليه مستفهماً .. لكن "زياد" تركه وتوجه الى
"كريم" الذى كان واقفاً مع رجلين يتحدثون بمرح .. وقف أمامه قائلاً
بدهشة ممزوجة بالسعادة :
- "كريم ضياء" !

التفت "كريم" لينظر الى "زياد" ثم ما لبث أن اتسعت ابتسامته وصاح
قائلاً :

- "زياد" .. مش ممكن .. وحشنى أوى يا ابن الايه
تعانق الاثنان وكل منهما ينظر الى الآخر بسعادة .. صاح "زياد" :
- انت بتعمل ايه هنا ورجعت من النمسا امتى ؟
قال له "كريم" مبتسماً :

- رجعت من أقل من شهر .. وبعمل ايه هنا فسيادتك أنا مدير القرية

هتف "زياد" بدهشة :
- والله العظيم .. ده ايه الصدفة الجميلة دي
أشار "زياد" لـ "آدم" الذى تركه واقفاً على بعد خطوات .. أقبل "آدم"
ينظر الى "كريم" .. فقدم "زياد" كلاهما الى الآخر قائلاً :
- أعرفكوا ببعض .. "كريم ضياء" .. دكتور "آدم خطاب"
تصافح الرجلان ورحب كل منهما بالآخر .. قال "زياد" بمرح :
- "آدم" يا "كريم" يبقى أخويا وصحبي من واحنا صغيرين
ثم نظر الى "آدم" قائلاً :
- "كريم" اتعرفت عليه فى شرم لما كنت بشتغل فى القرية اللي هناك ..
راجل محترم جداً .. وآخر مرة شوفته فيها قبل سفره النمسا بأيام
ثم عادر ينظر الى "كريم" وهو يقول :
- وأهو رجع أهو وبأه مدير قرية الماسة
نظر اليه "آدم" بدهشة قائلاً وهو يتأمله بلحيته التى لم يرى من قبل مدير
قرية سياحيه يحملها :
- انت مدير القرية ؟
ابتسم "كريم" قائلاً :
- أيوة مدير القرية بس مش لوحدى معايا شريك .. "فؤاد"
- أيوة طبعاً أسمع عنه
فى تلك اللحظة اقترب "فؤاد" فعرف "كريم" كل منهم على الآخر ..
فرجع "فؤاد" حاجبيه قائلاً وهو ينظر الى "آدم" :
- "آدم خطاب" ! .. مدير قرية جولدن بيتش
قال "آدم" مصححاً :
- سابقاً : أنا و "زياد" سيبنا الشغل من يومين
نظر اليه "كريم" بدهشة وقال :
- مكنتش أعرف أنك سبتها
ثم نظر الى "زياد" وقال بدهشة :
- ولا كنت اعرف أنك بتتسغل فى جولدن بيتش
قال "زياد" بضيق :
- دي قرية ما يعلم بيها الا ربنا كويس اننا خلصنا من الشغل فيها
قال "كريم" باهتمام :
- نازلين فين دلوقتى ؟
قال "زياد" شارحاً :
- لا احنا راجعين النهاردة على القاهرة .. كان عندنا فضول بس نحضر

الافتتاح ونتفرج على القرية اللي الناس ملهاش سيرة غير عنها
ابتسم "كريم" مرحباً وقال :
- القرية وصحاب القرية تحت أمركوا
قدم لهما واجب الضيافة وهو يتطلع حوله خوفاً من حضور "عاصي" ..
حاول أن ينظر تجاه النساء للبحث عن "آيات" لكنه لم يجدها لأول وهله
فأشاح بوجهه

هتفت "آيات" بإستغراب :
- طيب ومشيت بسرعة ليه
قالت "أسماء" ساخره :
- أنا عارفه يدوبك دخلت دقيقة وخرجت تاني تتمخطر وركبت عربيتها
ومشيت
قالت "آيات" وهي تفكر:
- أكيد كانت جايه تشوف النظام ايه مش احنا نعتبر قرية منافسة لقرية
باباها
فكرت "آيات" بقلق .. ترى هل "ساندى" فقط من دفعها الفضول
لحضور الافتتاح .. أم أن "آدم" أيضاً لربما دفعه فضوله للحضور ..
نفضت تلك الفكرة من رأسها وهي تقول .. لا تقلقى نفسك يا "آيات" ..
وحتى لو حضر فلا شأن لك به .. تناست أفكارها واندمجت فى الحديث مع
احدى السيدات

وقف "آدم" ينظر بإعجاب شديد الى الشاشة التي تعرض صور للقرية
ولأنظمة العمل بها .. اقترب منه "كريم" قائلاً :
- يهمنى أعرف رأى شخص خبرة زيك يا دكتور
التفت اليه "آدم" وقال بإعجاب ظاهر :
- بصراحة ممتاز .. أفكار جريئة محدش نفذها قبل كده .. وفى نفس الوقت
تريح ضمير أى واحد شغال فى السياحة
ابتسم "كريم" قائلاً :
- وأنا سعيد ان ده رأيك يا دكتور
- بس انت دراستك ايه
ضحك "كريم" قائلاً :
- تقصد عشان الأنظمة اللي حطينها فى القرية والأفكار اللي نفذناها .. لا
كل دى اقتراحات أختى .. هى اللي قدمت المشروع وبعدها كلمتني عن

أفكارها وعجبتني جداً ودخلت شراكة مع الأستاذ "فؤاد"
قال "آدم" مبتسماً :

- بجد هايل ربنا يوفقكوا
بعد ما يقرب من الساعة استأذن "آدم" و "زياد" للإنصراف .. فهتف
"كريم" :

- بتهرج يا "زياد" ملحقناش نعد ما بعض
- هجيلك تانى أكيد هتروح منى فين
- طيب ابقى اعملها انت بس وانت عارف القرية تحت أمرك انت ودكتور
"آدم" .. منتظر ان شاء الله زيارة منكوا قريب عشان تشوفوها على
الطبيعه

قال "آدم" مصافحاً اياه :
- أكيد ان شاء الله هيبقى فيه زيارة تانية .. بس اعذرني عشان سايب
والدتي منتظراني فى الشاليه .. وعشان كمان السفر أدامنا 3 ساعات على
الطريق

قال "كريم" مودعاً اياهما :
- ربنا يحفظوا ان شاء الله .. اتشرفت بمعرفتك يا دكتور
ثم عانق "زياد" قائلاً :
- مستني زيارتك ان شاء الله
رحل "آدم" بصحبة "زياد" متوجهاً كل منهم الى سيارتهما

كانت "آيات" مندمجة فى الحديث مع احدى السيدات .. وفجأة ارتطمت
بها فتاة من الخلف .. فالتفتت الفتاة و "آيات" فى نفس الوقت ولترطم يد
الفتاة المحملة بكوب العصير بـ "آيات" ويتساقط العصير على ملابسها ..
صاحت الفتاة بخرج :

- أنا اسفة .. معلىش بجد أنا اسفة أوى
قالت "آيات" وهى تنظر الى ملابسها التى اتسخت بالعصير :
- لا أبداً ولا يهملك

قالت الفتاة وهى تخرج منايلها من حقيبتها وتمسح آثار العصير عن
ملابس "آيات" :

- أوف مش هيطلع .. طيب اعمله فى الحمام بماية وشوية وهتشف
نظرت اليها "آيات" مبتسمة وقالت :
- مفيش مشكلة هروح الشقة أغير
قالت الفتاة بأسف شديد :

- معلىش والله مخدتش بالى أنا أسفة مرة تانية

- لا أبدا ولا يهكم

التفتت "آيات" لتقابل "أسماء" التي تحاول كتم ضحكاتها وقالت :
- شكلك فظيع بالعصير المدلوق عليكي ده .. تخيلي لو حد من الصحفيين
صورك ونلقى بكرة صورتك ومكتوب فوقها بالبنت العريض .. احدى
المسؤولات فى قرية الماسة تسكب العصير على ملابسها كالأطفال
نظرت اليها "آيات" بغيظ وقالت :

- "أسماء" مش وقتك

قالت "أسماء" وهى مازالت تضحك :

- طيب روحى غيري هدومك بسرعة مش معقول هتقضى بقية الحفلة
بالمنظر ده

لم تجد "آيات" حلاً آخر فتوجهت تشق طريقها بين النساء

ما كاد يصل "زياد" الى سيارته حتى هتف :

- أوبس نسيت آخذ رقم "كريم"

نظر الى "آدم" قائلاً وهو ينصرف :

- ثوانى يا "آدم" هاخذ منه الرقم بسرعة وأجيلك

أوماً "آدم" برأسها ووقف واضعاً يديه فى جيب بنطاله يتطلع الى المكان
حوله منتظراً عودة "زياد" .. دخل "زياد" القاعة فكد أن يصطدم بـ
آيات" التى كانت تهم بالخروج .. رجع خطوة للخلف قائلاً :

- اتفضلى

خرجت "آيات" وهى تحاول بالمناديل مسح بقع العصير التى ترسبت
فوق ملابسها .. كانت عينا "آدم" تدور فى المكان .. ثم التفت ينظر الى
باب القاعة منتظراً خروج "زياد" .. توقف الزمن .. بل توقف كل شئ ..
توقف قلبه عن مهمته فى ضخ الدماء الى جسده .. وتوقفت رنتيه عن
امداد قلبه بالأكسجين .. وتوقف عقله عن التفكير .. لم تعمل سوى
عيناه التى تعلقت بتلك الفتاة الخارجة من القاعة .. اتسعت عيناه وهو
يراها تمر أمامه .. لم يتمكن من رؤية وجهها الا للحظة لكنها كانت كافيها
ليتعرف عليها .. عادت أجهزته للعمل ولكن بسرعة جنونية .. لم يشعر
بنفسه الا وهو يسرع الخطا ليلحق بها .. هتف بلوعة وبصوت مرتجف
وكأنه قادم من مكان سحيق :

- "آيات" !

توقفت .. لم يقل الا كلمة واحدة لكنها عرفت صوته .. وكيف تستطيع
نسيان ذلك الصوت التى كانت تستمتع اليه فى محاضراته بالساعات ..

حبست أنفاسها .. كرر ندائه .. الذى لم يكن نداءً بقدر ما كان استفهاماً
ملهوفاً ممزوج بالتعجب :

- "آيات" !

اضطرب تنفسها وتسارعت نبضات قلبها .. بلعت ريقها بعصوبة وأخذت
نفساً عميقاً لتلتفت ببطء وتقف فى مواجهته .. غارت عينا "آدم" فى
محجريهما وتحركتا بسرعة على وجهها بتفاصيله وكأنهما لا تصدقان ما
تراه أمامها .. هربت الدماء من وجهه وكأنه يرى شبحاص أمامه ..
اضطرب تنفسه بشدة وبدا كمن يجاهد ليبقى قلبه الذى يخفق بجنون
حبس صدره .. اقترب منها أكثر وقال بذهول ولهفة وجزع :

- آيات

بلعت "آيات" ريقها بصعوبة وهى تنظر اليه .. حاولت أن تفهم مشاعرها
فى تلك اللحظة فلم تستطع .. بدا وكأن قلبها وعقلها يتحدثان معها بلغة لا
تفهمها .. ثم .. استدارت لتغادر .. اندفع "آدم" بسرعة جاذباً اياها من
ذراعها .. التفتت تنظر اليه بدهشة واستنكار .. فأمسك بيده الأخرى
ذراعها الآخر وأدارها لمواجهته .. نظرت اليه بحدة وصاحت :

- سيبنى

لمعت الدموع فى عينيه وعلى شفثيه ابتسامة حائرة متردده وهو يقول
بصوت مضطرب :

- "آيات" .. انا مش مصدق

تحولت دهشتها وسكونها الى غضب .. حاولت جذب نفسها من بين يديه
اللمسكة بذراعيها وهى تصيح :

- بقولك سيبنى

لكن "آدم" تشبث بها بقوة لم يترك لها فرصة للإفلات من بين يديه
.. قربها منه أكثر واتسعت ابتسامته وهو يقول بصوت باكى وهو يتأملها
بلهفة :

- حبيبتي .. مش مصدق .. "آيات" أنا مش مصدق

جذبت نفسها للخلف وقد بدأت تشعر بالخوف منه .. صاحت قائلة بحزم :
- سيبنى لو سمحت

جذبت ذراعيها من يديه بعنف .. لم يتركها إلا ليمسك وجهها بين كفيه
يتحسسها كما لو كان يتأكد من أنها حقيقته .. قرب منها بوجهه قائلاً
بحيرة ولهفة :

- ازاي .. انتى مكنتش معاها .. افكرت معاها

تساقطت عبراته فوق وجنتيه وهو يقول بصوت باكى وهو يتذكر البناء

المنهار والحريق والجثة المتفحمة التي دفنها ظناً منه أنها "آيات" :
- افكرتك كنتى معاها .. "آيات"

صاحت بغضب وهى تحاول الابتعاد عن مرمى يديه :

- انت اتجننت .. سيبنى بقولك يا إما هنادى الأمن

بدا وكأنه لا يسمعها .. كل ما كانت ترسله حواسه الى عقله المضطرب هو

أن "آيات" على قيد الحياة وأنها واقفة أمامه الآن .. نظرت "آيات" اليه

وقد تزايد خوفها فضلاً ضيقها الشديد من اقترابه منها بهذا الشكل ..

حاولت ابعاده عنها بعنف شديد .. فنبهه عنفها الى حالة الخوف التى

اعترتها .. نظر اليها دهشة وقال وهو ممسك ذراعها يأبى أن يتركها :

- "آيات" براحه متخفيش

فى تلك اللحظة خرج "زياد" يبحث عن "آدم" .. صُدم عندما وجده واقفاً

على بعد عدة خطوات ممسكاً بفتاة تحاول افلات نفسها من بين يديه ..

لمحته "آيات" فصرخت له قائلة وهى تستجد به بلهفة :

- لو سمحت تعالى .. خليه يسيبنى

اقترب "زياد" فى دهشة وأمسك "آدم" يبعده عنها وهو يقول بإستغراب

مما يفعل صديقه :

- "آدم" سييها يا "آدم"

صرخت "آيات" بحده وقد تقطعت أنفاسها بعدما نجحت فى افلات ذراعها

من يده :

- انت معندكش دم ولا ذوق .. اياك تقرب منى تانى .. سامع

نظر اليها "آدم" مصدوماً وكأن عقله لا يستوعب كل ما يحدث وقال

بإضطراب :

- مكنش قصدى أخوفك .. بس انتى متعرفيش أنا .. أنا كنت هناك فى

القاهرة عند بيت

لم تتوقف "آيات" لتستمع الى حديثه بل أولته ظهرها وانطلقت فى

طريقها .. انطلق خلفها وجذبها مرة أخرى من ذراعها يوقفها فصرخت

وهى تعنفه قائلة :

- والله لو مسبتنى لهنادى الأمن أخليهم يرموك بره

لحق به "زياد" وجذبه الى الخلف وهو يصيح به :

- "آدم" .. مالك يا "آدم" .. سييها بأه متعملناش مشاكل .. "آدم" فوق

جذب "زياد" ذراعها من قبضة "آدم" المتشبثة بها بقوة .. وجذبه فى

اتجاه السيارة .. سار "آدم" للخلف وعيناه معلقتان بها وهى تجرى

مسرعة فى اتجاه شقتها .. نزع "آدم" نفسه من "زياد" وود أن يلحق

بها مرة أخرى .. فأوقفه "زياد" وصرخ به :
- "آدم" انت اتهللت .. انت فيه ايه
نظر اليه "آدم" ومازالت الدماء هاربة من وجهه وقال بأعين دامعة
وابتسامة مرتجفة :
- "آيات" يا "زياد" .. دي "آيات"
تجمد "زياد" فى مكانه للحظات ثم صاح :
- ازاي يعنى
قال "آدم" وقد اتسعت ابتسامته وقال بلهفة :
- بقولك هى .. ممانتش يا "زياد" .. "آيات" عايشة ممانتش
التفت "زياد" ينظر الى الاتجاه الذى ذهبت منه "آيات" ثم جذب صديقه
فى اتجاه السيارة .. توقف "آدم" قائلاً بحده :
- واخذنى على فين مش همشى .. أنا هروحها .. مش هسيبها
صاح به "زياد" بعنف :
- تروحها فين البنت مرعوبة منك لو طلبتك الأمن هتبقى مشكلة .. تعالى
نرجع الشالية وتهدى كدة وبعدين تفكر
بدا وكأن "آدم" لم يستمع اليه .. صاح مرة أخرى بسعادة :
- "آيات" عايشة يا "زياد" .. عايشة
ابتسم "زياد" وربت على كتفه وجذبه الى سيارته وسأله بقلق وهو يرى
تعبيرات وجهة الغريبة وتنفسه المضطرب :
- هتعرف تسوق ؟
أوماً "آدم" برأسه وعيناه متعلقة فى الاتجاه الذى غادرت منه .. انطلق
فى طريقه وقد اتسعت ابتسامته ودمعت عيناه بفرحة .. وخفق قلبه بجنون
.. وهو يتمتم بشفين مرتجفتين :
- "آيات" !



عادت "آيات" الى غرفتها وهي ترتعش بشدة .. وقلبا يخفق بقوة ..
توجهت الى النافذة تتأكد من كون "آدم" لم يتبعها .. جلست على فراشها
ومازالت يداها ترتعشان .. أعادت في عقلها ما حدث منذ قليل .. تملكها
شعور بالخوف والغضب في آن واحد .. خوف من أن يتعرض لها مرة
أخرى وظلت تتساءل في نفسها .. ماذا يريد .. لماذا تصرف هكذا .. يا
لجراته .. بل يا لوقاحته .. شعرت بالغضب من امساكه بها وقربه منها
على هذا النحو

لم تشعر الا والعبرات تتساقط فوق وجنتيها .. ماذا يظنني .. كيف يتعامل
معي بهذا الشكل .. أظنني سهلة الى هذه الدرجة .. يقترب مني وقتما شاء
وكيفما شاء .. كيف يجروني على الاقتراب مني ولمسى بهذا الشكل .. أبدلت
ملابسها بملابس النوم .. فلم تشعر في نفسها بأى رغبة في العودة للحفل
.. كانت تخشى أن تواجهه مرة أخرى .. وحتى وإن لم تواجهه .. لن
تستطيع التحدث مع أى شخص الآن .. فالشى الوحيد الذى تشعر به الآن
.. هو الرغبة فى البكاء .. لا تعرف تحديداً لماذا تبكى .. لكنها فقط كانت
تريد أن تبكى .. وبكت !

فتح "آدم" باب الشاليه ولحقه "زياد" .. استقبلته أمه قائله :
- خلاص يا حبيبي أنا جاهزة وتممت على كل حاجة فى الشاليه
لكنها فوجئت به يقبل عليها ويمسك كتفيها قائلاً وابتسامة واسعة على
محياء :

- "آيات" عايشه يا ماما .. مماتتش

اتسعت عينا أمه من الدهشة وقالت :

- بتقول ايه يا ابني

هزها بيديه وقال بحماس والسعادة فى عينيه :

- بقولك "آيات" .. الحمد لله عايشة .. شوفتها يا ماما

نقلت أمه نظرها بينه وبين "زياد" فقد ظنت أن حزنه عليها جعله يتخيل

رؤيتها .. قال "زياد" مبتسماً :

- شكلها فعلاً ممتتش .. واللى ماتت دى كانت واحدة تانية

التفت اليه "آدم" وقال بلهفة :

- أنا مش قادر أصبر عايز أروح أشوفها تانى وأتكلم معاها

قال "زياد" محذراً :

- اهدى شوية يا "آدم" .. البنت كانت هتطبلك الأمن .. مش عايزين

مشاكل

شهقت أم "آدم" قائلة :

- تطلبلك الأمن .. ليه يا ابني

قال "زياد" بمرح :

- ابنك لما شافها فضل ماسك فيها مش عايز يسيبها والبنت كانت يا عيني

مرعوبة ومخضوضة وده برضه متبت فيها بإيده وسنانه

ابتسم "آدم" قائلاً :

- أعمل ايه يعني .. كنت هتجنن لما شوفتها أدامى

ثم قال بحزن :

- بس مدتنيش أى فرصة أتكلم معاها .. ولا انى أشرحها أى حاجة

قال "زياد" مطمئناً آياه :

- متقلقش بكرة تتكلموا مع بعض وتقولها كل الكلام اللي جواك .. بس

اهدى كده واعقل عشان الأمور دى متتاخدش الا بالهداوة

لم يستطع "آدم" النوم .. ظل ممدداً فوق فراشه واضعاً اللاب توب فوق

قدميه يتأمل صورتها والابتسامه على شفثيه لا تغادرهما .. لم يصدق حتى

تلك اللحظة أن "آيات" مازالت على قيد الحياة .. تمنى أن يذهب اليها

ويتحدث معها فما كان يطيق هذا الانتظار .. لكنه خشى أن يسبب لها

المزيد من الخوف .. اختفت ابتسامته وهو يتذكر كيف كانت خائفه منه ..

فرعه .. تحاول افلات نفسها من بيد يديه بعنف .. تنهد وهو يعلم أن الأمر

لن يتم بسهولة .. فبالتأكيد مازالت تحمل له فى نفسها البغض والرفض ..

لكنه لن يدع الأمور على حالها .. يجب أن يقنعها بأنه تغير .. وأنه ترك كل

ما يغضب ربه .. وبأنه عاد مرة أخرى انساناً نقياً .. وأنه نادم على كل ما

فات .. تذكر جرمه فى حق نفسه .. وفى حق ربه .. فتساعل فى نفسه .. هل
تقبلت توبتى يارب .. هل عدت فعلاً انساناً نقياً .. هل أمازلت غاضباً على
.. شعر بالتكاسل لكنه أجبر نفسه على النهوض من فراشه .. توضأ
وصلى ركعتين لله عز وجل .. يستغفره فيها ويرجو مغفرته .. ويرجو أن
يقربه من "آيات" .. وأن تكون له دون سواه

جلس "عاصى" فى بار قريته .. فى احدى يديه كأساً وفى الأخر فتاة ! ..
رن هاتفه فرد بلهفه :

- ايه الأخبار

قال الشخص على الطرف الآخر :

- ازيك يا أستاذ "عاصى" .. الحلفة خلصت دلوقتى
سأله بإهتمام :

- ها ايه اللى حصل

- مفيش حفلة زى أى حفلة .. بس كانوا مقسمين الستات فى جهه

والرجال فى جهه عشان كده معرفش أدخل وسطهم وأدور على "آيات"
زفر "عاصى" بضيق قائلاً :

- وبعدين .. معملتش حاجة يعنى .. زى ما روحت زى ما جيت
قال الرجل :

- لا طبعاً ودى تيجي .. صحيح أنا معرفتش أدخلها صورة كدة ولا كدة

وهى جوه الحفلة .. بس لما طلعت خدلتها شوية صور فى الجون
سأله "عاصى" بلهفه وهو يبتعد عن الفتاة التى معه :

- ها كمل

قال الرجل بحماس :

- فى الأول افكرتها هتمشى وتسيب الحفلة .. فمشيت وراها .. ولما لقيت
واحد جاى نحيتها استخبيت وراقبتهم

- واحد مين ؟

- "آدم خطاب" اللى كان شغال فى جولدن بيتش

رفع "عاصى" حاجبيه قائلاً :

- كمل

- كان باين عليهم بيتخانقوا .. هو ماسكها وعازب يحضنها وهى بتزرق

فيه وبتبعد عنه .. بس خدت صورة فى الجوون مش واضح فيها انها
كانت بتزرقه أو بتحاول تبعد نفسها عنه

ضحك "عاصى" قائلاً :

- حلو أوى كده .. الصورة دى هتعمل بيها زى ما اتفقتنا

قال الرجل :

- متقلقش يا أستاذ "عاصى" .. بكرة الصبح هتلاقى الخبر منور من

الجرنال بتاعنا

شعر "عاصى" بالإنتصال ولمعت عيناه وهو يقول :

- أما نشوف أنا ولا انتى يا بنت عمى .. ابقى خلى أخوكى ينفحك

سمعت "آيات" ضحكات صديقتها تتعالى بعدما دخلنا البيت .. مسحت

دمعاتها المتساقطة على وجهها بظهر يدها .. سمعت "إيمان" تقول لـ

"أسماء" :

- شكلها نامت النور مطفى

قالت "أسماء" بمرح :

- هربت من الحفلة وسابتنا نتعجن لوحدنا

طرقت "أسماء" الباب ثم فتحته لـ .. تُصدم من وجه "آيات" الباكى ..

كانت جالسه فى منتصف فراشها الصغير وعينيها ممتلاتان بالدموع ..

أقبلت الفتاتان عليها وقال "إيمان" بدهشة :

- "آيات" انتى كنتى بتعيطى

جلست "أسماء" بجوارها قائله :

- مالك يا "آيات" حد ضايقك فى الحفلة ؟

قالت "آيات" بصوت مبجوح :

- شوفت "آدم"

قالت "أسماء" :

- دكتور "آدم" ؟ .. وبعدين .. كلمك ؟

أخذت تقص عليهما ما حدث بعدما غادرت الحفل .. فصاحت "أسماء"

بحنق :

- هو فاكّر نفسه ايه .. ازاي يعمل كده

قالت "إيمان" وهى تشعر بالغضب هى الأخرى :

- بجد راجل مش محترم

قالت "آيات" بصوت مرتجف وقد شعرت برغبة فى البكاء مرة أخرى :

- لما نادى عليا وشوفته محستش بأى حاجة .. عارفه أكنه واحد غريب

عنى معروفش .. لكن لما عمل معايا كده ومسكنى بالشكل ده بجد حسيت

انى بكرهه .. ازاي يتجرأ ويعمل كده
قالت "أسماء" بحيره :
- بس أنا مش فاهمة كان عايز منك ايه
قالت "آيات" بحدده :
- ولا أنا فاهمة .. كل اللي طالع عليه .. "انتى مكنتيش معاها" ..
مفهمتش هو بيقول ايه خوفت منه أوى شكله مكنش طبيعي خالص .. لولا
ان كان فى واحد خارج من القاعة وندتهله مكنتش عرفت أهرب منه
قالت "إيمان" بحزم :
- لازم تقولى لأخوكى يا "آيات" .. لازم يعرف ان فى معاكى راجل ..
ممكن يكون عمل كده عشان فاكرك لوحدك وملكيش حد
قالت "أسماء" باستغراب :
- أنا أصلاً مش فاهمة ليه يقرب منك كدة ويمسكك مش عايز يسيبك .. هو
عارف كويس أوى ان خلاص كدة الموضوع انتهى وكمان هو أصلاً
مكنش يبحبك .. ايه بأه اللهفة اللي ظهرت عليه فجأة دى
قالت "آيات" بحنق :
- معرفش ومش عايزة أعرف
سألته "أسماء" :
- هتقولى لأخوكى ؟
تهدت "آيات" قائله :
- أيوة بكرة ان شاء الله هعرفه بموضوع خطوبتى القدمة .. بس خايفة
أقوله على اللي حصل النهاردة يروح يتشاكل معاه
قالت "إيمان" بتشفى :
- أحسن خليه يتشاكل معاه عشان يتربى ويتعمل الأدب .. أنا اصلاً مش
عارفه انتى ليه ما قولتيش لأخوكى انك كنتى مخطوبة لـ "آدم"
قالت "آيات" بمرارة :
- مجتش فرصة للكلام وبعدين محبتش أتكلم فى الموضوع ده وأفتحته تانى
.. وكمان متخيلتش أبداً انه ممكن يبجي الحفلة أنى أشوفه .. أنا عارفه انه
فى قرية منافسه لينا فقولت مستحيل نتقابل أبداً
ربتت "أسماء" على قدمها قائله :
- طيب يا حبيبتي نامى دلوقتى وبكرة نفكر هنعمل ايه
حاولت "آيات" النوم لكن النوم خاصم جفونها .. ظلت مستيقظة حتى قبل
الفجر بقليل .. قامت وصلت ركعتى قيام الليل .. وصلت الفجر ووضعت
جسدها على فراشها وغطت فى نوم عميق

استيقظ "كريم" وخرج من غرفته ليرى أصوات في المطبخ .. توجه إليه ليرى "على" يعد الفطار .. فابتسم له قائلاً بصوت ناعس :
- صباح الخير يا "على"
التفت له "على" قائلاً :
- صباح النور

توجه "كريم" الى الحمام بينما أعد على الطاولة ووضع فوقها الطعام المعد .. فتح الباب وتناول الجرائد الموضوعه أمامه ثم وضعها فوق الطاولة .. التفت الاثنان حول طاولة الطعام فقال "على" :
- الحفلة كانت حلوة امبارح أنا شايف ان الناس كانت مبسوطه
قال "كريم" وهو يلوك الطعام في فمه :

- أنا برده شايف كده .. طبعاً كان في ناس مش عاجبها الوضع بس ده طبيعي .. لولا اختلاف الآراء لبارت السلع .. كل واحد بيدور على الحاجة اللي مناسبه له ولمبادئه ولتخليه مبسوط وضميره مرتاح
قال "على" وهو يتناول احدى الجرائد من فوق الطاولة :
- عجبني فكرة الجرايد اللي بتتوزع على كل القرية كل يوم الصبح
ابتسم "كريم" قائلاً :

- فكرة "آيات" .. ما شاء الله عليها دماغها جامدة
تجمدت نظرات "على" على أحد العناوين في الجريدة ثم ما لبث أن تغيرت ملامحه .. نظر اليه "كريم" بتمعن قائلاً :
- ايه ؟ .. متقولش بدأوا هجوم .. أصلاً دي حاجة متوقعة .. أكيد في ناس كتير مش هيعجبها الأسلوب المحترم اللي احنا شغالين بيه
بدا على "على" الوجود وهو يعطى الجريدة لـ "كريم" .. أخذ "كريم" الجريدة ونظر اليها ليتلقى الخبر الصاعقة .. تمتم يقرأه بصوت خافت :
- مشهد عاطفي يجمع بين مدير قرية جولدن بيتش السابق و شقيقة مدير قرية الماسة

امتقع وجه "كريم" واحتقنت به الدماء عندما رأى الصورة المنشورة تحت الخبر .. "آدم" ممسكاً بوجه "آيات" بكفيه مقترباً منها بوجهه وكلاهما ينظر الى عين الآخر .. أطرق "على" برأسه وقد أصابه الحزن لما يشعر به "كريم" الآن .. وضع نفسه موضع "كريم" فول كانت الصور المنشورة لـ "إيمان" أخته لكاد أن يجن الآن .. نهض "كريم"

دون أن يتفوه بكلمة وأحضر هاتفه واتصل بـ "آيات" وهو مازال ممسكاً
بالجريدة في يده
صاحت "أسماء" النائمة :

- "آيات" ردى على موبايلك أو افضليه
استيقظت "آيات" .. وشعرت بالتوتر لإتصال "كريم" .. ظنت انها يريد
أن يسألها لما غادرت الحفل مبكراً .. وستضطر الى أن تقص عليه كل
شء .. ردت قائلة :

- السلام عليكم .. أيوة يا "كريم"
سمعته يقول بحزم شديد :

- و عليكم السلام .. واقف مستنيكي أدام باب الشقة اطلعيلى فوراً
ازداد توتر "آيات" واضطرابها .. لماذا يتحدث اليها بجفاء هكذا .. ليس
معقولاً أن هذا بسبب مغادرتها الحفل مبكراً .. تمتمت وهى ترتدى اسدالها
:

- استر يارب

فتحت باب الشقة وهالها وجه "كريم" المحتقن .. خرجت وواربت الباب
خلفها ونظرت الي قائلة :

- خير يا "كريم"

رفع الجريدة أمام عينيها .. تجمدت الدماء فى عروقتها وبردت أطرافها
وهى تتطلع الى صورتها مع "آدم" والى العنوان الذى يشى بوجود علاقة
بينها وبينه .. شهقت بقوة وهى تضع كفها على فمها .. طوى "كريم"
الجريدة وأبعدها عن ناظريها وهو يقول بصرامة :

- أنا عايز أسمع منك انتى كمان قبل ما أروح أربي الكلب ده
ثم أغمض عينيهِ للحظة وتمتم بخفوت :

- أستغفر الله

تساقطت العبارات من عينيها .. ثم ما لبثت أن تعالت شهقاتها بالبكاء وهى
لا تصدق أن عرضها أصبح شئ يلاك فى الصحف وعلى ألسن الناس ..
أغمضت عينيها بشدة وجسدها يرتجف بقوة .. نظر اليها "كريم" بتمعن
.. ثم ما لبث أن جذبها لحضنه وهو يقول لها :

- فهميني يا "آيات" .. ازاي الصورة دى اتاخذت

لم تستطع الرد الا بمزيد من البكاء .. ربت على رأسها قائلاً :

- طيب اهدى .. اهدى عشان نعرف نتكلم

فى تلك اللحظة خرج "على" من السقة المجاورة وأشار الى "كريم"
قائلاً :

- ادخلوا هنا أنا نازل
جذبها "كريم" الى الشقة وأغلق الباب .. وجهها للجلوس على الأريكة
وجلس بجوارها وهي مازالت تبكى .. ربت على ظهرها قائلاً :
- ممكن تهدي شوية .. عايز أفهم منك اللي حصل .. عشان الموضوع ده
مستحيل أعديه بالساهل كده
توقفت عن البكاء وقالت بصوتها الباكي ووجهها الممتلئ بالعبرات :
- هو الل مسكنى غصب عنى ومكنش راضى يسيبنى .. أصلاً اللى
متعرفوش انه كان خطيبي
صمت "كريم" قليلاً من وقع الخبر عليه .. ثم بانفعال :
- ازاي يعنى .. "آيات" اتكلمى وقوليلى كل حاجه متخبيش عنى حاجة
صمتت "آيات" قليلاً لتتمالك نفهسا .. ثم .. قصت عليه كل شئ .. كل
شئ .. وانتهت بقولها :
- مكنتش فاكراه انى هيكون موجود فى الحفلة .. ولما نادى عليا افتكرته
هيحاول يتكلم بس .. لكنه مسكنى من دراعى ومكنش راضى يسيبنى
أمشى وفضل يقرب منى غصب عنى
انتهت من حديثها ورفعت عينيها تنظر الى "كريم" فلم تجد وجهه الا
محتقناً أكثر وفى عينيه نظرة غضب شديد .. أوقفها قائلاً :
- ارجعى انتى وأنا هتصرف
نظرت اليه بقلق قائله :
- هتعمل ايه ؟
قال بحزم وهو يسوقها الى شقتها :
- قولتلك هتصرف
عاد الى شقته وبدل ملابسه فى عجاله ومازالت نظرة الغضب فى عينيه ثم
توجه الى الخارج وهو يحمل هاتفه ومفاتيح سيارته .. اتصل بـ "على"
وقال :
- "على" هتعرف تتصرف النهاردة من غيرى ؟
سأله "على" بقلق :
- أيوة .. بس انت مش هتيجي الشغل يعنى ؟
قال "كريم" باقتضاب :
- مسافر القاهرة .. وهتابعك فى التليفون
- ماشى .. ترجع بالسلامة ان شاء الله
انطلق "كريم" يشق طريقه خارج القرية .. اتصل بـ "زياد" .. فلم يجد
اجابة .. حاول مرات ومرات الى أن استيقظ "زياد" من نومه وأجاب

بعينين نصف مفتوحتين :

- ألو

قال "كريم" بحزم :

- "زياد" قولى عنوان صحبتك

هرب النوم من عيني "زياد" وجلس على فراشه قائلاً :

- صحبى مين ؟

- دكتور "آدم"

قال "زياد" بقلق :

- ليه عايز عنوان فى ايه ؟

- أنا فى طريقي للقاهرة عايزه فى حاجه مهمة

شعر "زياد" بالتوتر .. هل من الممكن أن تشتكى "آيات" من "آدم" الى

"كريم" .. باعتباره مدير القرية والمسؤل عنها ! .. رد قائلاً :

- احنا مسفرناش يا "كريم" .. احنا هنا فى العين السخنة

- طيب ثوانى

أوقف "كريم" سيارته على جانب الطريق ثم قال :

- اديني رقم الشاليه بتاعه

أخبره "زياد" عن رقم الشاليه .. فأنهى "كريم" المكالمه سريعاً .. حاول

"زياد" الإتصال بـ "آدم" دون جدوى فارتدى ملابسه وتوجه الى الشاليه

يطرق بابه .. فتحت له والده "آدم" فسألها بلهفة :

- "آدم" هنا يا خالتي ؟

- أيوة يا ابني نايم جوه

انطلق "زياد" الى غرفة "آدم" ليوقظه قائلاً :

- "آدم" .. "آدم" قوم .. "آدم"

استيقظ "آدم" وهو ينظر الى "زياد" بدهشة .. ثم أغمض عينيه مرة

أخرى قائلاً :

- عايز بأه يا "زياد" .. أنا منمتش الا الصبح

قال "زياد" بقلق :

- "كريم" اتصل بيا وكان مسافرك على القاهرة وطلب منى عنوانك ..

قولتله اننا لسه هنا مسفرناش فطلب رقم الشاليه بتاعك

فتح "آدم" عينيه ونظر اليى "زياد" بدهشة وقال :

- مش فاهم .. كان هيسافرلى القاهرة ؟ .. ليه ؟

- مش عارف يا "آدم" بس مش مرتاح .. خايف تكون "آيات" دى

حاكتله على اللى حصل امبارح

- أخوها فى الرضاعة مش بالنسب .. دلوقتى منتظر منك اجابة لانى مش هعدى الموضوع ده بالساهل .. حتى اللى نشر الخبر ده لازم هيتعاقب على السب والقذف اللى عمله

تنهد "آدم" وهو يشعر بعلقه قد توقف عن العمل لا يستطيع التفكير بوضوح فمئذ الأمس وهوي تلقى الصدمات واحدة تلو الأخرى .. قال "زياد" محاولاً تهدئه الأمور :

- "آدم" مكنش قصده يا "كريم" .. هو بس انفعل لما شافها .. مكنش مصدق نفسه .. لأنه كان فاكرها ماتت قال "كريم" بدهشة شديدة :

- ماتت .. وايه اللى خلاه يفكرها ماتت

قال "آدم" بوهن وهو يشير الى الأريكة :

- اعد وأنا احكيلك

توجه "آدم" الى غرفته ليحضر شهادة الوفاة التى استخرجها لـ "آيات" .. والتى شعر "كريم" بالصدمة وهو يتطلع اليها .. ثم .. تحدث "آدم" ليخبره بجانبه من القصة .. ران الصمت طويلاً الى أن قال "آدم" بخجل :

- أنا آسف انى اتصرفت كده .. بس حط نفسك مكانى .. واحدة انت مستلمها من المشرحة ودافنها بإيدك وعملت لها شهادة وفاة وفجأة لقيتها أدامك .. غصب عنك مش هتعرف تتحكم فى مشاعرك ومش هتعرف تفكر بوضوح

تنهد "كريم" بضيق وهو يقول :

- المشكلة دلوقتى فى الخبر اللى انتشر ده

ظهر الغضب على وجه "آدم" وهو يقول :

- متقلقش أنا هعرف شغلى مع اللى عمل كده .. سيبهولى

قال "كريم" بحزم وهو ينهض :

- أنا هعذك بس عشان الكلام اللى قولته دلوقتى وعشام الموقف الصعب

اللى اتعرضتله .. بس مش هسمحك انك تقرب من أختى تانى .. الرابط

اللى كان بينكوا خلاص انتهى .. مش عايز أشوفك تضايقها تانى

ثم قال بغضب مكبوت :

- أما اللى نشر الكلام ده فأنا لازم أرفع عليه قضية سب وقذف

أوماً "آدم" برأسه وهو يقول بصرامة :

- معاك حق .. ارفع عليه القضية عشان يتربى على اللى عمله ده .. بس

أنا برده مش هسيبه

خرج "كريم" دون أن يضيف كلمة أخرى .. ألتقط "آدم" الجريدة التى

تركها "كريم" على الطاولة وأخذ يتطلع الى تفاصيل الخبر والتي كانت تتحدث عن علاقة خفيه بينهما .. امتقع وجهه والتفت يغادر الشاليه ..
لحق به "زياد" وهو يسأله :
- على فين يا "آدم"
قال وهو يركب سيارته بسرعة :
- رايح الجريدة اللي نشرت الخبر ده
انطلق "زياد" خلفه بسيارته .. كانت جريدة محلية لم يجد صعوبة في الوصول الى مقرها .. نزل "آدم" وهو يحمل بيده الجريدة وأخذ يسأل عن صاحب الاسم الموضوع في بداية المقال الى أن وجده .. دفعه "آدم" في كتفه وهو يهتف :
- ايه الكلام اللي انت نشرته ده
شعر الرجل بالخوف لأول وهلة ثم ما لبث أن قال :
- ايه .. خبر زى أى خبر
صاح "آدم" بعنف :
- الخبر ده تنزله تكذيب دلوقتي حالاً انت فاهم
قال الرجل ضاحكاً بسرخة :
- لا مش فاهم .. تكذيب ايه انت بتحلم
كان رد "آدم" وهو لكمة قمية سددها الى وجه الرجل مع تعالى صيحات الاستنكار من الجميع .. جذبه "زياد" قائلاً :
- خلاص يا "آدم" كفايه
ألقى "آدم" الجريدة فوق الرجل الملقى على الأرض وقال بإشمةزاز :
- أنا هعرفك ازاي تنشر خبر زى ده .. أنا والبنت اللي فى المقال هنرفع عليك قضيتين سب وقذف ومش هسيبك الا وانت محبوس
هم بأن يضربه مرة أخرى لكن "زياد" أحكم قبضته عليه وهو يجذبه الى خارج المبنى .. هتفت "زياد" قائلاً :
- مش هتجيبها لبر يا "آدم" .. مش هترتاح الا لما تجيب لنفسك مصيبة
ركب "آدم" سيارته وهو يشعر بالحمق الشديد فسأله "زياد" :
- رايح فين ؟
قال "آدم" وهو ينطلق فى طريقه :
- رايح فى داهية
أخذ ينطلق بسيارته لا يلوى على شئ وهو يفكر فى مدى الأذى الذى سببه الى "آيات" .. شعر بالضيق الشديد وهوي فكر فى حالها الآن بعد نشر هذا الخبر وهذه الصورة التى تجمعها بها .. زفر بضيق وضرب على

الموقد بقبضته بقوة شديدة وهو يهتف :
- الله يخربيتك كنت ناقصك انت كمان

- ايه اللي منشور فى الجرنال ده يا "آيات" ؟
شعرت "آيات" بالخجل الشديد وهى تستمع الى تلك العبارة عبر الهاتف ..
لم تكن تعلم أن المتصل هو "أحمد" والا ما كانت قامت البرد عيه ..
صمتت فحثها قائلاً بصوت غاضب :
- "آيات" قوليلي معناه ايه الكلام ده .. ازاي تتصوروا مع بعض كده ..
انتى رجعتيله تانى يا "آيات"
صاغت "آيات" بحنق :
- دى حاجة ملكش انك تتدخل فيها .. ولو سمحت أنا هقفل دلوقتى عشان
مش قادرة أتكلم
انفجرت "آيات" فى البكاء .. جلست "أسماء" بجوارها تطيب خاطره ..
دخلت "إيمان" حاملة كوب عصير لمون وأعطته الى "آيات" قائلة :
- اشربي ده يا حبيبتي
قالت "آيات" من بين بكائها :
- أنا عملت ايه عشان يحصلى ده كله .. ربنا يسامحه طلعلى منين ده
معرفش .. بسببه بقت الناس تتكلم عنى وسمعتى بقت زى الزفت
صاغت "أسماء" بقوة :
- محدش يقدر يتكلم عن سمعتك .. ده جرنال حقير أصلاً محدش بيصدق
كلام الجرايد
قالت "آيات" بصوت باكى :
- والصورة .. والصورة اللي منشورة .. لو مصدقوش الكلام الصورة
هتخليهم يصدقوا
زفرت "إيمان" بحنق شديد وهى تقول :
- الناس دى معندهاش دين ولا أخلاق ده قذف محصنات وخوض فى
الأعراض .. ربنا ينتقم منهم
قالت "آيات" وهى تحاول السيطرة على بكائها :
- اعمل ايه دلوقتى ؟ .. مش هقدر أطلع من البيت واشوف حد .. أكيد كل
اللى فى القرية شافوا الصورة
فى تلك اللحظة رن جرس الباب .. فارتدت "إيمان" اسالها وتوجهت
لفتحته .. خفق قلبها بقوة عندما وجدت "كريم" الذى خفض بصره بمجرد

أن رآها .. وكذلك فعلت هي ووقفت متوترة .. فقال بهدوء :

- لو سمحتى قولى لـ "آيات" تلبس وهستها تحت

قالت "إيمان" بصوت مضطرب :

- حاضر

نزل "كريم" ينتظرها بالأسفل .. عدة دقائق ووجدها أمامه تنظر يميناً

ويساراً .. قال وهو يشعر ينظر الى عينيها التي بدا عليهما آثار البكاء :

- انتى كويسة

ارتجفت شفاتها وأطرقت برأسها والدموع تتجمع فى عينيها من جديد ..

تنهد "كريم" بأسى وربت على كتفها قائلاً بحنان :

- متخفيش أنا هعرف أجيبك حقك منه .. كلمت المحامى بتاع أستاذ

"فؤاد" وان شاء الله هنمشى فى اجراءات القضية

رفعت "آيات" رأسها ونظرت اليه فى اضطراب .. شعرت بشئ من الحزن

والألم وهى تقول :

- بس الموضوع مش مستاهل قضية .. يعنى .. يعنى هو كده هيدخل

السجن ؟

قال "كريم" بحزم :

- ازاي مش مستاهل قضية يكتب عنك خبر زى ده وينشر صورة ليكي

ومن غير ما يتأكد من أى معلومة فى الخبر بتاعه .. لازم طبعا يتعاقب ده

قذف

قالت "آيات" وقد فهمت ما يعنيه :

- آه آه يستاهل طبعا .. أنا افكرتك بتكلم عن .. عن ... "آدم"

قال "كريم" وهو يتنهد بضيق :

- ده حكايته حكاية هو كمان

نظرت اليه قائله :

- ايه اللى حصل ؟ .. انت روحته ؟

قال "كريم" بتهكم :

- الأستاذ مطلعك شهادة وفاة

فغرت "آيات" فاها بدهشة .. فروى لها "كريم" ما سمعه من "آدم" ..

تجمعت الخيوط فى عقلها واستطاعت تفسير تصرفاته الغريبة ليلة أمس

وطريقته فى التعامل معها والتي أشعرتها وقتها بالخوف منه .. لم تستطع

انكار شعورها بالتفهم لمتصرفاته التي ضايقته بالأمس .. فبالتأكيد كانت

الصدمة شديدة عليه .. نظر اليها "كريم" بتمعن وقال :

- مش عايزك تشيلى هم حاجة .. خلاص أنا تكلمت معاه ومش هيقربلك

تانى .. والصحفى برده مش عايزك تشيليبى همه
التفت اليه وهى تقول بمرارة :
- بعد ايه .. الناس خلاص قرأت اللي موجود فى الجرنال انت ناسى ان
الجراید بتتوزع على القرية كلها .. يعنى كل الناس قراته
دمعت عيناها فقال لها بحنان :
- احتسبى يا "آيات" أجر الأذية دى .. انتى مش هتكونى أحسن من أم
المؤمنين عائشة اللي خاضوا فى عرضها .. وهى من هى .. وربنا سبحانه
وتعالى قال "إِنَّ الَّذِينَ جَاءُوا بِالْإِفْكِ عُصْبَةٌ مِنْكُمْ لَا تَحْسَبُوهُ شَرًّا لَكُمْ بَلْ
هُوَ خَيْرٌ لَكُمْ " .. قولى الحمد لله وادعى انه يرفع عنك البلاء ده ..
ومتقلقيش حتى لو متحاسبش فى الدنيا فربنا هيتولى عقابه فى الآخرة
تمتت "آيات" وهى تكفكف دمعها :
- الحمد لله

تمددت "آيات" على فراشها وهى تشرد فى كلام "كريم" الذى رواه لها
عن "آدم" وعن ظنه أنها فارقت الحياة .. تذكرت "آيات" نظرات عينيه
يوم أمس ولهفته عليها .. ودموعه التى كانت تملأ عينيه .. شعرت
بالدهشة .. لماذا يهتم بدفنها ودفن "حليمة" و باستخراج شهادة وفاة
لها .. لماذا شعر بهذه السعادة لدرجة أنه بكى عندما وجدها حية أمامه ..
لماذا هذا الإهتمام؟! .. ظل السؤال فى عقلها بلا اجابة

التفت "زياد" ليقول لـ "آدم" الجالس بجواره على الشط :
- "آدم" أنا رأى تسيب العين السخنة دلوقتى لأن بجد الدنيا مولعه على
الأخر
صمت "آدم" لبعض الوقت وهو ينظر الى البحر ثم قال :
- مش همشى
نظر اليه "زياد" قائلاً :
- طيب هتعمل ايه ؟ هتفضل آعد هنا فى قرية "شكرى" ؟
لمعت عينا "آدم" واحتفظ بصمته .. فهتف "زياد" :
- أنا مش حابب استنى فى القرية المقرفة دى
ثم أشار الى بعض الفتيات والشباب على بعد عدة أمتار منهما والذين
يلهون معاً بجرأة قائلاً :
- مش شايف المناظر .. الواحد حاسس انه فى مكان موبوء

ثم زفر بحده وقال :
- أنا خلاص قرفت بأه من الشغلانه دى .. حاسس بجد انى عايز أسيب
المكان ده .. انا بقالى سنين بشتغل فى السياحة لما جبت أخرى خلاص
قال " آدم " بنقه :
- متقلقش هلاقى حل
التفت اليه " زياد " قائلاً :
- حل ايه ؟
قال " آدم " وقد لمعت عيناه بلؤم :
- بكرة تعرف
ثم عاد ينظر الى البحر أمامه وهو عازم على التمسك بـ " آيات " بكل ما
أوتى من قوة

حاولت " آيات " فى الأيام التاليه اشغال نفسها بعملها ونسيان ما حدث ..
كانت تشعر بالحزن والألم عندما ترى اثنان ينظران اليها ثم تنحى احدهما
وتهمس فى أذن الأخرى .. لكنها حاولت أن تحتسب أجر ذلك البلاء الذى
وقع بها .. كانت تعمل بهمة ونشاط لكى ترهق عقلها وجسدها حتى لم يعد
لديها قدرة على التفكير فى همومها .. لكن السؤال عن سر اهتمام " آدم "
بها ظل فى رأسها بلا اجابة ..

مارست " إيمان " عملها المعتاد فى صالة الألعاب الرياضية .. كانت تشعر
بسعادة بالغة لممارسة هذا العمل لانه يشجعها على اللعب هى الأخرى
ومشاركة هؤلاء الفتيات فى محاولة انزال وزنها .. علمت منهم وصفات
مجربة فى فقدان الوزن وكونت مجموعة من الفتيات ليشجعوا بعضهن
البعض على السير على أحد الأنظمة الغناشية لفقدان الوزن .. وكانت هى
قائدة تلك المجموعة .. شعرت بالحماس الشديد فى مواصلة النظام الغذائي
هذه المرة .. فلکم بدأت فى الأنظمة والتي كان مصيرها الفشل الذريع لقلّة
حماستها ولقلّة عزيمتها .. اما هذه المرة فالأمر مختلف .. كانت ولأول
مرة منذ فترة طويلة تشعر بالسلام الداخلى مع نفسها .. وكأنها تصالحت
معها .. وبدأت فى النظر الى نفسها بشئ من الإيجابية .. انهدت كتابة
التقرير الإشرافى الذى طلبه " كريم " من كل مشرفى القرية وتسليمه له
فى نهاية كل اسبوع .. ذهبت فى اتجاه مكتبه تقدم قدماً وتؤخر الأخرى ..
لا تعلم لما يعترئها هذا التوتر الشديد كلما صادفته أو تحدثت معه ..

حاولت البحث عن "آيات" لإعطائها الملف لتسلمه بدلاً منها .. لأنها شعرت أنها لان تملك الجراة لموادته وخاصة بعدما حدث فى الإجتماع .. توجهت "آيات" الى مكتب "كريم" وسلمته تقرير "إيمان" عن صالة الألعاب الرياضية .. تفحص الملف بنظرة سريعة وقبل أن تغادر "آيات" أوقفها قائلاً :

- هى لسه مضايقة منى ؟

قالت "آيات" على الفور :

- لا بالعكس .. دى محرجة منك جداً .. عشان اللي حصل وانها فهمتك غلط فى الإجتماع
أوما "كريم" برأسه وغادرت "آيات" المكتب

أنهت "أسماء" عملها وشعرت بالإرهاق والجوع فتوجهت الى الإستراحة المخصصة للموظفين .. جلست على احدى الطاولات وبدأت فى تناول طعامها .. سمعت فتاتين فى الطاولة بخلفها تقول احدهما للاخرى :
- لا بس فى ناس محترمة برده
ردت الاخرى قائله :

- أيوة فى ناس محترمة بس اللي اسمه "على" ده راجل قليل الأدب
بيبص للبنات بصات وحشه واتحرش بيا قبل كده

انحشر الطعام فى حلق "أسماء" .. امتدت يدها الى كوب الماء وتناولت عدة رشقات منه وهى تسمع التاة تقول :

- معاكى حق أنا برده مبرتاحلوش خالص حتى بفكر نشتكيه للأستاذ
"كريم" .. هو راجل محترم وأكد هيمشيه
قال الفتاة :

- يا ستى مش عايزين مشاكل .. ممكن "على" ده يقول اننا بنتبلى عليه
وشكلنا احنا اللي هيكون وحش

بدا الدموع فى عيني "أسماء" وتجعد جبينها بقوة وهى تتذكر تحرشات "هانى" بها والتي كادت أن تنساها وتنسى كل ما حدث قبل قدومها الى القرية .. لكن ها هى تلك الذكريات الكريهة تعود لتطفو على سطح ذكرياتها مرة أخرى .. قامت من فورها وألقت نظرة على الفتاتان ثم توجهت منطقة كالسهم تبحث عن ... "على" !

كانت تشعر ببركان غضب بداخلها .. كادت أن تأتى بما فى معدتها وهى تتذكر اضطرارها للإستسلام لـ "هانى" بسبب خوفها وجبنها .. اعادت

كلمات الفتاة فى عقلها وشعورها بالخوف من الكلام والتحدث بما يحدث معها .. تخيلت "على" وهو يفعل مع الفتاة كما فعل "هانى" معها .. أخذ غضبها فى التزايد الى أن وصل لقمته .. ها هي وجدت مبتغاها .. "على" جالس على أحد المقاعد فى الحديقة .. انطلقت فى اتجاهه .. وقفت أمامه وهى تصرخ فيه بغضب هادر :

- عامل فيها راجل محترم .. هو ده بأه الدين اللى ربنا قال عليه نظر اليها "على" بدهشة شديدة وهو يحاول استيعاب ما تقول .. فأكملت بغضب :

- انت انسان حقير ومعدكش أخلاق وأنا مش هسكت أنا هقول لأستاذ "كريم" ولو معملش حاجة وطردك من هنا أنا هسيب القرية دى لان ميشرفنيش انى أشغل مع واحد سافل زيك قالت ذلك ثم غادرت مسرعة .. امتقع وجه "على" بشدة وهو يستمع الى تلك الكلمات التى انهالت بها عليه .. هب واقفاً وركض خلفها ثم وقف أمامها يمنعها من التحرك ونظر اليها بغضب قائلاً :

- ايه اللى انتى بتقوليه ده صاحت بغضب متهكمة :
- أيوة مثل مثل .. ما انت رائع أوى فى التمثيل .. انت عارف كويس أنا بتكلم عن ايه

كاد "على" أن يجن من حديثها واسلوبها فصاح بغضب :
- والله ما فاهم انتى بتتكلمى عن ايه بالظبط .. ولا فاهم انتى ليه بتشتمينى كده

قالت "أسماء" وهى تنظر اليه بإشمزاز :
- سمعت بنتين وهما بيتكلموا مع بعض فى الكافيتيريا عن اللى انت بتعمله فى البنات وتحرشاتك بيهم ونظراتك ليهم .. انت بجد انسان حقير أوى بجد .. وراسم نفسك وعامل انك محترم بس أهو ربنا كشفك على حقيقتك نظر اليها "على" بأعين تشع غضباً وهو يضم قبضتى يده بقوة حتى ابيضت أصابعه وهرب الدم منها .. قال بصرامة :

- والله العظيم لو مكنتيش بنت أنا كنت عرفت شغلى معاكى .. مين البنيتين اللى بتقولى انك سمعتيهم بيتكلموا عنى ؟

نظرت اليه "أسماء" وقد شعرت ببعض الخوف من نظرات عينيه الغاضبة فلم يسبق لها أن رآته غاضباً هكذا .. قالت بتوتر :

- أعدين فى الكافيتيريا

أشار لها بحزم أن تلحق به وقال :

- وريهملى
ذهبت معه فى اتجاه الكافيتريا .. حمدت الله أن الفتاتان مازلتا فى معقديهما
.. أشارت "أسماء" فى اتجاه طاولتهما فاتجه اليهما "على" .. بمجرد أن
رأوه توقفوا عن الكلام .. نظر اليهما "على" بغضب قائلاً وهو يحاول أن
يتحكم فى أعصابه :

- أنا عملت ايه بالظبط ؟ .. ايه اللي قولتوه عنى ؟
وقفت "أسماء" تراقب ما يحدث بإهتمام وقد عقدت ذراعيها أما صدرها
.. قالت احدى الفتيات بإرتباك :

- ما قولناش حاجة عنك يا أستاذ "على"
صاحت أسماء" بحده وقد ظنت الفتاة خائفة من "على" :

- متخفيش منه .. قولى اللي حصل
قالت الفتاة وهى تنظر الى "اسماء" بإستغراب :
- مفيش حاجة حصلت .. أنا متكلمتش على أستاذ "على" خالص
قالت "أسماء" بحدة وهى تقترب من الفتاة :
- ازاي يعنى أنا سمعتك بتقولى انه بيبيص للبنات بطريقة وحشه وانك
اتحرش بيكي

احمر وجه الفتاة بشدة وأطرقت برأسها وهى تقول :
- أنا مكنش قصدى الأستاذ "على" .. انا كان قصدى "على" اللي بيشتغل
فى الروم سيرفيس
اضطربت "أسماء" وهو تشعر بالخطأ الفادح الذى وقعت فيه .. قال
"على" بصرامة :
- اسمه ايه بالظبط ؟

أخبرته الفتاة عن اسمه كاملاً .. فطلب منها الحضور معه .. توجه بالفتاة
الى مكتب "كريم" وقصت الفتاة عليه ما حدث .. و طلبت حضور فتاة
أخرى والتي أكدت أن هذا هو ما حدث معها هى الأخرى .. لم يكن مصير
"على" هذا سوى الطرد من القرية .. فرحل وهو مطرق الرأس بعدما
سمع تعنيفاً شديداً من كل من "كريم" و "على" .. خرج "على" من
مكتب "كريم" بعد انتهاء المشكلة متوجهاً الى شقته .. ما كاد يصل الى
البناية حتى وجد "أسماء" واقفة أسفلها وقد بدا عليها التوتر .. تجاهلها
تماماً وأطرق برأسه وهو يهم بدخول البناية لكنها أوقفته قائلاً :
- لو سمحت

توقف دون أن ينظر اليها .. صمتت لبرهه ثم قالت بإضطراب :
- أنا آسفة

لم يتحدث بشئ .. فأكملت :

- لما سمعتها بتقول "على" .. افكرت انها تقصدك انت

قال "على" بهدوء :

- كان لازم تتأكدى الأول قبل ما توجهيلى الاتهام .. "يا أيها الذين آمنوا

إن جاءكم فاسق بنبأ فتبينوا أن تُصيبوا قوماً بجهالةٍ فتصبحوا على ما

فَعَلْتُمْ نَادِمِينَ" .. وانتى متبينتيش انتى هاجمتى على طول

قالت بحده :

- قولت خلاص أنا آسفة .. أنا لما سمعت كده حسيت ان دمي اتحرق لان

الموقف ده صعب ان أى بنت تتعرضله .. عشان كده اتكلمت معاك

بالاسلوب ده

صمت "على" لبرهه ثم أخذ نفساً عميقاً وقال بهدوء دون أن ينظر اليها :

- أنا مش ممكن اعمل كده أبداً .. مش ممكن هأذى بنت لا بلمسة ولا بكلمة

ولا حتى بنظرة لانى عارف كويس ان كما تدين تدان .. لو عملت كده فى

أى بنت أكيد فى يوم من الأيام ربنا هيردهالى فى أختى أو أمى أو مراتى

لما أتجوز .. عشان كده أنا بخاف أعمل أى حاجة غلط مع أى بنت وبحافظ

عليهم أكنهم اخواتى .. مش عشان بس خايف من عقاب ربنا .. لأ ..

عشان ربنا يحافظلى على الانسانه اللى هتكون مراتى

دخل "على" البناية .. ظلت "اسماء" واقفة وقد شعرت بوخزات الدموع

فى عينيها .. تؤلمها وتحرقها .. حاولت السيطرة على نفسها فلم تستطيع

.. حاولت وقف عبراتها ومنعها من الإتهام فلم تستطع .. حاولت التحرك

من مكانها فلم تستطع .. ما كانت تشعر به بداخلها شل حركتها تماماً ..

تساقطت على وجنتيها العبرات ساخنة حارقه .. ثم التفتت تنظر الى

البوابه الخالية والتي عبر منها "على" منذ قليل .. ولأول مرة فى حياتها

.. شعرت بقلبها يخفق بطريقة لم تعهدها من قبل !

جواد بلا فارس

بقلمي : بنوثة أسمره



وقفت "آيات" فى شرفة غرفتها تراقب مجموعة من الأطفال يلعبون بالكرة .. ابتسمت وهى ترى تلك البراعة التى يتعاملون بها مع الحياة .. وتلك الإبتسامه التى تملو شفتى كل منهم فلا أحمال تثقل كتفهم ولا هموم تشغل عقلهم .. فقط اللعب والمرح والضحك .. تمنى أن تعود طفلة مثلهم تلهو وتلعب وتمرح ولا تعرف عن الحياة ما تعرفه الآن .. ليبتها تعود الى بيتها القديم فى كنف والدها الحبيب تنعم بالراحه والأمان .. يخلو قلبها من الهموم والأحزان .. لكن كيف السبيل للعودة .. لو كانت العودة ممكنه لتمنينا جميعاً أن نبقى صغاراً ولما تجاوز أحدنا مرحلة الطفولة قط !

لماذا تلك القسوة .. لما يؤذى الناس بعضهم البعض هكذا .. لما شخص لا يعرفك يؤذيك ويخوض فى عرضك .. ماذا جنى؟! .. تنهدت فى حسره وهى تفكر فى أن الأذى الذى تعرضت له من القريب .. كان أقوى وأشد مرارة من الأذى الذى تتعرض له الآن .. لأن الضربة من القريب مؤلمة وموجعة أكثر .. انتبهت لنفسها ولأفكارها قائله .. لماذا تتذكره .. اتركى أيامه بكل ما فيها .. لا يستحق حتى العتاب ! .. قفز الى عقلها ذلك السؤال الذى لم تجد اجابته بعد .. لماذا اهتم بالبحث عنها وبدفنها وبإستخراج شهادة وفاتها .. لماذا تلك الحالة الغريبة التى بدا عليها بمجرد أن رآها .. تتذكر جيداً الدموع التى لمعت فى عينيه وتساقطت على وجهه وهو يتمتم بإسمها بشفتين مرتجفتين .. تذكر تحسسه لوجهها وهو يأبى أن يتركها أو يفلتها من بين يديه .. اقشعر جسدها فحركت رأسها يميناً ويساراً وكأنها تنفض منه تلك الافكار وتلك الاسئلة ! .. فمهما كان السبب الذى دفعه لذلك .. فلا شأن لها به !

أوقف "آدم" سيارته داخل قرية "الماسة" .. نظر حوله يتلفت يميناً ويساراً عله يراها .. لكن محاولاته باءت بالفشل .. سأل على مكتب "كريم" ثم توجه اليه .. ظهر الضيق على وجه "كريم" وهو يتطلع الى "آدم" لكنه وقف ورحب به قائلاً :

- أهلاً بيك يا دكتور

ابتسم "آدم" بتوتر وقال :

- أهلاً بيك يا أستاذ "كريم"

أشار "كريم" الى أحد المقاعد أمام المكتب قائلاً :

- اتفضل

جلس "آدم" وبدأ عليه الإضطراب قليلاً ثم ما لبث أن ابتدأ حديثه قائلاً :

- أنا حبيت أعتذر مرة ثانية عن اللي حصل بسببي لـ "آيات"

قال "كريم" بإقتضاب وهو يقطب جبينه :

- خلاص حصل خير .. انا بدأت فعلاً فى اجراءات القضية .. وان شاء الله

يكون فى جلسة قريب

قال "آدم" بحماس :

- وأنا كمان رفعت قضية على الصفحى وعلى الجريدة .. يعني كده هيبقوا

قضيتين مش قضية واحدة

أوماً "كريم" برأسه .. فنظر اليه "آدم" قائلاً فجأة :

- أنا عارف انها اكيد حكتك كل حاجة عنى .. بس أنا اتغيرت كثير

عقد "كريم" حاجبيه وهو يقول بحزم دون أن ينظر اليه :

- ملوش لازمة الكلام ده يا دكتور .. حياتك الخاصة تخصك لوحدك

تنهد "آدم" بأسى قائلاً :

- طيب أنا مش تكلم فى حاجة فانت دلوقتي .. بس كل اللي يهمنى انك

تعرفه انى مستحيل أذى "آيات" بأى شكل من الأشكال .. ومش هسمح

لحد انه يأذيها أبداً

أطرق "كريم" برأسه صامتاً .. فأكمل "آدم" قائلاً :

- المهم دلوقتي واللى أنا جايلك عشان .. هو شهادة الوفاة اللي أنا طلعتها

لـ "آيات"

رفع "كريم" رأسها ونظر اليه وقال شارداً :

- أنا برده كنت قلقان من الموضوع ده .. الشهادة دي لازم تتلغى .. أنا

هكلم المحامى واشوف ايه الإجراءات اللي المفروض نعملها لأن "آيات"

دلوقتي قانوناً متوفيه

- أنا كلمت المحامى بتاعى اللي ماشى فى اجراءات القضية .. وقالى على

الخطوات اللى لازم نعملها .. لازم أكون موجود لاني أنا اللى طلعت شهادة الوفاة .. وكمان "آيات" .. وحد يضمنها

قال "كريم" :

- طيب تمام .. هشوف نقدر نساافر امتى وأبلغ حضرتك يا دكتور
قال "آدم" بحماس وهو يخرج احدى الكروت الشخصية من جيبه ويقدمه الى "كريم" :

- وأنا جاهز فى أى وقت .. كلمنى بس على الموبايل وقولى المعاد المناسب ليكوا

تناول "كريم" الكارت منه ووضعها فوق المكتب قائلاً :
تمام

نهض "آدم" قائلاً :

- بعد اذنك

خرج "آدم" من مكتب "كريم" .. لم يشأ الخروج من القرية .. مجرد معرفته بأن "آيات" فى هذه القرية يجعله يشعر بأنه قريباً منها .. أخذ يدور فى القرية يتأملها بأعين الإعجاب .. راقته له التطورات التى أدخلها "كريم" على القرية .. توجه الى البحر .. رفع حاجبيه بدهشة وهو يرى النساء جالسات بدون أن يرتدين ملابس البحر .. فمن المعروف أن شواطئ القرى السياحية الكبرى غير مسموح بالتواجد على الشط بدون ملابس البحر .. ظل يتمشى بمحاذاة البحر وهو يشعر بسكينة وراحة لم يشعر بهما فى مكان آخر .. عاد أدراجه وهو يدور بعينيه فى القرية لا ييأس من البحث عنها .. رآها .. جالسه على أحد المقاعد تعقد ذراعيها أمام صدرها .. شارده .. تنظر أمامها .. عاقدة حاجبيها .. اقترب منها .. رغباً عنه لاحت ابتسامه على شفثيه .. كاد أن يقترب أكثر ويتحدث معها .. إلا أنه تذكر ما حدث لها بسببه .. وبما قيل عنهما فى الصحف .. نظر حوله ليجد الأمر لا يخلو من وجود بعض الأشخاص هنا وهناك .. عاد ينظر اليها مرة أخرى بحسرة وهو يتمنى الإقتراب منها .. فى تلك اللحظة التفتت .. فتلاقت نظراتهما .. شعرت بالدهشة وهى تراه أمامها .. ود لو اقترب منها وتحدث معها .. لكنه خاف عليها من نظرات الناس وكلامهم .. أطرق برأسه وتنهى بأسى .. وأرغم نفسه على التوجه الى حيث أوقف سيارته .. تابعته "آيات" بعينها فى دهشة .. ترى لماذا أتى ؟ .. ولماذا وقف ينظر اليها ؟ .. ولماذا ذهب ؟ .. عادت لتلتفت أمامها وهى توبخ نفسها عن الإهتمام بأمره ... حثت نفسها قائلة .. لا شأن لك به فليفعل ما شاء وقتما شاء !

فى منتصف الإجماع الذى عقده "كريم" مع "على" و "آيات" و

"إيمان" و "أسماء" قال "كريم" :

- والمشكلة دى هنتصرف فيها ازاي ؟

قالت "آيات" بأسى :

- مش عارفه بس لازم نشوف حل .. مش معقول كل شوية نلقى هجوم

فى جرنال شكل

قال "كريم" وهو يزم شفتيه بضيق :

- مفيش حل غير اننا نزود اعلاناتنا فى الجرايد .. ونعمل عروض دورية

.. ونحاول على أد ما نقدر مندیش للصحافة مادة تتكلم فيها

قال "على" بضيق :

- حتى لو مدينهمش مادة برده هيتكلموا .. دول ناس معندهمش ضمير ..

بس سيبهم للى خلقهم .. ميعرفوش ان النبي صلى الله عليه وسلم قال

على قول الزور أنه من أكبر الكبائر .. ربنا ينتقم منهم

قال "كريم" وهو يتفحص الأوراق أمامه :

- خلاص كده يعتبر اتكلمنا فى كل حاجة تقريباً

تنحج "على" قائلاً بخرج :

- على فكرة يا "كريم" .. ان شاء الله والدى ووالدى جايين بكرة العين

السخنة

ابتسم "كريم" قائلاً :

- ينوروا

قال "على" مبتسماً :

- الله يكرمك .. انا بس كنت عايز أستأذنك انهم يعدوا فى شقة فى نفس

العمارة اللى احنا فيها .. فى شقة هتفضى النهاردة ان شاء الله

هتف "كريم" على الفور :

- انت بتقول ايه يا راجل عيب عليك تستأذنى ايه .. دول على عينا وراسنا

ابتسم "على" وقال وقد اخرجته ترحاب "كريم" بأهله :

- ربنا يكرمك

ارتسمت ابتسامة صغيرة على شفتى "إيمان" وقد أسعدها ترحيب

"كريم" بزيارة أهلها للقريه .. أتى "كريم" اتصالاً فنهض قائلاً :

- بعد اذنكوا

خرج "كريم" من المكتب وجلس الجميع ينتظر عودته .. لا تعلم لماذا

قالت ذلك الكلام فى هذا الوقت .. لكنها اندفعت فجأة قائلة :

- على فكرة أنا مبحبش الرجالة اللي بتفضل تتكلم بالقران والحديث لانهم أول ناس هتحلل لنفسها انها تتجوز على مراتهم
ران الصمت وكان على رؤسهم الطير .. نظرت اليها "آيات" و "إيمان"
بدهشة فلم يجدا داعياً لذكر ذلك وفي اجتماع عمل ! .. لم يقطع هذا
الصمت الا "أسماء" وهي تقول :
- وكل حاجة بيعملوها بيحللونها لنفسهم بالحديث والقرآن ومحدث يقدر
يغظهم

ساد الصمت مرة أخرى حت تكاد تسمع صوت ابرة لو سقطت على
الأرض .. لكن هذه المرة قطع الصمت صوت "على" الهادئ وهو ينظر
الى يديه التي تمسك بأحد الأقلام فوق الطاولة وهو يقول :
- الرجاله مش محتاجين يحللوها لنفسهم التعدد .. لأنه حلال فعلاً
تسببت كلماته فى شعورها بالغضب .. فنظرت اليه بحدة .. أكمل بهدوء :
- "فاتكحوا ما طاب لكم من النساء مثنى وثلاث ورباع " .. رخصة من
عند ربنا للرجال
توترت "أسماء" وأخذت تحرك قدميها بعصبية .. فأكمل "على بنفس
الهدوء :

- بس ربنا شرط التعدد ده بشرط مهم " فإن خفتم ألا تعدلوا فواحدة " ..
يعني مش كل الرجاله ليها حق فى التعدد .. ولا كل الرجاله بتبقى عايزه
التعدد

ران الصمت للمرة الثالثة .. شردت "أسماء" تفكر فى كلماته .. ثم ما
لبثت أن نظرت اليه قائله بتحدى :

- والراجل اللي يتجوز بنت صغيرة أد ولاده ويرمى مراته الاولى فى
الشارع وحتى يرفض انه يطلقها عشان يذلها
قال "على" على الفور :

- ميبقاش راجل

ظلت معلقة عينيها به .. فأكمل بحزم :

- الراجل اللي يستغل قوامته على المرأة عشان يذلها ميبقاش راجل ..
والنبي صلى الله عليه وسلم وصانا بالنساء خيراً .. واننا نعاملهم برفق
ولين زى ما بنعامل الإزاز اللي سهل انه يتكسر .. الراجل هو اللي يعامل
المرأة زى ما الرسول وصانا .. أما اللي يأذها ويقهرها ويستغل قوامته
عليها ميبقاش راجل أصلاً

غرقت "أسماء" فى شرودها مرة أخرى الى أن جاء "كريم" .. وبعد
دقائق انتهى الاجتماع .. لم تستطع منع نفسها من متابعة "على" أثناء

خروجه برفقة "كريم" .. قالت لها "آيات" باستغراب :
- مش فاهمة ليه اتكلمتى عن الموضوع ده آدم "على" ؟
قالت "أسماء" بضيق وهى تهتم بالإنصراف :
- عادى كبرى

دخلت "إيمان" الى الشرفة لتقول لـ "أسماء" الواقعة فيها :
- "سمسم" ممكن تيجى تعملىلى ماسك من بتوعك
أومأت "أسماء" برأسها ودخلت الى المطبخ وبدأت فى اعداد ما طلبته
"إيمان" منها .. قالت "إيمان" بمرح :
- هقف أتفرج عليكى عشان أبقى أعمله بنفسى ما هو مش كل شوية
هقرفك معايا
كانت "أسماء" تتحرك بشرود .. وكأنها لا تشعر بما حولها .. تتحرك
بألية لتمزج المكونات معاً .. نظرت الى "إيمان" بشئ من التردد وقالت :
- واضح انك بتحبى أخوكى أوى
قالت "إيمان" مبتسمة :
- "على" .. بصراحة هو أخ عسل .. يعنى طيب ومش بيغلس عليا .. بس
لما بيزعل بيبقى أستغفر الله .. زعله وحش وعصبي جدا
نظرت "أسماء" الى الخليط الذى تمزجه للحظات نظر أعادت النظر الى
"إيمان" قائله :
- هو كان على طول كده فى حاله وواحد جمب
ابتسمت "إيمان" قائله :
- هو على طول هادى .. بس زمان أيام ما كان فى ثانوى كان شقى شوية
وكان مطلع روح ماما .. بس الحمد لله أول ما دخل الجامعة ربنا هداه لما
اتعرف على ناس كويسة فى المسجد وبقي هادى ومبقتش ماما تشتكى
منه خالص بعد ما كان مجننها بعماليه
قالت "أسماء" بسخرية :
- مش متخيلة أخوكى حد يشتكى منه
ضحكت "إيمان" قائله :
- لا والله ده كان فظيع سهر لوش الفجر ومفيش مذاكرة وشتايم وحاجة
كده رهيبه .. بس زى ما قولتلك لما اتعرف على ناس كويسة حبهم أوى
وصاحبهم وبعد عن صحابه القدام قطع معاهم خالص
فى تلك اللحظة رن جرس الباب فقالت "أسماء" :
- شوفى مين يا "إيمان"

ارتدت "إيمان" اسدالها وتوجهت الى الباب لتفتحه .. خفق قلبها بقوة
لمرأى "كريم" واقفاً أمام الباب .. أطرق برأسه وقال :
- "آيات" هنا ؟

قالت بصوت خافت :

- أيوة ثواني

دخلت غرفة "آيات" وأخبرتها بقدوم "كريم" .. توجهت "آيات" اليه
قائله :

- خير يا "كريم"

قال لها بعد لحظات صمت :

- لازم نساfer القاهرة عشان موضوع شهادة الوفاة اللي دكتور "آدم"
طلعها لك

توترت "آيات" لذكر اسمه .. فأكمل :

- هو مستنى مننا اننا نحدد المعاد عشان نروح سوا

قالت "آيات" بضيق :

- مينفعش نروح من غيره ؟

- لا للأسف لازم بييجى معانا لإن هو الى طلع الشهادة بنفسه .. ولازم
الموضوع ده نشوفله حل انتى كدة قانوناً متوفية .. وده مينفعش كمان
عشان القضية اللي احنا رافعينها على الصحفى
صمت قليلاً ثم قال :

- على فكرة هو كمان رفع قضية على الصحفى وعلى الجريدة

أومات "آيات" برأسها وهى تتساعل بداخله .. أرفع تلك القضية من أجله
أم من أجلها .. أتاها الجواب من داخلها بسخرية .. بالطبع من أجله ..
وماذا تعنين أنت له !

أخرجها "كريم" من شرودها قائلاً بحنان :

- مالك يا "آيات"

أطرقت برأسها قائله :

- مفيش

ربت على كتفها قائلاً :

- معلىش متزعلىش .. ان شاء الله ربنا هيرزقك بالى أحسن منه مليون مرة
لمعت العبرات فى عيونها ثم رفعت رأسها وقالت بكبرياء :

- أنا أصلاً نسيته .. هو معدش حاجة بالنسبة لى

أطرقت برأسها مرة أخرى لتخفى عينيها المبللتان بالدموع .. عانقها
"كريم" بحنان وقال :

- مش عايزك تزعلى نفسك عشان أى حاجة .. نأتى متعرفيش الخير فين .. ادعى ربنا دايماً أنه يرزقك الخير ويرضيكي بيه .. لان ربنا أحيانا بيرزقنا الخير ومبكنش شايفين ان ده خير ولا بنكون راضيين بيه ثم أبعدھا عنه قليلاً قائلاً :

- ماشى ؟

- أومأت برأسها .. فقال :

- قولى دايماً الحمد لله

- تمتت :

- الحمد لله

- دخلت "آيات" المطبخ فنظرت اليها "إيمان" قائله :

- فى حاجة يا "آيات"

- تنهدت "آيات" وهى تقول :

- كان بيظمن عليا وبيقولى اننا هنسافر عشان موضوع شهادة الوفاة ده نشوفله حل

- قالت "إيمان" وابتسامه صغيره على شفيتها :

- أخوكى ده حنين أوى .. وطيب أوى .. تحسيه راجل كده ومسؤل عنك رغم انه مش شقيقك

- نظرت اليها "أسماء" بخبت ورفعت حاجبها قائله :

- ها وايه كمان

- ارتبكت "إيمان" واحمرت وجنتاها بخجل قائله :

- مفيش

- قالت "أسماء" وابتسامه خبيثة على شفيتها :

- طيب خدى الماسك يا موزه

- أخذته "إيمان" من يدها وخرجت من المطبخ مسرعة وهى تشعر بالخجل

.. أطلقت "أسماء" ضحكة عالية وهى تقول بلهجة مسرحية :

- القرع لما استوى قال للخيار يا لوبيا !

- ابتسمت "آيات" قائله :

- ياباى عليكي غتته .. أخرجتها يا بنتى

- هتفت "أسماء" بمرح :

- أخرجتها ايه بس ده احنا شكلنا هنشوف أيام فل فى القرية دى

أثناء جلوسه فى غرفة المعيشة تنامى الى مسامعه صوت بكاء من خلف

باب الغرفة .. نهض "مدحت" واقترب من غرفة "أسماء" التي تقسم فيها "مديحة" .. كاد أن يطرق الباب لكنه تراجع .. شى خطوتين ثم التفت وعاد مرة أخرى .. طرق الباب فأخفت صوت البكاء .. لحظات وفتحت "مديحة" وعينيها يبدو عليهما آثار البكاء .. تأملها قائلاً :

- فى حاجة
قالت بحده :

- لا مفيش

- سمعتك بتعيطي

ابتسمت بسخرية وقالت :

- ومن امتى ده بيهمك

زفر بضيق ونظر اليها بحده .. فأكملت :

- ولا يكونش ضميرك صحى فجأة

قال بغضب وقد فشل فى المحافظة على هدوءه :

- أنا ضميري مستريح على الآخر .. الدور والباقي على ضميرك انتى
صاحت قائله :

- عايز ايه يا "مدحت" انت بتخبط عليا عشان تتخانق معايا

قال وهو ينظر اليها باحتقار :

- مفيش مرة نتكلم فيها الا ولازم تسمى بدنى بكلامك وتخرجيني عن

شعورى .. مفيش مرة اتعاملتى معايا زى ما أى ست عاقلة بتتعامل مع

جوزها .. مفيش مرة حسستيني فيها بضعفك ادامى وبان انتى الست وأنا

الراجل .. مفيش مرة حسيت فيها انك بتحترميني وبتعملى اعتبار لكلامى

أخذ نفساً عميقاً ثم قال :

- انتى اللى هديتي كل حاجة بينا .. انتى اللى دمرتى حياتنا

قالت ببرود وقد عقدت ذراعيها أما صدرها :

- وانت العاقل الراسى المخلص اللى اتظلمت معايا فى الجوازه دى مش

كده

صاح بحده :

- احنا الاتنين غلطانى .. أنا وانتى غلطانين كفاية مكابرة بأه .. بنتك

ضاعت مننا بسبب مشاكلنا

دمعت عيناها وأجهشت فى البكاء وانتفض جسدها وهى تقول :

- وحشتنى أوى .. مش عارفه عامله ايه دلوقتى .. يا ترى عايشة ولا

ميته .. ولو عايشة عايشة ازاي وفين .. قلبى واجعنى عليها أوى

تشنجت بالبكاء .. فتنهد "مدحت" بأسى وهو يقول متأماً :

- أعمل ايه .. أدور عليها فين قلبت عليها الدنيا
نظرت ايله ترجوه قائلاً :
- عشان خاطرى يا "مدحت" لاقيتها .. نفسى ترجع بأه .. نفسى أطمئن
عليها .. عمرى ما هسامح نفسى على اللي حصل .. انا مكنتش متوقعة
الأمور هتوصل للدرجة دي .. أنا افكرتها هتروح لصحبتها
أجهشت مرة أخرى فى البكاء وهى تصيح :
- عايزة بنتى .. عايزة "أسماء" يا "مدحت" هاتهالى
اقتربت منها وربت على كتفها قائلاً :
- ان شاء الله هنلاقيها .. بكرة هنزل تانى أدور عليها فى المستشفيات و
فى الأقسام وفى محطات الأتوبيس .. ان شاء الله هنلاقيها
نظرت اليه وأومأت برأسها وهى تحاول التشبث بأى أمل .. فى أنها سترى
ابنتها مرة أخرى

استقبل كل من "على" و "إيمان" والديهما بالترحاب وبالاعناق
والعبرات .. هتفت أمهما وهى تعانق "إيمان" بشدة :
- يا حبيبتي يا بنتى .. وحشتنى أوى
تساقطت العبرات فوق وجنتيها فقال لها زوجها :
- ايه يا أم "إيمان" .. ما العيال كويسين أهو لزمته ايه العياط دلوقتى
ربت "على" على كتفها قائلاً وهو يقبل جبينها :
- خلاص يا ماما بأه
قالت بصوت باكى وهى تنظر اليهما :
- وحشتونى أعمل ايه
ابتسمت "إيمان" وهى تعانقها مرة أخرى قائلة :
- وانتي كمان وحشتيني أوى يا ماما
وجدت فجأة "كريم" مقبلاً عليهما فابتعدت عن أمها فى حرج ووقفت
مطرقة برأسها وقد شعرت بالإضطراب .. نظر اليهما قائلة ببشاشه :
- حمدالله على السلامة
اقترب منه "على" وقدمه الى والديه قائلاً بسعادة :
- ده الأستاذ "كريم" مدير القرية
سلم والده عليه وقال :
- أهلا بيك يا ابنى
مدت والدة "إيمان" يدها وهى تقول :

- ازيك يا ابني
نظر "كريم" الى يدها فى حرج فسلم عليها "على" بدلاً منه .. قال
"كريم" مبتسماً :
- الحمد لله بخير .. منورين العين السخنة
قالت أم "إيمان" مبتسمة :
- ده نورك يا ابني
حمل "على" حقيبتها وصعد بها الى شقة والديه والتي كانت فى الطابق
الذى يعلوا طابقهم .. دخل الجميع الى الشقة بعدما استأذن منهم "كريم"
للإنصراف .. قالت والدة "إيمان" لـ "على" :
- الجدع ده باين عليه ابن حلال
قال "على" بحماس :
- أوى يا ماما بجد راجل محترم جداً
سألته أمه بفضول ولهفة :
- هو متجوز
- لا يا ماما مش متجوز
ابتسمت والدته قائلة بلهجة ذات مغزى وقد لمعت عيناها :
- ربنا يرزقه ببنت الحلال
ثم حانت منها التفاته الى "إيمان" التي تظاهرت بأنها لم ترها ..

وقفت "أسماء" تراقب "على" الذى كان يعطى تعليماته لبعض العاملين
بالقرية .. كانت تراقبه كمن يراقب شئ غريب يكتشفه لأول مرة .. شئ
يشدها ويجذبها .. كلامه غريب عجيب .. لكنه يخترق عقلها .. ويطيب له
قلبها .. راقبت احدى الفتيات وهى مقبلة نحوه .. يبدو أنها تشتكيه من
شئ ما .. أطرق برأسه واستمع شكواها ثم أجابها ببضع كلمات وانصرفت
.. التفت لينصرف فحانت منه التفاته اليها .. رآها وهى واقفة هناك على
بضع أمتار تحت الظل توجه أنظارها اليه .. رآته ينظر اليها .. فشعرت
بالخجل والتفتت لتغادر المكان !

تلقت "إيمان" اتصالاً من والدتها تقول لها :
- "إيمان" عايزاكى شوية تعالى
- أنا فى الشغل يا ماما
- لا سيبى الشغل دلوقتى وتعالى

قالت "إيمان" بقلق :
- خير يا ماما فى حاجة
- أيوة بعمل محشى وبط وعايزاكى تساعدينى
هتفت "إيمان" بغيظ :
- محشى وبط ايه يا ماما دلوقتى بقولك عندى شغل
- طيب خلصى بسة وتعالى .. سلام
بعد عدة ساعات أنهت "إيمان" عملها وتوجهت الى البناية التى تقسم
فيها .. وقفت " أمام البناية المغلقة وهى تبحث عن مفتاحها فى حقيبتها
فلم تجده .. يبدو أنها نسته فى الحقيبة الأخرى عندما بدلتها هذا الصباح
.. كادت أن تعيد أدراجها عندما وجدة "كريم" مقبلاً فى اتجاه البناية ..
اضطربت كعادتها عندما تراه ووقفت فى جانباً .. أخرج مفاتيحه وفتح
البوابة ثم رجع خطوتين للخلف وأشار لها بالدخول قائلاً :
- اتفضلنى
ودون أن تنظر اليه دخلت وصعدت الدرجات بسرعة وسمعتة يغلق البوابة
خلفها .. صعدت الى الدور العلوى حيث شقة والدتها .. أمضت "إيمان"
الساعات فى اعداد الطعام وهى تهتف بحنق :
- ماما انتى عازمة جيش .. ايه الأكل ده كله
قالت والدتها بحزم :
- احشى وانتى ساكتة
اكملت "إيمان" عملها الدؤب وبعدها انتهت .. من عملها ومن طاقتها ! ..
جاءت مهمة تسوية الطعام التى استغرقت وقتاً حتى شعرت "إيمان" أن
قدميها وظهرها يصرخان ألماً .. رات أمها تعد صنية كبيرة محملة بالطعام
.. فنظرت اليها "إيمان" باستغراب قائلة :
- لمين ده
قالت أمها وهى تكمل مهمتها فى اعداد الصنية :
- شششششششش
حملت أمها الصنية وتوجهت الى الباب قائلة :
- افتحى الباب
فعلت "إيمان" وهى مازالت تشعر بالدهشة .. هبطت والدتها الدرجات ..
لم تغلق "إيمان" الباب بل ظلت مكانها تسمع صوت أقدام أمها على
الأرض ثم صوت جرس .. و .. :
- ازيك يا أستاذ "كريم"
فتحت "إيمان" فاهها فى دهشة واتسعت عيناها وأطرقت السمع

ابتسم "كريم" قائلاً :

- الحمد لله .. ازی حضرتك يارب تكون القرية عجبتمكم

سمعت أمها تقول بحماس :

- دى زى الفل .. الهى يباركلك يارب.. ده أنا سمعه عنك سمع خير ..

"على" و "إيمان" ملهمش سيرة غير عنك

ضربت "إيمان" كفها بوجنتها وهى تتم بصوت خافت :

- هاااااار اسود

سمعت أمها تكمل بنفس الحماس :

- اتفضل يا أستاذ "كريم" دى حاجة بسيطة كدة مش أد المقام

تناول "كريم" منها الصنية بخرج وهو يقول مبتسماً :

- تسلّم ايدك بس مكنش فى داعى تتعبى نفسك وبعدين ده كثير أوى

قالت أمها بمرح :

- كثير ايه .. ده انتوا يا عيني شابين أعيدين لوحدكوا فى الشقة لا فى

واحدة تطبخ ولا تعملكوا حاجة .. الهى يرزقك انتى و "على" ابني ببنتين

طيبين زيكوا كده

ابتسم "كريم" قائلاً :

- متشكر أوى .. ومعلش تعبينك معانا

قالت "أمها" بحماس :

- لا أبداً متقولش كده ده انت معزتك من معزة "إيمان" و "على" .. آه

والله .. وبعدين أنا معملتش الأكل ده .. دى "إيمان" هى اللى أصرت

تعمله بنفسها

ضربت "إيمان" وجنتها مرة أخرى وهى تتمتم :

- بتعملى ايه يا وليه

أكملت والدة "إيمان" قائله بحماس :

- أصل "إيمان" بنتى من صغرها وهى ايدها معايا فى شغل البيت .. وما

شاء الله عليها دلوقتى بتعمل الأكل أحسن منى كمان .. آه والله .. نفسها

فى الأكل حلو أوى .. ما انت هتدوق وتبقى تقول رأيك بأه

- تسلّم ايدها

ضغطت "إيمان" على انسانها بشدة وهى تتمتم بغیظ :

- حسبي الله ونعم الوكيل

قالت "أمها" قبل أن تغادر :

- يلا بالهنا والشفا ولو احتجت حاجة أنا زى أمك بالظبط متكسفش

ابتسم قائلاً :

- متشكر أوى .. تسلمى
صعدت أمها لتفاجأ بـ "إيمان" الواقفة على باب الشقة وتنظر اليها بغیظ .
ما كادت أمها تدخل وتغلق الباب حتى هتفت "إيمان" بغضب :
- ايه يا ماما جو أفلام الأبيض والاسود ده .. ايه اللى انتى عملتیه ده
قالت أمها ببرود :
- عملت ايه يعنى .. النبي وصانا على سابع جار وده مش جار بس ده
صاحب الفضل عليكى وعلى "على"
قالت "إيمان" بحده :
- ماما انتى عارفه كويس أنا قصدى ايه .. انا فهماكى كويس
أشاحت أمها بيدها وهى تنصرف قائله :
- يختى اتبلى على الله يجي بفايدة بس
تابعتها "إيمان" بعينها وهى تشعر بالغضب والغیظ

أغلقت "آيات" باب الشقة خلفها وهبطت الدرج وهى تشعر بالتوتر ..
ظلت تذكر الله فى نفسها علها تهدئ من روعها .. خرجت من البناية لتجد
"كريم" منتظرها فى سيارته .. وخلفه .. "آدم" فى سيارته .. أشاحت
بوجهها حتى لا تقع عينها عليه .. لكنه تابعها بعينيه وهى تلف حول
السيارة لتركب بجوار "كريم" .. لاحت ابتسامه على شفثيه وهو ينظر
اليها .. ود لو تحدث معها .. لكنه يعلم بأن عليه أن ينتظر .. فمهمته ليست
سهلة على الإطلاق !
انطلقوا فى طريقهم الى القاهرة .. قاموا بعدة خطوات وفى أكثر من مكان
حتى يتم الغاء شهادة الوفاة واثبات أنها مازالت على قيد الحياة .. فى
منتصف النهار كان بلغ منهما التعب والجوع مبلغه فاقترح "آدم" الذهاب
الى أحد المطاعم لتناول طعامهم .. جلس ثلاثتهم حول الطاولة .. كان بين
"آيات" و "آدم" مقعد فارغ .. لكن فى المقابل كان فى مواجهتها تماماً ..
حاول "آدم" قدر استطاعته ألا ينظر اليها حتى لا يثير حنق "كريم" ..
وضعت عينيهما فى طبقها ولم ترفعهما قط حتى لا تصطدم لوجهه .. لكن
رغماً عنها تسرب صوته الذى طالما عشقته الى أذنيها .. ذكرها صوته
بكل شئ .. بكل تفاصيل علاقتهما .. تذكرت أول مرة رآته فيها .. عندما
كان سائق السيارة الأجرة يتشاجر معها .. تذكرت كيف رآته وقتها فارسها
وهو واقف بجوارها يدافع عنها ويحميها من بطش الرجل بها .. تذكرت
كيف كنت تنتظر مواعيد محاضراته بفارغ الصبر .. وكيف كانت تنظر اليه
هائمة سابعة فى أحلامها .. وتذكرت كيف تحطم ذلك الحلم الجمسل

لتستيقظ على واقع مفزع .. قفزت كل الذكريات الى عقلها فجأة .. خداعه .. كذبه .. خيائته .. قبلته في السيارة .. "بوسى" .. الفيديو .. اعترافه بخطبته لابنة عمها .. استغلاله اياها .. لم تتحمل كل تلك الذكريات التي أخذت تظهر أمامها في اصرار رافضة أن تختفى من عقلها سقطت منها الملعقة بعدما ارتعشت يدها بتوتر .. التفت "آدم" و "كريم" اليها بعدما قطعاً حديثهما .. نظرت الى "كريم" بتوتر قائله بصوت مضطرب :

- ثوانى وراجع

نهضت وغادرت بسرعة وكان وحشاً يطاردها .. قطب "آدم" جبينه وهو يشعر أنه سبب ذلك الإضطراب الذى أصابها .. ألهمه الدرجة لم تعد تطيق رؤيته !

عادت ... تأملها .. بدت على عينيها البكاء .. هو يعرفها جيداً .. يعرفها أكثر من نفسها .. يستطيع رؤية ذلك الألم الذى تنطق به ملامح وجهها ونظرات عينيها .. لم يتحمل أن تظل أمامه هكذا وهو لا يستطيع مجرد الحديث معها .. وشرح نفسه أمامها .. والتخفيف من حزنها وصدمتها وآلامها .. نهض قائلاً :

- هستناكوا فى العربية

تابعه "كريم" بنظراته ثم التفت الى "آيات" قائلاً بحنان :

- انت كويسة يا "آيات" ؟

أومات برأسها وهى تحاول رسم بسمة على شفيتها وهى تقول :

- أيوة الحمد لله .. بس يمكن السفر تعبني

جلس "آدم" فى السيارة وهو يفكر فى هذا الطريق الشائك الذى يجب عليه قطعه ليصل الى "آيات" .. لكن كيف السبيل لبلوغ مراده ؟ .. كيف يستطيع كسب ثقته من جديد ؟ .. كيف يثبت لها أن عاد انسان طاهر الذيل ؟ .. كيف يثبت لها أنه تاب وأناب ؟ .. ظلت الأسئلة تتقاذف داخل عقله وهو يحاول أن يجد اجابه لكل منها .. حانت منه التفاته ليجد "آيات" خارجه من المطعم بصحبة "كريم" .. التفت "كريم" الى "آيات" قائلاً :

- نسيت موبائلى على الترابيزة .. خدى المفتاح واعدى فى العربية

تناوت منه المفتاح وعاد "كريم" الى المطعم .. أسرع "آدم" بالخروج من السيارة وتوجه ناحيتها .. بمجرد أن رآته مقبلاً نحوها أحتت السير فى اتجاه السيارة لكنه وقف أمامها قائلاً :

- "آيات"

قالت بحزم ودون أن تنظر اليه :

- لو سمحت متكلمنيش

حاولت الإنصراف فوقف أمامها وقال بلهفة :

- أنا مش عارف أتكلم معاكى فى القرية .. خفت حد يشوفنا سوا ويتكلم

عك خاصة بعد اللي اتنشر فى الجرنال

ظهرت الدموع فى عينيها وهى تتذكر تلك الصورة وما كتب تحتها .. قال

"آدم" وهو ينظر اليها بألم :

- أنا آسف يا "آيات" .. والله مكنت أعرف انك هتتأذى كده .. أنا مكنتش

قادر أتحكم فى نفسى لما شوفتك آدمى .. والله غصب عنى .. معلىش

متضايقيش منى .. أنا رافع عليه قضية دلوقتى وان شاء الله هجبك حقك

منه

تمالكت "آيات" نفسها فأخر ما تريده الآن هو البكاء أمامه .. قالت بحزم

وهى مازالت لا تريد النظر الى وجهه :

- لو سمحت سيبنى أعدى

قال بسرعة :

- طيب أنا هتكلم وانتي اسمعى .. مش عايز أكثر من كده .. أنا عارف انتى

حسه بآيه نحيتى دلوقتى وشايفانى ازاي .. ومعاكى حق .. معاكى حق

تكرهينى ومتثقيش فيا تانى .. معاكى حق تبقى مش طايفة تبصى فى

وشى .. بس أنا اتغيرت .. والله اتغيرت .. أنا غلظت غلط بشع .. عارف ..

بس ربنا بيسامح .. مش كده .. مش ربنا بيسامح .. انا على أمل انه

يسامحنى ويغفرلى

تقطع تنفسه قال بصوت مضطرب :

- انتى كنتى بتحبينى .. يبقى مش صعب عليكى تسامحينى

لمعت عيناه بالعبرات وهو ويقول :

- والله ما كنت هأذيكي .. فى الأول أيوة بس بعد كده حبيتك بجد

أخذت "آيات" نفساً عميقاً ورفعت عينيها تنظر اليه بجدده وقالت بقسوة :

- أنا مستحيل أسامحك .. أبداً .. مهما حصل مش هسامحك .. عايزنى

أسامحك على ايه ولا ايه .. أسامحك على ايه بالظبط

قال بجمود وفى عينيه نظرة ألم :

- تسامحينى انى لعبت بيكي من الأول .. تسامحينى انى كنت عايز أنتقم

من عمك فيكي وارجع حقى عن طريقك .. تسامحينى انى استغللت

مشاعرك نحيتى عشان أرجع حقى .. تسامحينى انى خنتك قبل كتب الكتاب

بيوم .. تسامحينى انى عرفت واحدة لمدة سنة وكنت عايش معاها عشان

أستغلها وأخذ فلوسها .. تسامحيني انى سمعتك كلام كثير عن مشاعرى
نحيتك وكان كله كذب .. تسامحيني انى كنت انسان حقير عاق بأمه ..
تسامحيني انى مكنتش حتى بصلى ولا كنت عارف ربنا
صمت قليلاً ليأخذ نفسه ثم قال ونظرات عينيه هى مزيج من الحيرة والألم

:

- عايزك تسامحيني على كل ده
رغمأ عنها تساقطت عبراتها فمسحتها بسرعة بظهر يدها .. كان ذكر كل
ذلك أمامها بذلك الوضوح وبتلك الطريقة شاق جداً عليها .. رجع "آدم"
خطوة للخلف ليسمح لها بالعبور .. اتجهت مسرعة الى السيارة وأغلقت
الباب وهى تدفن وجهها بين كفيها وتفرغ ما بداخلها من ألم وقهر وعذاب
.. بالبكاء !

عاد "آدم" الى سيارته واجماً .. أخرج هاتفه واتصل بـ "فؤاد" ..

- دكتور "آدم" أهلاً بيك

- اهلا بيك يا أستاذ "فؤاد" .. أنا كنت عايز أقابل حضرتك ضرورى .. أنا
حالياً فى القاهرة

- خير يا دكتور ان شاء الله

- لا خير ان شاء الله .. عايز أتكلم معاك بخصوص قرية الماسة .. ينفع
نتقابل دلوقتى

- والله يا دكتور أنا حالياً فى غداء عمل فى فندق هينتهى كمان 10
دقايق بالكثير

- طيب ينفع آجى لحضرتك دلوقتى .. ولا فى مشاكل

- لا طبعاً موافق يا دكتور .. مفيش مشاكل منتظرك ان شاء الله

أنهى "آدم" المكالمة وقد بدا عليه العزم والإصرار .. عزم على بدء حياته
مرة أخرى لكن هذه المرة بشكل لائق .. بشكل يجعله فخوراً بنفسه ..

بشكل يجعل ضميره مستريح .. بشكل يجعل "آيات" تراه مرة أخرى ..
فارس أحلامها !



- طبعاً أن ليا الشرف انى اشتغل معاك يا دكتور
ابتسم "آدم" لهذا الترحيب .. فقد كان جل ما يخشاه أن يرفض "فؤاد"
لما تنامى الى مسامعه عن علاقته بـ "آيات" وما حدث بينهما .. قال
"آدم" بحماس :

- تمام .. أنا متشكر جداً يا أستاذ "فؤاد"
قال "فؤاد" بجديّة :

- طبعاً أنا يشرفنى ان راجل زيك عنده خبرة أكاديمية وعملية انه يشتغل
معايها فى قريتي .. بس أنا مش فاهم تحديداً حضرتك عايز شراكة ولا ايه
بالظبط .. لانك قولت شغل ما قولتش شراكة
تنحى "آدم" قليلاً ثم قال :

- بصراحة حالياً مفيش عندى امكانيات للشراكة .. ولو هشارك هيكون
بمجهودى فقط .. وأنا شايف ان حضرتك مش محتاج حد يشاركك
بالمجهود لان بالفعل عندك الأستاذ "كريم" مدير القرية .. عشان كده أنا
متكلمتش فى شراكة .. أنا اتكلمت فى شغل .. وأنا مش هشرط منصب
محدد أنا كل اللى يهمنى انى اشتغل فى القرية
صمت قليلاً ثم تنهد قائلاً :

- أنا سببت قرية جولدن بيتش بعد ما اتخنقت من اللى بيحصل فيها ..
وكنت لغيت من دماغى تماماً فكرة الشغل فى السياحة رغم ان الماجستير
بتاعى كان عن الموضوع ده وكمان أنا بحب الشغل فى السياحة جداً
وعندى خبره كويسة فيه .. فعشان كده لما شوفت القرية بتاعة حضرتك
والقوانين اللى حاططها مع أستاذ "كريم" .. بصراحة اتشجعت جداً ..
وفعللاً لو كان معايها راس مال حالياً أنا مكنتش اترددت لحظة فى انى
أشاركك

ثم زفر بضيق وقال :

- بس للأسف أنا مفيش امكانية للشراكة الا بالمجهود وطبعاً حضرتك مش محتاجة فأى مكان هتقولى امسكه فى القرية أنا مش هعترض ان شاء الله .. وزى ما قولت لحضرتك عايز "زياد" كمان معايا .. هو خبرته العملية أكثر منى .. "زياد" بيشتغل فى السياحة من سنين وكان مدير قرية فى شرم

صمت "فؤاد" يفكر فيما قاله "آدم" .. ثم التفت اليه وابتسم قائلاً :

- أبشر يا دكتور .. انت و الأستاذ "زياد" أكيد هتكونوا مكسب كبير لقريتنا .. "كريم" راجل محترم وشريكى وممشى القرية بطريقة ممتازة بس دى أول مرة يشتغل فيها فى السياحة .. لكن انت و "زياد" عندكوا خبرة وكفاية انه مجالك يا دكتور

ثم هتف بحماس :

- على خيرة الله .. ان شاء الله اعتبر نفسك انت و "زياد" من النهاردة من فريق قرية الماسة

اتسعت ابتسامه "آدم" وقال بسعادة :

- بدج متشكر جداً يا أستاذ "فؤاد" .. وان شاء الله هنكون عند حسن ظنك خرج "آدم" من الفندق الذى التقى فيه بـ "فؤاد" .. وهو يشعر بسعادة بالغة .. توجه الى المسجد القريب وأدى فريضة المغرب وهو يشعر بالراحة والسعادة فى قلبه .. طوال الطريق الى العين الساخنة كانت الابتسامه ترتسم على شفثيه من حين لآخر .. استنشق الهواء وكأن اليوم ذراته تحمل عبقاً جديداً لم يستنشقه من قبل .. عبق الأمل والسعادة و تحقيق الذات .. والأهم .. أنه اقترب خطوة من "آيات"

جلست "آيات" فى غرفتها منذ أن عادت الى العين الساخنة .. لم تشعر فى نفسها الرغبة للتحدث مع أحد أو لرؤية أحد .. ظلت تفكر فيما دار اليوم بينها وبين "آدم" .. وتلك الكلمات القاسية التى ألقاها على مسامعها .. لماذا ذكر مساؤه بتلك الطريقة التى جعلتها تكاد أن تختنق ؟ .. أظن أنها ستسامحه ؟ .. كيف .. كيف تستطيع أن تغفر كل ما قال .. سمعت صوت المفتاح يدور فى الباب .. فمسحت وجهها بيديها ونهضت تستقبل الفتيات .. نظرت اليها "إيمان" قائله :

- ايه ده رجعتى امتى ؟

قالت "آيات" بصوت مبحوح قليلاً :

- من كم ساعة كدة

قالت "أسماء" وهي توجه الى غرفتهما :
- عملتى ايه فى موضوع الشهادة
قالت "آيات" وهي تستند على الجدار بظهرها :
- خلاص تقريباً كده الموضوع اتحل .. لسه اجراءات بسيطة هيعملها
المحامى لكن مش هروح تانى القاهرة
أومأت "أسماء" برأسها وقالت :

- كويس

قالت "إيمان" وهي تتوجه الى الباب :

- أنا طالعة أشوف ماما

فتحت الباب وشهقت بقوة عندما وجدت "كريم" أمامها والذي كان يهم
بالطرق على الباب .. وضعت يدها على صدرها وقد شعرت بالفزع لهذه
المفاجأة .. فقال بخفوت :

- معلش أنا آسف خضيتك .. أنا كنت لسه هضرب الجرس

أومأت برأسها دون أن تنطق بكلمة وتوجهت الى الداخل .. قالت لـ

"آيات" بصوت مضطرب :

- أخوكى بره يا "آيات"

توجهت "آيات" الى "كريم" الذى نظر اليها باهتمام قائله :

- كويسه دلوقتى ؟

ارتبكت قائله :

- أيوة الحمد لله

- ايه بأه اللي كان مضايقتك ؟ .. دكتور "آدم" اتكلم معاكى ؟

أطرق "آيات" برأسها قليلاً ثم نظرت اليه قائله بصوت خافت :

- أيوة

- قالك ايه ؟

لاحت العبرات فى عينيها وقالت :

- قالى انه اتغير وتاب وان ربنا بيقبل التوبة وانه عايزنى أسمحه على كل

اللى عمله

أطرق "كريم" برأسه شاردأً ثم نظر اليه وقال :

- وقولتية ايه ؟

هزت كتفيها وقالت :

- قولته مش هقدر أسامحه

تنهد "كريم" قائلاً بضيق :

- هتكلم معاه .. أنا لا عايزه يتكلم معاكى ولا يقرب منك

قالت "آيات" بتوتر:

- هو اتكلم معايا بإحترام يعني مضايقتيش .. أقصد يعني متخانقش معاه

نظر اليها "كريم" متأملاً وهو يقول :

- أنا ما قولتش هتخانق معاه .. أنا قولت هتكلم معاه

ربت على كتفها قائلاً :

- متضايقتيش نفسك انتى .. ماشى

أومأت برأسها وابتسامه صغيرة على شفيتها .. تتحنح "كريم" وبدا عليه

التردد .. نظرت اليه قائله :

- فى حاجة

ابتسم بخجل قائلاً :

- يعني كنت عايز أسألك عن حاجة كدة

عقدت ذراعها أمام صدرها قائله :

- اسأل

أخفض من صوته وهو يقول :

- انتى و "إيمان" صحاب من زمان ؟

قالت "آيات" باستغراب :

- "إيمان" .. أيوة من 4 سنين تقريباً .. بتسأل ليه ؟

قالت بنفس النبرة الخافته :

- ورأيك فيها ايه ؟

ضاقت عيناها وهى تجيب بحيرة :

- رأى فيها ازاي يعنى ؟

- يعنى رأيك فيها يا "آيات" .. انتى مش صحبتها يبقى أكبد فى رأى

محدد مكوناتها عنها

قالت "آيات" مبتسمة بخبث :

- آه .. بصراحة هى بنت محترمة أوى وطيبة أوى وحنينة أوى .. ودمها

خفيف .. عايز تعرف ايه تانى ؟

ابتسم "كريم" قائلاً :

- لا خلاص كفاية كدة

اتسعت ابتسامتها وهى تقول بخبث :

- لكن ما قولتليش يعنى بتسأل ليه

ضحك قائلاً :

- هتشتغليني يا بنت انتى .. يلا على شفتك

ضحكت قائله بعتاب :

- آه ماشى ما أنا فى البتاع مدعيه وفى البتاع التانى منسيه
- لا متقلقيش هتبقى مدعيه ان شاء الله
هتفت بسعادة كالأطفال :

- بجد يا "كريم" يعني
كمم فمها بكفه وقال :

- ششششش متخلينيش أندم انى قولتك .. اسكتى خالص لحد ما اتكلم مع
باباها الأول .. ميصحش هى تعرف قبلهم
هتفت بسعادة :

- طيب خلاص ماشى مش هقول حاجة .. بس كلمه بسرعة عشان مش
هقدر أتكلم فى نفسى كثير
أطلق "كريم" ضحكة عالية وهو يقول :

- هتقولولى ده انتوا الستات مبتبلش فى بوقكوا فوله .. تعرفى المثل اللى
بيقول لو عايزة تنشرى خبر قوليه لواحدة ست وقوليلها انه سر .. تلاقيه
انتشر زى النار فى الهشيم
ضربته فى كتفه بقبضتها وهى تقول :

- بس أحسن لما تيجي تسألنى عنك أطلع فيك القطط الفطسانه
ابتسم قائلاً :

- وأهون عليكى يا "آيات" .. خلاص أنا هسيبك لضميرك
قالت "آيات" وهى تنظر اليه والفرحة فى عينيها لا تستطيع اخفائها :
- بجد أنا فرحنه أوى .. ربا يتملك بخير يا "كريم" .. انت تستاهل كل
خير .. و "إيمان" والله بنت محترمة أوى مش هتلاقى أحسن منها
أوما برأسه وابتسم قائلاً :

- هستخير الأول ونشوف ربنا هيختارلنا ايه

عاد "آدم" الى الشاليه قائلاً لأمه وهو يقبل يديها ورأسها فى سعادة :
- باركيلى يا ماما .. بركة دعاكى لقيت شغل تانى
ابتسمت أمه فى سعادة قائله :

- بسم الله ما شاء الله .. ربنا يرزقك يا ابنى وينولك كل اللى فى بالك
اتسعت ابتسامته وهو يقول :

- كلمت أستاذ "فؤاد" صاحب قرية الماسة اللى جمبنا .. والحمد لله واقف
انى أشغل فى القرية .. ووافق كمان على شغل "زياد"
تلاشت ابتسامه أمه وهى تقول بعتاب:

- قرية سياحية تانى يا ابنى .. ده أنا مبقتش بحب أطلع بره الشاليه من

المناظر اللى بشوفها

قال "آدم" وهو يجذبها من ذراعها ليجلسها بجواره :

- لا متقلقيش القرية دي حاجة تانية خالص .. مش هتلاقى فيها اى حاجة من اللى كنتى بتشوف فيها هنا .. بجد قرية محترمة جداً ومديرها راجل محترم أوى

ابتسمت بخبث وقالت :

- آه طبعاً مين يشهد لمدير القرية غيرك

اختلفت ابتامة "آدم" وظهر الحزن عى ملامحه .. نظرنا ليه أمه باهتمام وقالت :

- فى حاجة يا ابنى

تنهد "آدم" بأسى وقال وهو مطرقاً برأسها وقد شبك أصابعه فى بعضها بتوتر :

- اتكلمت مع "آيات" النهاردة واحنا فى القاهرة

- وقالتك ايه ؟

هز رأيه بأسى وهو يقول :

- قالتلى مش ممكن أسامحك

ربتت أمه عى ظهره وقد ظهر الحزن فى عنيها .. وقالت :

- معلش يا ابنى مفيش حاجة بتيجي بالساهل .. لازم الواحد يتعب ويشقى عشان يوصل للى هو عايزه

أوما "آدم" برأسه صامتاً .. فقالت بحماس :

- متقلقيش أنا هتصرف

التفت اليها قائلاً باستغراب :

- هتصرفى ازاي يعنى ؟

- مش انت بتقول انك هتشتغل فى القرية بتاعتهم .. يعنى أكيد هتمشى من

هنا ونروح نعد فى القرية التانية .. يعنى أكيد هنتقابل أنا وهى .. أنا بأه

هدد معاها وهتكلم معاها يمكن أعرف أحنن قلبها عليك

نظر اليها "آدم" بلهفه وقال :

- بجد يا ماما .. ربنا يكرمك يارب

ربتت على ظهره وقالت مبتسمة :

- متشلش هم أنا هتصرف

وقفت "أسماء" غير منتبهه لذلك الشاب الذى يقف على بعد خطوات منها

ويلقى عليها بنظرات متفحصة من رأسها الى أخمص قدميها .. كانت تمسك في يدها احدى الأورق تتفحصها بعناية .. بدأ الشاب فى الإقتراب منها قائلاً :

- لو سمحتى هو الأتوبيس بيعدى من هنا ؟
نظرت اليه ببرود وقالت :
- خفه

ابتسم بينما يقترب منها أكثر وقال :
- طيب قوليلى انتى حلوة على طول كدة ولا بالنهار بس ؟
فجأة استمعا صوتاً من خلفهما يصيح :
- لم نفسك يله

التفت كلاهما .. خفق قلبها عندما وجدت "على" قائماً خلفها يرمق الشاب بنظرات غاضبة .. التفت اليه الشاب ببرود وقال :

- حد كلمك يا كابتن
أشار اليه "على" برأسه قائلاً :
- اتفضل من هنا

عقد الشاب ذراعيه أمام صدره وهو يقول بعناد :
- ولو متفضلتش
هتفت "أسماء" بحده :

- على فكرة دة نائب مدير القرية يعني لو متحركتش من هنا بنفسك
هيجيب السيكيوريتي يحركوك
نظر الشاب اليهما شزراً ثم غادر بصمت .. التفتت "أسماء" تنظر الى
"على" مبتسمة وهى تقول :
- متشكرة أوى

لم يجيبها .. بل رمقها بنظرة غاضبة ثم التفت ليغادر .. اختفت ابتسامه
"أسماء" ثم سارت خلفه وهى تقول :
- فى ايه ؟ بتبصلى كده ليه
التفت اليها وقال دون أن ينظر اليها :
- مفيش

عاد يكمل سيرة فأوقفته مرة أخرى بقولها :
- طبعاً هتقولى ان أنا اللى غلطانه عشان لابسه ضيق وحاطه ميك أب
التفت اليها وقال :
- طالما انتى شايفه كده .. يبقى مش محتاجه تسمعى نفس الكلام منى ..
ده غير ان الموضوع ده ميخصنيش انتى حره فى لبسك

بلعت ريقها بصعوبة و عقدت جبينها وهي تقول بتوتر :
- على فكرة أى واحدة دلوقتي بتتعاكس سواء لابسه محترم أو لأ .. كده
كده بتتعاكس

نظر الى الأرض وقال بحزم :
- آه بس فى فرق بين واحدة بتتعاكس .. واحد بيرمى عليها كلمة وهو
معدى من جمبها .. وبين انه يتجراً ويقرب منها بالشكل ده ويتكلم معاها
أكنه واثق من انها هستجيب لكلامه
قالت بحدده :

- قصدك ايه بأستجيب لكلامه .. أنا مكنتش هستجيب لكلامه طبعاً ولو
مكنتش انت جيت أنا كنت هزأته بنفسى
قال بنفس الحزم :

- أنا ما قولتش انك كنتى هستجيبى أنا قولت هو كان واثق انك
هتستجيبى لان لبسك عنوان ليكي .. اللى بتلبس ضيق وهى ماشية فى
الشارع أكيد بتعمل كده عشان تلفت الانتباه ليها .. ما هى لو بتعمل كده
عشان نفسها عندها بيتها تلبس فيه اللى هى عايزاه
صمتت وقد عقدت حاجبيها وهى تنظر اليه .. فأكمل "على" بهدوء :
- أظن الكلام ده انتى عارفاه كويس اوى .. وأظن انه اتقالك قبل كده لان
صحابك كلهم —

قطع كلمته .. فقال بصوت مرتجف :
- كمل .. صحابك كلهم محترمين مش كدة ؟ .. كنت هتقول كده مش كده ؟
صمت "على" وهو يعرض على شفثيه كأنما ندم على كلمته .. لمعت عيناه
بالدموع وقالت بصوت كمن أوشك على البكاء :
- مش معنى انى بلبس كده انى مش محترمة
غادرت مسرعة قبل أن يرى تلك العبره التى تساقطت فوق وجنتها ..
وقف "على" مكانه وهو يزفر بضيق شديد !

صعدت "إيمان" الدرج الى شقة والدتها .. لكنها فوجئت بـ "كريم" فى
وجهها ينزل السلم .. شعرت بالدهشة فأخفضت رأسها ووقفت فى مكانها
حتى ينزل .. لكنه توقف وأشار اليها قائلاً :
- اتفضلى

ارتبكت بشدة وأكملت صعودها شعرت بأنه ينظر تجاهها .. حانت منها
التفاتة اليه .. لتتأكد بالفعل من أنه يركز أنظاره عليها .. استغربت ذلك

بشدة واشاحت بوجهها على الفور .. نزل الدرج وهى تصعد مسرعة
مندهشة كيف ينظر اليها هكذا .. هذه هى المرة الأولى التى تراه ينظر
اليها دون أن يغض بصره ! .. فتحت والدتها الباب وجذبتها من يدها و
..... أطلقت زغروته خافته .. نظرت اليها "إيمان" بدهشة وهى تقول :
- ايه فى ايه ؟

جذبتها أمها من ذراعها تبتعد عن الباب وهى تقول :
- ارقصى يا "إيمان" .. افرحى يا "إيمان" .. زغرطى يا "إيمان"
نظرت اليها "إيمان" وقد اتسعت عيناها دهشة وهى تقول :
- ايه اللى حصل يا ماما
قالت والدتها وهى لا تستطيع تمالك نفسها من الفرحة :
- أستاذ "كريم" طلب ايدك من أبوكى
اتسعت عينا "إيمان" وفغرت فاهها فى دهشة وتعالق خفقات قلبها وهى
تقول :
- ايه ؟

قالت أمها بحماس ممزوج بالفرح :
- والله زى ما بقولك .. مش قولتلك .. المحشى والبط جبوه على ملا وشه
.. ابقى اسمعى كلام أمك بعد كده
صاحت "إيمان" :

- محشى وبط ايه يا ماما .. طيب قوليلى كلمة عدله .. قوليلى انه معجب
بيكى يا "إيمان" .. مش محشى وبط
اختفت ابتسامة "إيمان" وهى تنظر الى أمها بشك وقالت :
- ماما أوعى تكونى بتضحكى عليا والله العظيم أروح فيها .. ماما مفيناش
هزار فى الحاجات دى

أطلقت أمها ضحكة عالية وهى تقول :
- يا بت والله حصل .. حتى اسألى أبوكى أهو أعد جوه فى البلكونه
فى تلك اللحظة خرج والدها وابتسم ليها قائلاً برزانه :
- مبورك يا "إيمان" يا بنتى .. والله الجدع شكله طيب وابن حلال ..
جهزى نفسك النهاردة ان شاء الله عشان هيبجى يعد معاكى
قالت وقلبها يقفز فى فرح :

- النهاردة
قالت أمها :
- أيوة يا بت عشان تتكلموا مع بعض قبل ما يتكلم مع أبوكى فى تفاصيل
الجواز

اتسعت ابتسامة "إيمان" ومشاعر كثيرة بداخلها .. فرح .. سعادة .. تفائل .. راحة .. خوف .. اضطراب ... حب !

- ما تزوقيني يا ماما أوام يا ماما .. ده عريسي هيجي يعد معايا النهاردة يا ماما

هتفت "آيات" بتلك العبارة وهى تلف حجاب "إيمان" .. قالت "إيمان" بمرح طفولى :

- يلا يا "آيات" عشان ألحق أطلع قبل ما ييجي ضحكت "آيات" قائله :

- طيب يا بنتى خلصت أهو

انتهت "آيات" فقامت "إيمان" تنظر الى نفسه فى المرآة .. تأملتها "آيات" قائله :

- على فكرة يا "إيمان" اتى خسيتى التفتت اليها "إيمان" قائله بلهفة :

- بجد يا "آيات"

- أيوة يا بنتى والله خسيتى .. انتى بمتوزنيش نفسك ولا ايه

- لا بخاف أوزن نفسى عشان ميجليش احباط مع انى ماشية على دايت وعلى الرياضة مبفوتش يوم

تأملت نفسها فى المرآة بسعادة وهى تقول :

- الحمد لله انه جه بفايده لو مكنتش خسيت كان زمانى محبطة .. ماما امبارح فضلت تصر عيلا آكل محشى وبط بس قولت أبداً .. مش الل

عماله أعمله من ساعة ما جيت تيجي ماما تضيعهولى فى يوم

توجهت "إيمان" الى الباب قائله بمرح :

- هطلع أساعد ماما .. وانتوا متأخروش

قالت "آيات" وهى تودعها على الباب :

- متقلقيش هلبس أنا و "أسماء" ونطلعكوا على طول

توجهت "آيات" الى غرفتها .. وجدت "أسماء" جالسه على فراشها فى الظلام .. أضاءت النور فقالت لها "أسماء" على الفور :

- سبيه مقفول

أطفأته "آيات" ونظرت الى "أسماء" بدهشة قائله :

- أعددة فى الضلمة ليه

تمتمت "آيات" بوهن :

- عادى

جلست "آيات" بجوار "أسماء" على الفراش وهي تتأملها قائلة :
- لا مش عادى .. مالك يا "أسماء" .. انتى كنتى بتعيطى
قالت "أسماء" بحده :
- مماليش .. "آيات" لو سمحتى سببى لوحدى
- مش هتطلعى معايا لـ "إيمان"
- لا مش طالعة .. لو سمحتى سببى لوحدى
- مالك يا "أسماء" ايه اللى مضايقتك
قفزت العبرات على عينيها وهي تقول بحده :
- قولتلك مفيش .. عايزة أعد لوحدى .. لو سمحتى يا "آيات"
نهضت "آيات" وهي ترمقها بنظرات حزينة قلقة .. عادت "أسماء" الى
شرودها ووجومها !

خفق قلب "إيمان" بقوة وهي تسمع جرس الباب ثم ترحيب أويها
وأخيها بـ "كريم" .. وقفت تردد بعض الآيات القرآنية عليها تهدئ من
روعها .. لكن هيات .. كانت تقرأ بلا تركيز .. ابتسمت "آيات" وهي
تتأملها قائلة :
- يا عيني .. وشك أصفر زى اللمونه .. كل ده من أخويا "كريم"
التفت اليها "إيمان" قائلة :
- "آيات" اسكتى دلوقتى أنا مش قادرة أتلّم على أعصابى
ضحكت "آيات" وقالت :
- أمال هتخرجى تعدى معاه ازاي
احمر وجهها بشدة وهي تقول :
- مش عارفه .. انا مش هقدر أخرج .. بجد مش هقدر .. اطلعى قوليله
يفوت علينا يوم تانى
أطلقت "آيات" ضحكة عالية وهي تقول :
- حلوة فوت علينا يوم تانى دى
تظاهرت بالخروج وهي تقول :
- خلاص من عنيا هروح أقولها كده
جذبتها "إيمان" من ذراعها وهي تهتف :
- انتى ما بتصدقى .. كنى هنا .. خلينى اعرف اسمع اللى بيحصل بره
بعد دقائق دخلت والدتها قائلة بحماس :
- يلا يا "إيمان" .. تعالى قدمى العصير عشان تعدوا تتكلموا مع بعضيكوا
.. الراجل مستنى بره

قالت "إيمان" وقد شعرت بأنها على وشك البكاء :
- لأ مش عايزه .. مش هقدر اخرج .. هو لازم يعني يتكلم معايا
نظرت اليها أمها وقد اتسعت عيناها وهي تقول :
- يلا يا بت بلاش دلع الراجل مستنى بره
ثم تأملتها هاتفه :
- ايه ده يا منيلة .. ما تحطى حاجة على خلقتك دى .. استنى أما أجبك قلم
الكحل وصباح الروج بتاعى
أوقفتها "إيمان" قائلة بحزم :
- مش هحط حاجة ريحي نفسك
شهقت أمها قائلة بغيظك :
- يا بت اسمعى كلامى يا بت .. حطى اى حاجة على خلقتك تديكى منظر
- قولتك لا يا ماما
تدخلت "آيات" قائلة :
- متقلقيش يا طنط هي كده زى القمر مش محتاجة حاجة .. وبعدين
"كريم" عارف انها مبتحطش ميك أب
قالت وهي تغادر:
- انتوا حرين .. بنات فقر صحيح . يلا يا "إيمان" انجزى
وقفت "إيمان" وهي تشعر بأن قدميها تصطكان ببعضهما البعض .. ظلت
تردد بعض الأذكار .. وهي تأخذ من والدتها الصنية .. اهتزت الأكواب من
رعشة يديها واضطرابها فاعطتها الى والدتها مرة أخرى قائلة :
- بقولك ايه شيليتها انتى .. انا لو خدتها ودخلت بيها هتدلق منى وهيبقى
شكلى زبالة
قالت أمها بتبرم :
- آه يانى .. طيب ادخلى .. خلصينا الراجل مستنى
كادت "إيمان" أن تبكى وهي تقول :
- طيب ناجلها ليوم تانى
اتعت عينا أمها وهي تنظر اليها وقالت بحزم وهي تضغط على أسنانها :
- "إيمان" .. اتبلى ادخلى متفقعيش مرارتى
دخلت "إيمان" مطرقة الرأس وقد تحولت بشرة وجهها البيضاء الى
اللون الأحمر .. نسيت أن تلقى السلام .. جلست بسرعة على أول مقعد
وجدته أمامها .. لا تدرى حتى أين يجلس "كريم" .. سمعت والدها يقول :
- منور يا أستاذ "كريم"
أتاها الصوت من المقعد المجاور لها :

- ده نورك يا عمى
قالت فى نفسها : يا دى الخيبة .. هو انت اللى آعد جمبي .. هتفتكر
دلوقتي انى ما صدقت وروحت آعده جمبك !
ودت لو نهضت من مقعدها وتخير مقعد آخر بعيد عنه .. لكنها لم تجد فى
قدميها القدرة على حملها .. كاد قلبها أن يتوقف عندما التفت "كريم"
اليها قائلاً :

- ازيك يا آنسة "إيمان"

كان هذا هو أول حوار مباشر يجريه معها منذ اجتماعهما الأول والذى
انتهى بخروجها من الاجتماع بغضب .. توترت للغاية فلم تستطيع الرد ..
حاول كثيراً الحديث معها .. لكنها شعرت كما لو أن لسانها قد قُطع من
فمها .. لم تجد فى نفسها الجرأة على الرد عليه على الإطلاق .. كان أخيها
وأبيها يجيبان بالنيابة عنها .. شعرت بأنها ما هى الا لحظات وستفقد
وعيها .. جلست تلك الجلسة مرات عديدة من قبل .. لكن تلك المرة الأمر
مختلف .. لأن هذه المرة قلبها يخفق لهذا الرجل الجالس بجوارها ..
انتهت الزيارة بعدما قال "كريم" لأخيها وأبيها :

- هنتظر الرد وول فى قبول .. يبقى أفضل كتب كتاب على طول لأن
الخطوبة بالنسبة لنا مش هيبقى ليها لزمة
عادت "إيمان" الى غرفتها وهى تشعر أنها فى حلم تخشى الاستيقاظ منه
.. حلم خافت أن تغمض عينيها حتى لا تفقد لحظة واحدة من الشعور به

تلقى "كريم" خبر انضمام "آدم" و "زياد" الى القرية بمزيج من القلق
والضيق .. قال "فؤاد" عبر الهاتف :

- أنا عارف المشاكل الى حصلت بس فعلا الرجل عنده خبره كبيره خو
وصاحبه وهيبقوا أكيد مكسب للقرية
قال "كريم" شارداً :

- مع حضرتك فى كده .. بس حضرتك عارف اللى حصل واللى اتنشر فى
الجرايد

- لا متقلقش يا "كريم" .. أصلاً الأخبار دى بتتنسى ومحدثش بيفتكرها
وكمان هما لا ممثلين ولا ناس مشهورة عشان الواحد يفتكر خبر زى ده
عنهم .. ده غير القضية اللى انت رافعها على الجريدة واللى أكيد بتثبت ان
الخبر ده كذب

قال "كريم" بضيق :

- مش عارف .. برده مش مرتاح لشغله فى القرية .. يعنى حضرتك عارف

انه كان بيتشغل فى جولدن بيتش وانت عارف جولدن بيتش عامله ازاي
.. هو لو متوقع انه هيعمل هنا ما بداله يبقى غلطان

قال "فؤاد" على الفور :

- لا اظن .. هو عارف القوانين كويس وأكد هيلتزم بيها .. وبصراحة أنا
شايفها فرصة هائلة بالنسبة لنا انه يبقى من فريق عمل القرية لأن لا أنا
ولا انت لينا خبرة فى المجال ده
تنهد "كريم" باستسلام قائلاً :
- طيب ربنا يقدر الخير

اتصل "كريم" بأبويه ينبئهما بالخبر السعيد .. هتفت أمه قائله :

- أخيراً هتفرح قلبي

ابتسم قائلاً :

- أوية أخيراً

- قولى حلوة

زى القمر .. لما تشوفها هتحبها طيبة وبنت حلال

- باباها وماماتها بيشتغلوا ايه

- باباها على المعاش ومامتها ست بسيطة بمتشتغلش .. هما ناس بسيطة

اوى بس محترمين جداً .. أخوها شغال معايا فى القرية النائب بتاعى

راجل محترم وأخلاقه عاليه

قالت "أمه بسعادة :

- بنا يتملك على خير يا "كريم"

- انتوا باه هتنزلوا امتى .. أنا عايز أكتب الكتاب على طول

- للأسف لا أنا ولا باباك هنعرف ننزل قبل 4 شهور على الأقل

هتف "كريم" :

- 4 شهور .. لا انتوا كده تنزلوا على الفرع بأه

- طيب يا "كريم" خليها خطوبة دلوقتى ولما ننزل اكتب الكتاب

- خطوبة ايه يا ماما .. و 4 شهور كمان .. ولا ليها أى لازم بالنسبة لى لا

هعرف اتكلم معاها براحتى ولا هعرف أشوفها براحتى .. لا أنا هكتب

الكتاب دلوقتى وانتى وبابا لما تنزلوا يبقى الفرع ان شاء الله

- طيب اديني رقمها عشان أكلمها

- مش معايا رقمها هجيبه من أخوها وأبعتهولك فى رسالة .. بس لما

يردوا عليا لانهم لسه مردوش

- يا حبيبى هو فى بنت هتلاقى واحد أحسن منك .. مبروك مقدماً

جاء رد "إيمان" وأهلها بالموافقة .. وتم الاتفاق على كتب كتابهما فى نهاية الإِسبوع فى قرية الماسة !

- "سمر" هستناكى ولو مجتيش بجد هزعل منك
هتفت "إيمنا" بهذه العبارة وهى تتحدث الى "سمر" التى قالت :
- بتهرجى لا طبعاً لازم هاجى .. ألف مليون مبروك يا "إيمان" ربنا
يتمملك على خير
قالت "إيمان بحماس :
- اعملى حسابك انك هتعدى معنا شوية انتى وطنط .. الشقة اللى احنا
أعدين فيها .. فيها 3 أوض و "أسماء" بتبات مع "آيات" ففى أوضة
فاضية طنط تاخده وانتى تباتى معايا
- خلاص اتفقنا هقول لماما وآهى فرصة الواحد يغير جو كام يوم ده أنا
مطحونة فى الشغل يا بنتى
- خلاص اتفقنا بجد .. متتصوريش أنا فرحانه أد ايه انى هشوفك
- أنا اللى فرحانه جدا انى هشوفك انتى و "آيات" و "أسماء"

فى اليوم الموعود .. كان نفس اليوم الذى تسلم فيه "آدم" و "زياد"
عملهما فى القرية .. شعر "كريم" ببعض القلق من وجود "آدم" ..
خاصة بعدما عرف من "آيات" أنه تحدث معها يوم أن كانوا فى القاهرة
.. لذلك قال له بحزم :
- وجودك فى القرية أكيد هيفيدنا كتير يا دكتور .. بس ياريت تبقى وجودك
هنا للشغل وبس
نظر اليه "آدم" وقد أدرك ما يقصده .. فأكمل "كريم" بنفس الحزم :
- ماشى يا دكتور ؟
قال "آدم" بهدوء :
- أنا مستحيل أضايق "آيات" .. أو أأذيها .. متقلقش منى
أقبل "زياد" وهو يربت على كتف "كريم" قائلاً بمرح :
- مبروك يا عريس
ابتسم "كريم" قائلاً :
- الله يبارك فيك يا "زياد" عقبالك ان شاء الله
قال "آدم" مبتسماً :

- يلا روح انت ربنا يعينك أكيد وراك حاجة كثير .. متقلقش أنا و "زياد"
هنا

أوما "كريم" برأسه والتفت الى "زياد" وقال :

- مستميك ان شاء الله متتأخرش

- طبعاً ودى تيجي

ثم نظر الى "آدم" قائلاً بحرج :

- وانت كمان يا دكتور ياريت تنورنا

كان "آدم" بعلم أنها ما عزمه الا مضطراً ومجاملاً ليس إلا . لكن "آدم"

ما كان ليترك فرصة تقربه فيها من "كريم" .. عله يغير الفكرة التي

كونها من كلام "آيات" عنه .

تعالت الزغاريد .. ارتدت "إيمان" فستاناً وردى اللون .. ووضعت القليل

من مساحيق التجميل والتي أبرزت جمالها .. صفقت لها "آيات" شعرها

بعناية بشكل جميل .. كانت سعيدة وهي تنظر الى نفسها فى المرآة وقد

بدت بشكل لم تتوقع أن تراه فى مراتها يوماً ..

جاءها اتصال من "سمر" تخبرها بأنهما على مشارف القرية .. خرجت

"إيمان" وقالت لـ "على" بلهفة :

- "على" ربنا يكرمك .. "سمر" ومامتها أدام البوابة ممكن تروح

تجيبهم

توجه "على" الى البوابة فوجد سيارة تقودها سيدة كبيرة وبجوارها

"سمر" .. هز رأسه واقترب من المرأة قائلاً :

- أهلاً وسهلاً

ابتمست قائله :

- أهلاً بيك

أشار لها "على" بالطريق الذى يجب أن تسير فيه .. فقالت له :

- طيب اركب معانا

قال بحرج :

- لا اتفضوا

رمقته "سمر" بطرف عنيفا قبل أن تنطلق أمها بالسيارة .. كان لقاء

الفتاتان حاراً :

- وحشتيني أوى أوى أوى

- انتى كمان يا "سمر" وحشتيني أوى

كادت الدموع أن تفر من عيني "إيمان" فصاحت "آيات" :

- لا أبوس ايدك أنا ما صدقتش انى ظبطته
تعاقت "آيات" و "سمر" فى اشتياق وكل منهما سعيدة بروية الأخرى
التفتت "سمر" قائله :
- أمال فين "أسماء"
قالت "آيات" بحزن :
- تحت تعالى ننزلها

حضر المأذون .. و ... تم زواج "كريم" و "إيمان" وسط فرحة الأهل
والأصدقاء .. لم تتوقف والدة "إيمان" عن الزغاريد كانت سعادتها لا
توصف بالكلمات ولا بالعبارات .. بكت أكثر من مرة وهى تتطلع الى ابنتها
التي قالت بمرح :
- ماما محسسانى انى اتجوزت خلاص .. ده كتب كتاب يعني أعدالك مش
راحه فى حته
استأذن "كريم" ليدخل للعروس يلبسها شبكتها .. صاحت "إيمان" فى
لوعة :

- لازم يعني ؟

ضحكت "آيات" قائله :

- لا مش لازم خالص .. ربنا معاك يا أخويا يا حبيبي
دخل "كريم" متوجهاً اليها وقفت وهى تنظر أرضاً وهى تسمع صوت
خفقات قلبها المضطرب داخل صدرها .. مد يده اليها .. فتسمرت مكانها
وهى تفرك يديها بتوتر .. ضحك ضحكة خافته وهو يقول :
- مش هاكلها متخفيش .. أنا هلبسك الشبكة بس
أطلقت "آيات" ضحكة عالية
بينما أطلقت "سمر" وأمها ضحكات خافته .. نظرت اليها والدتها قائله :

- بت يا "إيمان" اخلصى

كادت أن تبكى وهى تتمتم بصوت مضطرب :

- هلبسها أنا

ابتسم "كريم" قائلاً :

- طيب ماشى .. ممكن ألبسك الدبلة على الأقل
أومأت برأسها وهى مازالت تنظر أرضاً .. وبعد عناء ومجاهدة للنفس ..
مدت يدها لترسى الكهرباء فيها بعدما التقطها "كريم" فى راحته ..
ألبسها دبلتها وهى لم تستطع منع تلك البسمة التى قفزت الى شفيتها ..

أعطاها دبلته الفضية لتلبسه اياها .. اختفت ابتسامتها وهي تقول بصوت خافت :

- لازم ؟

ضحك بخفوت قائلاً وهو يرتديها بنفسه :

- لا مش لازم دلوقتي نأجلها بعدين

أطلقت والده "إيمان" زغروته عاليه .. خرج "كريم" يستقبل التهاني بالخارج .. بينما جلست "إيمان" مع صديقتها وهي تشعر بسعادة لم تشعر بها من قبل

انحنى "آيات" على "سمر" قائله :

- هنزل أشوف "أسماء" وأجى

أومأت "سمر" برأسها .. خرجت "آيات" من الشقة .. لكن فجأة تجمدت فى مكانها وهي ترى "آدم" الواقف أمام الباب يتحدث فى الهاتف .. أغلق سريعاً بمجرد أن رآها .. نظرت أرضاً .. وبدأت فى نزول الدرج .. هتف قائلاً :

- "آيات" .. ممكن بس أقولك حاجة

قالت وهي تستمر فى النزول دون أن تلتفت اليه :

- لا مش ممكن

نزل مسرعاً ووقف أمامها يعترض طريقها .. نظرت اليه بغضب وصاحت :

- ابعده لو سمحت

وقف أمامها بعناد قائلاً :

- اسمعيني الأول

صاحت بحده :

- مش عايزه أسمعك .. ابعده من أدامى

- "آيات" أنا عارف انى غلطت .. بس أنا كنت مضطر .. ليه مش عايزه تفهمى

نظرت اليه بإحتقار قائله :

- وأنا كنت فى الشارع من غير بيت ومن غير فلوس لكن معملتش زيك .. رغم انى بنت وضعيفه .. وكان ممكن أضيع نفسي .. بس أنا حافظت على نفسي لانى مش دى أخلاقى ولا دى تربيتى

أطرق "آدم" برأسها وقد ألمه كلامها بقدر ما ألمه نظرة الإحتقار فى

عينها .. ابتعد وأفسح لها الطريق .. نزلت مسرعة وهي تحاول منع

الدموع من التجمع داخل عينيها .. توجهت الى غرفة "أسماء" فوجدتها

تقف فى الشباك .. اقتربت منها قائلة :
- "أسماء" أعدده هنا لوحدك ليه .. يا بنتى اطلعى اعدى معانا
التفتت اليها "أسماء" وقالت بوجودوم :
- لا مش عايزه .. اطلعى انتى
وقفت "آيات" بجوارها وهى تقول بحنان :
- طيب قوللى مالك
سقط ضوء القمر على عينيها فلمعت فيهما الدموع .. ثم نظرت الى
"آيات" قائلة بصوت باكى :
- حسه ان مليش مكان بينكوا
قالت "آيات" وهى تربت على ظهرها :
- ليه بتقولى ده
صاحت "أسماء" وهى تبكى :
- عشان هى دى الحقيقة .. أنا فعلاً مليش مكان هنا .. بس أنا مش عارفه
أروح فين .. انا لو فكرت أمشى من هنا مش هعرف أروح فى حتة
قالت لها "آيات" بحنان :
- وليه عايزة تمشى من هنا يا "أسماء" .. فى حد ضايقتك ؟
أطرق برأسها وهى تهزها نفيماً وتقول بصوت خافت :
- لا مفيش حد ضايقتى
- لا أنا حسه ان فى حد ضايقتك .. انتى كنتى كويسه .. لكن بقالك كام يوم
مش مضبوطة خالص .. أكيد فى حاجة حصلت
مسحت "أسماء" عبراتها وهى تقول :
- لا متشغليش بالك .. يلا اطلعى عشان "إيمان"
قالت "آيات" بإصرار :
- مش هطلع الا اذا طلعتى معايا
نظرت اليها "أسماء" بحزم وهى تقول :
- أنا مش هطلع .. اطلعى انتى لو سمحتى .. انا بجد حبه أفضل لوحدى
شوية .. معلىش يا "آيات" بس فعلاً مش حبه أتكلم فى أى حاجة
قالت "آيات" باستسلام وهى ترمقها بنظرات حزينه :
- طيب خلاص زى ما تحبى .. بس أتمنى فعلاً تفتحلى قلبك وتقوللى فى
ايه .. أنا مبخبيش عنك حاجة أى حاجة بحكيها لك .. بس انتى على طول
كدة بتشيلى جواكى ومبتكلميش
لمعت العبرات فى عينيها مرة أخرى وهى تقول :
- أنا كويسة متقلقيش

عادت "أسماء" تتطلع من الشباك وتغرق في شرودها من جديد

استأذن "كريم" من والد "إيمان" في الخروج برفقتها .. بدلت "إيمان" ملابسها وأزالت المكياج .. واستعدت للخروج برفقة "كريم" .. انصرفا معاً وهي تشعر بالتوتر الشديد لخروجها لأول مرة بصحبة رجل .. حاولت أن تقتنع نفسها بأن هذا الرجل أصبح زوجها .. لكنها لم تستطع على الرغم من ذلك اخفاء توترها واضطرابها وشعورها بشئ غريب ليست معتاده عليه من قبل .

قبل أن تنصرف "آيات" برفقة "سمر" ووالدتها .. أقبلت عليها والدة "إيمان" قائلة :

- خدى يا "آيات" الطبق ده بتاع "أسماء" .. أنا مش عارفه مطلعتش ليه وفضلت أعد له لوحدها تحت كده
توقف "على" عن جمع الأطباق بعدما استمع الى ما قالتة أمه .. سمع "آيات" تجيب :

- والله ما عارفه يا طنط اترجتها كثير بس مرضيتش خالص وشكلها مضايقة ومش راضية تقولى ايه اللى مضايقتها .. أكيد حاجة فى الشغل ضايقتها

- طيب يا حبيبتي اديها الطبق ده والحاجة الساقعة عقبال ما افرح بيكوا
كلكوا ان شاء الله

تنهد "على" بضيق وهو يشعر بأنه السبب فى ذلك .. بعدما تحدث معها بهذا الحديث الذى ضايقتها وجرحها

جلست "إيمان" أمام "كريم" على الطاولة فى ذلك المكان الهادئ .. تنظر الى يديها اللتان تعرقتا من كثرة فركها اياهما .. رفعت نظرها لتتلاقى نظراتها بنظرات "كريم" فأخفضت عينيها على الفور .. ابتسم لها قائلاً :

- طيب بلاش تبصيلي .. اتكلمى

لم تجيب .. فقال :

- تعرفى انك من يوم ما جيتي القرية دى وأنا مسمعتش صوتك
ظلت مطرقة برأسها وتوترها يتزايد .. فقال :

- طيب هسألك سؤال بسيط .. انتى وافقتى عليا ليه

حاولت التحدث فلم تستطع .. تنهد "كريم" قائلاً وهو يرجع ظهره للخلف

:
- شكلك هتتعبيني
رفعت عينيها تنظر اليه تتبين هل هو غاضب منها أم لا .. لكنه فاجأها
بابتسامته العذبة ونظرات عينية المرححة .. فابتسمت وهي تبعد عينيها
عنه .. فقال بمرح :
- طيب على الأقل بتبتسمى .. أحسن الناس لو بصت علينا هيفتكرونى
خاطفك

تمتت بصوت خافت :
- أنا بس متوترة شوية
أسند مرفقيه على الطاولة وهو يقول مبتسماً :
- لا ما أنا شايف مش محتاجه تقويلي
ثم تتم بعتاب :
- كده متلبسينيش الدبلة ؟
قالت بصوت مضطرب :
- معلىش

- ايه معلىش دى .. أصرفها منين يعني .. فى عروسة ترفض تلبس
عريسها الدبلة
نظرت اليه وقد عقدت جبينها وهي تقول :
- معلىش مكنش قصدى أضايقك
نظر اليها بمرح قائلاً وهو يشير الى الدبلة فى اصبعه :
- ماشى بس خلى بالك أنا لبستها لنفسى مؤقتاً بس
ابتسمت وقد أطرقت برأسها فى خجل

انتهت سهرتهما وعادا الى البناية .. شعرت "إيمان" بسعادة كبيرة فقد
استمتعت طيلة السهرة بشخصيته المرححة ابتسامته العذبة حتى وإن لم
تتحدث معه الا قليلاً .. لكنها كانت سعيدة لأنه لم يظهر ضيقه منها لهذا
السبب .. بل أبدى تقديراً لموقفها ولمشاعرهما .. توقفاً أمام بابيهما
المتلاصقين .. التفت اليها "كريم" مبتسماً وهو يقول :
- ايه رأيك نتغدى مع بعض بكرة
ابتسمت بخجل وقالت مطرقة برأسها :
- ان شاء الله
نظر اليها قائلاً :
- طيب بصيلي طيب
حاولت فلم تستطع .. توترت قائلة :

- انا هدخل بأه
قال "كريم" :
- ماشى اتفضللى
التفتت لفتح الباب .. فوجئت به يمسك ذقنها ويدير وجهها اليه .. نظرت
اليه لتتلاقى عيناها للحظات .. قال مبتسماً :
- تصبى على خير
صمت لبرهه .. ثم تمت بصوت خافت وهى مازالت تنظر الى عينيه
التي شعرت بوجود قوة مغناطيسيه تجذبها اليهما :
- تصبى على خير

ألقت "إيمان" بنفسها فوق فراشها والابتسامه على محياها .. لم تجد فى
نفسها الرغبة للنهوض وتبديل ملابسها .. فقد جلست سابعة فى فضاء
خيالها تتذكر تلك الليلة بكل تفاصيلها .. لا تدرى الى كم من الوقت ظلت
هكذا فى مكانها بلا حراك .. سمعت رنين هاتفها فوجدت رقماً غريباً ..
خمنت أنه لـ "كريم" .. فلم تعتاد اتصال أرقام غريبة بها وفى هذا الوقت
.. رد قائله بصوت خافت :

- السلام عليكم
أتاها صوته :

- و عليكم السلام .. صحيتك
قالت بسرعة :

- لا أصلاً لسه منمتش
قال بحنان :

- أنا بس اتصلت أقولك انى النهاردة مش عايز أظبط المنبه عشان
يصحيني للفجر .. عايزك انتى تصحيني .. ممكن ؟
اتسعت ابتسامتها وهى تقول :

- ممكن

صمت قليلاً ثم قال بخفوت :

- خلاص هعتمد عليكى .. تصبى على خير

- و انت من أهل الخير

كان بينها وبين الفجر عدة ساعات .. لكها علمت أنها لن تستطيع النوم ..
أسندت رأسها الى وسادتها والبسمة لا تفارق ثغرها !



في صباح اليوم التالي استيقظت كل فتاة منهن بمشاعر مختلفة عن الأخرى .. استيقظت "إيمان" ببسمة على ثغرها وخفقات قلبها التي تشي بسعادتها وهنائها .. ولمعة عينيها التي تراها لأول مرة وهي تنظر في مرآتها .. نظرت الى تلك الدبلة التي تزين أصابعه وأخذت تتحسسها في سعادة .. "أسماء" استيقظت مثقلة القلب بالهموم .. كسيرة الفؤاد .. حزينه العينين .. تحاول التغلب على ما بداخلها والتظاهر بأنها أفضل

"سمر" استيقظت وهي ترى بشارات الصباح من الشرفة .. تتطلع الى البحر أمامها وهي تفتح لهوائه رئيتها لتعبئها برائحته الذكية المنعشة .. شعرت كالطائر الحر الذي يسبح في الفضاء الشاسع .. لكن قلب هذا الطائر يتمنى بشدة أن يجد وليفه الذي يركن اليه .. ويسكن اليه .. ويطمئن لقربه .. "آيات" استيقظت على مشاعر .. غضب .. ألم .. جراح .. أحزان .. ذكريات مريرة .. لكن تتخلل كل تلك المشاعر القاسية .. لمسة من .. حنين !

ابتدأ اليوم بتلك المشاعر التباينه على الفتيات الأربعة .. فنبداً معاً أحداث هذا اليوم العجيب !

دخلت "آيات" المطبخ لتسمع ضحكات ومزاح "إيمان" و "سمر" اللاتان تعدان طعام الإفطار فحيتها مبتسمة :

- صباح الخير

التفتت الفتاتان اليها :

- صباح النور

- صباح النور

خرجت "أسماء" من الحمام وحاولت رسم بسملة على شفتيها وهي تقبل
"إيمان" قائلاً :

- ألف مبروك يا "إيمان"

قالت "إيمان" وهي تتظاهر بالغضب :

- لا أنا زعلانه منك بجد

- والله عارفه انك أكيد علانه .. بس فعلاً أنا كنت تعبانه .. معلى ملحوقه
تتعوض فى فرحك ان شاء الله

التفت الأربع فتيات حول طاولة الطعام .. قالت "سمر" :

- طبعاً هتسيبوني وتروحوا شغلوكوا

ابتسمت "آيات" قائله وهي تلوك الطعام فى فمها :

- أيوة طبعاً أمال عايزانا نعد جمبك ولا ايه

قالت "سمر" بحزن :

- طيب هعمل أنا ايه لوحدى .. هحس بملل فظيع

قالت "إيمان" ملتفته الى "آيات" :

- متخلى "سمر" يا "آيات" تروح العيادة بدل الدكتوراة اللي واخدة أجازة
النهاردة

هتفت "آيات" :

- والله فكرة

قالت "سمر" بإستغراب :

- عيادة ايه

قالت "آيات" شارحة :

- افتتحنا عيادة أطفال هنا فى القرية .. عيادة صغيرة بس ما شاء الله

الإقبال عليها حلو أوى .. بس الدكتوراة اعتذرت لمدة اسبوع .. ايه رأيك

لو حسيتى انك هتملى تعالى اعدى فيها شوية

قالت "سمر" بحماس :

- أكيد طبعاً .. أنا أصلاً رغم ارهاقى فى الشغل إلا انى بعشقه .. بجد بعشق

الأطفال أوى ونفسى أفضل حواليه على طول .. بحس فيهم بالبراءة

وبحاجات كتير لسه موجودة جوايا ..

ثم شردت قائله وسحابة حزن فى عينها :

عارفين .. ساعات بحس انى طفلة .. ولما بشوف أب حنين على ابنه

الصغير بقول فى نفسى يارتنى رجعت صغيرة تانى ولقيت حد يتعامل معايا
بحنية كدة ويحسنى انه بابا وانه مسؤل عنى .. عمرکوا شوفتوا واحدة
بتمنى راجل يحسها انه باباها .. أهو أنا بتمنى كده
ثم قالت :

- نفسى فى راجل أغمض عيني وأنا واثقه انه مش هيضيعني .. أرمى كل
همومى وخوفى وحمولى عليه وأنا واثقه انه هيكون أد المسؤلية
نهضت "أسماء" فجأة قائله :

- أنا همشى

نظرت اليها "آيات" قائله :

- طيب استنى هخلص أهو ونمشى سوا

لم تترك لها "أسماء" فرصة للحديث بل قالت وهى تحمل حقيبتها وتغادر
:

- لا هسبأکوا عشان ورايا حاجات كتير

جلس "آدم" و "زياد" بصحبة "على" و "كريم" فى مكتب هذا الأخير
.. قال "كريم" :

- زى ما اتفقنا وقسمنا الشغل بينا يا شباب .. أهم حاجة عندى ان يكون
فى تنسيق بينا .. وأنا مش ديكتاتور .. يعنى اللى يكون عنده مقترحات
أفضل أو أساليب أفضل لسير العمل يبلغنى بيها
ابتسم "آدم" قائلاً :

- تمام يا "كريم" .. انت كدة سهلت علينا كتير .. وكمان ميزتك انك
بتحسس اللى بيشتغلوا عندك انهم بيشتغلوا معاك مش عندك
قال "زياد" بحماس :

- أنا بجد اتحمست أوى للشغل هنا

نظر "كريم" الى ساعته وقال :

- معدش الا ساعة على صلاة الجمعة .. نتقابل فى مسجد القرية ان شاء
الله

أثناء انصراف الرجال من مكتب "كريم" .. توجهت "آيات" الى المكتب
.. وقف "آدم" أثناء خروجه ينظر اليها وحيها قائلاً :

- صباح الخير
تجاهلته تماماً ودخلت المكتب ! .. ربت "زياد" على كتف "آدم" وساقه
بعيداً .. قالت "آيات" مبتسمة :
- "كريم" عايزه منك خدمه
- خير يا "آيات" أوامري
قالت وهي تجلس أمامه :
- هما خدمتين مش خدمة واحدة .. الخدمة الأولى . صحبتي "سمر" اللي
هيا صحبة "إيمان" اللي جت امبارح من القاهرة عشان تحضر كتب
الكتاب
- آها مالها
- هي دكتورة أطفال .. وما شاء الله عليها ممتازة أوى وبتحب شغلها ..
وبما ان الدكتورة اللي فى عيادة الأطفال فى أجازة ايه رأيك سمر تشتغل
فى العيادة بدلها
- بس يا "آيات" .. البنت جاية عشان تحضر كتب كتاب صحبتها
وتريحلها يومين فى القرية نقوم نقولها تعالى اشتغلى عندنا
قالت "آيات" بحماس :
- لا بالعكس دى مرحبة جداً .. أصلاً زى ما قولتلك هى بتحب شغلها أوى
وكانت مضايقة اننا كلنا هنكون فى الشغل وهنسيبها لوحدها
- طيب خلاص طالما كدة مفيش مشكلة
- تسلم يا "كريم" .. الطلب التانى باه .. عايزة أخرج النهاردة أشتري
شوية لبس
نظر الى ملابسها قائلاً :
- ماشى مفيش مشكلة .. نفس الستايل كدة
ابتسمت قائله :
- لا ستايل تانى .. بصراحة عايزة ألبس لبس يرضى ربنا باه .. مش
عايزة أحس انى مقصرة فى موضوع اللبس ده .. يعني مش عايزة أحسن
ان ربنا غضبان منى عسان لبسى
ثم نظرت الى ملابسها قائله :
- هو لبسى أحسن من الأول بكثير .. بس برده حسه ان لسه .. نفسى
أكون زى "إيمان" و "سمر" كدة .. لبسهم محترم ومش ملفت
ابتسم "كريم" قائلاً :
- والله فرحتيني يا "آيات" .. طيب ايه رأيك باه ان أنا هاجى معاكى
ونختار اللبس سوا .. وأى حاجة انتى عايزاها هتكون هدية منى ليكي

قاتل مبتسمة :

- لأ أنا اللي عايزة أشتريهم أنا معايا فلوس متقلقش

قال بحزم :

- خلاص انتهت .. وبعدين سيبيني آخذ الثواب ده .. كل ما تبقى لابسه حاجة واسعة أنا جايهالى هاخذ أنا الثواب عليها .. متحرمينش بأه من الثواب ده لو سمحتي

ابتسمت بإستسلام قائله :

- بس أنا عايزة أروح النهاردة

قال لها بمرح :

- أمرك يا باشا .. أصلى الجمعة واخذك ونروح نجيب اللبس على طول ..

بس كدة دي "آيات" هاتم تؤمر والعبد لله ينفذ

ضحكت قائله :

- ماشى يا سيدى واضح ان مزاجك على النهاردة .. طبعاً مش كتب كتابك

كان امبارح

لاحت ابتسامة واسعة على شفثيه وهو يقو :

- عارفة بمجرد ما كتبنا الكتاب و أنا حسيت ان قلبي ده عمال يرفرف

بجنحاته .. رغم انى مش كدة خالص .. يعني بحس انى راکز ومش خفيف

.. بس حسيت امبارح انى أخف من الريشة

أطلقت ضحكة عالية وقالت :

- فينك يا "إيمان" تسمعى الكلمتين دول عشان تعرفى تأثيرك فى أخويا

- هى على فكرة بنت حلال أوى .. وأكثر حاجة عجبانى فيها حياها ..

متتصوريش الصفة دي لما بتكون فى البنبت بتخليها جميلة فى عين

الراجل ازاي

ابتسمت "آيات" وهى تنظر اليه بسعادة قائله :

- ربنا يباركلكوا فى بعض .. انتوا الاتنين طيبين وتستاهلوا كل خير

توجهت اليه بعدما أخذت نفساً عميقاً .. حاولت ألا تنظر اليه وهى تقول :

- لو سمحت يا أستاذ "على" عايزة امضة حضرتك على الطلب ده

التفت "على" اليها .. وتناول الملف من يدها .. قرأه بدقة ثم زيله بتوقيعه

.. استعادت منه الملف وهمت بالإنصراف .. باغتها قائلاً :

- أنسة "أسماء"

توقفت دون أن تنظر اليه .. بدا عليه التوتر والإضطراب .. قال :

- أنا آسف .. انا مكنش قصدى انى أجرك بكلامى
ظهر الحزن فى عينيها لكنها قالت بصعوبة :
- عادى محصلش حاجة

همت بالإصراف لكنه أوقفها مرة أخرى وقال :
- انا كل اللى كان قصدى أقوله ان صحابك أكيد اتكلموا معاكى فى
الموضوع اللى كنا بنتكلم فيه وقتها .. يعنى مش محتاجة تسمعى أكثر من
اللى سمعته عشان تنفذى وتختارى صح
أطرقت "أسماء" برأسها قليلاً ثم نظرت اليه قائلة بألم :
- أنا للأسف غيرهم .. مكنش ليا أب وأم يقولولى الصبح من الغلط .. كانوا
مدينى حرية فى حاجات كتير منها لبسى .. صعب أوى ان حد عاش كدة
تيجى فجأة وتقوله انت غلط وان الصبح كذا .. غصب عنى مش عارفه
أتقبل ده

تههد "على" ثم قال وهو ينظر أمامه :

- مش صعب لو الانسان ده عرف ان ربنا هو اللى أمره بكده .. ربنا هو
اللى قال ان ده صح .. وان ده غلط .. وعلى فكرة طالما الانسان ده مكنش
يعرف الصبح من الغلط ومحدث نبهه ده يعذر لجهله .. وربنا يغفرله ان
شاء الله على اللى فات من حياته .. لكن طالما عرف .. يباه كدة أقيمت
عليه الحجة .. ويبتدى يتحاسب .. أيوة كان جاهل .. بس دلوقتى معدش
جاهل .. وعرف الصبح من الغلط .. مينفعش يفضل مستمر فى الغلط ويقول
أصلى مكنتش أعرف .. لأ انت دلوقتى عرفت يبقى تلتزم بكلام ربنا وتنفذ
شعرت براحة غريبة وهى تتحدث اليه .. قالت وهى تنظر اليه :
- بس أنا أحسن من بنات كتير .. حتى لو لبسى ضيق .. بس أنا محترمة
فى تعاملاتى ومش بسمح لحد انه يتجاوز معايا .. انت من ساعة ما انا
اشتغلت هنا سمعت عنى كلمة وحشة أو شوفت منى حاجة وحشة ؟

قال "على" بهدوء :

- لأ مشفتش منك حاجة وحشة ولا سمعت عنك حاجة وحشة

قالت "أسماء" بحماس :

- ربنا رب قلوب .. يعنى هو مطلع على تصرفاتى وعلى اللى فى قلبى ..
وده أهم كتير من المظاهر .. أهم كتير من انى ألبس محترم بس أبقى بنت
مش كويسة وأتعامل مع الشباب بطريقة وحشة .. فى بنات كتير أوى
محترمة أوى فى لبسها بس مش محترمة فى تصرفاتها
صمت "على" للحظات ثم قال :

- وانتى ليه تبصى للى محترمة فى لبسها ومش محترمة فى تصرفاتها !

.. ما تبصى للى محترمة فى الاتنين .. لازم الواحد يبص للى أعلى منه
مش اللى أقل منه .. اللى يبص للى أقل منه ويقول أنا أحسن ده يبفضل
طول عمره تحت ومبطلعش أبداً ولا بيتقدم .. لكن اللى يبص للى أعلى
منه بيحب يقلده وبيحب يوصله وأكد هيوصله .. وبعدين أيوة ربنا عارف
الى فى قلبك ومطلع عليه مختلفناس فى دى .. بس برده ربا أمرك
بحاجات لازم تنفذها .. يعنى ينفعش متبقيش بتصلى وقتولى ربا رب
قلوب ربنا عالم باللى فى قلبى وانى بنت كويسة .. طيب ما تصلى .. مش
هو أمرك تصلى .. صلى .. ايه اللى منعك .. لو انتى فعلاً كويسة ومسلمة
أمرك لله ومستسلمه لله ولأوامره ولنواهيته .. هتصلى لأنه أمرك تصلى ..
اهو ربا أمرك تتحجى .. وبمواصفات معينة .. مينفعش تتحجى على
مزاجك أو بالطريقة اللى انتى شايفاها صح .. لازم تتحجى بالطريقة اللى
هو شايفاها .. واللى هو عايزها .. واللى هو أمرك بيها
صمتت "أسماء" تحاول استيعاب كلماته وتميرها على عقلها وقلبها ..
سألته بخفوت :

- وايه هى الطريقة دى

قال "على" بحماس :

- أولاً ميكنش ضيف يكون واسع .. ثانياً ميكنش شفاف ويبين الجسم ..
ثالثاً .. ميكنش مبرفن ببرفان أو بخور أو أى حاجة يقدر اللى واقف جمبك
يشمها .. رابعاً ميكنش ملفت .. خامساً ميكنش شبه لبس الكافرات ..
سادساً ميكنش شبه لبس الرجال .. سابعاً ميكنش ثوب شهرة
نظرت اليه "أسماء" باستغراب وقالت :

- معلش يعنى ايه ميكنش ثوب شهرة دى .. مش فاهمة

قال "على" بهدوء شارحاً :

- يعنى متكنيش لبساه عشان الناس تشاور عليكى وانتى ماشية فى
الشارع .. الرسول نهانا عن اللبس المزين أوى الفخم أوى اللى الواحد
بيلبسه عشان الناس تشاور عليه وهو ماشى فى الشارع وده بيبأه خيلاء
ماشى يعنى يقول يا أرض اتهدى ما عليكى أدى .. وبرده نهانا عن اللبس
الرت أوى المبهدل أوى اللى الواحد يلبسه عشان الناس تشاور عليه
وتقول ده الراجل ده زاهد وعابد .. يعنى الرجال والنساء محرم عليهم
لبس الشهرة .. يعنى متلبسش حاجة ملفته عشان الناس تشاور عليكى
وتعرفك

تمتت قائله :

- أيوة فهمت

قال وهو ينظر الى ساعته :
- بعد اذنك عشان ألحق الصلاة

قالت بخفوت :

- اتفضل

التفتت تنظر اليه لتتابعه بنظراتها أثناء مغادرته .. نعم تعلم بأنه لن يفكر فيها يوماً .. وأنها بالتأكيد ليست الفتاة التي سيختارها زوجة وحببية .. وأنها بالنسبة له فتاة متبرجة .. وأنه ليس كأي رجل قابلته في حياتها .. وعلى الرغم من ذلك .. خفق قلبها بقوة ونعومة .. وحب .. وهي تتابعه بعينها !

توافد الرجال في القرية على مسجد القرية الذي جهزه "كريم" بكل ما يلزم .. ابتسم "آدم" الجالس على الأرض في انتظار بدء الخطبة وهو يميل على "زياد" قائلاً :

- ما شاء الله .. حلوة أوى فكرة المسجد في القرية .. عشان الناس متكسلش تطلع بره القرية يدوروا على مسجد يصلوا فيه .. أهو كده مفيش راجل في القرية له حجه ..

ابتسم "زياد" وهو يتأم المسجد قائلاً :

- فعلاً فكرة حلوة أوى

ثم التفت الى "آدم" قائلاً :

- والله الواحد حاسس براحة كبيرة هنا .. غير ما كنا بنحس في قرية النحس "شكري" .. أعوذ بالله الواحد هناك كان يبقي قلبه مقبوض على طول .. لكن هنا سبحان الله كفايه ان الواحد ضميره مرتاح ابتم "آدم" قائلاً :

- ده غير معدلات الشغل هنا .. أنا صعقت من الأرقام

قال "زياد" بمرح :

- قال احنا اللي كنا فاكرين ان قرية "شكري" عليها اقبال .. لو جه شاف معدلات الحجز في القرية هنا هيقل قرينته ويعد في بيتهم

ساد الهدوء فجأة عندما اعتلى الإمام المنبر .. نظر "آدم" و "زياد" الى بعضهما في دهشة .. فلم يكن الإمام سوى .. "كريم" .. ألقى نظرة على الموجودين وتلاقت أنظاره بأنظار "آدم" و "زياد" .. ثم بدأ خطبته :

- الحمد لله حمداً كثيراً مباركاً فيه، كما يحب ربنا ويرضى، وأشهد أن لا

إله إلا الله وحده لا شريك له، وأشهد أن سيدنا محمداً عبد الله ورسوله،

صلى الله وسلم وبارك عليه، وعلى آله وأصحابه.
أما بعد : يقول الله عز وجل " وَتُوبُوا إِلَى اللَّهِ جَمِيعًا أَيُّهُ الْمُؤْمِنُونَ لَعَلَّكُمْ تُفْلِحُونَ " .. فمن رحمة الله عز وجل بعباده أن باب التوبة مفتوح في كل زمان ومكان حتى تشرق الشمس من مغربها .. رخصة لكل انسان وقع في معصية أو ذنب صغيراً كان أم كبيراً .. يستطيع بتلك الرخصة أن يتوب الى الله عز وجل فيغفر له ذنبه ويمحيه تماماً من صحيفة أعماله كأنه لم يفعله في حياته قط .. فلنتحدث عن أنواع البشر وأنفسهم .. هناك شخص يملك بين جنباته نفس أمارة بالسوء .. وصاحب هذه النفس والعياذ بالله يقبل على المعصية ويميل اليها دائماً دون أدنى شعور بالذنب .. يقترف المعصية سراً وجهاً ليلاً ونهاراً .. دون ان يظرف له جفن .. ونسى الملك المطلع عليه من فوق سبع سماوات .. وهذه النفس استحوذ عليها الشيطان تماماً فسار يحركها كيف يشاء .. وهى مأوى للشر فى جسم الإنسان .. ومنبع للشر .. واذا قيل له لماذا تفعل ذلك يا عبد الله .. تعلل بعلل واهية ويضع أخطائه على شماعه "إِذَا فَعَلُوا فَاحِشَةً قَالُوا وَجَدْنَا عَلَيْهَا آبَاءَنَا"

كان "آدم" يستمع الى الخطبة دون أن يرف له جفن .. تعلق عيناه بكريم وتعلقت أذنيه بكلماته .. أكمل "كريم" قائلاً :

- النوع الثانى هى النفس اللوامة .. والتي أقسم الله بها فى سورة القيامة "لَا أَقْسِمُ بِيَوْمِ الْقِيَامَةِ * وَلَا أَقْسِمُ بِالنَّفْسِ اللّوَامَةِ " .. وهى نفس فى صراع دائم بين الخير والشر .. اذا ارتكب صاحبها ذنباً .. ظل يلوم نفسه .. ويؤنبها .. ويستشعر ذنبه وتقصيره فى حق الله .. يتذكر يوم القيامة والآخرة فيتحسر على ما اقترف من ذنوب .. ويندم على ما فات من حياته

.. أما النوع الثالث هو النفس المطمئنة .. وهى منبع الإيمان فى صاحبها .. فهى نفس خاشعة متوكلة على ربها .. واثقة بالله .. محبة لله .. خاضعة لله .. تشناق الى الله .. والتي قال الله عنها "يَا أَيُّهَا النَّفْسُ الْمُطْمَئِنَّةُ ارْجِعِي إِلَىٰ رَبِّكِ رَاضِيَةً مَّرْضِيَّةً فَادْخُلِي فِي عِبَادِي وَادْخُلِي جَنَّاتِي " .. فأسأل الله أن يرزقنا جميعاً تلك النفس المطمئنة

انتهت خطبته .. وأقام الصلاة .. بعد الإنتهاء من الصلاة .. التفت "زياد" الى "آدم" قائلاً :

- يلا
قال "آدم" وهو يجلس مستنداً الى أحد العواميد فى المسجد :

- لا سيبنى شوية

أوما "زياد" برأسه وخرج من المسجد .. أسند "آدم" رأسه الى العمود خلفه .. وشرد وهو ينظر الى سقف المسجد .. وجد فجأة يداً تربت على كتفه فالتفت ليجد وجه "كريم" الباش .. جلس بجواره قائلاً :

- ايه يا دكتور مش هتمشى

أوما برأسه قائلاً :

- شوية كده

جلس "كريم" بجواءه مفترشاً الأرض .. نظر اليه قائلاً :

- ربنا كبير أوى على فكرة

لمعت العبرات فى عيني "آدم" وأخذ ينظر الى "كريم" صامتاً .. فربت على قدمي "آدم" قائلاً :

- متخليش الشيطان يحبطك ويوهمك ان ملكش توبة .. لان ربنا اسمه

الغفور .. بيغفر التوبة للعبد التائب الصادق فى توبته .. اهم حاجة ان

التوبة تكون صادقة .. مس توبة باللسان فقط

أوما "آدم" برأسه .. ثم قال باهتمام :

- والواحد يعرف منين اذا كان ربنا قبل توبته ولا لا

- الأهم هو انك تطبق شروط التوبة صح

قال "آدم" باستغراب :

- وهى ايه شروط التوبة

قال "كريم" بهدوء :

- شروط التوبة أربع .. لازم يجتمعوا مع بعض عشان تبقى توبة صادقة

وربنا يتقبلها .. أول حاجة انك توبتك تكون مخلصه لله .. يعني مش تائب

عشان خايف من الشرطة مثلاً أو عشان خايف من الناس أو عشان خايف

من الفضيحة .. أو مثلاً تايب من شرب الخمره عشان خايف على صحتك

منها .. أو تايب من الزنا عشان خايف على نفسك من الأمراض

صمت قليلاً ثم قال :

- أو تايب عشان حبيبك ترضى عنك

تلاقت أنظارها وبلع "آدم" ريقه بصعوبة وقد فهم ما يقصده "كريم" ..

فأكمل "كريم" :

- أول شرط من شروط التوبة انك تتوب لله عشان خايف منه وعشان

ندمان على ذنبك فى حق ربك

ثم أكمل :

- تانى شرط انك تتوب بقلبك وتكره المعصية بقلبك مش بس بلسانك ..

ثالث شرط ان تسيب المعصية دى فوراً .. مش تقول هسيبها بكرة ولا بعد بكرة ولا من الشهر الجاى .. لأ تسيبها فوراً وتبعد عنها فوراً .. الشرط الرابع انك تنوى وتعقد عزمك انك مترجعش للذنب ده تانى أبداً .. الشرط الخامس وده شرط مهم جدا وللأسف فى ناس كتير بتغفل عنه .. وهو رد المظالم لأهلها .. يعني لو كنت نهبت حد أو سرقت حد أو أكلت مال أو شهدت زور على حد أو قتلت حد .. لازم المظالم دى تترد .. لازم الشروط الخمسة عشان تبقى توبتك كاملة وربنا يتقبلها ان شاء الله
قام "كريم" وغادر المسجد وترد "آدم" خلفه يعيد ما قال فى عقله مرات ومرات ومرات

انطلق "كريم" فى طريقه بصحبة "آيات" الى المول التجارى .. وأثناء تجربة "آيات" لأحدى القطع .. اتصل بـ "إيمان" التى ارتسمت ابتسامة واسعة على شفيتها بمجرد أن رأت اسمه وردت قائله :

- السلام عليكم

قال بصوته الرخيم :

- و عليكم السلام .. ازيك يا "إيمان"

تمتت بخفوت :

- الحمد لله

- أنا فى المول مع "آيات" بتشتري شوية حاجات .. ان شاء الله كلها

ساعة وأرجع القرية .. هتكونى جاهزة ؟

- أيوة ان شاء الله .. هرجع بس الشقة أغير هدومى

- خلاص ماشى على تليفون ان شاء الله .. وأنا راجع هتصل بيكي

- خلاص اتفقتنا

بعد نصف ساعة توجهت "إيمان" الى عيادة الأطفال حيث تعمل "سمر"

وابتسمت لها قائله :

- ايه الأخبار

قامت "سمر" من فوق مكتبها وعقدت ذراعيها وهى تستند بظهرها الى

المكتب وقالت :

- بصراحة العيادة روعة والجو هنا جميل أوى .. حسه ان نفسى هنا

مفتوحة للشعل أوى

فى تلك اللحظة أتت "أسماء" وهى تقول :

- بنات مشفتوش "آيات" داخة عليها فى ورق مهم لازم تمضية ..
وبكلمها موبايها غير متاح
قالت "إيمان" :
- آه "آيات" مع "كريم" فى المول بيقول بتشتري حاجات
ثم نظرت الى ساعتها قائله :
- كلها نص ساعة أول أقل ويرجعوا ان شاء الله
ابتسمت "أسماء" وهى تنظر الى "سمر" قائله :
- ايه رأيك يا "سمر" فى القرية
قالت "سمر" بحماس :
- كنت لسه بقول لـ "إيمان" المكان ممتاز بجد حسه براحه نفسية عجيبة
.. آه لو أفضل هنا ومرجعش القاهرة تانى
نظرت اليها "إيمان" بخبث وقالت :
- والله فى ايدك تفضلى هنا ومترجعيش القاهرة تانى
نظرت اليها "سمر" مستفهمة .. فقالت "إيمان" بمرح :
- يا بنتى حنى على الراجل الغلبان بأه وهو يبقى بابا وماما وأنور و جدى
توترت "سمر" وقالت بعتاب :
- بس يا "إيمان"
نظرت اليهما "أسماء" مستفهمة :
- راجل مين ؟
قالت "إيمان" وهى تتنهد :
- الراجل اللى عايز يتجوزها وهى رافضه حتى انه يدخل بيتهم
نظرت اليها "سمر" قائله :
- يا "إيمان" خلاص انسى الموضوع ده بأه
قالت "إيمان" بمزاح :
- لا مش هنسى نفسى أفرح بيكي انتى و "على"
هوى قلب "أسماء" بين قدميها .. قالت بصعوبة :
- "على" أخوكى ؟
أومأت "إيمان" برأسها وهى تقول :
- آه "على" أخويا يا ستى
بدا الإضطراب على "أسماء" وقالت بصوت مرتجف :
- أنا همشى
خرجت "أسماء" من العيادة تحت السير وهى تشعر بأن الرؤية غير
واضحة .. ثم اكتشفت بأن ما كان يحجب عنها الرؤية بوضوح .. هو تلك

الدموع التي أخذت بالتجمع داخل عينيها !

التفتت "إيمان" الى "سمر" قائلة بجديه :

- "سمر" انتى بجد رافضة "على" نظرت اليها "سمر" بحيرة وقالت :
- "على" انسان محترم جداً .. وبجد ساعات بحس اننا مناسبين لبعض
أوى .. بس مش عارفه .. مش عارفه ليه مش قادرة أقول أيوة
قالت "إيمان" بحزم :

- لو انتى فعلاً شايفاه مناسب هتوافقى .. لو رفضاه عشان موضوع الشغل
هو خلاص اشتغل دلوقتى يا "سمر" وفى مركز كبير ومرتب كبير ما شاء
الله

قالت "سمر" بحيرة :

- صدقيني مش دى المشكلة .. أنا فعلاً بحترم "على" .. وحسه انه
مناسب أوى ليا .. واننا هنكون زوجين ناجحين .. بس مش عارفه ..
جوايا تردد كبير أوى .. وخوف .. مش عارفه .. حسه بحيرة كبيرة أوى ..
عشان كدة قولت لمامتك لما كلمتني متخليهوش يستتاني .. لاني حسه ان
الحيرة اللي جوايا دى مش هتخلص أبداً
تهدت "إيمان" قائلة :

- كان نفسى أوى تكونوا لبعض

قالت "سمر" بحزن :

- وأنا نفسى أكثر منك .. نفسى بجد .. بس حسه انى متكتفة .. ومش
قادرة آخذ الخطوة دى .. أنا من يوم ما مامتك كلمتني وأنا بستخير .. ولحد
دلوقتى بستخير .. بس لسه .. لا شايفه حاجة .. ولا حسه بحاجة

عادت "آيات" بصحبة "كريم" وبمجرد ان دخلا القرية قالت "آيات"
بمرح :

- "كريم" وديني الشقة الأول .. عايزة أغير هدومي وألبس حاجة من
اللى اشتريناها
ابتسم لها قائلاً :

- ماشى يا ستى

نظرت اليه بتأثر قائلة :

- بجد يا "كريم" ربنا ما يحرمنى منك .. انت دلوقتى كل عيلتى مش أخويا
وبس .. عارف أنا بجد محظوظة أوى ان ليا أخ زيك .. رغم انك مش

أخويا شقيقي بس بجد أنا بنسى النقطة دي تماماً .. بحس فعلاص أكنا
أخوات من أم واحدة وأب واحد
ابتسم وو يربت على رأسها قائلاً :

- أنا كمان بعترك أختي بجد .. لان فعلاً انتي أختي يا "آيات" .. متقلقيش
حتى لما أتجوز هفضل أخذ بالي منك وهفضل معاكى مش هسيبك .. وحتى
لما تتجوزى وتروحي بيت جوزك .. برده هفضل جمبك وقت ما تحتاجيني
هتلاقيني

لمعت الدموع فى عينيها تأثراً بكلماته فصاح بمرح :
- أوف .. ده انتوا الستات حاجة بشعة .. تزعلوا تعيطوا .. تفرحوا تعيطوا
.. حاجة بؤس

ضحكت "آيات" بملء فمها وهى تقول :
- عشان احنا كائنات رقيقة حساسة

تعلقت أنظاره بـ "إيمان" التى كانت تسير فى اتجاه البناية .. كانت تبعد
عنها بضع خطوات فقط .. عندما اقترب منها "كريم" وأطلق زمور
سيارته فانتبهت .. أوقف سيارته أمام البناية فقالت "آيات" بخبث :

- افتحلى الشنطة هاخذ حاجتى وأطلع
قال "كريم" وهو يحمل الحقائب :

- سببها وأنا هطلعها لك

ألقت نظرة على "إيمان" التى اقتربت وقالت وهى تأخذهم من يده :
- لا هاتهم مش تقال

توجهت "آيات" الى داخل البناية بينما ابتسم "كريم" وهو يقول لـ
"إيمان" :

- ازيك يا "إيمان"

ابتسمت بخجل قائله :

- الحمد لله

نظر الي ملابسها وقال :

- غيرتى هدومك ولا لسه

- لا لسه طالعة دلوقتى .. مش هتأخر عشر دقائق بس وأنزل
ابتسم قائلاً :

- براحتك

كادت أن تنصرف لكنه أوقفها قائلاً :

- استنى

فتح باب السيارة الخلفى وأخرج منه بوكية كبير يحوى ورود حمراء

زاهية معد بطريقة رائعة .. قدمه اليها وعلى شفثيه ابتسامه واسعه وهو يقول :

- اتفضلي

اتسعت ابتسامه "إيمان" ونظرت الى الورد بسعادة وهي تحمله بين يديها كالطفل الصغير .. ثم نظرت اليه قائلخ :

- متشكرة أوى

تمتم مبتسماً :

- العفو .. يلا مستنيكي

أومأت برأسها ودخلا البناية وهي تكاد تقفز فى الهواء فرحاً

دخلت "آيات" البيت ليتنامى الى مسامعها صوت شهقات بكاء قادم من غرفتها .. تركت ما بيدها أمام الباب وأغلقتة وتوجهت مسرعة لتجد "أسماء" جالسه على فراشها تدفن وجهها بين يديها وتبكي بحرقة .. اقتربت منها "آيات" وقالت بلوعة :

- "أسماء" مالك فى ايه ؟

قالت "أسماء" وهي تحاول أن توقف بكائها دون جدوى :

- مفيش حاجة

جلست "آيات" بجوارها وهي تقول بحده :

- ازاي يعنى مفيش حاجة

قالت "أسماء" بنفاذ صبر وهي تكفكف دمعها :

- قولتلك مفيش حاجة يا "آيات" .. شوية وهبقى كويسة

هتفت "آيات" بحدة وقد غاظها كتمان "أسماء" لمشاعرها وأحزانها دائماً :

- انتى على طول كدة .. عمرك ما جيتي قولتيلى يا "آيات" أنا مضايقه

من كذا .. على طول بتشيلى فى قلبك وتسكتى .. بجد يا "أسماء" أنا

مكنتش مصتورة ان أنا ولا حاجة بالنسبة لك

نظرت اليها "أسماء" قائله :

- ازاي يعنى ولا حاجة .. أنا مليش غيرك أصلاً وانتى عارفه كدة

- لو كان فعلاً ملكيش غيري كنتى حكيتيلى على اللى جواكى مش قفلتى

على نفسك كده

تنهدت "أسماء" بحزن وقالت :

- لما بتكون المشكلة ملهاش حل مبعرفش أتكلم فيها .. بحس الكلام

هيتعبنى على الفاضى

- ومين قالك ان ملهاش حل .. اتكلمى يمكن أعراف الأقيلها حل
قاتل "أسماء" بمرارة :

- لا ملهاش حل .. ومستحيل يبقى ليها حل

- ايه هيا المشكلة اللى ملهاش حل ؟

فى تلك اللحظة دخلت "إيمان" الى البيت وأغلقت الباب بهدوء فلم ينتبه
أحد الى صوت اغلاقه .. كادت أن تتوجه الى غرفتها لكنها تسمرت فى
مكانها عندما سمعت "أسماء" تقول :

- أنا بحب "على"

شعرت "آيات" بالدهشة وهى تنظر الى "أسماء" قائلة :

- "على" مين ؟

نظرت اليها "أسماء" قائلة ودموعها تبلل وجهها :

- "على" أخو "إيمان"

اضطربت "إيمان" بشدة ولم تدرى كيف تتصرف .. أهداها عقلها الى أن
تعود وتفتح الباب وتغلقه بقوة .. هبت الفتاتان عندما استمعا الى صوت
اغلاق الباب .. وقفت "إيمان" على باب غرفتيهما فالتفتت "آيات" اليها
.. قالت "إيمان" بسرعة متظاهرة بالمرح :

- ازيكوا يا بنات .. أنا داخلة أغير هدومى لان "كريم" مستنيني تحت

أومات "آيات" برأسها وهى تبتسم بوهن .. دخلت "إيمان" غرفتها وهى
تتنهد بقوة وبأسى

قامت "آيات" وأغلقت الباب ثم عادت للجلوس بجوار "أسماء" وقالت
لها :

- احكيلى اللى حصل .. واشمعنى "على" بالذات

قصت لها "أسماء" كل مواقفها مع "على" .. فقالت "آيات" :

- يعنى "على" كان السبب انك متحضرين امبارح كتب كتاب "إيمان"

- كنت مخنوقة أوى .. لما قالى صحابك محترمين حسيت انى مجروحة
منه أوى

صمتت قليلاً ثم نظرت الى "آيات" قائلة بحيرة :

- أنا مش عارفه أنا ليه حسيت نحيتة بكدة .. يعنى هو جد أوى معايا ..

وناشف .. بس معرفش .. عارفه لما تحسى انك منجذبه لحاجة لانها ضدك

.. لانها مختلفة عنك .. أنا حسيت ان ده اللى خلانى أتعلق بيه كده .. انه

مختلف عن أى حد شوفته وعن أى حد عرفته

لاحت ابتسامه على شفيتها وهى تقول :

- تعرفى انه قالى انه مش بيحب يعمل حاجة غلط مع بنت عشان مراته

اللى هيتجوزها .. يعني مش عايز يخون مراته وهو أصلاً لسه مشفهاش
ولسه ميعرفش هي مين .. هو فى حد كده
ثم قالت :

- ورغم انى فى نظره غلط .. الا انه مش بيتكلم معايا بشدة أو بعنف أو
بإحتقار .. بالعكس بحس انه بيتكلم معايا براحة وبشويش .. مش بيقولى
كلام جامد يكرهنى فى عيشتى .. بالعكس بحسه عارفه أكنه بياخد بإيدى
واحدة واحدة .. لما اعتذرلى كنت فرحانه أوى .. حسيت انه مهتم ولو
شوية صغيرين انه ميز علنيش أو انى أبقى مضايقه منه .. فضل يكلمنى
بالراحة على اللبس وعلى الحجاب .. من غير ما يجرحنى ومن غير ما
يقولى انتى غلط وهدخلى النار .. لأ .. كان بيتكلم براحة .. غصب عنى
حسيت انى اتشدتله .. نفسي يفضل يتكلم معايا كده وينصحنى على طول ..
مش فى اللبس بس .. لأ فى كل حاجة

ران الصمت بينهما .. فقالت "آيات" بحماس :

- "أسماء" يمكن بس انتى عجبك اسلوبه مش أكثر من كده .. يعني مش
حب ولا حاجة زى ما انتى متصوره

قالت "أسماء" بصوت باكى وقد عاودت عباراتها التساقط على وجهها :
- أنا كنت فاكرة كده .. فضلت أقول لنفسي كده .. بس لما عرفت انه بيحب
"سمر" وعايز يتجوزها حسيت انى قلبي موجوع أوى .. مش قادرة
أتخيله مع "سمر" ولا مع أى واحدة .. مش قادرة أتخيل انى ممكن
معرفش أتكلم معاه تانى .. أو انه يختفى فجأة من حياتى .. حسه انى
عايزاه فى حياتى على طول يا "آيات" .. معرفش أنا عمرى ما حسيت
كده .. وعلى طول بستخف بالناس اللى بتحب وبتتعلق بغيرها .. بس أنا
فعلاً حسه انى اتعلقت بيه أوى .. تعرفى أنا نفسى دلوقتى حالاً أتكلم معاه
.. فى كل حاجة .. نفسي أحكيه على كل حاجة

تعالت شهقاتها وهى تقول بصوتها المرتجف الباكى :

- نفسي أحكيه على بابا وماما ومشاكلهم وخرافاتهم .. نفسي أحكيه على
احساسى بعدم الأمان .. نفسي أحكيه على الحاجات اللى بتخوفنى .. نفس
أحكيه على "هانى" واللى عمله معايا .. حسه انى عايزه أحكيه على كل
حاجة .. أنا على طول بخبى مشاعرى جوايا ومش بحب أتكلم مع حد عن
احساسى .. بس أنا حسه انى عايزه أحكيه هو على كل حاجة .. أول مرة
أحس بكده .. أحس انى عايزه أطلع اللى جوايا لحد .. عايزه أعيط أدامه ..
عايزه أصرخ .. عايزه أخرج كل اللى جوايا .. وبعد ما أخلص يتكلم معايا
وأسمع منه

نظرت اليها "آيات" بحزن فقالت "أسماء" بمرارة وهي شاردة :
- بس هو بيحب "سمر" .. طبعاً شايفها أحسن منى مليون مرة .. وان
هي دى البنت اللي تستحق تكون مراته
نظرت الى "آيات" بأعين دامعة وهي تقول بألم :
- عايزة أمشى من هنا يا "آيات" عايزه أروح أى مكان تانى غير هنا ..
بس مليش مكان أروح فيه .. مش عارفه أروح فين
انفجرت "أسماء" فى البكاء مرة أخرى فأحاطتها "آيات" بذراعيها
تشاركها عبراتها هي الأخرى وهي تشعر بالألم من أجلها !

التف "كريم" و "إيمان" حول طاولة الطعام .. بدت "إيمان" شاردة ..
نظر اليها "كريم" متأملاً ثم قرب كفه من كفها .. فانتفضت .. وابتسمت
بخجل وأبعدت كفها .. أسند مرفقيه على الطاولة وهو يقول بمرح :
- اللي واخذ عقلك .. بتفكرى فى ايه
- أبدأ .. مشكلة واحدة صحبتى جت على بالى
قال "كريم" بمرح :
- آه قولتىلى .. سرحانه فى واحدة صحبتك وانتى اعده معايا تانى يوم من
كتب الكتاب .. لا بداية مبشرة
ابتسمت قائله :
- أنا آسفة معلىش
بادلها ابتسامته اوقال :
- ولا يهملك
أتى النادل بالطعام .. نظرت "إيمان" الى الطعام قائله :
- ايه كل ده .. أنا عاملة دايت أصلاً
ابتسم قائلاً :
- خلاص مش من مرة
قالت بحزم :
- لا من مرة .. المرة دى ممكن تبوظلى تعب اسبوع
نظر اليها قائلاً :
- مش المفروض بيكون يوم فرى كل اسبوع .. خلى النهاردة الفرى
بتاعك
ابتسمت قائله :
- انت شكلك كده هتبوظلى كل اللي بعمله

ضحك قائلاً :

- لا متقلقيش النهاردة بس .. وبعدين انتى مش محتاجة تنزلى كثير ..

قالت بتوتر ممزوج بالحرص :

- لا محتاجة أنزل كثير .. عشان بس هدومى واسعة فمش باين أنا

محتاجة أنزل أد ايه

قال "كريم" وهو يشرع فى تناول طعامه :

- انتى دلوقتى عندك الجيم ومشرفة عليه كمان يعني مش صعب عليك

انك تستمرى على الرياضة

قالت "إيمان" بحماس :

- أنا فعلاً من ساعة ما جيت هنا وأنا مستمرة على الرياضة وحتى خسيت

عن الأول

ابتسم دون أن يعقب فقالت بتوتر وهى تخشى أن تجرحها اجابته :

- انت مش مضايق عشان أنا مليانه شوية ؟

قال "كريم" بهدوء :

- انا حابب انك تكونى أقل .. وعارف انك تقدرى .. ممكن بس يكون كان

كسل منك أو حاجة .. بس عامة حتى لو منزلتيش فأنا مش هتفرق كثير

بالنسبة لى .. بس أنا قولتلك اللى أنا حابه أكثر

ابتسمت وقد شعرت بالراحة والحماس :

- ان شاء الله هكون زى ما انت حابب

اقترب منها بوجهه هو ينظر الى عينيها بعمق قائلاً :

- ودى حاجة تفرحنى

ابتسمت بخجل وشرعت فى تناول طعامها هى الأخرى .. نظر اليها بسعادة

قائلاً بمرح :

- بس اتطورنا عن امبارح .. يعني الحمد لله فى تقدم

ضحكت بخجل قائله :

- هى أول طلعة بس اللى بتكون صعبة

ضحك هو الآخر قائلاً :

- ماشى

ثم نظر اليها بخبت وغمر بعينه هو يقول :

- عقبال ما نفتح على الرابع

احمرت وجنتاها خجلاً وأشاحت بوجهها .. سمعته يطلق ضحكة رنانه ..

أسعدت قلبها وطربت لها أذنيها

عبر "كريم" بسيارته بوابة القرية وأوقفها أمام المبنى الذى يحوى صالة الألعاب والتفت اليها قائلاً :

- اشوك فى اجتماع بالليل ان شاء الله
ابتسمت قائله :

- ان شاء الله

كادت أن تهم بالإنصراف لكنها عدلت عن رأسها ونظرت اليه قائله :

- ممكن أسألك عن حاجة

ابتسم قائلاً وهو يلتفت اليها :

- آه طبعاً اتفضلى

صمت قليلاً تحاول البحث عن كلمات مناسبة لتصوغ عبارتها .. ثم قالت :

- انت ليه اخترتتى أنا بالذات .. وبالسريعة دى .. يعني كل حاجة حصلت

فجأة .. وبعدين احنا متكلمناش مع بعض ولا حاجة .. يعني ليه حسيت انك

عايز تتقدملى أنا وكمان كتب كتابة مش خطوية

نظرت اليه تنتظر جواباً لأسئلتها .. التفت بجسده اليها ونظر اليها قائلاً

بجدية :

- بصى يا "إيمان" .. أنا شخص عملى شوية .. يعني عندى واحد زائد

واحد يساوى اتنين .. كنت بدور على زوجة بمواصفات معينة .. والصفات

دى فعلاً لقيتها فيكى .. وعشان كده مترددتش لحظة

سألته بصوت خافت :

- ايه هى الصفات دى

ابتسم لها بحنان قائلاً :

- أولاً انها تكون انسانه ملتزمة وعارفه ربنا وده لمستته فيكى من لبسك

ولما كنتى بتغضى بصرك لما بتشوفينى .. كمان أنا بحب البنت الخجولة

الحييه .. وده لمستسه فيكى كل ما بقابلك .. يمكن دى أكثر صفة أنا كنت

حابب انى أور عليها والأقيها فى الانسانه اللى ارتبط بيها .. كمان كنت

عايز واحدة باره بأهلها .. وده لمستته من كلام مامتك عنك .. كمان كنت

عايزها من بيت طيب .. لان اخواتها دول هيبقوا خيلان ولادى .. وطبعاً

اخوكى "على" ما شاء الله عليه راجل محترم جداً .. وكمان مامتك

وباباكي ناس طبيين .. كنت عايز واحدة متحطش راسها براسى يعني

واحدة أحس بضعفها وبانها أنثى وده لمستته ساعة المشكلة اللى فى

الاجتماع الأول لما مشيتى وسيتى الاجتماع .. كان ممكن تقفى

وتسمعيني كلمتين فى العضم .. بس انتى مشيتى بهدوء.. ولما عرفتى انك

فهمتيني غلط وحسيتى بالذنب مكنتيش عارفه تتعاملى معايا ولا عارفه
تواجهيني .. وغير ده كله أنا حسيت بانجذاب نحييتك .. ودى مش هقدر
أفسرها لأنها حاجه تتحس متقلش .. حاجه بتحسيها بقلبك وبتلاقيه
بيقولك هي دى الإنسانه المناسبه ليك .. وطبعاً أولاً وأخيراً الاستخاره
والاستشارة .. وأنا استخرت ربنا .. واستشرت "آيات" وسمعت عنك كل
خير

ابتسمت "إيمان" وأومات برأسها وقد أشعرتها كلماته بالراحة .. أمسك
يديها فارتجفت بين أصابعه .. نظرت الى عينيه التى تحتويها وهو يقول :
- انتى بأه وافقتى عليا ليه ؟

ابتسمت بخجل وقالت وهى تنظر الى يدها التى فى يده :
- حسيت انك انسان محترم ومعارف ربنا .. وكمان "على" اتعامل معاك
وشكر فى أخلاقك جداً .. وكمان "آيات" شكرت فيك .. واستخرت ربنا
ووافقت

نظر اليها متفحصاً قائلاً بخبث :

- بس كده .. يعنى محستيش بأى كيميا خالص
توردت وجنتاها خجلاً وسحبت يدها من يده
فقال بعتاب :

- ماشى وأنا اللى كنت فاكرك .. بس خلاص هعمل ايه حظى كده
نظرت اليه بأشاح بوجهه عنها .. تمتمت بحزن :
- انت زعلت

لم يجيبها فقالت :

- انا بتكسف على فكرة .. يعنى حتى لو حسه بحاجه مش هعرف أقول
دلوقتى

التفت اليها قائلاً وهو رفع أحد حاجبيه :

- ماشى .. وأنا هستنى .. كده عليكى ليا حاجتين .. الأول اعتراف مهم ..
والتانى الدبلة اللى لبستها لنفسى امبارح
ضحكت فقال بمرح :

- مش هتنازل عن حقى على فكرة .. خلى بالك يعنى
أومات برأسها ونزلت من السيارة .. ابتسم لها قبل أن ينطلق الى الجراح
ليصف سيارته وينزل متوجهاً الى مكتبه

سار "آدم" مع والدته فى الممر الذى يحوى مكاتب الموظفين بالقريه ..

توقفا أمام مكتب "آيات" فأشارت له أمه بالابتعاد .. ابتعد خطوات للخلف ..
طرقت الباب فأتاها صوت "آيات" أدناً بالدخول .. شعرت "آيات"
بالدهشة وهبت واقفة وهي ترى والدة "آدم" أمام الباب .. أقبلت نحوها
قائله بترحاب :

- أهلاً وسهلاً أزي حضرتك يا طنط

أقترب منها والدة "آدم" وأغلقت الباب وهي تقبلها قائله :

- الحمد لله يا بنتي أزيك انتي

غادر "آدم" بعدما دخلت والدته وأغلقت الباب خلفها .. دعا الله أن تأتي
تلك الزيارة بنتيجة ترضيه

أجلستها "آيات" على الأريكة بالمكتب وجلست بجوارها .. نظرت اليها أم
"آدم" متفحصة .. بدت مختلفة عن ذي قبل بملابسها الواسعة الفضفاضة
و حجابها الطويل ووجها النظيف الخالي من مساحيق الجميل .. تمتمت
مبتسمة :

- بسم الله ما شاء الله .. ربنا يفتح عليك يا بنتي

ابتسمت "آيات" وهي مازات تشعر بالدهشة من تلك الزيارة .. ربتت
والدة "آدم" على قدمها قائله :

- بصي يا بنتي .. انا جايه أقولك كلمتين .. ومعلش استحميلني واعتبريني
زي أمك

قالت "آيات" على الفور :

- طبعاً يا طنط اتفضلي

قالت أم "آدم" :

- أنا جايه أتكلم معاكى عن ابني "آدم"

تجمدت ملامح "آيات" وهي تقول :

- أنا مش حابه أتكلم عنه يا طنط بعد اذنك

قالت أم "آدم" بحزم :

- اسمعيني ولو معجبكش الكلام ارمه ورا ضهرك ولا أكنك سمعته

نظرت اليها "آيات" بتوجس .. قالت أم "آدم" :

- ابني غلط غلط كبير أوى .. فى حق ربنا وفى حق نفسه وفى حقى وفى

حقك انتي كمان .. بس مين يا بنتي مبيغلطش .. طول ما الانسان عايش

فى الدنيا دى بيغلط وبيتوب .. وربك بيغفر ويسامح .. يبقى احنا يا بنى

أدمين مش هنسامح بعض

قاطعتها "آيات" قائله بشئ من الحدة :

- بس دى قدرات .. فى حد ممكن يسامح وحد لآ .. فى غلط ممكن الواحد

يفغره وغلط لا صعب الواحد ينساه .. وحتى لو سامحت .. مش ممكن
هنسى .. هفضل مجروحه منه .. والأصعب انى هفضل أحتقره .. أنا
مبقتش بحترمه يا طنط .. مش قادره أحترمه
رمقتها أم "آدم" بحزن وهى تستمع الى مشاعرها تجاه ابنها .. فتنهدت
قائله :

- يا بنتى اللي عايزاكى تعرفيه ان ابنى بيحبك أوى .. والله بيحبك .. والله
ابنى اتغير وبيحبك .. ده كان بيعد طول الليل قدام القبر مش عايز يمشى ..
فضل يا كبدى عليه زى ما يكون هو اللى مات .. لا بياكل ولا بيشرب وأفل
على روحه بيصلى وبيقرا قرآن
خفق قلب "آيات" وهى تتخيل حال "آدم" الذى وصفته أمه .. وهو يظن
بأنها ماتت وأنه دفنها بيده .. أكملت أمه :

- لما عرف انك عايشة بقت الدنيا مش سايعاه من الفرحة .. بأه نفسه
يجيلك ويتأسفلك .. ولما اتكلم معاكى وصدتيه كان بيتقطع من جوه .. والله
"آدم" تاب يا "آيات" ورجع عن الطريق اللى كان ماشى فيه .. لو مكنش
تاب بجد مكنش حاله اتغير لما افتكرك متى .. لو مكنش تاب بجد مكنش
ساب الشغل فى القرية الثانية رغم انه كان بيقبض منها فلوس أد كده ..
بس هو ساب الحرام يا بنتى .. وكل ده قبل ما يعرف انك عايشة .. يعنى
مسبش الحرام عشانك .. لأ سابه عشان ربنا يا بنتى .. يعنى تاب من قلبه
بجد

نظرت اليها "آيات" بمزيج من الحيرة والخوف والألم .. فربتت على
قدمها قائله :

- فكرى يا بنتى .. فكرى وشوفى قلبك هيرسيكى على ايه .. انا بس حببت
أجى وأقولك الكلام ده بنفسى .. لانى عارفه ان "آدم" حاول يتكلم معاكى
كثير واننى بتصديه .. فاكراه بيضحك عليكى تانى .. قولت أجى وأقولك
وأكيد أنا ست كبيرة مش هضحك عليكى ولا أعشك
أطرقت "آيات" برأسها فقال أم "آدم" وقالت :

- أنا همشى يا بنتى وربنا ينور قلبك ويرزقك الخير انتى و "آدم" ابنى ..
حتى لو رفضتية فده حقك يا بنتى محدش يقدر يجبرك على حاجة انتى
مش عايزاها .. لو رفضتية ربنا يباركلك ويرزقك باللى أحسن منه ..
ويباركله ويرزقه باللى تسعد قلبه
ظلت "آيات" محتفظة بصمتها فقالت أم "آدم" وهى تخرج هاتفها من
حقيبتها :

- هاتى رقمك يا بنتى وخدى رقمى خليه معاكى .. خلىنا نسال على بعض

ونود بعض .. بعيد عن ابني "آدم" وبعيد عن حكايتك معاه
تبادلا أرقام الهواتف ورحلت أم "آدم" بينما ظلت "آيات" جالسه مكانها
على الأريكة .. تشعر بمشاعر كثيرة متضاربه بداخلها .. لكن أقسى شعور
فيهم كان .. الخوف .. الخوف من أن تُخدع مرة أخرى !
تهددت وقامت لتغادر مكتبها بعدما شعرت بحاجتها الى استنشاق الهواء
المنعش .. خرجت لتتقابل مع "إيمان" التي ابتسمت لها قائله :
- هتضري اجتماع بالليل ؟

تمتت "آيات" :

- أيوة ان شاء الله

نظرت اليها "إيمان" وهي تتذكر حديث "أسماء" عن "على" وقالت لها
:

- فى حاجة مضايكاى يا "آيات"

أخذت "آيات" نفساً عميقاً ثم قالت :

- مش حاجة محددة .. تقدرى تقولى حاجات

اتعست عينا "إيمان" وهي تنظر الى نقطة خلف "آيات" .. ثم قالت
بدهشة :

- بصى شوفى مين واقف مع "أسماء"

التفتت "آيات" لتتسع عيناها دهشة هي الأخرى .. رأت "آدم" واقفاً مع
"أسماء" يتحدثان كمان لو كان بينهما حديثاً خاصاً وكل منهما يتطلع الى

الآخر باهتمام .. قالت "إيمان" وهي مازالت ترمقهما بنظراتها :

- يا ترى عايز منها ايه

حانت من "آدم" التفاتته فرآى "آيات" تنظر تجاهه .. تأمل ملابسها
الواسعة وحجابها الطويل بمزيج من الدهشة والإعجاب .. التفتت "آيات"

وقالت لـ "إيمان" :

- هروح أشوف شغلى

دخلت "آيات" المبنى مرة أخرى وهي تتساءل بداخلها عن الحديث الذى
يجمع بين "آدم" و "أسماء" فى تلك اللحظة

فى تلك اللحظة قالت "أسماء" لـ "آدم" بضيق :

- أرجوك يا دكتور ده موضوع يخصنى

قال لها "آدم" بحزم :

- بس والدك قلقان عليكي جداً .. واترجانى انى لو عرفت أى حاجه عنك

أبلغهاله

قالت بضيق :

- أنا مش عايزه حد منهم يعرف مكانى .. أصلاً أنا مش فارقة معاهم ..
محدث فيهم مهتم بيا .. هو تلاقى بس الناس كنت وشه لما مشيت فحب
يرد اعتباره

نظر اليها "آدم" بإهتمام قائلاً :

- أنا مش عارف انتى لسه بتقولى كده .. بس الراجل فعلاً كان هيموت من
قلقه عليكي .. وأنا مقدرش أبقي عارف مكانك وساكت .. انا لما شوفتك
دلوقتي استغرب جداً .. لانى مكنتش متوقع انك تكونى هنا مع "آيات" ..
ول كنت أعرف من الأول كنت كلمتك وعرفت ان والدك بيدور عليكي
- لو سمحت يا دكتور "آدم" .. متقولوش حاجه
تهد "آدم" قائلاً :

- بصى يا "أسماء" أنا ادبته كلمه ووعدته انى لو عرفت مكانك هعرفه ..
وهو فعلاً قلقان عليكي .. هديكي فرصة تظبطه أمورك ونفسيك تهدي كده
وبعدين هكلمه وأقوله على مكانك .. ماشى ؟

أومات برأسها بإستسلام وقالت :

- ماشى .. بس متكلموش غير لما تعرفنى الأول
أوما برأسه قائلاً :

- خلاص ماشى

فى تلك اللحظة أقبلت أم "آدم" فعرفهما "آدم" ببعضهما البعض ثم
استأذنت "أسماء" للانصراف .. قال "آدم" الى أمه بإهتمام :

- عملتى ايه يا ماما ؟

ابتسمت قائله :

- كل خير يا حبيبى .. قولتلها كلمتين طلعا من قلبي .. واللى ربنا رايده
هيكون

ربتت على كتفه قائله :

- لو ليك نصيب فيها هتاخذها يا ابنى ومحدث هيقدر يقف قصادك .. أما
لو ربنا مش كاتبها لك يبقى ترضى بنصيبك يا حبيبى وربنا ان شاء الله
هيرزقك بغيرها

أطرق "آدم" برأسه وقلبه يصرخ : لا أتمنى غيرها .. أرجوك يارب
ارزقنيها

فى تلك اللحظة خرج "كريم" من المبنى .. فإبتسم "آدم" فى وجهه قائلاً
:

- أستاذ "كريم" لو سمحت
أقبل "كريم" فعرفهما "آدم" قائلاً :
- أستاذ "كريم" مدير القرية يا ماما
نظرت اليه أم "آدم" ببشاشه وقالت :
- أهلاً بيك يا ابني ما شاء الله ربنا يحميك من العين
ابتسم "كريم" وقال :
- تسلمى يا حاجه
نظرت اليه بإعجاب وقالت :
- ما شاء الله قرية تشرح القلب .. ده انا كنت فى القرية الثانية قافله على
نفسى الباب وحبسه نفسى فى الشاليه ليل ونهار مكنتش بحب أخرج ..
كنت بحس أستغفر الله انى فى مكان كله غضب من ربنا .. أما هنا ما شاء
الله الواحد بيحس ان قلبه بيرفرف كده وهو ماشى فى القرية .. ربنا
يباركلكوا يارب
اتسعت ابتسامه "كريم" وهو يقول :
- وأنا مبسوط جداً ان القرية عجت حضرتك
قالت والدة "آدم" بحماس :
- عجبتنى أوى .. ده كفاية انكوا مبتعملوش حاجة تغضب ربنا .. والله
الواحد كان خايف غضب ربنا ينزل على القرية الثانية وهو فيها زى ما
غضب ربا نزل على "عاد" و "ثمود" وأهلك اللى فيها كلهم بالمعاصى
اللى كانوا بيعملوها .. بس هنا الحمد لله الواحد قلبه مستريح .. وكفاية يا
ابنى ان مالكوا حلال .. أصل الحرام ده ربنا مبيباركش فيه .. ببيجى من
هنا والبركة تضيع من هنا .. ربنا يرزقكوا ويوسع عليكوا يارب
تمتم "كريم" :
ربنا يباركلك يا حجه تسلمى على الدعاء الجميل ده
ثم نظر الى "آدم" قائلاً :
- متنساش اجتماع بالليل يا دكتور
أوماً "آدم" برأسه مبتسماً وهو يقول :
- لا متقلقش مش ناسى

أثناء انهماك "زياد" بجولته الإشرافية على الشاطئ .. رأى مجموعة من
الأطفال يلعبون بالكرة .. دخل بينهم والتقط الكرة بقدميه وظل يأتى
بحركات احترافيه .. نظر اليه الأطفال فى اعجاب ثم .. شرع فى اللعب

معهم والأطفال يضحكون ويمزحون بمرح .. اندمج "زياد" فى اللعب
بالكره مع الأطفال وقد تعالت ضحكاتهم وصيحات الإعجاب بلعب "زياد"
المحترف .. فجأة تعالت الأصوات على الشاطئ بالصراخ فأحد الأطفال
يغرق فى الماء .. اندفع "زياد" بسرعة ناحية البحر وأخذ يجذف بيديه
وقدميه الى أن انتشل الطفل من الماء .. وضعه على الأرض ليجد وقد
انقطع تنفسه تماماً .. لم ينتظر للبحث عن أهل الطفل بل انطلق كالمجنون
متوجهاً الى .. عيادة الأطفال !

سمعت "سمر" هرج ومرج بالخارج وصت رجل يصيح :

- فين الدكتوراة اللى هنا الولد هيموت

خرجا "سمر" من مكتبها مسرعة مرتدية معطفها الأبيض .. هتفت :

- ايه فى ايه ؟

لم يجيبها "زياد" بل اقتحم الغرفة .. وخرجت الأم التى كانت عندها فى
المكتب ومعها طفلها بعدما رأت "زياد" يمدد الطفل فوق سرير الفحص
وهو يصيح بأنفاس متقطعة :

- الولد غرق فى البحر .. مبيتنفش

أبعدت "سمر" "زياد" بيدها وهوت على صدر الطفل بسماعتها .. لا
تنفس .. لا نبض .. قامت على الفور بعمل تنفس صناعى للطفل .. وقف
"زياد" قراقبها وهى تعمل بسرعة وبإصرار .. لم يتحرك الطفل ظل ساكناً
.. لمعت العبرات فى عين "زياد" مختلطة بالماء الذى بلل عينه ووجهه
وملابسه بالكامل .. وأخيراً شهق الطفل بقوة فقامت "سمر" على الفور
بإمالتة ليستطيع اخراج كل الماء المحتبس داخل رئتيه .. كح الطفل بقوة
الى أن سكن .. نظرت اليه "سمر" تتفحصه وتمتمت بقلق :

- حبيبى انت كويس .. حاسس بإيه

أشار الى صدره وهو يبكى قائلاً :

- هنا بيوجعنى

نظرت بشفقة وألم الى الطفل ذو الخامسة من عمره .. ومسحت على
شعره قائله بحنان :

- معلىش ده من التنفس الصناعى اللى عملتهولك .. شوية وهتبقى كويس

أوماً الطفل برأسه والدموع فى عينيه .. أخذ "زياد" يتمتم فى خفوت :

- الحمد لله .. الحمد لله

التفتت اليه "سمر" بحده وقد كادت أن تنسى وجوده .. نظرت اليه قائله :

- وحضرتك كنت فين لما كان بيعوم فى البحر ؟

قال "زاد" بانفاس متقطعة :

- كنت بلعب مع
 قاطعته هاتفه بغضب :
- كنت بتلعب .. بتلعب وسايب ابنك يعوم لوحده فى البحر وهو فى السن الصغير ده
 نظر اليها "زياد" يحاول افهامها الوضع :
 - لا أنا
- لكنها قاطعته وهى تنظر اليه باحتقار قائله :
 - انت معندكش ضمير ولا عندك احساس .. اللى زيك خسارة ان ربنا ينعم عليه بنعمة الأطفال .. لما تسيب طفل صغير زى ده يعوم فى البحر لوحده وتقولى انك كنت بتلعب تبقى بجد متستاهلش تكون أبوه
 نظر اليها "زياد" بحده هاتفاً :
 - افهمى الأول وبعدين اتكلمى
 قاطع صياحهما فى وجه بعضهما البعض دخول رجل الى غرفة الفحص وهو يهتف بلوعة :
 - محمد فين ؟
- نظر الى الفراش ثم أسرع بمعاينة الصغير وهو يبكى قائلاً :
 - محمد انت كويس .. يا حبيبي
 نظرت اليه "سمر" بدهشة عندما قال الطفل بصوت باكى :
 - أنا خايف يا بابا
 رفعت "سمر" نظرها لتنظر الى "زياد" الذى عقد ذراعيه أمام صدره وهو يرفع حاجبيه وينظر لها بقوة .. شعرت بالخجل لأنها صبت جام غضبها على الشخص الخطأ .. التفت والد الطفل قائلاً بصوت مضطرب :
 - هو كويس يا دكتورة
 قالت بحزم :
- أيوة كويس .. بس لو سمحت خد بالك منه بعد كده .. ده صغير مينفعش ينزل البحر لوحده
 قال "زياد" بلؤم وبنبره بارده :
 - ايه الهدوء ده .. مش هتسمعيه الموشح اللى سمعتيهولى من شوية ؟
 أشاحت "سمر" بوجهها عنه بينما نظر اليه الرجل بإستغراب ثم عاد ينظر الى "سمر" قائلاً :
 - أقدر أخده دلوقتى
 قالت بإقتضاب :
 - أيوة اتفضل

حمل الرجل ابنه وغادر غرفة الفحص .. التفتت تنظر الى "زياد" الذى
مازال يعقد ذراعيه أمام صدره ثم قال :
- مش ناوية تعتذرى ؟

قالت بحزم :

- لآ .. اتفضل اطلع عشان فى كشوفات بره
أوما برأسه وقال قبل أن يغادر :

- ماشى .. هسامحك بس عشان مراعى الخضة اللي كنتى فيها
خرج "زياد" وعادت "سمر" الى ممارسة عملها المعتاد

جلس "زياد" بصحبة "آدم" فى مطعم القرية يتناولان طعامهما .. قال
"زياد" :

- وبعدين .. خالتى قالتلك تتفائل ولا تصرف نظر يعنى ؟
تهند "آدم" قائلاً :

- معرفش .. قالتلى لو نصيبك هتاخدها ولو مش نصيبك ربنا يرزقك باللى
تسعدك

قال "زياد" وهو يرشف من كوبه :

- بصراحة انت مفيش فى ايدك حاجة تعملها يا "آدم" .. يعنى بعد زيارة
خالتى ليها لو هى لسه مصره على الرفض .. بياه خلاص يا ابنى انساه
توقف "آدم" عن تناول طعامه وهو ينظر الى "زياد" قائلاً :
- انساه ؟

ترك الملعقة من يده واستند بمرفقيه فوق الطاولة وهو يقول :

- "زياد" .. أنا لما حببت "آيات" .. حببت فيها برائتها وحنيتها وطيبة
قلبها .. لكن دلوقتى أنا مش بحب "آيات"
نظر اليه "زياد" فأكمل "آدم" بحزم :
- أنا بعشقها

تبادلا النظرات قليلاً .. ثم قال "آدم" :

- "آيات" اتغيرت .. معدتش "آيات" بتاعة زمان .. شخصيتها بأقوى
بكتير .. بأت بتعرف تتحمل المسؤولية .. بأت بتعرف تقف على رجليها ..
بأت بتعرف تتحدى وتقاوم .. بأت واثقة فى نفسها جداً .. أنا لو كنت بحبها
قبل كدة 70% فأنا دلوقتى بحبها 100%

صمت وهو يتطلع الى البحر بجواره يسمع هدير أمواجه ثم قال :

- "آيات" مبتعرفش تكره .. يمكن دى أكثر حاجة جذبتنى ليها فى البداية

.. قلبها أبيض أوى ونضيف أوى مبتعرفش تكره .. مبتعرفش تحقد على حد ولا تأذى اللي أذاها

ثم نظر الى "زياد" قائلاً بحماس :

- انت متعرفش يا "زياد" "آيات" كانت بتحبني ازاي .. مكنتش بتسمع كلامها ليا ولا بتشوف نظراتها ولهفتها وخوفها عليها .. مكنتش بتحس اللي أنا بحسه .. "آيات" كانت بتحبني جداً وأنا واثق انها حتى لو كانت دلوقتي مجروحه مني .. إلا ان مستحيل تكون كل مشاعرها ماتت .. أكيد لسه في ولو جزء بسيط

قال "زياد" :

- بس يا "آدم" هي معدتش بتثق فيك .. معدتش هتقدر تستمر معاك وانت جارحها كده .. صعب عليها

تهد "آدم" قائلاً بحزم :

- بالعكس .. "آيات" لو اتجوزت واحد تاني غيري وكونت معاه أسرة وشلتني من حسابتها .. مستحيل هتتسى الجرح اللي جرحتهولها .. هيفضل معلم جواها .. حتى لو حبت التاني ده .. برده مستحيل تنسى مشاعرها نحيتي ولا تنسى اني كنت السبب في ان قلبها يتكسر .. لكن لو رجعتلى أنا هنسيها الألم اللي شافته بسببي .. لو رجعتلى هداوى جرحها يا "زياد" وهتسأه ومش هتفتكره تاني .. مش هياألمها تاني صمت "زياد" لا يدرى ما يقول .. فأكمل "آدم" :

- لو كانت اللي موجودة دلوقتي هي "آيات" القديمة .. كان ممكن أحاول أنساها وأدور على غيرها .. لكن دلوقتي لأ .. مش هقدر .. دلوقتي بقت البنيت اللي بحلم بيها فعلاً .. زمان قولتلها انتي فتاة أحلامي ومكنتش حاسسها .. لكن دلوقتي بقولها ومن قلبي .. "آيات" هي فتاة أحلامي يا "زياد" ازاي أسيبها تضيع من ايدي

طرق على الطاولة بقبضته وهو يقول بحزم :

- أنا واثق انها لو اتأكدت اني اتغيرت هترجعلى .. هي بس محتاجه تتأكد اني اتغيرت وانى مش هخدعها تاني ولا هكذب عليها تاني .. هي دي مشكلتي اني أثبتلها ده .. لو قدرت فعلاً أخليها تصدقني .. أنا واثق انها هترجعلى .. عشان كده مش هستسلم .. لازم أخليها تصدقني نظر "زياد" الى ساعته قائلاً :

- طيب يلا عشان متأخرش على الإجتماع

قرأ "عاصي" أحد عناوين الصحف بغضب بالغ :
- بنت عائلة اليماني .. ترفض العمل في قرية عمها بسبب تدنى مستوى
العمل بها
كرمش الجريدة بين قبضتيه بقوة وهو يهتف :
- أهو ده اللي كنت خايف منه .. ماشي يا بنت "عبد العزيز" .. خليتي
اللي يسوي واللي ميسواش يتكلم عننا .. إما وريتك مبقاش أنا "عاصي"

فوجئ "كريم" بـ "أحمد" أمامه بالمكتب فهب واقفاً وهو يسلم عليه قائلاً

:
- أهلاً أهلاً يا "أحمد" ازيك
ابتسم "أحمد" قائلاً :
- تمام الحمد لله ازيك انت
- الحمد لله اتفضل اعد
جلس "أحمد" مواجهاً لـ "كريم" الذي قال :
- ناوى تحضر اجتماع النهاردة ولا ايه ؟ .. هيكون أول اجتماع يشارك
فيه دكتور "أدم" و "زياد"
قال "أحمد" بتوتر :
- بصراحة أنا جايلك عشان حاجة تانية .. بس ده ميمنعش اني هحضر
الاجتماع ان شاء الله
وضع "كريم" مرفقيه فوق المكتب قائلاً :
- خير يا "أحمد"
تنحج "أحمد" بضع مرات قبل أن يقول :
- بصراحة انا عايز أطلب منك ايد الأنسة "آيات"
بُهِت "كريم" قليلاً .. فقال "أحمد" :
- أتمنى تعرض الأمر عليها وأنا منتظر رأيها ان شاء الله .. وإذا كانت
موافقة ان شاء الله فأنا هجيب بابا وماما ونيجي نتقدملها رسمي ونطلبها
منك
أوماً "كريم" برأسه قائلاً :
- خلاص هقولها ان شاء الله
اتسعت ابتسامه "أحمد" وهو يقول :
- وأنا متفائل ان شاء الله

قالت "آيات" لـ "سمر" قبل أن تدخل الإجتماع :
- يا بنتى هتعملى ايه لوحدك فى الشقة تعالى اعدى فى المكتب على ما
الإجتماع يخلص
قالت "سمر" بحرج :
- هتخرج يا "آيات"
هتفت "آيات" :

- يا بنتى هتخرجى من ايه .. بقولك هتعدى فى جنب لحد ما نخلص
دخلت "آيات" بصحبة "سمر" الى مكتب "كريم" .. وفوجئت بوجود
"أحمد" بالداخل الذى هب واقفاً وابتسم اليها .. أشاحت بوجهها والتفتت
الى "كريم" .. أقلت التحية وعرفتاهما على بعضهما البعض .. فقال
"كريم" :

- متشكرين يا دكتورة على اللى عملتية النهاردة وآسفين على تعبك معانا
قالت بحرج :

- لا أبداً مفيش مشكلة .. أنا كنت مبسوفة وأنا بشتغل فى العيادة النهاردة
التف الجميع حول طاولة الإجتماع بإستثناء "سمر" التى جلست على
الأريكة الموجودة بالمكتب .. تسمرت مكانها عندما رأت "زياد" الذى
دخل المكتب برفقة "آدم" .. نظر اليها "زياد" بدهشة وهو لا يعلم سبب
وجودها فى مكتب "كريم" .. أشاحت بوجهها بعيداً عن نظراته .. ألقى
"آدم" نظره على "آيات" الجالسه بجوار "كريم" .. ثم جلس فى مكانه
على الطاولة مواجهاً لـ "كريم" .. بعد قليل حضر "على" برفقة
"إيمان" .. اندهش "على" لوجود "سمر" بالمكتب .. توترت "سمر"
لرؤيته .. وهو أيضاً بدا عليه التوتر .. وفى النهاية حضرت "أسماء" ..
و.. بدأ الإجتماع

مال "زياد" على "آدم" قائلاً :

- مين البنت اللى أعده ورا دى ؟

ألقى "آدم" نظرة على "سمر" ثم قال :

- مش فاكرا اسمها .. صاحبة "آيات"

ثم قال بأسى وهو يتذكر يوم خطبتهما :

- حضرت خطوبتنا

التفت "زياد" ليلقى نظرة على "سمر" التي أشاحت بوجهها الى الجهة الأخرى بمجرد أن التفت نظراتهما .. بدا على "على" الشرود .. وكأنه فى مكان آخر غير هذا الإجتماع .. أما "آدم" فقد جاهد نفسه بصعوبة ولم يوجه عينيه تجاه "آيات" .. حتى لا يثير غضب "كريم" الجالس قبالة .. التفتت "أسماء" تنظر الى "سمر" ثم تعود لتتنظر الى "على" فى أسى غير عابئ بنظراتها غير "آيات" التي شعرت بالأسى لما تعانیه صديقتها من حب مستحيل .. نظرت "إيمان" مبتسمة الى "كريم" أثناء حديثه .. فإنتهز فرصة أنهماك الجميع وغمز لها بعينه فأشاحت بوجهها ووضعت أصابعها على فمها تكتم ضحكتها .. شعر "آدم" بنظرات "أحمد" المتحدية التي يصوبها تجاهه بين الحين والآخر .. عقد ما بني حاجبيه فى حيرة .. لا يدري سبب تلك النظرات .. انتهى الإجتماع .. فرحلت الفتيات .. وبقي الرجال فى مكتب "كريم" .. استأذن "آدم" للإنصراف بينما انخرط "زياد" و "على" فى الحديث مع "كريم" .. ابتعد "آدم" عن المكتب بضع خطوات ليسمع صوت "أحمد" من الخلف يقول :

- لحظة يا دكتور

التفت اليه "آدم" .. فوقفت "أحمد" فى مواجهته وفى عينيه نفس النظرة .. أطرق برأسه لبرها ثم نظر اليه قائلاً :

- مبروك على شغلك الجديد

قال "آدم" ببرود :

- الله يبارك فيك

وضع "أحمد" يديه فى خاصرته وهو يقول :

- وشك حلو علينا .. أول يوم استلمت فيه شغلك اتكتب كتاب "كريم" و مراته .. وتانى يوم اللي هو النهاردة فى مبشرات لخطوبة قريب ان شاء الله

ابتسم "آدم" ببرود .. وهم بأن ينصرف فقال "أحمد" :

- مش هتسألنى خطوبة مين ؟

وقف "آدم" قائلاً بنفاذ صبر:

- خطوبة مين ؟

ابتسم "أحمد" بإستفزاز وهو يقول :

- خطوبتى

تمتم "آدم" ببرود :

- مبروك

قال "أحمد" وهو يرفع حاجبيه بتحدى :

- مش عايز تعرف مين العروسة ؟
تحولت نظرات "آدم" الى القلق والتوتر .. فاتسعت ابتسامه "أحمد"
وهو يقول :
- "آيات" .. خطوبتي أنا و "آيات"
تسمر "آدم" فى مكانه وقد تجمدت تعبيرات وجهه ونظرات عينيه ..
فربت "أحمد" على كتفه قائلاً بمرح مصطنع :
- يلا أشوفك بعدين يا دكتور
عاد "أحمد" الى مكتب "كريم" .. بينما وقف "آدم" حيث هو للحظات
يحاول أن يستوعب تلك الصدمة .. ثم ما لبث ان التفت بعصبية أحت
السير الى أن رأى "آيات" تسير بصحبة "سمر" و "إيمان" و
"أسماء" متوجهين الى سكنهم .. فسار مسرعاً الى أن أصبح بينها وبينه
عدة خطوات فهتف :
- "آيات"
التفت الأربع فتيات بحدة .. توقفت "آيات" وهى تنظر اليه باستغراب ..
اقترب ووقف أمامها .. كانت تعبيرات الغضب على وجهه .. وعيناه بدتا
فى منتهى القسوة .. نظرت اليه بدهشة .. فقال بحده :
- عايز أتكلم معاكى لو سمحتى
نظر الى الفتيات .. فابتعدن قليلاً ثم انحنت "إيمان" على "سمر" قائلة :
- بلاش نبعد خلىنا قريبين منهم .. مينفعش نسيبها لوحدها معاه
عقدت "آيات" ذراعيها أمام صدرها وهى تقول بتحدى :
- أفندم
رمقها بنظراته الغاضبة وقد تجعد جبينه بقوة وهو يقول بصرامة شديدة :
- اسمعى يا "آيات" .. أنا عارف انى غلظت فى حقك جامد أوى ..
وجرحتك كتير .. وعشان كده أنا مستعد أتحمل أى عقاب انتى بتعمليه فىا
دلوقتى لانى عارف انى أستحق كده
ثم رفع أصبعه محذراً أمام وجهها وهو يقول بغضب :
- بس لو وافقتى انك تتخطبى للى اسمه "أحمد" ده .. أو لأى راجل غيره
.. فأنا هنسأكى وأشيلك من قلبى يا "آيات"
نظرت اليه "آيات" باستغراب عندما ذكر أمر خطبتها لـ "أحمد" .. أكمل
"آدم" بنفس الغضب :
- والله ما هسامحك لو عملتيها .. عاقبيني زى ما انتى عايزه .. لكن
تتخطبى لغيرى لأ
لانت نظراتها وبدت فى عينيها دموع لا تدرى سببها .. فاخفتى غضبه

وهو ينظر اليها قائلاً بحنان :

- خدى وقتك .. انا عارف انك صعب تسامحيني وصعب تصدقيني ..
عارف ان ده مش هيحصل بسهولة .. أنا هفضل مستنى ان ده يحصل يا
"آيات" .. بس لو سمحتى انتقمى منى بأى شكل انتى عايزاه .. إلا انك
تتخطبى لغيرى
انهى حديثه ودار على عقبه ليرحل من حيث جاء .. وقفت "آيات" تتابعه
بنظراتها والعبرات مازالت فى عينيها .. وفى قلبها حيرة كبيرة !

الفصل التاسع والعشرون من رواية جواد بلا فارس



تمددت "آيات" فى ظلام غرفتها وهى تسمع تردد كلمات "آدم" فى عقلها
.. تنهدت بقوة وهى تشعر بحيرة كبيرة بداخلها .. خاصة بعدما أخبرها
"كريم" بعد عودته الى البيت بتقديم "أحمد" لخطبتها .. وأنه لن يرحل
من القرية قبل أن يحصل على ردها .. وطلب منها "كريم" استشارة الله
عز وجل فى هذا الأمر
عاودت التفكير فى "آدم" مرة أخرى .. كيف يطلب مسامحتها .. كيف
تستطيع أن تفعل .. أيظن أن أخطائه بتلك السهولة التى من الممكن
غفرانها .. كيف تثق به مرة أخرى .. كيف تثق بحبه ومشاعره مرة أخرى
.. كيف تثق أنه تاب بالفعل

لن تستطيع أن تتحمل صدمة أخرى .. يكفيها ما لاقت في الفترة الماضية
من صدمات مؤلمة .. لكن جزء آخر من نفسها يقول .. لما لا تعطينه
فرصة .. لما لا تصدقيه خاصة وانك فقدت الآن كل شئ .. فماذا يريد منك
غير حبك وقلبك .. الله يغفر للعبد ما لم يغرغر .. فكيف لا تغفرين أنت ..
أنت أيضاً في حاجة أن تطلبى مغفرة الله ورضوانه .. فلکم عصيتيه .. ماذا
سيكون شعورك لو رفض توبتك .. ألن تموتين قهراً وكمداً .. أطلقت
تهيدة أخرى ثم قامت من مضجعتها وتوضأت وصلت ركعات القيام التي
تصليها كل ليلة .. وبعدها انتهت وقبل أن تصلى الوتر .. صلت صلاة
استخارة !

وأثناء سجودها وأثناء ترديدها لدعاء الاستخارة .. استشعرت أنها بين
يدي الله عز وجل وأنها تستخيره في أمرها .. وعندما وصلت الى هذا
الجزء في الدعاء :

- اللهم ان كان " آدم "

توقفت للحظة وقد انتبهت أنها ذكرت اسم " آدم " بدلاً من " أحمد " والذي
من المفترض أن تستخير الله من أجل رغبته في الزواج منها .. صمتت
للحظة .. ثم عاودها خشوعها وأكملت الدعاء كما خرج من قلبها أول مرة
:

- اللهم ان كان " آدم " خيراً لى فى ديني ومعاشي وعاقبة أمرى فيسره لى
وبارك لى فيه .. واللهم ان كان " آدم " شراً لى فى ديني ومعاشي وعاقبة
أمرى فاصرفه عنى واصرفنى عنه .. ثم اقدر لى الخير حيث كان وارضى
به .. انك على كل شئ قدير
انتهت من صلاة الفجر .. ونامت ملء جفونها

فى صباح اليوم التالى .. وقفت " أسماء " فى الشرفة لا تريد الاجتماع
معهن على مائدة الفطور .. فأخر ما تريده الآن هو رؤية " سمر " .. كان
مجرد مرآها أمراً شاقاً عليها .. كلما رأتها تذكرت بأن " على " فضلها هى
عن جميع النساء .. وبأنه يراها وحدها زوجته المستقبلية .. وأنه ما أراد
أحداً سواها .. كان هذا الشعور يطعنها .. يقتلها .. يعذبها .. لكن للأسف
تعلم أن عليها أن تعتاده .. فلعلها تسمع قريباً خبر خطبتهما !

تسللت نسيمات الصباح تداعب الستائر المعلقة على شرفة البيت .. التفت
"آدم" يتطلع الى السماء بزرققتها ونقاها .. تسللت الى أذنيه أصوات
تغريد العصافير فوق الشجر .. نهض من مكانه وترك جريدته الصباحية
ووقف يستند الى سور الشرفة .. يعبئ رنتيه بهواء البكور المنعش .. رفع
رأسه الى السماء فوقه .. تخيل الله عز وجل فوق .. بعيد .. فوق سبع
سماوات مما يقف الآن .. تأمل أن الله فوق عرشه .. مستو عليه ..
استواء يليق بجلاله وكماله .. تخيل الملائكة فى السماء .. تلبى أمر ربها
.. تخيل الجنة وخازنها .. أخذ يتساءل ترى كيف شكلها .. كيف نعيمها ..
ترى أمن الممكن أن يدخلها .. من أى باب يدخل .. تذكر احدى خطب
الجمعة التى سمعها منذ فترة قريبة .. أن للجنة أبواب ثمانية .. احداها
يسمى باب الصلاة .. يدخل منه المصلون القائمون الراكعون الساجدون
آناء الليل وأطراف النهار .. واحداها باب الريان ويدخل منه أهل الصيام
الذين يكثرون من صيام النوافل بجانب الفرائض .. واحداها باب الأيمن
وهو باب المتوكلين الذي يدخل منه من لا حساب عليه ولا عذاب ..
واحداها باب الصدقة .. واحداها باب الحج والعمرة .. واحداها باب الجهاد
فى سبيل الله .. واحداها باب الكاظمين الغيظ والعافين عن الناس الذين
يعفون عن مظالمهم .. واحداها باب التوبة ! .. وهو مفتوح دائماً .. فى
كل وقت وكل حين .. حتى تشرق الشمس من مغربها ..
شعر "آدم" بقشعريرة تسرى فى جسده وهو يتذكر كلام "كريم" عن
شروط التوبة الصادقة .. والذى كان آخرها .. رد المظالم الى أهلها .. رفع
نظره الى السماء مرة أخرى وهو يقول فى نفسه .. ترى أمن الممكن أن
أدخل الجنة من ذاك الباب .. باب التوبة !
أخذ نفساً عميقاً ثم دلف الى الداخل .. توجه الى خزانة ثيابه وانتقى منها
ما يرتديه .. أقبل على والدته وقبل رأسها قائلاً :

- ماما .. انا مسافر القاهرة
نظرت اليه بدهشة قائلة :

- خير يا ابنى

قال "آدم" بحزم :

- فى حاجة مهمة لازم أعملها
قبل رأسها مرة أخرى قائلة :

- ادعيلي

رفع كفيها الى السكاء قائلة :

- ربنا يهديك يا ابنى وينورك طريقك ويردك بالسلامة

لم يستطع "آدم" تأجيل هذا الأمر .. يجب أن يقوم به .. والآن ! .. هاتف "كريم" ليخبره بأمر سفره .. كانت "آيات" الى جوار "كريم" فى المكتب فاستمعت الى "كريم" وهو يقول :

- تيجي بالسلامة يا دكتور

سألت "كريم" وهى تتظاهر بالإنهماك فى تفحص الأوراق فى يدها :
- خير .. فى حاجة تخص القرية ؟

قال "كريم" وهو يعاود عمله :

- لا دكتور "آدم" مسافر القاهرة فبيعتذر انه مش هيقدر يجى النهاردة
شردت "آيات" وهى تفكر فى سبب سفره المفاجئ الى القاهرة !

وقفت تنظر اليه .. وهو منهمك فى ازاحة بعض ألواح الخشب المبعثرة
وجمعها معاً فى مكان واحد .. اقتربت منه .. ووقفت أمامه .. التفت
"على" اليها .. نظر اليها لبرهه .. بدت له جامدة الملامح .. فى عينيها
نظرة غريبة .. غض بصره .. واعتدل واقفاً وهو ينفض يديه فى بعضهما
البعض .. قالت بجمود :

- ممكن أسألك عن حاجة؟

تمتم بهدوء :

- اتفضلى

بلعت "أسماء" ريقها وهى تقول :

- لو انا استغفرت ربنا على الحاجات اللى أنا كنت بعملها غلط ومكنتش
أعرف انها غلط .. ربنا هيسامحنى ؟

أوما برأسه وهو يقول بحماس :

- طبعاً طالما توبتى من قلبك

أومات برأسها ثم قالت :

- وممكن الناس اللى حوليا تسامحنى ؟ .. ولا هيفضلوا فاكرين الحاجات
الغلط اللى كنت بعملها ؟

صمت وقد ضاقت عيناه .. ألقى على وجهها نظرة يحاول فيها تبين

مقصدها من السؤال .. لم تقابله الا ملامحها الجامدة الخالية من أى انفعال

.. تنظر الى عينيها مباشرة .. تبغى اجابه لسؤالها .. قال بحيرة :

- مش فاهم سؤالك .. تقصدى صحابك يعنى .. أكيد هينسوا ويتعاملوا

معاكى بناء على التغيير اللى حصلك

قالت بخفوت :

- لأ مقصدش صحابى

رفع عينيه مرة أخرى بدهشة .. هذه المرة لمح نظرة حزينه فى عينيها
سرعان ما أخفتها قائله بصوت حاولت أن يبدو بارداً خالى من أى انفعال
:

- صحيح نسيت أباركك على كتب كتاب أختك .. مبروك لأختك .. وعقبالك
انت و "سمر"

قالت ذلك ثم دارت على عقبيها دون أن يتمكن من الرد عليها .. شعر
بالدهشة لعلمها بموضوع "سمر" .. ترى أعلمت من "سمر" .. أهى من
أخبرتها .. ولماذا كانت تتحدث معه بتلك الطريقة الغريبة .. ترك ما بيده
وتوجه الى "إيمان" فى الصالة الرياضية .. اتصل بها وأخبرها أنه
ينتظرها بالخارج لعدم استطاعته الدخول فالمكان مخصص للنساء فقط ..
خرجت "إيمان" وهى تنظر اليه بقلق وقالت :

- فى ايه يا "على" ؟

نظر اليها "على" قائلاً باهتمام :

- هى "أسماء" عرفت منين انى كنت متقدم لـ "سمر" .. انتى اللى
قولتيلها ولا "سمر"

تحولت نظراتها الى الدهشة وهى تقول :

- انت ازاي عرفت ان "أسماء" عرفت بموضوع "سمر" .. انتوا

بتتكلموا مع بعض فى مواضيع خاصة يا "على" ؟

زفر "على" وقال بنفاد صبر :

- سألتك يا "إيمان" سؤال جاوبيني عليه

قالت "إيمان" وهى تعقد ذراعيها أمام صدرها :

- سمعتنى وأنا و "سمر" بنتكلم عن الموضوع ده .. وعرفت انك كنت

متقدم لـ "سمر" .. انت ليه مهتم بالموضوع ده ؟

لم يجيبها .. بل سألها باهتمام :

- "سمر" كانت بتقولك ايه بالظبط .. يعنى ايه اللى جاب سيرة الموضوع

- مفيش الموضوع اتفتح فجأة وكل اللى قالتة "سمر" انها محتارة ..

صلت استخارة بس مش عارفه تاخذ قرار

أوما "على" برأسها وصمت لبرهه .. ثم قال :

- و "أسماء" .. كان رد فعلها ايه لما عرفت ؟

ازدادت نظرات "إيمان" حدة وهى تقول :

- "على" فى ايه بالظبط .. حرام عليك لو كنت بتعشمها بحاجة .. البنيت

أصلاً فيها اللي مكفيها مهياش ناقصة
نظر اليها "على" وهو يعقد جبينه فى استغراب قائلاً :
- يعني ايه فيها اللي مكفيها .. انتى تعرفى عنها ايه بالظبط ؟
- أعرف ان مامتها وباباها على طول بينهم مشاكل جامدة .. وانها بنت
وحيدة .. وان فى الآخر باباها طرد مامتها من البيت واتجوز واحدة تانية
.. وطردها هى كمان .. وراحت عاشت مع مامتها فى بيت جدها .. بس
سابت البيت معرفش ليه وراحت عاشت مع "آيات"
شرد "على" فى كلام "إيمان" عن "أسماء" فقاطعت "إيمان" تفكيره
وهى تقول بحزن :
- "على" ابعدها أحسن .. متخليهاش تتعلق بيك أكثر من كده
نظر اليها "على" بدهشة قائلاً :
- يعني ايه مخليهاش تتعلق بيا أكثر من كده .. مين قال انها متعلقة بيا
أصلاً
هتفت "إيمان" بحده :
- أنا سمعتها وهى بتتكلم مع "آيات" عنك .. متعشمهاش بحاجة يا
"على" والله البنبت فعلاً مش متحملة صدمة
ضاقت عيناه وهو ينظر اليها قائلاً :
- سمعتها بتقول ايه عنى ؟
بدا على "إيمان" التردد لكنها حسمت أمرها وقالت :
- سمعتها بتقول انها .. بتحبك
تجمدت نظرات "على" على "إيمان" وهو يحاول استيعاب هذ التصريح
.. أكملت "إيمان" :
- أنا قولتلك عشان تبقى عارف وتأخذ بالك من تصرفاتك معاها عشان
متفهمكش غلط وتعشم نفسها على الفاضى
ثم لاحت سحابة حزن فى عينيها وهى تقول :
- الإحساس ده وحش أوى .. لما تتعشم بحاجة وتلاقيها ضاعت منك ..
عشان كده مش عايزاك تكون السبب فى ان "أسماء" تحسه .. هى رغم
انها عنيدة .. بس طيبة وغلبانة أوى .. ومش عايزاها تتجرح
أوماً "على" برأسه وهو يشعر بضيق شديد .. ثم غادر واجماً دون أن
ينطق ببنت شفه !

شعرت "بوسى" بمزيج من الدهشة والخوف والفرع وهى تفتح الباب لتجد "آدم" ماثلاً أمامها .. هتفت بصوت مضطرب :
- "آدم" ! .. عايز ايه ؟

لم تنتظر رداً بل حاولت غلق الباب لكنه وضع قدمه يمنعها من غلقه .. جرت فى اتجاه الهاتف تنوى الإتصال بالأمن الموجود أسفل العمارة .. لكن "آدم" دفع الباب ودخل وجذب الهاتف من يدها وهو يقول :

- استنى يا "بوسى" متخفيش

أخذت تتراجع الى الوراى وهى تنظر اليه بفرع قائله :

- اطلع بره يا إما هصوت وألم عليك العمارة

مدت لها "آدم" يده بذلك المغلف الكبير الذى كان يحمله .. والذى لم تنتبه اليه منذ البداية .. قال بهدوء :

- خدى يا "بوسى"

نظرت الى المغلف بشك ثم رفعت عينها تنظر اليه قائله وهى مازالت

تشعر بالخوف :

- ايه ده

أخذ نفساً عميقاً ثم قال بحزم :

- دى الفلوس اللى شاركتيني بيها فى العربية والفلوس اللى خدتها منك

وقولتلك انى هرجعها لك والفلوس اللى خدتها وما قولتتش انى هرجعها لك

تحولت نظرات الخوف الى نظرات الدهشة فى عينيها فأكمل قائلاً :

- انا معرفتش أحسن المبلغ بالضبط .. بس أنا مملكش غير العربية ولسه

بايعها حالاً .. هى طبعاً اتباعت بخسارة .. ودى كل الفلوس اللى استلمتها

من صاحب الأجنس اللى اشتراها .. خديهم عديهم وشوفى يكفوا انك

تسامحيني وتنسى الدين اللى عليا ليكي ولا لأ

ازداد اتساع عينيها دهشة وهى تشعر بأنها ترى "آدم" آخر غير الذى

تعرفه .. وقفت جامدة لا تتحرك .. فقال "آدم" وهو ينظر الى يده

المدودة بالمغلف :

- خدى يا "بوسى" .. عديهم وشوفى يكفوا ولا لأ

أخذت منه المغلف بتردد .. نظرت الى المال بداخله دون أن تقوم بعده

ولكنها شعرت بأن المبلغ كبير .. يكفى ويفيض .. نظرت اليه وقالت :

- أنا حسه ان ده أكثر من الفلوس اللى خدتها منى ومن الفلوس اللى

شاركتك بيها فى العربية

تنهد "آدم" بإرتاح وقال :

- طب الحمد لله .. كنت خايف ميقضوش

ثم قال بأسى :

- متنسيتش انى كنت عايش هنا وانتى بتصرفى على البيت أكل وشرب وغيره .. يعنى لو جينا حسبناها بالظبط هلاقى نفسى مديون ليكي .. بس أهم حاجة انك تسامحيني .. على كل اساءه منى .. وعلى كل غلطة عملتها فى حقك .. من أول علاقتنا اللى كانت كلها غلط فى غلط نظرت اليه "بوسى" مبتسمه وهى تقول :

- طبعاً مسامحك يا "آدم" .. انت عارف انى مبعرفش أزعل منك أبداً تركت المغلف من يدها على الطاولة .. وتوجهت الى باب البيت تغلقه .. ثم عادت تتهدى فى خطواتها .. وقفت أمامها تستند بيدها على صدره وهى تنظر الى عينيه بهيام قائله :

- تعرف انك وحشتنى أوى .. رغم انى كنت خايفة منك لما شوفتك بس حسيت انك واحشنى أوى

أزاح "آدم" يديها بحزم .. وقال :

- سامحتيني على أى اساءه صدرت منى ؟

ابتسمت وهى تعيد وضع يديها على صدره قائله :

- أيوة يا حبيبي

أزاح يديها مرة أخرى وهو يقول :

- استغفرى ربنا يا "بوسى" .. حياتك كلها غلط .. لو متى دلوقتى عارفه

مصيرك ايه ؟ .. استغفرى ربنا قبل ما تلاقى نفسك جوه القبر وبتندمى

على كل ذنوبك الصغير قبل الكبير

توجه الى باب البيت فتحه وخرج !

لأول مرة منذ سنوات يركب "آدم" المواصلات العامة .. كان قد نسى تلك

المعاناة الشاقة التى تذكره بأيام ثانوى وبالجامعة حينما كان يتزاحم وسط

الركاب ليستطيع أن يجد مكاناً يقف فيه .. يعد الدقائق التى تفصله عن

مكان نزوله فينزل بنفس الصعوبة التى سعد بها !

كان المنظر يبدو غريباً .. رجلاً وسيماً يرتدى حل أنيقة للغاية يرتاد

المواصلات العامة ! .. كان معه ما يكفى ليركب أحد سيارات الأجرة ..

لكنه لم يستطع مقاومة اغراء ركوب الحافلة .. تذكر "آدم" ذو الثامنة

عشرة ربيعاً والذى كان يرتاد تلك الحافلة يومياً للذهاب الى جامعته ..

سابقاً فى بحر أحلامه وطموحاته .. بقلبه النقى التقى وعينيه الشغوفتان

.. وآماله العريضة التى يخطها عقله .. وعلى الرغم من مرور خمسة

عشر عاماً .. إلا أنه فى تلك اللحظة شعر كما كان يشعر "آدم" ذو الثمانية

عشرة ربيعاً .. رغم الزحام الشديد فى هذا الوقت من اليوم .. ورغم وقوفه بطريقة غير مريحة .. الا أنه شعر بإبتسامه صغيره تلوح فوق شفثيه .. كان شعور الرضا يغمر قلبه .. شعر بأنه أزاح حملاً ثقيلاً عن قلبه فصار خفيفاً يرفرف بجناحيه داخل قفصه العظمى !

نزل ليركب احد الأتوبيسات المتوجهة الى العين الساخنة .. ليعود مرة أخرى الى قرية الماسة .. تلك القرية التى يشعر الآن بإنتماء شديد اليها .. لكل بنيانها ولكل سكانها .. وكأنه كان يعيش فيها منذ الأزل .. توقف الأتوبيس ليركب مرة أخرى سيارة توصله الى القرية .. دخل القرية مفروود الصدر .. ممشوق القامة .. يشعر بأنه انتصر أخيراً على تلك النفس الأمارة بالسوء .. والتى تحدث عنها "كريم" فى خطبته .. نعم استطاع مقاومتها .. مكافحتها .. وترويضها .. تمنى أن يصل الى مرحلة تلك النفس المطمئنة .. تمنى أن يصبح أفضل وأفضل .. لكنه ذكر نفسه قائلاً .. ليس بالتمنى فقط يصل الإنسان الى ما يريد يا "آدم" .. غاص فى البحر من أراد اللألى ! .. توجه الى مسجد القرية ليصلى فريضة العشاء .. ثم جلس فى أحد الأركان يقرأ من مصحفه الصغير الذى بات لا يفارقه !

فى اليوم التالى شعر الجميع بتغيير فى اسلوب "آدم" الذى اتسم بمرح لم يألفوه من قبل .. كان يعمل بمزيج من الثقة بالنفس والتفاؤل .. وكأنه ملك الدنيا بأسرها .. انعكست نفسيته على عمله فأبدع ! .. سعد "زياد" بهذا التغيير الذى ألم بصديقه .. سأله فجأة :

- انت فىن عربيتك ؟

ابتسم "آدم" قائلاً :

- بعثها

نظر اليه "زياد" بدهشة وقال :

- بعثها ليه .. هتغيرها ؟

قال "آدم" بهدوء :

- لأ .. بعثها واديت فلوسها لـ "بوسى" .. عشان أرد الدين اللى كان فى رقبتي ليها

نظر اليه "زياد" بإعجاب وربت على كتفه قائلاً :

- متزعلش ربنا يعوضك غيرها ان شاء الله

ضحك "آدم" قائلاً :

- أنا مش زعلان على فكرة .. بالعكس .. عارف لما تحس انك كان فى حاجة مقيداك وفجأة اتحررت منها .. أهو أنا ده احساسى دلوقتى ..

ياريتنى كنت عملت كده من زمان .. لى كنت هعرف انى هرتاح كده كنت بعثها من زمان ورجعتها فلوسها فى تلك اللحظة توجهت "سمر" الى العيادة .. لمحها "زياد" وهى تدخل المبنى .. فقال وهو يغدو مسرعاً :

- سلام دلوقتى يا "آدم"

جلس "آدم" على أحد المقاعد فى الحديقة .. يرفع ذراعيه على ظهر المقعد الكبير كما لو كان صقراً يهيم بالطير فى السماء .. خرجت من مبنى الإدارة برفقة "أسماء" .. تتجادبان أطراف الحديث .. نظر اليها متأملاً .. وابتسامه عذبة على شفثيه .. حانت منها التفاته اليه .. لتري "آيات" نظراته المصوبة تجاهها .. اتسعت ابتسامته العذبة .. خفق قلبها بقوة .. فأشاحت بوجهها بسرعة .. وحثت السير لتغادر المكان !

رأى "زياد" أحد الأطفال يلعب بالكره مع أصدقائه فى الحديقة أمام العيادة .. جذب الطفل الذى كان يجرى من ملابسه و ركع على ركبيته وهو ينظر اليه متفحصاً وهو يقول :

- ايه ده يا ابنى انت وشك أصفر كده ليه

قال الطفل بحيرة :

- مش عارف يا عمو

جذبه "زياد" من يده وقال بمرح وقد لمعت عيناه بخبث :

- طيب تعالى نروح للدكتورة وهى تقولنا وشك أصفر ليه

فوجئت "سمر" بـ "زياد" يدخل غرفة الفحص برفقة أحد الأطفال ..

ابتسمت للطفل فبادلها ابتسامتها .. قال "زياد" بمرح :

- معلىش يا دكتورة كشف مستعجل

نظرت اليه "سمر" قائله بجدية :

- اتفضل .. ايه مشكلته

قال "زياد" بلؤم :

- معرفش يا دكتورة بس وشه أصفر ومش طبيعى خالص

قامت "سمر" من مكانها تتابعها نظرات "زياد" الخبيثه .. حملت الطفل

واجلسته على سرير الفحص وبدأت فى الكشف عليه .. ثم قالت :

- لا مفيهوش حاجة .. هكتبله على شوية فيتامينات وياريت تهتم بأكله

كويس

قال "زياد" على الفور :

- لا أنا مش متجوز أصلاً .. الواد ده مش ابنى

نظرت اليه بدهشة فرأت المرح في عينيه .. أشاحت بوجهها وتوجهت الى مكتبها مرة أخرى ودونت بعض الكلمات فوق الروشته ثم أعطتها له .. أخذ "زياد" الورقة منها وهو يشكرها قائلاً :

- متشكرين أوى يا دكتورة مش عارف من غيرك كنا عملنا ايه
خرج "زياد" .. فحركت رأسها يميناً ويساراً بدهشة .. قال الطفل لـ
"زياد" بعدما خرج من العيادة :

- مش هتجبلى الدوا يا عمو

دفعه "زياد" من ظهره قائلاً :

- دوا ايه يا ابني انت صدقت انك تعبانه .. ده انا اللي محتاج فيتامينات ..
يلا روح شوف كنت بتعمل ايه

جرى الطفل فى اتجاه أصدقائه يكمل اللعب معهم .. رأى "زياد" طفل
جالس على أحد المقاعد يأكل الآيس كريم .. فنظر اليه قائلاً :

- انت يا ابني مال وشك أصفر كده ليه

نظر اليه ببلاهة قائلاً :

- ايه ؟

جذبه من يده قائلاً :

- تعالى تعالى هنروح للدكتورة تشوف مالك

فوجئت "سمر" بـ "زياد" يدخل غرفة الفحص ويديه طفل آخر .. أخذت
تنظر الى الطفل ثم الى "زياد" الذى قال بلهفة :

- المرة دى الحالة مستعجلة جداً .. ومتحتملش تأخير

قامت ودارت حول المكتب بلهفة وهى تقول بقلق :

- خير فى ايه

أشار "زياد" الى الطفل الذى تلطخ وجهه بالآيس كريم .. قائلاً وهو

يحاول أن يخفى ابتسامته :

- وشه أصفر أوى

نظرت اليه "سمر" بحده وقالت بشك :

- انت بجيب الأطفال دى منين

لم يستطيع كتم ضحكاته فضحك ضحكة مكتومة .. نظرت اليه "سمر"
بغضب وقالت :

- انت جاي تهرج يا أستاذ

توقف عن الضحك بصعوبة وهو يقول :

- لا والله أبداً أصل أنا أمى الله يرحمها كانت دايماً تقولى عليك حنية قلب

يا "زياد" مشفتهاش على حد

أشارت "سمر" يعينها الى الباب وقالت بحزم :
- اتفضل

نظر اليها بغيظ وجذب الطفل من يده قائلاً :

- تعالى يا ابني نشوفلنا دكتورة تانية .. الدكتورة دى قلبها قاسى
قبل أن يغادر التفت اليها قائلاً :

- على فكرة مش مسامحك على اللي عملتية فيا المرة اللي فاتت ولازم
تعذرى

نظرت اليه "سمر" بحدة وعضت شفتيها بغضب .. فقال بمرح :

- خلاص خلاص .. أول مرة أشوف دكتورة أطفال مرعبة كده ..
المفروض بيكونوا رفاق كده وكيوت .. عشان الأطفال متخفش منهم
أشارت الى الباب برأسها وقالت بحزم :

- اتفضل

ابتسم "زياد" ورمقها بنظرة إعجاب قبل أم يغادر الغرفة .. هزت رأسها
فى حيرة قائله :

- مجنون ده ولا ايه

اقتربت "آيات" من "أسماء" التى تقف فى الشرفة ساهمة شارده ..
قالت لها بحنان :

- سرحان فى ايه يا جميل

ابتسمت "أسماء" بوهن .. ثم عادت تنظر مرة أخرى الى السماء
الرمادية والتي لا يفصلها عن زرقة الليل سوى أقل من ساعة .. نظرت
اليها "آيات" متأملة اياها وهى تقول :

- بتفكرى فيه ؟

نظرت الى "آيات" بحزن وقالت :

- بفكر فى حاجات كتير

استندت "آيات" على سور الشرفة وهى تنظر الى مجموعة من الأطفال
يلعبون بالكرة أسفل البناية .. ثم التفتت الى "أسماء" قائله :

- حسه انك زى اللي تايه فى البحر ومش لاقى شط يرسى عليه
التفتت "أسماء" تنظر اليها .. فأكملت "آيات" :

- وفجأة لقيت شط أدامك بس مشكلتك انك مش عارفه توصليله ؟
أومأت "أسماء" برأسها بحزن .. فابتسمت "آيات" قائله :

- محتاجه مركب توصلك للشط ده ؟
- ابتسمت " أسماء " بوهن وأومات برأسها .. فأكملت " آيات " :
- طيب تعملى ايه فى نفسك بأه لو كان المركب أدامك وانتى اللى مش عايزه تركبى
- اختفت ابتسامه " أسماء " وقالت بتوتر :
- مش مسألة مش عايزة أركب
- أمال ايه ؟
- قالت " أسماء " بضيق :
- معرفش حسه ان فى حاجة مكتفانى .. زى ما قولتى المركب أدامى بس حسه انى متكته ومش عارفه أركب .. حسه ان الموج بيثدنى وبيبعدنى عن المركب دى
- قالت " آيات " بحنان :
- يبقى محتاجة مساعدة صديق
- ابتسمت " أسماء " .. فبادلتها " آيات " الابتسام قائله وهى تمد اليها يدها :
- هاتى ايدك
- أعطتها " أسماء " يدها بإستغراب فتشبثت " آيات " بيدها بقوة وقالت بحنان :
- مش هسيبك فى البحر أكثر من كده يا " أسماء " .. ولا هسمح لك انك تغرقى .. عشان أنا بحبك بجد ونفسى نكون مع بعض فى الجنة
- اغرورقت عينا " أسماء " بالعبرات وأطرفت برأسها .. فقالت " آيات " التى دمعت عيناها هى الأخرى :
- يا بنتى أنا كنت زيك .. بس أنا عرفت أفوق لنفسى .. أنا عارفه احساس انك مكتفه ده .. جربته قبل كده
- ثم نظرت الى يديهما المتشابكة وهى تقول :
- أدينى بساعدك أهو .. بس ربنا بيقول " إِنَّ اللَّهَ لَا يُغَيِّرُ مَا بِقَوْمٍ حَتَّى يُغَيِّرُوا مَا بِأَنْفُسِهِمْ "
- تساقطت من عيني " أسماء " العبرات عزيزة فقالت " آيات " :
- لو عايزة " على "
- رفعت " أسماء " رأسها تنظر اليها .. فأكملت " آيات " بحزم :
- يبقى لازم تكونى " فاطمة "
- شردت " أسماء " فى كلامها فأكملت :
- ومش قصدى " على " ده .. قصدى سيدنا " على " رضى الله عنه .. لو عايزه واحد زيه .. يبقى لازم تكونى زى " فاطمة " بنت النبي صلى الله

عليه وسلم .. مينفعش تكونى عايزة " على " .. وانتى واقفه مكانك محلك
سر

توقفت عبراتها عن الانهمار .. ونظرت الى "آيات" .. التى قالت بحنان :
- " على " مش أول ولا آخر راجل فى الدنيا .. فى رجاله كتير كويسة ..
بس كل واحد بيدور على اللى شكله .. واحد زى " على " بيدور على
واحدة شكله يا "أسماء" .. فاهمانى ؟
أومأت "أسماء" برأسها .. فقالت "آيات" :

- عارفه لو اتغيرتى بجد .. وعشان ربنا .. عشان تبقى زى ما ربنا عايز ..
ربنا هيكرمك أوى .. ربنا بيفرح جداً بالعبد اللى بيتوب .. كان ممكن ربنا
يخلقنا كلنا كويسين وكاملين ويدخلنا كلنا الجنة .. لكنه لحكمته خلقنا كدة
شوية نغلط ونتوب ونستغفر وندخل الجنة .. وناس تفضل على حالها
وعنادها ومعصيتها والعياذ بالله يدخلوا النار .. ده من عدل ربنا .. ان كل
واحد بياخذ جزاء عمله
ثم قالت :

- "كريم" قالى جملة حلوة أوى مش قادرة أنساها .. قالى ان النبي صلى
الله عليه وسلم قال " حفت الجنة بالمكاره وحفت النار بالشهوات " .. يعنى
الجنة عشان توصليلها لازم تجبرى نفسك انك تعملى الطاعات حتى لو
كارهاها .. بس بتعملها عشان ربنا أمرك بيها .. أما النار فبتتملى بالناس
اللى بتمشى ورا شهواتها ورغباتها وأهوائها .. وبتعمل كل اللى هى
عايزاه من غير ما تقف وتشوف ده حلال ولا حرام .. هيرضى ربنا ولا
هيغضبه

شعرت "أسماء" بسكينه فى قلبها وهى تستمع الى "آيات" .. ران
الصمت عليهما وكل منهما شارده فى جهه وهما مازلتا ممسكتان بأيدي
بعضهما البعض .. قالت "أسماء" فجأة :

- تعرفى ان بابا بيدور عليا وسأل دكتور "آدم" عليا
نظرت اليها "آيات" بدهشة .. فقالت "أسماء" بشرود :
- دكتور "آدم" كان عايز يقولهم على مكانى بس أنا مكنتش حبه انهم
يعرفوا

ثم التفتت الى "آيات" قائله :
- انتى رأيك ايه ؟

صمتت "آيات" تفكر .. ثم قالت :

- رأيي عرفيهم مكانك .. مهما كان هما أهلك .. مهما كانت المشاكل اللى
بينكم .. بس برده هما أهلك

تهدت "أسماء" بعمق .. ثم قالت :
- أنا حسه فعلاً انى عايزة أكلهم
لمعت العبرات فى عينيها وهى تقول بتأثر :
- وحشونى أوى
عانقتها آيات" بشدة .. فتركت "أسماء" لعبراتها العنان

فى المساء عادت "سمر" من عملها فى العيادة .. نظرت اليها أمها بحنق
قائله :

- ايه يا "سمر" أمال لو كانوا بيدوكى مرتب على كده .. يا بنتى انتى
بتشغلى وقتك مش أكثر يعني مش لازم تشتغلى بزمة كدة
قالت "سمر" وهى تتوجه الى غرفتها :
- يا ماما انتى عارفه انى بحب شغلى جداً .. وبعدين ازاي يعني مشتغلى
بزمة ده أنا دكتورة .. ومش أى دكتورة .. لا أدكتورة أطفال .. ازاي
أخون الأمانة اللي ربنا ائتمنى عليها
نظرت حولها وقالت :

- أمال "آيات" و "إيمان" و "أسماء" فين ؟
قالت أمها :

- "آيات" و "أسماء" نزلوا يتمشوا شوية .. و "إيمان" مع خطيبها
بيتعشوا بره

فتحت "سمر" حقيبتها ثم ما لبثت أن صاحت بضيق :

- أوووف نسيت موبايلى فى العيادة
قالت أمها بلا مبالاة هى تشغل التلفاز :

- ابقى هاتيه الصبح

قالت "سمر" وهى تتوجه للباب :

- لا هروح أجيبه

أوقف "كريم" سيارته أسفل البناية وهو ينظر الى "إيمان" مبتسماً ..

بادلته ابتسامته .. نزع الدبلة من اصبعه ومد يده اليها قائلاً :

- ممكن بأه تحنى عليا وتلبسينى الدبلة

لحظة تردد ثم أخذتها من يده وألبستها اياه فهتف :

- أشهد أن لا اله الا الله .. شوفتى زى شكة الدبوس

أطلقت "إيمان" ضحكة مرحة وهى تقول :

- خلاص بأه بطل تريقه أديني لبستهالك أهو

نظر اليها "كريم" وهو يقول :

- عارفه يا "إيمان" أقولك على سر

أسندت ظهرها الى المقعد وقالت :

- قول

التفت اليها قائلاً :

- أنا طول عمرى بحلم يبقى عندى ابن زى "صلاح الدين الأيوبي" .. قائد

.. عظيم .. تلتف الجيوش حواليه .. ويفتح القدس مرة ثانية

نظرت اليه "إيمان" بتأثر فأكمل قائلاً بحماس :

- نفسى أنا وانتى يا "إيمان" نعين بعض على كدة .. نربى ولادنا صح ..

مش زى ما احنا اتربينا .. نربيهم من صغرهم على الدين وعلى العقيدة

وعلى المبادئ .. نربيهم على حب النبي وحب الصحابة وحب أمهات

المؤمنين .. نربيهم ونعرفهم ان قدوتهم فى الحياة مش الخطيب ومنيب ..

لا قدوتهم "عمار بن ياسر .. عمر بن الخطاب .. بلال بن رباح .. وعائشة

وحفصة وأم حبيبة وفاطمة الزهراء .. نفسى يغيروا فى الدنيا وفى البلد دى مش زى ما جم

زى ما راحوا .. نفسى أفيد ديني وأفيد بلدى وأطلع ولادى شايلىن هم

دينهم وهم بلدهم على كتافهم .. مش كل همهم هو أكل وشرب ونوم

نظر اليها بعمق وأمسك يديها بين راحتيه وقال مبتسماً :

- هتساعديني على ده يا "إيمان"

أومات برأسها وقالت بتأثر :

- أيوة يا "كريم" .. هساعدك على ده

قبل "كريم" يديها وقال وهو ينظر اليها مبتسماً :

- وأنا أوعدك انى أكون خير زوج ليكي .. أكيد هتمر علينا مشاكل مش

هتبقى حياتنا كلها عسل فى عسل .. بس أوعدك على الأقل لما تهب علينا

الريح .. انى أتقى ربنا فيكي .. زى ما أنا عايزك توعديني انك تتقى ربنا

فيا

قالت له "إيمان" وهى تتشبث بيديه بقوة :

- أوعدك ان مهما مر علينا من مشاكل .. هتلاقيني قبل ما تنام بقرب منك

وبقولك "لا أدوق غمضاً حتى ترضى" .. مش هسيبك فى يوم تنام وانت

غضبان عليا

قرب "كريم" رأسها منه وقبل جبينها .. ابتسمت له بخجل وأبعدت نفسها

..فقال مبتسماً :

- ربنا يقدرنى وأقدر أحافظ على الأمانة

عادت "سمر" الى العيادة فوجدت عاملة النظافة تنظف المكتب فبحثت عن هاتفها فوق المكتب وهي تقول :

- مشفتيش موبائلى بيتهيالى كنت سايباه هنا
قالت المرأة وهي تنظر يمينا ويسارا :

- لا يا دكتوراه والله مشفتوش

قالت "سمر" بحيرة ممزوجة بالضيق :

- أمال هيكون راح فين بس

اتجهت الى البالطو الأبيض المعلق على الشماعة بجوار المكتب ودست يدها فى جيبه لتظهر ابتسامة على شفيتها وهي تقول :

- الحمد لله لقيته

رن جرس الهاتف الموضوع فوق المكتب .. فالتقطت السماعه .. كانت احدى الأمهات تسألها عن طفح جلدى آلم بصغيرها .. جلست "سمر" فوق مكتبها تجيب على أسئلة المرأة بصبر .. خرجت عاملة النظافة من المكتب .. وفجأة أظلم كل شئ .. فصاحت "سمر" وهي تضع يديها على سماعة الهاتف :

- يا حجه .. هو مفيش هنا كشاف

أتاها صوت المرأة وهي تصيح قائله :

- بدور أهو يا دكتوراه

عادت لتكمل حديثها مع الأم عبر الهاتف .. فجأة سمعت صوت صراخ

المرأة بالخارج .. فهبت واقفة وسقطت السماعه من يديها .. نادى المرأة فلم تجيبها .. وضعت يدها على قلبها وهي تتم بصوت مرتجف :

- أعوذ بالله من الشيطان الرجيم .. أعوذ بالله من الشيطان الرجيم

صرخت تناديهامرة أخرى دون جدوى .. تساقطت عبراتها فى ظلام

الغرفة .. أخذت تبحث فوق المكتب عن هاتفها بأيدي مرتجفة فلم تجده من

فرط توترها .. فجأة رأت كتلة لهب كبيرة تمر من أمام الباب لتملأ الردهة

فى الخارج .. نظرت الى النار بأعين متسعة وقد ارتجف جسدها فرعاً

وهلعاً .. جمدها خوفها فى مكانها .. فقط كانت تنظر الى النار كالتمثال !

أسرع كل من "كريم" و "على" و "زياد" بالحضور الى العيادة بعدما

توجه فرد الأمن الى مكتب "كريم" ليخبرهم بأمر الحريق .. أسرع البعض بالإتصال بالمطافئ .. بينما تناول البعض طفايات الحريق الصغيرة يحاولون بها اخماد تلك النيران التي اندلعت فى عيادة الأطفال التي كانت ترتفع طابقين عن الأرض .. كانت عاملة النظافة جالسه على الأرض تبكى وهى تمسك برأسها الذى ينزف دماً .. سألتها "كريم" بلهفه :

- ايه اللي حصل ؟

قالت المرأة الباكية :

- واحد خبطنى على راسى وفجأة لقيت النار حوليه حطيت بطانية حوليا وخرجت و

لم تستطع أن تكمل حديثها فقد سقطت مغشياً عليها .. حملها "على" وتوجه بها مسرعاً الى أحد الأطباء المقيمين فى القرية لحين حضور الإسعاف .. نظر "كريم" الى "زياد" بقلق وهو يقول :

- أنا خايف يكون فى حد جوه

قال "زياد" بلهفة وهو يرتدى احدى المعاطف الواقية ويعطى آخر لـ "كريم" :

- تعالى نشوف قبل ما النار تمسك فى المكان أكثر من كده دخل كلاهما .. كانت النيران تشتعل من الجدران وكأن أحدهم سكب عليها سائل سريع الاشتعال .. لم تكن النيران قد وصلت الى الأرضية فاستطاعوا المرور دون صعوبة كبيرة .. أخذوا ينظران فى الغرف التي سُدت فتحاتها بالنيران وهما يصيحان :

- فى حد هنا ؟

فجأة سمعا صوت "سمر" التي صرخت باكيه :

- أنا هنا

وقف "كريم" و "زياد" أمام مدخل الغرفة المشتعل وتلك النيران التي تفصلهما عن "سمر" التي وقفت خلف المكتب باكية العينين ضامة قبضتيها الى بعضهما البعض واضعة اياهما فوق صدرها .. كانت ترتجف كورقة فى مهب الريح .. فصاح "زياد" فى "كريم" :

- خليه يخطوا مرتبة تحت الشباك بسرعة يا "كريم"

رجع "زياد" الى الخلف وأحاط نفسه بالبطانية بإحكام ثم اندفع داخل الغرفة ليقف فى وسطها .. توجه "كريم" مسرعاً لإحضار المرتبة .. كانت "سمر" ترتجف بشدة .. فنظر اليها "زياد" قائلاً :

- لا أبوس ايدك او عى يغمى عليكى دلوقتى .. متخفيش النار بعيد عنك التفت ينظر الى مدخل الغرفة والذى أكلته النيران المسعورة حتى أصبح

- انت كويس يا "زياد" جراك حاجة
أمسك "زياد" ذراعه وهو يهتف بألم :
- حسبي الله ونعم الوكيل .. مرتبة دى ولا صبة أسمنت .. انتوا منجدينها
بإيه يا ظلمه
ساعد "كريم" "زياد" على النهوض فى تلك اللحظة أقبّل "آدم" وهو
ينظر الى صديقه فى لوعة قائلاً :
- "زياد" ايه اللى حصل .. ايه اللى بهدلك كده
قال "زياد" وهو ممسك بذراعه ويأن المأ :
- أنا كويس كويس .. متقلقش بس شكلى هحتاج أجبس
ساعده "آدم" على ركوب سيارته ثم أخذ منه المفتاح وانطلق به الى
المستشفى بينما انهمك "كريم" مع الرجال فى اطفاء الحريق !

جلست "سمر" فى منتصف فراشها تبكى كالأطفال وبجوارها أمها و
"إيمان" و "أسماء" .. دخلت "آيات" حاملة كوب من الليمون وأعطته
لها قائلة :
- اشربى ده يا "سمر"
تناولت "سمر" الكوب من بين يديها وهى تقول بصوت مرتجف :
- كنت مرعوبة .. من رعبى فضلت واقفة أبص للنار معرفتش أتصرف
عانقتها أمها وقالت فى لهفة :
- الحمد لله يارب .. الحمد لله انك رجعتهاالى بالسلامة
قالت "إيمان" بأسى :
- يا عيني شكل الأستاذ "زياد" ايده اتكسرت وهو بينظ .. دكتور "آدم"
خده على المستشفى
هتفت "سمر" وقد تذكرت فجأة المرأة التى كانت تنظف الكتب :
- كان فى ست معايا فى العيادة هى بتنظف .. متعرفوش طلعوها ولا لأ
طمأنتها "إيمان" قائلة :
- آه متقلقيش طلعوها و "على" خدها على المستشفى .. "كريم" قالى ان
دماغها اتفتحت وقالت ان فى حد خبطها على دماغها .. عامة هو قالى ان
البوليس بيحقق دلوقتى وانهم أكيد هيطلبوا شهادتك انتى وهى و الأستاذ
"زياد"
هتفت أم "سمر" :

النظافة .. ووعدوا بسرعة العمل على اكتشاف الجناة ..
اجتمعوا جميعهم فى مكتب "كريم" مساءً لبحث هذا الأمر الجلل الذى
يهدد عملهم وسمعة القرية .. بإستثناء "أسماء" التى اعتذرت عن
حضور الإجتماع والتى لاحظ "على" غيابها .. أصر "آدم" على أن هذه
الأفعال لن تخرج الا من يد "عاصى" .. كان القرار الذى توصلوا اليه هو
زيادة الحراسة ووضع كاميرات المراقبة فى زوايا متفرقة فى أنحاء
القرية الى حين وصول الشرطة الى معلومات جديدة فى القضية
انتهى الإجتماع وكل منهم شارد فيما أصاب القرية بالأمس وفيما يمكن أن
يفعله "عاصى" ! .. أعطى "كريم" مفتاح السيارة لـ "آيات" و
"إيمان" قائلاً :

- استنوى فى العربية عشان نروح المشوار بتاعنا
كانت "إيمان" قد طلبت بعض المستلزمات للصالة الرياضية و اقترح
"كريم" خروج "آيات" معها والتى لا تخرج من القرية أبداً فأراد أن
يرفقه عنها قليلاً .. خرجت الفتاتان من المكتب فقالت "إيمان" وهى تشير
الى بقعه عصير على ملابسها :

- عايزة أروح أغير هدومى الأول مش معقول هخرج كده
قالت "آيات" بوهن :

- أنا هلكانه مش هقدر آجى معاكى .. هستنى "كريم" فى العربية ونجيك
ناخذك من البيت
- خلاص ماشى

خرجت "إيمان" من المبنى لتسمع "على" من خلفها يقول :

- مروحه ؟

التفتت قائله :

- أيوة هغير الأول عشان خارجه مع "كريم" و "آيات"

أوما برأسه قائلاً :

- طيب أنا أصلاً مروح

سارا معاً فى اتجاه المنزل .. بينما توجهت "آيات" الى الجراج للجلوس
فى سيارة "كريم" وانتظاره .. فجأة .. وجدت من يكلم فمها من الخلف
.. حاولت الصراخ فأتى صوتها مكتوماً للغاية لا يسمعه من يبعد عنها
ببضعه أمتار .. حاول الرجل جذبها فى اتجاه ما .. وهى تحاول أن تفلت
من بين يديه !

رأى "آدم" .. "أحمد" وهو متوجه الى خارج مكتب "كريم" .. خشى أن

يستغل وجود "آيات" فى الجراج ويحاول الحديث معها .. فغادر مكتب "كريم" على الفور وسار خلفه ليرى الى أين هو ذاهب .. انعقد جبينه بضيق شديد وهو يراه كما توقع "آدم" متوجهاً الى الجراج .. لحقه وقد تزايد الغضب بداخله .. توقف "أحمد" فجأة وهو يرى "آيات" وذاك الرجل المقنع يجذبها مبتعداً .. وقف "آدم" خلفه يراقب المشهد بأعين متسعة قبل أن ينطلق كالسهم فى اتجاه الرجل .. كان الرجل عاكفاً على محاولة السيطرة على حركات "آيات" المجنونة فى افلات نفسها من بين يديه .. فلم ينتبه الى لكمة "آدم" التى تحركت بسرعة فى الهواء لتتهوى على وجهه فيصيح متألماً .. جذب "آدم" .. "آيات" من ذراعها يبعدها عن الرجل ووقف أمامها فى مواجهاته .. وبسرعة البرق أخرج المقنع مطواه من جذائه وحاول تسديد الطعنات الى "آدم" .. صرخت "آيات" باكية وهى ترى يد "آدم" التى تمسك بذراع الرجل فى محاولة افلات المطواة منها .. أسرع "أحمد" فى جذبها صائحاً :

- تعالى يا "آيات" لازم تبعدى من هنا
صاحت :

- لا استنى

نظرت "آيات" خلفها الى "آدم" الذى تلقى لكمة من الرجل أرداه أرضاً ثم جثم فوقه يحاول طعنه بمطواته فسدده اليه "آدم" لكمة قلبت الموازين وأصبح "آدم" معتلياً الرجل .. صاح "أحمد" وهو يجذبها من ذراعها :

- سيبيه هيعرف يتصرف .. يلا بسرعة من هنا
صاح "آدم" بلوعة وهو يحاول السيطرة على الرجل :

- "آيات" امشى من هنا .. خدها بعيد يا "أحمد"

لكن فجأة سمعت صرخة مدوية من "أحمد" التفتت وأطلقت صرخة عالية عندما وجدت مقنعاً آخر يلف عنق "أحمد" بذراعه يريد خنقه .. ظلت تطلق صرخات مدوية على أحد يسمعها .. استطاع "آدم" ربط يدي الرجل خلف ظهره بربطه عنقه وأسرع فى اتجاه الرجل الذى يخنق "أحمد" جذبته من ملابسه بقوة .. فأفلت "أحمد" من بين يديه وأخذ يشهق بقوة ليعبئ رنته بالهواء الذى افتقدته .. ظل "آدم" و المقنع يكيلان الى بعضهما اللكمات والركلات .. بينما جلست "آيات" مكانها وقد شعرت بأن قدميها لا تحملانها وأخذت تصرخ عالياً .. فى تلك اللحظة حضر "كريم" و "زياد" ليروا ذلك المشهد المفزع .. أسرع الاثنان يعينان "آدم" على الإمساك بالرجل وصد ضرباته .. لم ينتبه أحد الى الرجل الأول الملقى على الأرض والذى استطاع تحرير يديه من ربطة عنق "آدم" .. أخرج مطواة

أخرى من بين ملابسه وأطلق زمجرة غاضبة وهو ينطلق فى اتجاه
"كريم" الذى يكتف المقتع الثانى .. فصرخ "آدم" بسرعة محذراً :

- حاسب يا "كريم"

ترك "كريم" ذراعى المقتع ليمسك بذراع المقتع الآخر كى يتفادى الطعنه
التي كاد أن يوجهها اليه .. بمجرد أن أفلت "كريم" المقتع الثانى استطاع
أن يتمالك نفسه وسدد لكمة بكوعه الى بطن "زياد" الذى صاح متألماً ..
حاول "آدم" شل حركته لكنه هوى بقبضة مطواته فوق رأس "آدم"
بقوة انفجرت لها الدماء من رأسه وترنح واضعاً يديه على موضع الجرح
قبل أن يجلس أرضاً ويهرب المقتع من المشهد .. صرخت "آيات" وهى
ترى الدماء تنهمر على وجه "آدم" .. بينما يحاول "كريم" و "زياد"
الامساك بالمقتع الأول .. استطاعا بالفعل شل حركته تماماً .. اتصل
"كريم" بأفراد الأمن على البوابة الذين حضروا بسرعة وسيطروا على
الرجل .. كانت "آيات" تنظر الى "آدم" وتبكي بلوعة وهى جالسه على
الأرض تصرخ بشدة وقد أفرعها كل ما حدث .. نظر "آدم" تجاهها وهو
ممسكاً برأسه .. فتح عينيه بصعوبة فظهر لها كرتان من اللون الأزرق
وسط صفحة الدماء الحمراء التى غمرت وجهه .. تمت بصوت خافت وهو
يشعر بألم حاد فى رأسه :

- متخفيش

اتجه "كريم" الى "آيات" وهتف يريد الإطمئنان عليها :

- انتى كويسة ؟ .. "آيات" انتى كويسة فيكى حاجة

هزت رأسها نفيماً وهى تنظر الى "آدم" باكية بكاء أشبه بالصراخ والأنين
.. تركها "كريم" ليتفحص جرح "آدم" الذى كان ينزف بغزارة ساعده
مع "زياد" على النهوض بصعوبة .. نظر "كريم" فى اتجاه "آيات"
وصاح :

- بينزف جامد لازم أنقله المستشفى دلوقتى .. خد انت "آيات" يا "زياد"
روحها

توجه "كريم" مسرعاً الى سيارته وأدخل "آدم" الى المقعد الأمامى
وانطلق به تحت نظرات "آيات" الملتاعة

أوصلها "زياد" الى البيت وهى تحمل نفسها بصعوبة .. استقبلها الفتيات
فى دهشة وفزع .. كانت ليلة عصيبة على الجميع .. ظلت "آيات" فى

غرفتها تهاتف "كريم" بين الحين والآخر للإطمئنان على وضع "آدم" ..
أخبرها "كريم" بأنه داخل غرفة الفحص يتم عمل بعض الأشعة على
رأسه .. شعرت "آيات" بقلبها يكاد أن يتوقف خوفاً .. قامت وتوضأت
وفرشت سجادتها ووقفت تصلى وتدعو الله عز وجل باعين دامعة أن
يسلمه ويحفظه من كل سوء .. حاولت النوم فلم تستطع .. فى النهاية عاد
"كريم" .. سمعت صوت سيارته من الأسفل .. علمت أنه سيأتى للإكمنان
عليها فلم تشأ أن تخرج لها وتظهر لهفتها لمعرفة أخبار "آدم" .. دخل
"كريم" غرفتها برفقة "إيمان" .. بمجرد أن رآته ألقى بنفسها بين
ذراعية وتعالى شهقات بكائها .. أجلسها "كريم" على الفراش وجلس
جوارها وهو يضع يده على رأسها ويقرأ عليها آيات الرقية .. الى أن
هدأت وسكنت .. مسح عبراتها وهو يقول بحنان :

- أحسن دلوقتى

أومأت برأسها .. نظرت اليه تنتظر أن يخبرها بحال "آدم" لكن اهتمامه
كان منصباً عليها . فاضطرت أخيراً أن تقول :

- وهو ازيه دلوقتى ؟

تنهد "كريم" قائلاً :

- الحمد لله جت سليمة .. خدله كام غرزه .. بس الحمد لله انها جت على أد
كده

قاتل "آيات" وهى تعاود البكاء مرة أخرى :

- كنت مرعوبة لما شوفت منظر الدم

ربت "كريم" على كتفها قائلاً :

- قولى الأذكار وحاولى تنامى .. انتى شكلك مرهق أوى

فعلت "آيات" ما طلب .. وبصعوبة شديدة استطاعت اغلاق عينيها .. من
التعب !

استيقظت "آيات" وهى تنظر الى هاتفها .. لم يتصل "كريم" .. أرادت

الاتصال به لمعرفة أخبار "آدم" .. لكنها عدلت عن ذلك واتصلت بـ ..

والدة "آدم" .. حتى تستطيع الحصول منها على اجابة تشفى غيلها ..

حمدت الله أنهما تبادلتا أرقام الهواتف يوم أن كانت عندها فى المكتب ..

أتاها صوت يبدو عليه آثار الارهاق :

- السلام عليكم

تمتم "آيات" :

- وعليكم السلام

- ازيك يا "آيات" يا بنتى
- الحمد لله يا طنط
صمتت برهة ثم قالت بإضطراب :
- أنا بس كنت عايزة أطمئن .. دكتور "آدم" أخباره ايه دلوقتي
فى تلك اللحظة دخلت أم "آدم" الى غرفة ابنها مسرعة والذى كان ممدداً
فى فراشه .. وقد لف الشاشة حول رأسه .. نظر اليها "آدم" واتسعت
عينه دهشة وهو يسمعها تقول :
- تسلمى يا "آيات" يا بنتى متحرمش من سؤالك
قالت "آيات" بحزن وقلق :
- يعني هو كويس دلوقتي .. يعني مش بيتألم ؟
قالت أمه وهى تنظر اليه مبتسمة بحنان :
- أيوة يا بنتى كويس الحمد لله متقلقيش
ابتسم "آدم" وهو يمد يده الى والدته يبغى الهاتف .. أعطته اياه فوضعه
على أذنه قائلاً برقه :
- أنا كويس يا حبيبتي متقلقيش عليا
تجمدت "آيات" فى مكانها ووضعت يدها على فمها وقد اتسعت عيناها
فزعاً .. قال "آدم" بحنان :
- متتصوريش فرحان باتصالك أد ايه .. لانه خلانى أتأكد ان أنا مهم
بالنسبة لك .. كنت هتجنن امبارح من خوفى عليكى .. بس "كريم" طمنى
انك كويسة .. لو كان جراك حاجة كنت روحت فيها
أغلقت "آيات" هاتفها فوراً وهى تحاول السيطرة على دقات قلبها التى
أخذت تتسارع بشدة .. لكن هيهات .. القلب الذى تسارعت دقاته يأبى
أن يعود الى سباته !



ابتسم "آدم" وهو يمد يده الى والدته يبغى الهاتف .. أعطته اياه فوضعه
على أذنه قائلاً برقه :
- أنا كويس يا حبيبتي متقلقيش عليا
تجمدت "آيات" فى مكانها ووضعت يدها على فمها وقد اتسعت عيناها
فزعاً .. قال "آدم" بحنان :
- متتصوريش فرحان باتصالك أد ايه .. لانه خلانى أتأكد ان أنا مهم
بالنسبة لك .. كنت هتجنن امبارح من خوفى عليكي .. بس "كريم" طمنى
انك كويسة .. لو كان جراك حاجة كنت روحت فيها

أغلقت "آيات" هاتفها فوراً وهى تحاول السيطرة على دقائق قلبها التى
أخذت تتسارع بشدة .. لكن هيهات .. القلب الذى تسارعت دقائقه يأبى
أن يعود الى سباته !
مسحت وجهها بكفيها وهى تحاول ألا تفكر فى كلماته التى أسمعها اياها
منذ قليل .. قامت وغسلت وجهها .. نظرت الى نفسها فى مرآة الحمام ..
بعينيها الحائرتين .. وملامحها المضطربة .. بلعت ريقها بصعوبة وهى
تشعر بقلبها وهو يعصيها ويرفض أن يستكين كما كان .. جففت وجهها
بعصبيه وخرجت ترتدى ملابسها .. وتتوجه الى عملها عل انشغالها به
ينسيها تلك الأفكار وتلك المشاعر التى تحاول مقاومتها .. وبشدة

توجه "على" الى مكتب "كريم" .. فوجده يتحدث الى الهاتف .. أشار له

"كريم" بالجلوس وانتظاره حتى يُنهي مكالمته الهاتفية .. بدا على
"على" الضيق والتوتر .. انهى "كريم" مكالمته ونظر اليه وهو يقول :
- خلاص كاميرات المراقبة هتركب فى القرية النهاردة .. والحراسه اللي
على البوابه زودناها

أوما "على" برأسه لكن عقله كان فى مكان آخر
ضاقت عينا "كريم" وهو يقول :

- مالك يا "على" فى حاجه

تنهد "على" قائلاً فى وجوم :

- بص يا "كريم" أنا بعترك صاحبي وأخويا .. عشان كده جيت أتكلم
معاك .. أنا حاسس انى مخنوق أوى

نهض "كريم" والتف حول المكتب .. جلس على المقعد المواجه لـ
"على" وسأله باهتمام :

- خير يا "على" .. قول أنا سمعك

تنهد "على" بأسى وقال :

- "أسماء" صحبة أختى وأختك

قال "كريم" باستغراب :

- مالها .. حصل منها حاجة ؟

قال "على" بضيق :

- اللي حصل ان انا وهى اتكلمنا كذا مرة مع بعض عن لبسها وعن شروط

الحجاب وكانت بتسألنى فى حاجات وأنا أرد عليها زى التعدد والمصافحة

ظل "كريم" صامتاً .. فأكمل "على" وهو مطرق برأسه :

- اللي عرفته من "إيمان" انك حست بحاجه نحيتي .. وقالتها صراحة

يعني مفيش مجال لسوء الفهم .. من ساعة معرفت وأنا حاسس انى

مخنوق ومضايق جداً .. خاصة ان "إيمان" قالتلى ان ظروفها صعبة ..

ومشاكلها كتير .. فمكنتش أحب أزود مشاكلها دى وأخليها تـ

توقف ولم يستطع ان يكمل .. ظل مطرقاً برأسه .. الى أن قال "كريم"

وهو يسند مرفقةً فوق المكتب :

- غلطان يا "على"

رفع "على" رأسه ينظر الى "كريم" الذى قال بحزم :

- غلطان انك تتكلم معاها فى حاجة شخصيه زى لبسها ولو حتى من باب

انك تنصحتها .. مينفعش يا "على" وأظن انك عارف الكلام ده كويس ..

لان انت شاب ومعرض للفتنة .. زي ما هى بنوته صغيره ومعرضة للفتنه

.. وده اللي حصل فعلاً البنيت اتعلقت بيك وحبتك .. وأنا واثق انك أكيد انت

كمان مشاعرك اتحركت نحيتها
 أطرق "على" برأسه مرة أخرى وقد احتقنت الدماء في وجهه .. أكمل
 "كريم" :
 - لو كنت عايز تنصحها فكان ممكن تقول لأختك "إيمان" تتكلم معاها ..
 أو تقولى وأنا أقول لـ "آيات" لكن كلامك معاها كده ده باب فتنة كبير يا
 "على"
 عقد "على" جبينه بضيق وهو يقول :
 - طيب أعمل ايه دلوقتي
 تنهد "كريم" وانحنى الى الأمام يسند مرفقيه الى قدميه وهو يقول :
 - حاول متحتكش بيها خالص .. لا فى شغل ولا فى غير شغل .. وأنا
 هحاول أشوف طريقه بحيث ان تعاملها يكون مع "آيات" مباشرة من
 غير ما تضطر تتعامل معاك
 ثم تنهد قائلاً وهو ينظر الى "على" بعتاب :
 - طيب هي معذورة لجهلها .. لكن انت مش معذور يا "على"
 تتمم "على" بضيق :
 - استغفر الله العظيم .. انا فعلاً كنت حاسس ان مكنش المفروض أتكلم
 معاها كده وانها ممكن مشاعرها تتحرك نحيتي بس معرفش ايه اللي
 خلانى أستمر وأتكلم معاها عن لبسها
 تنهد قائلاً :
 - انت صح .. لو كنت عايز أنصحها فعلاً كنت خلّيت "إيمان" هي اللي
 تتكلم معاها مش أنا
 قال "كريم" وهو يرجع ظهره للخلف :
 - خلاص حصل خير .. وكويس ان الموضوع فى أوله .. ملحوقه يعني ..
 وانت راجل محترم يا "على" .. بس طبيعى انك تضعف بس أهم حاجة
 زى ما علمت كده تلوم نفسك على الغلط وتصححه
 اوماً "على" برأسه وهو يقول :
 - متشكر يا "كريم" .. مكنش فى غيرك أقدر أتكلم معاه ويفهمنى
 ابترسم "كريم" قائلاً :
 - أنا تحت أمرك فى أى وقت يا "على" .. انت مش أخو "إيمان" مراتى
 بس .. لأ انت أخويا أنا كمان
 ابترسم "على" وهو يستأذن للإنصراف الى عمله

- سمحيني يا بنتى . . سمحيني .. ححك عليا .. انا عارفه انى أم فاشلة ..
ومستحقش أكون أم أصلاً
أجهشت "أسماء" فى البكاء فى الأخرى .. أخذ "مدحت" الهاتف من يد
"مديحة" بلهفة وهو يقول بصوت مرتجف وأعين دامعة :
- "أسماء" حبيبتي .. انتى كويسة يا حبيبتي
قالت "أسماء" من بين شهقاتها وهى تمسح دموعها بظهر يدها :
- أيوة يا بابا كويسة .. بس انتوا وحشتونى أوى
قال لها بلهفة :
- انتى اللى وحشتيني أوى يا "أسماء" .. انتى فىن يا حبيبتي قوليلنا
مكانك وهنجيلك دلوقتي
قالت "أسماء" بلهفة :
- هو انت وماما رجعتوا رجعتوا تانى لبعض يا بابا
ألقي نظرة على "مديحة" الى وقفت أمامه ووجهها مبئل بالعبرات .. ثم
قال :
- قوليلى انتى فىن يا "أسماء"
تنهدت بعمق ثم قالت :
- أنا فى العين السخنة
قال باستغراب :
- فى العين السخنة .. بتعملى ايه هناك
أخذت منه "مديحة" الهاتف وهتفت :
- حبيبتي قوليلى مكانك بالظبط وهنجيلك دلوقتي حالاً يا حبيبتي
أعطتهم "أسماء" العنوان .. فأسرعت "مديحة" بتبديل ملابسها ..
وانطلقت مع "مدحت" فى طريقهم الى .. قرية الماسة !

فى اليوم التالى زار "آدم" فى المستشفى كل من "كريم" و "زياد" و
"على" .. كان سعيداً لرؤيتهم حوله .. ابتسمت والدته وهى تعدل من
وضع الوسادة خلف ظهره .. وقالت للشباب :
- منورين والله .. اهو كده لازم تكونوا اخوات وتخافوا على بعض وتبقوا
ايد واحدة .. الديب مبيقدرش الا على الغنمة اللى ماشيه لوحده .. لكن لو
سط القطيع يخاف يقربلها
ابتسم "زياد" قائلاً بمرح :
- آه فعلاً هو "آدم" يدى على غنمة

ضحك "آدم" قائلاً :
- ماشى يا أبو دراع مكسور .. بأه مش مكسوف من نفسك بعد اللي
حصلك ده .. شكلك بأه بايخ جداً بصراحة
قال "زياد" بمرح :
- متفكر نيش ده أن كل ما أفكر أتعاظ .. أموت وأعرف ازاي هيا نطت
سليمة وأنا اللي حصلى كده
التفت اليه "كريم" قائلاً بمزاح :
- أكيد الموضوع متعلق بالنية يا "زياد"
صاح قائلاً :
- والله نيتى بيضة وزى الفل
ثم التفت اليه والدة "ادم" قائلاً :
- ولا ايه رأيك يا خالتى
قالت بحماس :
- "زياد" .. ده "زياد" ده زينة الرجالة .. ده ربنا يباركله ابن حلال
مصفى .. ربنا يرزقه ببنت الحلال اللي تشيله جوه حبابى عندها
قال "زياد" :
- والله انتى زى السكرى يا خالتى .. والوحيدة اللي نصفانى فى الدنيا دى ..
ربنا ميحرمنى منك
ثم قال بخبث :
- وبخصوص بنت الحلال .. فشكلك يا خالتى هتلبسى الحته اللي على
الحبل قريب
اتسعت ابتسامته وهى تهتف :
- بجد يا "زياد"
أطلقت زغروته فصاح "آدم" :
- ماما احنا فى المستشفى
لم تلتفت اليه بل سألت "زياد" بحماس وابتسامة واسعة على شفثيها :
- مين يا "زياد" .. واحدة من هنا ولا من جيرانا فى القاهرة
قال مبتسماً :
- لا من هنا
نظر اليه "آدم" قائلاً :
- ده انت طلعت ندل آخر حاجه .. وأنا آخر من يعلم يعنى .. ما قولتليش
حاجه عن الموضوع ده
قال مبتسماً :

- أديني قولى أهو
التفت اليه "كريم" قائلاً :
- مين بأه تعيسة الحظ .. قصدى سعيدة الحظ
قال بنقه :
- الدكتوراة "سمر"
التفت اليه "على" بإهتمام دون أن ينطق ببنت شفه .. فقالت أم "آدم"
بإستغراب :
- مين دكتوراة "سمر" دى .. أنا شوفتها قبل كده ؟
قال "آدم" ضاحكاً :
- دى الدكتوراة اللى كانت جوه عيادة الأطفال .. و "زياد" أنقذها .. مش
لاقى غير دى يا "زياد" دى هتفضل تزل فيك طول عمرك على اللى حصل
ده
شرد "على" وهو يشعر بداخله بمشاعر شتى .. تتقاذفه يميناً ويساراً ..
شرقاً وغرباً .. لكنه استغرب من شئ واحد .. وهو أن كل هذه المشاعر لم
يكن من بينها .. الغضب !

قام "عاصى" من فوره يستقبل "سراج" الذى دخل مكتبه قائلاً :
- أهلاً يا بابا اتفضل
جلس "سراج" مكان "عاصى" أم المكتب .. أغلق "عاصى" الباب
جلس أمام والده الذى قال بحده :
- وبعدين يا "عاصى" .. هتبطل تتصرف من دماغك امتى
قال "عاصى" بتبرم :
- يا بابا أنا متصرفتش كده الا لما جبت أخرى مع الناس دى .. يعنى
عجبك معدلات الشغل اللى بتقل يوم عن يوم .. محدش له سيره الا عن
قريتهم .. حتى الصحفيين اللى بندفعهم كل شهر أد كده ونازلين تشويه
فى سمعة القرية وبرده لسه معدل شغلهم على زى ما هو
صاح "سراج" بغضب وهو يضرب بكفيه فوق المكتب :
- تقوم تبعت رجال تخطف "آيات" يا "عاصى" .. هتستفاد ايه يا غبى
من كده
قال "عاصى" بحق :
- هتستفاد انى هضغط بيها على اللى اسمه "كريم" ده
نظر اليه "سراج" بإحتقار وهو يقول :

- غبي وهتفضل طول عمرك غبي .. أهم مسكوا واحد من الرجلين اللي
بعتمهم .. هتعمل ايه دلوقتي يا فالح
نظر اليه "عاصي" بدهشة وقال :
- انت عرفت منين يا بابا
قال "سراج" بتهكم :
- انت فاكرا ان انت بس اللي ليك عيون في كل مكان .. انت نسيت ان أنا
"سراج اليماني" ولا ايه
قال "عاصي" بضجر :
- متقلقش الواد ميعرفش مين اللي مأجره ودافعله الفلوس .. يعني أصلاً
ميعرفش حاجه عشان يقولها .. خليهم يشبعوا بيه
ضم "سراج" قبضتيه معاً ووضعهما فوق المكتب قائلاً :
- وبعدين هنتصرف ازاي
قال "عاصي" في شرود :
- متقلقش بفكر في حاجه كدة هتجيب من الآخر
سأله "سراج" بحذر :
- حاجة ايه
نظر اليه "عاصي" وهو يرفع أحد حاجبيه ويقول بلووم :
- هدية صغيرة تتحط في مكتب "كريم"
نظر اليه "سراج" وقد فهم ما يعنيه "عاصي" .. لاحت ابتسامه على
شفتيه وهو يقول :
- أهو هو ده الشغل اللي من الآخر .. مش تقولى خطف "آيات"
ابتسم "عاصي" قائلاً :
- خلاص متقلقش يومين بالكثير والهدية توصله
قام ليغادر المكتب فأوقفه "سراج" قائلاً :
- ايه أخبار السكر ؟
التفت اليه "عاصي" وقال بخبث :
- متقلقش وصل المخازن
نظر اليه "سراج" وقال بلهجة ذات معنى :
- متسيبوش كتير في المخازن عشان النمل ميحومش حوليه
ابتسم "عاصي" وهو يفتح الباب قائلاً :
- متقلقش

وقف "آدم" يصلى ويستخير الله عز وجل فى اقدامه على خطوة أجلها كثيراً .. دعا الله كثيراً فى سجوده أن ييسر له الخير .. وأن يجمع بينه وبين من يهواها قلبه .. أطال سجوده .. وأطال دعائه وتوسله لله وهو يقول :

- يارب أنا مبتمناش غيرها .. يارب خليها تسامحنى .. يارب اجعلها من نصيبى أنا مبتمناش زوجة غيرها .. يارب مش هقدر أتحمل جوازها من راجل غيرى .. يارب اجعلها من نصيبى .. يارب عيني مش شايفه غيرها وقلبي مش حاسس بغيرها .. نفسى تكون ليا وأكون ليها .. ونعين بعض وناخد بايد بعض .. يارب أنا محتاجلها فى حياتى عشان تثبتنى على اللى أنا فيه .. محتاجلها يارب عشان تعينى على طاعتك .. يارب نفسى تكون مراتى فى الحلال .. نفسى أنسى معاها كل حاجة غلط كنت بعملها .. يارب اقبل دعائى .. يارب

أنهى "آدم" صلاته وخرج ليجد والدته فى غرفتها .. اقترب منها وجلس بجوارها فقامت وعتدلت فى فراشها وهى تضع يدها على رأسه التى لفها الشاش وهى تقول :

- مالك يا ابنى .. تعبان

هز رأيه نفيماً وهو يقول :

- لا أبداً يا ماما .. الحمد لله أحسن كثير

نظرت اليه بأعين متفحصه وهى تشعر ببال ابنها المشغول :

- أمال مالك يا ابنى فى حاجة مضايقاك

التفت اليها قائلاً :

- ماما أنا عايز أخطب "آيات"

ابتسمت والدته وهى تقول بسعادة :

- يا حبيبي .. ياريت والله ده يوم المنى

قال "آدم" بحماس :

- طيب أنا فكرت أخذ الخطوة دى فعلاً وأتكلم مع أخوها .. على الأقل

أثبتلهم انى جد فعلاً .. ايه رأيك

أومأت برأسها وقالت بحماس :

- أيوة كده .. أبوك الله يرحمه كان يقولى الواحد يعيش يوم واحد زى

الأسد أحسن من انه يعيش 100 يوم زى النعامه

ابتسم "آدم" وهو يقول :

- يعني رأيك أتقدم وأتكلم مع أخوها
قالت بنفس الحماس وهي تربت على ظهره :
- أيوة يا حبيبي اتقدم .. عشان يعرف انك شاريها بجد .. وان شاء الله ربا
يحنن قلبها وتوافق
أوما " آدم " برأسه .. بذت كلمات والدته الحماس بداخله حتى انه لم
يستطع الإنتظار أكثر .. بدل ملابسه وتوجه الى الخارج تشييعه دعوت أمه
وابتسامتها الحانية المشجعة .. رفعت كفها الى السماء تسأل الله أن يسعد
قلب ابنها .. وأن يرزقه بمن هواها قلبه
شعر " كريم " بالدهشة لإتصال " آدم " الذي طلب فيه زيارته لبعض الوقت
.. عدل " كريم " من وضع المنزل واستعد لاستقباله .. دخل " آدم " وهو
يحاول اخفاء التوتر الذي يشعر به بداخله .. قال " كريم " بترحاب :
- اتفضل يا دكتور .. اتفضل
جلس " آدم " على الأريكة وجلس " كريم " على المقعد الجاور له .. بعد
عبارات التحية والمجاملة تتحنح " آدم " وقال :
- " كريم " .. أنا جايلك النهاردة عشان أتقدم لـ " آيات "
صمت " كريم " وبدا عليه الصدمة مما سمع .. فقال " آدم " بتوتر :
- أنا عرفت ان " أحمد " اتقدم لها .. وأنا لحد دلوقتي معرفش هي كان
ردها ايه عليه
نظر الى " كريم " بتوتر وقلبه يخفق بوجل .. لديه ثقة كبيره في انها
سترفض " أحمد " .. لكن على الرغم من ذلك لم يستطع ألا يشعر بالتوتر
والخوف من أن يكون مخطئاً في تفسير مشاعرها .. قال " كريم " :
- ولا أنا أعرف ايه ردها .. لسه مقالتليش ردها
أوما " آدم " برأسه .. ران الصمت بينهما .. ثم قال :
- طيب ياريت تعرض عليها طلبى .. وهي تختار
نظر " كريم " الى " آدم " متفحصاً ثم أسند ظهره الى المقعد قائلاً :
- بصراحة يا دكتور .. مكديش عليك أنا مقلق شوية من الموضوع ده
تنهد " آدم " قائلاً :
- أنا اتغيرت يا " كريم " .. عارف انك أكيد سمعت من " آيات " كل اللي
عرفته عنى .. وعارف انك نظرتك ليا عامله ازاي دلوقتي .. بس أنا
اتغيرت .. وانت أكثر واحد المفروض انه يقدر يعني ايه انسان تاب ..
وبعد عن كل حاجة غلط في حياته
باغته " كريم " قائلاً :
- عشان " آيات " ؟

قال "آدم" على الفور :

- لا مش عشان "آيات" .. عشان ربنا .. أنا سيبت جولدن بيتش وأنا فاك
ان "آيات" ماتت .. سيبتها بكل الأرف اللي فيها حتى من قبل ما أعرف
انى ممكن اشتغل هنا فى الماسة .. أنا بعث عربيتي عشان أنفذ الشرط
الأخير فى التوبة .. عشان أرد المظالم اللي مكنش حد منكوا هيعرف عنها
حاجة .. بس أنا بعامل ربنا .. وتوبت عشانه هو .. عشان يبقى راضى
عنى

نظر اليه "كريم" وقد ظهرت ابتسامه صغيره على زاوية قمه .. فأكمل
"آدم" بثقة :

- أنا مش ممكن أبداً أرح "آيات" يا "كريم" .. أنا بحبها .. والله بحبها
.. وأوعدك وأوعدها انى هحافظ عليها .. انا دلوقتي عرفت قيمة "آيات"
.. ونفسي بجد توافق انها تكون مراتي واننا نبتدى حياتنا سوا
ثم قال بأسى :

- "كريم" اللي عايزك تفهمه وتشرحها هو انى ما أملكش من الدنيا
دى أى حاجة .. العربية بعثها زى ما قولتلك .. وما أملكش غير مرتبى
اللى بقبضه من القرية .. واللى جزء منه بيطلع كل شهر لدين قديم فى
رقبتي بسبب شغلى اللي خسرتة مع "عاصى" وأبوه .. يعنى أنا حتى
مش هقدر دلوقتي أجيبها شبكة .. ولا هقدر أوعدها ببيت كبير وعفش
غالى .. مش فى امكانياتى دلوقتي

صمت وأطرق برأسه بأسى ثم نظر اليه قائلاً وهو يعقد جبينه بقوة :
- كان نفسى أقدم لها حاجة تليق بيها .. وبقيمتها .. بس للأسف أنا لسه
هبتدى حياتى من أول جديد .. كل اللي أقدر أقدمه دلوقتي .. دبلتين
ثم أشار الى قلبه قائلاً :

- وده

نظر اليه "كريم" قليلاً ثم قال :

- وأنا لامس صدق توبتك دى يا دكتور .. بس القرار فى ايد "آيات"
أوما "آدم" برأسه قائلاً :
- وأنا هنتظر ردها

دلف "مدحت" بسيارته بوابة القرية .. أخذت "مديحة" تتطلع الى ما
حولها تبحث عيناها بلهفة عن ابنتها "أسماء" .. اتصل "مدحت" بها

ليعلمها بوصولهما فوصفت له الطريق الى البناية التي تقيم بها .. نظرت من الشرفة واتسعت ابتسامتها وهي ترى سيارة والدها مقبلة في اتجاه البناية .. دخلت بسرعة وأخذت طرحة لفتها على شعرها كيفما اتفق ونزلت بسرعة وقلبها يخفق بقوة لا تتحمل تلك الثواني التي تفصلها عن أحضانها .. أوقف "مدحت" سيارته بمجرد أن لمحها تخرج من البوابه .. خرجت "مديحة" بسرعة من السيارة وأقبلت عليها تأخذها في أحضانها لتروى اشتياقها وحنينها اليها .. بكت "أسماء" في أحضان والدتها .. ذاك الحزن الذي افتقدته طويلاً جداً حتى عندما كانت تعيش معها في نفس المنزل .. لا تتذكر متى آخر مرة شعرت بذراعى أمها تلتفان حولها هكذا .. لا تتذكر متى آخر مرة أسندت وجنتها الى هذا الصدر الحانى .. لم تكن "أسماء" بعناقها تروى اشتياق الفترة الماضية فحسب .. بل كانت تروى اشتياق سنوات من الجفاف العاطفى .. أبعدتها أمها لتنظر اليها بأعينها الدامعة وهي تقول :

- "أسماء" .. وحشتيني أوى يا بنتى
قالت "أسماء" بصوتها المرتجف :
- وانتي كمان يا ماما وحشتيني أوى
التفتت الى "مدحت" الذى جذبها الى أحضانه باكياً كما لم تراه من قبل .. احاطته بذراعيها وهي تشعر بإنفاس جسده لقوة بكاؤه .. كانت الدموع تتساقط من عينيها لكن البسمة مرتسمة على ثغرها فى ثبات .. فى تلك اللحظة شعرت بأن لها قيمة .. بأن وجودها له معنى .. بأن لها من يفقدها ويشعر بإشتياق الى وجودها فى حياته .. لم تكن سعادتها بالغة لرؤيتها فحسب .. بل لشعورها بأنها شخصاً مهماً فى حياتها
أدخلتهما "أسماء" المنزل بترحاب شديد .. جلسا معاً على الأريكة كل منهما فى جهة .. يسمعان منها ما حدث لها منذ أن تركت البيت .. ظهرت تعبيرات الأسى والحزن على وجيهما .. وكل منهما يستشعر كم كان مقصراً فى حق تلك الفتاة التي رزقهم الله اياها

شعرت "آيات" بيداً تحيط بكتفيها فانتفضت والتفتت لتجد "كريم" مبتسماً .. وضعت يدها على صدرها قائله :
- خضنتى
ضحك ضحكة خافته وقال :

- هيكون مين يعني اللي يجرو انه يحط ايده على كتفك كده
ابتسمت قائله :

- معرفش اتخضيت وخلص

نظر الي الكراتين التي كانت تتفحص محتوياتها وهو يقول :
- طالعة بكرة مع الفوج السياحي ؟
قالت "آيات" بحماس :

- أيوة ان شاء الله

أومأ برأسه قائلاً :

- ممكن تسيبي شغلك شويه

- أهأا

سارت معه في اتجاه الشاطي وهو مازال لافاً كتفيها بذراعه .. نظرت اليه
"آيات" قائله :

- عارفه انك عايز تتكلم في ايه

نظرت اليها مبتسماً وقال دون أن يتوقفا عن السير :

- طيب عايزك في ايه ؟

نظرت أمامها وقالت :

- هتسأني عن رأيي في طلب "أحمد"

- مميمم ايه رأيك في طلب "أحمد"

توقفت "آيات" عن السير ونظرت اليه قائله :

- مش موافقة يا "كريم"

نظر اليها قائلاً دون أن يبدو مندهشاً لردّها :

- توقعت كده .. بس أحب أسمع منك أسباب رفضك

نظرت حولها بضيق ثم قالت :

- "أحمد" من أيام من كنا في الجامعة وأنا عارفه انه بيحبني .. ووقتها

كان الحب بالنسبة لي مهم .. مستحيل كنت أرتبط بإنسان مش بحبه .. وأنا

مكنتش بحب "أحمد" عشان كده لما قالي زمان انه عايز يتجوزني

رفضت

ثم نظرت اليه قائله بحزم :

- بس دلوقتي في حاجات تايئة أهم من الحب .. مش هتنازل عنها في

الإنسان اللي هتجوزه

- ايه هيا الحاجات دي ؟

قالت بحماس :

- اهم حاجة يكون انسان محترم ويعرف ربنا .. ياخذ بإيدي وأخذ بإيده ..

نبقى احنا الاتنين طوق نجاة لبعض .. أحس انه بيحبني وخايف عليا .. مقصدش الحب الرومانسي اللي كله كلام جميل .. لأ أقصد انه يحبني بتصرفاته قبل ما يقولهالى بلسانه .. احس انه خايف عليا من النار .. وانه بيبعدني عن كل حاجة غلط وبيصلح من تصرفاتي .. عايزه همنا يبقى واحد .. ازاي نرضي ربنا ونقرب منه .. عايزاه يخاف من ربنا ويخاف يغضبه مش واحد عايش فى الدنيا كده وخلص مش عارف هو اتولد ليه ولا عارف هو عايش ليه

اتسعت ابتسامه "كريم" وهو ينظر اليها باعجاب قائلاً :
- متصوريش يا "آيات" أنا فرحان بيكي أد ايه .. ربنا يهديكي كمان
وكمان

ابتسمت وهي تنظر اليه قائله :
- يعني معايا حق أرفض "أحمد"
- معاكى حق ترفضى كل اللي يخالف أحلامك دى .. لان اللي بتقوليه هو مواصفات الرجل الصالح اللي أتمناه لأختي
أطرقت "آيات" برأسها فباغتتها "كريم" بقوله :
- دكتور "آدم" طلب ايدك منى
رفعت رأسها بحدة تنظر اليه وقد اتسعت عيناها دهشة وأجم لسانها ..
ازداد ارتفاع وهبوط صدرها .. أكمل "كريم" :
- شرحلى ظروفه .. هو دلوقتى يعتبر هيبدأ حياته من السفر .. وعربيته باعها عشان يسدد دين فى رقبته .. وبيقول انه مش هيقدر يقدملك دلوقتى
غير دبلتين
قالت باقتضاب :

- وقولتله ايه
- قولتله هقولها وانتظر الرد مننا
انفلعت "آيات" قائله :
- انت ازاي يا "كريم" تقوله كده .. كان المفروض تقوله لأ مش هيحصل
مش ممكن أختي ترتبط بيك
سألها "كريم" بهدوء :
- ليه ؟

قالت بانفعال :
- ليه؟ .. مش عارف ليه .. عشان الدكتور الغير محترم .. زانى .. تقبل ان
أختك تتجوز واحد كده .. أصلاً مينفعش أتجوزه لان ربنا بيقول "الزَّانِي لَا
يَنكُحُ إِلَّا زَانِيَةً أَوْ مُشْرِكَةً" .. وأنا مش كده .. فمينفعش أنا وهو نتجوز

قال "كريم" بهدوء :

- الآية دى متنطبقش على "آدم"

نظرت اليه بدهشة وصاحت :

- ازاي يعني متنطبقش عليه .. ما انت عارف اللي عمله يا "كريم" وهو

أكدلى الكلام ده بنفسه

قال "كريم" بحزم :

- "آدم" بمجرد ما تاب ورجع لربنا سقطت عنه صفة الزنا .. يعني

خلاص خرج من الآية اللي اصلاً تفسيرها غير ما انتى فاهمة بس ده مش

موضوعنا دلوقتي

قالت "آيات" بعناد :

- بس ربنا بيقول " وَالَّذِينَ لَا يَدْعُونَ مَعَ اللَّهِ إِلَهًا آخَرَ وَلَا يَقْتُلُونَ النَّفْسَ

الَّتِي حَرَّمَ اللَّهُ إِلَّا بِالْحَقِّ وَلَا يَزْنُونَ وَمَنْ يَفْعَلْ ذَلِكَ يَلْقَ أَثَامًا * يُضَاعَفْ لَهُ

الْعَذَابُ يَوْمَ الْقِيَامَةِ وَيَخْلُدْ فِيهِ مُهَانًا " ... انت تقبل انى أتجوز واحد كده

رفع "كريم" حاجبيه قائلاً بتحدى :

- كملى الآيات يا "آيات" .. كملها

صمتت .. فأكمل عنها قائلاً :

- " إِلَّا مَنْ تَابَ وَآمَنَ وَعَمِلَ عَمَلًا صَالِحًا فَأُولَئِكَ يُبَدِّلُ اللَّهُ سَيِّئَاتِهِمْ حَسَنَاتٍ

وَكَانَ اللَّهُ غَفُورًا رَحِيمًا " .. مش كده .. مش هى دى الآية اللي بعدها

صمتت "آيات" وقد أطرقت برأسها فى شرود .. فقال "كريم" :

- أنا لا بقولك وافقى عليه ولا بقولك ارفضيه .. بقولك استخيري واللى

انتى هتقرريه هيكون .. انا مستحيل أغضب عليكى واحد انتى مش عايزاه

نظرت اليه "آيات" بحيرة وقالت :

- انت رأيك فيه ايه ؟ .. تاب بجد ؟ .. اتغير بجد

قال "كريم" بثقه :

- "آيات" أنا بقدر أفهم اللي أدامى بسهولة .. لو مكنتش حسيت انه

انسان كويس كنت رفضت فوراً من غير ما أرجعك

تركها "كريم" وسط حيرتها وشرودها .. أكملت السير حتى وقفت أمام

البحر الهادر .. تنظر الى علو أمواجه كعلو أمانها .. لا تريد أن تخطئ

الإختيار هذه المرة .. لا تنظر مشاعرها التى تحركت من سباتها .. لكنها

لن تفعل كالمرة الأولى وتنساق خلف مشاعرها دون تحكيم عقلها .. تريد

أن تتأكد من أنه لن يجرحها مرة أخرى .. تريد أن تتأكد من أنه

فارسها المفقود !

جلست الأربع فتيات فى غرفة "آيات" بينما نام أبوى "أسماء" فى غرفة "إيمان" .. والغرفة الثالثة بقيت بوالده "سمر" .. قالت "آيات" بسعادة

:

- أنا فرحانه أوى عشان انتى فرحانه يا "أسماء"
قالت "أسماء" ببهجة لم تشعر بها منذ وقت طويل :
- فرحانه بس .. ده أنا حسه زى اللى كان ضايع منه حاجه مهمة وأخيراً
لقاها .. بجد مكنتش متوقعة انى هفرح كده لما أشوف بابا و ماما .. بس
بجد فرحت اوى اوى
ابتسمت لها "سمر" قائله :

- ربنا ما يحرمكوا من بعض أبدأ
بادلتها "أسماء" الإبتسام وقالت :

- يارب

سألته "إيمان" :

- وبعدين ناوية على ايه .. هتكلمى شغل فى القرية ولا هترجى معاهم
قالت "أسماء" بحيرة :

- بصراحة لسه مقررتش .. مش عارفه
قالت "آيات" بحنان :

- استخيري ربنا .. وان شاء الله أى ان كان اختياره هيكون خير ليكي
أومأت "أسماء" برأسها وقالت :

- ماشى هستخير بس ابقى اكتبيلى دعاء الاستخاره فى ورقة عشان مش
حفظاه

قالت لها "سمر" :

- يا بنتى سهل جداً .. " اللهم أنى أستخيرك بعلمك وأستقدرك بقدرتك
وأسألك من فضلك العظيم فإنك تقدر ولا أقدر وتعلم ولا أعلم وأنت علام
الغيوب .

اللهم إن كنت تعلم (وتقولى الحاجة اللى بتستخيري ربنا عشانها) خير
لي فى ديني ومعاشي وعاقبة أمري فأقدره لي ويسره لي .

وإن كان هذا الأمر شراً لي فى ديني ومعاشي وعاقبة أمري فأصرفه عني
وأصرفني عنه وأقدر لي الخير حيث كان ، ثم رَضَّتِي به "

سألته "أسماء" :

- وأصلها ازاي ؟

قالت "سمر" :

- عادى زى الصلاة العادية ركعتين وبتقولى الدعاء ده بعد التشهد الأخير
وقبل ما تسلمى .. أو ممكن تقوليه بعد ما تسلمى من الصلاة
أومأت "أسماء" برأسها .. قالت "إيمان" لـ "آيات" :
- طالعة بكرة مع الفوج السياحى ؟
أومأت "آيات" برأسها وقالت :
- أهاا

سألته "سمر" :

- طالعين فين

قالت "آيات" :

- جبل عتاقة .. الفوج اللي طالع رجاله وستات .. فقولنا يكون فى 2 دليل
.. راجل عشان يتعامل مع الرجالة .. وبنت عشان الستات يتعاملوا معاها
برحتهم

ثم قامت قائله :

- فكرتوى .. هقوم أجهز شوية حاجات كده عشان أخذها معايا بكرة ان
شاء الله

فى الغرفة المجاورة كانت تلك هى المرة الأولى منذ فترة طويلة يضطر
فيها "مدحت" و "مديحة" الى المبيت معاً فى غرفة واحدة .. شعرت
"مديحة" بالخرج كما لو كانت مع رجل غريب .. جلس "مدحت" فوق
فراشه مستنداً ظهره الى احدى الوسائد شارداً .. خرجت "مديحة" الى
الشرفة تستنشق هواء الليل العليل .. بعد دقائق تبعها "مدحت" ووقف
بجوارها يتأمل الطبيعة الساحرة تحت ضوء القمر الذى صار بديراً يزين
السماء ببهائه وروعته .. قالت مديحة قاطعة هذا الصمت :
- الحمد لله اننا لقيناها .. لما شوفتها مكنتش مصدقه نفسى
أطرق "مدحت" برأسه ينظر الى الأشجار التى تتحرق أوراقها بنعومه مع
نسمات الليل :

- الحمد لله .. أنا كمان مصدقتش نفسى لما سمعت صوتها فى التليفون ..
ومصدقتش انها سليمة وعائشة .. الحمد لله ان ربنا حفظها طول الفترة
دى .. كان ممكن نلاقيها بس نلاقيها فى حال تانى وفى وضع تانى ..
الحمد لله

دمعت عينا "مديحة" وهى تقول :

- قصرت كثير أوى فى حقها .. حسه بإحساس فظيع .. حسه بجد
بإحساس بشع

نظر اليها "مدحت" قائلاً :

- أنا كمان قصرت معاها كثير .. محستش ان عندى بنت الا لما راحت منى
ثم قال :

- وقصرت معاكى انتى كمان

التفتت تنظر اليه .. كانت تلك هى المرة الأولى التى تجده معترفاً بتقصيره
تجاهها .. فأكمل وهو مازال يتطلع اليها :

- عارف انى غلطت كثير .. وان أى مشكلة بتحصل كنت بكبر دماغى
وأشوف مزاجى بره .. مفيش مرة أعدت معاكى وحاول أحل المشكلة
بهدوء

قالت وهى على وشك البكاء :

- أنا كمان غلطت

صمتت والدموع تتساقط من عينيها .. فقال بحنان لم تألفه :

- غلطتى فى ايه

هزت كتفيها وتطلع أمامها قائله :

- فى حاجات كثير

ابتسم "مدحت" وقال :

- تعرفى ان دى المرة الأولى اللى تعترفى فيها انك غلطتى فى حقى

التفتت اليه بحدته وقالت :

- ودى برده المرة الأولى اللى تعترف فيها انك غلطت فى حقى

اختلفت ابتسامته وقال بجديه :

- بصى يا "مديحة" أكثر حاجة بيكرها الرجل هو انه يلاقى مراته

واقفاله الكلمة بالكلمة .. دى حاجة بتستفز أى راجل .. أى نعم أنا عصبي

ولما بزعل ببقى غبي .. بس انتى برده بتترفزىنى يا "مديحة"

وبتخرجينى عن شعورى .. فى مواقف كثير ممكن تحتويها بهدوء .. من

غير ما تعندى معايا ومن غير ما تتحدىنى

قالت بعصبيه :

- بس انت لما بتتعب يا "مدحت" مش بس بتكون غبي انت بتكون عنيف

جداً .. مفيش ست تقبل على نفسها وكرامتها انها تتضرب كل شوية

والتانى وعلى حاجات تافهة

قال "مدحت" بحدته :

- ما هو انتى بعنادك اللى بتترفزىنى لدرجة انك بتخلينى أمد ايدى عليكى

صاحت بغضب :
- برده أنا اللي غلطانه .. حاجة حلوة أوى والله انت اللي بتضرب وأنا اللي
غلطانه

تنهد "مدحت" بقوة وقال :
- اظاهر اننا مش هنعرف أبداً نبقي زى أى اتنين متجوزين بيتكلموا مع
بعض بإسلوب محترم
قال ذلك ودخل الى الغرفة وترك "مديحة" وعيناها غارقة فى بحر
دموعها

فى صباح اليوم التالى توجهت "آيات" الى الحافلة المنطلق بالفوج
السياحى الى جبل عتاقة .. شعرت بالصدمة عندما صعدت الحافلة لتجد
"آدم" جالساً على أحد المقاعد فى منتصف الحافلة .. نظرت اليه بدهشة
شديدة .. فابتسم لها بعذوبة .. أشاحت بوجهها وتحدثت مع زميلها فى
الرحلة وتم التأكد من صعود جميع الركاب .. جلست فى مكانها فى المقعد
الأول وهى لازالت تشعر بالدهشة لوجود "آدم" على متن الحافلة ..
انطلق السائق بهم فى طريقهم الى جبل عتاقة حيث تقع احدى العيون
الكبريتية الطبيعية والتي تصل فيها درجة حرارة الماء الى 35 درجة
والتي تقوم بعلاج العديد من الأمراض الجلدية والجهاز العضلي الهيكلي
والأمراض الروماتيزمية .. توقفت الحافلة فى المكان المنشود .. قادت
"آيات" النساء .. وقاد زميلها الرجال .. شعرت بنظرات "آدم" المصوبة
تجاهها لكنها تجاهلته تماماً .. كانت الجولة رائعة استمتع به السائحون ..
انتوا من أخذ الحمامات الكبريتية فأمرتهم "آيات" بأخذ حماماً ساخناً حتى
تتفتح المسام وتتبدد رائحة الكبريت .. ثم توجه الفوج الى الحافلة للعودة
الى القرية وأخذ قسطاً من الراحة .. فبعد حمام الكبريت يكون الجسم
متثاقلاً ويلزم فترة من الراحة بعدها للإجهاد الذى يصيب القلب والدورة
الدموية بحمامات الكبريت

انطلقت الحافلة بهم عائدة الى القرية مرة أخرى .. وفى منتصف الطريق
.. انفجرت أحد اطارات الحافلة .. فتوقف السائق لتبديل الإطار التالف ..
نزلت "آيات" تنظر الى الجبل حولها .. والى المنطقة الصحراوية والرمال
تحت أقدامها .. نظرت الى السماء بلونها الرمادى والى الشمس التى
غربت فى الأفق والتي تعد بالعودة مرة أخرى مع فجر يوم جديد .. سارت

قليلاً تتأمل صفحة السماء الصافية وهي تشعر بحيرة كبيرة بداخلها ..
حيرة ما بين مشاعرها وبين تجربتها المريرة التي آلمتها أشد آلام ..
فجأة .. تجمدت الدماء في عروقها عندما سمعت من خلفها انطلاق
الحافلة مكملة طريقها في اتجارة القرية .. التفت جرت "آيات" مسرعة
وهي تصرخ بأعلى صوتها :
- استنى .. استنى

لكن صوتها كان أضعف من أن يصل الى السائق أو لأحد الركاب .. نظرت
بفزع الى الحافلة التي ابتعدت تماماً ... توقفت على الجرى وهي تلهث ..
نظرت حولها الى الليل الذي بدأ في الهطول .. أخذت تلهث بشدة .. وهي
تحاول تهدئه خفقات قلبها المضطرب

أطل "آدم" برأسه من الممر الفاصل بين جانبي الحافلة .. لم يتمكن من
رؤيتها فوق مقعدها .. ظنها نائمة ولربما تستند برأسها بزواية مائلة لذلك
لم يتمكن من رؤية رأسها أعلى المقعد .. عاد يسند ظهره الى مقعده ..
كان يعلم بأن الفوج سنقيم الى رجال ونساء وأنه لن يتمكن من رؤيتها
طويلاً .. لكنها أراد أن يكون معها .. فما كان يطيق البقاء في القرية وهي
ليست موجودة بها .. أخذ يحاول رؤيتها مرة أخرى دون جدوى .. تسرب
اليه الشعور بالقلق .. على الرغم من ان الوضع يبدو طبيعياً .. قام من
مقعده ليصعق عندما وجد مقعده فارغاً .. قال للمشرف الجالس في الجبهة
الأخرى :

- فين الأنسة "آيات" ؟

التفت زميلها الذي كان يسند رأسه الى زجاج الحافلة .. ونظر الى مقعدها
الفارغ ثم قال بدهشة :
- معرفش

هتف "آدم" بالسائق :

- اوقف لو سمحت

التفت السائق ينظر الى "آدم" بدهشة .. فرخ به :

- بقولك اقف

نزل "آدم" من الحافلة وهو ينظر حوله .. قال للمشرف على الرحلة بقلق
:

- أكيد نزلت لما كنا بنغير العجلة ومخدناش بالنا انها مركبتش

صاح فيه "آدم" بغضب بالغ :

- ازاي يعنى مخدتش بالك .. هي مش مشرفة معاك على الرحلة .. ازاي

مخدتش بالك انها مش أعده فى الكرسى بتاعها
أطرق الرجل برأسه ولم ينطق ببنت شفه .. أمره "آدم" وهو يبدو فى قمة
قلقه :

- لازم نرجع ندور عليها
صعد "آدم" ليطلب من السائق العودة مرة أخرى لكن السائق فاجئه
بإقتراب نفاذ الوقود .. فلن يكفى للعودة مرتين .. أخذ "آدم" يسب بخفوت
وهو يشعر بالحنق الشديد .. نظر الى المشرف وقال :
- روح انت عشان السياح اللي معانا .. وابعتلى حد بأى عربية
قال ذلك ودون أن يعطيه فرصة للرد نزل من الحافلة وانطلق يعدو بأقصى
سرعته فى عكس اتجاه سير الحافلة .. ظل يردد بلسانه :
- يارب .. يارب
شعر بخوفه يتصاعد خاصة بعدما أسدل الليل أستاره .. أخذ يفكر فى
"آيات" التى حتماً هى خائفة الآن .. زاد من سرعة عدوه وكأنه يسابق
الزمن !

نظرت "آيات" حولها بفرع وقد هبط الظلام ليسود المكان .. لولا القمر
المضى فى السماء لما تمكنت من رؤية ما حولها .. سمعت أصوات الرياح
تزار وتزمر فى غضب .. والرمال تتحرك لتلسع وجهها ويديها .. عقدت
ذراعيها أمام صدرها وهى تردد بعض الأذكار حتى تطمئن قلبها الفرع

*

شعرت "آيات" بخوفها يتصاعد فأخذت تردد بعض الآيات بصوت عالى ..
يتسرب صوتها المرتجف بالتلاوة الى أذنيها لتشعر بشئ من الطمأنينه ..
وكان صوتها يونسها .. ظلت واقفة فى مكانها تلف حولها بين الحين
والآخرة .. أمله أن ينتبهوا الى اختفائها .. بعد مضى ما يقرب من ساعة
من العدو المتواصل .. تمكن "آدم" أخيراً من العثور عليها .. واقفة
كالغزال الشارد فى عرض الطريق .. ابتسم قائلاً :
- الحمد لله .. الحمد لله
صاح قائلاً :
- "آيات"

التفتت تنظر اليه .. لمعت الدموع فى عينيها وهى تنظر اليه بلهفة ..
كالغريق الذى وجد طوق نجاته .. ابتسمت وهى تشعر بالسعادة الشديدة
لرؤيته .. اقترب منها بأنفائه المتقطعة وقف أمامها راعياً يذع كفيه على
ركبتيه يحاول ادخال المزيد من الهواء الى رئتيه التى تعبت من عدوه تلك
المسافة الطويلة .. نظرت اليه قائله بصوت مصطرب :
- انت نزلت من الباص ليه ؟

اعتدل واقفاً وهو لا يزال يلهث وحببات العرق تتصبب من وجهه وهو يقول
بصوت متقطع الأنفاس :

- نزلت أدور عليكى .. لقيتك مش موجودة على الكرسي بتاعك

نظرت اليه بأعين دامعة .. فابتسم فى وجهها وقال :

- متخفيش .. هيبعتولنا حد بالعربية .. متخفيش

أومات برأسها .. اتسعت باتسامته وهو يتأملها بحب قائلاً :

- كنت فاكِر هاجى الأقيكى منهاره وبتعيطى

أطرق برأسها وهى تقول :

- أعدت أقرأ قرآن .. بس برده كنت خايفة جداً

قال بحنان بالغ :

- متخفيش يا "آيات" أنا معاكى

تحاشت النظر اليه وابتعدت عنه بضع خطوات لتجلس على صخرة كبيرة

فوق رمال الصحراء الباردة .. اقترب منها "آدم" وجلس على الأرض

أمام الصخرة .. تحاشت "آيات" النظر اليه .. بينما أخذ يتأملها بحب

وحنان جارف .. ثم قال :

- أخوكى قالك ؟

بلعت ريقها بصعوبة وقد فهمت مقصده .. أومات برأسها دون أن تنظر

اليه .. قال لها وهو يتأملها متفحصاً :

- وردك ايه ؟ .. ممكن اعرفه دلوقتى ؟

صمتت .. طال صمتها .. وهى تنظر الى الرمال التى تلعب بها بطرف

حذائها .. وهو ينظر اليها لا يحيد نظره عنها .. وأخيراً قالت بصوت خافت

لا يكاد يكون مسموعاًك

- مش قادره أنسى

صمت "آدم" .. شرد .. أمعن التفكير .. وأخيراً نظر اليها قائلاً :

- والمفروض دلوقتى انى أقولك خلاص يا "آيات" معدتش هضايقتك تانى

؟

ثم قال بحزم :

- لا يا "آيات" مش هقول كده .. هقولك فكرى تانى وتالت ورابع .. أنا مش هياس الا فى حالة واحدة انتى عارفها كويس ثم قال :

- مش هياس الا اذا اتخطبتى لغيرى .. ساعتها بجد هشيلك من قلبى وهنساكى

ظلت مطرقة برأسها .. فنظر اليها بألم قائلاً :

- حتى مش عايزه تبصيلي .. للدرجة دى مش طيقانى ؟

بللت شفيتها بلسانها .. ثم قالت بصوت مضطرب دون أن تنظر اليه :

- لا مش كده .. بس .. مش عايزه اعمل حاجة حرام

ظل "آدم" ينظر اليها للحظات .. ثم .. أطرق برأسه هو الآخر .. التفتت

تنظر جانباً فى عكس الإتجاه الذى يجلس فيه .. صمت "آدم" لبرهه ثم ما

لبث أن ارتسمت ابتسامه حانيه على ثغره وقال وهو مازال مطرقة برأسه

:

- معاكى حق .. لازم نتقى ربنا عشان ربنا يباركلنا

اندهشت لكلامه فلو تسمعه من قبل يتحدث على هذا النحو .. لم تلتفت

لكنها أرهفت أذنيها بشده .. سمعت صوته الذى بدا عليه الارتياح والفرح

وهو يقول :

- مادمتى خايفة تبصيلي وتغضبى ربنا يبأه أكيد انتى خايفه ربنا ينزع

البركة بينا زى ما نزعها قبل كده .. مش كده يا "آيات" ؟

ظلت محتفظة بصمتها .. فأتسعت ابتسامته وقال وهو يقف وعينيه على

الطريق أمامه :

- معاكى حق .. ما عند الله لا ينال الا بطاعته

وقف ينظر فى الاتجاه الآخر .. يجاهد نفسه بصعوبة ألا يغضب ربه ب ..

نظرة .. يصوبها الى حبيته الجالسه أمامه .. ارتسمت ابتسامه صغيره

على شفيتها وقد أسعدتها كلماته التى لم تتوقع يوماً أن تصدر من "آدم"

.. التفتت تنظر اليه لتجده واقفاً أمامها ينظر الى الاتجاه الآخر .. أشاحت

بوجهها لتتنظر فى الإتجاه المعاكس .. أخذت تتسائل بداخلها .. عن هذا

التغير الذى تراه فى سلوكه .. أتصدق مشاعرها وأحاسيسها .. أم تظل

محتفظة بخوفها وقلقها .. تنهدت وهى تتمم :

- يارب انت أعلم بنفسى منى .. اهديني للطريق اللى فيه خير ليا

اتصلت "إيمان" بـ "كريم" لتقول فى قلق بالغ :

- "آيات" لسه مرجعتش يا "كريم" أنا قلقانه عليها أوى خايفة يكون ابن عمها خطفها

قال بقلق :

- ازاي يعني لسه مرجعتش .. طيب اقلنى

اتصل "كريم" بـ "آيات" فلم تجيب .. فهااتفها متروك بداخل الحافلة ..

اتصل بالمشرف فأخبره بما حدث وبأنه أرسل سيارة لاحضارها هي و

"آدم" .. اتصل "كريم" بـ "آدم" فتمتم :

- أخوكى بيتصل

انتبهت "آيات" وسمعتة يقول :

- أيوة يا "كريم" .. لا متقلقش لقيها .. العربية فى الطريق .. ماشى ..

طيب ثوانى

أعطاها الهاتف قائلاً :

- "كريم" عايز يطمئن عليكي

ردت وطمأنته على نفسها .. وأخبرها بان السيارة فى طريقها اليهما ..

أنهت المحادثة ومدت يدها بالهاتف اليه .. أخذه ووقف مبتعداً كما كان ..

أخذت تفرك ذراعيها بكفيها فى محاولة لبث الدفئ فيهما .. التفت اليها

"آدم" قائلاً :

- بردانه ؟

وبدون ان ينتظر ردها .. خلع جاكيت البدلة وهم بان يتوجه اليها ليعطيه

لها .. عندما .. رأى شئ اسطوانى طويل يزحف على الصخرة خلفها ..

دقق النظر ليجد ثعباناً ذو رأس كبير وعينين حمراوين ولسان مشقوق

يحركة حركات مرتعشة يزحف فى تودة بالقرب منها .. رفعت رأسها تنظر

الى "آدم" .. اتسعت عيناه فى دهشة وهى تراه مقبل عليها بسرعة

ونظرة غريبة فى عينيه .. فى نفس اللحظة التى هم الثعبان بأن ينقض

عليها بنابيه .. أمسكه "آدم" بيديه الاثنتين .. اطلقت "آيات" صرخة

طويلة وهبت واقفة وهى تنظر الى هذا الشئ الذى يتلوى فى يدي "آدم"

.. أطلق "آدم" صيحة قبل أن يتركه ليسقط أرضاً .. أخذ يزحف مبتعداً

ليترك خلفه على الرمال آثاراً متعرجة .. اتجه الى "آيات" التى كان

وجهها ينطق بأعتى علامات الفرع .. هتف قائلاً بلهفة :

- "آيات" الثعبان عضك ؟

أخذت تنهج بشدة .. ثم قالت بصوت خافت :

- لا

اتسعت عيناه وهى تنظر الى آثار العض والدماء على يده .. فصاحت

بجزع :

- " آدم " .. عضك يا " آدم "

أخذت تجهش في البكاء وهي تتلفت حولها قائلة :

- " آدم " لازم نشوف دكتور بسرعة .. أكيد كان مسمم

أمسك " آدم " بيده وهو يتمتم :

- متقلقيش

قال ذلك وهو يشعر بداخله بخوف كبير .. خوف من أن يسرى سم الثعبان داخل جسده قبل أن تصل السيارة وتحمله عائداً الى القرية .. خوف من أن يتسمم دمه ويلفظ أنفائه قبل أن يتمكن من أخذ المصل .. خوف من أن يلاقى ربه دون أن يعلم ان كانت توبته قد قبلت أم لا .. يا الله .. أنا لست مستعداً للموت .. لست واثقاً بعد من أنك غفرت لى ذنوبى .. لست مستعداً لدخول قبرى .. لست مستعداً لأن يقبض ملك الموت روحى .. أريد أن أكفر عن ذنوبى أولاً .. أريد أن أغرق نفسى فى الطاعات لأتطهر مما لوثت به نفسى من آثام .

نظرت اليه " آيات " بلوعة وهي تبكى بقوة وقالت :

- " آدم " انت كويس

لم تستطع أن تتبين هروب الدماء من وجهه تحت ضوء القمر .. لم يجيبها " آدم " .. بدا عقله منشغل بشئ آخر .. شئ أهم .. رآته " آيات " وهو يجثو على الأرض .. ليتيمم .. ثم اعتدل فى وقفته .. رفع كفيه بمحاذاة أذنيه .. وكبر للصلاة .. اذا كانت هذه هى النهاية .. فلتكن وأنا أصلى .. فلتقبض روحى وأنا ساجد .. هذا ما حدث به نفسه قبل أن يبدأ فى صلاته .. وقف بخشوع يصلى .. وقد بدأ الوهن يزحف الى جسده .. وضعت " آيات " كفها على فمها تكتم شهقاتها وهي تنظر الى وجهه الذى تصعب عرقاً .. والى عينيه الغائرتين .. شعر بحلقه يجف .. وبجفونه تثقل .. قاوم هذا الشعور .. واستمر فى الصلاة .. وضع جبينه على الأرض ساجداً .. وظل يستغفر .. ويستغفر .. ويستغفر .. أغمض عينيه وقد استسلم لمصيره .. خفق قلبه بخوف واضطراب .. ظل يرجو الله أن يغفر له ويتقبل توبته .. ظل يرجوه أن يرحمه وأن يتجاوز عن سيئاته .. لم يشعر بأى شئ آخر .. سوى بدنو لحظة الموت .. تمنى لو كان مستعداً لها أكثر من ذلك .. تمنى لو كان بإستطاعته العودة الى الوراء وتصحيح كل شئ بحياته .. تمنى وتمنى .. هربت دمعة من عينه وهو ساجد .. دمعة خوف وخشية ورهبة .. تذكر وقتها حديث النبي صلى الله عليه وسلم " عينان لا تمسهما النار عين باتت تحرس فى سبيل الله .. وعين بكت من خشية الله

" .. ها هوا يبكى خشية من الله عز وجل .. فهلا حرم عليه النار ..
استبشر خيراً وأحسن ظنه بالله .. لم يتوقف لسانه عن الاستغفار .. لم
يرفع جبينه عن الأرض .. فلتأتى تلك اللحظة وهو ساجد .. فليجرع
سكرات الموت وهو ساجد .. لعله يُبعت يوم القيامة وهو ساجد .. فيرحمه
الله ويعفو عنه .. لا يدري الى كم من الوقت ظل ساجداً .. لكنه أنتبه الى
صيحة "آيات" وهى تهتف بصوت مرتفع :
- أيوة هنا .. تعالوا بسرعة

قام "آدم" من سجودة وأتم صلاته .. بدا خائر القوى .. رأى سيارة
تتوقف أمامهما .. صاحت "آيات" فى السائق بصوت ملتحاح باكى :
- بسرعة رجعنا القرية .. فى تعبان عضه
خرج الرجل من سيارته مسرعاً يعين "آدم" على النهوض والجلوس
داخل السيارة .. ركبت "آيات" فى الخلف .. ظلت طوال الطريق تتابعه فى
مرآة السيارة الجانبية .. أخذت جفونه تثقل شيئاً فشيئاً وازداد شعوره
بالحمى .. الى أن وصلوا أخيراً الى المشفى .. وتم اعطائه المصل المضاد
لسم الأفعى !

مر اليوم التالي بصعوبة على الجميع .. لم يصدق "آدم" أنه لا يزال حياً
فكل ما كان يشعر به من ألم ووهن جعله يظن بأنه ما هى الا لحظات
وتفرق روحه جسده .. أخذ "كريم" يواسيه قائلاً :
- "آدم" افكر دائماً حديث النبي صلى الله عليه وسلم " مَا يُصِيبُ الْمُسْلِمَ
مَنْ نَصَبَ وَلَا وَصَبَ وَلَا هَمٌّ وَلَا حُزْنٌ وَلَا أَدَى وَلَا عَمَّ حَتَّى الشَّوْكَةِ يُشَاكُهَا
إِلَّا كَفَّرَ اللَّهُ بِهَا مِنْ خَطَايَاهُ " .. يعنى كل ده تكفير لذنوبك ان شاء الله
ابتسم "آدم" وهو فى فراشه قائلاً :
- والله لو كل اللى بيحصلى ده تكفير ذنوبى فأنا راضى .. وراضى أوى
كمان

ربت "كريم" على كتفه .. فأمسك "آدم" بيده قائلاً :
- "آيات" كويسه ؟

أوماً "كريم" برأسه .. خرج "كريم" من حجرة "آدم" بالمشفى ليلاقى
"آيات" الجالسه بالخارج فى صحبة والدته تطيب بخاطرهما وتواسيها ..
قامت "آيات" وانصرفت مع أخيها .. ركبت السيارة بجواره والتفتت اليه
قائله :

- هو كويس ؟

أوماً "كريم" برأسه وانطلق فى طريقه .. أسندت رأياها على زجاج
السيارة .. فالتفت إليها "كريم" يقول :
- تعبانه

قالت بصوت مبجوح من كثرة البكاء :

- مرهقة بس

لاحت ابتسامه على شفثيه وهو يقول متهكماً :

- يتمنعن وهن الراغبات

التفتت إليه بسرعة واحمرت وجنتاها خجلاً .. فنظر إليها بمرح قائلاً :

- شكلك بيقول ان هيبقى فى خطوبة قريب

رسمت ابتسامه صغيره على شفثيها وهى تدير وجهها لتنظر من الشباك

بجوارها .. فضحك "كريم" ضحكة خافته وهو يقول :

- طيب مش نفرح الراجل اللى نايم فى المستشفى ده

التفتت تنظر إليه مبتسمة بخجل وهى تقول وقد بدا عليها الارتباك :

- دلوقتى ؟

اتسعت ابتسامته وهو يقول :

- اللى أعرفه ان الواحد لما بيكون تعبان وببسمع خبر حلو ده بيديله دفعه

ان صحته تتحسن .. ايه رأيك نديله الدفعه ولا نأجلها لما يخرج

اتسعت ابتسامتها بينما لمعت عيناها قائله :

- خلاص ماشى

أطلق ضحكة أخرى .. وعبثت أصابعه فى شاشة هاتفه ثم وضع الهاتف

فوق أذنه .. سمعته يقول :

- السلام عليكم .. أيوة يا دكتور .. كنت عايز أبشرك بحاجة كدة فى وسط

المأسى اللى انت فيها دى

ثم التفت "كريم" ينظر الى "آيات" التى تبتم بخجل .. ثم قال :

- منتظرينك ان شاء الله ام تقوم بالسلامة انت والست الوالدة عندنا فى

البيت

هب "آدم" جالساً فى فراشه .. حتى كاد المحلول المعلق أن يقع أرضاً ..

هتف بلهفه :

- يعنى ايه يا "كريم"

ضحك "كريم" قائلاً :

- هيكون ايه يعنى يا دكتور .. مترکز كده

اتسعت ابتسامه "آدم" وهو ينظر الى والدته فى سعادة وهو يقول :

- خلاص ان شاء الله .. أصلاً الدكتور هيكتبلى على خروج النهاردة .. ان

شاء الله هتصل بيك بالليل أبلغك المعاد
- خلاص مستنيك ان شاء الله .. وحمدالله على السلامة مرة ثانية
شعر "آدم" بسعادة تغمر قلبه وروحه وعقله .. حمد الله كثيراً .. وشكره
كثيراً .. على استجابته دعائه .. ظل طوال اليوم فى فراشه يتعجل مغادرة
المشفى .. والذهاب لخطبة حبيبته !

أصرت "آيات" على عدم عمل حفل للخطبة .. فقط يرتديان دبلتا الخطبة
.. فعلى الرغم من سعادتها وفرحة قلبها .. إلا أنها كانت تشعر ببعض
الخوف .. الذى تتمنى أن يختفى تماماً من داخلها .. توجهت برفقة
"كريم" و "إيمان" و "آدم" ووالدته الى الصانع لشراء دبلة الخطوبة ..
نظرت الى الدبل المعروضة وهى تتذكر يوم ذهبت برفقة "آدم" ووالدها
لشراء دبلة خطبتها الأولى .. لاحت سحابة حزن على وجهها وهى تتذكر
كيف نزع والدها تلك الدبلة من اصبعها .. وكيف تحطمت آمالها وأحلامها
.. حانت من "آدم" التفاته اليها .. ليرى ذاك الحزن فى عينيها .. فشعر
على الفور بأنها تذكرت ذلك الماضى الذى يتمنى من كل قلبه أن ينسيها
اياها ويمحيه من ذاكرتها تماماً .. أشاح بوجهه عنها غاضباً لبصره وهو
يشعر برغبة عارمة فى احتوائها بذراعيه و التحدث اليها بما يجيش فى
صدره ليزيل تلك المخاوف والآلام من قلبها تماماً .. سألها "كريم" :
- ها .. اخترتى

نظرت الى تلك القطع الذهبية وهى تشعر بشئ من انقباض الصدر ..
تمتت بخفوت :

- لأ .. عادى .. مش مشكلة أى واحدة فيهم
قال "آدم" بحزم وعينيه على تلك القطع الذهبية :
- لأ

صمتت فأكمل :

- اختارى الدبلة اللى تحبها .. واللى تحبى تلبسها
ثم قال بصوت حانى :

- عشان الدبلة اللى هتختاريها دلوقتى مش هتقلعيها من ايدك أبداً
خفق قلبها بقوة لكلماته التى أشعرتها بأنه يعى تماماً تلك المخاوف التى
تعمل داخل صدرها .. وقفت تنظر الى القطع الذهبية فى حيرة وعيناها
تلمع بعبرات خفيفة .. لا تدري ما اصابها فجأة .. لكنها وقفت مضطربة ..

فجأة قال "آدم" للصائغ :

- شكراً

أشار لهم بالخروج .. شعرت "آيات" بالدهشة لكن دهشتها زالت عندما خرجوا من المحل وسمعته يقول لـ "كريم" بحزم :

- هنروح محل تانى

أوماً "كريم" برأسه وتخيروا محلاً آخر .. دخلت "آيات" فوضع الصائغ أمامها تشكيلة كبيرة .. فقال "آدم" وهو ينظر الى القطع الذهبية :

- لو معجبكيش حاجة هنا مفيش مشكلة نروح مكان تانى .. المهم تختارى حاجه حباها

أخذت "آيات" تنظر اليهم .. ثم .. وقع نظرها على احدى الدبل .. فقال قلبها نعم تلك .. أخذتها وارتدتها فى اصبعها .. التفت "آدم" ينظر اليها .. خفق قلبه لمرأى تلك الابتسامه العذبة التى ارتسمت على شفيتها .. أشاح بوجهه مبتسماً وهو يقول :

- عجبك

قالت بخفوت :

-أيوه

أرتها لـ "كريم" ولوالدة "آدم" التى قالت بسعادة :

- مبروك عليكى يا حبيبتي

نظرت "آيات" الى الدبلة فى سعادة بالغة .. قالت والدة "آدم" بحنان :

- اختارى يا بنتى خاتم .. ده هيكون هدية خطوبتك

نظر "آدم" الى أمه بدهشة .. قالت "آيات" بخرج :

- شكراً يا طنط مفيش داعى

ربت والدته على ظرها قائله :

- من هنا ورايح اسمى ماما مش طنط .. وبعدين انتى بنتى وأنا عايزه

أهادى بنتى

قبل "آدم" رأس والدته ممتناً .. وقبلتها "آيات" بتأثر .. تخيرت خاتماً

رقيقاً .. كانت سعادة "آدم" غامرة عندما قامت والدته بالباسها ذاك الخاتم

وتلك الدبلة .. ثم .. تطلق زغروته عالية تملأ المكان يهجة وسعادة .. أخذ

نفساً عميقاً مريحاً وهو يتمتم بسعادة :

- الحمد لله .. يارب باركلى فيها

أخرج "آدم" الدبلة الفضية التى اشتراها منذ قليل ووضعها فى اصبعه

وأخذ ينظر اليها بسعادة .. أخيراً .. صارت خطيبته مرة أخرى .. أخيراً

استجاب الله دعاءه وأعادها اليه مرة أخرى .. قال بحنان وهو مطرق

برأسه :

- مبروك يا "آيات"

ابتسمت وخفقات قلبها تعزف لحناً جميلاً .. قالت بسعادة ممزوجة بالخجل :

- الله يبارك فيك

قال برقه :

- وفيك .. ربنا يباركلى فيك

اتسعت ابتسامتها وهي تشعر بأن الفرحة طرق بابها أخيراً .

[http://www.youtube.com/watch?feature
v=T4NGuJyXy10&=player_embedded](http://www.youtube.com/watch?feature=v=T4NGuJyXy10&=player_embedded)

♥ فارس ♥ حلمك تتمنيه واللي حلمتي في يوم تلاقيه
بيكون وصفه يا مسلمه ايه يالا قوليلنا واحكي عليه

ما تشوف عينه الا حلاله ولاغير ربه بيشغل باله
ويطاطى ويراضي الوالد والوالده بتبات دعياله
ومصلي والمولى هاديه آدي اللي حلمت اني الاقيه

قولي كمان يا صبيه عليه ♥ فارس ♥ حلمك تتمنيه
بيكون وصفه يا مسلمه ايه يالا قوليلنا واحكي عليه

يتعب جسده ويعرق اكثر لجل ما يرتاح قلبه الاخضر
وبيرجلى وايده نضيفه نفسه عفيفه وزى السكر
وطيابه بتبان في عنيه
آدي اللي حلمت اني الاقيه

بتمنى انه يقدرني يبقى ولي لقلبي وأمري
والليل لو بطول أوقاته يبقى ونيسى ونجمى وقمرى
وأنا عمري والروح أعطيه
آدي اللي حلمت الاقيه

أمر العاطي انك تلاقيه زي ماكنتي بتحلمي بيه
وأهو جالك دلوقتي ♥ الفارس ♥ يسعد قلبك ويهنيه
يسعد قلبك ويهنيه

الفصل الحادى والثلاثون من رواية جواد بلا فارس



فى صباح اليوم التالى للخطبة استيقظت "آيات" وهى مازالت لا تصدق ما حدث خلال اليومين الماضيين .. أصبحت الآن خطيبة لـ "آدم" مرة أخرى .. وافقت على الخطبة كفترة اختبار له .. فهما زالت تثقتها به غير مكتملة بعد .. لكنها ما عادت تستطيع أن تنكر التغيير الذى لمستته فى تصرفاته وشخصيته .. ولعل آخرها رؤيتها اياه وهو يصلى بخشوع ظاناً أنها اللحظات الأخيرة قبل موته .. فبدلاً من أن يفقد أعصابه أو يبكى أو ينوح .. وقف يصلى فى خشوع ليستقبل الموت وهو على طاعة .. خرجت من غرفتها لترى الجميع جالساً فى غرفة المعشية .. باستثناء والد "أسماء" والذى أصر "كريم" على إقامته معه هو "على" .. حتى تكون الفتيات على راحتهن .. تعالت أصواتهن بالمرح والمزاح وهن يقدمن إليها التهاني والدعاء لها بالتوفيق

كعادتها ارتدت ملابسها وتوجهت الى عملها .. دخلت مكتبها لتفاجئ بباقة زهور على مكتبها وبها كارت أنيق كتب فيه :
- ألف مبروك يا عروستى .. "آدم"
ابتسمت بسعادة وهى تنظر الى الكارت والزهور التى أخذتها وأفرغت لها

احدى الفازات ووضعتها أمامها فوق المكتب .. تنظر اليها بين الحين
والآخر مبتسمة

فى ذاك الصباح رحل "أحمد" عن القرية بعدما تيقن من ضياع "آيات"
منه مرة أخرى .. فهذه المرة ربح "آدم" أيضاً .. رحل وفى داخله غضب
كبير .. لم يكن ذاك الغضب خالصاً من أجل خسارته لـ "آيات" .. بل كان
منبعه أيضاً خسارته التحدى أمام "آدم" .. لكنه على الرغم من ذلك تمنى
لها الخير .. مع من اختاره قلبها .. فهو يعلم علم اليقين أنه لم يدخل قلبها
يوماً .. ولم يستطع أن يحرك مشاعرها تجاهه قيد أنمله .. تذكر اخبارها
اياها بأن مساعدته لها وقت محنتها ستكون بدون مقابل .. لن تضطر الى
تقديم مقابلاً لتلك المساعدة .. لعل هذا ما يجذبه اليها .. نقائها وصراحتها
المفرطة مع نفسها ومع غيرها .. فلو كانت فتاة أخرى فى محلها فلعلها
استغلت الفرصة للإقتراب من "أحمد" بعدما خست كل مالها وأملاتها ..
لكنها لم تفعل .. لم تستغله .. ولم تخدعه .. لذلك لم يستطع أن يتمنى لها
غير .. السعادة

كانت دهشة "سمر" كبيرة عندما دخلت عليها أمها الغرفة لتقول :

- "سمر" انتى تعرفى واحد اسمه "زياد" ؟

نظرت اليها "سمر" بدهشة قائلة :

- "زياد" مين ؟

أشارت والدتها الى الخارج وهى تقول بصوت منخفض :

- معرفش .. أعد بره .. وبيقول انه جاى يتقدملك

قفزت "سمر" من فراشها وقد اتسعت عيناها بشدة .. فحثتها أمها قائلة :

- البسى بسرعة مستنياكى بره

ارتدت "سمر" ملابسها وهى تفكر .. من "زياد" هذا الذى جاء لطلب

يدها .. صُدمت عندما خرجت لتجد "زياد" أمامها .. ذاك الرجل الذى كان

يأتى العيادة وفى يده أحد الأطفال فقط من أجل أن يتحدث معها .. والذى

أنقذها يوم الحريق .. نظرت الى ذراعه المجبر بإشفاق .. نهض مرحباً

وابتسامة على ثغره :

- أهلاً وسهلاً

تمتم وهى تخفض رأسها :

- أهلاً بحضرتك

جلست على أحد المقاعد .. وقدمت والدتها مشروباً إليه تناوله منها قائلاً

:

- تسلم ايديك

ساد الصمت للحظات .. قبل أن يتنح "زياد" ليقول بشئ من الحرج :

- أنا آسف انى جيت فجأة كدة .. بس أنا معرفش رقم الأنسة "سمر" و

كمان من ساعة ما العيادة اتحرقت وأنا مبشوفهاش فى القرية

قالت والدتها بحزن :

- ربنا يجازى اللى كان السبب ده أنا كنت هموت من خوفى عليها

قال "زياد" :

- الحمد لهل انها جت على أد كده

نظرت "سمر" الى والدتها قائلة :

- على فكرة يا ماما أستاذ "زياد" هو الل خرجنى من العيادة وقت ما

اكنت بتتحرق

نظرت اليه أمها بإعجاب قائلاً :

- ربنا يبارك فيك يا ابنى .. والله فضلت أديك كثير .. ربنا صرف عنك كل

سوء

ثم نظرت اليه ذراعه المجبر وقالت بأسى :

- معلش يا ابنى على اللى حصل .. ربنا يشفيك ويعافيك يارب

- تسلمى .. الحمد لله جت بسيطة .. المهم ان الأنسة "سمر" الحمد لله

محصلهاش حاجة

ساد الصمت مرة أخرى .. ليقطعه "زياد" قائلاً وهو ينظر الى "سمر" :

- أنا زى ما قولت لولدتك يا دكتورة .. أنا يسعدنى ويشرفنى انى أتقدملك

أخذت "سمر" تفرك يديها وتنظر اليهما فى حرج .. دون أن تتفوه بكلمة

.. فأكمل "زياد" وهو يترك كوبه من يده فوق الطاولة :

- أنا اسمى "زياد" .. عندى 33 سنة .. بشتغل هنا فى القرية .. مرتبى

..... عندى شقة فى القاهرة بس مش ناوى أرجع على الأقل دلوقتى

لاى حابب أكمل شغل هنا فى القرية .. والدى ووالدتى متوفيين من زمان

.. تقدرى تقولى مقطوع من شجرة مليش غير صاحبى "آدم" اللى طبعت

بيه من الدنيا وأمه ربنا يبارك فيها اللى يعتبرها أمى الثانية

صمتت تستمع اليه بانتباه وهو لاتزال تنظر الى يديها فأكمل :

- لو فى أى سؤال أو أى حاجة تحبى تعرفيها عنى اسألينى عنها

خرجت من صمتها قائله :
- ممكن أعرف ليه حضرتك اخترتني بالذات .. يعنى حضرتك متعرفنيش ..
وأظن انك متعرفش أى حاجة عنى
ابتسم "زياد" قائلاً :
- مين قالك كده .. انا عارف كل حاجة عنك
رفعت رأسها تنظر اليه باستغراب .. فاتسعت ابتسامته وهو يقول :
- بصراحة سألت "كريم" وقالى انك صاحبة أخته من زمان وانك عايشة
مع والدتك .. وكمان انك صاحبة مراته وبتشكر فيكى جداً
شعرت "سمر" بالغیظ من "إيمان" التى لم تذكر لها شيئاً عن الموضوع
.. أكمل "زياد" :
- مش عايزة تسأليني عن حاجة
قالت "سمر" بإقتضاب :

لأ -
- طيب أنا هجاوبك على سؤالك اللى سألتيه واللى أنا لسه مجاوبتش عليه
.. سألتيني ليه اخترتك انتى بالذات .. صحيح أنا مشفتكيش الا كام مرة
بس عجبني فيكى انك جد يعنى مبتديش فرصة لحد انه يستظرف ولا يرخم
عليكى .. وحسيتك بنت مؤدبة ومحترمة وواضح انك بتحبى شغلك أوى
وعندك ضمير .. وحسيت انك هتكونى زوجة مناسبة ليا .. أنا من زمان
وأنا نفسى أقلنا نصى التانى .. واحدة أحس بالراحة لما أشوفها وأقول هى
دى يا واديا "زياد" اللى تشاركك حياتك بحلوها ومرها
صمتت لا تدرى ما تقول فأكمل :
- أنا يمكن ظروفى قريبيه شوية من ظروفى بس أنا ظروفى أصعب .. يعنى
اللى عرفته عنك ان باباكي من زمان وهو منفصل عنكوا
شعرت "سمر" بتوتر بالغ واضطربت ملامحها لذكر والدها الغائب ..
فأكمل "زياد" :

- أنا كمان فقدت والدى الله يرحمه من زمان أوى .. يمكن مفكرش شكله
.. وحتى أمى الله يرحمها اتحرمت منها بدرى .. طبعاً ربنا يباركلك فى
والدتك ويديها طولة العمر .. وكان لازم أعتمد على نفسى بدرى وأشتغل
وأصرف على نفسى وأكون نفسى عشان أعرف أفتح بيت .. حسيت ان
احنا ظروفنا الى حد كبير متشابهة فهنقدر نفهم بعض كويس
شعرت "سمر" بإضطراب بداخلها .. أثرت بها كلماته وظروفه التى مر
بها .. كان من الصعب عليها وبشدة العيش مع أب مفقود .. فكيف شعور
من فقد أمه أيضاً ! .. بالتأكيد كان شعوره قاسياً .. بالتأكيد عانى من وحدة

شديدة .. ولا يزال .. سمعته يقول ليخرجها من شوردها :
- أنا بجد ارتحتك جداً .. ونفسي فعلاً ان ربنا يجمعنا مع بعض .. وأى
سؤال تحبي تسألينه أنا تحت أمرك
حاولت "سمر" مقاومة شعور الإرتياح الذى شعرت به من خلال حديثه ..
وقالت بشئ من الحدة :

- حضرتك كنت صاحب دكتور "آدم" .. طيب كنت شغال معاه فى القرية
اللى جمب القرية دى ؟

قال "زياد" مطرقاً برأيه :

- قصدك جولدن بيتش .. أيوة كنت شغال فيها

قالت بحدة وقد شعرت بأنها وجدع درع تحتمى خلفه :

- حضرتك كنت بتتشلغل فى قرية كلها محرقات وحاجات تغضب ربنا
ومكنش فارق معاك تغضب ربنا ولا لأ

نظر اليها "زياد" قائلاً :

- مين قال ان مكنش فارق معايا .. أنا مكنتش مرتاح أبداً للشغل هناك ..

بس يمكن كنت محتاج اللى يعينى ويشجعنى انى آخذ الخطوة دى واسيب
الشغل .. والحمد لله "آدم" فاق قبلى ولما قرر انه يسيب القرية اتشجعت

وسيبتها

قالت "سمر" وهى تعقد ذراعيها أمام صدرها :

- مش مبرر

قال "زياد" بحماس :

- طبعاً مش مبرر .. كان لازم أسيب القرية بمجرد ما عرفت اللى بيحصل

فيها .. بس تقدرى تقول الشيطان كان أشطر منى .. وكتفنى خلانى مش

عارف آخذ الخطوة دى .. بس الحمد لله فوقت .. وأنا مرتاح جداً فى شغلى

هنا على الأقل ضميري مرتاح وبستغفر ربنا على انى استهنت بشغلى فى

جولدن بيتش

ثم قال :

- بصى يا دكتورة .. أنا اللى حبه فيكى أكثر هو انى حاسس انك انسانه

محترمة وملتزمة .. وأنا محتاج واحد كدة تعينى .. أنا على فكرة حتى لو

كنت بعمل حاجة غلط بس مش من النوع العنيد المتكبر اللى بيرفض

النصيحة .. ولا اللى بيقاوح فى الغلط .. لا الحمد لله من فضل ربنا عليا

انى مش كده

ثم قال :

- والحمد لله كمان صحبة "كريم" و "على" فادتنى كثير وبدأت أنتظم فى

الصلاة فى المسجد .. انا عمرى الحمد لله ما فوت فرض .. بس مكنتش
بصلى فى المسجد .. بس دلوقتى الصلاة كلها بصليتها فى المسجد .. يعنى
الصحبة الصالحة بتأثر فىا وبتغير فىا .. ما بالك لو زوجة صالحة وعائش
معاها فى بيت واحد

قاتل "سمر" وهى مطرقة برأسها :

- بس أنا مش صالحة اوى كدة .. أكيد ليا أخطاء وعيوب

قال "زياد" على الفور :

- يبأه نعين بعض .. انتى تكملى اللى ناقص فىا وأنا أكمل اللى ناقص فىكى
صمتت "سمر" وهى لا تستطيع انكار الراحة التى شعرت بها من الحديث
معه .. لكنها قالت فجأة وبحزم شديد :

- أنا أسفة يا أستاذ "زياد" .. كل شئ نصيب

صدم "زياد" لهذا الرفض القاطع والمفاجئ فى سياق الحديث .. بينما

ظهر الحزن فى عين والدتها .. هى نفسها شعرت بالأسى بداخلها .. لا

تعلم لما تفوهت بهذه الكلمات لتنتهى تلك المقابلة التى كلما طالت كلما

شعرت بالإرتياح أكثر وبالميل اليه .. كانت تفتقد شعور الأمان فى يحاتها

الى درجة أنها حينما شعرت بهذا الأمان فى حديثه خافت منه !

لعلها خافت من أن كيون هذا الشعور سراباً سرعات ما تكتشف زيفه .. أو

لعلها خافت أن تسير خلف أحاسيسها التى شعرت بالميل الى كلامه

وشخصيته .. او لعلها تعودت الوحدة وأطبقت على أنفاسها حتى لم تعد

تجرو على الخلاص منها .. قامت بهدوء لتدخل غرفتها معتذرة منهما ..

ساد الصمت للحظات يحاول فيها "زياد" فهم سبب ذاك الرفض الذى لم

يتووعه وبتلك الطريقة .. حتى أنها لم تأخذ وقتاً للتفكير .. استأذن لينصرف

.. فتح الباب .. وقبل أن يخرج أوقفته أمها قائله :

- أستاذ "زياد"

التفت اليها وفى عينيه حيرة ممزوجة بالضيق .. فنظرت اليه بحنان قائله

:

- اللى عايزه حضرتك تعرفه .. ان "سمر" تعبت كثير لما والدها بعد عنها

وهى صغيره .. يمكن ده اللى بيخليها مش قادرة تثق فى حد . ومش قادرة

تعتمد على حد غير نفسها .. لانها شالت المسؤولية معايا قبل أوانها

ثم قالت فيما يشبه الرجاء :

- لو شاريتها بجد اتمسك بيها

نظر اليها "زياد" صامتاً لبرهه .. ثم قال :

- لو حضرتك واثقة ان هو ده سبب الرفض .. يبقى أكيد هتمسك بيها

قالت أمها بحماس :
- أيوة أنا واثقة .. "سمر" بنتى وأنا عرفاها كويس .. لو مكنتش عجبته
مكنتش فضلت تجادل معاك وتسالك عن حاجة خاصة بيك .. كانت فضلت
ساكتة ومفتحتش بقها .. وده اللي خلانى بقولك الكلام ده دلوقتي ..
حسها انك شاريتها وانك متمسك بيها
نظر اليها "زياد" قائلاً بحماس :
- أنا فعلاً متمسك بيها
اتسعت ابتسامته والذتها وفي عيونها دموع محبوسة وهى تقول :
- خلاص اتفقتنا يا ابني
لوح لها "زياد" مودعاً .. خرج من الباية وهو يفكر فيما دار فى المقابلة
.. وفى كلمات والذتها .. نعم لا يعرفها الا منذ أيام قلائل .. لكنه يشعر بأنها
نصفه الآخر .. اذا كانت رفضته لذاك السبب .. فسيتمسك بها .. الى أن
يتمكن من كسب ثقتها

جلست "سمر" فى غرفة "بيات" تحاول بصعوبة منع تلك العبرات من
التساقط .. شعرت بأنها تفتقد للشجاعة التى تجعلها تقدم على تلك الخطوة
وتبدأ فى بناء حياة طبيعية مع شريط آخر يقف بجوارها ويواجهان الحياة
جنباً الى جنب .. تذكرت كيف تخلى والدها عن الوقوف بجوار والذتها فى
تلك المواجهة التى ذاقت مرارتها حتى وصلت لما هى فيه الآن .. تنهدت
بحسرة وهى تحاول مقاومة تلك المخاوف التى تمنعها من أن تسعد كأي
فتاة عادية .. التى تجعلها تصد كل من يتقدم لها .. والتى تجعلها الآن
تزرع تلك العبرات لما شعرت به من رغبة فى الموافقة كبتها بداخلها
لتعلن بدلاً منها رفضاً قاطعاً .. أرادت حقاً اعطائه واعطاء نفسها فرصة ..
فلعله يستطيع أن يكون ذاك الرجل الذى تبغى .. تسرب اليها شعور بالندم
لتسرعها فى الرفض .. فلعلها لو أعطت نفسها فرصة للتفكير لكانت
وافقت .. قامت بضيق وتوضأت ووقفت تستخير الله فى ذاك الأمر الذى
نهته بجمله واحدة منذ لحظات .. أنهت صلاتها وهى تفكر بحزم .. إن كان
نصيبتها فسيعود .. وإن لم يكن فلقد حماها الله من شر كانت ستقع فيه

ظل "آدم" محتفظاً بابتسامته العذبة طيلة اليوم وهو يلقي نظرة على دبلته

من حين الى آخر .. مازال الى الآن لا يصدق ما حدث .. لا يصدق أنه ارتبط بحبيبته أخيراً .. لا يصدق أنها أعطته فرصة أخرى ليثبت أنه جديراً بها .. لم يفتر لسانه عن ترديد :

- الحمد لله

فالله من يسر له واستجاب له ورزقه بمن أحب .. لكم كان يتمنى أن تمر تلك الخطبة سريعاً ليستطيع رؤيتها والتحدث معها كيفما شاء ووقتما شاء .. شعر بأن تلك الخطبة تكتفه عن التعبير عما يجيش به صدره .. لكنه عزم على ألا يغضب الله عز وجل هذه المرة .. لن يتجاوز معها كما فعل في خطبتهما الأولى والتي كانت منزوعة البركة .. عزم على أن يرضى الله ويطيعه حتى ينال ما يريد .. ساعده على ذلك "آيات" نفسها والتي أرادت ما أراده هو .. قارن بين حالهما في خطبتهما الأولى وحالهما الآن .. فاتسعت ابتسامته وهو يحمد الهل أن من عليه وعليها بالتوبة .. فلعل كل ما حدث كان من أجل تطهيرهما من ذنوبهما .. شرد "آدم" يفكر .. لعلمها لو كان تزوجها وقتها لكان حياتهما الآن لا تطاق .. فبالأكد الحياة في البعد عن الله لا تطاق .. شعر بكم كان الله رحيماً بهما أن فرقهما وهما على المعصية ليعيد جمعهما في الطاعة !

أخذ "آدم" يفكر .. لو علم الإنسان ما حماه الله منه لحمده على حاضره ولاستبشر بمستقبله .. أحياناً يكون الخير مغلف بغلاف من الأسى حتى نتوهم بأنه شراً .. لكنه الخير وليس سواه .. كلما اقترب الإنسان من الله فهم معنى الإبتلاء جيداً .. فالإبتلاء أحياناً يكون للتطهير وللتكفير عن الخطايا للرجوع الى الحق

بعد انتهاء العمل قابل "آدم" "كريم" وأخبره برغبته في زيارة "آيات" والتحدث معها .. بعد عدة ساعات حضر "آدم" الى منزل "كريم" الذي رحب به ببشاشه .. بعد قليل حضرت "آيات" تبسم بخجل وهي مطرقة برأسها .. أخذ "آدم" نفساً عميقاً وهو يشعر بسعادة تغمر قلبه .. ها هي حبيبته أمامه .. حبيبه وخطيبته .. غض بصره وإن كان ذلك شاقاً عليه .. تحدث قائلاً :

- ازيك يا "آيات"

ردت بخجل :

- الحمد لله .. ازيك انت

- الحمد لله .. لقيتي حاجة على مكتبك الصبح

ابتسمت قائلاً :

- أيوة .. فرحت بيها

اتسعت ابتسامته قائلاً :

- طيب الحمد لله انى قدرت أفرحك

صمت لبرهه ثم قال :

- "كريم" قالك على ظروفى ؟ .. انى دلوقتى يعتبر انى ببدأ حياتى من أول

وجديد

أومات برأسها قائله :

- أيوة "كريم" قالى كل حاجة

سألها باهتمام :

- طيب ورأيك ايه .. يعنى احساسك ايه

قالت بخفوت :

- أعتقد رأيى عرفته لما وافقت على الخطوبة .. أنا مش مهم عندى كل ده

.. يعنى أنا معنديش مشكلة انى أستناك لحد ما تقف على رجلك تانى

ابتسم بارتياح وهو يقول :

- ريحتى قلبى بكلامك على فكرة .. وأنا أوعدك ان شاء الله انى أعمل كل

اللى أقدر عليه عشان أعيشك أحسن مما كنتى عايشة

قالت "آيات" بصدق :

- صدقتى أنا مش ببص لكده .. أهم حاجة اننا نكون ماشيين صح ..

وحياتنا صح .. لو ده حصل أكيد هيكون فيها بركه .. فى ناس كتير عايشة

كويس ومرتاحة مادياً لكنها تعبانة نفسياً ومفيش فى حياتها بركة .. ومش

حسه بطعم الحياة أصلاً .. مش بالفلوس على فكرة .. المهم ان الواحد

يكون راضى .. وأنا راضية طول ما احنا ينتقى ربنا ومش بنغضبه

تنهد "آدم" قائلاً بتأثر :

انتى نعمة كبيرة أوى ربنا رزقتى بيها .. وأنا عاهدت ربنا انى أحفاظ

عليكى يا "آيات" .. مش عايزك تخافى منى .. انا فعلاً اتغيرت كتير ..

مش بس رجعت زى الأول .. أنا رجعت أحسن مليون مرة من الأول ..

نفسى تنسى كل اللى حصل قبل ده .. وتفتكرى بس حياتنا من لحظة ما

اتخطبنا

ابتسمت تقول :

- فعلاً أنا حسه بكدة .. يعنى معدتش بفكر فى حاجة فاتت .. خلاص مش

هفكر فيه تانى .. انت غلطت وأنا غلطت .. خلاص ربنا يغفرلنا احنا

الاتنين

اتسعت ابتسامته "كريم" الذى كان جالساً على بعد خطوات منهما يحمل

اللاب توب على قدميه منشغلاً فيه .. دعا الله لهما أن يوفقهما وأن يجعل

كل منهما قرءة عين الآخر

شعرت "سمر" بالدهشة عندما عادت من عملها لتجد "زياد" جالساً بصحبة والدتها .. دخلت الغرفة على الفور لتقول لها "آيات" بلهفة :
- "زياد" أعد مستنيكي بقاله ساعة
قالت "سمر" بإضطراب :
- عايز ايه ده مش خلاص رفضته
دخلت والدتها وهي تقول :
- "سمر" تعالى شوية لو سمحتي
خرجت "سمر" وهي تشعر بالإضطراب .. ألقت عليه نظرة لتجده مبتسماً ووقف مرحباً بها .. جلست وهي لا تعلم سر تلك الزيارة بعد رفضها اياه ..
قامت والدتها وهي تقول :
- تحب تشرب شاى ولا قوة يا أستاذ "زياد"
- قهوة لو سمحتي
دخلت أمها المطبخ .. فشعرت "سمر" بالضييق .. قالت بشئ من الحدة :
- خير يا أستاذ "زياد"
ابتسم وهو يضع ساقاً فوق ساق قائلاً بمرح :
- لا أبدأ جاي أتكلم فى تفاصيل الخطوبة
نظرت اليه بحدة وقالت بدهشة :
- خطوبة ايه؟
ابتسم لها قائلاً :
- خطوبتنا
قالت بجدية :
- حضرتك بتهزر .. خطوبة ايه .. حضرتك خدت ردى المرة اللي فاتت ولا نسيته

مال بجسده ونظر اليها قائلاً بمرح :
- هو انتى فاكرة لما تقوليلى انك مش موافقة .. خلاص بأه همشى وأنسى الموضوع وأقول كرامتى وكده يعني .. لا أبسلوتلى .. مش أنا خالص
نظرت اليه بدهشة وقد ألجم لسانها فأكمل بنفس المرح :
- هفهمك .. لما كنت صغير كان عندى عربية نص نقل .. لا دماغك متروحش لبعيد .. مش عربية حقيقية .. عربية لعبة .. فى يوم العربية دى وقعت من البلكونة .. أنا اللي حدفتها .. وبعدين وقعت على راس عم

"فاروق" جارنا .. كان راجل غلبان أوى .. المهم فضل يزعق ويقول مين اللي رمى العربية دي على دماغى .. أنا طبعاً مفتحتش بقى .. خفت يطلع يضربنى .. ولا يقول لأمى وهى تضربنى .. سكت .. والعربية ضاعت منى .. عم فارق الله يرحمه ويغفرله بأه من غيظه كسر العربية تحت رجله كانت "سمر" تستمع اليه وهى تنظر اليه بدهشة وحيرة وقد فغرت فاها .. بعدما انتهى انتظرت أن يكمل فلم يتحدث فقالت بجدية :

- آه وبعدين .. ايه علاقة ده بموضوعنا ؟

أطلق "زياد" ضحكة عالية وهو يقول :

- لا ملوش علاقة أنا كنت بدردش معاكى

نظرت اليه "سمر" بغضيط ثم أشاحت بوجهها بينما عادت والدتها من المطبخ حاملة صنية القهوة .. فنهض "زياد" مسرعاً وأخذها منها قائلاً :

- تسلمى يا أمى متحرمش منك أبداً

نظرت اليه بدهشة وهو يقول لأمها "أمى" .. جلس "زياد" يرشف من فنجاناه وهو يقول :

- تسلم ايديك يا أمى قهوة ممتازة

ثم التفت الى "سمر" يقول بلؤم :

- وانت يا دكتوراه بتعرف تعمل قهوة ولا ملكش فى الطبخ ؟

ضحكت والدتها قائلة :

- لا "سمر" ما شاء الله عليها بتعرف تعمل كل حاجة

ابتسم "زياد" قائلاً :

- أنا كمان بعرف أعمل كل حاجة من أول الطبخ لحد الغسيل

رفعت والدة "سمر" حاجبيها قائلة بدهشة :

- معقولة

أخذ رشفة من فنجاناه وقال :

- طبيعى لما راجل يعيش لوحده لازم يتعلم يعمل حاجة حاجة بنفسه ..

اتعلمت كل حاجة .. أنا أصلاً عايش لوحدى على طول .. حتى لما سافرت

شرم ولما جيت هنا برده كنت عايش لوحدى

ثم قال بشئ من الأسى :

- أحياناً الواحد من كتر ما بيعيش لوحده بتعود على الوحدة ويحس انها

زى الصاحب اللي صعب يسببه أو يفترق عنه .. بس بييجي عليه وقت

يحس انه خلاص مش طايقها .. ونفسه فى حد يتكلم معاه زى ما بيتكلم

مع نفسه .. نفسه يحس ان له لزمه فى الدنيا دي وان فى حياته بيت

وأسرة وزوجة وأولاد ومسؤولية .. مش عايش كدة لنفسه وخلاص

كانت "سمر" تستمع اليه باهتمام بالغ .. فأكمل :
- أنا يمكن عشان كمان كنت طفل وحيد .. فكانت الوحدة ملازماني من كل اتجاه .. عشان كده نفسى أكون أسرة كبيرة أوى .. يعني بتاع 7 ولا 9 عيال كده
ثم التفت الى "سمر" قائلاً بمرح :
- ايه رأيك .. لو عايزه أكثر أنا معنديش مانع لاحت الابتسامه على شفيتها وهى تقول :
- أكثر من كده ؟ .. انت مش عايز زوجة .. ده انت عايزه دادة لولادك أطلق "زياد" ضحكة عالية سرت كالنغمات فى أذنيها وهو يقول بمرح :
- لا مش لدرجة دادة .. ما أنا هساعدك برده يعني .. لسه بقول بعرف أطبخ وأغسل وممكن كمان أحملك العيال .. يلا يا ستى .. هتلاقى فين راجل زبي يحملك العيال .. ده أنا عريس لقطه والله
أطلقت "سمر" ضحكة مكتومة وهى تضع أصابعها على فمها .. شعرت بمرح بداخلها لم تشعر به منذ زمن .. وكأنها عادت طفلة مرة أخرى .. نظرت اليه بطرف عينها لتتأمل ملامحه التى كانت عى قدر من الوسامة .. وابتسامته التى لا تفارقه .. ومرحه الذى يغدق به على من حوله .. شعرت بإستكانه وهى تستمع باهتمام الى حديثه الشيق .. وذكريات طفولته وصباه

جلس "كريم" فى مكتبه يزاول عمله كالمعتاد عندما اقتحم عليه المكتب فجأة بعض الرجال .. نهض قائلاً :
- أفندم
قال أحدهم :
- أنا النقيب "....." معانا أمر بتفتش المكتب
شعر "كريم" بالدهشة وقبل أن سعى ما يحدث تجول المخبرين فى المكتب وقد قلبوه رأساً على عقب وهو يحاول تنظيم ما تم بعثرته من أوراق هامة .. ثم .. صاح أحد المخبرين :
- تمام يا فندم
التفت ليجد المخبر قد أعطى للضابط مجموعة أكياس فى داخلها مسحوق أبيض .. فتح الضابط أحد الأكياس وغمس فيها اصبعه ثم قربها منه يشمها ويتفحصها عن قرب .. ثم التفت الى "كريم" قائلاً :

- مخدرات ! .. اتفضل معانا

صاح "كريم" باستنكار :

- مخدرات

لم يتركوا له فرصة للحديث .. ساقه المخبرين الى الخارج وهو يشعر
بالصدمة مما يحدث .. لقيه "آدم" و "زياد" فصاحوا :

- ايه فى ايه

- مين دول يا "كريم"

قال "كريم" وهو يسير معهم دون أن يسمحوا له بالتوقف :

- بيقولوا لقوا فى مكتبى مخدرات

صاح "زياد" بحده :

- ايه .. مخدرات !

سار "آدم" خلفه وهو يهتف قبل أن يجلسوه فى السيارة :

- متقلقش يا "كريم" هجيب المحامى وهجيك على القسم

انطلقت السيارة حاملة "كريم" الذى أخذ يتمتم مصدوماً :

- اللهم اكفينهم بما شئت وكيفما شئت

علمت "آيات" بخبر القبض على أخيها فأسرعت تجرى فى اتجاه البوابة

.. لقيت "آدم" واقفاً يتحدث فى هاتفه باهتمام اشار اليها فأقبلت نحوه ..

أنهى اتصاله فقالت بلهفة :

- ايه اللى حصل ده .. فين "كريم"

زفر "آدم" بحنق قائلاً :

- البوليس لقي فى مكتب "كريم" مخدرات

شهقت بقوة وهى تضع يدها على فمها ثم ما لبثت أن هتفت :

- مش ممكن كريم يعمل كده

قال "آدم" على الفور :

- طبعاً مش ممكن يعمل كده .. ده أكيد الكلب "عاصى"

قفزت الدموع الى عينيها وقد أصابها الفزع والخوف على أخيها .. فهدئها

"آدم" قائلاً :

- متخفيش يا "آيات" أنا رايحله القسم دلوقتى وان شاء الله خير ..

روحي انتى دلوقتى

أسرع "آدم" فى اتجاه مكتب "كريم" ليجده مبعثراً عن آخره .. وضع

"كرسى" أسف الكاميرا المثبته فى الجدار واستخرج منها الشريط

الموضوع بها .. ثم توجه الى قسم الشرطة حيث تم أخذ "كريم" !

بعد عدة ساعات من التحقيقات والإتيان بشريط الفيديو الذى صورته الكاميرا التى وضعها ووزعها "كريم" فى أماكن متفرقة من القرية بعد حادثة الجراج .. تبين أن أحد العاملين بالقرية قد دخل مكتبه ودس تلك الأكياس فى ذاك المكان الذى وجده رجال الشرطة .. أثبت الفيديو بما لا يدع مجالاً للشك بأن تلك مؤامرة قد حيكّت للإيقاع بـ "كريم" .. وعندما سألهم الضابط عن يشكون فيه .. أسرع "آدم" على الفور قائلاً :

- "عاصى اليمانى" .. مفيش غيره .. هو وأبوه شغلهم قدر .. ومستبعدش أبداً انهم يكونوا تجار مخدرات فعلاً

حضر أحضر القيادات الكبرى الى القسم وجلس بصحبة "كريم" و "آدم" و محاميه .. أفشى لهم عن علمهم منذ زمن بتجارة "سراج" و "عاصى" المشبوهة .. وأنهم ينتظرون اللحظة المناسبة للإيقاع بهم .. بالأدلة التى لن تجعلهم ينفدون من عقابهم .. طلب ذاك الضابط الكبير من "كريم" أن يساعدهم عن طريق المكوث فى القسم وكأنه بالفعل قد قبض عليه .. وذلك حتى يطمئن "عاصى" لسير خطته بنجاح .. وبعد انكشاف تلك المؤامرة .. ووعده بأنه خلال يومين سيتم مداهمة المكان الذى تظن الشرطة بأنه مخزناً محملاً بذاك السم الأبيض .. فقط ينتظرون اللحظة المناسبة حتى لا ينفذ "عاصى" و "سراج" منها .. وافق "كريم" على الفور على مساعدة الشرطة فى القبض على أولئك المجرمين .. كان المطلوب منه أن يظل فى القسم وألا يفشى أمر اطلاق سراحه بين العاملين فى القرية خاصة بعدما اكتشوا بوجود جواسيس فى القرية تعمل للصالح "عاصى" وأولها ذاك العامل الذى دس امخدرات فى مكتب "كريم" .. وقد كان

انهارت "إيمان" بعدما سمعت خبر القبض على "كريم" .. وأصرت على الذهاب الى القسم لرؤيته .. استسلم "على" لإصرارها وتوجه بها بصحبة والده الى قسم الشرطة .. سمحوا فقط بدخول "إيمان" الى غرفة المكتب حيث يجلس "كريم" منتظراً أوامر أخرى من الضابط .. بمجرد أن رآته شهقت باكية بشدة .. اقترب منه ولفها بذراعيه وعانقها طويلاً وهو يقول :

- خلاص يا "إيمان" متعيطيش .. قول قدر الله وما شاء فعل .. وبعدين مش "على" فهمك .. أنا مش مقبوض عليا أنا هنا بس عشان "عاصى" يفكر انهم قبضوا عليا وان محدش بيحك فيه

أبعت رأسها لتتنظر اليه قائله بأعين دامعة :
- كنت خائفة عليك أوى
أجهشت فى البكاء مرة أخرى .. فابتسم "كريم" بعذوبة وهو يقول :
- ده حب بأه
نظرت اليه قائله وهى تجفف دموعها بمنديلها :
- لا متجوزاك شفقه
أطلق ضحكة خافته وهو يقول بعتاب مصطنع :
- و أنا الى كنت فاكرك بتحبيني .. طلعتى متجوزانى شفقه .. وأنا مقبلش
انك تتجوزيني شفقه
ابتسمت وهى تنظر اليه بحب قائله :
- لا مش شفقه
رفع احدى حاجبيه وهو يبتسم بلؤم قائلاً :
- أمال تجوزانى ليه .. عايزه أعرف دلوقتى
اختفت ابتسامتها وهى تقول :
- ده وقته يا "كريم" .. مش لما نشوف المصيبة اللى احنا فيها دى الأول
قال بحزم :
- متغيريش الموضوع .. متجوزانى ليه بأه
اتسعت ابتسامتها ولم تجيب .. فقال بحنان :
- طيب أنا هطلع أكرم منك
ثم نظر الى عينيها قائلاً :
- بحبك يا "إيمان"
احمرت وجنتاها وأطلقت ضحكة سعادة خافته ونظرت أرضاً .. أمسك
ذقنها ورفع وجهها ونظر فى عينيها قائلاً .. انتى لما عرفتيني وقربتى
منى .. حبتيني ولا لسه ؟
قالت بخجل :
- أيوة .. حبيتك
اتسعت ابتسامته وهو يشعر بأن قلبه يقفز فرحاً .. ثم قال بمرح :
- والله احنا اتنين مجانيين .. ملقيناش الا القسم عشان كل واحد يقول
مشاعره للتانى .. يعنى أقول لولادنا ايه .. أول مرة أقول لأمكوا انى بحبها
قولتها فى القسم
ضحكت بشدة .. فمسح بعض العبرات التى لاتزال عالقة على وجهها وهو
يقول :
- أيوة عايزك تضحكى على طول كده .. مش عايزك تعيطي تانى

أومات برأسها وهي تقول :
- خلى بالك من نفسك .. ماشى .. وأنا هجيك تانى
قال "كريم" بحزم :
- لأ .. متجيش هنا تانى يا "إيمان" .. انا مرضتتش أضايقك المرة دى
عشان مقدر قلقك عليا .. بس لو سمحتى متجيش هنا تانى .. وأنا هبقى
أكلمك .. اتفقنا
أومات برأسها قائله :
- خلاص ماشى يا "كريم"

فى مطعم القرية جلست "أسماء" بصحبة أبويها .. التفوا حول الطاولة
يتناولون طعام العشاء .. ابتسمت "مديحة" وهي تنظر الى ملابس ابنتها
الواسعة وحجابها الطويل .. فلم تكن معتادة على رؤية ابنتها بهذا النوع
من الثياب .. فنظرت اليها ثم قالت :
- انتى غيرتى ستايل لبسك ولا ايه يا "أسماء"
قالت "أسماء" وهي تلعب فى طبقها بملعقتها :
- أيوة
نظر اليها "مدحت" قائلاً :
- اشمعنى يعنى .. عشان "آيات" غيرت ستايلها هي كمان
نظرت اليه قائله :
- لا مش عشان أقلد "آيات" .. عشان أنا حبه كده
ثم عادت تنظر الى طبقها قائله :
- عرفت ان لبسى مكنش صح .. و "آيات" اتكلمت معايا كتير .. وامبارح
خلتني أجرب لبسها .. وحسيت انى مرتاحه فيه
ثم قالت وهي شارده :
- "آيات" قالتلى انى لو لبست زى ما ربنا أمرنى .. ولو حظيت فى نيتى
وأنا خارجه من البيت انى بلبس كده عشان ربنا وعشان أسمع كلامه ..
باخد ثواب طول ما أنا بره البيت .. أكنى بعمل عبادة بالظبط
ابتسمت والدتها وهي تقول بحنان :
- أنا فرحانه أوى بكلامك ده يا "أسماء" أول مرة أسمعك تتكلمى كده ..
وكمان "آيات" حسه ان البنت دى اتغيرت كتير
ابتسمت "أسماء" قائله :

- هي فعلاً اتغيرت .. بس فضلنا نحب بعض زى الأول .. ولسه صحاب زى الأول ويمكن أكثر كمان من الأول نظر اليها والدها وتحنح قائلاً :
- انتوا ناوية على ايه يا "أسماء" .. هتكلمى شغلك هنا فى القرية ولا هترجعى معانا القاهرة تنهدت "أسماء" ثم قالت :
- من ساعة ما جيتوا وأنا بفكر فى الموضوع ده ثم قالت بحزم :
- أنا عايزه أرجع معاكوا القاهرة ابتسمت أمها وهي تربت على ظهرها قائلة :
- يا حبيبتي .. أنا كمان كنت حبه انك ترجعى معانا اتسعت ابتسامه "مدحت" وهو يقول :
- خلاص يبقى بكرة ان شاء الله نتوكل على الله ونرجع القاهرة شردت "أسماء" وهي تنظر من نافذة المطعم بجوارها .. أخذت تتسائل فى نفسها .. ترى هل ما تفعله صواب؟! .. أترحل أم تبقى؟! .. ظل السؤال يتردد بداخلها وقد منعتها حيرتها من ايجاد الجواب المناسب !

كم كانت صدمة "أسماء" كبيرة عندما أخبرها والدها بحديث "على" معه .. استمعت اليه بلهفة وهو يقول :
- الشاب ده باين عليه محترم .. المهم هو قالى انه حابب يتكلم معاكى الأول فى شوية حاجات لو ارتحتوا انتوا الاتنين هيتوكل على الله ويجيب أهله .. ولو مفيش راحه خلاص كل شئ نصيب .. قولتى ايه يا "أسماء" كادت "أسماء" أن تسقط مغشياً عليها من فرط حماسها .. قالت بحماس :
- ماشى يا بابا
- طيب يا بنتى هو حابب نعد بره فى أى مكان .. يعنى مش حابب ان حد يعرف الموضوع دلوقتى قبل ما تتكلموا مع بعض .. حتى أمك أنا ما قولتلهاش
- ماشى يا بابا مفيش مشكلة شعرت بدقات قلبها عالية معلنة عن سعادتها .. سألت نفسها .. أحقاً طلب على من والدها الحديث معها .. لماذا لم يطلب منها هي .. بالتأكيد لم يرد أن يتخطى والدها .. هكذا هو .. يعرف الأصول جيداً .. يخشى أن يخطئ

فى أفعاله وتصرفاته .. ارتسمت ابتسامه حاله على شفيتها .. وهى
تستعد لذاك اللقاء .. لم تخبر "أسماء" هو "آيات" التى قالت بإبتهاج :
- طيب كويس .. بشرة خير .. يارب تملها الموضوع على خير يارب
قالت "أسماء" بلهفه :

- يارب .. يارب

ثم سألت "آيات" :

- ايه أخبار أخوكى دلوقتى

قالت "آيات" الحمد لله :

- لا الحمد لله زى ما قولتلك مفيش قضية أصلاً .. بس هما مخليينه عندهم

فى المكتب .. حتى مش مدخلينه الحجز .. عشان "عاصى" يفتكر انه

نجح فى خطته وان محدش بيشارك فيه

قالت "أسماء" بعنف :

- حسبى الله ونعم الوكيل فيه .. ده كتلة شر متحركة

قالت "آيات" بأسى :

- أنا عرفت دلوقتى ليه بابا بعد عنهم .. وليه منعى من انى أعرفهم أو

أكون على صلة بيهم

- طبعاً يا بنتى كان معاه حق انه يتبرى من أخوه وابن أخوه .. دى عالم

أستغفر الله العظيم

ابتسمت "آيات" قائله بمرح :

- سيبك من السيرة الغم دى وخلينا فى "على"

ابتسمت "أسماء" بسمة حالمة وهى تقول :

- "على" !

ضحكت "آيات" قائله :

- هنبداً ولا ايه .. لا امسكى نفسك .. أما نشوف بس الموضوع هيرسى

على ايه

شعرت "أسماء" بالحرج وهى ترى على مقبلاً عليهما .. نهض والداها
مرحباً به وتبادلا عبارات المجاملة .. ثم جلس معهم على الطاولة فى ذاك
المطعم الهادئ .. قام "مدحت" قائلاً :

- طيب هعد أنا على الترابيزة اللى جمبكوا عشان أسيكوا تتكلموا براحتكوا

ظلت "أسماء" تنظر أرضاً تنتظر أن يبدأ حديثه .. قال :

- ازيك يا آنسة "أسماء"

تمتت مبتسمة :

- الحمد لله

بدا عليه الحرج والإضطراب .. تناول رشفة من كوب الماء الموضوع

أمامه ليقلل من جفاف حلقه .. ثم قال :

- أنا حبيت أتكلم معاكى بالطريقة دي .. عشان تبقى كل حاجة ماشية صح

.. يعني محبتش ان ده يكون بدون علم أهلك .. بس نتيجة المقابلة دي

متوقفة عليكى انتى

نظرت اليه تنتظر ما سيقول فأكمل :

- ليا شروط لازم تكون موجودة فى الانسانه اللي هرتبط بيها .. لو مكنتش

مناسباكى خلاص يبقى مفيش نصيب

أومات "أسماء" برأسها .. نظر "على" اليها للحظات متأملاً .. ثم

أخفض رأسه قائلاً :

- انت ليه غيرتى لبسك ؟

صمتت ولم تجب فحضاها قائلاً :

- عشان كلامى معاكى قبل كده ؟ .. ولا عشان عارفه انك جايه تقابلينى ؟

قالت بحدة :

- لا ده ولا ده .. أنا غيرت لبسى لما اقتنعت .. ولما "آيات" اتكلمت معايا

وفضلت ورايا لحد ما اتجرات انى آخذ الخطوة دي .. مش عشانك ولا

حاجة .. ده لبسى اللي بلبسه بقالى كام يوم .. مش لابسه كده عشان

هشوفك يعني

قال "على" بصوت هادئ :

- انتى على طول منفعة كدة

تنهدت بحزن وقالت :

- لا مش دائماً .. مش عارفه .. ساعات بتترفز أيوة .. دي حاجة وحشة

صح ؟

ابتسم "على" وقال :

- أكيد يعين مش هقولك دي حاجة حلوة

قالت "أسماء" مبتسمة :

- ايه بأه المواضفات ما قولتليش

اختفت ابتسامته وقال بجدية :

- الل أنا عايزها زوجة تكون عارفه كويس يعني ايه زواج ومسئليه ..

زوجة عارفة حقوقها الزوجية وعارفه كمان واجباتها .. زوجة تبقى

مستعدة انها تعيش معايا على قدر امكانياتي .. لحمد لله أنا دلوقتي بقبض مرتب محترم .. بس مهما كان لسه فى بداية حياتى .. عايز واحدة تلتزم بكلام ربنا اللى امرها بيه .. متعندش فى الغط وتتمسك بيه .. واحدة بنت حلال وطيبة

ثم أخذ نفساً عميقاً وقال :

- وبخصوص الشغل .. أنا مش حابب أبدأ ان مراتى تشتغل نظرت اليه صامته فأكمل :

- هتقوليلى أختك ايمان بتشتغل هقولك أختى "إيمان" مسؤلة من بابا وحاليا من زوجها هما حرين مع بعض .. لكن أنا محبش ان مراتى تشتغل .. كل راجل له طباع غير التانى .. ودى طباعى .. دلوقتي أنا حابب أسمع منك .. هل اللى قولته ده مناسب ليكى ولا لأ ؟

لم تحتاج "أسماء" وقتاً للتفكير بل اتسعت باتسامتها وهى تقول :

- أنا أصلاً علف كرة محبش الشغل .. أنا اشتغلت بس لانى مضطرة عشان أصرف على نفسى .. لكن أنا نفسى زى ما انت نفسك .. انى أعد فى البيت ويبقى مهمتى بيتى وجوزى وولادى وبس ومفيش حاجة تشغلنى عنهم .. وبخصوص امكانياتك فأنا موافقة .. ومش هعترض على امكانياتك لانى نفسى فى راجل بجد أحس انه بياخد بايدي وبيعرفنى الطريق الصح .. وبعدين أى اتنين لازم يتعبوا فى بداية حياتهم وهما صغيرين .. يعين عادى .. بوعدين انت ما شاء الله عليك ناجح فى شغلك .. يعنى أحسن من شباب كثير فى سنك .. وبخصوص بأه انى انفذ كلام ربنا فأنا مش عنيدة لوا حاجة .. بس محتاجة اللى يتكلم معايا براحه والبل يفهمنى براحة من غير ما يجرحنى ومن غير ما يحسنى انى الى النار وبئس المصير .. وانت اسلوبك حلو معايا وبتكلم براحة فأكيد هسمع كلامك

ابتسم "على" وهو ينظر اليها قائلاً :

- على فكرة أنا مش هادى على طول .. أنا لما بتترفز ببقى صعب ضحكت "أسماء" قائلة :

- عارفه "إيمان" أختك قالتلى

أخفض "على" بصره دون أن تختفى ابتسامته وهو يقول :

- يعنى موافقة على كل الكما اللى قولته ومعنديش أى اعتراض عليه قالت بخجل ممزوج بالسعادة :

- لأ معنديش اعتراض

التفت "على" ونادى والدها .. ثم نهض يسلم عليه قائلاً :

- ان شاء الله هتصل بحضرتك يا أستاذ "مدحت" عشان نيحي نزوركوا
فى البيت
اتسعت ابتسامه "مدحت" وهو يقول :
- تنور يا ابنى .. أهلك راجعين امتى ان شاء الله
- بكرة ان شاء الله .. وانتوا مسافرين امتى ؟
- احنا مسافرين النهارده ان شاء الله
- خلاص زى ما اتفقنا ان شاء الله
رحل "على" فتابعته "أسماء" بعينيها وهى تشعر بسعادة كبيرة .. ما
ل "مدحت" عليها قائلاً :
- ها قوليلى ايه رأيك
نظرت اليه "أسماء" قائله :
- بصراحة هو حد محترم أوى .. انت رأيك ايه يا بابا
ابتسم قائلاً وهو يربت على ظهرها :
- أنا كمان شايف كده .. ربنا يتملك على خير

ظل "كريم" فى القسم لمدة أربعة أيام .. وفى اليوم الخامس أتت البشرى
بالقبض على "سراج" و "عاصى" بعدما أعدت لهم الشرطة كميناً
وأوقعتهم فى فخها .. تابعتهم عدسات الكاميرات للحصول على صورهم
للتكسب من وراء تلك الفضيحة فى جرائدهم .

حمد "كريم" ربه لظهور الحق ولإنتقامه من رأسى الأفعى .. شعر "آدم"
بالإرتياح فأخيراً لن يكون قلقاً من شرور "عاصى" وتهديداته .. تنهد
بإرتياح وقد شعر أن الله قد انتقم له .. وأخذ بحقه ممن ظلمه .. فها هو
"عاصى" يزوج فى السجن لأعوام طويلة .. يدفع بها ثمن شروره وأذاه
لخلق الله .. على الرغم من شعور "آيات" بالراحة الا أنها حزنت أن
يكون ذاك هو مصيرهما .. تمننت لو كان تابا اللى الله قبل أن يقبض عليهما
.. لكنهما تمادا فى ظلمهما وبطشهما حتى أخذهم الله أخذ عزيز مقتدر .

كانت تلك البشرى هى الأولى ثم .. توالى البشائر بعد ذلك .. عادت
"أسماء" مع والديها الى القاهرة .. وكذلك عادا والدى "على" الى
بيتهما فى القاهرة .. وبعد يومين سافر "على" وتقدم رسمياً بصحبة

والداه الى "أسماء" .. التي شعرت كالطير الذى ظل محبوساً أعوام عديدة
فى قفص كئيب .. وفجأة .. أطلق سراحه .. ففرد جناحيه يطير فى
السماء ..

كانت سعادة "زياد" عارمة عندما ردت "سمر" أخيراً بالموافقة لكنها
اشترطت فترة خطبة طويلة .. وألا يعقدا الا ليلة الفرح .. فتمت الخطبتين
فى خلال شهر واحد .. خطبة "على" و "أسماء" التي ظلت عند أهلها
فى القاهرة .. وعاد "على" لممارسة عمله فى القرية بينما كان يذهب
اليها مرة اسبوعياً .. وخطبة "زياد" و "سمر" .. التي ظلت فى القرية
برفقة والدتها .. وعملت فى عيادة الأطفال بعد اعادة تجديدها .

مضت شهران على تلك الأحداث السعيدة ..

وفى أحد الأيام بينما كان "آدم" فى زيارة لـ "آيات" .. قال لها بضجر :
- مش نكتب الكتاب بأه .. الخطوبة طولت أوى
قالت وهى تحاول أن تخفى ابتسامتها :
- مطولتش ولا حاجة دول 3 شهور بس
صاح بحنق :

- آه 3 شهور بس شوفت فيهم ذل سنين .. كفاية انى لا عارف ابصلك ولا
عارف أكلمك ولا عارف أعد معاكى براحتى
ثم نظر الى "كريم" الذى ابتسم وهو يتطلع الى اللاب توب الخاص به
وقال له بمرح :

- منور يا "كريم"
قال "كريم" ضاحكاً دون أن يرفع عينه عن الشاشة :
- ده نورك يا "آدم"
هتف "آدم" قائلاً :

- مش تحضرنا يا "كريم" .. اقنع أختك بأه
ابتسم قائلاً وهو ينظر اليه :

- والله دى حاجه تخصصكوا انتوا الاتنين .. انتوا اللى تحددوا معاد كتب
الكتاب

قال "آدم" بغیظ :

- آه ما انت ايدك فى المية الباردة .. نطيت مرحلة الخطوبة على كتب

الكتاب عدل

ضحك "كريم" قائلاً بمرح :
يا باى على الأر

زفر "آدم" وهو يوجه حديثه الى "آيات" قائلاً :
قولتى ايه .. نحدد بأه ؟

صمتت لتفكر فى أحداث الثلاث شهور الماضية والتي لمست فيهم تغير جذرى فى سلوك "آدم" جعلها تتناسى خوفها شيئاً فشيئاً .. بل جعلها تتناسى "آدم" القديم تماماً .. حثها قائلاً :
"آيات" .. انتى لسه خايفة .. لسه قلقانه منى ؟

قالت بخفوت :
لأ

طيب ايه ؟

نظرت الى "كريم" قائله بلؤم :

لما أطمئن على "كريم" أخويا الأول

نهض "آدم" قائلاً وهو يتظاهر بالإنصراف :

طيب لما تبقى تطمنى على أخوكى ابقى ادينى رنه هتلاقيني عندك

نظرت اليه "آيات" بحدة .. فنظر اليها قائلاً بحزم :

كلمة واحدة كتب الكتاب بعد 3 أيام

هتفت :

لأ ايه 3 أيام دى مش هلحق أعمل حاجة .. خليهم اسبوع

قفزت ابتسامه الى شفتيه وهو يقول :

ماشى اسبوع

نهض "كريم" ووقف أمامهما قائلاً بلؤم :

ها وصلتوا لايه .. سنة ولا سنة ونص

نظر اليه "آدم" بغیظ وقال ضاحكاً :

كان نفسى تبقى خطيب أختى عشان أدلك يا "كريم"

ضحك "كريم" قائلاً :

ده انت بتحبنى أوى باين عليك

أوى أوى

نظر اليهما "كريم" قائلاً بسعادة :

بارك الله لكما وبارك عليكما وجمع بينكما فى خير

بعد شهرين ..

هبّت النسّمات المنعشة القادمة من اتجاه البحر لتلفح وجوه ذلك الثنائى الجالس على رمل الشاطئ مستنداً بظهره الى احدى الصخور الكبيرة .. كان الشاطئ خالياً الا منهما .. تعالت أصوات الأمواج فى سيمفونية عذبة تطرب سامعها ليسبح معها فى عالم آخر .. تركزت أنظار الثنائى على قرص الشمس الذى أخذ فى الغروب شيئاً فشيئاً راسماً لوحه فنية من ألوان الطيف تسبح فى السماء الزرقاء لتختلط ألوانها بزرقة السماء فتضفى عليها حرارة اللقاء .. نظر " آدم " الى " آيات " التى أحاطها بذراعه واستندت برأسها الى صدره وقال :

- تعرفى انى بعشق منظر الغروب

رفعت رأسها ونظرت اليه قائله :

- أنا كمان بحبه أوى .. دايماً كنت بشوفه فى حلمى

ابتسم وهو يمسخ بأصابعه على وجنتها قائلاً :

- حلمك ؟

أومأت برأسها مبتسمة .. فسألها :

- كنتى بتحلمى بيايه ؟

ضحكت ضحكة خافته ونظرت الى عينيه تسبح فى بحارهما قائله :

- كنت بحلم بأرض خضرا كبيرة وواسعة والشمس بتغرب فى السما ..

وفجأة يظهر حصان من بعيد وعليه فارس .. يبجي يقف أدامى ويمدلى

ايدو ويركبنى وراه ويطير بيا

رفع حاجبيه فأكملت بحب :

- مكنتش لاقية الفارس بتاعى .. بس دلوقتى لقيته

قبل وجنتها قائلاً :

- واثقة انك لقيتيه

أومأت برأسها بثقه .. فابتسم لها تلك الإبتسامة الساحرة التى لطالما

خطفت لبها وقال :

- وأنا كمان لقيت فتاة أحلامى .. اللى مش ممكن هسمح انها تضيع من

ايدي تانى .. واللى هعمل كل اللى أقدر عليه عشان أسعدها وعشان

أنسيها أى اساءة وأى جرح جرحتهولها

وضعت أصابعها على شفتيه وعقد حاجبيها وهى تقول :

- بلاش نتكلم عن اللى فات .. أنا نسيت خلاص

قبل أصابعها قائلاً :

- بجد .. يعني سامحتيني من قلبك
أومات برأسها مبتسمة .. قال بحنان :
- عارفه كنت هتجنن لما كنتى بترفضيني ومش قادرة تسامحيني .. كنت
خايف أوى مترضيش تردعيلى تانى .. مكنتش عارف ازاي هكمل حياتى
من غيرك .. من غير ما تكونى فيها .. لما عرفت ان "أحمد" اتقدمك
خفت أوى .. خفت توافقى عليه .. كنتى هتبقى قتلتيني بجد
نظرت اليه تتطلع الى عينيه بحب .. فهمس لها وهو يتحسس وجهه بلهفة

:
- لما كنت فاكرا انى دفنتك .. الأيام دى من أصعب الأيام اللى مرت عليا فى
حياتى .. لما شوفتك تانى .. صدقتش نفسى .. حسيت ان روى رجعتلى
.. حسيت ساعتها ان مش ممكن هقدر أبعد عنك أبداً .. حسيت انك لازم
تكونى ليا

نظرت اليه بتأثر .. نهض فجأة قائلاً :

- يلا قومى

نظرت اليه بدهشة قائله :

- هنروح فين ؟

جذبها من ذراعها ليووقفها ونفضا ملابسهما من رمل الشاطئ وأمسك يدها
وسار بها وهى لا تعلم الى أين يأخذها .. توجه بها الى المساحة الخضراء
المشتركة بين الثلاث قرى .. ودخل اسطبل الخيول لينتقى جواداً .. نظرت
اليه "آيات" بدهشة وقالت :

- "آدم" بتعمل ايه ؟

لم يجيبها بل عدل من وضع السرج على الجواد وجذبها من يديها يوقفها
فى بداية المرج الأخضر .. ثم اعتلى الجواد .. وحته على الركض فى
اتجاه قرص الشمس الذى أصبح يظهر منه الآن أقل من نصفه .. نظرت
اليه "آيات" وهو يبتعد أمام عينيها .. ركض بعيداً ثم توقف .. والتفت
تجاهها .. اتسعت ابتسامها وضحكت بمرح وهى تراه مقبلاً نحوها على
صهوة جواده .. تعالت ضحكاتهما كلما اقترب أكثر .. لمعت عينيها بسعادة
عندما توقف أمامها يمد يده اليها مبتسماً .. قالت ضاحكة :

- انت بتعمل ايه ؟

لم يجيبها بل ظلت يده ممدودة اليها حتى سلمته كفها .. قربها من الجواد
فألت بحيرة :

- مش هعرف أطلع

ابتسم قائلاً:

- متخفيش هساعدك

حاولت .. فلم تستطيع نظرت اليه ضاحكة بخجل وقالت :

- خلاص يا "آدم" مش مشكلة

أصر على انجاح محاولة اصعادهما خلفه على ظهر الجواد .. حتى استطاعت ركوبه أخيراً ساعدها على ذلك ملابسها الفضفاضة من الأسفل التي سترتها دون أن تتكشف .. نظرت حولها من ذلك الارتفاع وأمسكت به قائله بخوف :

- أنا خايفة

مد ذراعيه الى الخلف وأمسك بذراعيها ولفهما حول خصره والتفت اليها قائلاً :

- متخفيش امسكى فيا كويس

أحاطته بذراعيها و .. قبل أن ينطلق التفت اليها بعينان تشعان حباً وهمس بحنان :

- بحبك يا "آيات"

نظرت اليه وقلبهما يخفق بقوة .. تعلقت بعينه هامسه :

- بحبك يا "آدم"

ظلت أعينهما معلقة ببعضهما البعض للحظات .. تتحدث خلالها العيون بحديث لطالما اشتاقت اليه .. وتشاركها دقات القلب فى الحديث معلنة عن حباً تهفو اليه القلوب .. تسمع صوت تنفسه المضطرب ويسمع صوت تنفسها الدؤوب .. رسمت نبضات قلبه لوحة من حبه الذى حبسه طويلاً بداخله .. والذى اشتاق أن يبثه اياها .. فترجم قلبها ذلك الرسم ونبض هو الآخر ليرسم لوحة مماثلة تهديها اياه .. ثم .. انطلق بها .. تزايدت نبضات قلبها خوفاً .. فإقتربت منه أكثر .. ثم ما لبثت أن اطمئنت بقربه .. داعبت الرياح وجهها بنعومة .. نظرت من خلف كتفه الى قرص الشمس الذى غرب بالكاد .. والى المساحة الواسعة من النجيلة الخضراء والى فارسها الذى تحطيه بذراعيها .. تماماً كحلمها .. اتسعت ابتسامتها .. أغمضت عينيها فى سعادة تستمتع بتلك اللحظة التى انتظرتها طويلاً .. فأخيراً وجدت لحلمها فارساً نبيلاً .



عمرته السعادة و الفرحة .. ودق قلبه معلناً شغفه ولهفته لبدء حياته الجديدة .. مع تلك الزوجة التي اختارها من بين ملايين النساء .. كانت مواصفاته لزوجته المستقبلية معروفة ومحددة .. فهو رجل يعرف جيداً ما يريد .. عمل بقول النبي صلى الله عليه وسلم "فاظفر بذات الدين تربت يداك" .. فإختارها تعرف ربها ..

وتمتثل لأوامره وتجتنب نواهيه .. فرأى فيها الزوجة الصالحة التي تعينه فى أمور دينه وديناه .. قذف الله بحبها فى قلبه .. ذلك القلب الذى حماه طيلة عمره من أن يخفق لإمرأة لا تحل له .. حماه كما حمى بصره من رؤية الحرام والتلذذ به كغيره من الشباب فى سنه .. ولذلك كافأة الله الآن بزوجة لا يرى فى الوجود سواها .. أحبها بأكثر مما كان يتمنى .. فكان حبها فى قلبه وحبها فى قلبها هو بركة تعفهما عن الحرام .. هى أيضاً صانت مشاعرها وعواطفها .. لم تسمح لأحد بأن يدخل قلبها .. حفظته لزوجها الذى لم تكن تعلم عنه شيئاً .. حفظته من أجل أن تهبه إياه وهو غاية فى النقاء .. دون أن يلوثه حب محرم يدخل قلبها فينشر به سواداً يطفى بريقه اللامع .. فكافأها الله برجل من خيرة الرجال .. رأت فيه الزوج الصالح .. والحبیب الوفى .. خفق قلبها له كما لم يخفق من قبل .. واستعدت لليلة زفافها بفساتها الأبيض ناصع البياض كقلبها وقلبه . وفى جو من البهجة والسرور أعلننا للدنيا بأسرها أنهما زوج وزوجة يجمعهما ذاك الرباط المقدس .. وهما يدخلان عشهما السعيد وسط فرحة الأهل والصحب .. أمسك "كريم" برأس "إيمان" بين راحتيه وقبل جبينها قائلاً :

- اللهم اجعلنى خير زوج لخير زوجة

رفعت "إيمان" كفيها لتضعهما على كفى "كريم" الممسكتان بوجهها
همست له :
- اللهم اجعلنى خير زوجة لخير زوج

ترأس "آدم" ادارة القرية فى غياب "كريم" الذى استغرق اسبوعين ..
استقبله الجميع بالتهانى والدعاء بالبركة فى زواجهما .. ترأس "كريم"
اجتماعاً هاماً حضره "آدم" و "على" و "زياد" .. أرادت "آيات"
حضور ذاك الاجتماع لكن "آدم" قال لها بحزم :
- ازاي يعنى تحضرية .. أكيد مرأة "كريم" مش هتحضر .. تبقى البنت
الوحيدة اللى أعد وسطينا .. ازاي يعنى
قالت باستنكار :
- ما انت و "كريم" موجودين
قال "آدم" بحزم :
- لا يا "آيات" برده مينفعش .. هبقى أقولك على اللى حصل فى الاجتماع
رغم ضيقها لعدم سماحه لها بالحضور إلا أنها لا تنكر السعادة التى
شعرت بها وهى تستشعر غيرته عليها
قال "كريم" باستغراب :
- آخر حاجة كنت متوقع ان "شكرى" يعملها
قال "آدم" بثقه :
- لا على فكرة أنا مستغربتش .. "شكرى" أولاً وأخيراً رجل أعمال يعنى
اللى عمله ده متوقع جدا
قال "زياد" باستنكار :
- أيوة يا "آدم" بس بصراحة أنا متوقعتش أنا كمان .. يعنى لما قل معدل
الشغل عنده والحجوزات .. توقعت انه يعمل زى ما كان "عاصى" بيعمل
ويغوط أوى فى السكة اللى هو عارفها .. لكن يقفل الملهى ويقلبه صالة
ألعاب وكمان يمنع الخمرة من القرية ويفصل بين الرجالة والسنتات فى
حمامات السباحة .. دى آخر حاجة توقعت ان "شكرى" يعملها
نظر اليه "آدم" قائلاً :
- زى ما قولتك يا "زياد" .. "شكرى" رجل أعمال .. أهم حاجة عنده
المكسب والخسارة .. لما لقي ان فكرة القرية الحلال هى اللى بتكسب
وبتجيب دخل ممتاز .. قرر انه يمشى على النظام اللى احنا ماشيين عليه
قال "على" ساخراً :

- بس لسه سامح للستات انهم يلبسوا بكيني على البيلاج
قال "آدم" :

- وده أكبر دليل انه بيحاول يعمل أى حاجة عشان يزود دخل مش أكثر ..
يعني مش فكرة حاجات حرام بيمعنها خوف من ربنا .. لا هو حاول يعمل
حاجة وسط بين القرية الحلال والقرية بتاعته .. يعنى من الآخر حب
يرضى جميع الأذواق

قال "كريم" وهو يخط خربشات على الأورق أمامه :
- أهو ده معنى حديث النبي صلى الله عليه وسلم "إنما الأعمال بالنيات"
.. احنا نيتنا اننا نبعد عن الحرام عشان منغضبش ربنا علينا .. فبجانب
الكسب المادى لينا ثواب عند ربنا .. لكن هو نبتة انه يكسب أكثر ويرضى
الناس وأذواق الناس .. وكده ملوش أى أجر عند ربنا
قال "على" وهو يومئ برأسه :

- فعلاً معاك حق يا "كريم" .. ياريت يا شباب نجدد نيتنا دائماً .. انها
تكون خالصة لوجه الله .. عشان ميفتناش الأجر ده
قال "زياد" ضاحكاً :

- ألد حاجة فى الموضوع اننا خلصنا من التهمة اللى اسمه "عاصى" ده
هو وأبوه .. من يوم ما اتحبسوا والقرية حالها كرب خاصة بعد ما جت
مراته وبنته يديروا القرية .. زودوا الطينه بله
ثم صاح بمرح :

- أنا من الاول بقول الحريم دول يحطوا بس ايديهم فى أى حاجة تتخرب
على طول .. أهو اللى فشل أعداء "سراج" و "عاصى" انهم يعملوه فى
سنين .. جت مراته وبنته وعملوه فى أربع شهور
نظر اليه "على" قائلاً:

- أنا سمعت انهم هيلغوا العقد مع الشركة اللى مأجرين منها القرية
هتف "زياد" :

- يكون أحسن برده .. يلا سكة اللى يروح ميرجعش

فى مطعم القرية .. نظرت "آيات" الى "آدم" لتجده شاردًا مقطب الجبين
يتناول طعامه بروتينيه .. سألته باهتمام :

- سرحان فى ايه؟

أفاق من شرود قائلاً :

- لا أبداً

أكمل تناول طعامه .. فالت "آيات" بحنان :

- هو انا مش عارفك يعني .. فى حاجة شغلاك ومضايقاك كمان
قطب جبينه مرة أخرى وقال وهو يلعب بالطعام أمامه بطرف شوكتة :
- كان نفسى ظروفى تكون أحسن من كده .. كان زمانا متجوزين دلوقتى
وعايشين فى بيت واحد
وضعت كفها على كفه الموضوع فوق الطاولة وهى تنظر ايه بحنان قائله
:

- الحمد لله احنا أحسن من ناس كتير يا "آدم" .. وانا شاء الله الوضع
يتحسن

تنهد "آدم" بضيق ثم نظر اليها قائلاً :

- أنا الفلوس اللى حوشتها متكفيش أى حاجة يا "آيات" .. أنا محتاج
سنين عشان أقدر أشتري شقة وأفرشها
ابتسمت قائله بمرح :

- يعني هو ازم يعنى يا دكتور "آدم" نعيش فى شقة ملك .. ما نأجر شقة
ايه المشكلة يعنى .. ولما ربنا يفتحها علينا نبقى نشترى شقه
قال "آدم" بضيق :

- وفرش الشقة .. ده لوحده محتاج مش أقل من سنة سنة ونص تحويش
قالت له "آيات" على الفور :

- مش لازم كل حاجة تبقى على سبعة عشرة يا "آدم" .. يعنى مش لازم
نختار أعلى حاجة واقيم حاجة .. لو فكرنا بالطريقة دى يبقى هنستنى
سنين زى ما بنقول

نظر اليها بأسى وقال :

- نفسى يا آيات "أجبتك كل اللى نفسك فيه

ابتسمت له بحب ونظرت اليه بعينان شغوفتان وهى تقول :

- وأنا نفسى فى شقة صغيرة حتى لو ايجار .. وعفش على أدنا لحد ما
ربنا يرزقنا نبقى نغير كل حاجة يا "آدم"

أحاطها كفها بين كفيه واقترب منها ينظر اليها بشغف قائلاً :

- بحبك

ابتسمت بعذوبه وهمست :

- وأنا بموت فيك

ابتسم لها بحنان وقال :

- متقلقيش يا حبيبتي ان شاء الله ظروفنا هتكون أحيان

اتسعت ابتسامتها وهى تقول :

- مش قلقانه .. أنا واثقة ان ربنا هيكرنا أوى يا حبيبى

عادت "آيات" الى الشقة لتجد "زياد" جالساً مع "سمر" ووالدتها ..
دخلت غرفتها .. بدلت ملابسها ووقفت فى الشرفة قليلاً .. ثم ما لبثت أن
اندفعت "سمر" تفتح باب الغرفة وناتها قائله :
- "آيات"

خرجت "آيات" من الشرفة لتتنظر الى وجه "سمر" الذى ينطق فرحاً ..
اقتربت منها "سمر" وقالت بحماس الأطفال وهى تضم كفيها معاً :
- خلاص حددنا معاد الفرح
نظرت اليه "آيات" بدهشة وهتفت :

- بتهرجى

أطلقت "سمر" صيحة سعادة وهى تقول :

- لا والله بتكلم بجد

اتسعت ابتسامه "آيات" وعانقتها قائله بسعادة :

- مبروك يا حبيبتي مبروك فرحتك أوى أوى يا "سمر" .. أنا مش
مصدقة

نظرت اليها "سمر" وقالت بإبتسامه واسعة :

- أنا اللي مش مصدقة .. أنا اشترطت على "زياد" خطوبة طويلة .. بس
بجد أنا طول الشهور اللي فاتت وأنا كل ما أعرفه أكثر كل ما بحس براحه
أكبر .. ولما كلمنى دلوقتى فى الفرح كان متوقع جداً انى هرفض .. فوجئ
انى بقوله انى موافقة بس هستخير الأول .. حسيت انه طاير من الفرحة
ضحكت "آيات" قائله :

- بركاتك يا "زياد"

ابتسمت "سمر" بتأثر وقالت :

- عارفه يا "آيات" .. ساعات كنت بتخيل انى مش ممكن هتجوز أبداً ..
مش ممكن هقدر أثق فى حد أبداً .. بس "زياد" معرفش ازاي قدر يخلينى
أطمئنه أوى كده .. يمكن عشان هو فعلاً انسان طيب أوى .. وبسيط أوى
.. وواضح أوى .. من النوع اللي تقدرى تفهميه من أول مقابلة .. لا هو
غامض ولا هو كتوم .. بالعكس شخصيته واضحة وصريحة وده اللي
خلانى أثق فيه وأطمئنه

قالت "آيات" بسعادة :

- ربنا يتملك على خير يا "سمر"

ثم قالت :

- بارك الله لكما وبارك عليكما وجمع بينكما فى خير

تم تحديد موعد كتب كتاب "على" و "أسماء" قبل موعد زفاف "زياد" و "سمر" .. كان يوماً بهيجاً .. أصر "على" على كتب الكتاب في قاعتين للأفراح .. فلعله أراد أن يدخل السرور على قلب "أسماء" التي يعلم أنها لاقت الكثير من المآسى طوال حياتها .. وبالفعل كانت "أسماء" في ذاك اليوم من أسعد ما يكون .. أحاطتها "مديحة" بذراعيها بأعين دامعة وهي تبسم بسعادة .. التف حولها صديقاتها "آيات" و "إيمان" و "سمر" .. اللاتي كن يدللنها ويمرحن معها فأضفين جو من البهجة زادها سعادة فوق سعادتها .. كذلك أم "على" دمعت عيناها وهي تقبل عروس ابنها .. أحببتها "أسماء" بشخصيتها الطيبة البسيطة .. كذلك أحببتها أم "على" .. فهي صارت الآن زوجة فلذة كبدها .

عادت "مديحة" الى البيت مع "مدحت" و العروس السعيد "أسماء" .. التي قضت ليها ساهرة تتحدث في الهاتف لأول مرة مع زوجها وحببيها "على" .. جلست "مديحة" فوق فراشها تلمع عيناها بالدموع .. اقترب منها "مدحت" قائلاً :

- الحمد لله اليوم عدى على خير .. عقبال ما نوصلها بيتها ان شاء الله زرفت "مديحة" العبرات وهي تقول :

- هتوحشنى أوى يا "مدحت"

ابتسم وهو يربت على ظهرها قائلاً :

- دى سنة الحياة يا "مديحة" .. وبعدين العين السخنة مش بعيد دى كلها 3 ساعات ونكون عندها

تنهدت "مديحة" وهي تقول :

- لولا انى حبيت خطيبها فعلاً وشايفاه راجل بجد .. مكنتش خليتها تسافر .. من يوم ما رجعتلى تانى وأنا حسيت انى ضيعت سنين وأنا عامله فجوة بيني وبينها .. كان لازم أقرب منها أكثر .. هى بنتى وملهاش حد غيرى .. ياريت كنت خدتها فى حضنى من زمان .. أكيد مكنش حصلها ده كله ولا كانت نفسيتها تعبت كده

قال "مدحت" بوجوم :

- أنا كمان قصرت معاها .. بس أدينا بنتعلم من أخطائنا .. وربنا ادانا فرصة تانية نقرب من بنتنا ونحسها اننا أهلها بجد .. سبحان الله الواحد مبعرفش قيمة الحاجة اللى ربنا كارمه بيها إلا لما بتضيع من ايده

نظرت اليه "مديحة" وقالت :
- تفكر ممكن نكمل حياتنا مع بعض يا "مدحت" وتبقى حياة هادية .. ولا
الشهور اللي فاتت دي حلم هنصحى منه ونرجع تانى زى ما كنا
نظر اليها "مدحت" قائلاً بحزم :
-بصى يا "مديحة" الحواز ده شركة بين اتنين .. وعشان الشركة دي
تنجح لازم الاتنين تكون ايديهم فى ايدين بعض .. مينفعش واحد يبني
والتانى يهدم .. مينفعش واحد يحاول انه يصلح والتانى واقف محلك سر
.. لو حطيتي ايدك فى ايدك وعاهدتيني اننا نراعى الشركة دي على أد ما
نقدر .. أكيد مش هنرجع لمشاكلنا القديمة اللي كانت كلها بسبب ان كل
واحد شايف نفسه صح وبيرمى على الغلط على التانى
قالت "مديحة" وهى تمسك بيده :
- أوعدك انى هحاول على أد ما أقدر الشركة دي تنجح .. بس انت كمان
اوعدنى انك متعملش الحاجات اللي بتضايقني منك
ضحك قائلاً :
- انتى عايزه الحاية كلها بمبى ولا ايه .. أكيد هضايقك وتضايقيني .. أهم
حاجة اننا نحط خطوط حمرا فى التعامل بينا محدش مننا يتخطاها .. لازم
نحترم بعض يا "مديحة" حتى فى خلافاتنا مع بعض
أومأت برأسها وابتسمت قائلاً :
- وأنا موافك على كل اللي قولته يا "مدحت"

جلس "آدم" شارداً فى مكتبه .. لا يفتر لسانه عن ترديد :
- أستغفر الله
يعلم جيداً أنها مفتاح الرزق .. تمنى لو تمر الأيام سريعاً ليستطيع توفير
عش الزوجية ويتم زفافه على عروسه التى اشتاق لقربها .. أخذ يفكر فى
حلول عديدة يستطيع بها زيادة دخله ليسبق الزمن ويقلل من تلك الأيام
التي تفصله عن حلمه .. سمع طرقات على الباب فاعتدل فى جلسته وأذن
للطارق بالدخول .. دخل "كريم" بإبتسامته العذبة قائلاً :
- فاضى شويه
أوماً "آدم" برأسه .. جلس "كريم" قبالته ونظر اليه قائلاً :
- بص يا عم "آدم" .. انت بتعتبرنى أخ ليك ولا لأ
قال "آدم" على الفور :
- طبعاً يا "كريم" .. ده انت أكثر من أخ .. وبصرف النظر عن انك أخو

"آيات" فربنا يعلم أنا بحبك ازاي وبحترمك ازاي .. وبجد بعترك مثل
أعلى ليا

ابتسمي "كريم" قائلاً :

- ربنا يكرمك يا "آدم" .. لو اللي بتقوله ده مطبوط فعلاً يبقى هتوافقني
على طلبى

نظر اليه "آدم" بإهتمام وقال :

- أمر يا "كريم"

قال "كريم" بخفه :

- الأمر لله .. بص بأه .. قبل ما تكون انت أخويا ف "آيات" أختي الملزومة
منى .. أنا عارف اننا متكلمناش فى أى تفاصيل مين عليه ايه وقسمنا
الجهاز بينا زى ما الناس بتعمل .. انت متكلمتش فى الموضوع ده ولا
حددت أى حاجة

قال "آدم" بحرج :

- عارف انى متكلمتش فى الموضوع ده بس مش زى ما انت فاهم .. أنا
نفسى أنا اللي أجيب لـ "آيات" كل حاجة .. وبعدين يا "كريم" انت أكثر
واحد عارف ان المفروض كل حاجة تبقى على الراجل مش الست .. زمان
لما كان الصحابة بيتجوزوا مكنش حد بيطلب من مراته انها تشاركه فى
الجهاز .. كان بيجهز بيته على أد مقدرته .. وبصراحة أنا شايف انى
حابب أعمل كده مع "آيات" .. ان جابت هى حاجات فى البيت أهو بيتها
.. تجيب اللي هى عايزاه .. لكن محبش ألزمها بحاجة وأقولها عليكى كذا
وعليا كذا

اتسعت ابتسامه "كريم" قائلاً :

- على فكرة أنا فاهم كلامك ده كويس .. وعارف انك متكلمتش فى حاجة
عشان كده .. بس اللي عايزه أقولها لك انى حابب أهادى "آيات"

نظر اليه "آدم" وقد عقد جبينه فأكمل "كريم" :

- الشقة اللي جمبى فاضيه .. وأنا هخدتها لـ "آيات"

قال "آدم" بحزم وتقطبة جبينه فى تزايد :

- مفيش مشكلة هاديها زى ما انت عايز .. بس الشقة دى مستحيل نعيش
فيها أنا وهى .. أنا اللي هجيب الشقة لـ "آيات" حتى لو ايجار

تنهد "كريم" قائلاً :

- انت بتعمل فرق ليه

قال "آدم" بحزم شديد :

- مش بعمل فرق بس معلش يا "كريم" الموضوع ده منتهى بالنسبة لى

قال "كريم" بعد تفكير :

- طيب المبلغ اللي كنت هحطه فى الشقة أنا ههديها بيه .. وتجيئوا كل اللي ناقصكوا

قال "آدم" بضيق :

- ودى برضة مرفوضة .. مش هخليها تفرش هى الشقة وأنا يبقى مليش لازمه خالص كده

هتف "كريم" :

- حيرتنى معاك .. طيب ايه يرضيك

قال "آدم" :

- "كريم" اقل الموضوع ده أحسن لانه منتهى بالنسبة لى

نظر اليه "كريم" قائلاً :

- طيب عندى فكرة .. خذ انت المبلغ على سبيل السلف وابقى ردهولى فى الوقت اللي يريحك

فكر "آدم" قليلاً وهو مقطب الجبين ثم هز رأسه نفيماً وقال :

- لأ برده

هتف "كريم" :

- يا "آدم" متبقاش عنيد .. أقولك .. امضيلي وصل أمانه

نظر اليه "آدم" باهتمام فقال "كريم" :

- أظن كده مناسب .. امضيلي وصل أمانه أثبت حقى بيه .. وابقى ادفع فى المعاد اللي يريحك

تنهد "آدم" وبعد تفكير لفترة قال وهو يرفع حاجبيه بحزم :

- أنا ممكن أخذ الفلوس بشرط واحد .. هكتبك وصلات أمانه مش وصل

واحد .. كل وصل بمعاد محدد للدفع وبمبلغ محدد .. يناسبك كده

أوماً "كريم" برأسه مبتسماً وهو يقول :

- أيوة مناسبنى

أخرج "كريم" دفتر شيكاته ودون بياناته ثم أعطاه الى "آدم" الذى مزقه

فوراً وهو يقول :

- ده لأ المبلغ ده كبير

تنهد "كريم" وهو ينظر اليه بغيظ .. ثم دون بيانات أخرى وأعطاه لـ

"آدم" الذى نظر اليه بعين الرضا .. ثم اخرج عدة أوراق وكتب وصولات

الأمانه وسلمها الى "كريم" .. ثم نهض والتف حول المكتب معانقاً اياها

قائلاً بإمتنان :

- تسلم يا "كريم" .. انت فعلاً راجل جدع أوى

ابتسم له "كريم" وقال :
- يا عم متقولش كده .. ربنا يوفقكوا ويتملكوا بخير
خرج "كريم" من مكتب "آدم" الذى اتسعت ابتسامته وظل يحمد الله
بلسانه وقلبه وكل جوارحه .. خرج "كريم" ينظر الى وصولات الأمانه ..
ثم .. مزقها الى قطع صغيره وألقاها مبتسماً فى أول سلة قمامة قابلته !

جلست "سمر" ليلة عرسها تنظر الى فستان زفافها الأبيض الطويل
وعيونها تلمع بعبرات خفيفه وبتسامه صغيره على ثغرها .. علقته فى
مكان مرتفع حتى لا يتكرمش ثم دخلت الى فراشها بعدما شربت كوباً من
اللبن الدافئ .. نظرت الى فستانها بفرح .. ثم ما لبثت أن اختفت ابتسامته
اتدرجياً ولمعت العبرات فى عينيها أكثر .. حتى كانت عيناها كبنر فاض
بمائه على ما حوله .. مسحت عبراتها بأصابعها وهى تحاول تمالك نفسها
دون جدوى .. فتحت أمها الباب فجأة مبتسمة وهى تقول بمرح :
- "سمر" .. أنا ..

تجمدت ابتسامتها على ثغرها وهى تنظر الى "سمر" الباكية .. اقتربت
منها بلوعة وقالت :

- "سمر" مالك .. اتخانقتى انتى و "زياد" ؟

هزت رأسها نفيماً .. وهى تحاول أن تهدئ من روعها .. جلست أمها
بجوارها وقالت وهى تمسح عبراتها بيدها :

- أمال مالك يا حبيبتي

قالت "سمر" بصوت مرتجف وهى تضم قدميها الى صدرها :

- كان نفسى بابا هو اللى يكون وليى ... ويكون موجود يوم فرحى .. حسه
ان مليش حد .. كان نفسى هو اللى يسلمنى لـ "زياد" ويقوله خلى بالك
من بنتى .. متزعلهاش .. متضايقهاش .. كان نفسى أشوف الفرحة فى
عنيه .. ويعيط ويقولى هتوحشيني يا "سمر"

أنهت كلامها لتجهش فى بكاء حار وهى تهتف :

- لكن أنا مش فارقه معاه أصلاً .. مش فارقه حتى انه يشوفنى ولا يظمن
عليا .. خلفنى ليه طيب .. خلفنى ليه ؟

لم تتمالك أمها نفسها هى الأخرى ووضعت كفها على فمها لتجهش هى
الأخرى فى البكاء .. قالت "سمر" بصوت باكى يئن ألماً :

- عارفه رغم كل السنين اللى فاتت دى .. أنا لسه عندى أمل انه فى يوم
قلبه يحن ويسأل عليا .. عارفه لو جالى وقالى سامحيني أنا هعمل ايه ؟

نظرت اليها أمها لترى ذاك الألم الذي ينطق به وجه "سمر" ودموعها المتساقطة وهي تقول بمرارة :

- هسامحه .. والله هسامحه .. وهنسى كل حاجة .. بس هو ييجى بس .. أو حتى يسأل عليا .. ده ميعرفش حتى إذا كنت عايشة ولا ميتة تنهدت أمها بقوة عليها تطفئ من تلك النيران التي شعرت بها داخل صدرها .. ثم نظرت الى "سمر" بتردد .. بخوف .. بألم .. بخجل .. بضيق .. بحنان .. بأسف .. وقالت :

- لأ عارف

توقفت "سمر" عن البكاء لتنظر اليها دون فهم .. فأكملت أمها بصوت مرتجف :

- عارف انك عايشة .. وانك كبرتى ودخلتى المدرسة .. ومش ناقصك حاجة

اتسعت عينا "سمر" فى محجريهما بشدة .. وفغرت فاهها فى دهشة وقد شلت الصدمة لسانها .. لحظات وبلعت ريقها وهي تقول بلهفة :

- يعني ايه .. وهيعرف منين .. مش فاهمة .. وانتى عرفنى منين .. انتى بتقولى ايه

قالت أمها وهي تغالب عبراتها :

- أبوكى اتصل بيا يظمن عليكى يا "سمر"

أمسكتها "سمر" من ذراعها بقوة وهي تهتف بلهفة :

- ماما انتى بتقولى ايه .. ازاي يعني .. بابا بيكلمك وانتى بتكلميه .. ازاي يعني .. ماما فهميني أبوس ايدك هتفت أمها بألم وهي تعاود بكائها :

- أبوكى المحترم بعد ما سابنى وسابك وسافر منعرفش عنه حاجة رجع افكر بعد 15 سنة غياب ان عنده زوجة وبنت .. اتصل على تليفون البيت القديم الى كنا عايشين فيه .. حاول يعتذر ويتأسف كان ممكن أسامحه بس

.....

ثم هتفت بغضب ومرارة :

- لقيته بيقولى انه اتجوز واحدة من البلد اللي كان عايش فيها .. وخلف منها كمان .. وقالى وقتها انه رجع مصر هو ومراته وولاده وعايز يشوفنى ويشوفك

اتسعت عينا "سمر" وهي تسمع مصدومة الى اعتراف والدتها التي أكملت بحدده :

- طبعا رفضت وقولته مستحيل أخليك تشوفنى ولا تشوف بنتك .. حاول

كثير واطرجاني كثير .. بس احنا كنا خلاص ظبطنا حياتنا من غيره ..
ومعدلوش وجود بينا
هتفت "سمر" بحدده :

- ليه ما قولتليش يا ماما .. ليه لما اتصل بيكي ما قولتليش
قالت والدتها بغضب هادر :

- أقولك ليه .. ده واحد باعنى وباعك وراح عاش فى بلد تانية وكون أسره
تانية .. ووقت ما حب ينزل مصر افكر انه له بنت مخلفها .. ده واحد
ميستحقش انه يكون أب

قالت "سمر" باكيه :

- وأنا قولتلك انى مستعده أسامحه .. انتى متعرفيش احساسى وأنا عايسة
وعارف ان ليا أب وناسيني ومبيسالك عليا .. ليه ما قولتليش وقت ما

اتصل يا ماما .. ليه .. كان من حقى أعرف

ثم قالت كأنها تحدث نفسها :

- يعني لما اتصل بيكي كنت أنا عندى 15 سنة ولا 16 سنة .. كان ممكن

تريحيني وتقوللى على الأقل انه اتصل بيا .. انه سأل عنى .. بدل ما

تسيبنى أتعذب كده

ثم نظرت اليه وهتفت :

- حرام عليكى ليه تحرميني منه

قالت أمها بغضب :

- هو اللى حرمك منه مش أنا

قالت "سمر" بعتاب :

- انت بصيتى لكرامتك يا ماما ولزعلك منه لكن مبصتيش اذا كنت أنا

محتاجه فى حياتى ولا لأ .. مش من حقك تحرميني منه طالما طلب

يشوفنى .. أى زوج وزوجة لما ينفصلوا عن بعض المفروض ميدخلوش

ولادهم فى خلافاتهم .. هما ملهمش ذنب .. حتى لو الأم كرهت الأب والأب

كره الأم ولادهم هيفضلوا يحبوهم هما الاتنين .. وهيفضلوا محتاجينلهم

هما التنين .. وحرام واحد فيهم يحرم التانى من ولاده .. حرام .. كان لازم

تبصلى أنا وتهتمى بمشاعرى أنا مش بمشاعرك انتى .. كان لازم تشوفى

أنا محتاجه بابا ولا لأ .. عايزه أشوفه ويشوفنى ولا لأ .. حتى لو انتى

كرهتیه أما مش هقدر أكرهه أنا بجنبه حتى من غير ما أشوفه .. حرام

عليكى اللى عملتیه فيا

ثم قالت باكية :

- انتى كده قاطعه للرحم يا ماما .. بعدتيني عن بابا طول السنين دى ..

عارفه ربنا بيقول ايه عن قاطع الرحم .. "وَالَّذِينَ يَنْقُضُونَ عَهْدَ اللَّهِ مِنْ
بَعْدِ مِيثَاقِهِ وَيُقْطَعُونَ مَا أَمَرَ اللَّهُ بِهِ أَنْ يُوصَلَ وَيُفْسِدُونَ فِي الْأَرْضِ أُولَئِكَ
لَهُمُ اللَّعْنَةُ وَلَهُمْ سُوءُ الدَّارِ"
ثم قالت :

- عارف النبي صلى الله عليه وسلم بيقول ايه .. "إن أعمال بني آدم
تعرض على الله تبارك وتعالى عشية كل خميس ليلة الجمعة فلا يقبل عمل
قاطع رحم"

تنهدت أمها بأسها وهى مطرقة برأسها مغمضة العينين تشعر بالوهن ..
ربتت "سمر" على ظهرها قائله بقلق :
- ماما انتى كويسة ؟

أومأت برأسها دون أن تفتح عينيها .. لحظات وهضت وخرجت من الغرفة
.. أسندت "سمر" برأسها الذى أصابعه الصداع الى وسادتها وهى تفكر
فى أسى فى اعترافات والدتها التى لم تكن تتوقعها قط .. عادت والدتها
حاملة هاتفها .. أعطتها لها قائله :

- ده رقمه .. احتفظت برقمه .. معرفش ليه احتفظت بيه .. بس وقتها كان
التليفون فيه اظهار .. ولقيت نفسى بحتفظ بالرقم وبكتبه عندى فى ورقة
ثم قالت :

- معرفش لو اتصلتى هتلاقى حد يرد عليكى ولا لا .. أنا مجربتش أتصل
ببيه أبداً

تركتها أمها وأغلقت الباب خلفها .. نظرت "سمر" الى رقم الهاتف
المدون فى هاتف والدتها .. هذا هو الخيط الوحيد الذى قد يصلها بوالدها
مرة اخرى ..

ترى تأخذ تلك الخطوة وتهاتفه .. لم تحتاج وقتاً للتفكير .. اتصلت بأيدي
مرتعشة وبقلب وجل ومشاعر مضطربة .. سمعت الرنين كالطنين فى
أذنها .. ممل .. رتيب .. ثم :
- ألو

صوت رجولى .. لم تستطع أن تتبين إن كان صغيراً أم كبيراً .. رد الصوت
مرة أخرى :

- ألو .. ألو
صوته أجش .. مازالت لا تستطيع تحديد سنه .. أغلق الخط ! .. حاولت
الاتصال مرة أخرى :

- أيو .. مين بيتصل .. الخط مفتوح رد
تنحنحت وقالت بصوت خافت جداً :

- ألو
- أيوة .. مين ؟
لا تعرف ماذا تقول .. لا تعرف إن كان والدها أم لا .. قالت بصوت مرتجف مضطرب :

- أنا .. أنا "سمر" .. ممكن أكلم
أرادت أن تقول بابا لكنها لم تستطع .. اغرورقت عيناها بالعبرات .. لم تنطق تلك الكلمة قط .. لم توجهها الى رجل قط .. كيف تنطقها الآن .. قال بصوت يبدو عليه آثار البكاء :

- أنا كنت عايزة أتكلم مع الأستاذ
لم تكمل حديثها .. قاطعها الرجل قائلاً :

- "سمر" !

حاولت السيطرة على ارتجافة صوتها وهي تقول :

- أنا .. أيوة اسمي "سمر" .. أنا لو سمحت كنت عايزه أتكلم مع الأستاذ "....." .. هو موجود ؟
لم تجد رداً .. فقط تستمع الى صوت تنفسه المضطرب .. فقالت بتوتر :

- أنا معرفش اذا كان ده رقمه ولا لا .. الرقم قديم يعني
قطعت حديثها عندما سمعت الرجل يجهش في البكاء وهو يهتف باسمها قائلاً :

- "سمر" .. انتي "سمر" .. بنتي ؟
تساقطت عبراتها وعلاات الألم على وجهها .. أغمضت عينيها بشدة وصوته يسرى في أذنيها لأول مرة .. قال بلهفة :

- "سمر" .. اتكلمى .. انتي "سمر" بنتى مش كده ؟
قالت من بين شهقاتها :

- أيوة

قال بصوت حمل كل معانى الشوق والهفة والحنين :

- يا حبيبتي .. وحشتيني أوى أوى .. "سمر" اتكلمى عايز أسمع صوتك ثم أجهش في البكاء مرة أخرى .. قالت :

- انا مكنتش أعرف انك اتصلت بيا .. انا كنت فاكرة
قاطعها بلهفة :

- انتي فين يا "سمر" .. عايز أشوفك .. أرجوكى يا بنتى .. نفسى أشوفك .. قوليلى مكانك يا "سمر" .. عشان خاطرى قوليلى مكانك
قالت بسعادة من بين بكائها ودموعها وهي لا تصدق لهفته على رؤياها وعلى الحديث معها وعلى القدوم اليها :

- أنا فى العين السخنة .. فى قرية اسمها الماسة .. أنا
صمتت لبرهه ثم قالت :
- أنا فرحى بكرة
ثم أجهشت فى البكاء قائله :
- ونفسى أشوفك أوى
قال بصوت مرتجف :
- وأنا كمان نفسى أشوفك .. أنا هجيلك النهاردة .. ينفع يا بنتى ؟ .. ينفع
أجيلك دلوقتى ؟
قالت بلهفة :
- أيوة . أيوة ينفع .. تعالى .. هستناك
قال وضحكاته تختلط ببكائه :
- طيب ادينى رقمك .. لو معاكى موبايل ادينه رقمه
أملته "سمر" هاتفها .. فوجدت رقماً يتصل بها فقال بلهفة :
- ده رقمى .. ماشى .. عشان لو معرفتش أوصل هكلمك .. انا جايك حالاً
يا "سمر" .. ماشى يا بنتى .. حالاً هجيلك
ابتسمت قائله وهى تمسح العبرات التى تغرق وجهها :
- ماشى مستنياك
أنهت المكالمة والتفتت لتجد والدتها واقفة أمام الباب وقد استمعت
للمكالمة وعبراتها فى عينيها .. نظرت اليها "سمر" بأسى ثم قامت
لترتمى فى أحضانها وهى تقول :
- مش قادرة أستنى لبكرة قولتله ييجي دلوقتى .. عشان خاطر
متزعلش بس أنا بحبك وبحبه برده .. ومش عايزة أبعد عن حد فيكوا ..
متزعلش منى
ربت أمها على شعرها وقبلت رأسها قائله :
- مش زعلانه منك .. انتى اللى متزعلش منى
قبلتها مرة أخرى فنظرت اليها "سمر" بفرح وهى تقول بلهفة :
- انا مش مصدقه انى خلاص هشوفه .. ألبس ايه .. تعالى قوليلى ألبس
يه .. طيب هو كان بيحب ايه عشان أعملهوله على ما ييجى
ابتسمت أمها من بين دموعها وهى تنظر الى ابنتها ولهفتها على ملاقة
أبيها .. شعرت وقتها الندم الشديد لحرمانها من بعضهما طيلة الأعوام
الماضية .. من أجل الثأر لكرامتها الجريئة .. كان يجب أن تبدى مصلحة
بنتها ومشاعرها على مصحتها وهى ومشاعرها هى .. تنهدت فى أسى
وهى تستغفر ربها على ما فعلت فى حق ابنتها الوحيدة

وقفت "سمر" فى الشرفة تنتظره .. اتصلت به مالا يقل عن 7 مرات .. كانت مطمئن عليه على الطريق فى هذا الوقت من الليل .. وكانت تتخذها ذريعة لسماع صوته .. لم تفارقها ابتسامتها ونظرات عينيها الملهوفة .. قفز قلبها من مكانه حتى كاد أن يصم أذنيها لقوة ضرباته عندما علمت بأن على مشارف القرية .. ارتجفت يديها وشفتيها وهى تتطلع الى الطريق أسفل البناية .. لمحت سيارة تعبر الممر أمام البناية لتتوقف عندها .. خفق لبها بقوة وهى تنظر الى الأسفل الى ذلك الرأس الذى خطه الشيب الذى نزل من تلك السيارة .. قبل أن يدخل البناية رفع رأسه عالياً .. تلاقت نظراتهما الملهوفة .. تأملت وجه أبهيا من ذاك الارتفاع وهى لا تتحمل تلك اللحظات التى تفصلها عن القاء نفسها بين أحضانه .. دخل البناية فاتجهت الى الباب تهوول مسرعة .. دخلت والدتها غرفتها وأغلقت الباب .. بقيت خلفه تستمع الى ما يحدث .. فتحت "سمر" الباب وعيناها معلقة على المصعد تنتظر خروده .. انفتح باب المصعد .. لظهر أمامها رجل وقور قد بلغ من الكبر عتياً .. خطت سنوات العمر بيديها فوق جبينه وعلى جانبي رقبته .. يبدو على وجهه آثار الإجهاد .. لكن عينيه تعلقتا بها فى لهفة .. شعر لوهلة بالخجل .. فذاك الرجل والدها لكنها لم تراه أبداً .. لا تذكره أبداً .. شغرت بشئ من الغربة .. لكن ذاك الإحساس تلاشى بعدما رآته يجهد فى البكاء وهو يتطلع الى وجهها بلهفة .. دمعت عيناها هى الأخرى .. لم ينتظر أكثر ليأخذها بين ذراعيه ضاماً اياها بقوة الى صدره .. شعرت بقوة ضمته اليها فأغضت عينيها تتساقط العبارت منهما .. تلف يديها حول عنقه بقوة وكأنها تخشى أن يفارقها مرة أخرى .. كان تنفسها يتقطع من قوة ضمته .. بدا وكأنه لا يستطيع السيطرة على مشاعره التى فاضت حتى أغرقته وأغرقتها .. أبعدا عنه أخيراً لينظر الى وجهها الذى يراه لأول مرة منذ أن تركها رضية فى مهدها .. ارتجفت شفاته وهو يقول :

- "سمر" .. كبرتى .. كبرتى وبقيتى وعروسة جميلة

أجهشت فى البكاء مرة أخرى .. قال بألم ومرارة :

- سامحيني أنا آسف .. والله أنا ندمان فوق مالا تتصورى .. ندمان انى

سببتك ومشيت .. ندمان انى دورت على نفسى وبس .. ندمان انى كان

قلبي قاسى وجاحد .. حققت كل اللى سافرت عشانه .. بس مرتحتش ..

مرتحتش أبداً .. كنت طايش لأبعد حد .. هربت من المسؤولية .. بس

للأسف فوقت متأخر .. ولما حبيت أرجعك لحضنى معرفشت .. سمحيني يا

بنتى

عانقته "سمر" مرة أخرى مغمضة عينيها . لم تكن تبغى العتاب .. لم تكن تبغى فى الحديث عما مضى .. لم تكن تبغى سوى ذاك الحزن والإحساس بالأمان الذى افتقدته طيلة عمرها .. لم تشعر سوى بشئ واحد .. الآن هى فى أحضان والدها .. فلا شئ يهم سوى ذلك !

ارتدت "سمر" فستان زفافها ونظرت الى نفسها فى المرآة .. كانت تحلم بذلك اليوم منذ أن كانت صبية .. كانت تعلم بأنها ستكون سعيدة فى يوم عرسها كملايين البنات .. لكنها لم تتوقع أن فرحتها يتكون بهذا الشكل .. فرحتها بزواجها ممزوجة فرحتها لوجود أبيها بجوارها .. ولياً لأمرها .. يضع يده فى يد "زياد" ليزوجها له .. حاول كثيراً تبرير ما فعل .. والحديث فيما مضى .. لكنها رفضت الحديث عن أى شئ فات أو انه .. طوت هذه الصفحة تماماً .. لم تطويها فقط بل مزقتها وألقته خلف ظهرها .. لا يهمها ما فات .. المهم أنه معها وبجوارها .. وعدها بأن يعرفها على اخوتها من زوجته .. اخبرها أن لها أخاً وأختين .. سعدت لذلك بشدة .. لطالما حلمت بأن يكون لها اشقاء وشقيقات .. أرادت التعرف عليهم بشدة .. أرادت أن تندمج فى حياة أبيها .. دون ان يؤثر ذلك على مشاعرهما تجاه أمها .. فتلك نقرة وتلك نقرة أخرى .. هذه أمها وهذا أبيها .. ليس شرطاً أن تخسر واحد منهما لتكسب الآخر .. بس تري أن تكسب كليهما .. فكل منهما تحمل نصف جيناته .. وكل منهما أعطاهما سبباً للوجود فى هذه الحياة .

سعد "زياد" بشدة من أجلها .. لم يرها سعيدة بهذا الشكل .. توجهها الى عشهما السعيد .. نظرت اليه "سمر" بحب وثقة وحنان كما لم تنظر اليه من قبل .. بدت مرتاحه بشكل كبير وكأنها كانت تحمل عبئاً ثقيلاً أزاحته أخيراً من فوق كتفيها .. عانقها "زياد" طويلاً يبتها حنانه .. يشعرها بأنه معها الآن وغداً وللأبد .. وبأنها شريكة حياته ونصفه الآخر الذى لا يستطيع أن يفصل عنه قط .. فبدءا حياتهما الزوجية بفرحة وسعادة وكل منهما يعد الآخر بأن يكون الحزن الدافئ له .. ومصدر أمنه وأمانه !

*

فتحت "مديحة" الباب وابتسمت فى وجه "على" قائله :

- ازيك يا "على" .. اتفضل يا حبيبي
دخل "على" قائلاً :
- ازي حضرتك أخبارك ايه
قالت وهي تغلق الباب خلفه :
- كويسة يا حبيبي الحمد لله ازي ماما و "إيمان"
ابتسم قائلاً :
- بخير الحمد لله
أشارت الى حجرة الصالون فجلس واضعاً ما يحمله بيده فوق الطاولة ..
دخلت "مديحة" غرفة "أسماء" قائلة :
- "أسماء" على جه ومستنيكي بره
هبت من فراشها قائلة بدهشة :
- "على" ! .. بس مقاليش انه جاى
ضحكت "مديحة" وقالت :
- عادى يعني هو غريب .. يلا البسى واطعليه
ارتدت "أسماء" ملابسها .. استقبلها "على" ببشاشة .. ضحكت قائلة :
- ايه المفاجأة الحلوة دى
جلست بجواره فقال :
- كنت قريب من هنا قولت أعدى عليكى وكمان أعملهاك مفاجأة
اتسعت ابتسامتها .. اخرج "على" من جيبه علبة من القطيفة واعطاها
اياها قائلة بابتسامه عذبه :
- شوفى كده ذوقى هيعجبك ولا لأ
نظرت الى العلبة بدهشة ثم فتحتها لتجد خاتماً ذهبياً .. اتسعت ابتسامتها
وهي تقول بسعادة :
- الله .. حلو أوى يا "على"
اتسعت ابتسامته هو الآخر وهو يرقب تلك السعادة على وجهها وقال :
- طيب الحمد لله ان ذوقى عجبك
نظرت اليه بحب قائلة :
- أصلاً ذوقك بيعجبني على طول
ثم قالت بمرح :
- مش اخترتنى بباه لازم يكون ذوقك حلو .. هو فى أحلى منى
اختفت ابتسامته وتحدث بجدية قائلة :
- انتى فعلاً يا "أسماء" جميلة .. مش بس بشكلك .. لأ كمان بروحك
وبطيبة قلبك .. عارفه .. أنا كنت ببعد عن أى علاقه حرام أو أى حاجة

تغضب ربنا وكنت دائماً بدعى ربنا انه يرزقنى بزوجة طيبة أحبها فى
الحلال وتدخل قلبى .. والحمد لله ربنا رزقنى بيكى
اختفت ابتسامة "أسماء" وشردت وفى عينيها نظرة أسى .. قام "على"
وجلس بجوارها على الأريكة ينظر باهتمام الى لمعة عينيها قائلاً :
- مالك يا حبيبتي . أنا قولت حاجة ضيقتك
هزت رأيتها نفيماً وتلك اللمعة تتزايد فى عينيها .. وضع يده على ظهرها
وهو يقول :

- لأ فى حاجة مضايقاتى .. كده تخبى عنى .. مش اتفقنا نكون صرحا مع
بعض

نظرت اليه بأسى .. فقال متظاهراً بالغضب :
- على فكرة لو ما قولتليش مالك هزعل منك بجد .. لانك كده بتعملى فرق
بيننا .. مش قولنا اننا خلاص بقينا واحد يا "أسماء" .. ولا نسيتى كلامنا
قالت وعبراتها تتساقط :

- لأ منستش
ربت على ظهرها بحنان وهو يقول :
- طيب قوليلي مالك .. ايه اللي ضايقتك
مسحت عبراتها وهى تنظر الى يديها قائلة :
- افكرت حاجة ضايقتنى
- ايه هى ؟

تساقطت عبراتها وجسدها ينتفض بخفوت .. أحاطها "على" بذراعه
وهمس فى أذنها بحنان :

- حبيبتي اتكلمى معايا .. قوليلي مالك
نظرت اليه بأعين دامعه قائلة :
- كان فى حاجة نفسى أقولها لك من زمان يا "على" .. بس "آيات"
قالتلى ما أقولش .. وان دى حاجة مش ذنبى .. وانى أستر على نفسى ..
بس أنا مش قادرة أخبى عليك .. مس بحب أخبى حاجه عنك
تجمدت الدماء فى عروقه وهو ينظر اليها وقد غارت عيناه .. اضطرب
تنفسه وهو يسألها بخفوت :

- فى ايه يا "أسماء" .. ايه اللي كنتى مخبياه عليا
أجهشت فى البكاء وهى تنظر اليه قائلة :
- فاكّر لما قولتلى انك مبتعملش حاجة غلط مع أى بنت عشان ربنا
يحافظك على البنت اللي هتكون مراتك
نظر اليها دون أن يرد فأكملت باكية :

- من يومئذ وأنا عايزه أقولك .. بس شوية أخاف وشوية أتردد .. خايفة
من رد فعلك .. بس بجد مش قادرة أخبى عليك .. حسه انى محتجالك أوى
تساعدنى انى أنسى .. محتجالك تقولى كلام يخفف عنى
جف حلقه .. ولكنه تحدث بهدوء حازم قائلاً :

- اتكلمى يا "أسماء"

أطرقت برأسها وأغمضت عينيها للحظات .. ثم .. قصت عليها ما صدر من
"هانى" من تحرشات .. وما قاسته وعانت منه فى بيت جدها من خالتها
واتهاماتها وطعنها فى عرضها .. انتهت من حديثها .. صمتت .. لا تجرؤ
على النظر الى وجهه .. أخذت تفرك كفيها بعصبيه .. وهى تنظر أرساً ..
تعلم أنها لربما أخطأت بالحديث معه .. واخباره بكل شئ .. لكنها لم
تستطع أن تخفى عنه .. وأن تكتم بداخلها تلك الذكرى التى تورق
مضجعتها .. طال صمته .. بدأت فى بكاء مكتوم .. ارتعشت يديها وهى
تخشى أن تسمع منه الآن كلمة تنهى كل أحلامها .. وتحطم قلبها ..
استغفرت الله فى سرها .. الى أن وجدته فجأة يجذبها الى صدره لافاً
ذراعيه حولها .. أجهشت فى البكاء بصوت مرتفع وكأنها تخرج شئ
حبيس بداخلها لم تعد تقوى على بقاءه .. كانت أمها تستمع الى حديثها
جون أن تظهر واضحة للعيان .. أخذت تبكى بخفوت وهى تستشعر الجرم
الذى شاركت فيه .. ومدى ما أوقعت على ابنتها من ظلم ومعاناة .. همس
"على" قائلاً :

- عيطى .. خرجى كل اللى جواكى لحد ما تحسى انك مرتاحه خالص
لم تتوقف عن البكاء الا حينما شعرت بأنها أفرغت كل ما بداخلها من ألم
وقهر .. رفعت رأسها تنظر اليها .. مسح عبراتها بحنان وهو يقول :
- قومى اتوضى وصللى ركنتين هتحمسى انك أحسن
تأملت تعبيرات وجهة الحانية وهى تقول بصوت مبسوح :

- يعنى مش زعلان منى

هز رأسه نفيماً .. قالت بأسى :

- بس انت كدة ربنا محافظش على مراتك زى ما كنت عايز .. انت كان
المفروض تتجوز واحدة أحسن منى

رأت الحزن فى عينيه وهو يقول هامساً :

- مش يمكن دى غلطة ربنا عاقبنى عليها

نظرت اليه بعدم فهم قائله :

- مش فاهمة تقصد ايه

غير الموضوع على الفور .. وتنهى قائلاً :

"آدم" جزء من طرحة فستانها ليغطي به وجهها الذي زينته بقرقه ..
ليخفى جمالها وسحرها عن الأعين المتلصصة .. فذاك الجمال وتلك
المفاتن من حقه هو فقط .. ذهبا الى قاعة الفرح .. فساعدتا "سمر" على
خلع الكاب وعلى ضبط الطرحة .. ليبدأ الاحتفال بالعرس السعيد

دخلت "آيات" بيتها الجديد مع زوجها الحبيب وهي تدعو الله أن يديم
فرحها ويبارك في زواجها .. وقف "آدم" أمامها مبتسماً .. ابتسمت له في
رقه ونعوده .. وضع يده على جبينها ودعا قائلاً :
- اللهم إني أسألك خيراً وخير ما جبلتها عليه وأعوذ بك من شرها ومن
شر ما جبلتها عليه

عملاً بقول النبي صلى الله عليه وسلم " إذا تزوج أحدكم امرأة أو اشترى
خادماً فليقل اللهم إني أسألك خيراً وخير ما جبلتها عليه وأعوذ بك من
شرها ومن شر ما جبلتها عليه "
اتسعت ابتسامته وهو ينظر إليها بحب قائلاً :

- مبروك يا حبيبتي .. أخيراً بقيت في بيتي
بدلاً من ملابسهما واستعدا لصلاة ركعتين يؤمها "آدم" فيهما .. اتسعت
ابتسامتها وهي تبادلته نظراته المحبة الشغوف .. حمد الله في نفسه ان
يسر له أمر زواجه .. وأن سخر له "كريم" الذي ساعده وقدم له تلك
السلفة التي أعانتها على اتمام تجهيز بيتها .. شعر بكرم الله عليه .. فحمده
كثيراً .. نظر الى زوجته في سعادته .. تهيأت له وأقبل عليها .. لكن ..
وعلى الرغم من نسيانها لذلك الأمر لفترة طويلة .. قذف الشيطان في
نفسها تلك الذكريات المريرة .. والأفعال القبيحة التي آتاها "آدم" قبل
توبته .. انزوت مبتعدة عنه .. والأسى على محياها و الألم في عينيها .. لم
تستطع النظر اليه .. أو التبرير .. نظر اليها متأماً .. متخوفاً .. قلقاً .. الى
أن تتم بخفوت :

- أنا كنت شاكك .. ودلوقتي اتأكدت .. انتى لسه مسمحتيش يا "آيات"
اغمضت عينيها دون أن تجد كلمات تقولها .. وكأن الكلمات هربت منها ..
نهض عنها وخرج من الغرفة .. جلست تبكى وتستغفر .. الى أن أفاقت
لنفسها .. حدثت نفسها .. ماذا تفعلين يا "آيات" .. كيف تسمحين
لوساوس الشيطان أن تتلاعب بك .. ألا تعلمين أن ابليس يضع عرشه
على الماء ويقدم كل شيطان تقريراً عما عمله في يومه من شر وأذى ..
وأكثر تلك الشياطين قرباً من ابليس هو ذاك الذى يستطيع أن يفرق بين
الرجل وزوجته .. هذا الشيطان يحبه ابليس كثيراً ويمجده ويعظمه على
صنيعه .. فلا شئ من الأفعال الشنيعة والمريعة أحب الى ابليس من أن

يتخاصم زوجان ويفترقا .. ويسمحان للشيطان بأن ينفث سمومه فى
أذنيهما وقلبيهما .. فيستسلمان لوساوسه .. ويهدمان بيتهما بأيديهما ..
لامت نفسها بشدة .. استغفرى ربك يا "آيات" .. واستعيذى به من
الشيطان الرجيم .. ذاك الشيطان الذى بدأ عمله سريعاً فى الإيقاع بينك
وبين زوجك ومن أول ليلة فى زواجكما .. واعلمى يا "آيات" أن تلك لن
تكون الأخيرة .. بل هى البداية .. فعليك دائماً أن تحصنى نفسك حتى
تصدى ذاك الماكر عن الوسوسة فى أذنيك .. ستصديه بإيمانك وبإستعانتك
بالله عز وجل .. لن تسمحى لوساوسه بأن تؤثر على حياتك الزوجية ..
كلما ذكرك بمساوئ زوجك ستتذكرين أنت محاسنه .. كلما ذكرك بتلك
اللحظة التى أغضبك فيها زوجك ستتذكرين أنت اللحظات الكثيرة التى
رسم فيها البسمة على شفتيك .. كلما ذكرك بذنوبه ستتذكرين أنت توبته ..
كلما ذكرك بجفائه ستتذكرين أنت حبه وحنانه

نهضت "آيات" ودخلت الى الحمام تغسل وجهها .. ثم عادت الى غرفة
النوم وترينت ببعض المساحيق الخفيفة .. خرجت تبحث عن "آدم" ..
وجدته فى غرفة المعيشة واقفاً يصلى .. وقفت خلفه .. تنظر اليه .. رآته
وهو يهوى ساجداً .. لحظات وبدأ جسده فى الإنتفاض .. بكى "آدم" فى
سجوده وهو يسأل الله أن يغفر له ذنبه .. دعاه ألا يكون نفور زوجته منه
الآن من شؤم المعصية التى ارتكبها .. علم فى قراره نفسه أن من تعجل
الشئ قبل أوانه عوقب بحرمانه .. لكنه أحسن الظن بالله أن يرفع عنه تلك
العقوبة .. وأن يصرف النفور من نفسه زوجته وحبيبته .. انتهى من
صلاته وشعر بسكينه بداخله .. مسح وجهه بكفيه .. ثم نهض والتفت ليجد
"آيات" واقفه خلفه وهى تنظر اليه بحزن .. اقترب منها وحاول رسم
بسمة على ثغره .. يعلم ما تشعر به .. هو المخطئ .. هو السبب .. لذلك لا
يستطيع لومها .. ابتسمت له .. بعذوبه .. ورقه .. ونظرت اليه بحب ..
اختفى الحزن من عينها .. وأقبلت نحوه تلقى بنفسها بين ذراعيه .. سكن
للحظة ثم لفها بذراعيه يضمها اليه بشدة وهو يستنشق عبير شعرها الذى
يلامس وجهه .. رفعت رأسها ونظرت اليه وقال :

- مش عايزين الشيطان يدخل بينا .. ماشى
نظر اليها متأملاً .. ابتسم وهو ينظر اليها بحنان جارف .. يحتويها
بنظراته قائلاً :

- ماشى

قالت بحزم وهى تنظر فى عمق عينيه :

- أنا سمحتك يا "آدم" .. خلاص هنقفل الصفحة دى ونرميها ورا ظهرنا

.. مش هنتكلم فيها تانى .. متخليش الشيطان يشكك فى انى سامحتك ..
ماشى ؟

اتسعت ابتسامته ومسح على شعرها بحنان قائلاً :

- ماشى

: همست

- بحبك

: همس

- بحبك

لأول مرة يردد كلاهما "بسم الله اللهم جنبنا الشيطان وجنب الشيطان ما رزقتنا" .. عملاً بقول النبي صلى الله عليه وسلم "لو أن أحدكم إذا أراد أن يأتي أهله قال : "بسم الله ، اللهم جنبنا الشيطان وجنب الشيطان ما رزقتنا" ، فإذا قدر بينهما ولد لم يضره الشيطان أبداً" .. أشعره الحلال بقبح ونجاسة الحرام .. واستقزار الفعل والمفعول به .. مر على ذهنه حديث النبي صلى الله عليه وسلم "وَفِي بُضْعِ أَحَدِكُمْ صِدْقَةٌ" .. قَالُوا: يَا رَسُولَ اللَّهِ، أَيَاتِي أَحَدُنَا شَهْوَتُهُ وَيَكُونُ لَهُ فِيهَا أَجْرٌ؟ .. قَالَ: "أَرَأَيْتُمْ لَوْ وَضَعَهَا فِي حَرَامٍ أَكَانَ عَلَيْهِ فِيهَا وَزْرٌ؟ فَكَذَلِكَ إِذَا وَضَعَهَا فِي الْحَلَالِ كَانَ لَهُ أَجْرٌ" .. فهذه الطاهرة زوجته وحلاله وكلما أتاها أخذ أجراً .. ابتسم يقبل جبينها .. الآن فقط .. شعر بأن الله راضى عنه .. لأن من علامات رضى الله عن العبد أن يوفقه لفعل الخيرات .. واجتناب المحرمات .. "رَضِيَ اللَّهُ عَنْهُمْ وَرَضُوا عَنْهُ ذَلِكَ لِمَنْ خَشِيَ رَبَّهُ" .. نامت ملء جفونها فى أحضان زوجها الذى أخطاها بذراعيه فى حنان.

فى أحد الأيام .. شعر "آدم" بشئ ناعم يلامس وجنته وبهمسات رقيقه :

- "آدم" .. "آدم"

فتح عينيه ببطء ليطلع وجه "آيات" المبتسم .. همست بعذوبه :

- حبيبي قوم اتأخرت على الشغل

تمطع فى فراشه ثم نظر اليها مبتسماً وهو يفتح عينيه بصعوبه .. نهض

من فراشه وتوجه الى الحمام بينما توجهت "آيات" الى المطبخ لتعد

مائدة الفطور .. خرج يجفف شعره ونظر اليها مقبلاً اياها قائلاً :

- صباح الخير

ابتسمت فى وجهه :

- صباح النور

التفا معاً حول مائدة الطعام .. فتمتم كلاهما :

- بسم الله

قالت "آيات" وهى تضع احدى اللقيمات فى فمها :

- بفكر ما أروحش الغسل النهاردة

نظر اليها "آدم" قائلاً :

- براحتك .. أصلاً الفترة دى مفيش ضغط كبير فى الشغل

أومأت برأسها وقالت بمرح :

- أهأا ما أنا عارفه عشان كده قولت أدلع ومروحش الشغل

ضحك قائلاً :

- ماشى يا ستى ادلعى براحتك

انتهيا من طعامهما فردد كل منهما :

- الحمد لله الذى أطعمنى هذا و رزقنيه من غير حول منى ولا قوة

انتهى "آدم" من ارتداء ملابسه بينما كانت "آيات" تنظف حذاءه ..

توجه الى الباب وارتدى حذاؤه فقبلته مودعه وابتسامه حانية على ثغرها

وقالت :

- خلى بالك من نفسك

توجهت "آيات" الى المطبخ لتنظيف الاوانى المتكدسة من تحضير

الفظور .. انتهت من عملها فى جلى الصحون وبدأ فى الإعداد لطعام

الغداء بينما كانت ترتب المنزل وتنظفه .. قبل قدوم "آدم" بنصف ساعة

توجهت الى غرفتها لتتنقى شيئاً آخر ترتديه .. زينت وجهها بنعومة

وأسدلت شعرها فوق كتفها .. أعدت المائدة ونظمتها وأضافت بعض

اللمسات الرقيقة .. عاد "آدم" من عمله لتستقبله ببشاشه .. بدا عليه

الإرهاق فعاونته على تبديل ملابسه وهى تسمعه كلماتها الرقيقة الحانية

التتخفف عنه تعب النهار من أجلها .. التف معاً حول مائدة الطعام .. أشاد

"آدم" بطعامها فاتسعت ابتسامتها .. قال "آدم" :

- على فكرة فى حاجة أنا عملته وواثق انها هتفرحك

تركت ملعقتها ونظرت اليه قائله بلهفة :

- ايه هى

اسند مرفقيه فوق الطاولة ونظر اليها بمرح قائلاً :

- أنا وعدتك لما الظروف تتحسن نطلع رحلة شهر غسل مش كده

قالت على الفور :

- يا حبيبى أنا مش عايزة حاجه .. وبعدين مش محتاجين رحلة شهر غسل

ولا حاجة ده احنا عايشين فى العين السخنة .. الناس بتيجي هنا لشهر
العسل

اتسعت ابتاسمته وهو يقول بتحدى :

- بس المكان اللى احنا هنروح له لو عرفتيه مستحيل تقولى كده
نظرت اليه باستغراب قائله :

- ايه هو طيب

تأملها قائلاً :

- هنعمل عمره سوا

اتسعت عيناها وهتفت بسعادة :

- بتتكلم بجد .. بجد يا "آدم"

أوما برأسه فهبت واقفه تحتضنه وهى تقول :

- ياه كان نفسى أوى أعمل عمره تانى .. بجد ربنا يباركك يا "آدم" .. أنا
فرحانه أوى .. دى ألى رحلة بجد

جلست مرة أخرى على مقعدها فقال "آدم" ببشاشه :

- ان شاء الله هقولك المعاد بس عامة حضرى نفسك من دلوقتى .. وان

شاء الله ماما طالعة معانا هى كمان كان نفسها تعمل عمره من زمان
أخذت تتذكر المرة الأولى والوحيدة التى ذهبت فيها الى العمرة مع والدها
الحبيب رحمه الله .. وكيف كانت سعادتها لزيارة تلك البقعة المباركة ..

وكم تمننت من يومها العودة الى ذاك المكان مرة أخرى .. انتهاء من تناول

طعامها .. همت بأن تنهض لتحمل الأطباق الى المطبخ .. لكن "آدم"

اوقفها وأمسك بيدها .. وأخذ ينظر الى أصابعها والتى علق بها بعض

الطعام .. ثم .. قربها الى فهمه وهو ينظر اليها وأخذ يلحق صابغاً تلو

الآخر تحت أنظارها وقد اتسعت ابتسامتها وضحكت بخفوت .. عملاً بقول

النبي صلى الله عليه وسلم "إذا أكل أحدكم طعاماً فلا يمسح يده حتى

يلعقها أو يلعقها"

انتهت من جلى الأواني لتجلس مع زوجها فى حجرة المعيشة يقرآن فى

أحد التفسيرات .. فمئذً زواجهما اتفقا على أن يقرأها كل يوم آيه واحده

بتفسيرها .. سيأخذان وقتاً طويلاً لنهاية سورة واحدة .. لكنهما اتفقا على

أن قليل متصل خير من كثير منقطع .. كانت "آيات" تستمع فى استكانه

الى قراءة "آدم" من كتابة التفسير وشرحه للمعنى .. تدبراً الآية ولسان

حالتها يقول : سبحان الله .. سُمع المنادى فى المسجد القريب يؤذن للصلاة

فنهض "آدم" وتوضأ وشيعته بابتسامتها ثم ارتدت اسدالها لتؤدى

فريضتها .

تعالت ضحكاتها وهما جالسان معاً على الأريكة يشاهدان أحد المقاطع المضحكة .. نظر "آدم" اليها يتأمل ضحكته وبسمتها التي لا تفارق محياها كلما كان فى البيت .. قربها منه وقبل جبينها .. نظرت اليه .. لتروى لها عيناه الشغوفتان ما يحدثه به قلبه من أحاديث خاصة !

أنهت "آيات" عملها المنزلى وتوجهت الى غرفة النوم لتجد "آدم" جالساً فى الفراش يجمع كفيه الى بعضهما البعض ويقرأ فيهما كما كان يفعل النبي صلى الله عليه وسلم .. فعن عائشة أن النبي صلى الله عليه وسلم كان إذا أوى إلى فراشه كل ليلة جمع كفيه ثم نفث فيهما فقرأ فيهما قل هو الله أحد وقل أعوذ برب الفلق وقل أعوذ برب الناس ثم مسح بهما ما استطاع من جسده يبدأ بهما على رأسه ووجهه وما أقبل من جسده يفعل ذلك ثلاث مرات " .. جلست على الفراش بجواره وهى تعدل من وضع الغطاء .. انتهى "آدم" من القراءة فى كفيه وأخذ يمسح على رأسه ووجهه وجسده .. ثم التفت الى "آيات" يمسح بديها رأسها ووجها وجسدها .. ابتسمت له وقبلته قائلة :

- تصبح على خير يا حبيبي

- تصبحى على خير يا حبيبي متنسيش تقولى الأذكار

وضعت "آيات" رأسها على الوسادة وأخذت تتم بشفتيها وتردد أذكار النوم .. ضبط "آدم" هاتفه على ميعاد صلاة الفجر ثم وضع رأسه على وسادته ونام ملء جفونه .

تركت والدة "آدم" العروسين لينعمان ببعض الوقت بمفردهما قبل أن تنتقل للعيش معهما بعد اصرار "آدم" و"آيات" على ذلك .. وأمضت وقتها مع والدة "سمر" التى باتت تعيش بمفردها هى الأخرى .. تقاربت المرأتان وكانت كل منهما للأخرى سلوى وأنيساً

حمد "آدم" ربه أن رزقه هذه العمرة وكذلك فعلت والدته و"آيات" وهم جالسون معاً على متن الطائرة المتوجهة الى المدينة .. نظرت "آيات" من النافذة فى لهفة تعد الدقائق التى تفصلها عن أحب الاماكن اللى قلبها .. حطت الطائرة فى مطار المدينة ثم توجهوا الى الفندق لوضع حاجياتهما .. ثم .. توجهوا الى زيارة قبر النبي صلى الله عليه وسلم .. صلوا ركعتين تحية للمسجد فى الروضة الشريفة .. ثم توجهوا الى قبر النبي صلى الله

عليه وسلم .. وقف " آدم " أما القبر وقد جف حلقه .. وأطرق برأسه
يستشعر عظمة هذا القبر الذى يسكنه خير البشر وأكملهم .. يقف الآن
أمام قبر ذلك القائد العظيم والنبي الكريم .. ذلك الحبيب أمامه .. ذلك النور
أمامه .. ذلك الذى تتفطر قداه من قيام الليل أمامه .. ذلك الكريم المعطاء
أمامه .. فسالت دموع " آدم " فرحاً وهيبة .. كم أنت عظيماً يا رسول الله ..
كم عانيت لأصبح أنا الآن مسلماً .. كم قاسيت فى سبيل تبليغ رسالتك .. كم
تألمت و عذبت وشجبت وجنتاك وكسرت رُباعيتك وشج رأسك وسالت
الدماء منك لأصير أنا مسلماً .. كم ضحيت فى سبيل الدعوة لا لشيء سوى
لنشر تلك الرسالة التى ائتمنتك الله عليها .. كم كنت تتألم لموت أحدهم على
غير الإسلام .. كم أحبك يا رسول الله .. يا شفيعي يوم العرض .. لم يراك
أحداً الا وأحبك .. لم يعرفك أحد الا وأحبك .. لم يسمع عنك أحداً الا
وأحبك .. حتى الصخر والشجر أحبوك .. لم أحارب فى أحد .. لم أرحم فى
بدر .. ما هاجرت فى يوم .. ولم أكن من الأنصار .. ولكن يا نبي الله أحبك
.. حبك فى قلبى ألهبه .. أبعدتنى ذنوبى لكن ها أنا جئت اليك أخيراً ..
أتمس الهدى والنور والتقى .. أهتدى بهديك وأسير فى دربك .. أنقذتنى
من كل خبيث وأنرت لى الطريق الى رب العالمين .. وكنت مثال للصادق
الأمين .. كم أتلهف شوقاً لرؤياك .. والنظر الى وجهك الطليق .. والهناء
بالشرب من كفك الطاهرة .. جسدى بجسدك .. عرضى بعرضك .. أفديك
بقلبي وروحي وبكل ما أملك .. ومن غير للشفاعة يملك !
سلم على الرسول الكريم ثم تقدم قليلاً ليسلم على أبى بكر رضى الله عنه ..
وتقدم أكثر ليسلم على عمر رضى الله عنه .. ثم توجهوا الى البقيع للسلام
على أصحاب البقيع وهو يدعو لهم بالمغفرة والرحمة .. كانت سعادة
والدة " آدم " غامرة وبكت تأثراً فكم تمنى تلك الرحلة منذ أمد بعيد وها
هو الله قد رزقها اياها

لم يستطع " آدم " تمالك عبراته التى تساقطت وهو يرى الكعبة لأول مرة
.. وكذلك والدته .. خفق قلبهما كما لم يخفق من قبل .. شعر " آدم " بهيبة
هذا البيت .. وبرهبة كلما اقترب منه .. كان كالفراشة التى تنجذب الى
الضوء رغماً عنها .. لا يحيد عينيه عن الكعبة وكأنه يريد حفر كل
تفاصيلها بداخله .. لمس الحجر الاسود .. عندما تذكر أن فى ذلك حظ
لخطاياها بكى بشدة .. دار فى الطواف ودموعه تغرق وجهه .. أيا رب كم
أنت رحيم .. أذنب وأذنب وأنت تغفر وتغفر .. كم أنت كريم .. كم أنت حلیم
.. شعر وكأن قلبه يُغسل .. وكأن ماء بارد صب عليه من السماء ليغسل
قلبه وينقيه .. لم يشعر بقلبه نظيفاً كما يشعر الآن فى تلك اللحظة .. لم

يشعر بقلبه مرهفاً ورقيقاً كما يشعر الآن في تلك اللحظة .. لم يبكي من خشية الله كما بكى في تلك اللحظة .. ظل يستغفر ويستغفر .. حاول أن يدعو .. ظل يشرد بخياله .. يفكر ما الذي يريده من الله عز وجل ليسأله اياه ؟ .. فكر وفكر .. لم يجد سوى .. الجنة .. تلك آخر آماله ونهاية مبتغاه .. لا يريد سواها .. وبصحبته كل من أحب .. أخذ يدعو أن يكرمه الله بدخولها .. باستنشاق عبيرها .. بالجلوس تحت ظلال أشجارها .. وحوله كل من أحب .. وكل من رافق .. وكل من عرف .. وتوسعت أمانيه ليسأل الله الجنة لكل من قال بقلبه ولسانه .. أشهد أن لا اله الا الله وأن محمداً رسول الله